


Xtidxcoob Dios ni
biädinä dad Jesucrist



New Testament in Zapotec, Mitla (MX:zaw:Zapotec, Mitla)

Xtidxcoob Dios ni biädinä dad Jesucrist

New Testament in Zapotec, Mitla (MX:zaw:Zapotec, Mitla)

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
5cff1274-8dc3-5398-a94d-f6033bb363c9

Contents

San Mateo	1
San Marcos	53
San Lucas	86
San Juan	141
Hechos	181
Romanos	233
1 Corintios	253
2 Corintios	272
Gálatas	284
Efesios	291
Filipenses	298
Colosenses	303
1 Tesalonicenses	308
2 Tesalonicenses	312
1 Timoteo	315
2 Timoteo	320
Tito	324
Filemón	327
Hebreos	328
Santiago	343
1 Pedro	348
2 Pedro	354
1 Juan	358
2 Juan	364
3 Juan	365
Judas	366
Apocalipsis	368

Guijtz Ni Bacuaa Mateo

Retoxpen_{goldoo} Jesucrist

(Lc. 3:23-38)

¹ Guijtz ni rusule' laj retoxpen_{goldoo} xten Jesucrist xi'n toDavid, xi'n toAbraham.

² Abraham gujc xtd Isaac, Isaac gujc xtd Jacob, Jacob gujc xtd Judá con rebejtzni. ³ Judá con Tamar gujc xuczajn Fares con Zara. Fares gujc xtd Esrom, Esrom gujc xtd Aram. ⁴ Aram gujc xtd Aminadab. Aminadab gujc xtd Naasón. Naasón gujc xtd Salmón. ⁵ Salmón con Rahab gujc xuczajn Booz. Booz con Rut gujc xuczajn Obed. Obed gujc xtd Isái. ⁶ Isái gujc xtd reii David. David con nani gujc cháäl Urías gujc xuczajn Salomón.

⁷ Salomón gujc xtd Roboam. Roboam gujc xtd Abías. Abías gujc xtd Asa. ⁸ Asa gujc xtd Josafat. Josafat gujc xtd Joram. Joram gujc xtd Uzías. ⁹ Uzías gujc xtd Jotam. Jotam gujc xtd Acaz. Acaz gujc xtd Ezequías. ¹⁰ Ezequías gujc xtd Manasés. Manasés gujc xtd Amón. Amón gujc xtd Josías. ¹¹ Josías gujc xtd Jeconías con rebetzni cheni huij reben Israel pres lo guedx Babilonia.

¹² Che gudejd huij rebejnğa pres Babilonia, dxejc guyu' xi'n Jeconías, Salatiel. Salatiel gujc xtd Zorobabel. ¹³ Zorobabel gujc xtd Abiud. Abiud gujc xtd Eliaquim. Eliaquim gujc xtd Azor. ¹⁴ Azor gujc xtd Sadoc. Sadoc gujc xtd Aquim. Aquim gujc xtd Eliud. ¹⁵ Eliud gujc xtd Eleazar. Eleazar gujc xtd Matán. Matán gujc xtd Jacob. ¹⁶ Jacob gujc xtd José cháäl Marii nani gujc xnan Jesús ni birilaj Crist.

¹⁷ Ni'cni gujc tzudaj xfamil reni agudejd gubi'reni lo guedxliujre che gubajnlı toAbram cheni gubajnlıza torei David. Tzudajza rexagdoo najc reni gudejd cheni gubajnlı toDavid cheni huijli reben Israel pres Babilonia. Stzudaj rexagdoo najc reni gudejd cheni birilireni pres Babilonia che gojlı Crist.

Cheni gojl Jesucrist

(Lc. 2:1-7)

¹⁸ Scree gujc cheni gojl Jesucrist. Abia'n xnanni, Marii, diidx guchnaani José ni gac cháälni. Per anse xca' sa'reni, Marii agac nuxi'nni sa'csi biäd Sprit Dxaan xten Dios lojni. ¹⁹ José com najcni te bensa'c, di rıajzni nuro'nni Marii nex loj rebejn te niacheereni, ni'c bejnıi xhigab Guřonxhiga'tzni Marii. ²⁰ Xhigabga cayujnni cheni baluıloj te xangl Dios lojni, lo bacal räjpni lojni:

—José xajg toDavid, na'c guidxejblu xca'lu Marii gacni cháällu sa'csi xi'nni nani chu najc xten Sprit Dxaan xten Dios. ²¹ Che gaal xi'nni cuälajluni Jesús sa'csi laani guslaani rexpejnıi lo rextojlreni.

²² Guiraa redee gujc si'c te guzojb diidx ni gunii tej ni bacuaa xtdix Dios. Räjpni:

²³ Suu te dxapxteeb báz, sajl te xingaanni nani guirilaj: Emanuel, (lajni säloj Dios nabajın con nuure).

²⁴ Che gubajın José lo bacal, bejnıi si'cni räjp xangl Dad lojni. Cua'ni Marii gujc cháälni. ²⁵ Luxh dini niembeeni si'c cháälni dxejli cheni gudejd gojl xingangalojni ni gulälajni Jesús.

2

Che biädhuii rebeñ nanduxh ni laa remagos lojni

¹ Cheni gojl Jesús nen guedx Belén xten guedx Judea, najc Herodes reii xten guedx Judea. Dxejc bidzujñ rebenñajñ ni najc remagos, siädreni nejz cadro rliejn gubijdx, bidzujñreni guedx Jerusalén. ² Rniabdiidxreni:

—¿Con reii xten rebeñ Israel nani golgaj, ä? Nurnu abihuiinu xpajlni laadxlinu, ni'cni siopdoñnuni.

³ Che biejn diajg reii Herodes diidxga, guyuduxhni yärsia' näjza guiraa reben Jerusalén. ⁴ Dxejcti batie'ni guiraa rebixhojzro ni rnibee loj rebixhojz, näjza guiraa renani ruluu xleii Moisés lo rebeñ te gunabdiidxni lojreni:

—¿Caro gaal Crist?

⁵ Laareni räjpreni:

—Neñ guedx Belén xten guedx Judea sa'csi si'c gunii niguii ni bacuaa xtidx Dios che räjpni:

⁶ Luj guedx Belén xten guedx Judea, dilu gajc maazru huin loj reguedxro xten guedx Judea sa'csi neñ guejdxre guirii tej nani guinibee, te ni ga'p rexpenä Israel.

⁷ Dxejcti guredx-xhiga'tz Herodes remagos te gunabdiidxni gucti biricaj bajl nani bahuiireni. ⁸ Dxejcti baxhalñireni guedx Belén, räjpni lojreni:

—Colchäj ro'c, colñabdiidxsa'c xcuent biuuxga te che abidxältuni jiädniitu loä te näjza narä chagañäni.

⁹ Che biejn diajg reii, sä'tireni. Bajl nani bahuiireni lagajc lajdxreni lañtis niñdñi lojreni. Che bidzujñireni cadro yu' bázga, dxejcrú guzobdxí bajlga. ¹⁰ Che bahuii remagos loj bajlga, rbalazduxhreni. ¹¹ Si'c bidzujñreni. Che biu'reni neñ yu', bahuiireni lo bázga con xnanni Marii. Dxejcti bazuxhijbreni, gojñreni bázga, baxhalreni rexcälñasa'creni bazalajzreni oor, näjza yaal näjza yalnejh. ¹² Che agojl guibi'reni, gunixcälreni, räjp Dios lojreni:

—Na'c guibi'tu nez loj Herodes.

Dxejcti gunaazreni garenca nez yuj, gubi'reni lajdxreni.

Che siini Egipto

¹³ Che sii remagos lajdxreni, biäd te xangl Dios baluilojni lo José lo bacal, räjpni:

—Huistie, cua' biuxe're näjza xnanni, huinäreni Egipto. Ro'c guläjz che guiniäli lojlu. Siguiil Herodes biuxe're sa'csi rñajzñi ju'tñini.

¹⁴ Dxejc huistiegajc José, cua'ni biuxe're näjza xnanni, lagajc yäälga biriireni, siireni nez Egipto. ¹⁵ Ro'c guyu'reni cheni gujñli Herodes. Guiraa dee guzajc te guzobj diidx ni bacuaa niguii ni gunii xtidx Dios che räjpni: “Egiptoli guredxä xi'nä.”

Che guinibee Herodes gujt rebiuxbáz

¹⁶ Che gucbee Herodes abasguee remagosni, bidxecheduxhni. Gunibeeni guet guiraa rebiuxniguii ni yu' tio'p ijz näjza rebiuxe' ni yu' guxiiru dxej, guideb neñ guedx Belén näjza reguejdx ni re' gabiga, si'cti redxej ni räjp remagos lojni. ¹⁷ Dxejc guzobj diidx ni bacuaa Jeremías ni gunii xtidx Dios che räjpni:

¹⁸ Biejn xse' beñ neñ guedx Ramá, te yälñhuinduxh, te yälñrbedxdij, yälñrbedxneñ: laa Raquel ni roon yejc rexi'nñi.

Naaddini jiäjñ lajzñi sa'csi agujt rexi'nñi.

¹⁹ Cheni gujt Herodes, dxejc lo te bacal huiluiloj xangl Dios loj José nen Egipto. ²⁰ Rájjni:

—Huistie, cua' biuxe're nájza xnanni, gubisac nez Israel sa'csi agujt renani rlanj ju't biuxe're.

²¹ Dxejcti huistie José, cua'ni biuxe' nájza xnanni. Gubi'reni Israel. ²² Luxh che biejn diajgni rnibee Arquelao guejdx Judea lacuaa Herodes, xtdadni, bidxebni nuini ro'c. Dxejc gunisac Dios lojni loj te bacal, ni'c huijni lo reguejdx xten Galilee. ²³ Dxejc biádlájzni nen guejdx ni laa Nazare't te si'c guzobj diidx ni bacuaa niguii ni gunii xtidx Dios cheni rájjni: “Sirilajni nazaren.”

3

Juan Bautist basule' xtidx Dios loj rebejn (Mr. 1:1-8; Lc. 3:1-9, 15-17; Jn. 1:19-28)

¹ Nen redxejga biáad Juan Bautist lo reyubijdz xten guedx Judea, ro'c cagulijdxni, ² cayájjni:

—Colgusiechlajztu rextoljtu sa'csi xcálrnibee Dios abidzungajxhni.

³ Juan najc nani basä't Isaías, te niguii ni gunii xtidx Dios, cheni bacuaani: Riejn xse' te ni rbedxa' nez lo reyubijdz:

“Colguslii xnezyuj Dad, colguslii xnezyulajzni.”

⁴ Najcw Juan xquichlajd cameii. Naliib te duguijd xque'ni. Rajwni guxha't nájza dzujn xten baseerguijxh. ⁵ Riáad reben guedx Jerusalén náj guiraa reben Judea nájza rebejn ni tre' gajxh nez ro' gueu Jordán, riádcuadijgreni xtiidxni. ⁶ Che ruxhobdojlreni xtojlrni, rutiobnis Juanreni ro' gueu Jordán.

⁷ Che bahuiini siáad xhidajl reben guidoo ni najc referisee nájza ni najc resaducee, rlanjreni gutiobnisnireni, rájjni lojreni:

—La'tu benguidxduxh, najctu si'c bál. ¿Chu balijdxtu guxuntu loj xcálruxe'ch Dios ni siáad? ⁸ Colguibansa'c si'cni nungäjl te fiipac rebejn guliipac abasiech-lajztu. ⁹ Na'c litis guntu xhigab naatu: “¡Ni nurnu najcnu rexagdo to Abram!” Rniliá lojtu, sajx xca' Dios reguijre gunni gacreni rexi'n to Abram.

¹⁰ Asojb guibyaj lo xlobaa reyajg, luxh guiraa reyajg nani di ninexhsa'c xcax lojni, sidinni te checni. ¹¹ Narä guliicani rustiobnisä con nis si'c te seen cheni abasiechlajztu, abaxhobdojltu. Niluxh nani siáad detzä sutiobnisni la'tu con Sprit Dxaan xten Dios nájza con guiboo. Rnibeeruni loä. Bensacduxhni. Nicla xcura'chni digacdi chanää. ¹² Aca'ni xhi cojn gusiani triuu xtenni te chuchee triuuga nen ngodx xtenni. Dxejcti guixhtriuuga, suze'cni guijxhga lo guiboo ni rejx par tejpas.

Che gurobnis Jesús (Mr. 1:9-11; Lc. 3:21-22)

¹³ Dxejc birii Jesús nez Galilee, bidzujjni ro' gueu Jordán cadro yu' Juan te gutiobnis Juanni. ¹⁴ Niluxh naaddi Juan gutiobnis Jesús. Rájj Juan lojni:

—Luj nanab gutiobnislu narä, niluxh naj alga luj siáadlu loä te gutiobnisälu.

¹⁵ Dxejc ráj Jesús lojni:

—Basaan gacni si'c naj, sa'csi nanab gusoobnu guiraa ni rlanj Dios gac.

Dxejctiru batiobnis Juan Jesús.

¹⁶ Cheni gulujx gurobnis Jesús, birigajcni lo nis. Dxejc bixal xhaguibaa, bahuiini siädajjt Sprit Dxaan xten Dios si'c te palom, biäjtni lojni. ¹⁷ Dxejc xhaguibaali biejn diajgreni te xse' ni rájji:

—Dee najc xi'nä ni sanälazä. Laani rbanälazä.

4

Che huij Jesús lo reyubijdz
(Mr. 1:12-13; Lc. 4:1-13)

¹ Dxejc bejn Sprit Dxan xten Dios huij Jesús nez lo reyubijdz te nejzga nuhuał beñdxab Jesús.

² Che gulujx bacua'n Jesús tiuu gubijdx, tiuu guxhijñ, gulaanni. ³ Sas biääd beñdxab lojni, räjpni:

—Palga guliilu Xi'n Dioslu, gunibee gac reguijre yätxtiil.

⁴ Badzu' Jesús diidxre lojni, räjpni:

—Loj reguijtz xten Dios caj scree: “Xhet ganaxdi yältxtiil guibajñ rebejn; sibajñzani con guiraa diidx nani rniü Dios.”

⁵ Dxejcti huiñä beñdxab Jesús guedx Jerusalén. Gulä'pnini jiaa yejc xques guidoro. Dxejcru räjp beñdxab lojni:

⁶ —Palga Xi'n Dios luj, bitiäjs lo yujli, sa'csi scree caj loj rexquijtz Dios: Sinibee Dios rexanglni ga'preni luj; siliäsreni luj con ñaareni didi gacnaj ni'lu lo reguijga.

⁷ Badzu' Jesús diidxre lojni, räjpni:

—Caj loj rexquijtz Dios: “Na'c fallu Dad ni najc Xtioslu.”

⁸ Stee huält huiñä beñdxab Jesús yejc te danro. Dxejcti baluini lojni guiraa reguejdx, reguedxro ni tre' lo guedxliuj näj guiraa xcälñasa'creni. ⁹ Dxejcti räjpni loj Jesús:

—Guiraa redee sunidxä lojlu palga guzuxhijblu nez loä te ganlu narä.

¹⁰ Dxejcti räjp Jesús lojni:

—iHuij nez rec beñdxab! Scree caj loj rexquijtz Dios: “Dad Xtioistislu ganlu; lojtisni chulu.”

¹¹ Dxejcti gubicaj beñdxab loj Jesús. Dxejc biääd rexangl Dios biädhuiireni Jesús.

Gusloj Jesús cayujñ xtzuunni
(Mr. 1:14-15; Lc. 4:14-15)

¹² Che biejn diajg Jesús yu' Juan nen ladzguiib, huijni nez Galilee. ¹³ Dxejcti gudejñni guedx Nasare't, huiläjzñi guedx Capernaum ni tre' gajxh nez ro' nis, nez reguejdx Zabalón con Neftalí. ¹⁴ Si'c gujc te guzojb diidx ni bacuaa Isaías ni gunii xtidx Dios:

¹⁵ Lajdx Zabalón, lajdx Neftalí, nezyuj ni rij nez ro' nisdoo, stelaad gueu Jordán,

Galilee cadro rbäjz rebejn nani di gac rexpñ Israel.

¹⁶ Rebejn nani rbäjz nen te yälcäy abahuiireni te bajlga,

luxh bajlga basaniñ xcäriejn renani nabajñ lo xcälrdxejb, lo xpalaä yälgujt.

¹⁷ Dxejcli gusloj cagulijdx Jesús, räjpni:

—Colgusiejchlajztu, colguxhobdojl te guibañsa'ctu sa'csi abidzungenajxh xcälñrñibee Dios.

Che gurejdx Jesús tajp xpejñni
(Mr. 1:16-20; Lc. 5:1-11)

¹⁸ Sasaj Jesús nez ro' nisdoo xten Galilee che bahuiini lo tio'p niguii. Tejni laa Simón, ni laaza Pedr. Steeni najc lagajc bejtzni, ni laa Andrés. Dzuun ni rujñreni najc rniaazreni bäjl, ni'c cacuaareni guijxh lo nisdoo. ¹⁹ Dxejcti räjp Jesús lojreni:

—Coltanajl narä. Naj riniaaztu bäjl, niluxh narä gunä cueedxtu rebejn.

²⁰ Lagajc dxejc basa'reni xquijxh'reni te sanajl'reni laani.

²¹ Che gudejdreni ro'c, bahuiini loj stio'p niguii, Jacob con bejtzni Juan. Yu'reni nen te barcw con xtradreni, ni laa Zebedeo cayunsa'creni guijxh. Dxejc gurejdx Jesúsreni. ²² Lagajc dxejc basa'nreni barcw nájza xtradreni te sanajlreni Jesús.

Caguluii Jesús xhidajl bejn

(Lc. 6:17-19)

²³ Sasajti Jesús guideb nez región xten Galilee, caguluiini nen teja rexquidooreni. Cagusule'ni redidxcoob xten xcäl'rnibee Dios. Cagusiajczani guiraa yäl'racxhuu ni rajc rebejn guejdxga, guiraa yäl'guijdx. ²⁴ Biejn diajg reben Siria diidx xcuent ni cayujn Jesús. Sas biädnäreni guiraa rebenracxhuu ni cayajc guiraloj yäl'guijdx, yäl'nayan; guiraa reni rajc yejcreni, guiraa reni rajc malyäl'guijdx, reni rajc yäl'guidxbej, guiraareni abixu'n tiejxhreni. Dxejcti basiajc Jesús rebejnğa. ²⁵ Xhidalduxh ben Galilee huinajl'ni, náj reben reguedx Decápolis, nájza reben guedx Jerusalén, nájza reben Judea nájza rebejn ni tre' stelaad gueu Jordán.

5

Yejc te dajn balijdx Jesucrist rebejn

¹ Che bahuii Jesús loj reben xhidajl, huä'pni yejc te dajn. Dxejcti gubig rexpejn'ni ni gurejdxni lojni. ² Dxejc gusloj caguluii Jesús reni'c, scree räjpni:

Rebejn ni sibaalajz

(Lc. 6:20-23)

³ —Sibaalajz rebejn nani nanchee rquinduxhreni xcäl'racnáj Dios, sa'csi laareni nungäj'lreni xcäl'rnibee Dios.

⁴ 'Sibaalajz rebejn nani rac-huin lajzreni xcuent rextoj'lreni, sa'csi sudzucaj Dios xtojl'reni, susiäj'l'ni lajzreni.

⁵ 'Sibaalajz rebejn nani nadolajz nani r'lajz guntis si'cni rnibee Dios, sa'csi sacnáj Diosreni lo xcäl'nabaj'nreni lo guedxliujre.

⁶ 'Sibaalajz rebejn ni nastoocanu rliaanreni, riojl'reni, sa'csi r'lajzreni guiba'nsa'ctisreni nez loj Dios, sa'csi sudeed Dios lojreni guiraa ni rniabreni.

⁷ 'Sibaalajz rebejn nani rulasajz sa'reni, sa'csi sulasajz'za Diosreni.

⁸ 'Sibaalajz rebejn nani najc nayatis lastooreni rujnreni rexhigabsa'c xten Dios sa'csi suhuiireni lo Dios.

⁹ 'Sibaalajz rebejn nani ruscuedcxilajz sabejn'reni, sa'csi laareni sirilaj'reni rexi'n Dios.

¹⁰ 'Sibaalajz rebejn nani rusutijp lajzreni che rusacsí bejn'reni sa'csi naba'nsa'creni nez loj Dios, sa'csi xtenreni najc xcäl'rnibee Dios xhaguibaa.

¹¹ Col'spaalajz'tu che gusacsí bejntu til'näj'reni la'tu, guiniireni guiraloj didx-xhii xcuent xtidxä. ¹² Col'guibaalajz, col'balajz sa'csi xhaguibaali sunidxduxh Dios xcuent xtz'uuntu. Sigajc'za basacsireni reniguii ni gubaj'n galoo ni gunii xtidx Dios.

La'tu najctu si'c sejd lo guedxliujre

(Mr. 9:50; Lc. 14:34-35)

¹³ Räjpzani:

—La'tu najctu si'c sejd lo guedxliujre. Palga di sejd gac nadzujy, ¿xho gacsacni nadzujy? ¿Xhi gun bejn'ni dxejc? Susäj'l'reni sejdga detz yu', suláj bejn yej'cni.

¹⁴ 'La'tu najctu si'c te bianij lo guedxliujre. Te guejdx nani tre' jiaa yejc te dajn, digacdi guiga'tzni. ¹⁵ Digacdi xcaguij te bajl dxejcti jä'uuni nen te caj.

Maazru huen soobni jiaa neṇ te gandilieer te gusaṇijni loj guiraa rebejn ni tre' neṇ yu'. ¹⁶ Xcälṇabaṇsa'ctu najc si'c te bajl loj rebeṇ guedxliuj. Suhuiireni xtzunsa'ctu dxejc siliä'preni xpala'n xtadtu ni yu' xhaguibaa.

Rului Jesús xcuent leii

¹⁷ Räj pzani:

—Na'c guntu xhigab siädgudzucaä leii xten toMoisés, niclaza rediidx ni baluii redad ni gunii xtidx Dios. Xhet siäddzucäädini, narä siälä te guluiäpacni si'cni najcni. ¹⁸ Rniliäpac, dxejli che ni nitloj guibaa näjza guedxliuj, nicla tej letr ni caj loj leii di nit. Sajcpac guiralii ni caj lo reguijtzga. ¹⁹ Ni'cni chutis ni rlaž gusaan te diidx nani caj loj leii, mase te didxbäzni, luxh ruluiini gun bejn si'c, laani guxiduxh sajcn lajdx Dios guibaa. Niluxh renani rucuaadijg xtidx leii, luxh rujnpacreni si'cni caj lo leii, ruluiizani leii, beṇsacduxh gacni lajdx Dios guibaa. ²⁰ Ni'cni rniä lojtu, palga ditu gusa'cru xtzun Dios, ditu guibaṇsa'cru loj reni najn xcuent xleii toMoisés, näjza loj rebeṇ guidoo ni laa farisee, dipactu jiu' lajdx Dios xhaguibaa.

Rului Jesús xcuent yälrdxe'ch

(Lc. 12:57-59)

²¹ Räj pzani:

—Abiejza diajgtu nani gunii rebengoldoo: “Na'c ju'tlu. Chutis te nani ju't sa'ni, sinärenini lo guxhtis te jiäuuni neṇ latzguiib.” ²² Niluxh narä rniä chutis nani guidxechduxh lo sa'ni sijni lo guxhtis. Chutis ni guinii didxnaj lo sa'ni, sijni lo juejz. Chutis ni gäb lo sa'ni: “beṇnayällajz” sidejdni loj yälguxhtis xten Dios, sijni gabijl cadro cayejc guiboduxh.

²³ 'Che sanälu gojn guidoo te gusa'nlu ni lo bacuug, palga guinaj lajzlu yu' chu lo cadxe'chlu, ²⁴ basansijc gojn xtenlu lagajc ro'c, huisiälxgaa diidx con sa'lu, dxejcti guibi'lu te gac gusa'nlun gojn xtenlu.

²⁵ 'Palga yu' chu rdxe'ch lojlu, basquejn basiäjl diidx con laani lagajc cheni sasanäjluni lonezyuj te di guteedni luj lo juejz. Luxh juejz suteedni luj loj reguixhaj te gusa'ureni luj neṇ latzguiib. ²⁶ Rniliäpac lojlu: “Dilu guirii ro'c palga dilu cue'c guiralii meel nani guiniabni lojlu.”

Rului Jesús xcuent yälrusquee sa'ni

²⁷ Räj pzani:

—Abiejn diajgtu guniireni galoo: “Na'c guesnäjtu gunaa nani di gac chäältu.” ²⁸ Narä rniä, chutis te nani fii loj te gunaa dxejcti guisia' lajzni gunaaga, abejnni dojl neṇ lastooni. ²⁹ Palga balojlu ladbee rujn rujnlu dojl, gulääni basälni te laad sa'csi hueenru gunijtlu te balojlu quela chää guideb tiejxhlu gabijl. ³⁰ Palga ṇaalu ladbee rujn rujnlu dojl, batiu'ni sa'csi hueenru gunijtlu te ṇaalu quela chää guideb tiejxhlu gabijl.

Rului Jesús xcuent yälru'o'n chää bejn

(Mt. 19:9; Mr. 10:11-12; Lc. 16:18)

³¹ Räj pzani:

—Abiejn diajgtu guniireni galoo: “Chutis niguii ni rlaž guro'n chäälni, nanabtis gudeedni te guijtz nani rniä abaro'nni chäälni.” ³² Narä rniä, niguii nani guro'n chäälni niluxh xhet dojldi bejn chäälni, niguiiga sujn gun chäälni yälgubejxh, niluxh chutis ni guchnaa gunaaga sujnzani yälgubejxh.

Rului Jesús xcuent che ria'n diidx

³³ Räj pzani:

—Abiejnza diajgtu gunii rebengool: “Che ria'nlu diidx lo Dios gunlu xhi gunlu, na'c jial lajzlu; basa'pac xtiidxlu lo Dios.” ³⁴ Narä rniä, na'c gunlu juraar, nicla tej mood, nicla por xhaguibaa, sa'csi ro'c najc lajdx Dios, ³⁵ nicla por loj guedxliuj sa'csi ro'c rsiuj ni'ni; nicla por guedx Jerusalén sa'csi ro'c najc guedxlajdx reiuro, ³⁶ niclaza por lagajc bituiyejclu, sa'csi digacdi guncheelu te guichyas niclaza te guichnol, nicla tej guijch. ³⁷ Nanab guiniitisl: “Mbaj” o “Ajndi”. Palga yu' xhiru rniilu, bendxab najc ni rujn rniiluni.

Chanälajzni rebejn ni rdxe'ch lojni

(Lc. 6:29-30)

³⁸ Räjpzani:

—Abiejn diajgtu gunii rebengool galoo: “Te baloj por ste baloj, te läjy por ste läjy, nalajznu bejn lo sa'lu si'ctis ni rujnni lojlu.” ³⁹ Narä rniä, na'c tilnäjlte bejn ni bejn te cos guijdx lojlu. Palga chääzni ladbee lojlu badeed stelaad lojlu chääzni. ⁴⁰ Palga yu' chu rlaiz tilnäjlte xca'ni xcamangwlu, badeedza näj xsa'cwlu lojni. ⁴¹ Palga yu' chu guinibee guulu xcargwni te kilómetro, huinäni tio'p kilómetro. ⁴² Nani guiniab xhi guiniabxlia'ni lojlu, badeedni. Nani guiniablaa xhi guinablaani lojlu na'c gudxoijnluni lojni, na'c gäblu: “Xhetini.”

⁴³ Abiejn diajgtu gunii rebengool: “Colchanälajz sa'tu. Colguidxe'ch loj renani rdxe'ch lojtu.” ⁴⁴ Narä rniä lojtu, colchanälajz rebejn ni rdxe'ch lojtu. Benle' yejc reni rgue lojlu. Colyejn dxunsa'c loj renani rdxe'ch lojtu. Colcujdx, colnab loj Dios xcuent rebejn nani rdxagdijltu, rusacsireni la'tu, ⁴⁵ te si'c gactu xi'n xtadtu ni yu' xhaguibaa nani rujn rii xcubijdxni lo rebensa'c sigajcza lo reben guijdx. Rujnzani riabj nisguij lo rebensa'c sigajcza lo rebenguijdx. ⁴⁶ Palga la'tu chanälajzta lagajctis rebejn nani rinälajz la'tu, ¿xhi gaan guntu dxejc? Najctu lagajc si'c najc rebejn ni rutie' meel ni rajx lo gubier. ⁴⁷ Palga guiniitu: “Xchan”, lagajctis loj resa'tu, ¿xhini'c rujntu ni najc hueenru lo chutis bejn? ¿La et sigajcdiza rujn rebejn nani di gumbée Dios? ⁴⁸ Colyajc bensa'c si'c ni najc xtadtu ni yu' xhaguibaa.

6

Rului Jesús xho gudeedni gojn

¹ Räjpzani:

—Na'c gusäbdiidx guntu dzunsa'c nez loj rebejn te fittisreni xhi rujntu. Palga gusäbdiidxtu di xtadtu ni yu' xhaguibaa guniidx xhi xca'tu. ² Che gudeedlu gojn, na'c güilu diidx xhi badeedlu. Na'c gunlu si'c rujn rebejn nani rusguee neñ reguidoo, näjza lad nezuyj. Rujnsireni si'c te ruhuii rebejn xhi rujnreni te rliä'p rebejn xpala'nreni. Narä rniä acua'reni gaan xtenreni. ³ Luj che gudeedlu gojn xtenlu, na'c gacbee nicla tej xamiigwlu xhi badeedlu, ⁴ te gac gojn xtenlu xhiga'tz. Dxejcti xtadlu ni cahui nani bejnlu xhiga'tz, sacnäjni luj nez loj rebejn.

Rului Jesucrist xho cueedx, guiniabni lo Dios

(Lc. 11:2-4)

⁵ Räjpzani:

—Cheni rbejdx, rniabtu lo Dios, na'c guntu si'c rujn rebenguidoo ni rusguee. Rchaglajzreni rniabreni lo Dios rsiuliireni neñ reyu' cadre riel xtidx Dios, näjza guíraa resquiin, näjza nez ronejz te ruhuii rebejn xho rujnreni. Rniäp, acua'reni gaan xtenreni. ⁶ Naj luj cheni cueedx, guiniablu lo Dios, biu' neñ xyu'lu. Basäuu ro' yu'ga, dxejcti xhiga'tz gunii loj xtadlu ni yu'

xhaguibaa. Dxejcti xtadlu ni cahuii xhi rujnlu xhiga'tz, sacnäjni luj nez loj rebejn.

⁷Cheni caniitu lo Dios, na'c guinisactu balti huält rediidx nani aguniitu. Si'c rujn rebejn nani di gumbee Dios. Naareni sa'csi sanuutis rniireni xhidajl diidx balti huält, siejn diajg Dios. ⁸Na'c guntu sigajc ni rujnreni, sa'csi anajn xtadtu xhini'c rquiintu che guiniabtuni lojni. ⁹Ni'cni scree colguinii lo Dios: Xtdadnu ni yu' xhaguibaa dxan najc lajlu.

¹⁰Sujiääd xcälrnibeelu;

bejn si'cni rlajzlu lo guedxliujre sigajc rujnlu xhaguibaa.

¹¹Nadxej baniidx xcu'nnu sa' ni rdaunu guira dxej.

¹²Basiäjł lajzlu redojl xtenu si'c riäjł lajznu redojl xten rebejn ni rujn dojl loonu.

¹³Na'c gusaanlu jiaabnu xhigabguijdx,

basłaa nuure lo dojl,

sa'csi xten guejblu najc yälrnibee, yälndip näjza yälrdimbicha' par tejpas.

Sugacni si'c.

¹⁴Palga la'tu gusiäjł lajztu redojl ni rujn rebejn lojtu, xtadtu ni yu' xhaguibaa susiäjłza lajzni rextojłtu. ¹⁵Palga ditu gusiäjł lajztu redojl ni rujn rebejn lojtu, sigajcza xtadnu ni yu' xhaguibaa di lajzni jiäjłza rextojłtu.

Ruluii Jesús xho gucua'n bejn

¹⁶Räjpzani:

—Che rucua'ntu na'c guntu si'c rujn rebejn nani rusguee; rumbaa lojreni te fii rebejn cagucua'nreni. Rniliä acua'reni rexgaanreni. ¹⁷Niluxh la'tu, che rucua'ntu, colcun yejctu, colquib lojtu ¹⁸te na'c gabee rebejn cagucua'ntu, xtadtistu suhuii cagucuanxhiga'tztu. Xtdadtu ni cahuii xhi cayunxhiga'tztu suniidxni xhi xca'tu nez loj rebejn.

Yäl'nasa'c ni yu' xhaguibaa

(Lc. 12:33-34)

¹⁹Räjpzani:

—Na'c gapdajntu yäl'nasa'c lo guedxliujre cadro rajw reman o rbibtiejn xhixtentu, niluxh richu' gubaan rolijz bejn te rbajnreni. ²⁰Hueenru ga'ptu xcäl'nasa'ctu xhaguibaa cadro di reman gauu, diza rexhixtentu cuibtiejn, diza regubaan jiu' te cuanreni. ²¹Sa'csi cadro yu' xcäl'nasa'ctu, ro'cza naga' lastootu.

Bianij xten tiejxhtu

(Lc. 11:34-36)

²²Räjpzani:

—Bianij xten tiejxhni najc balojni, ni'cni palga rhuisa'c balojtu, guideb tiejxhtu yu' lo bianij. ²³Niluxh palga rebalojtu di fisa'c, guideb tiejxhtu yu' lo nacäy, ni'cni palga bajl nani yu' tiejxhtu dini gusanij, ðlinacäiboo najc guidebtu!

²⁴Nicla te bejn di gacdi gun dzuun loj tio'p lam tejsi junt, sa'csi sibälazni tejni laga sanälajzni steeni. Digacdi guntu xtzuun Dios palga caguilltistu xcäl'nasa'ctu lo guedxliujre.

²⁵Ni'cni rniä lojtu, na'c chutu yärsia' por xcäl'nabajntu, xhicha gautu, xhicha yätu, niclaza naatu xhicha lajd gajcwtu. Yäl'nabajn sajrcu lo yälrajw, luxh sajrcu tiejxhtu lo xhajbtu. ²⁶Colhuii remane' ni rtajt xhaguibaa. Direni cue'c binij, dizareni guilia' gäjł, dizareni cuchee xhi gaureni neñ yu', luxh xtadtu

ni yu' xhaguibaa rudeedni xhi rajwreni. ¿Laa xhet sajcdirutu loj remane'ga, ä? ²⁷ ¿Chu tej la'tu sa'csi ru'tu yärsia' sajci tiobrutu ste bo'c jiaaru?

²⁸ ¿Xhicient runduxhtu xhigab xcuent xhajbtu? ¿Colhuii reguii ni tre' nesiät! ¿Xho roobreni? ¿Xho rialreni? Direni gun dzuun, dizareni guzaa xhajbreni. ²⁹ Narä rniä lojtu, nicla reii Salomón guideb najcwni rexhabsa'c xtenti di nisiuchee si'c rsiuchee tej reguiiga. ³⁰ Palga Dios rujn rajc recuaan ni yu' nesiät ni rial nadxej luxh guixee ahuejcreni, ¿xhixh dini gunduxhru par la'tu, bejn nani guxii rililajz? ³¹ Ni'cni na'c chutu yärsia' guntu xhigab: “¿Xhicha guidaunu, xhicha guidunnu, xhicha gacwnu?” ³² Sa'csi rebejn nani di gumbee Dios xhigabtsiga rujnreni, caguillreni guiraa recosga. Niluxh xtadtu ni yu' xhaguibaa anajnni xhini'c rquiintu. ³³ Colquixgaa yälrnibee xten Dios näjza yäl'nabansa'c si'cni rrajz Dios dxej sica'tu guiraa ni rquiintu. ³⁴ Ni'cni na'c gunduxhtu xhigab xho tedtu dxej guixee. Combast tedtu trabajw nani riäd dxej con dxej.

7

Na'c cubeetu sa'tu (Lc. 6:37-38, 41-42)

¹ Räjpzani:

—Na'c cubeetu sa'tu te na'cza cubee Dios la'tu. ² Sa'csi sigacni rgubeetu sa'tu, sigajcza sigubee Dios xhi rujntu; niluxh lagajc si'cni rutixhtu lo bejn, si'cza sutixh Dios lojtu. ³ ¿Xhicient ruhuiilu loj guijxh ni yu' baloj sa'lu, luxh dilu fii yagro nani yu' lagajc balojlu? ⁴ ¿Xhicient gäblu lo sa'lu, nädonnu cuää guijxh ni yu' nen balojlu, luxh dilu fii loj yagro ni yu' nen balojlu? ⁵ Benguijdx ni rusguae, guläxgaa yagro ni yu' balojlu te gac fisa'clu te cuäalu guijxh nani yu' baloj sa'lu.

⁶ Na'c guluiitu guiraa rextidx Dios loj chutis bejn sa'csi yu'reni najc si'c bä'cw, xlia'si rca'renini; sibi'reni, sauya'reni luj. Sigajcza recos sa'cru, na'c gudeeduni loj chutis bejn, sa'csi yu'reni najc si'c cuch rbälazreni cossa'c najcreni si'c cuch ni ruläj yejcxhitis xhi cos.

Colnab, colquiiil, colgusejz rolä' (Lc. 11:9-13; 6:31)

⁷ Räjpzani:

—Colnab lo Dios te guniidxn nani rniabtu. Colquiiilni te guidxäjltuni. Colnii rolä', te guixalni jiu'tu. ⁸ Chutis ni rniab lo Dios sica'ni nani rniabni, nani rguuil xhi cos nez loj Dios rdxälzani nani rguuilni; nani rusejz rolä', suxhalzareni lojni.

⁹ ¿La yu' chu teju che guiniab xi'nni te yätxtiil, alga gudeedni te guij, ä? ¹⁰ O palga guiniabni te la' bälj, ¿la sudeedni te bäl? ¹¹ Palga la'tu ni najc bejn guijdx rajc rudeedtu cossa'c loj xi'ntu, aticaxh xtadtu ni yu' xhaguibaa. Laani suniidxn cossa'c loj renani guiniabni lojni.

¹² Ni'cni guira'ti cos ni rrajztu gunnäj bejn la'tu, sigajcza colyennäjreni, sa'csi si'c caj lo leii xten toMoisés, näjza lo diidx ni bacuaa redad ni gunii xtidx Dios.

Rolä' xten yäl'nabajn najc dää (Lc. 13:24)

¹³ Coljiu' nez rolä' nani najc dää, sa'csi gulajg najc rolä', gulajg najcza nezyuj nani rinä bejn lo yälrunijt, luxh xhidajlreni riu' nejzga. ¹⁴ Sa'csi dää najc rolä', dääza najc nezyuj nani rinä bejn nez loj yäl'nabajn, niluxh guxii najc renani rdxäl nezyujga.

*Ninexhsa'c ni rcaj loj te yajg rujn gumbeeni yajgga**(Lc. 6:43-44)*¹⁵ Răjpszani:

—Colnatiro rebejn nani rlaiz gusguee la'tu. Rniisireni rusule'reni xtidx Dios. Rluisi nadolajzreni si'c te xiil, niluxh direni gac. Alga si'c loob najcreni, rutie'chreni bejn si'c re'ch xiil che riädchu' loob lojreni. ¹⁶ Dzuun nani rujnreni sujn gumbeetureni. Anajntu di uub xcaj lo reyaguejch, diza iigw xcaj lo guechbiojb. ¹⁷ Ni'cni lo guiraa reyagsa'c rcaj ninexhsa'c lojni, per lo guiraa reyajg ni xhet yagsa'cđi, ganax ninejxh ni di ganaxsa'c rcaj lojni. ¹⁸ Digacđi xcaj ninexhdxuudx loj te yajg ninexhsa'c. Di gacđiza xcaj te ninexhsa'c loj te yajg ni di gac yagsa'c. ¹⁹ Guiraa reyajg nani di ninexhsa'c xcaj lojni, nanab guidinni te checni. ²⁰ Sigajcza sajc gumbeetu be_nsa'c sa'csi rujnreni dzunsa'c.

*Xhet guiraadi bejn jiu' lo xcälrmibee Dios**(Lc. 13:25-27)*²¹ Răjpszani:

—Xhet guiraadi renani rni, “Dad, Dad”, jiu' lo xcälrmibee Dios xhaguibaa. Ganaxtis renani rujn si'cni rlaiz Xtađä ni yu' xhaguibaa. ²² Sidzujn dxej sinii xhidajl bejn loä: “Dad, Dad, con lajlu basule'nu xtiidxlu, con lajzalu biläanu rebe_ndxab, con lajzalu biennu remilagwr.” ²³ Dxejc säpä lojreni: “Dina gumbeä la'tu. Colbicaj loä be_nlatsiaj.”

*Tio'p cimient**(Lc. 6:47-49; Mr. 1:22)*²⁴ Răjpszani:

—Chutis nani rucudiajg diidx nani cania, luxh ruzoob xtidxä, laani najc si'c te be_nsiñ nani basoob rolijzni yejc te guilaj. ²⁵ Che biajb nisguij, biäjt nis gueuu, gubi' bej, bidinreni yejc yu'ga sas di yu'ga niajb sa'csi sojbni yejc guilajga. ²⁶ Nani riejn diajgni xtidxä, luxh dini guzoob xtidxä najc si'c te be_n gualajz nani basoob rolijzni lo yujxh. ²⁷ Che biajb nisguij, biäjt nis gueuu, gubi' beduxh bidinreni yec yu'ga. Dxejc ligurebä'n yu'ga. Lacti xhiroob banijt bejn_{ga}.

²⁸ Che gulujx gunii Jesús rediidxga, lacti bidxeloj rebejn rediidx ni baluini, ²⁹ sa'csi baluini rebejn si'cpac te nani rnibee, xhet si'c ruluiidi rebejn ni najn leii.

8*Rusiajc Jesús te bejn ni rał tiejxhni**(Mr. 1:40-45; Lc. 5:12-16)*

¹ Che biäjt Jesús yec dajn, xhidajl bejn huinajlni. ² Dxejcti biääd te be_nracxhuu ni rał tiejxhni nez loj Jesús. Bazuxhijbni, răjzni:

—Dad, palga rlaizlu, sajc gusiajclu narä.

³ Dxejcti basga Jesús ñaani, gudajjni dade'ga con ñaani, răjzni:

—Rlazä jiajclu. Siajc tiejxhlu.

Lagajc dxejc gubicaj guejdx ni rał tiejxhni. ⁴ Dxejcti răjps Jesús lojni:

—Arniä, rut lojđi gäblu xhi guzajclu. Huijtis lo rebixhojz te badeed gojn ni gunii toMoisés gudeed bejn ni riajc, te fii rebixhojzga abiajclu.

*Rusiajc Jesús te xmos capitán roman**(Lc. 7:1-10)*

⁵ Che biu' Jesús guedx Capernaum, bidzujñ te capitán roman nani rnibee te gayuu soldaad. Gunabduxhni lo Jesús, ⁶ räjpni:

—Dad, xmosä naga' rolizä. Di gacdi guiniibni luxh cayanduxhni.

⁷ Räjp Jesús:

—Do'o te gusiacäni.

⁸ Dxejcti räjp capitán lojni:

—Dad, xhet sacädi; di nungäjñ jiu' guejblu rolizä. Guiniitis te diidx, siacgajc xmosä. ⁹ Narä nacäza xmos rebejn ni rnibee, niluxh rnibeäza te gayuu soldaad. Che rniä lo tejni: “Huij”, rijni. Che gäpä loj steeni: “Gudaa”, riädgajcni. Che gäpä loj xmosä: “Bejn dee”, rungajcni.

¹⁰ Che biejn diajg Jesús si'c, bidxeloduxhni, räjpni loj renani siädnajlni:

—Rniliäpac lojtu, nicla nen guideb reguedx Israel dina nidxälä te bejn ni rililajz si'c rililajz dade're. ¹¹ Niluxh rniä, sirii xhidajñ benzijñ nez ladjiaa, nez ladjiät, te jiädcuenäjreni Abram, Isaac, Jacob ladjx Dios xhaguibaa. ¹² Luxh rebeñ Israel nani niajx xi'n Dios sijreni te laad lo yälcäy cadro soonreni, sauya'reni läjyreni, sidejdtisreni trabajw par tejpas.

¹³ Dxejcti räjp Jesús loj capitán:

—Gubi' rolizlu. Sigajcni huililajzlu, sigajcza gacni.

Dxejc lagajc orga bñajc xmosni.

Rusiajc Jesús xnansueegr Pedr

(Mr. 1:29-31; Lc. 4:38-39)

¹⁴ Che bidzujñ Jesús rolijz Pedr, bahuiini naga' xnansueegr Pedr, cayacxhuuni, yu'ni xliaa. ¹⁵ Dxejc gudajntis Jesús ñaani, birigajcni xliaaga. Dxejcti huistie nane'ga, gusloj cagudeedni xhi gau Jesús.

Rusiajc Jesús xhidajñ ben racxhuu

(Mr. 1:32-34; Lc. 4:40-41)

¹⁶ Che biu' guxhijñ, biädñareni loj Jesús xhidajñ bejn ni yu' rebeñdxab lostooreni; con xtiidxni gunibeeni birii guiraa rebeñdxabga. Basiajczani guiraa rebeñ racxhuu. ¹⁷ Si'c bejnne te guzojb diidx ni bacuaa todad Isaias, ni gunii xtidx Dios, che räjpni:

Lagajc laani cua'ni rexcälracxhuumu, sanāzani rexcälñayannu.

Reni rlajz ninajñ Jesús

(Lc. 9:57-62)

¹⁸ Che bahuii Jesús tre' xhidalduxh rebejn guideb gabi cadro suga'ni, gunibeeni tedñajni rexpeñpacni stelaad ro' nis. ¹⁹ Dxejcti biääd te benñajñ loj Jesús, räjpni:

—Mastr, sisiaäza cadrotis chäälü.

²⁰ Räjp Jesús lojni:

—Rebäjz rajpreni xpiliääreni, remane' ni rutajñ xhaguibaa rajpreni xpi-tiääreni, niluxh narä Xi'n Dios ni gujc Niguui dina gapä cadro gaa yecä.

²¹ Stee rexpeñpacni räjp lojni:

—Dad, basaan chaxgää ladxä te chacuatxä xtadä.

²² Räjp Jesús lojni:

—Gudanajñ narä. Basaan sugucua'tz resabengutreni rebejn nani najc si'c bengut sa'csi najcreni beñdojñ.

Basiacdxñ Jesús te beduxh

(Mr. 4:35-41; Lc. 8:22-25)

23 Che biu' Jesús neṅ barcw, biu'za rexpejn̄pacni lagajc nenga. 24 Dxejc huájs te bedonduxh lo nisdoo. Lirusiääzni barcw neṅ nisdoo. Luxh Jesús nagayejśni. 25 Dxejcti huij rexpejn̄pacni huicuäänni, räjpreni:

—Dad, gucnäj nuure te di guetnu.

26 Dxejc räj̄p Jesús:

—¿Xhicuent rdxejbtu, bejn̄ ni guxii rililajz?

Dxejcti huistieni, gudidxa'ni lo bej nájza lo nisdoo, te biacdxireni. 27 Dxejc bidxeloduxh rexpejn̄pacni, räjpreni:

—¿Chuni'c najc niguiire? ¡Ahuilaa xho rucuadiajg bej nájza nisdoo xtiidxni!

Rebendxab ni yu' lajdx regadarenos

(Mr. 5:1-20; Lc. 8:26-39)

28 Che bidzujñ Jesús stelaad nisdoo cadro najc lajdx regadarenos, tio'p bejn̄ ni yu' beṅdxab lastooreni biädchaglojreni Jesús. Rebejn̄ga riireni neṅ rebaa, nialazduxhreni, ni'cni rut rajcdi rdejd nezyujga. 29 Guredxa'reni räjpreni:

—¿Xhicuent siädchu'lu loonu luj ni najc Jesús Xi'n Dios? ¿La siäädlu ree te gusacsílu nuure luxh gad galđi xor̄nu, ä?

30 Nez te laad, zijte' cadro suga'reni, cayaip bejn̄ xhidalro cuch. 31 Dxejcti gunab rebeṅdxabga loj Jesús, räjpreni:

—Palga cuäälu nuure, basaan jiu'nu neṅ recuchre.

32 Dxejcti räj̄p Jesús:

—Colchäj.

Dxejcti biriireni neṅ lastoo redade'ga, huichu'reni neṅ recuchga. Dxejcti guiragajc recuchga caguxun̄reni, huitejbreni ro' te guilaj, biääzreni neṅ nisdoo, gujttireni neṅ nis.

33 Rebejn̄ ni cayaip recuchga, baxun̄reni, huijreni lajdxreni, huiyeireni diidx guiraa ni guzajceni nájza ni guzajc redade' ni guyu' rebendxab lastooreni. 34 Dxejcti guiraa rebeṅguejdxga huichaglojreni Jesús. Che bahuiireni lojni, gunabduxhreni lojni, jiunejzni lajdxreni.

9

Basiajc Jesús te bejn̄ nani abixu'n̄ tiejxhni

(Mr. 2:1-12; Lc. 5:17-26)

1 Dxejcti biu' Jesús neṅ barcw. Gudejdni stelaad ro' nis te bidzujñni lajdxni.

2 Ro'c biändnäreni lojni te bejn̄ nani abixu'n̄ ṅaani, ni'ni. Naga'ni lo te da'. Che bahuii Jesús lacti rililajzreni, räj̄pni loj beṅracxhuuga:

—¡Baspaa lajzlu xi'nä! Agubicaj rextojllu.

3 Dxejcti gaii beṅnajn̄ ni ruluii xleii Moisés cayujn̄reni xhigab ensilaareni, caniyaj dee Dios con rextiidxni. 4 Dxejc gucbegajc Jesús xhi xhigab cayujn̄reni, dxejc räj̄pni lojreni:

—¿Xhicuent cayujntu xhigabguijdx neṅ lastootu? 5 ¿Con ni najc guyasiru? Guiniä lo te bejn̄: “Agubicaj rextojllu”, o guiniä lo te bejn̄: “Huistie, guzaj.”

6 Dec gunä te gacbeetu Xi'n Dios ni gujc Niguii rajp yäl̄rnibee lo guedxliujre te gudzucajni dojl.

Dxejcti räj̄pni loj beṅracxhuuga:

—Huistie, cua' xta'lu, huij rolizlu.

7 Dxejcti huistie beṅracxhuuga, siini rolizni. 8 Che bahuii rebejn̄ lojni, bidxeloduxhreni, gulä'preni xpala'n Dios, ni badeed yäl̄rnibeega loj rebejn̄.

Che gurejdx Jesús Mateo

(Mr. 2:13-17; Lc. 5:27-32)

⁹ Dxejcti birii Jesús cadro basiajctni benracxhuu, sä'tini. Dxejc bahuiini loj te dade' ni laa Mateo. Sobga'ni loj te yagxhiil cadro rbej reni ruquijx xcuent guiraloj. Dxejc räjp Jesús lojni:

—Gudanajl narä.

Dxejcti huisuni, sanajlni Jesús.

¹⁰ Cheni sobga' Jesús lo mex cayajwreni rolijz Mateo, biäädza xhidajl rebejn nani ruquijx xcuent guiraloj, ni najc rebejn ni di gac xpen Israel, gurejzareni lo mex näj Jesús näjza reni najc rexpejn pacni. ¹¹ Che bahuii reben guidoo, ni laa refarisee, xhi cayujn Jesús, räjpreni loj rexpejn pac Jesús:

—¿Xhicuent raunäj xmastrtu rebejn nani ruquijx xcuent reyuj näjza rebejn ni di gac xpen Israel?

¹² Che biejn diajg Jesús xhi guniireni, räjpni lojreni:

—Rebejn nani nadaan dini guiquiini chu gusiajctni, niluxh rebejn racxhuu ni'c rquiinreni chu gusiajctreni. ¹³ Colchäj te colchaseed xhi säloj diidxre ni caj loj reguijtz: “Yälrlulaslajz rlazä, dina rlazä guniidxtu guidxaa loä.” Sa'csi narä dina niädtedxä rebensa'c, narä siädtedxä rebeñdojl te gusiechljazreni.

Gunabdiidxreni xcuent yälrucua'n

(Mr. 2:18-22; Lc. 5:33-39)

¹⁴ Dxejcti biääd rexpejn pac Juan loj Jesús räjpreni:

—Nuure con refarisee rcua'nnu xhidal huält, ¿xhicuent di rexpejn pac lu gucua'n, ä?

¹⁵ Räjp Jesús lojreni:

—Che ruchnaa te bi'n, ¿xhixh rac-huin lajz regolnejdx laga suga' bi'n con laareni? Palga yu' xhi sac bi'nga, dxejc sii soonreni, sucua'nreni.

¹⁶ Rut gundi remiend te ladbiejw con te la' ladcoob sa'csi sixu'n ladcoobga, sutiäjsruni ladbiejwga, sajz xhiroobru cadro biräjsga. ¹⁷ Niclaza gac guida' bincoob neñ reguidbiejw, sa'csi reguidbiejw siräjsni dxejc sixe' bin, sinijtz reguijdgä. Ni'cni nanab guida' bincoob neñ reguidcoobza, te si'c nicla tejreni di nit.

Xindxa'p Jairo näjza gunaa nani gudajñ xhajb Jesús

(Mr. 5:21-43; Lc. 8:40-56)

¹⁸ La] ni caniini rediidxga, biääd te dade' ni rnibee neñ guidoo xten rexpejn Israel. Bazuxhijbni nez loj Jesús räjpni:

—Entis gujt xindxa'pä. Gudaä, badzuub naalu yejctni te guibañsacni.

¹⁹ Dxejcti huisu Jesús, sanäni Jairo. Näj rexpejn pacni sanajlreni.

²⁰ Luxh guyu' te gunaracxhuu nani agujc tzubitio'p ijz cayajctni yälguidxbäii. Bidzujñni nez dejtz Jesús, gudajñni ro' xhajbni, ²¹ sa'csi bejñni xhigab neñ lastooni: “Palga sajz canätis ro' xhajbni, siacä.” ²² Dxejc gubiré Jesús bahuiini loj gunaaga, dxejc räjpni:

—Gulecdxilajzlu xindxa'pä. Yälrlililajz xtenlu abasiajclu.

Luxh lagajc dxejc biajz gunaaga.

²³ Cheni biu' Jesús rolijz dade' nani rnibee neñ xquidoo rexpen Israel, bahuiini rebejn ni ro] bizej näjza xhidajl rebejn ni cabedxa' cayoon, li te bieje cayajc, dxejc ²⁴ räjpni loj rebejn ga:

—Colguibicaj. Nagayejstis dxa'pga, gajdñi guet.

Dxejc rebejn ga alga ruxhiznäjreni Jesús. ²⁵ Cheni abirii rebejn neñ yu', biu' Jesús, gunaazni naa dxape', dxejc huistie dxape'ga. ²⁶ Dxejcti bire'ch diidxga guiraa neñ reguejdx ni tre' nejzga.

Basiajz Jesús tio'p lotiä'p

²⁷ Che birii Jesús ro'c, huinajl tio'p bejn̄nani di fii. Rbedxa'reni roonreni rājpreni:

—Balaslajz nuure, Xi'n toDavid.

²⁸ Che bidzujñ Jesús cadro caya'nni, gubigreni lojni. Dxejcti gunabdiidx Jesús lojreni, rājpreni:

—¿La rililajztu sajc gunä ni rniabtu?

Redade'ga basejc diidx, rājpreni:

—Sajc gunluni, Dad.

²⁹ Dxejcti gudajnni balojreni, rājpreni:

—Sugacni si'cpacni rililajztu.

³⁰ Lagajc dxejc bixal balojreni. Sas rājppac Jesús lojreni:

—Arniä, na'c chayeitu diidxre, te rut gacbeedi xhi guzajctu.

³¹ Cuantsi biriireni ro'c guslojreni cagutie'chreni diidx xcuent Jesús guideb gabi neñ reguejdxga.

Basnii Jesús te gop

³² Che biriireni cadro biajc baloj rebejn̄ga, biääd sgaii bejn̄ biädnäreni te gop loj Jesús. Yu' xp̄rit beñdxab neñ lastoo bejn̄ga. ³³ Che barilaagw Jesús xp̄rit beñdxab neñ lastoo bengopga, guslogajcni caniini. Rdxeloduxh rebejn̄ rājpreni:

—Gajdpacnu guihuii sa' redzuunre lajdx rexpejn̄ Israel.

³⁴ Dxejc reben̄ guidoo ni najc refarisee, rājpreni:

—Rbääni rexpr̄it beñdxab con yäl̄rnibee xten beñdxabro.

Rulasajz Jesús rebejn̄

³⁵ Gudejd Jesús guiraa reguedxro näjza reguedxbäz, basule'ni xtidx Dios neñ reguidoo xten rexpejn̄ Israel. Basääbni diidx xten xcäl̄rnibee Dios. Basiajczani guiraloj yäl̄racxhuu, guiraloj yäl̄gũiidx ni rajc bejn̄ neñ reguejdxga.

³⁶ Che bahuiini loj reben̄ xhidajl biaduxhni rebejn̄ga sa'csi rdebya' lajzreni, rac-huin lajzreni, najceni si'c najc rexiīl nani di ga'p baxtoor. ³⁷ Dxejcti rājpreni loj rexpejn̄pacni:

—Guliipac xhidalduxh beñ guedxliuj di gan xtidxä, luxh guxii najc reni guluiireni; najcni si'c gäj̄l ni agojl guilia', niluxh ruti mos ni guilia'ni. ³⁸ Coñab lo Dad nani najc xtenni guedxliujre te guxhal̄ni rebejn̄ ni sajc guluii reben̄ guedxliujre, gacreni si'c mos ni rliä' gäj̄l.

10

Gule Jesús guitzubitio'p rexpejn̄pacni

(Mr. 3:13-19; Lc. 6:12-16)

¹ Dxejcti gurejdxni guitzubitio'p rexpejn̄pacni, badeedni yäl̄rnibee lojreni te gurilaagwreni rexpr̄it beñdxab lastoo bejn̄ näjza te gusiajcreni guiraloj yäl̄gũiidx näjza yäl̄racxhuu.

² Laj reguitzubitio'p rexpejn̄ni ni guleni najc: Simón, ni laaza Pedr; Andrés bejtz Simón; Jacob xi'n Zebedeo; Juan bejtz Jacob; ³ Felipe; Bartolomé; Tomás; Mateo, ni najc colectoor; Jacob, xi'n Alfeo; Lebeo ni rniireni Tadeo; ⁴ Simón, te bejn̄ ni yu' loj recananita; Judas Iscariote, nani bateed Jesús ladzn̄aa rebejn̄ nani rdxe'ch lojni.

Baxhal̄ Jesús rexpejn̄pacni gutie'chreni diidx

(Mr. 6:7-13; Lc. 9:1-6)

⁵ Guitzubitio'p rebejn̄re baxhal̄ Jesús. Balijdxn̄ireni rājpreni:

—Na'c chäätu nez cad yu' rebejn ni di gumbée Dios. Na'c jiu'tu lajdx reben samaritan. ⁶ Colchäxgaa lo rexpejn Israel nani agunijt nen dojl. ⁷ Colchäj, colzäbdiidx lo rebejn, colye'tz lojreni xcäl'rnibee Dios abidzungajxh. ⁸ Colgusajc ben racxhuu, colgusajc tiejxh rebejn ni ral guejch tiejxhrenei, colguspajn bengut. Colgurilaagw xpriit bendxab lastoo rebejn. Ligaj cua'tu yäl'rnibee, ligajza coljejn dzuun.

⁹ Räjpzani:

—Na'c chanätu oor, niclaza pla't, niclaza coobr nen xdobdäjltu, ¹⁰ niclaza guijxh na'c chanätu lo nejz. Na'cza chanätu tio'p xhajbtu, nicla gura'ch, nicla baston sa'csi bejn ni rujn dzuun nungäj'l xca'ni xhi gauni.

¹¹ Räjpzani:

—Che guidzujntu xhitis te guedxro, xhitis te guedxbäz, colquiiil te bensa'c. Rolijztisni coljia'n dxejli ni juunejztu guejdxga. ¹² Cheni jiu'tu nen yu', colnii xtidx Dios lo rebejnnga. ¹³ Palga najcreni bejn ni numbee Dios, sujia'n yäl'rbedxilajz loj rebejnnga. Niluxh palga direni gac bensa'c, naaddireni xca'reni xtidx Dios, suguibi' yäl'rbedxilajzga lojtu, coljiunejz ro'c. ¹⁴ Palga direni gusaan jiu'tu rolizjzreni, palga di rlaizreni gucuadijzreni xtiidxtu, dxejc coljiunejz rolizjz bejnnga, o coljiunejz guejdxga, dxejc colcuijz guxhuj ni'tu si'c te seen gulälazreni xtidx Dios. ¹⁵ Rniliäpac lojtu, dxej ni gun Dios xcäl'guxhtisni, te yäl'guxhtisoru gun Dios rebejnnga, quela yäl'guxhtis ni gujc reben guedx Sodoma näj Gomorra.

Yäl'rusacsí ni siääd

¹⁶ Räjpzani:

—iColjhuiire! Narä suxhalä la'tu si'c xile' nez loj reloob, ni'cni colgacnasiñduxh si'c najc te bäl, colyajcza nadolajz si'c te palom. ¹⁷ Colnatiro rebejn sa'csi suteedreni la'tu ladznaa rexcuxhtisreni, siguijnzarení la'tu nen xquidooreni. ¹⁸ Sinäzarení la'tu nez loj regubier, nez loj rereii xcuent rextidxä, te gusule'tu xtidxä nez lojreni näjza nez loj rebejn nani di gumbée Dios. ¹⁹ Cheni chanäreni la'tu nez loj reguxhtis, na'c guntu xhigab xho guiniitu, niclaza guntu xhigab xhicha ni'c guiniitu, sa'csi lagajc Dios suniidx diidx guiniitu orga. ²⁰ Sa'csi et la'ditu ni guinii dxejc, Sprit xten Xtadtu Dios ni yu' nen lastootu, laani guinii nen lastootu.

²¹ 'Luxh rebejn suteedreni lagajc bejtzreni ladznaa reni ju'treni. Redad suteedreni lagajc xi'nreni, rexi'n bejn sidxe'chzarení lo xcuzajnreni te ju't bejn xcuzajnreni. ²² Guiraa rebejn guedxliuj sidxe'chreni lojtu xcuent xtidxä. Nani chanuu lo xtidxä dxej lultli, ni'c sujn gaan yäl'nabajn par tejpas. ²³ Che guirinajlreni la'tu te gusacsíreni la'tu nen te guejdx, colguxun ro'c, colchäj stee guejdx. Rniliä lojtu, ditu gun gaan tedtu guiraa reguejdx xten rexpejn Israel ansde jiaäd Xi'n Dios ni gujc Niguii.

²⁴ 'Di te bejn ni casieedgaj benroru lo xmastrni, diza te mos gac benroru lo xlamni. ²⁵ Te bejn ni casieed, rsieedruni te gacni si'c najc xmastrni, sigajcza rujn mos, riuni xtidx xlamni te gacni si'c najc xlamni. Palga rbälajreni Beelzebú nani rnibee bendxab, ¿xho direni cuälajza Beelzebú rexi'nni, ä?

Chuni'c nanab guidxejbni

(Lc. 12:2-9)

²⁶ Räjpzani:

—Ni'cni na'c guidxejbtu rebejn, sa'csi anajntu xheti te cos ni niäuu lojni ni di guidzujn dxej guixal lojni, te fii chutis bejn lojni. Xhetiza te cos xhigat'zdi ni di guidzujn dxej siejn diajg bejn xcuentni. ²⁷ Diidx nani rniä

lojtu guxhijn, colguiniini che nianij lo guedxliuj. Rediidx nani rniä chigaj rodiajgtu, colguiniini dip, jiaali colzuj, guredxa' te jiejni. ²⁸ Na'c guidxejbtu renani rugu't bejn, sa'csi direni gun gaan ju'treni xaim bejn. Colguidxejbru nani rugu't tiexh bejn näjza xaim bejn neñ gabijl.

²⁹ '¿La di bejn guto' tio'p manbáz ni rutajt por te centaab, ä? Luxh racbee Xtdadni ni yu' xhaguibaa che riajb tejni lo yuj. ³⁰ Näjza rexquidxejclu nagab tebgajreni. ³¹ Ni'cni rniä na'c guidxejbtu; sajcrutu lo te chinaa manbáz ni rutajt.

Renani rusule' xtidx Jesucrist nez loj rebejn

(Lc. 12:8-9)

³² Räjpzani:

—Chutis renani rusule' xtidxä nez loj rebejn, narä siniäza xcuentni nez loj xtdadä ni yu' xhaguibaa. ³³ Guiraa renani di gusule' xtidxä nez loj rebejn, sajczza narä dina guiniä xcuentni nez loj xtdadä ni yu' xhaguibaa.

Rlia' Jesús sa' bejn

(Lc. 12:51-53; 14:26-27)

³⁴ Räjpzani:

—Na'c guntu xhigab siädnää yälrbexdilajz lo reben guedxliujre, xhet yälcuexdixi ni siädnää, yälrdxagdijl siädnää. ³⁵ Narä siädnää yälrdxagdijl te bi'n con xtdadni; te dxa'p con xnanni; te gulijzni con xnansueegrni. ³⁶ Ni'cni lagajc resa'tu ni yu' rolijztu sidxe'chreni lojtu.

³⁷ 'Nani sanälajzru xtdadni, xnanni, luxh narä dini chanälajz, digacdi gacni xpenä; nani sanälajzru xingaanni o xindxa'pni, di gacdiza gacni xpenä.

³⁸ Nani di guu xcrujzni, nalajznu tedni trabajw, jädnajlni narä, di gacdi gacni xpenä. ³⁹ Nani guidxäl xcäl'nabajnni lo guedxliujre, sunitni yäl'nabajn xhaguibaa. Luxh nani gunijt xcäl'nabajnni lo guedxliujre xcuent rextidxä, sidxälni yäl'nabansa'c xhaguibaa.

Gaan nani xca'ni

(Mr. 9:41)

⁴⁰ Räjpzani:

—Nani guniidx rolijzni jia'ntu, runiidxzani rolijzni jia'nä; luxh nani ruscuääz narä rolijzni, rolijzni ruscuääzzani Gueb Dios nani baxhal narä. ⁴¹ Nani guscuääz te niguii ni rnii xtidx Dios rolijzni sa'csi baxhal Dios niguiiga, sica'za bejnga lagajc gaan ni xca' niguii ni rnii xtidx Dios. Nani guscuääz te beñsa'c rolijzni sa'csi beñsa'cni, sica'zani lagajc gaan ni xca' beñsa'cga. ⁴² Chutis nani gudeed mase te xhijgtis nis niäljuj xcuentä lo rebiuxe're, rniliäpac lojtu, direni gunijt, sica'pacreni nani nungäj] xca'reni.

11

Renani baxhal Juan Bautist loj Jesús

(Lc. 7:18-35)

¹ Che gulujx baluii Jesús rexpejn pacni xho gunreni dzuun, dxejcti biriini ro'c te saluiini, chasule'ni diidx lajdx rexpejn pacni.

² Juan yu' neñ latzguuib. Che biejn diajgni xhi cayujn Jesús, baxhalni tio'p xpejn pacni ³ te huinabdiidxreni:

—¿La luj ni najc Crist ni jääd, ä?, o ¿la silääznu chu stee bejn?

⁴ Dxejcti badzu' Jesús diidxre räjpni:

—Colchäj, colye'tz loj Juan recos nani riejn diajgtu, näjza recos nani ruhuiitu. ⁵ Reni di fii, ruhuiireni; reni di sa, arsiajreni, reni ral tiejxhni,

abijc tiejxhreni; reni di jien diajg, ariejn diajgreni; rebengut, ahuäjzreni, gubansacreni. Dxejcti loj rebejn proob nani cabäjz xcälracnäj Dios cacusule'reni xtidx Dios ni rusläa bejn nen dojl. ⁶ Chicbaa renani di jieed narä.

⁷ Cheni sii rebejnğa gosloj Jesús canii loj rebejn xcuent Juan:

—¿Chumi'c huihuiitu nez loj reyubijdz? ¿La te biquii ni rusniib bej, ä?

⁸ ¿Xhimi'c huihuiitu? ¿Te bejn ni sucheduxh, ä? Ni najntu rebejn nani sucheduxh rbäjzreni roliz reëii. ⁹ La'tu ¿xhicient huijtu ro'c? ¿Te fiitu te niguii ni rnii xtidx Dios, ä? O'n. Rniliä lojtu, luxh dini gac bejntis ni rnii xtidx Dios; benroruni. ¹⁰ Laa Juan nani rusä't ni bacuaa lo reguijtz cadro caj scree: Narä suxhalä te niguii nani guinii xtidxä nez lojlu; laani susuceeni nezyuj nezlojlu.

¹¹ Guliipac rniä, loj guiraa rexingaän xten gunaa, nicla tejni gajd guiricaj ni najc te bensacduxh loj Dios si'c ni najc Juan Bautist. Niluxh bejn nani najc ben huinru lo xcälrnibee Dios xhaguibaa, bejnğa maazru sajcnii loj Juan.

¹² Cheni gucli dxej ni gosloj rusule' Juan Bautist diidx najli, yu'duxh reni rlanjpac jiu'reni lo xcälrnibee Dios ni yu' xhaguibaa con yälrdxe'ch, sas reni nadxecha' rlanjzreni cuäxuuni xcälrnibee Dios. ¹³ Guiraa reniguii ni gunni xtidx Dios näjza xleii Moisés, gunixgaareni recos ni churu gac, galooli hasta che biäädli Juan Bautist. ¹⁴ Palga rlanjztu chalilajztu, lagajc Juan najc Elías, niguii xten Dios nani bia'n diidx jääd. ¹⁵ Nani sobdiajg diidx, gucuaadijgni.

¹⁶ ¿Xhicojn guntebloä rebejn nani tre' naj, ä? Najcreni si'c najc rebiiux nani rguijt nez lo guii cadro rdo', rbejdxreni lo sa'reni, ¹⁷ rniireni: “Bielnu bizej te guya'tu luxh ditu nuya'. Dxejcti bielnu redij ni nabaduxh luxh dizatu nioon.” ¹⁸ Sa'csi che biääd Juan dini niajw dizani niä', luxh räjp rebejn najcni te xpejn bendxab. ¹⁹ Dxejcti biälä narä, Xi'n Dios ni gujc Niguii, rauä, rä'ä dxejcti räjp rebejn: “Niguiire rauxha't, rätejzani bin, najcni xamigw rebejndojl näjza reniguii ni ruquijx xcuent reyuj ni rajx lo gubier.” Luxh loj rebejn ni najc xpejn Dios yuduxh xcälrnajn Dios, ni'cni baxhalni guiro'p rebejnre.

Reguejdx gualajz (Lc. 10:13-15)

²⁰ Dxejcti gosloj Jesús gudilnäjni rebenguejdx cadro benduxhni remilaagwr, sa'csi naaddireni gosiechlanjzreni xtojlneni, sanuutis nabajlneni nen dojl. Dxejcti räjpni:

²¹ —¡Gunatiru guedx Corazín! ¡Gunatiro guedx Betsaida! Paru nen guedx Tiro näjza guedx Sidón niajc remilaagwr nani gujc guedx lajdxtu, cadxejli nusiejch lajzreni xtojlneni, cadxejli niajcwreni nen godx, nidäab cobdäj yejcreni. ²² Luxh rniä lojtu: che guidzujn dxej ni gun Dios xcälguxhtisni, sidejdrutu castiigw loj rebejn ni guläjz guedx Tiro näjza guedx Sidón. ²³ Luj guedx Capernaum di gunlu xhigab chäslu xhaguibaa; jäjt nen baa jiajblu, sa'csi paru nen guedx Sodoma niajc sa' remilaagwr nani gujc guedxlajdxlu, pet najli tresijc guejdxga. ²⁴ Luxh rniä lojtu, dxej ni gun Dios xcälguxhtisni, trabajwduxhru tedtu loj rebejn Sodoma.

Coltaa loä, te gusilajztu (Lc. 10:21-22)

²⁵ Laa dxejcnii räjp Jesús:

—Rliä'pä xpala'nlu Xtääd, Dad xten xhaguibaa näjza guedxliuj, sa'csi bacua'tzlu recosre lo rebennajn, lo rebejn ni racbee, te baluiiluni loj rebennadolajz ni najc si'c biuxbäz. ²⁶ O'n. Guliini, Xtääd, sa'csi rujnlu xhigab si'c najc hueen gacni.

27 'Guiraa recosre abaniidx Xtadä loä, rutru numbeedi xingaanni; xtadtisni rumbeeni. Rutruza numbeedi xtadni, xtebtis xingaanni, näjza loj renani gudeed xingaanni gumbée xtadni. 28 Coltaa loä guiraa tu nani abadxajg, nani rsina', narä sunidxä yälrusilajz lojtu. 29 Colguisieed guntu dzuun si'cni ruluiätu. Colhuui xho runä, xho nacä nadolajz, dizana gacä beñnayedxajz neñ lastoä, ni'cni sidxäl xaimtu yälrusilajz. 30 Sa'csi guyasi najc xtzunä ni ruluiätu, dizani gac naganduxh.

12

Rutie' rexpejn Jesús triuu dxej ni rusilajzreni

(Mr. 2:23-28; Lc. 6:1-5)

1 Che sasaj Jesús nez loj reyuj cadro naga' triuu, luxh dxejga najc dxej ni rusilajz rexpejn Israel, calaan rexpejn pacni, guslojreni calädxa'reni doj lo triuu te cayajwrenini. 2 Che bahuii reben guidoo ni laa farisee, räjpreni loj Jesús:

—Ahuii xho rujn rexpejn paclu dzuun nani di nungäjl gunreni dxej nani rusilajz bejn.

3 Luxh laani räjpni lojreni:

—¿La gajdtu gol xhi caj loj reguijtz xcuent ni bejn toDavid che gulannäjni rexpejn ni, ä? 4 Biu'reni xquidoo Dios, gudajwreni yätxtiil nani di nungäjl gauni, nicla laani, niclaza rebejn nani sanäni, sa'csi yätxtiilga rebixhojz tis rajwni. 5 O ¿la gajdtu gol lo reguijtz xten leii cadro caj xcuent rebixhojz, ä? Laareni riu'reni neñ reguidoo dxej ni rusilajz bejn, rujnreni xtzuuñreni niluxh xhet dojdi rujnreni. 6 Narä rniä lojtu, ree suga' tej nani sajrcu loj guideoga. 7 Paru niacheetu xhi säloj dee: “Yälrusilajz rlazä, xhet yälrejt di guideaxa”, ditu nucuaquij redee ni xhet bejndi. 8 Sa'csi narä Xi'n Dios ni gujc Niguii rnibeä dxej ni rusilajz rebejn.

Niguii ni rxu'n naani

(Mr. 3:1-6; Lc. 6:6-11)

9 Che birii Jesús ro'c, biu'ni te xquidobäzreni. 10 Ro'c suga' te bejn ni gubijdz te naani. Luxh sa'csi caguilreni xho gucuaquijreni Jesús, gusloj canabdiidxreni lojni, räjpreni:

—¿La rusaan leii gusiajcn beñracxhuu dxej ni rusilajz bejn, ä?

11 Badzu' Jesús diidxre lojreni, räjpni:

—Chutejtu ni rajp te xiiil niluxh palga guitejbni neñ bisie che gal dxej ni rusilajz bejn, ¿xhixh dini cuää xiilga neñ bisie, ä? 12 Sacduxhru te bejn loj te xiiil, ni'cni susaan leii gun bejn dzunsa'c dxej nani rusilajz bejn.

13 Dxejcti räjpni loj dade'ga:

—Baslii naalu.

Che basliinini, dxejc biajc naani, gujcn tebloj si'c najc stelaad naani.

14 Dxejcti birii reben guidoo ni laa farisee, bachagsa'zaren te bia'nreni diidx ju'treni Jesús.

Diidx ni guniireni xcuent Jesús

15 Che gucbee Jesús xhi xhigab cayujnreni, biriini ro'c. Xhidajl bejn sanajlni, dxejc basiajc Jesús guiraa rebenracxhuu. 16 Dxejc räjpni lojreni:

—Na'cpac gäbreni chu najcni.

17 Si'c gujc te gusojb diidx ni gunii Isaías ni gunii xtidx Dios che räjpni:

18 Deeni najc xmosä nani aguleä, laani sanälazä, laani rbanälazä, sudedä sprit xtenä lojni te gusule'ni yälguxhtis xtenä lo guedxliuj.

¹⁹ Dini tilnäj bejn, dizani cuedxa';
rudza jiejni diajgni xse'ni lad nezyuj.

²⁰ Dini qui'ch nicla te niyt ni cabiejc,
dizani gusuii te duxiil ni cayujn guxh,
dxejli che gunni gaan guinibeeni yälguxhtis.

²¹ Lajtisni sustioob lastoo reben ni digac xpejn Israel.

Rucuaquijreni Jesús rajpni yälrnibee xten bendxab
(Mr. 3:19-30; Lc. 11:14-23; 12:10)

²² Dxejcti biädnäreni loj Jesús te bejn ni di fii, dizani guinii, yu' te bendxab lastooni. Dxejcti basiajc Jesúsni, te gujc guniini, te gujca bahuini. ²³ Guiraa rebejn bidxeloren, räjpreni:

—¿Xhaa laa Xi'n toDavidni, ä?

²⁴ Che biejn diajg reben guidoo ni laa farisee rediidxga, räjpreni:

—Bejnre rbää rebenxab con yälrnibee xten Beelzebú ni rnibee loj rebenxab.

²⁵ Che gucbee Jesús xhi xhigab cayujnreni, dxejc räjpni:

—Guiraa yälrnibee nani rlia' sa'ni sinitloj; te guedxro sigajc te famil nani rlia' sa'reni, nani ridilnäj sa'reni, sinitlojreni. ²⁶ Sigajca palga bendxab rbää sabendxabni, silia' sa'reni, dxejc ¿xho gac chanuu xcälrnibeereni? ²⁷ Palga narä rbää rebenxab con yälrnibee xten Beelzebú, ¿chu xcälrnibee rajc rbää rexpejntu bendxab, ä? Ni'cni lagajc laareni suluiireni xhet laadi rujntu xhigab. ²⁸ Palga narä rbää rebenxab con Xpirt xten Dios, guliipacni abidzujn xcälrnibee Dios lojtu.

²⁹ 'Bahulaare. ¿Xho gac jiu' te bejn cuan rolizj te bendaan, xho gac cuanni xhixten bejnga, palga dini gulibxgaani bendaanga? Che abilib bejnga, sajc cuanni rehxixten bejnga.

³⁰ 'Nani xhet yu'di xladä, rdxe'chni loä. Nani di jiädnajl narä, rutie'chni reni siädnajl narä.

³¹ 'Ni'cni rniä guira'ti dojl, guira'ti yälrusguee xte bejn sajc gusiäj] lajzni xtebtis yälrnijaj Sprit Dxaan xten Dios di Dios gusiäj] lajzni. ³² Chutis ni guinii xhi te diidx yälrnijaj Xi'n Dios ni gujc Niguii sajc gusiäj] lajzni, luxh chutis ni guiniyaj Sprit Dxaan xten Dios, di Dios gusiäj] lajzni, nicla lo guedxliujre, niclaza xhaguibaa.

Sajc gumbeetu bejn xcuent diidx ni rniireni
(Lc. 6:43-45)

³³ 'Palga nasa'c te yajg sicaj ninexhsa'c lojni, per che di yajg gac yagsa'c, xho xcaj ninexhsa'c lojni. Ni'cni huenliisi siembeetu te yajg che fiitu xho najc ninejxh ni rcaj lojni. ³⁴ Sa' la'tu benguijdx ni najc si'c te bäl niälasduxh, ¿xho gac guiniitu te didxsa'c?, ni ro' bejn rniitis rehxigab ni yu' nen lastoo bejn. ³⁵ Te beñsa'c rniini didxsa'c, sa'csi ganax xhigabsa'c yu' nen lastooni, te benguijdx rniitisni cosguijdx sa'csi ganax xhigabguijdx yu' nen lastooni. ³⁶ Narä rniäza, guiraa redidxguijdx nani rni bejn sudeedreni cuent lo Dios cheni gunni yälguxhtis, ³⁷ sa'csi lagajc rextiidxlu sujn guinii Dios najclu beñsa'c, lagajc rextiidxlu sujn gunijtlu lo Dios.

Rebenguijdx rniab te milagwr si'c te seen
(Mr. 8:12; Lc. 11:29-32)

³⁸ Dxejcti rebejn ni ruluii xleii toMoisés näjza reben guidoo ni laa farisee, räjpreni loj Jesús:

—Mastr, nuurnu rlanjnu guihuiinu te seen; bejn te milagwr te fiinuni.

³⁹ Badzu' Jesús diidxre, räjpmi:

—Rebenguijdx ni rusguee rniab te seen, niluxh xhetru seendi fiireni xseentis Jonás, dade' ni gunii xtidx Dios. ⁴⁰ Sa'csi lagajc si'cni guyu' Jonás xque' te bälro choñ dxej, choñ yääl, si'cza chu Xi'n Dios ni gujc Niguü neñ lastoo guedxliuj choñ dxej, choñza yääl. ⁴¹ Cheni gac yälguxhtis xten Dios pet sistie rebejn ni siääd Nínive te fiireni gac yälguxhtis rebejn ni tre' lo guedxliuj naj, niluxh säjb rebejn Nínive abanijt rebejnre sa'csi rebeñ Nínive basiejch lajzreni, bia xtojłreni che basule' Jonás xtidx Dios lojreni. Luxh nani yu' lojtu naj, sacduxhruni loj Jonás. ⁴² Nájza reiñ xten rebeñ sur sistieni te fiini gac yälguxhtis rebejn ni tre' lo guedxliujre naj, niluxh nájzani säjbni abanijtreni. Sa'csi laani zitduxh biriini te biädcuadiajgni reyälñajn xten Salomón, luxh nani yu' lojtu naj nanduxhruni loj Salomón.

Te spritdxuudx ni rbisac
(Lc. 11:24-26)

⁴³ Räjpmi:

—Cheni rii te spritdxab neñ lastoo te bejn, ricanzajni nez lo reyubijdz, ritiilni cadro gusilajzni, per cad rdxäldini. ⁴⁴ Dxejcti rujnni xhigab, naani, guibisacä cadro biriä. Cheni rbisacni ro'c, rdzujni si'c rdzujñ te bejn neñ te yu' ni naya neñni, naliobsa'cni, sucheeni, luxh rut rbäjzdi ro'c. ⁴⁵ Dxejcti rijni, rixiini sgajdz sprit nani najc nadxuudxru lojni te jäädläznäjrenini neñ lastoo bejnga. Dxejcti rxhñduxhru bejnga lojni gujñi galoo. Sigajcza gac rebejn ni tre' lo guedxliujre naj.

Xnan Jesús con rebejtzni
(Mr. 3:31-35; Lc. 8:19-21)

⁴⁶ Lał ni caninäjni rebejn, bidzujñ xnanni con rebejtzni, suga'reni rolä' rlaizreni guiniireni lojni. ⁴⁷ Dxejcti biääd tej ni räjpmi loj Jesús:

—Xnanlu nájza rebejtzlu suga' rolä' rlaizreni guininäjreni luj.

⁴⁸ Laani badzu'ni diidx lo bejnga räjpmi:

—¿Chuni'c najc xnanä? ¿Chuni'c najc rebetzä?

⁴⁹ Dxejcti basgaani naani nez loj rexpejñpacni, räjpmi:

—jRedee najc xnanä redeeza najc rebetzä! ⁵⁰ Chutis nani rujñ si'cni rñibee Xtadä ni yu' xhaguibaa ni'c najc betzä, ni'c najc bisianä, ni'cza najc xnanä.

13

Xcuent bejn nani rbe'c binij
(Mr. 4:1-9; Lc. 8:4-8)

¹ Lagajc dxejga birii Jesús royu'ga, huicueni nez ro' nisdoo. ² Xhidalduxh bejn bire' cadro suga'ni, sas biu'ni neñ te barcw, ro'c gurejni. Dxejcti rebejn gurej nez lo plaii. ³ Dxejc gusloj caguluui Jesús con recuent, räjpmi:

—Cołcuadiajg. Birii te dade' ni rbe'c binij te cue'cni binij. ⁴ Lał ni cabe'cni binij yu' binij ni bitejb gajxh nez ro' nesiuj, biääd remane' ni rutajt, sas gudajwreni binijga. ⁵ Yu' binij ni bitejb nez neñ reguij cadro guxii yu' yuj. Gulengajc binijga sa'csi direni nibej jäät neñ yuj. ⁶ Che birii gubijdx, bigolreni sa'csi xhetiza xlobaani, dxejc gubijdzni. ⁷ Yu'za binij ni bitejb neñ reguejch. Che guroob reguejchga, dini nusaan niroob regäje', gubijdztireni. ⁸ Guyu' binij ni gurej lo reysusa'c, ro'c gucduxhni. Yu' binij cuaj te gayuui, yu'za binij cuaj gayojñni, yu'za ni cuaj galbitzuuni loj cade tej binij ni gurej. ⁹ Nani rsobdiajg diidx gucuadiajgni diidxre.

*Xhi pajr najc recuent xten Jesús**(Mr. 4:10-12; Lc. 8:9-10)*¹⁰ Dxejcti gubig rexpejn pacni, gunabdiidx lojni, räjpreni:

—¿Xhicuent rusule'lu diidx loj rebejn con recuent?

¹¹ Dxejcti badzu' Jesús diidx räjpni lojreni:—Sacnäy Dios la'tu te gacbeetu recos xhiga'tz xten xcäl'rnibee Dios xh-
aguibaa, luxh laareni digacdi gacbeerenini. ¹² Chutis ni arajp yäl'racbee,
sica'runi te gapruni yäl'racbee. Sas nani guxii rajp yäl'racbee, guiraa yäl'racbee
ni räjpni sibicaj. ¹³ Ni'cni rniä lojreni con recuent sa'csi mase cadxelo-
reni, direni fii, mase cacuadiajgrena di diajgrena jiejn, xhet racbeedireni.
¹⁴ Laareni najcreni si'c te soob diidx ni gunii Isaiás, dade' ni gunii xtidx Dios,
che räjpni:

Siejn diajgpactu, niluxh xhetliidi gacbeetu,

sidxelojpacu, niluxh ditu fii.

¹⁵ Sa'csi guyalajz rebejnre, lastooreni najc si'c te guij,

di diajgrena jiejn,

luxh niäüza balojreni, didi fisa'creni con balojreni,

didi jiejnza diajgrena, didi gacbeez lastooreni,

didi gusiejch lajzreni guibi'reni loä te gusiaca lastooreni.

¹⁶ 'La'tu col'guibalaznäy balojtu sa'csi rhuisa'ctu, riensa'cza diajgtu.¹⁷ Rniliäpac, xhidajl redade' ni gunii xtidx Dios, näjza xhidajl beñsa'c
rlazduxh nuhüii sa' recos ni cahüitu, luxh direni nuhüini, räljzreni niejn
diajgrena sa' rediidx nani cayejn diajgtu, luxh di diajgrena niejnii.*Rusule' Jesús xcuent bejn ni rbe'c binij**(Mr. 4:13-20; Lc. 8:11-15)*¹⁸ Colcuadiajg xhi säloj xcuent bejn nani rbe'c binij. ¹⁹ Rebejn nani rucua-
diajg diidx xten xcäl'rnibee Dios, niluxh direni gacbeeni, najcreni si'c najc
binij nani bitejb nez ro' nesuyj; riääd bendxab rudzucajni rediidx nani biu'
neñ lastooni. ²⁰ Rebinij nani bitejb nez neñ reguij, najc si'c rebejn nani
rucuadiajg diidx, gustli rca'reni diidxga, ²¹ luxh guxii yu' xlobaani, direni
sutijp. Che rdejdreni trabajw, che rdxe'ch bejn lojreni, sa'csi rucuadiajgrena
xtidx Dios, rusiejch lajzreni, rbälazni diidxga. ²² Rebinij nani gurej neñ
reyaguejch säloj rebejn nani rucuadiajg rextidx Dios rujnrureni te gunreni
dzuun te ga'preni yäl'nasa'c ni yu' lo guedxliujre. Dxejcti rexcäl'nasa'c xten
guedxliujre rusgueereni. Guiraa recosre rutaü lo xtidx Dios neñ lastoo
rebejnre, dini gusaan gac te cosechsa'c neñ lastoo rebejnre. ²³ Dxejc rebinij
nani rtejb lo reyusa'c, ni'c najc si'c rebejn nani rucuadiajg xtidx Dios, nani
racbee diidxga, nani rutie'ru sa'reni te racxhidajlreni. Yu' bejn ni najc si'c
binij ni gujc te gayuu; yu' bejn ni najc si'c binij ni gujc gayojn; yu' bejn ni
najc si'c binij ni gujc galbitzuu.*Xcuent triuu cadro guyu' cuanguejch*²⁴ Dxejc bij Jesús stee cuent, räjpni:—Xcäl'rnibee Dios xhaguibaa najc si'c te bejn nani gule'c ganax triusa'c
lo xyujni. ²⁵ Lañ nagaguejs bejnğa, biääd te bejn nani rdxe'ch lajz loj
xpaxhuaan binijğa, biädle'cni bedz cuanguejch lo xtriuu bejnğa, dxejcti sääni.²⁶ Cheni gulejn triuuga, birii doj lojni, dxejc biricaj näjza cuanguejch ro'c.²⁷ Dxejcti räjp remos lo xlamreni; “Dad, ¿la et ganax triusa'c di gule'clu,
ä? ¿Caxh bazaj cuanguejchre?” ²⁸ Räjp xlamreni: “Te bejn ni rdxechlajz
loä biädle'cchani.” Dxejcti gunabdiidx rexmosni räjpreni: “¿La rlajz guebju
cholädxanu recuanguejchğa, ä?” ²⁹ Dxejc räjp xlamreni: “Na'c, sa'csi che

guiliäädxtu cuanguejchga, nägajcza triuu guiliäädxtu. ³⁰ Colsaan tioobreni tebloj. Che guire' cose'ch, dxejc guinibeä remos gutiexgaareni cuanguejch, guliibrenini gacni ters, dxejcti checni. Dxejcti sajc gutie'reni triuu chucheeni nen yu'."

Xcuent bedz muxhtas

(Mr. 4:30-32; Lc. 13:18-19)

³¹ Bijza Jesús stee cuent räjpni:

—Xcälrmibee Dios xhaguibaa najcni si'c te bedz muxhtas nani cue'c te bejn lo xyujni. ³² Gulii bejdzga najc bāze'ru loj guiraa rebejdz, per che roob yajgga, rajcni guroobru loj guiralii recuaan, rajcni te yagro, luxh riääd remane' ni rutajt riädyujn xpitiäazreni lo xajcw yajgga.

Xcuent levaduur

(Lc. 13:20-21)

³³ Bijzani stee cuentre, räjpni:

—Xcälrmibee Dios xhaguibaa najc si'c levaduur nani rugu'ch te gunaa lo choñ mediid arin, dxejc ni'c rusaguijni guideb cojbgā.

Xhicuent baluii Jesús ganaxtis con cuent

(Mr. 4:33-34)

³⁴ Baluii Jesús guiraa rebejn ganaxtis con recuent, xhetiru stee mood nuluini, ganaxtis con cuent guniini lojreni. ³⁵ Si'c bejnni te guzobj xtidx dade' ni gunii xtidx Dios che bacuaani lo reguijtz, räjpni:

Suiyā diidx con recuent,

suiyā diidx xcuent recos ni naga'tz che bencheeli Dios guedxliuj.

Rusule' Jesús xcuent cuanguejch nen triuu

³⁶ Dxejcti basadiidx Jesús rebejn, biu'tini nen yu' cadro bire' rexpejn pacni lojni, räjpreni lojni:

—Basule' loonu xcuent cuanguejch ni guyu' loniaa.

³⁷ Räjp Jesús lojreni:

—Bejn nani rbe'c retriusa'c, najc Xi'n Dios ni gujc Niguii; ³⁸ loniaaga najc guedxliuj; retriusa'c najc rebejn nani najc xpejn Dios, nani rucudiajg xtiidxni; recuanguejchga najc rebejn ni najc xpejn bendxab. ³⁹ Bejn nani rdxe'ch lajz najc lagajc bendxab. Cose'ch säloj che nitloj guedxliuj; reni gutie' cose'ch najc rexangl Dios. ⁴⁰ Sigacni guire' recuanguejch te chääni lo guiboo te checni, sigajcza gac che gac fis guedxliuj. ⁴¹ Xi'n Dios ni gujc Niguii suxhaḷ rexanglni te jäädgutie'reni, te jäädlääreni lo xcälrmibeeni guiraa renani rujn riajb bejn nen dojl, näjza reni rujn cosguijdx. ⁴² Susälreni rebejnga nen te or cadro cayecduxh. Ro'c sonduxhreni, sauya'reni läijyreni.

⁴³ Dxejcti rebensa'c sidimbicha'reni si'c gubijdx lo xcälrmibee Xtadreni. Palga sobdiajgtu, colgucuaadiagsa'c.

Te cossacduxh ni naga'tz

⁴⁴ Räjpszani:

—Si'cza xcälrmibee Dios xhaguibaa najc si'c te cossacduxh ni naga'tz lo te yuj loniaa. Bidxäl te dade'ni, luxh bacuatzsacnini. Dxejcti rbalajzni, huijni, huito'ni guiraa xhixtenni te rajpni meel siini yujga.

Perl nani sacduxh

⁴⁵ Räjpszani:

—Xcälrmibee Dios xhaguibaa najcza si'c najc te dad rapduxh nani caguiil perlsa'c te siini. ⁴⁶ Che bidxälni te perlsa'c, tejni sacduxh, bato'ni guiraa xhixtenni te gusiini perлга.

*Guijxh ni rniaaz bājł*⁴⁷ Rājɓzani:

—Xcālɓnibee Dios xhaguibaa najcza si'c te guijxh ni rusāl bejn lo nis te rniaazreni guiraloj cuaa bājł. ⁴⁸ Cheni agudxajni, rbäärenini nez ro' nisdoo, te ro'c rbereni loj rebājł. Rebājł ni najc hueen rucheeni neñ te dxijm; nani di gac hueen rusālrenini te laad. ⁴⁹ Si'cza gac che gac fis guedxliuj; sirii rexangl Dios te sudzucajreni rebenguijdx lo rebensa'c. ⁵⁰ Dxejcti susālreni rebenguijdx neñ te or cadro cayecduxh; ro'c sonduxhreni, sauya'reni lājyreni.

*Te beñ rajp*⁵¹ Dxejcti gunabdiidx Jesús lojreni, rājɓni:

—¿La racheetu guiraa ni caniä lojtu, ä?

Dxejcti rājɓreni:

—O', racbeenuni Dad.

⁵² Dxejcti rājɓni lojreni:

—Cheni rsieed te bejn nani najn leii xcuent yälɓnibee xten Dios xhaguibaa, najcni si'c te lam nani rajc rbää lo rexcälɓnasa'cni recos ni nacoob, nājza recos biejjw.

*Jesús lo guedx Nazare't**(Mr. 6:1-6; Lc. 4:16-30)*

⁵³ Che gulujx basule'ni recuentre, biriini ro'c, sääni. ⁵⁴ Huijni lagajc lajdxni. Ro'c gusloj caguluiini neñ xquidobäzreni ro'c. Dxejcti rdxeloduxh reben ro'c, rājɓreni:

—¿Caro bisieedni reyälɓnajnre? ¿Xho rajc rujnni remilagwr? ⁵⁵ ¿La et laadi dee ni najc xi'n carpinteer, ä? ¿La et Mariidi najc xnanni? Dee ni najc bejtz Jacobo, José, Simón con Judas. ⁵⁶ Luxh rebisiajnni rbäjzreni lo guejdxre. ¿Cacharo bisieedni guiraa nani caguluiini?

⁵⁷ Dxejcti cayujnni xhigab chugan la guliini, dxejc rājɓ Jesús lojreni:

—Guiraa rebejn rinälajz te niguii nani rnii xtidx Dios, biädla reben lajdx-pacni direni jiu xtiidxni.

⁵⁸ Ni'c dini niujn xhidäl milagwr ro'c sa'csi direni chalilajz xtiidxni.**14***Che gujt Juan Bautist**(Mr. 6:14-29; Lc. 9:7-9)*

¹ Lagajc neñ redxejga Herodes, ni laaza tetrarca, biejn diajgni diidx xcuent ni cayujn Jesús. ² Dxejc rājɓni lo rexmosni:

—Dee najc Juan Bautist. Pet agubansacni lo rebengut, ni'cni rajɓni yälɓnibee te rujnni remilagwr.

³ Si'c gunii Herodes sa'csi laani basäuuni Juan neñ latzgüiib. Niluxh gunibeeni biliibni con caden neñ latzgüiib xcuent Herodías, ni gujc chääl bejtzni Felipe. ⁴ Bidxe'chni sa'csi rājɓ Juan lo Herodes:

—Et laadi rujnlu rbäznäjlu chääl bejtzlu.

⁵ Rlajz Herodes nugu'tni Juan, luxh rdxejbni rebenguejdx, sa'csi guiraareni rniireni Juan najc te niguii ni rnii xtidx Dios. ⁶ Dxejc che gojl laj Herodes gujc lanij, birii xindxa'p Herodías te baya'ni nez loj regelnejdx. Luxh sa'csi bidxaglazduxh Herodes baya'ni, ⁷ rājɓni loj gunaaga:

—Gunab xhitis ni rlanjzlu, sa'csi gudix lazá gunidxä ni guiniabtislu.

⁸ Dxejcti gunaaga, abalijdx xnannini, rājɓni lo Herodes:

—Loj te platön baniidx bitiujejc Juan Bautist.

⁹ Diidxga benhuin lastoo reii Herodes, per sa'csi abia'n diidx, niluxh abiejn diajg rebejn, gunibeeni gudeedreni nani guiniab gunaaga. ¹⁰ Dxejcti gunibeeni biru' yejc Juan Bautist nen latzguiib. ¹¹ Sas biädnäreni yejcti lo te platón, badeedrenini loj gunaaga. Dxejcti gunaaga badeednini lo xnanni.

¹² Dxejcti bidzujn rexpejn Juan sanäreni togoolda te huicua'tzrenini. Dxejcti hui'sa'nreni diidx loj Jesús.

Bayaan Jesús gaii mił bejn
(Mr. 6:30-44; Lc. 9:10-17; Jn. 6:1-14)

¹³ Che biejn diajg Jesús xhi guzajc Juan, xtebni huä'pni nen te barcw huijni stee laad nez lo reyubijdz. Che gucbee rebejn caro sääni, huinajlreni Jesús lo yuj. Guiraa nen reguejdxga birireni. ¹⁴ Che birii Jesús nen barcw, bahuiini loj xhidalduxh bejn, dxejc balazlajznireni, basiajcti rebejn nani racxhuu.

¹⁵ Cheni acayu' guxhijn, gubig rexpejn pacni lojni räjpreni:

—Rut rbäjzdi nez lo reyubijdzre, niluxh agudxej naj. Basadiidx rebejn te jiiireni nez rerench te chasiireni xhi gaureni.

¹⁶ Räjp Jesús:

—Xhicuent jiiireni. La'tu colgudeed xhi gaureni.

¹⁷ Dxejcti räjpreni:

—Xhetru räjpdinu ree. Gaiitis yätxtiil näjza tio'p bäjl räjpnu.

¹⁸ Laani räjpni:

—Coltanäni ree.

¹⁹ Dxejcti gunibeeni gurej rebejn lo guixa'. Dxejcti cua'ni guigaii yätxtiil näjza guiro'p bäjl, guläsni lojni xhaguibaa, badeedni xquixhtios lo Dios, dxejcti gula'ni reyätxtiil. Badeednini loj rexpejn pacni. Dxejcti rexpejn pacni gudisrenini loj reben xhidajl. ²⁰ Guiraareni gudajw, gudxaj xque'reni. Dxejcti batie'reni yätxtilbiujy nani bia'n. Si'cti tzubitio'p dxijm gudxajni. ²¹ Renani gudajw najcreni si'cti gaii mił niguii, xhet näjdi regunaa niclaza rebiuux bigab.

Gusaj Jesús lo nisdoo
(Mr. 6:45-52; Jn. 6:16-21)

²² Sas gunibee Jesús biu' rexpejn pacni nen barcw te ganidreni tedreni stee lad nis lałni casadiidxni rebejn. ²³ Che gulujx basadiidxni rebejn, huä'p Jesús yecdaj te xtebni guninäjni Dios Xtadni. Che gojl guxhijn, ro'c sugaxteb Jesús. ²⁴ Luxh barcw galäii lo nis sasaj. Cagusnibduxh reoļ barcw, liriääzni lo nis sa'csi cabi' beduxh cadro sääreni. ²⁵ Rsildooru gubig Jesús, bidzujni lojreni, siädsajni lo nisdoo. ²⁶ Che bahuii rexpejn pacni siädsajni lo nisdoo, bidxebreni, räjpreni:

—Colhuii te fantasmni —guredxa'reni sa'csi bidxebduxhreni.

²⁷ Dxejc gunii Jesús lojreni, räjpni:

—Na'c guidxeljbtu, laa naräni; colsutijp lastootu.

²⁸ Dxejcti gunii Pedr lojni, räjpni:

—Dad, palga lujni, gunibee jäälä lojlu nez lo nisre.

²⁹ Räjp Jesús:

—Gudaa pues.

Dxejcti birii Pedr nen barcw gusajni lo nis te sääni nez loj Jesús. ³⁰ Che bahuii Pedr beduxh ni cabi', bidxebni, dxejc gusloj cayääzni nen nisdoo. Guredxa'ni, räjpni:

—Dad, i gulää narä!

³¹ Lagajc dxejc gunaaz Jesús naani, räjpni loj Pedr:

—Guxii rajplu yälrlililajz. ¿Xhicuent guctio'p lajzlu?

³² Che huá'preni nen barcw, gulázgajc bej. ³³ Dxejcti renani sää nen barcw bazuxhijbreni nez loj Jesús rájpreni:

—Guliipacni najclu Xi'n Dios.

Basiajc Jesús reben racxhuu guedx Genesare't

(Mr. 6:53-56)

³⁴ Che gudejdreni lo nis, bidzujnreni nez lo reyuj xten Genesare't. ³⁵ Che biembe reben ro'cni, batie'chreni diidx guideb gabi lajdxreni. Dxejcti biädnäreni guiraa reben racxhuu lojni. ³⁶ Gunabduxhreni gusaanni canreni ro' xhajbtisni. Dxejcti guiraa renani gudajn xhajbni, biajcreni.

15

Nani ruxhin bejn

(Mr. 7:1-23)

¹ Dxejcti gubig gaii rebejn nani ruluii leii näjza rebejn guidoo ni laa farisee. Siädreni guedx Jerusalén, rájpreni loj Jesús:

² —¿Xhicuent di rexpejnpaclu jiu xcostrumbr rebengool? ¿Xhicuent direni gusoob yälrdiib naareni che rajwreni?

³ Badzu'ni diidx, rájpmi:

—¿Xhicuent di la'tu gusoobzatu xtidx Dios? Dee alga riurutu rexcostumbrtu. ⁴ Dios gunibeeni xho guntu che rájpmi: “Gojp xpala'n xtadlu, xnanlu”, näjza “Nani guiniyaj lo xtadni o loj xnanni, suguetni.” ⁵ Luxh la'tu rniitu sajč gäb chutis bejn loj xtadni o loj xnanni: “Digacdi gacnäätu sa'csi guiraa ni rapä abadedäni lo Dios.” ⁶ Luxh chutis ni guinii si'c, xhetru nanabdi gacnäjni xtadni o xnani. Si'c ni cabälaztu rextidx Dios te gac chanuutu rexcostumbrtu. ⁷ ¡Bejn ni rusguee najctu! Laaca gunii Isaías, bejn nani gunii xtidx Dios xcuenttu cheni rájpmi:

⁸ Rebenguejdxre con ro'reni rliä'preni xpala'nä niluxh lastooreni zijt suga' nez loä.

⁹ Xlia'si rajnreni narä, sa'csi ruluiireni si'c xtidxä reyälrmibee xten reben guedxliuj.

¹⁰ Dxejcti gurejdxni rebejn, rájpmi lojreni:

—Colcuadiaj, colyacbee. ¹¹ Nani riu' ro' bejn di guxhin bejnğa, sanga nani ri' ro' bejnğa ni'cni ruxhin bejnğa.

¹² Dxejcti rexpejnpacni gubig lojni, rájpreni:

—¿La najnlu bidxe'ch rebejn farisee che biejn diajgreni diidx ni guniilu?

¹³ Dxejc laani rájpmi:

—Xhitis yajg nani di Xtadä ni yu' xhaguibaa nusuj siliädxa'ni guideb xlobaani. ¹⁴ Colgusaanreni; lotiä'preni, ruluiireni nezuy lo salotiä'preni. Luxh palga te bejn lotiä'p guluii canejz chää stee lotiä'p, guiro'preni sitejbreni nen te gueed.

¹⁵ Rájpm Pedr loj Jesús:

—Basule' cuentre loonu.

¹⁶ Rájpm Jesús:

—¿La näjza la'tu ditu gacbee, ä? ¹⁷ ¿La ditu gacbee guiraa ni rajw bejn ru' xque'ni, dxejcti che rdejndi xque'ni, abigo'ni? ¹⁸ Niluxh diidx nani ri' ro' reben, nen lastoo bejn riini; dee ni ruxhin bejn. ¹⁹ Sa'csi nen lastoo bejn ri' rehxigabguijdx xten rebejn ni rugu't sa'ni; xten rebejn ni rusguee gunaa; xten rebejn ni rusguee chääl sa'ni; xten rebejn ni rbajn; xten rebejn ni rni

didxhii lo sa'ni; xtenza rebejn ni rutijl sa'ni. ²⁰ Laa sa' recosre ni ruxhin bejn. Che dini gusoob recostumbr xte yälrdiib naani, di ni'c guxhin bejn.

*Te gunazit nani huililajz xtidx Jesús
(Mr: 7:24-30)*

²¹ Biriiti Jesús ro'c, sääni nez región xten Tiro näjza Sidón. ²² Nejzga rbäjz te gunaaha cananee, cabedxa'ni biäädni lo Jesús, räjpni:

—Dad, xi'n toDavid, balaslajz narä. Xindxa'pä yu' xpej bendxab lastooni, niluxh cagusacsíduxhnini.

²³ Xhet räjpdi Jesús lojni. Dxejcti biädnaðduxh rexpejn pacni lojni, räjpreni:
—Barilaagw gunaare, didi rbedxa'ni siädnañlmi luñ.

²⁴ Dxejcti räjp Jesús lojni:
—Dios baxhañ narä lojtis xpen Israel nani agunijt nen dojl.

²⁵ Dxejcti gubig gunaaga, bazuxhijbni nez loj Jesús, räjpni:
—Dad, gucnäj narä.

²⁶ Dxejc räjp Jesús lojni:
—Di gac hueen xca' bejn xcuxtiil rexi'nni gusañnini lo rebä'cw.

²⁷ Dxejc räjp gunaaga lojni:
—Guliini Dad, näjza rebä'cw rajw te la' yätxtiil ni rtejb lo mex xten xpax-huanaani.

²⁸ Dxejcti räjp Jesús lojni:
—Nane', lacti guroob najc xcälirililajzlu. Sugac si'cni rñajzlu.
Lagajc dxejc biajc xindxa'pni.

Basiajc Jesús xhidaj beñ racxhuu

²⁹ Birii Jesús ro'c gudejdni nez ro' nisdoo ni laa Galilee. Huäpgajcni yejc te dajn, ro'c gurejñi. ³⁰ Xhidajl bejn bidzujñ cad sobga'ni. Siädnañeni reben ni rajc ni'ni, reben ni najc lotiä'p, reben gop, reben ni xheti naani, näjza xhidalo beñ racxhuu, bidzunñajrenini nez loj Jesús. Dxejcti basiajcnireni.

³¹ Ni'cni lacti bidxeloduxh reben xhidajlga che bahuiireni rñii regop, rñajc reni xheti naani, rsiaj reni rajc ni'ni, ruhuüi relotiä'p, dxejc rñiä'preni xpala'n Xtiis rexpen Israel.

*Badeed Jesús xhi gudajw tajp miñ bejn
(Mr: 8:1-10)*

³² Gurejdx Jesús rexpejn pacni räjpni lojreni:

—Riaä rebejnre sa'csi agujc choñ dxej yunäjreni narä luxh xhet ca'direni gaureni. Di rñazä guxhañläreni jüreni rolizreni palga gajdreni gau didi guidxajgreni lo nezyuj.

³³ Dxejcti räjp rexpejn pacni lojni:

—¿Xho guidxälñu xhi gau reben xhidajlre nez lo reyubijzre cadro rut rbäjzdi, ä?

³⁴ Räjp Jesús lojreni:

—¿Bal yätxtiil ca'tu?

Räjpreni:

—Gajdzisni, näjza gaii bälbäze'.

³⁵ Sas gunibee Jesús cue rebejn lo yuj. ³⁶ Dxejc cua' Jesús guigajdz yätxtiilga näjza rebäjñ, badeedni xquixtiis lo Dios dxejc gula'ni reyätxtiilga näjza rebäjñga badeednireni loj rexpejn pacni. Dxejcti laareni gudisreni yätxtiilga con rebäjñga lo rebejn xhidajñga. ³⁷ Guiraareni gudajw, gudxaj xque'reni. Che gulujx gudajwreni, batie'reni reyätxtiil ni bia'nga, gudxaj gajdz dxijmni.

³⁸ Renani gudajwga najc si'cti tajp miñ bejn, niluxh xhet näjdi regunaa niclaza

rebiuux bigab. ³⁹ Dxejcti basadiidx Jesús rebejn, biu'tini neñ barcw te gudejdni lo nisdoo nez región xten Magdala.

16

Reben guidoo ni laa farisee näjza saducee rniabreni te milagwr si'c te seen (Mr. 8:11-13; Lc. 12:54-56)

¹ Refarisee näjza resaducee bidzujñreni lo Jesús, gunabreni gunni te milagwr, gudeedni te seen ni rien xhaguibaali. Niluxh caguguesireni, sa'csi rlanjreni guiga' Jesús. ² Dxejc badzu' Jesús diidxre räjpni lojreni:

—Che rajl gudxej, rniitu: “Saru gac te dxej guixee sa'csi naxniaa xhaguibaa.” ³ Che rajl rsil rniitu: “Etladi gac te dxej nadxej sa'csi naxniaa xhaguibaa niluxh tre' za.” Xhoxh numbeetu xhi säloj reseñen ni rien xhaguibaa, luxh ditu gumbee xhi säloj reseñ xcuent redxejre, nalajznu recos ni cayajc.

⁴ Reben guiidxre, rebeñ guyalajz rniab te senro, te milagwr, luxh dirureni fii stee milagwr; suhuiitisreni xsen Jonás.

Dxejcti basa'n Jesúsreni ro'c, sä'tini.

Levaduur xten refarisee (Mr. 8:14-21)

⁵ Che gudejd rexpejnñpacni stelaad nisdoo biäl-lajzreni ninäreni yätxtiil.

⁶ Dxejcti räjp Jesús lojreni:

—Bacuadijg, colñati levaduur xten refarisee näjza resaducee.

⁷ Dxejcti bejnreni xhigab neñ lastooreni: “Si'c caniini sa'csi dinu niopnä yätxtiil.” ⁸ Luxh gucbee Jesús xhigabga, dxejc räjpni lojreni:

—¿Xhicuent rujntu xhigab xhet yätxtiildi ca'tu, ä? ¡Huinuxh najc xcälirililajztu! ⁹ ¿La gajdtu gacbee? ¿La diza lajztu guinaj che gudisä gaii yätxtiil gudajw gaii miñ bejn, ä? ¿Bal dxijmni batie'tu, ä? ¹⁰ ¿La diza lajztu guizaj che gudisä gajdz yätxtiil gudajw tap miñ bejn, ä? ¿Bal dxijmni batie'tu? ¹¹ ¿Xhicuent ditu gacbee et yätxtiildi cagusa'tä cheni caniä lojtü colñati levaduur xten refarisee näjza resaducee?

¹² Dxejcrü gucheereni dini niäjp: “Colñati levaduur xten yätxtiil.” Laani caniini: “Colñaáti yäl'ruluii xten refarisee näjza resaducee.”

Bicäjp Pedr Jesús najc Cristpac (Mr. 8:27-30; Lc. 9:18-21)

¹³ Che bidzujñ Jesús región xten Cesarea xten guedx Filipo, gunabdiidx Jesús loj rexpejnñpacni, räjpni:

—¿Chu naj rebejn nacä narä Xi'n Dios ni gujc Niguii?

¹⁴ Laareni räjpreni:

—Yu'reni naj luj najclu Juan Bautist; yu'zareni rniñ luj najclu Elías, peta sgaiireni rniñ luj najclu Jeremías o stee niguii ni rniñ xtidx Dios.

¹⁵ Dxejcti räjpni lojreni:

—La'tu, ¿chuni'c rniitu nacä?

¹⁶ Dxejc räjp Simón Pedr:

—Luj najclu Crist, Xi'n Dios nani nabajn.

¹⁷ Badzu' Jesús diidxre, räjpni:

—Chicbaalu, Simón Pedr, xi'n Jonás, sa'csi xhet bejnñdi baluii dee lojlu, Xtadätis ni yu' xhaguibaa baluiinini lojlu. ¹⁸ Narä rniä lojlu, luj najclu Pedr, nani säloj: “Te guj.” Sa'csi sibäxtiejlü guidxagsa'za renani rililajz xtidxä, niluxh che guetreni, direni nitloj. ¹⁹ Narä gunidxä yäl'rniabee lojlu te gulijdxlu

rebejn nani ahuiililajz xtidxä. Xhitis ni gusaanlu gunreni, o xhitis ni dilu gusaan gunreni, susoob Dios xtiidxlu.

²⁰ Dxejcti gunibee Jesús rutlojdi gäb rexpejn_{pacni} laani najc Guejb Crist.

Gunii Jesús xho guetni

(Mr. 8:31–9:1; Lc. 9:22-27)

²¹ Lagajc dxejc gosloj cagusule' Jesús diidx lo rexpejn_{pacni}, guniini lojreni xho nanabpac cháani guedx Jerusalén te ro'c tedni trabajwduxh ladznaa rebengool xten guidoo, ladznaa rebixhojz, näjza rebejn ni najn xleii Moisés. Guniizani sugu'trenini, niluxh ni riojn dxej sibansacni lo rebengut.

²² Dxejcti huinä Pedr Jesús te laad, gosloj cadilnäjnni, räjpni:

—¡Gacnäj Dioslu, Dad! ¡Gurniälojlu gaclu si'c!

²³ Dxejc gubiré Jesús, räjpni lo Pedr:

—¡Gubicaj loä beñdxab! Na'c rusiejytislu loä. Luj dilu gun xhigab xten Dios, alga xhigab xten rebenguedxliuj rujnlu.

²⁴ Dxejcti räjp Jesús loj rexpejn_{pacni}:

—Palga yu' chu tejtu rlaiz guirinajl narä, sucuälazni lagajc laani, suguuni xcrujzni, nalajznu tedni trabajw, sujiädnajni narä. ²⁵ Sa'csi nani rlaiz gunni gaan xcäl'nabajnni, sunijtnini. Luxh nani runijt xcäl'nabajnni por narä, sidxälni xcäl'nabajnni par tejjas. ²⁶ Sa'csi çxhi gaan gun te bejn palga ga'pni guideb guedxliuj, luxh nit xaimni lo Dios, ä? o çla yu' xhi gudeeb bejn te siini xaimni? ²⁷ Sa'csi narä Xi'n Dios ni gujc Niguüi siälä lo yälrdimbicha' xten Xtaäa con rexanglni, dxejcti siguixä tebgaj bejn si'ctis ni gujc xtzuunni. ²⁸ Rniliäpac lojtu, loj reni tre' ree naj, yu'reni di guet dxejli ni fixgaareni jiälä narä Xi'n Dios ni gujc Niguüi lo xcäl'nibeä.

17

Chuni'c najc guroob

(Mr. 9:2-13; Lc. 9:28-36)

¹ Che gudeed xho'p dxej, huinä Jesús Pedr, Jacobo, con Juan betz Jacobo, xtebreni huijreni jiaa yejc te dajn. ² Dxejcti nez lojreni bidxaa xho rujn lojni. Lojni gosloj rdimbicha' si'c gubijdx; xhajnbi gujc nolbäj si'c te bajl. ³ Dxejc bahuigajczeni loj Moisés näjza loj Elías, cayuyjreni diidx con Jesús. ⁴ Dxejcti räjp Pedr loj Jesús:

—Dad, ¡huenduxh suga'nu ree! Palga rlaizlu, sajc jiennu choñ yuguijxh, tejni gac xten guejblu, steeni gac xten Moisés, steeni gac xten Elías.

⁵ Lañi canii Pedr, biäj'te za ni rdimbicha' guideb gabireni; neñ zaga biejn te xse' ni räjp:

—Dee najc xi'nä ni sanälazä, ruspaduxhni lazä, colcuadiajg xtiidxni.

⁶ Che biejn diaj rexpejn_{pac} Jesús diidxga, bazuxhijbreni, basajbreni lojreni lo yuj, bidxebduxhreni. ⁷ Dxejcti gubig Jesús lojreni, batzuubni ñani lojreni, räjpni:

—Colchasulii, na'c rdxejbtu.

⁸ Che guläs lojreni, lojtis Jesús bahuiireni, rutru suganäj dini.

⁹ Cheni sayäj'treni yejc dajnga, gunibee Jesús lojreni, räjpni:

—Rutlojdi gäbtu xhini'c bahuiitu dxejli ni guibansacä narä Xi'n Dios ni gujc Niguüi lo rebengut.

¹⁰ Dxejcti gunabdiidx rexpejn_{pacni} lojni:

—¿Xhicuent rnii rebejn ni najn xleii Moisés ganid Elías nanab jiäd, ä?

¹¹ Badzu' Jesús diidxre, räjpni:

—Guliini siädxgaa Elías, laani gansa'cni guira'ti, ¹² niluxh narä rniä lojtu, abiääd Elías, di rebejn nienbeeni, luxh bennäjrenini si'ctis ni rla-zreni, basacsíduxhrenini. Sigajcza gunnäjreni narä Xi'n Dios ni gujc Niguii, susacsíduxhreni narä.

¹³ Dxejcti gucbee rexpejnpacni caniini xcuent Juan Bautist.

Jesús basiajc te biuux ni guyu' xpej bendxab

(Mr. 9:14-29; Lc. 9:37-43)

¹⁴ Cheni bidzujnreni cadro tre' xhidajl bejn, gubig te bejn lojni bazuxhijbni, dxejc räjpni:

¹⁵ —Dad, balaslajz xinä sa'csi laani cayacxhuuni, rajcni yälguidxbej, rusacsíduxh yälgujdxgani, yu' huält rtejbni lo guiboo yu' huält rtejbni lo nis.

¹⁶ Biädnääni loj rexpejnpaclu, luxh di niajcdi nusiajcrenini.

¹⁷ Jesús badzu' diidxre lojreni räjpni:

—Benguidx, bejn ni di chalilajz, ¿gucli yu' ä lojtu? ¿Cati gac gunä huant la'tu? ¿Coltanä biuuxga ree!

¹⁸ Dxejcti gudilnä Jesús bendxab ni yu' lastoo biuuxga, gunibeeni biriini, lagajc dxejc biajc biuuxga.

¹⁹ Dxejc guninäj rexpejnpacni Jesús te laad, gunabdiidxreni räjpreni:

—¿Xhicuent di niajcdi nibäänu bendxab neñ lastoo biuuxga?

²⁰ Jesús räjp lojreni:

—Sa'csi la'tu guxiduxh rililajztu. Rniliä lojtu, paru najc yälrililajz xtentu si'cti te bejdz muxhtas, sajz gäbtu loj dajn rec: “Gubicaj ro'c, gudejd ste-laad”, luxh sibicaj dajnga. Palga rililajzpacktu, xhetliidi yu' ni di gacdi guntu. ²¹ Niluxh sa' bendxabre, dini guirii palga ditu guiniabduxh lo Dios, gucua'nzatu.

Jesús rusule' stehuält xho guetni

(Mr. 9:30-32; Lc. 9:43-45)

²² Lañi sasajreni nez región xten Galilee, räjp Jesús:

—Sutedreni narä Xi'n Dios ni gujc Niguii lадznaa rebendojl te gusacsireni narä. ²³ Niluxh sugu'treni narä, dxejc ni riojn dxej sibansacä lo rebengut.

Che biejn diajgreni diidxga, guc-huinduxh lajzreni.

Gudijxni impuest xten guidoo

²⁴ Che bidzujn Jesús näjza rexpejnpacni guedx Capernaum, biääd rebejn ni rusquijx xcuent guidoo lo Pedr, gunabdiidxreni lojni, räjpreni:

—¿La di xmastrtu quiix impuest xten guidoo?

²⁵ Räjp Pedr:

—Rguijxnini.

Che biu' Pedr neñ yu', ganid Jesús gunii lojni, räjpni:

—¿Xhi rchalolu, Simón? ¿Chuni'c rusquijx rebejn ni rnibee lo guedxliujre? ¿Chuni'c rguijx reimpuest, recuyo't? ¿Reben lajdxreni o rebenzajt?

²⁶ Badzu' Pedr diidxre räjpni:

—Rebenzajt.

Räjp Jesús:

—Ni'cni di rexi'nreni quiixni. ²⁷ Luxh te di guidxe'chreni, huij ro' nisdoo, bacuaa ansuel, gulää bäjł ni guiniazxgaalu. Ro' bäjłga sidxällu te melpla't ni sajl te chatijxlu impuest xcuentä näjza xcuentlu.

18

¿Chuni'c sajcru lajdx Dios xhaguibaa?

(Mr. 9:33-37; Lc. 9:46-48)

¹ Laa dxejñi gubig rexpejn pac Jesús lojni te gunabdiidxreni:

—¿Chuni'c sajcru lajdx Dios xhaguibaa?

² Dxejcti gurejdx Jesús te biuxbáz, bazujnini nez galáireni, ³ dxejc rájñni:

—Rniliápac lojtu, palga ditu gusiechlajztu, palga ditu gac nadolajz si'c te biuxbáz, ditu jiu' lajdx Dios xhaguibaa. ⁴ Ni'cni chutis bejn nani gac nadolajz si'c biuxe're, laani gac ni sajcru lajdx Dios xhaguibaa. ⁵ Chutis ni riu te sa' biuxe're, sa'csi rinálajzni nará, lagajc nará riuni.

Riezwg jiajbni neñ dojl

(Mr. 9:42-48; Lc. 17:1-2)

⁶ Rájñzani:

—Chutis ni gudzucay lo xnezyuá te sa' biuxe're ni ahuililajzni xtidxá, maazru huen niliib te guj xten molin dojb yejnñi, chatejbni loj nisdoo, palga gunni jiajb tej reni'c lo dojl. ⁷ Proobza guedxliuj sa'csi yuduxh xhigabguijdx lojni. Sa'csi nanabpac chu xhigabguijdx. Gunatiro, bejn ni ruzobloj rexhigabguijdxre, ni rujn riajbza lo dojl reni rililajz xtidxá, ni najc si'c biuxe're.

⁸ Palga ni'lu o ñaalu gun jiajb lu lo dojl, batiu'ni. Hueenru jiu'lu lo xcälñabajn Dios nitiujnglu o natiujnglu lacuaa jiilu con guiro'p ni'lu o guiro'p ñaalu lo balduxh ni rejc par tejpas. ⁹ Palga te balojlu rujn riajb lu lo dojl, gulääni. Hueenru jiu'lu lo xcälñabee Dios najclu lotiá'p lacuaa chu guiro'p baloj chazälreni luj lo balduxh ni rejc par tejpas.

Xcuent xiil ni gunijt

(Lc. 15:3-7)

¹⁰ Rájñza Jesús lojreni:

—Colñatiro, andi cuälaztu rebejn ni najc si'c biuxbázre ni sasaj lo xnez Dios, sa'csi rexangl Dios ni cahuiireni, guiraatis dxej yu'reni loj Dios. ¹¹ Sa'csi Xi'n Dios ni gujc Niguüi biáäd te guslaani rebejn nani agunijt neñ dojl.

¹² Rájñzani:

—¿Xho rhuiitu? Palga rajp te bejn te gayuu xiil, dxejc nit tejni, ¿laa dini gusaan stabitzubigaaga ni yu' neñ gurajl te chatiilni xile' ni gunijt, ä? ¹³ Luxh palga guidxälñi xile'ga, rniliá lojtu, sibalazduxhruni xcuent xile'ga luxh guxiuru guibanäj lajzni xcuent rexiil nani di ninijt. ¹⁴ Sigajcza Xtradnu ni yu' xhaguibaa di rlajz nit lo Dios nicla tej reni ahuililajz xtiidxni, ni najc si'c biuxbázre.

Xho gunnäjlu bejtzlu

(Lc. 17:3)

¹⁵ Rájñzani:

—Palga gun bejtzlu te cosguijdx lojlu, guninäjni xtebtislu, gojs lojni xhi dojl bejnñi lojlu. Palga saru gucuadiajñi xtiidxlu, abiäjñ lajztu. ¹⁶ Palga naaddini gucuadiajñi, dini jiu xtiidxlu, dxejc huinä stee o stio'p bejn chaninäjñuni, te guiraa ni guiniitu jiejn diajg rebejnga, te arajplu tio'p o choñ testiigw. ¹⁷ Palga di bejtzlu gucuadiajg xtidx rebejnga, luxh dizani jiu xtiidxreni, neñ guidoo huile'c xquejlu loj rebejn ni ricuadiajg xtidx Dios. Palga dizani jiu rebeñ guido'o, sugacni nez lojlu si'c te benguijdx ni di gumbee xtidx Dios o si'c rebejn nani rusquijx loj rebejn nani ruto'.

¹⁸ Ni'cni rniliápac lojtu, guiraa yälguختis xten bejn ni di gusiechlajz xtojñreni ni guntu lo guedxliuj, si'c jia'ñni xhaguibaa; guiraa redojl nani

gusiäj] lajztu lo guedxliuj sa'csi basiechlajz beṇdoj]ga, si'cza jia'nni xh-aguibaa.

¹⁹ 'Sigajcza rniä lojtu, palga tio'ptu tejsi xhigab guntu xhini'c guiniabtu lo Dios, che guiniabtuni lo Dios, Xtadä ni' yu' xhaguibaa suniidxni ni rniabtu lojni. ²⁰ Sa'csi cadrotis nadxagsa' tio'p o choṇ bejn sa'csi rinälajzreni narä, anasuga'ä galäii rebejnğa.

²¹ Dxejcti gubig Pedr loj Jesús, gunabdiidxni:

—Dad, ¿palga gunijt betzä loä, bal huält nanab gusiäj] lazä? ¿La sajl gajdzli huält, ä?

²² Badzu' Jesús diidxre lojni räjpni:

—Dina guiniä gajdztis huält, rniä gayoṇbidzuu huält, nalajznu si'ctiza huält basiäj] lajzlu.

Xcuent tio'p bejn ni nazäb meel

²³ Xcälrmibee Dios xhaguibaa najc si'c te reii ni rljaz gunni cuent lac nazäb rexmosni lojni. ²⁴ Agusloj cayujnni xcuentni chela bidzunnäjreni te mos ni nazäb balti mil lojni. ²⁵ Luxh mosre xhet rajpdini te quiixni rexti'nni, ni'c gunibee reii guido'ni si'c slav, näjza chäälni, näjza rexi'nni, nägajcza guiralii xhixtenni, te gaxh xti'nni. ²⁶ Dxejcti mosga bazuxhijbni loj xlamni, gunabduxhni lojni, räjpni: “Guläzsijc tiop-choṇ dxej, Dad, te gac quixä xti'nä.”

²⁷ Dxejcti lamga balazlajzni xmosni, badzucajni guiraa ni nazäb mosga lojni, baslaanini. ²⁸ Cheni birii mosga rolijz xlamni, bidxaagni stee samosni ni nazäb bale'si beex lojni. Gunaaznini, baxhiya'ni yejnini, dxejc räjpni: “Gudijxga ni nazäb luä.” ²⁹ Dxejcti ste mosga bazuxhijbni lojni, räjpni: “Guläzsijc. Siguixäca guiraa ni nazäb lojlu.” ³⁰ Luxh steega naaddini, alga huisägacni samosni neṇ latzguib te bejnini gaan gudijxni guiraa ni nazäbni.

³¹ Cheni bahuii sgaii mos xhini'c bejnini, gucnaduxhlajzreni, huiye'tzreni lo xlamreni xhi huiyejnini. ³² Dxejcti gurejdx xlamreni mosga, räjpni lojni: “iMos guijdx! Narä badzucä di'n ni nazäb luä, sa'csi gunabduxhlu loä.

³³ Si'cza niunnäjlu sa'lu, nulazlajzluni sigajc ni balazlazälu.” ³⁴ Sas lacti bidxehduxh lamga, gunibeeni biäuuni te gudijxni guiragajc ni nazäbni lo xlamni.

³⁵ Baluux Jesús cuentga, räjpni:

—Sigajcza gunnäj Xtadä ni' yu' xhaguibaa guiraa rebejn ni di gusiäj]lajzpac guiraa redojl ni rujn resa'ni lojni.

19

Jesús ruluii xcuent yälru'o'n sa'ni

(Mr. 10:1-12; Lc. 16:18)

¹ Che gulujx gunii Jesús recuentre, biunejnzi Galilee, huijni lo región xten Judea, stelaad gueu Jordán. ² Xhidajl bejn birinajlni, ro'c basiajctni rebejn racxhuu, ³ dxejc gubig refarisee lojni, rljazreni gusguesireni Jesús ni'c räjpreni lojni:

—¿La sajc guro'n te niguii chäälni che rljaztisni, ä?

⁴ Badzu' Jesús diidxre lojreni, räjpni:

—¿La gajdtu goj lo reguijtz nani bacuaa to Moisés cadre caj xho benchee Dios bejn galooli: “Niguii näjza gunaa bencheenireni”? ⁵ Guniiiza Moisés: “Ni'cni gusaan niguii xtadni con xnanni te xca'ni chäälni, dxejc dirureni gac tio'p, tejtis bejn najcreni.” ⁶ Ni'cni dirureni gac tio'p, anajcreni tejtis bejn, digacdi guillia' rebejn lo sa'ni nani abachagsa' Dios lo sa'ni.

⁷ Dxejcti gunabdiidxreni lojni, räjpreni:

—¿Xhicient gunibee Moisés gudeed niguii te guitz lo cháälni te si'c gac guro'nni gunaaga, á?

⁸ Räjp Jesús lojreni:

—Sa'csi najc lastootu si'c te guij, ni'c basaan to Moisés baro'n niguii cháälni, niluxh galodoo et si'cti gujçni. ⁹ Luxh rniä lojtu, niguii nani gusaan cháälni, luxh xhet dojl di bennäj cháälni stee niguii, dxejcti guchñaani ste'ca gunaa, rujnni dojl. Sigajcza niguii ni guchñaa gunaaga ni abaro'n cháälhini, rujnza niguiiga dojl.

¹⁰ Dxejc räjp rexpejn pacni lojni:

—Palga si'c najc xcuent niguii con cháälni, hueenru na'c guchñaani.

¹¹ Jesús räjp lojreni:

—Xhet guiraadi bejn rajc gacbee rediidxre, rebejntis ni rudeed Dios te xcäriensa'c ni'ctis racbee. ¹² Yu' xhicient digacdi guchñaa niguii: yu'reni digacdi guchñaa sa'csi si'c gojreni; yu'reni digacdi guchñaa sa'csi baxhin sabejnreni; yu'zaren digacdi guchñaareni sa'csi rlaizreni gunreni xtuuntis Dios. Nani rajc racbeeni rediidxre, sugacbeenireni.

*Biädnäreni rebiuux loj Jesús
(Mr. 10:13-16; Lc. 18:15-17)*

¹³ Dxejcti biädnäreni rebiuux' loj Jesús te gudzuubni naani yejçreni, guini-abni lo Dios xcuentreni. Luxh rexpejn pacni gudilnä j rebejn ni siädnä rebiuux'e. ¹⁴ Dxejc räjp Jesús lojreni:

—Colgusaan guibig rebiuux' loä, na'c gudxojnntureni, sa'csi xcälrnibee Dios xhaguibaa najc xten reni nadolajz si'c najc rebiuux'e re.

¹⁵ Che gulujx badzuubni ñaani yejc rebiuux', biunejzni ro'c.

*Te ben ni rajp guninä j Jesús
(Mr. 10:17-31; Lc. 18:18-30)*

¹⁶ Dxejc biäd te bi'n lo Jesús, gunabdiidxni lojni; räjpni:

—Mastr sa'c, ¿xhini'c nanab gunä te xca'ä yälñabajn lo Dios par tejpas?

¹⁷ Dxejc räjp Jesús lojni:

—¿Xhicient rniilu mastr sa'c narä? Diostis najc sa'c. Per par rlaizlu xca'lu yälñabajn lo Dios, bazoob rextidx Dios ni caj lo xleii Moisés.

¹⁸ Dxejcti räjp bi'nga lojni:

—¿Xhi rediidxga?

Dxejc räjp Jesús lojni:

—Na'c ju'tlu, na'c guesnäjl bejn nani di gac cháällu, na'c cuanlu, na'c guiliäslu didxxhii xcuent bejn. ¹⁹ Bazoob xtidx xtdlu con xnanlu, huinälajz sa'lu si'cni sanälajzlu lagajç luj.

²⁰ Dxejcti räjp bi'nga lojni:

—Guiraa rediidxre runä che nacäli biuux. ¿Xhiruxni'c riäädx gunä?

²¹ Dxejc räjp Jesús lojni:

—Palga rlaizlu gaclu bens'a'c lo Dios, huij, bato' guiraa ni rajplu, dxejc gudisni lo rebenproob, dxejc xhaguibaa sapduxhlu xhixtenlu. Dxejcti gudaa te jiädñajllu narä.

²² Cheni biejn diajç bi'nga rediidxre, guc-huinduxh lajzni sa'csi rajpni xhidalduxh xhixtenni.

²³ Sas Jesús räjp loj rexpejn pacni:

—Rniliäpac lojtu, naganduxh jiu' te bejn rajp loj xcälrnibee Dios. ²⁴ Rnisacä lojtu, guyasiru ted te camei nen baloj te guux; naganduxhru jiu' te bejn ni rajp lo xcälrnibee Dios.

²⁵ Che biejn diajg rexpejn pacni rediidxre, bidxeloduxhreni, dxejc canabdiidx loj sa'reni:

—¿Chuni'c sajc jiu' lo xcäl'rnibee Dios?

²⁶ Dxejc bahuidzu'tz Jesús lojreni, räjpni:

—Naganduxh gun rebejn dee, Diostis sajc gun guiraloj.

²⁷ Dxejcti Pedr räjp lojni:

—Nuurnu basa'nnu guiraa xhixtennu te siopnalnulu. ¿Xhini'c jia'pnu ro'c?

²⁸ Jesús räjp lojreni:

—Rnliäpac lojtu, la'tu ni biädnajlto narä, che guscobä guiraa recos cheni cueä narä, Xi'n Dios ni gujc Niguui, lo yagxhil cadro guinibeä lo guiraa reben guedxliuj, la'tu ni siädnajlto narä sibejzatu lo tzubitio'p yagxhil te guinibeetu loj guitzubitio'p guejdx xten rexpejn Israel. ²⁹ Luxh guiraa rebejn ni basa'n rolizni o rebejzni, o rebisiajnni, o xtadni, o xnanni, o chäälni, o xi'nni, o rexhujni, te siädnajlmi narä, rebejnnga sajp te gayuu huält locni gojpn, nägajc ga'preni xcäl'nabajn Dios par tejpas. ³⁰ Rebejn nani rchalo najcreni be'nroru lo sa'reni nez loj Dios, reni'c gac bejn ni guxii sajc nez loj Dios. Rebejn nadolajz ni di guchalo sajcreni lo sa'reni, reni'c sajcreni nez loj Dios.

20

Xcuent reni rujn dzuun

¹ Räjpzani:

—Xcäl'rnibee Dios najc si'c te bejn ni najc baxhuaan xten te renchro. Rsildooru biriini te satiilni mos gun dzuun lo xyujni, lo reyaguub. ² Che bidxälmi gaii mos, bachaagni diidx. Bia'nreni diidx quixnreni te denaar tebdxej cade tej remosga. Dxejc baxhalnreni loj xyujni sayujnreni dzuun.

³ Birisacni, satiilni sgaii mos si'cti rcagaa, rsil. Bidxaagni sgaii bejn ni xhet cayujndi, suga'sireni nez lo guii. ⁴ Räjpni lojreni: “Näjza la'tu colchayujn dzuun lo xyuä. Narä siguixä si'cni riäjil xca'tu.” Sä'ti rebejnnga lo dzuun.

⁵ Birisac dade' si'cti läiidxej, birisaczani si'cti rcachon gudxej. Bidxaagni sgaii bejn, sigajcza räjpni loj rebejnnga. ⁶ Dxejc si'cti rcagaii birisacni, huijni lo guii. Ro'c bidxälmi sgaii bejn ni xhet cayujndireni, suga'sireni nez lo guii. Dxejc räjpni lojreni: “¿Xhicuent suga'tu ree guideb dxej xhet cayujnditu?”

⁷ Dxejc räjpreni lojni: “Sa'csi rut siädtildinu te choyennu dzuun.” Dxejcti räjpni lojreni: “Näjza la'tu colchayejn dzuun lo xyuä. Narä siguixsa'cätu.”

⁸ Che biu' guxhijn, räjp lam lo mos ni rnibee remos: “Gurejdx remos te quixxlureni. Gudix-xgaa reni biu' gudxejru lo dzuun. Lult gudijx reni biu' ganid lo dzuun.”

⁹ Dxejc ganid biu' remos ni agudxej biu'reni lo dzuun. Cade tejreni cua' te denaar, si'cni rca' ni rujn dzuun guideb dxej. ¹⁰ Cheni biu' reni biu' lo dzuun rsiloo, bejnreni xhigab sica'rureni meel, per sigajcza laareni cua'reni te denaar cade tejreni. ¹¹ Che cua'reni xcuentreni gusloj cadxe'chreni lo baxhuaan xten dzuunga. ¹² Räjpreni: “Redee ni biu' lult lo dzuun pet teb ortis bejnreni dzuun, luxh gudijxlureni sigajcni gudijxlu nuurnu, luxh biennu dzuun guideb dxej, luxh biennu dzuun lo yäl'nanlaa.”

¹³ Dxejc räjp lamga lo tejreni: “Xamigwä, xhet cosgujdxdi cayunä lojlu. ¿La xhet bia'ndinu diidx te denaar quixälu tebdxej? ¹⁴ Huij, cua' xmeellu. Narä rlazä quixä bejnre ni biu' lult sigajc ni gudixä lojlu. ¹⁵ ¿La di gacdi gunä si'ctis ni rlazä con xmelä? ¿O rdxechlajzlu loä sa'csi nacä hueen, ä?” ¹⁶ Ni'cni reni biääd lult sajcreni teboj con reni biääd ganid, luxh reni biääd ganid sajcreni teboj con reni biääd lult.

*Gunisac Jesús xho guetni**(Mr. 10:32-34; Lc. 18:31-34)*

¹⁷ Che sasaj Jesús lo nezyuj sääni Jerusalén, huinäni rexpejn̄pacni te laad te räjpni lojreni:

¹⁸ —La'tu ruhuiitu sosaanu nez guedx Jerusalén. Ro'c narä, Xi'n Dios ni gujc Niguii, siabä ladz̄naa reni rnibee lo rebixhojz, näjza lo rebejn̄ ni najn leii. Laareni sinibeereni guetä. ¹⁹ Suteedreni narä ladz̄naa rebenz̄ijf te cubeereni narä quiinreni narä, dxejc gucuareni narä lo cruju. Luxh ni riojn̄ dxej, sibansacä loj rebengut.

*Ni gunab xnan Jacoob näjza Juan**(Mr. 10:35-45)*

²⁰ Dxejcti gubig xnan Jacoob näjza Juan, xi'n Zebedeo loj Jesús. Bazuxhijbni nez loj Jesús, te gunabni lo Jesús. ²¹ Gunabdiidx Jesús lojni:

—¿Xhini'c rlaizlu?

Räjp gunaaga lojni:

—Che jiu'lu lo xcäl̄rnibeelu, gunibelaa cue tej rexi'nä xladbeelu, steeni cue xladbäjgwlu.

²² Dxejc räjp Jesús:

—¡Ditu gan xhini'c rniabtu! ¿La sajc tedtu yäl̄rsacsí sa'ni tedä? ¿La sajc tedtu trabajwduxh sa' ni nanab tedä?

Dxejc räjpreni:

—Sajc tednuni.

²³ Dxejcti räjp Jesús lojreni:

—Guliipacni. Sidedxgaatu trabajw, sidedxgaazatu yäl̄rsacsí. Et narädi cueä reni cue xladbägwä o xladbeä. Xtaďä ni yu' xhaguibaa alaguleni rebejn̄ga.

²⁴ Che biejn̄ diajg stzuu rexpejn̄pac Jesús, bidxe'chreni loj guiro'p rexi'n nane'ga. ²⁵ Dxejc gurejdx Jesús reni, räjpni:

—La'tu najntu xho rujn̄ regubier ni rnibee lo rebenz̄ijf, rnibeereni rebejn̄ga si'c xlamreni. Luxh reni najc rebenro lojreni runnäjreni rebejn̄ga si'tis ni rlaizreni. ²⁶ Et si'cni gunditu la'tu loj rebejn̄. Chutis rlaiz gac benro lojtu, nanab gunni dzuun gacnäjni guiraliitu si'c te mos. ²⁷ Luxh chutis tejt̄u ni rlaiz guiliä'p xpala'n̄ni, nanab gacni si'c xmos lo guiraliitu. ²⁸ Sigajcza biääd Xi'n Dios ni gujc Niguii. Dini niniab mos chu lojni, alga laani najc xmos bejn̄, badeedzani lagajc yäl̄nabajn̄ xt̄enni te gudijxn̄i baslaani xhidal bejn̄ ni yu' lo dojl.

*Jesús rusiajc tio'p lotiä'p**(Mr. 10:46-52; Lc. 18:35-43)*

²⁹ Che gojl guiriireni guedx Jericó, xhidalduxh bejn̄ sanajlni. ³⁰ Dxejcti sobga' tio'p bejn̄ ni di fii cuä' nez yuj. Che biejn̄ diajgreni sadejd Jesús ro'c, gusloj cabedxa'reni:

—Dad, Xi'n toDavid, balazlajz nuurnu.

³¹ Gudil̄näj rebejn̄reni, te gusäuren̄i ro'reni. Luxh laareni dipru guredxa'reni:

—¡Dad, Xi'n toDavid, balazlajz nuurnu!

³² Dxejc guzudxi Jesús, gurejdxni reni di fii, räjpni lojreni:

—¿Xhini'c rlaiztu gunä?

³³ Räjpreni lojni:

—Dad, rlaaznu guixal balojnu te gac fiinu.

³⁴ Dxejc balazlajz Jesúsreni, gudajnni balojreni. Sas biacgajc balojreni, gujc bahuiireni, sanajltireni Jesús.

21

Biu' Jesús guedx Jerusalén
(Mr. 11:1-11; Lc. 19:28-40; Jn. 12:12-19)

¹ Cheni Siäddzungajxhrene guedx Jerusalén, bidzujñreni te guedxbäz ni laa Betfagé, cuä' dajn ni laa Oliib. Baxhal Jesús tio'p xpejn'pacni, ² räjpni lojreni:

—Colchäj loj guedxbäzre ni tre' nez lojtu. Ro'c guidxäلتu te burğunaa caduu näjza teburhuin. Colguxhecni, coltanäni loä. ³ Palga yu' chu naa: “¿Xhini'c rujntu?”, colye'tz lojni: “Dad caquiinnini terate'. Suxhalgajcni.”

⁴ Luxh guiraa dee gujc te guzojb diidx ni gunii dade' nani bacuaa xtidx Dios agujc xchero, che räjpni:

⁵ Colye'tz loj reni rbäjz guedx Siön,

bahuii xreilu siääd lojlu,

nadolajzni bijbni te burbäz, te burbäz, xi'n man ni rujn dzuun, ni ruu cargw.

⁶ Dxejcti huij rexpejn'pacni, bejnreni si'c gunibee Jesús gunreni. ⁷ Biädnäreni burga näjza burbäz xi'nni. Gudixhrene xhajbreni detz burbäzga, dxejc gubijb Jesús burbäzga. ⁸ Xhidalduxh bejn tre' ro'c, luxh yu' reni gudixh xhajbreni lo nez yuj, peta sgaireni batiu' balajg te gudixhrene rebalajg lo nez yuj cadro ted Jesús. ⁹ Rebejn ni nijd, näjza reni siääd dejtzni gusloj cabedxa'reni, räjpreni:

—iXchej guibajn Xi'n toDavid! iChicbaa ni siääd xcuent Gueb Dios! Rliä'pnu xpala'n Guejblu Dios.

¹⁰ Cheni biu' Jesús nen guedx Jerusalén, guiraa reben guejdxga gusloj camojm, yu'reni canabdiidxreni loj sa'reni:

—¿Chucha najc bejnre?

¹¹ Yu'zareni räjp:

—Dee najc Jesús, niguii ni rusule' xtidx Dios. Guedx Nazare't xten Galilee siäadni.

Basia Jesús guidoro
(Mr. 11:15-19; Lc. 19:45-48; Jn. 2:13-22)

¹² Dxejc biu' Jesús nen guidoro xten Dios, guläani guiraa rebejn ni caguto' näjza rebejn ni casii. Barexhättni remex xten reni ruchaa meel xten rebejn, näjza reyagxhil xten reni ruto' repalom. ¹³ Dxejc räjpni lojreni:

—Loj reguijtz ni bacuaa rebengaloo caj: “Sirilaj xquidoä yu' xten yäl'rbejdx, yäl'rniab loj Dios.” Niluxh la'tu abejntuni xpiliäa gubaan.

¹⁴ Lagajc nen guidooğa, gubig loj Jesús gaii bejn ni di fii näjza gaii bejn ni rsiacoj, luxh basiajcnireni. ¹⁵ Cheni bahuii reni rnibee loj rebixhojz, näjza reni najn leii remilagwr ni bejn Jesús, luxh biejnza diajgreni xho cabedxa' rebixhojz. ¹⁶ Dxejc räjpreni loj Jesús:

—¿La riejn diajglu xhi caniireni, ä?

Badzu' Jesús diidxre lojreni räjpni:

—O'n, riejn diagäni. ¿La gadtu goł lo reguijtz ni bacuaa te dade' ni gunii xtidx Dios? Ro'c caj xcuent redee, cadro caj rediidxre:

Abejnlu goł rebixhojz näjza rebäznite' dij ni rliäpsa'c'pac xpala'n Dios.

¹⁷ Dxejcti basaan Jesúsreni, biunejzni ro'c sääni guedx' ni laa Betania, ro'c gudejdni yääl.

Te yag iigw ni gubijdz
(Mr. 11:12-14, 20-26)

¹⁸ Cheni bara yääl, rsilru gubisac Jesús guedx Jerusalén. LaĽ ni sääni, gusloj calaanni. ¹⁹ Bahuiini loj te yag iigw cuä' nezyuj. Gubigni gajxh ni' yajgga, per xhet ninejxhdi bidxälni, ganaxhtis balajg caj lo yajgga. Dxejc räjp Jesús lo yajg iigwga:

—ĴNuncru xcay nicla tej ninejxh lojlu!

Dxejcti gubidzgajc yajgga. ²⁰ Cheni bahuii rexpejnpacni, bidxeloduxhreni, gunabdiidxreni loj Jesús:

—ĴXhi cuent gubidzgajc yajgga?

²¹ Räjp Jesús lojreni:

—Rniliäpac lojtu, palga chalilajzpacku, luxh ditu gun tio'p lajztu, xhet ganaxdi sa' cosre guntu, palga gäbtu lo te dajn: “Gubicaj ro'c, gusuj galäii nisdoö”, si'c gacni. ²² Guiraa ni guiniabtu loj Dios, palga chalilajzpacku, suniidxnini.

Xcälrnibee Jesús

(Mr. 11:27-33; Lc. 20:1-8)

²³ Dxejcti biu' Jesús nen guidoro, dxejc laĽ ni caguluiini rebejn gubig reni nibee loj rebixhojz näjza rebengool, gunabdiidxreni lojni:

—ĴXhi yälrnibee rajplu ni'cni rajc rujnlu recosre? ĴChuni'c baniidx yälrnibeere lojlu?

²⁴ Badzu' Jesús diidxre lojreni räjpni:

—Sigajcza narä gunä te yälgunabdiidx lojtu; palga sajc gudzu'tu diidxga loä, dxejc guiniä lojtu chuni'c baniidx yälrnibee te runä recosre. ²⁵ ĴChuni'c guñibee gutiobnis Juan ni rutiobnis? ĴLa Dios o la beñ guedxliuj?

Dxejc gusloj cayäjp lo sa'reni, palga jie'tznu Dios gunibeeni, dxejc sinajni loonu, Ĵxhicuent ditu nililajz xtiidxnini? ²⁶ Palga jie'tznu bejn guedxliuj guñibeeni, dxejc sixa't rebejn yejcnu sa'csi guiraareni rililajzreni Juan najc te Dade' ni gunii xtidx Dios. ²⁷ Dxejc räjpreni loj Jesús:

—Dinu guidon.

Dxejc räjp Jesús lojreni:

—Sigajcza narä dina guiniä caro siääd yälrnibee te runä guiraa recosre.

Te dade' ni guyu' tio'p xi'nni

²⁸ Jesús räjp lojreni:

—Guidon xho guichalootu diidxre. Te dade' guyu' tio'p xi'nni. Räjpni loj xingangalojni: “Xi'nä, nadxej chayujnlu dzuun cadre care' uub.” ²⁹ Dxejc badzu' xi'nni diidx lojni, räjpni: “Di rlazädi cha'a.” Luxh che gojl ste ra't, basiejch lajzni säätini sayujnni xtzun xtadni. ³⁰ Dxejc räjp dade'ga lo stee xi'nni: “Xi'nä, nadxej chayujnlu dzuun.” Dxejc badzu' xi'nni diidxre, räjpni: “Mbaj, dad, sia'ä.” Luxh dini nij. ³¹ Loj guiro'preni, Ĵchuni'c bejn si'cni rlazx xtadni?

Dxejc räjpreni:

—Xingangalooni.

Dxejcti räjp Jesús lojreni:

—Rniliäpac lojtu, reni ruquijx guiraloj, näjza regunabdxab ganidreni jiu'reni lojtu loj xcälrnibee Dios, ³² sa'csi Juan ni rutiobnis biädluini la'tu xho guibajntu, luxh ditu nililajz xtiidxnini. Biädla reni ruquijx guiraloj, näjza regunadxab huililazduxhreni xtiidxnini. Niluxh la'tu bahuiitu guiraa recosga, ditu nusiechlazj te nililajztu xtiidxnini.

Xcuent remosguijdx

(Mr. 12:1-12; Lc. 20:9-19)

³³ 'iColcuadiajg stee cuentre! Guyu' te dade' ni najc baxhuaan xten te renchro, gule'cni yaguub loj xyujni, bateedni bazaa guideb gabi yujga. Gudäänni te gueed te gujcní te tanc te chuchee nisuubga che rxii reuub. Bencheezani te yu' ni najc jiaaro te ro'c cue te ni fii guideb loj xyujni. Badedlaani yujga loj gaii bejn ni rujn dzuun, sä'tini te biaj zijtro. ³⁴ Che agojl guire' cose'ch baxhañ baxhuaanga gaii xmosni loj xyujni te chaxiireni cose'ch ni riäjl xca' baxhuaanga. ³⁵ Dxejc reni biannäj yujga gunaazreni remosre, gudijnreni tejni, bagu'treni steeni, bacuaareni guij yejc steeni. ³⁶ Dxejc baxhañsac baxhuaanga sgaii mos. Niluxh reni biannäj yujga sigajcza bennäjreni remosga.

³⁷ Dxejcti bejn baxhuaanga xhigab: "Maazru huen guxhañä xi'nä; su-cuadiajgrureni xtiidxni." ³⁸ Cheni bahuiireni lo xi'n baxhuaan xten yujga, bejnreni xhigab: "Deeni jiannäj yujre; do'o guigu'tnuni te jiannänu yujre." ³⁹ Dxejcti gunaazrenini, guläärenini te laad, dxejc bagu'trenini.

⁴⁰ Dxejc gunabdiidx Jesús räjpni:

—Che jiääd baxhuaan xten yujga, çxhi gunnäjni rebejn nani biannäj xyu-
jñi?

⁴¹ Dxejc räjpreni loj Jesús:

—Dini gulazlazj rebenguidxga, sugu'tnireni, sudedlaani xyujni loj ste'ca bejn nani gudeed cose'ch ni riäjl xca'ni che gañ guire' cose'chga.

⁴² Dxejcti räjp Jesús lojreni:

—çLa gajdtu goñ lo reguijtz nani bacuaa dade' nani gunii xtidx Dios galoo? Rediidxre caj ro'c:

Guij nani gulälaz reni runchee yu',
cua' Dios lagajc guijga gudixhnini squiin yu',
sajcruni loj guiraa reguij.

Dee bejn Gueb Dios, luxh rdxeloduxhnu dzunrore ni bejnñi.

⁴³ 'Ni'cni rniä lojtu, sibicaj xcälñnibee Dios lojtu, sidejdni loj rebejn nani gudeed ni riäjl xca' xcälñnibee Dios, nalajznu renani chalilajzpac xtiidxni.

⁴⁴ Luxh xcuent guijga: nani jiaj lo guijga, silia'ni, per nani guitejb guijga yejcní, li siujyni, gacni däj.

⁴⁵ Che biejn diajg reni rnibee lo rebixhojz näjza refarisee recuent ni canii Jesús, guchbeereni cagusä'tni lagajc laareni. ⁴⁶ Rlajzreni niniaazrenini, per bidxejbreni rebejn sa'csi salilajz rebejn najc Jesús bejn ni rniñ xtidx Dios.

22

Xcuent yäl'ruchnaa

1 Guslosac canii Jesús lojreni con recuent, räjpni:

2 —Xcälñnibee Dios najc si'c te reiñ ni bejn te sa' te guchnaa xi'nñi.

3 Baxhañni rexmosni te saxiireni regolnejdx chääreni sa', niluxh rebejnre di rñajzdireni. ⁴ Dxejc baxhañsacni rexmosni, räjpni: "Colye'tz loj reni abidoñ, agujc comiid. ¡Abagutä balti gonsa'c, gonguro! Anacchee guira'ti yäl'räjw. Coltaa." ⁵ Niluxh reni abidonga di niu xtiidxreni. Tejñi sahuii rexyujni, steeni säa lo rexnegosni, ⁶ dxejcti sgaii reni niñc biooz gunaazreni rexmos reiñ, basacsireni remosga, sas bagu'trenini. ⁷ Che biejn diajg reiiga, bidxe'chduxhni, baxhañni rexsoldaadni te sagu'treni guiraa rebenguidxga, te saze'czareni guejdx cadre rbäjzreni. ⁸ Dxejcti räjpni loj rexmosni: "Guiraa dee anacchee, di nungäjñ jiäädru reni abidoñ. ⁹ Colchäj, pues, lo resquiiñ lo nezyuj, colcuedx chutis bejn ni guidxaagtistu." ¹⁰ Biriñ rexmosni, sääreni

lo nezyuj. Dxejc bachagsa'reni guiraatis bejn ni bidxaagreni, reni najc benguijdx sigajc reni najc beñhueen te gudxaj rolizj reiiga.

¹¹ 'Dxejc biu' reii biädhuiini loj rebiooz. Bahuini loj te bejn ni sobga' ro'c, luxh xhet xhablanijdini najcwni. ¹² Dxejc räjp reii lojni: "Xamigwä, ¿xho bejnlu biu'lu ree luxh xhet xhablanijdilu najcwló?" Dxitis sobga' bejnnga, xhet rniidini. ¹³ Dxejc räjp reii loj rexmosni: "Colguliib ni'ni nájza naani, colsälni detzyu' cadro nacáji te ro'c gonduxhni chubejli relájyni." ¹⁴ Sa'csi xhidajl najc reni bidon luxh guxii najc reni bibee.

La sajc quiixni impuest

(Mr. 12:13-17; Lc. 20:20-26)

¹⁵ Dxejcti sii refarisee, biä'nreni diidx siguiilreni xho gunijt Jesús te diidx te guiga'ni. ¹⁶ Ni'c baxhañreni gaii xpejnreni nájza gaii bejn ni nadxaag Herodes te räjpreni loj Jesús:

—Mastr, anajñnu rniilu ganax didxlii, ruluiizalu xtiidxpac Dios, luxh dilu jiu xhi rnii rebejn, sa'csi dilu cue bejn ni sajcrú lo stee bejn. ¹⁷ Gunii loonu, pues: ¿La laaca najc quiixnu impuest lo César ni rnibee loonu o et laadi?

¹⁸ Dxejc gucbee Jesús xhet laadi xhigab cayujnreni neñ lastooreni, dxejc räjpni lojreni:

—¿Benguijdx! ¿Xhicuent rlanjtu guquiiltu narä? ¹⁹ Colguluii te meel loä.

Dxejc badeedreni te meel ni laa denario. ²⁰ Che bahuii Jesús loj meelga, gunabdiidxni lojreni, räjpni:

—¿Chuni'c caj lo meelre?

²¹ Dxejc räjpreni:

—Loj César.

Dxejc räjp Jesús lojreni:

—Colgudeed lo César ni riäjł xca' César, colgudeedza lo Dios ni riäjł xca' Dios.

²² Che biejn diajgreni rediidxre, bidxeloduxhreni. Dxejc basaanrenini, sä'tireni.

Canabdiidxreni xho gac che guibañsac rebejn

(Mr. 12:18-27; Lc. 20:27-40)

²³ Lagajc dxejga bidzujñ gaii reni laa saducee, reni di chalilajz sibañsac bejn loj rebengut. Gubigreni loj Jesús, gunabdiidxreni, ²⁴ räjpreni:

—Mastr, si'c naj to Moisés, palga yu' te bejn ni abachñaa, luxh ruti xi'nni che guetni, riäjł guchñaa bejtzni biuudga te chu xi'nreni xcuent bejtzni. ²⁵ Mbaj. Loonu yu' gajdz niguii ni najc bejtz sa'reni. Betzgoolga bachñaa, dxejc gujtni, luxh di xi'nni niu'. Basa'nni cháälni lo bejtzni. ²⁶ Sigajcza gusajc ni ro'p bejtzni; sigajcza gusajc ni riojn bejtzni. Si'c huinuu gujc che basa'li guigajdz bejtzga. ²⁷ Sas che gujt guiraareni, nájza gunaaga gujt. ²⁸ Che guibañsac rebejnnga lo rebengut, ¿chu tej lo rebejtzga gac cháälpac gunaaga, ni guiraareni bachñaareni gunaaga?

²⁹ Dxejcti badzu' Jesús diidxre lojreni, räjpni:

—Et laadi rujntu xhigab sa'csi ditu gacbee xtidx Dios ni claza xcuent xcälrnibee Dios. ³⁰ Ni che guibañ rebengut, diru yälruhñaa chu, diruza bejn gudeed rexindxa'preni guchñaa. Dxejc sajcreni si'c rexangl Dios ni yu' xhaguibaa. ³¹ Dxejc xcuent yälrbañsac loj rebengut, ¿la gajdtu goł reguijtz ni bacuaa to Moisés che räjp Dios xcuent retoxtagoldoone? ³² "Narä nacä Xtios Abram, Xtios Isaac, nájza Xtios Jacob", ä? Dios di gac Xtios bengut, Xtiosis rebejn ni nabajñ najcni.

³³ Che biejn diajg rebejn xtidx Jesús, bidxeloduxhreni diidx ni ruluini.

*Diidx ni maazru sajc**(Mr. 12:28-34)*

³⁴ Che gucbee refarisee basäu Jesús ro' resaducee, bidojpreni, bachaagreni diidx. ³⁵ Dxejc tejreni nani najn leii, rlanjzi guquuilni Jesús ni'c gunabdiidxni lojni räjpi:

³⁶ —Mastr; ¿xhi diidx ni gunibee Dios sajcru lojreni caj lo leii?

³⁷ Räjpi Jesús lojreni:

—Nani rnii scree: “Huinälajz Dad Xtioslu guideb lastoolu, guideb xaimlu, nájza guidebgajc xcäriejnlu.” ³⁸ Diidxre ni gunibee Dios najc ni sajcru, luxh ganidni siädni loj rextidx Dios. ³⁹ Ni ro' pga sigajcza najcni: “Huinälajz resa'lu sigajc ni sanälajzlu lagajc luj.” ⁴⁰ Guiro'p remandamientre nanab te guzoob bejn guiraa rediidx ni bacuaa toMoisés nájza ni bacuaa redade' nani gunii xtidx Dios.

*¿Chu xi'n najc Crist?**(Mr. 12:35-37; Lc. 20:41-44)*

⁴¹ Lałni tre' refarisee, gunabdiidx Jesús lojreni, räjpi:

⁴² —¿Xhi rujntu xhigab xcuent Crist? ¿Chu xi'n najcni?

Räjpreni lojni:

—Laani najc xajg toDavid.

⁴³ Räjpi Jesús lojreni:

—¿Xhicuent räjpi David “Xtadä” lojni che basanij Sprit Dxaan xten Dios lastooni? Ni'c bacuaa toDavid rediidxre:

⁴⁴ Dad Dios räjpi lo Xtadä,

gurej xladbeä lał ni gudzugä guiraa reni rdxe'ch lojlu ladzni'lu.

⁴⁵ Palga lagajc David rnii: “Dad” lojni, ¿xho mood najcni xi'nni?

⁴⁶ Dxejc rut gujcdi badzu' nicla te diidx lojni, luxh dxejliga rutru gojpdí xhi diidx niniabdiidxreni lojni.

23*Rucuaquij Jesús refarisee nájza rebejn nani najn leii**(Mr. 12:38-40; Lc. 11:37-54; 20:45-47)*

¹ Dxejc räjpi Jesús loj reben xhidaalga nájza loj rexpeljpacni:

² —Rebejn ni najn leii nájza refarisee räjpi yäl'najn te gusule'reni xleii Moisés. ³ Ni'cni colguzoob guiraa rextiidxreni, na'c guntu sa' recos ni rujnreni, sa'csi laareni rniireni xhini'c guntu, dxejcti lagajc laareni direni gun ni rnibeereni guntu. ⁴ Rnibeereni gun rebejn cos naganduxh ni najc si'c te cargw naduxh ni di gac guu bejn, per laareni nicla con te bicueñaareni direni gusniibni. ⁵ Guiraa recos ni rujnreni, rujnrenini te fiitis rebejn. Rchaglajzreni rcaj lo cuajsreni nájza roxhajgwreni recaje' cadre yu' tla' guijtz ni caj xtidx Dios lojni. Rustioolzareni xi' xhajbreni. ⁶ Rlajzreni ganidreni tedreni lo mex che gal' te lanij; rlanjzreni cuereni lo rebancw ni suga' delante nen reguidobáz. ⁷ Sigajcza rlanjzreni guchagro' bejn ñaareni nez lo guii, guiniiza rebejn “Mastr” lojreni.

⁸ Na'c gusaantu guinii rebejn “Mastr” lojtu, sa'csi tejtisni yu' ni najc Mastr, laani najc Crist. Peta la'tu guiraatu najctu tejsi sa'tu. ⁹ Na'c guiniitu “Xtadä” loj te bejn guedxliuj sa'csi yu' tejtis ni najc Xtadtu, ni'c najc Dios ni yu' xhaguibaa. ¹⁰ Na'cza gusaantu guiniireni lojtu “Mastr” sa'csi yu' tejtis Mastr, ni'c najc Crist. ¹¹ Ni yu' si'c mos lojtu ni'c najc benroru loj resa'ni. ¹² Sa'csi chutis ni rchaloni najcni benro lo sa'ni, ni'c sustuiyá lojni, chutis ni najc nadolajz loj Dios, ni'c sunáni benro lo sa'ni.

13 'iProobzatu remastr xten leii nájzatu refarisee, najctu benguijdx! Sa'csi rudxojujtu jiu' rebejn loj xcälrnibee Dios. Lagajc la'tu ditu jiu' luxh dizatu gusaan jiu' rebejn ni rlanj jiu'.

14 'iProobzatu remastr xten leii nájzatu refarisee, najctu benguijdx! Sa'csi rudzucajtu rolizj renanbiuud la'si cabedx canabduxhtu lo Dios, naatu gusueutu bejn si'c. Sa'csi rujntu scree, siabduxh fis xten Dios yejctu.

15 'iProobzatu remastr xten leii nájzatu refarisee, najctu benguijdx! Zijt rijtu lo reneyuj nájza lo nisdoo te guntu gaan guchaa mase tejtis bejn xmoodni te gan'ni Dios si'c rajntuni. Luxh che ahuililajz bejnga xtiidxtu, rujntuni tio'p huält maazru te xi'n gabijl loj ni najctu.

16 'iProobzatu, najctu si'c lotiä'p, rlanjtu guluiitu nezyuj! La'tu ni rnii palga te bejn guiniliipac xtiidxni guzä'tni guidoro, xhet sajcdi xtiidxni. Palga guiniliipacni guzä'tni oor ni yu' neñ guidoo, dxejc sii rniliini dxejc nungäjl guzoobni xtiidxni. 17 jBeñ nayääl, beñlotiä'p! ¿Xhini'c sajcru? ¿La oor la guidoro ni rundxan oorga? 18 Rniizatu: "Palga te bejn guiniliipacni guzä'tni lo bacuug ni yu' neñ guidoro, di xcuentdi xtiidxni. Luxh palga yu' chu guiniliipac guzä'tni gojn ni dzuub lo bacuug, dxejc sii rniliipacni dxejc nungäjl gusoobni xtiidxni." 19 jBeñ nayääl, beñ lotiä'p! ¿Xhini'c sajcru? ¿La gojn o la bacuug nani rundxan gojnga, ä? 20 Nani ruzä't lo bacuug che rniliipacni, et ganaxdi lo bacuug ruzä'tni, nájza guiraa ni tre' lo bacuug ruzä'tni. 21 Ni ruzä't guidoro che rniliipacni, et ganaxdi guidoro ruzä'tni, nájza Dios ni rbájza neñ guidoro ruzä'tni. 22 Sigajcza ni ruzä't guibaa che rniliipacni caguzä'tzani yagxhilo xten Dios nájza lagajc Dios ni sobga' ro'c.

23 'iProobzatu remastr xten leii nájzatu refarisee, najctu benguijdx! Bedzxtiil, anis nájza comiñ ni rajntu, ruedeetu lo Dios tej tantga yejc cade te tzuu, niluxh ditu jiu' ni sajcru lo xtidx Dios, cadro cajxcuent yäl'nabanya, yäl'rulazlajz, nájza yäl'rililajz. Deeza ni riäjlpac guntu la'l ni cayujnzatu steega. 24 jLa'tu, lotiä'p ni rlanj guluii nezyuj! Riutu rediidx ni guxii saj, niluxh rediidx ni saduxh ditu jiuni, najctu si'c bejn ni rbää te rex lo xpla'tni dxejcru räj'mni te cameii.

25 'iProobzatu remastr xten leii nájzatu refarisee, najctu benguijdx! Rusiatu detz bas nájza pla't luxh neñni najc-dxuudx. Sigajcza la'tu riuduxhtu recos-tumbr, luxh lastootu guidxa yäl'gubaan nájza yäl'rdxe'chlajz. 26 Farisee ni najc lotiä'p: gudibxgaa neñ bas nájza neñ pla't, dxejc náj dejtzni sajc naya.

27 'iProobzatu remastr xten leii nájzatu refarisee, najctu benguijdx!, sa'csi najctu si'c rebaa ni nacchesa'c; nolbäjreni, saru rluini, luxh neñreni guidxa dzuuj xte bengut nájza bälyudx. 28 Sigajcza najctu la'tu. Saru rujn lojtu, rchalo rebejn najctu bensa'c, niluxh lastootu guidxa yäl'rusguee nájza yäl'guyalajz.

29 'iProobzatu remastr xten leii nájza refarisee, najctu benguijdx! Runcheetu xpaä redade' ni gunii xtidx Dios galoo, rusucheeatu ro' xpaä rebejn ni gujc bensa'c, 30 dxejc rniitu: "Paru nibajñnu neñ redxer ni gubajñ retoxtd-goldoonu dinu niacnäj reni bagu't redade' ni gunii xtidx Dios." 31 Lagajc con rediidxre rcäjptu najctu rexajg renani bagu't redade' nani gunii xtidx Dios. 32 jColguscuääz guntu sa' recos ni guläxtiej retoxtdgoldootu!

33 jLa'tu ni najc si'c bäl, la'tu ni najc si'c te bitiiääz guidxa bäl'nialajz! ¿Xho guntu te na'c chäätu gabijl par tejpas? 34 Ni'cni, guxhalä' repxenä' ni guini xtidxä, nájza beñnajn, nájza mastr. Luxh yu'reni suha'ttu sucuaatreni lo cruzj; yu'zaren i siguijntu neñ reguidobäz, sirinajlturen i guejdx por guejdx.

35 Si'cza yejctu jiajb xtiejn guiraa rebeñnadolajz ni bagu't bejn xchejli toAbel

ni gujc nadolajz, xchejliza Zacarías, xi'n Berequías, ni bagu'ttu neñ guidoro gajxh lo bacuug. ³⁶ Rniliäpac lojtu, dojl xten guiraa recosga siajb yejc rebejn ni tre' lo guedxliuj naj.

Jesús biin xcuent guedx Jerusalem

(Lc. 13:34-35)

³⁷ Räjpa Jesús:

—¡Jerusalén, Jerusalén! Xpejnlu rugu't redade' ni rnii xtidx Dios, ru-cuaazareni guij yejc rebejn ni ruxhal Dios te gusule'reni xtiidxni lojtu. ¡Balti huält rlazä nutie'ä la'tu si'cni rutie' guidco'c rexquidbäzni neñ xhigani, per ditu nicäjb! ³⁸ Colhuii xho jianxteb xquidootu cuälazrenini. ³⁹ Rnixgää lojtu, naj dirutu fii loä, dxejli che guiniitu: “Benle' Dios nani siääd xcuentni.”

24

Jesús räjp sibijl guidoro

(Mr. 13:1-2; Lc. 21:5-6)

¹ Birii Jesús neñ guidoro te asiini, dxejc gubig rexpejnpackni lojni, gusloj caguluireni reyuduxhga lojni. ² Dxejc räjp Jesús lojreni:

—¿La ruhuiitu guiraa reyu're? Rniliäpac nicla tej guij di jia'n yejc sa'ni ree; guiragajc reyu're sibijl.

Cos ni gululoj gac fis

(Mr. 13:3-23; Lc. 21:7-24; 17:22-24)

³ Dxejcti huijreni yejc te dajn ni laa Oliib. Che gurej Jesús ro'c, biääd rexpejnpackni lojni te xhiga'tz gunabdiidxreni lojni:

—Rlaaznu guiniilu loonu guc gac guiraa recosre. ¿Xhi seen gululoj ameer jiäädlu näjza che ameer nitloj guedxliuj?

⁴ Dxejc räjp Jesús lojreni:

—¡Colnatiro te rut gusueedi la'tu! ⁵ Sa'csi su' xhidajl reni jiääd, naaren: “Narä nacä Crist”, luxh susgueereni xhidajl bejn. ⁶ Siejn diajgtu xcuent cadro cayajc guer, näjza xcuent cadro rlazj chu guer, na'c guidxtejbtu sa'csi si'c nungäjil gac, niluxh gajd galdi nitloj guedxliuj. ⁷ Sa'csi siäjs te naciön sidilnäjni stee naciön; te yälrnibee sujñ guer con stee yälrnibee, luxh su' gubijn, su' yälgujdx, su'za xuduxh xhidajl lajt. ⁸ Luxh guiraa redee cuäxtejtis retrabajwduxh ni churu chu.

⁹ 'Dxejc guteedreni la'tu ladznaa rebendojl te gusacsireni la'tu, te gugu'tzareni la'tu, luxh guiraa rebejn sidxe'ch lojtu sa'csi sanälajztu narä.

¹⁰ Neñ redxejga, xhidajlreni sibälaz xcälirilajzreni, sidxe'ch lo sa'reni, suto' sa'reni lo sa'reni. ¹¹ Dxejc siricaj xhidajl bejn ni rusguee, gäbreni xcuent Dios rniireni, luxh susgueereni xhidajl bejn. ¹² Sa'csi lacti suduxh yällatsiaj lo guedxliuj, diru bejn chanälajz sa'ni. ¹³ Dxejcti bejn ni chasanäj xnezyujtis Dios, ni'c sun gaan xca'ni yälñabajn par tejpas. ¹⁴ Luxh sisiule' xtidx Dios guideb lo guedxliuj te gacbee guiraa reben guedxliuj xtiidxni; dxejrcu jiääd fis xten Dios.

¹⁵ 'Cheni fiitu asobga' te benguidxduxh neñ yu' ni najc dxan neñ guidoro, si'cni gunixgaa toDaniel ni gunii xtidx Dios gacni, bejn ni goj dee sugacbeeni nani rojni, ¹⁶ dxejc renani rbäjz lo guedx Judea, suguxunreni gucuatzojreni neñ dajn. ¹⁷ Bejn ni niä'p yejc xyu'ni dxejga di galdi jiajtni te chalääni xhixtenni neñ xyu'ni; ¹⁸ bejn nani cayujñ dzuun lo niaa, na'c guibi'ni niclaza chaxhiini xhajnbi. ¹⁹ ¡Proobza regunaa ni nuxi'n, näjza reni cagusiä' báz neñ redxejga! ²⁰ Colñabduxh loj Dios xhet nendi redxej ni cayacnalduxhdi

nanab guxuḡditu, ni claza dxej che rusilajz bejn. ²¹ Sa'csi su' trabajwduxh neḡ redxejga, sa' ni gajd bejn fii dxejli ni guzobloj guedxliuj, luxh che tedni, diru guibi' chuni. ²² Luxh palga di Dios gutiu' yejc redxejga, ni claz tej bejn di laa. Luxh sutiu' Dios yejc redxejga sa'csi rinälajzni reni aguleni.

²³ Neḡ redxejga palga yu' chu naa lojtu: “Colḡhuii, aree Crist”, o “Colḡhuii ani arec”, na'c chalilajztuni. ²⁴ Siääd xhidajl niguii ni rusguee, gäbreni najcreni crist; sidzujnza rebejn ni rusguee ni gäb xtiidxpac Dios rusule'reni; luxh sujnreni remilagwr sujnzareni senro, parsi gusgueereni, susgueduxhreni rebejn, niluxh rlijzreni gusgueezareni rebejn ni agule Dios, ni rililajz xti-idxni. ²⁵ Agunixgää lojtu xhini'c gac. ²⁶ Ni'cni palga naareni lojtu: “Bahuii, a crist yu' nez lo reyubijdz”, na'c chäätu; o palga naareni: “A crist suga' neḡ yu're”, na'c chalilajztuni. ²⁷ Sa'csi si'cni guideb xhaguibaa rien che rdinya' ladjaa näjza ladjiätli, si'cza suhuiitu loä, Xi'n Dios ni gujc Niguii, cheni jiälsacä lo guedxliuj. ²⁸ Ni najntu cadro naga' te mangut, ro'c re' regolbetz.

Cheni jiädsac Xi'n Dios ni gujc Niguii

(Mr. 13:24-37; Lc. 21:25-33; 17:26-30, 34-36)

²⁹ Räjpzani:

—Cuantsi ted guiraa retrabajwduxh, sicäy lo gubijdx, diruza bäii gusanij, sitejba rebajl ni yu' xhaguibaa, sinibduxhza guideb xhaguibaa. ³⁰ Dxejcti suhuiireni xhaguibaa seen xten Xi'n Dios ni gujc Niguii, luxh guiraa rebejn ni rbäjz neḡ guiraa reguejdx lo guedxliujre, sonduxhreni suhuiireni siääd Xi'n Niguii lo reza xhaguibaali. Siäädni con yälrmibe näjza yälrdimbichaduxh. ³¹ Dxejc suxhalni rexanglni con te trompet ni guscuedxa'reni dipduxh te guire' guiraa rebejn ni aguleni lo guidajp lajd squiin guedxliuj, guideb lo guedxliuj näjza xhaguibaa.

³² 'iColguiseed ni ruluii yajg iigw! Che naren reḡaani che cabääni be'n, asiääd bäi curex, ³³ sigajcza cheni fiitu cayajc guiraa recosre, sacbeetu asiädgajxh fis, rolä'li abidzujni. ³⁴ Rniliäpac lojtu, guiraa redee sajz laḡ ni nabajḡ gaii rebejn ni suga' ree naj. ³⁵ Guibaa näjza guedxliuj sinitloj, niluxh xtidxä di nitloj.

³⁶ 'Rut najndi xhi dxej, xhiör gacni, ni claz rexangl Dios, ni claza Xi'n Dios; Dad Diostis najn.

³⁷ 'Sigajcni gujc neḡ redxej che gubajḡ toNoé, si'cza gac che jiälä Xi'n Dios ni gujc Niguii. ³⁸ Neḡ redxe galoo, cheni gajd nisguiduxhga jiajb, rebejn ni nabajḡ dxejc cayajwreni, cayä'reni, caguchnaareni, cagudeedza bejn xindxa'preni guchnaa, dxejli cheni biu' Noé neḡ barcwro. ³⁹ Direni niacbee xtiidxni; cheni biäädli nisguiduxh ni sanä guiraareni dxejcru gubeereni. Sigajcza gacni che jiälsacä narä Xi'n Dios ni gujc Niguii. ⁴⁰ Neḡ redxejga palga cayujḡ tio'p bejn dzuun lo niaa tejni guibee, steeni sia'n. ⁴¹ Palga cayo't tio'p gunaä xobniil, tejni guibee, steeni sia'n.

⁴² Ni'cni colsusin, sa'csi ditu gan xhi dxej jiääd Dad xtentu. ⁴³ Colganchee, paru niacbee baxhuaan xten yu' cor yääl niääd gubaan ni siädlan rolizjni, nisisinni dxejc, dini nusaan niu'ni rolizjni te cuanni. ⁴⁴ Ni'cni colsusinza la'tu, sa'csi siääd Xi'n Dios ni gujc Niguii lagajc or ni ditu gun xhigab jiäädni.

Xcuent te mossa'c näjza te mosgijdx

(Lc. 12:41-48)

⁴⁵ 'Chuni'c najc mossa'c ni ruzoob diidx, ni basannäj xlamni rebejn ni yu' rolizjni te gudeedni xhi gaureni ä? ⁴⁶ Chicbaa mos ni saru cayujḡ xtuunni che guidzujḡ xlamni. ⁴⁷ Rniliäpac lojtu, lamga susa'nni sa' mosga te fiini guiraa xhixtenni. ⁴⁸ Dxejc palga mosga di gusoob xtidx xlamni, gunni

xhigab: “Sacladuxh guibi' xlamä”, ⁴⁹ dxejc guisloj cagusacsíni resamosni, guislojni gaunäjni, yänäjni rebengu. ⁵⁰ Dxejc sidzujñ xlamni dxej che dini gun xhigab jäädni, luxh or ni dini gan guidzujñni. ⁵¹ Dxejc siguinduxhni mosguijdxga, surilaagwnini te guidxagsa ni sabenguijdxni, dxejc sonduxhni, chubejli reläjyjni.

25

Xcuent tzuu gunaa

¹ Räjpa Jesús:

—Pues xcälrnibee Dios najc si'c tzuu gunadxa'p nani cua' xcandilse'treni te huijreni te sa'. ² Gaii regunaaga nasin, sgaiireni nayääl. ³ Reni nayäälga sanäreni xcandilreni, niluxh direni nica' sijn se't. ⁴ Niluxh reni nasinga sanäreni sijn se't te guze'creni nen xcandilreni. ⁵ Sa'csi bi'nga di nidzungaj, gunaaaz bacal regunadxa'pga, gudiejstireni. ⁶ Dxejc si'cti garol yääl, biejñ te xse' ni räj: “Bi'n asiääd, colchäj, colchachaglojni.” ⁷ Guiraa regunaare huistieguxunreni, dxejc bensa'creni xcandilreni, te cuaguijreni. ⁸ Dxejc guigaii regunayääl räjpreni loj reni nasin: “Colgunidxlaa te bo'c se't gusanijnu xcandilnu, sa'csi arlajzni jiuini.” ⁹ Dxejcti regunanasin räj lojreni: “Digac-dini, dxejc dini gal nicla par nuurnu nicla par la'tu. Colchäj cadro ruto'reni se't colchazii xse'ttu.” ¹⁰ Lalni sasii guigaii regunaa-nayäälga se't, bidzujñ bi'n. Regunaa-sin ni cabäjz bi'n biunäjrenini lo sa', biäuuti ro lä'. ¹¹ Cheni bidzujñ regunanayäälga, räjpreni: “Dad, Dad, baxhal ro lä'.” ¹² Dxejc räjpni lojreni: “Rniliäpac lojtu, dina gumbeätu.”

¹³ Dxejc Jesús räj lojreni:

—Colsusinza, sa'csi ditu gan nicla xhi dxej nicla xhi or siääd Xi'n Dios ni gujc Niguii.

Xcuent lam ni badeed meel

¹⁴ Xcälrnibee Dios xhaguibaa najc si'c te bejn ni agojl guirri chääni zijt te biaj. Gurejdxni rexmosni, badeedni meel lojreni.

¹⁵ Lo tejni badeedni si'cti gaii miñ meel, lo steeni badeedni si'cti tio'p miñ, dxejc steeni cua' te miñ. Loj tejjani badeedni si'cti ni rujñni xhigab sajc gunnäjreni dzuun, dxejcti biriini xpiajni. ¹⁶ Ni cua' gaii miñ meel bejn te dzunro, bejnñi gaan sgaii miñ meel. ¹⁷ Sigajcza ni cua' tio'p miñ meel, bejnñi gaan stio'p miñ. ¹⁸ Dxejcti ni cua' te miñ meel, huicua'tzni xmeel xlamni nen te gueed ni gudäänni lo yuj.

¹⁹ Gudejdti balti bäii, dxejc gubi' xlam remosga, bejnñi cuent loj guiraareni. ²⁰ Che bidzujñ ni cua' gaii miñ meel, bidzunnäjni sgaii miñ meel ni bejnñi gaan, räjpni loj xlamni: “Dad, baniidx guejblu gaii miñ loä. Aree sgaii miñ meel ni benä gaan.” ²¹ Räj xlamni lojni dxejc: “Hueenca, mos hueen najclu, rusoobzalu xtidxä. Sa'csi gujclu bensa'c con te cos bäz, naj sunidxä guinibeelu xhiroobru. Biu' loä, bibalaznäjä narä.” ²² Che bidzujñni ni cua' tio'p miñ meelga, räjpni loj xlamni: “Baniidx guejblu tio'p miñ meel loä, aree stio'p miñ meel ni benä gaan.” ²³ Räj xlamni lojni: “Mbaj. Mos hueen najclu rusoobzalu diidx. Sa'csi gujclu bensa'c con te cosbäz, naj sunidxä guinibeelu xhiroobru. Biu' loä, bibalaznäjä narä.” ²⁴ Che bidzujñ mos ni cua' te miñ meel, räjpni lo xlamni: “Dad, ananä najclu te bejn ni di gulazlajz; rca'lu cose'ch cadro dilu nibe'c binij, rutojpszalu cadro dilu nutie'ch binij. ²⁵ Ni'cni bidxebä, huicua'tzä xmeellu nen yuj. Niluxh axh aree xmeellu.” ²⁶ Dxejc räj xlamni lojni: “¡Mos guijdx, mos ploj! Najnlu rca'ä cose'ch cadro dina nibe'cä binij,

rutopä cadro dina nutie'chä binij. ²⁷ Riäjł nisa'nlu xmelä neñ te bancw te che nibi'ä nicasacä xmelä con xi'nni ni niujni gaan.” ²⁸ Dxejc räjpni loj reni suga' ro'c: “Colgudzucaj te mił meel ni ca'ni colgudeedni loj ni rajp tzuu mił meel. ²⁹ Sa'csi loj ni rajp sudedäru, niluxh ni xhet rajpdi sudzucää tudxe'n nani rajpni.” ³⁰ Dxejc räjpni: “Colca' mosre ni xhet sajcdi, colguzälñi lo yälñacäjy, cadro chu yälñronduxh, näjza yälñrajw reläjy bejn.”

Yälğuxhtis xten reguejdx

³¹ 'Che jiädsac Xi'n Dios ni gujc Niguii con yälrdimbicha' xtenni, siädñäni rexangl Dios. Dxejc sibejni lo tron ni rdimbicha' xtenni te guinibeeni. ³² Dxejc sidojp nez lojni guiraa reben guedxliuj. Dxejc sibeni lojreni, silia'ni sa'reni si'c rujn te baxtoor cheni rbeni rexiil loj redxib, te rlia'reni loj sa'reni. ³³ Suzujni rexiil xladbeeni dxejc redxib xladbäjägwini. ³⁴ Dxejc säjb reiij loj reni suga' xladbeeni: “Coltaa, la'tu ni beñle' Xtaä. Coljiu' lo yälñribee ni guc-chee cheni guzoblojli guedxliuj. ³⁵ Sa'csi che calanä la'tu baniidx xhi gudauä, che cayolä, la'tu baniidx xhi gu'ä. Che cuanzaä si'c te benzijit, la'tu banidxlaatu cadro bia'nä. ³⁶ Che xheti xhabä, la'tu baniidxni, che gucxhuä, la'tu biädhuiitu narä, che guyu'ä neñ latzguuib, biädhuiitu narä.” ³⁷ Dxejc sinii reni suga' xladbeeni, säjbreni: “Dad, çguc bahuiinu gulaanlu, baniidxnu xhi gudajwlu? Çguc bahuiinu cayojllu, baniidxnu xhi gu'lu? ³⁸ Çguc bahuiinu najclu si'c te benzijit, baniidxnu cadro bianlaalu, o biäädx xhajblu, baniidxnu xhi gojtlu? ³⁹ O çguc bahuiinu cayacxhuulu, o yu'lu neñ latzguuib, biophuiinu lojlu?” ⁴⁰ Dxejc reiiga säjb lojreni: “Rniliäpac lojtu, xhitis xhi bejntu loj te rexpənä ni rñii xtidä mase proobreni, lagajc loä bejntu recosga.”

⁴¹ 'Dxejc säjzpäni loj reni suga' ladbäjägwini: “Colguibicaj loä, benguijdx, colçhäj lo balduxh ni cayejc par tejpas ni cayejc par beñdxab ni rnibee näjza rexpəndxabni. ⁴² Sa'csi gulanä, luxh ditu nuniidx xhi niauä; biolä, per ditu nuniidx xhi niä'ä; ⁴³ cuanzaä si'c te benzijit, luxh ditu nuniidxlaa cadro nia'nä, biädzxa xhabä, niluxh ditu nuniidx xhi niacwä; gucxhuä, guyu'äza neñ latzguuib, niluxh ditu niädhuii loä.” ⁴⁴ Dxejc laareni säjbreni: “Dad, çguc bihuiinu calaanlu, o cayojllu, o canzajlu si'c te benzijit, o cayäädx xhajblu, o cayacxhuulu, o yu'lu neñ latzguuib, luxh dinu niacnäjlü?” ⁴⁵ Dxejc säjb reiiga lojreni: “Rniliäpac lojtu, loj xhitis ni ditu niacnäj rebejn ni rililajz xtidä, mase proobreni naräni ditu niacnäj.” ⁴⁶ Dxejcti sij rebejnre lo yälñrusacsı par tejpas, per rebejn ni nadolajz, ni agule Dios, sijreni lo xcälñabajñ Dios par tejpas.

26

Bejnreni xhigab xho guiniaazreni Jesús (Mr. 14:1-2; Lc. 22:1-2; Jn. 11:45-53)

¹ Che gulujx gunii Jesús rediidxre, räjpni loj rexpəjñpacni:

² —Anajntu stio'p dxejtis cayäädx gac lanij ni laa pascw. Luxh suteedreni narä, Xi'n Niguii ladzñaä reni gucuaa narä lo cruzj.

³ Dxejc bidojp rebejn ni rnibee rebixhojz, näjza remastr xten leii, näjza rebəngool lo rexpəjñ Israel. Lo xle' Caifäs, ni rnibee loj rebixhojz, bidojpreni.

⁴ Ro'c bachaagreni diidx xho guiniaazreni Jesús con yälñrusguee, te ju'trenini.

⁵ Luxh räjpreni lo sa'reni:

—Na'c jiennuni neñ redxe lanij, te di gun rebejn bieiduxh.

Te gunaa ni biädnä perfum
(Mr. 14:3-9; Jn. 12:1-8)

⁶ Che yu' Jesús guedx Betania, rolijz Simón te bejn ni basiajcní che ral tiejxhni, ⁷ ro'c gubig te gunaa lojni, ca'ni te vasguij ni laa onix, guidxani te perfum ni sajc melro. Che sobga' Jesús lo mex, bachajni perfum yejc Jesús. ⁸ Che bahuii rexpejn pacni xhi cayujjni, bidxe'chreni, gusloj cayäjpreni:

—¿Xhicuent casáxlia'ni perfumga? ⁹ Perfumre niajc nido'ni, nirri xhidajl meel lojni te niacnäjni rebenproof.

¹⁰ Biejn diajg Jesús xhi caniireni, dxejc räjpni lojreni:

—¿Xhicuent cadxe'chnäjtu gunaare? Ni te coshween najc dee nani bejnni loä. ¹¹ Ni guirasi dxej su' rebejn ni xhet rajpdi lojtu, peta narä guxii dxej su'ä lojtu. ¹² Nani bejn gunaare che bachajni perfumre guideb lagaa tiexhä, najcni par guzucheeni narä te guiga'tzä. ¹³ Rniliäpac lojtu, cadrotis gusule'reni xtidxä lo guideb guedxliuj, sujyreni diidx xcuent ni bennäj gunaare narä, te guinaj lajzreni gunaare.

Judas bato' Jesús
(Mr. 14:10-11; Lc. 22:3-6)

¹⁴ Dxejc lo retzubitio'p rexpejn pac Jesús birii tej ni laa Judas Iscariote, huininäjni rebejn ni rnibee loj rebixhojz, ¹⁵ räjpni:

—¿Lac guniidxto loä te gutedä Jesús ladznäatu?

Dxejc badeedreni galbitzuu melpla't lojni. ¹⁶ Dxjecli caguuil Judas xho gutedni Jesús lojreni.

Lult xchej xten Jesús
(Mr. 14:12-25; Lc. 22:7-23; Jn. 13:21-30; 1Co. 11:23-26)

¹⁷ Primer dxej lanij, dxej ni rajwreni yätxtiil ni di saguij, gubig rexpejn pacni loj Jesús, räjpreni lojni:

—¿Caro rlajzlu chozucheenu te gaulu xchej xten lanipascw?

¹⁸ Dxejc räjpni lojreni:

—Colchäh lo guejdx rolijz te dade', colye'tz lojni: “Si'c naj Dad mastr: Asiäddzungajxh xo'ni, ni'cni rolijzlu gaunäjni rexpejn pacni xchej lanipascw.”

¹⁹ Bejnti rexpejn pacni si'cni gunibee Jesús gac, bazucheereni xchej xten pascw.

²⁰ Che biu' guxhijñ, sobga' Jesús lo mex con retzubitio'p xpejn pacni. ²¹ Lal ni cayajwreni räjpni lojreni:

—Rniliä lojtu, yu' tejtú ni guto' narä.

²² Dxejc guc-huinduxh lajzreni, räjpreni lojni:

—Dad, ¿andi naräni?

²³ Dxejcti räjp Jesús lojreni:

—Ni gaunäj narä nen tejtis pla't, laa ni'cni guto' narä. ²⁴ Xi'n Dios ni gujc Niguii sajc si'tctis ni caj loj guijtzt xten Dios, per gunatiro bejn ni guto'ni. Huenru na'c niajl bejnga.

²⁵ Dxejcti gunii Judas, ni caguto' Jesús, räjpni:

—Mastr, ¿andi naräni?

Jesús räjp lojni:

—O'n, lujni.

²⁶ Lal ni sobga'reni cayajwreni, guläs Jesús yätxtiil, badeedni xquixtios lo Dios, dxejcti gula'nini, badeednini loj rexpejn pacni, räjpni:

—Coltajw; dee najc si'c tiexhä.

²⁷ Dxejc guläsni te vas, badeedni xquixtios lo Dios, dxejcti badeednini loj rexpejn_{pacni}, räjpni:

—Guiraatu colyá', ²⁸ sa'csi dee najc si'c xtienä; ni'cni riannää la'tu te didxcoob, luxh rejnre sixe'ni xcuent xhidajl bejn te guslaanireni nen _{dojl}.

²⁹ Luxh rniä lojtu, diruna yá'a nis nani riü yejc uub, dxejlini yänäsacätu lo xcälribee Dios, Xtädä.

Räjp Jesús sibälaz Pedroni

(Mr. 14:26-31; Lc. 22:31-34; Jn. 13:36-38)

³⁰ Che gulujx bilreni te dij, biriireni, sääreni lo dajn ni laa Oliib. ³¹ Dxejc räjp Jesús lojreni:

—Guiragajctu sactio'p lajztu xcuentä, susa'ntu narä naguxhijñ sa'csi lo reguijtz xten Dios caj scree: “Sugu'treni baxtoor dxejc sire'ch rexiil.” ³² Dxejc cheni guiban_{sacä} lo rebengut, ganidä cha'ä regiön Galilee, dxejcti jiädnajltu narä.

³³ Dxejc räjp Pedr loj Jesús:

—Masque guiraareni cuälazlu, narä dina cuälazälu.

³⁴ Dxejc räjp Jesús lojni:

—Rniliäpac lojlu, lagajc guxhijñre, nicla gajd guidgaii cuedxa', luxh luj alagulälazlu narä choñ huält.

³⁵ Räjp Pedr loj Jesús:

—Masque riäj_l guetnäälü, dina cuälazälu.

Dxejc sigajcza gunii guiraa rexpejn_{pacni}.

Gurejdx-gunab Jesús loj Dios nen _{Getsemani}

(Mr. 14:32-42; Lc. 22:39-46)

³⁶ Dxejcti bidzujñ Jesús näjza rexpejn_{pacni} te lajt ni laa Getsemani, räjpni lojreni:

—Colcuésijc ree la_l ni cuedx-guiniabä lo Dios.

³⁷ Dxejc sanäni Pedr näjza guiro'p xi'n Zebedeo, luxh gusloj cayachuinduxh lajzñi, cayu'zani yärsiaduxh. ³⁸ Dxejc räjpni lojreni:

—Te yälhuinduxh yu' lastoä; astoocanu agoj_l guetä. Coljia'n ree, coltie'ch bacal lojtu.

³⁹ Dxejc guzaj Jesús stla', guzuxhijbni dxejc basajb lojni lo yujli, gusloj cabedx-canabni lo Dios:

—Xtädä, palga sajñni, basanlaa tedcaj trabajwduxhre ni tedä, te na'c tedäni. Xhet si'c di ni rlažä gacni; si'cpacni rlažzlu gac, si'c gacni.

⁴⁰ Dxejcti gubi'ni cadre suga' guichoñ rexpejn_{pacni}, che bidzujñni ro'c, nagayejsreni. Räjpni lo Pedr:

—¿La di najcdi nutie'chtu bacal lojtu nicla tebor, ä? ⁴¹ Colguibajñ, colnab lo Dios te na'c jiajbtu nen _{dojl}. Guliipacni, lastootu nadip, niluxh tiejxhtu rdxajg.

⁴² Gubi' Jesús stehuält, gurejdx-gunabni loj Dios, räjpni:

—Xtädä, palga digacdi tedcaj tedä trabajwre, sugacni si'ctis ni rlažzlu gacni.

⁴³ Dxejc gubisacni, bidxälñi rexpejn_{pacni}, nagayejsreni sa'csi yuduxh bacal lojreni. ⁴⁴ Basaannireni, dxejc säasacni, gurejdx-gunabni lo Dios ni riojñ huält, gunisacni lagajc rediidx ni guniini galoo. ⁴⁵ Dxejc huijñi cadre suga' rexpejn_{pacni}, räjpni lojreni:

—iNaj sii, colguejs, colgusilajz! Abidzujñ or ni gutedreni Xi'n Dios ni gujc Niguii ladzñaa rebendoj_l. ⁴⁶ iColchastie, colcho', colhuii! Asiääd nani guted narä ladzñaa rebendoj_l.

*Gunaazreni Jesús sanärenini pres
(Mr. 14:43-50; Lc. 22:47-53; Jn. 18:2-11)*

⁴⁷ Lalni canii Jesús bidzujn Judas, nani najc tej retzubitio'p xpejn'pacni. Bidzun'näjni xhidalduxh bejn ni ca' espaad, ni ca' garo't, najcreni xpejn reni rnibee rebixhojz, nájza xpejn rebengool xten rexpejn Israel. ⁴⁸ Judas, ni bato' Jesús, abadedxgaani te seen lojreni räjpni:

—Nani guchagro'ä, ni'c najc laani; colguiniazgajcni.

⁴⁹ Dxejc gubigni loj Jesús, räjpni:

—Xchan, Dad Mastr.

Dxejc bachagro'ni lojni. ⁵⁰ Jesús räjp lojni:

—Xamigwä, ¿xhi siäädlu?

Dxejcti gubig rebejn lojni, gunaazrenini.

⁵¹ Per tej reni suganäj Jesús gulääni te spaad, batiu'ni diajg te mos xten rebixhojz ni rnibee. ⁵² Dxejc räjp Jesús lojni:

—Guluchee xspaadlu loj xse'ni. Guiraa reni rucuanäj con spaad, lagajc con spaad guetreni. ⁵³ ¿La ditu gan sajca guiniabä lo Xtadä, luxh laani suxhalgajcni gayonbitzubitio'p mił xanglni gacnäj narä? ⁵⁴ Dxejc xho gac soob diidx ni caj lo reguijtz xten Dios ni rnixgaa riäjł gac guiraa recosre lagajc si'cni cayajcni.

⁵⁵ Dxejc räjp Jesús loj rebejn xhidajlga:

—¿La siädñätu spaad nájza garo't te guiniaaztu narä astoocanu nacä si'c te gubaan? Ni guirasi dxej gureä galäiitu, baluiätu neñ guidoro, luxh ditu niniaaz narä. ⁵⁶ Niluxh guiraa recosre cayajc te soob rediidx ni caj lo reguijtz ni bacuaa redade' ni gunii xtidx Dios.

Dxejcti guiraa rexpejn'pacni basanxtebreni Jesús, baxunreni lojni.

*Jesús nez loj rebixhojz
(Mr. 14:53-65; Lc. 22:54-55, 63-71; Jn. 18:12-14, 19-24)*

⁵⁷ Reni gunaaz Jesús huinänini nez loj Caifás, ni rnibee loj guiraa rebixhojz, bidzujnreni cadro abidojp guiraa rebejn nani ruluii leii nájza rebengool xten xpejn Israel. ⁵⁸ Dxejcti zit-zijt biädñajł Pedr rebejnğa, bidzujnłireni lole' xten bixhojz ni rnibeega. Ro'c biu'ni, gurenäjni rexquixhajg bixhojzga te ro'c bia'nni te fiini xhini'c gac.

⁵⁹ Reni rnibee rebixhojz, nájza rebengool con guiraa reni rajp yälrnibee gusloj caguilreni xhitis te diidx, masque xhet guliidini, te gucuaquijreni Jesús te guinibeereni guetni. ⁶⁰ Niluxh xhet bidxädireni, luxh gubig xhidajł bejn, guniireni xhidajł didx-xhii xcuent Jesús. Dxejcti bidzujn tio'p dade' ni gunii didx-xhii, ⁶¹ räjpreni:

—Niguiire gunii scree: “Narä sajc gutzulä guidoro xten Dios, sajca gunchesacäni neñ choñ dxej.”

⁶² Dxejc gusulii dade' ni rnibee lo rebixhojz, räjpni loj Jesús:

—¿Xhicuent xhet rniidilu, ä? ¿Xhini'c canii reniguiire cagucuaquijreni luj?

⁶³ Niluxh dxitis suga' Jesús. Dxejcti räjp dade' ni rnibee loj rebixhojz lojni:

—Rnibeä guiniliilu, guiniliipaclu con laj Gueb Dios nani nabajn. Gunii don, ¿la luj najc Crist, Xi'n Dios?

⁶⁴ Jesús räjp lojni:

—Lagajc guejblu naj si'c. Niluxh empac rniä lojtu, desde ñajli suhuiitu cueä narä Xi'n Dios ni gujc Niguii xladbee Dios ni rnibee, suhuiizatu jiälä lo reza ni tre' xhaguibaa.

⁶⁵ Dxejc batiäjs dade' ni rnibee loj rebixhojz xhajbni, räjpni:

—iNiguiire aguniyajni Dios con xtiidxnii! ¿Xhiru testiigw rquiinnu? Abiejn diajgtu didxyaj xtenni. ⁶⁶ ¿Xhi rchalotu?

Dxejc basejcreni diidx:

—iAbiga'ni! Riäjl guetni.

⁶⁷ Dxejc batiobxhejnreni lojni, gudijnrenini. Yu'reni gudajp lojni, ⁶⁸ räjpreni lojni:

—Palga najclu Crist, gunii chuni'c gudijnlu.

Di Pedr nicäjp numbeeni Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹ La! ni cayajc reni'c, Pedr sobga' lole'. Dxejc gubig te dxape' ni rujn dzuun ro'c, räjpni lojni:

—Näjza luj cuansanäjlu Jesús, ni siäd nez Galilee.

⁷⁰ Per di Pedr nicäjp nez loj guiraareni, räjpni:

—Dina ganä xhini'c caniilu loä.

⁷¹ Asii Pedr nez ro' puert, che bidxaagni stee dxape' ni rujn dzuun ro'c. Dxape're räjp loj reni suga' ro'c:

—Näjza dade're cuansanäj Jesús ni siäd Nazare't.

⁷² Dxejc basguee Pedr stehuält, räjpni:

—Rniliäpac dina gumbeä dade'ga.

⁷³ Che gojl sterate', gubig reni suga' ro'c loj Pedr, räjpreni:

—Guliini; näjza luj najclu te xpejn; huenliisi riejn diidx ni rniilu.

⁷⁴ Dxejcti guslojni cagueni, caguzä'tni Dios, räjpni:

—Dipacna gumbeä niguiiga.

Guniitisi si'c, chela guredxa' te guidgaii. ⁷⁵ Dxejcru banalajz Pedr rediidx ni gunii Jesús lojni che räjpni: “Che gajdli guidgaii cuedxa', choñ huält alaguniilu dilu gumbee narä.” Dxejc birii Pedr ro'c, gusloj cayonduxhni.

27

Batedreni Jesús loj Pila't

(Mr. 15:1; Lc. 23:1-2; Jn. 18:28-32)

¹ Che bianij lo guedxliuj, guiraa reni najc rebixhojz ni rnibee näjza rebengool xten rexpejn Israel bia'nreni diidx xho gunreni ju'treni Jesús.

² Baliübrenini, guläärenini ro'c, huisa'nrenini loj Poncio Pila't, ni najc gubernadoor.

Xho gujt Judas

³ Dxejcti Judas, ni bato' Jesús, che bahuiini bacuaquijreni Jesús, basiejch lajzni, guc-huin lajzni, dxejc huidzu'ni galbitzuu meel pla't loj rebixhojz ni rnibee näjza loj rebengool. ⁴ Räjpni:

—Baniitduxhä lo Dios sa'csi bato'ä te bejn ni xhet bejnidi.

Dxejc räjpreni lojni:

—Xhixh gunnu. Ni'c najc xcuentlu; lujti najn.

⁵ Dxejc bacuaa Judas meelga lo yuj neñ guidoro, biritini ro'c. Sas huijni, baliibni te duu guejn, gojlni lo te yajg, ro'cti gujtni.

⁶ Rebixhojz ni rnibee batojpreni meelga, räjpreni:

—Di gag di guizälnu meelre neñ caj gojn sa'csi najcni xcuent xtiejn te bejn.

⁷ Dxejc bia'nreni diidx con meelga siireni te la' yuj xten te dade' ni runchee guejs te ro'c gucuat'zreni rebenzijt. ⁸ Ni'cni najli rniireni yujga: “Yurejn”.

⁹ Si'c gusojb diidx ni gunii Jeremías, dade' ni gunii xtidx Dios galoo che räjpni:

“Cua'reni galbitzuu melpla'tga si'cti basoob rexi'n Israel sajc bejn̄ga. ¹⁰ Con meelga guziireni yuj lo bejn̄ ni runchee guejs, sigacni gunibee xtdnu Dios.”

Gusuj Jesús nez loj Pila't

(Mr. 15:2-5; Lc. 23:3-5; Jn. 18:33-38)

¹¹ Bidzun̄näjreni Jesús loj Pila't ni najc gubernadoor. Dxejc gunabdiidxni, räjpni lo Jesús:

—¿La luj najc reii xten rexpejn̄ Israel, ä?

Räjp Jesús lojni:

—Najcni si'cni najlu.

¹² La_lni cabe'c rebixhojz ni rnibee näjza rebengool rexquej Jesús xhetliidi guniidi Jesús. ¹³ Dxejc räjp Pila't lojni:

—¿La di diajglu jiejn̄ guiraa rediidx ni caniireni cagucuaquijreni luj, ä?

¹⁴ Per xhetliidi diidxdi basejc Jesús, nicla xcuent tejsi diidx ni bacuaquijreni. Ni'cni bidxeloduxh gubernadoorga.

Gunibeereni guet Jesús

(Mr. 15:6-20; Lc. 23:13-25; Jn. 18:38–19:16)

¹⁵ Neñ redxe lanij rajpreni costumbr ruslaa Pila't tej bejn̄ ni cue rebejn̄ loj reni yu' neñ latzguuib. ¹⁶ Neñ redxejga guyu' te bejn̄ ni säab xtiidxni ni laa Barrabás. ¹⁷ Cheni tre' guiraareni ro'c, gunabdiidx Pila't lojreni:

—¿Chuni'c rlanjtu guslaä, la suslaä Barrabás o Jesús ni laa Crist?

¹⁸ Sa'csi najn̄ Pila't rdxe'chlajzreni lo Jesús, ni'c bateedrenini lojni.

¹⁹ La_l ni sobga' Pila't lo yajgxhiil cadro rujnni yäl_guxhtis, baxha_l cháälhi diidx lojni, räjpni:

—Xhet gundilu dade'ga ni xhet bejndi, sa'csi nuchej nadxuudx gunixca_lä xcuentni.

²⁰ Niluxh rebixhojz ni rnibee näjza rebengool baquuilreni rebejn̄ te gunabreni laa Barrabás, näjza te guet Jesús. ²¹ Dxejcti gunii gubernadoor stehuält, räjpni lojreni:

—¿Chu tej loj guiro'preni rlanjtu guslaä?

Dxejc guredxa'reni, räjpreni:

—¡Barrabás!

²² Gunabdiidx Pila't, räjpni:

—¿Xhi gunnäá Jesús ni laaza Crist?

Guiraareni guredxa':

—Bacuaani lo cruzj.

²³ Dxejc räjp Pila't lojreni:

—¿Xhi latsiaj bejn̄ni?

Niluxh laareni guredxa'rureni, räjpreni:

—¡Bacuaani lo cruzj!

²⁴ Che bahuii Pila't xlia'si caniini, alga gusloj rebejn̄ cayujn̄ te bieiduxh, cua'ni nis, gudiibni ñaani nez lojreni, räjpni:

—Dina xcaquiä xtiejn̄ bejn̄re ni xhet bejndi. La'tu col_huii xho guntu. Xcuenttitu najcni.

²⁵ Dxejc guiraa rebejn̄ga badzu' diidxre, räjpreni:

—Suxcaquijnu xtiejn̄ni, nuurnu näjza rexi'nnu.

²⁶ Dxejc baslaa Pila't Barrabás, dxejc gunibeeni gudijnreni Jesús dxejc bateednini ladzña_a rebejn̄ te gucuaarenini lo cruzj.

²⁷ Dxejc huinä resoldaad xten gubernadoor Jesús lo pretoor, yu' cadro rujnreni yäl_guxhtis, ro'c batojpreni guiraa resa'reni. ²⁸ Dxejc gulääreni

xhajbni, bashuajcwrenini te lad xníaa. ²⁹Dxejc bencheereni te coron guejch, basälrenini yejcní, basälreni te yabixijl naani, xladbeeni, sas bazuxhijbreni nez lojni guslogajc caguxhisnäjrenini, räjpreni:

—¡Collä'p xpala'n reii xten rexpejn Israel!

³⁰Sas batiobxhejnreni lojni, cua'reni yabixijlga te ni'c batiälreni yejcní.

³¹Che gulujx baxhiznäjrenini, gulääreni lad xníaa ni najcwni. Dxejc bashuacwsacrenini lagajc xhajbni, sanätirenini te xcajni lo cruzj.

Bacuaareni Jesús lo cruzj

(Mr. 15:21-32; Lc. 23:26-43; Jn. 19:17-27)

³²Cheni sariireni, bidxaagreni te bejn ni siääd guedx Cirene, laani Simón, basguureni dade'ga xcruzj Jesús.

³³Che bidzujñreni te lajt ni laa Gólgota, nani säloj: dan Calabeer, ³⁴ro'c badeedreni bin nu'ch cuanlaa te gu' Jesús. Te bocbäztisni gu'ni, dxejc naaddiruni niä'nini.

³⁵Cheni abacuaareni Jesús lo cruzj, gudzujt resoldaad yejc xhajbni, te si'c gudisreni xhajb Jesús cua'reni, te si'c guzojb diidx xten te dade' ni gunii xtidx Dios. ³⁶Gurejtireni ro'c, gusloj canäjreni Jesús. ³⁷Yejc cruzjga bacuaareni te guijt con letro. Lo guijtza rcaj xhini'c najc xtojñ nani cayejt. Lo guijtza caj: “Dee najc Jesús reii xten rexpejn Israel.”

³⁸Näjza tio'p gubaan cuaj lo stio'p cruzj con laani. Tejni cuaj lo te cruzj xladbee Jesús, steeni cuaj xladbäjgwni. ³⁹Luxh renani sadejd nejzga guniyajreni Jesús, cagusniibreni yejcreni, ⁴⁰cayäjpreni lojni:

—jja'ä! Luj ni nutiexhlu guidoo, luxh choñtis dxej niunchesacluni; palga guliñ najclu Xi'n Dios, biäjñ loj cruzjga.

⁴¹Näjza rebixhojz ni rnibee, näj remastr xten leii, baxhiznäjrenini räjpreni loj sa'reni:

⁴²—Baslaani xhidajñ bejn, xhoxh di gacdi guslaani lagajc laani. Palga najcni reii xten rexpejn Israel, sujäjtñi lo cruzj nanaj te chalilajznu xtiidxni.

⁴³Huinälajzni Dios, naj suguslaa Diosni palga sanälajz Diosni; ni najni: “Narä nacä Xi'n Dios.”

⁴⁴Regubaan ni caj lo recruzj sigajcza guniyajreni Jesús.

Che gujt Jesús

(Mr. 15:33-41; Lc. 23:44-49; Jn. 19:28-30)

⁴⁵Dxejcti bicäjy guideb guedxliuj läidxej hasta rcachon gudxej. ⁴⁶Si'cti rcachon gudxej guredxa' Jesús dipduxh, räjpni:

—Elí, Elí, ¿lama sabacatani? —dee säloj: Xtiozä, Xtiozä, ¿xhicuent gulälazlu narä?

⁴⁷Yu' reni suga' ro'c, che biejn diajgreni räjpni si'c, räjpreni:

—Cabejdx Dade're Elías.

⁴⁸Baxungajc tejreni, huica'ni te sponj, bahuajdxnini loj binagr, bacuaanini yejc te biquii te badzugni binargra ro' Jesús. ⁴⁹Dxejc reni tre' ro'c räjp:

—Basaan; guidon la siääd Elías te guslaanini.

⁵⁰Dxejc guredxaduxh Jesús stehüält, baslaatini xpritni. ⁵¹Lagajc orga biräsyä' ladro ni zääb neñ guidoro, gujcní tio'p la' jiaali hasta lo yuj. Gujc te xuro, sas gusuj bej reguïro. ⁵²Dxejc gubicaj reguij ni niäuu ro' rebaa, luxh gubansac xhidajñ xpejn Dios ni gujt aguc xchej. ⁵³Dxejcti, che huäjs Jesús lo rebengut, biriireni neñ baa, baluilojreni lo xhidajñ bejn ni rbäjz guedx Jerusalén.

⁵⁴ Dxejc capitán xten resoldaad nájza resoldaad ni canäj Jesús, che bahuiireni xuduxh nájza guiraa recos ni gujc ro'c, bidxeybreni, rájpreni:

—Guliipacni najc dade're Xi'n Dios.

⁵⁵ Zijtru tre' xhidajl regunaa ni biädnajl Jesús che biriini nez Galilee te bahuiireneni. Cadxelojtisreni guiraa ni cayajc ro'c. ⁵⁶ Tej regunaaga najc Marii Magdalen, steni najc Marii xnan Jacob nájza José, steni najc xnan rexi'n Zebedeo.

Huicua'tzreni Jesús

(Mr. 15:42-47; Lc. 23:50-56; Jn. 19:38-42)

⁵⁷ Che gojl gudxey, bidzujñ te beñrajp ni siäd guedx Arimatea; laani José. Nájza dade'ga najc tej reni birinajl Jesús. ⁵⁸ Huij dade'ga loj Pila't, gunabni tiejxh Jesús. Dxejc gunibee Pila't gudeedrenini lojni. ⁵⁹ Cua'ti José tiejxh Jesús, batejbnini neñ te bariadya, ⁶⁰ huitixhnini neñ xpaapacni. Nacoob baaga, gojni bidäänni cuä' te guilaj. Dxejc basäuni ro' baaga con guiro, dxejcti siini. ⁶¹ Sobga'za Marii Magdalen nájza stee Marii nez loj baa, bahuiireni biga'tzni.

Xhi rájp resoldaad ni cuanäj xpaa Jesús

⁶² Che gudejd dxej xten ni gulec-cheereni lanij, bara yääl bidojp rebixhojz ni rnibee nájza rebejn ni laa refarisee, bidzujñreni loj Pila't, ⁶³ rájpreni lojni:

—Dad, banaj laaznu xhi rájp bejn ni rusgueere. Rájpn: “Che ted choñ dxej sibansacni loj rebengut.” ⁶⁴ Ni'c baxhal chu chacanäj ro' baaga dxejli guisa' choñ dxej, te di cháä rexpeljñpacni chaläärenini tiejxhni, dxejc gäbreni loj rebejn: “Agubansacni loj rebengut.” Yäl rusgueega saj cuntroru loj ni gujc ganid.

⁶⁵ Rájñ Pila't lojreni:

—La'tu rajptu te cuaa soldaad; colchäj, basäutu'tz ro' baaga si'ctis ni saj guntu.

⁶⁶ Dxejcti sääreni, basäutu'tzreni ro' baaga; con resoldaad bacuaareni te sei lojni te rut faldini. Dxejc basa'nreni resoldaad canäj ro'c.

28

Sibansac Jesús loj rebengut

(Mr. 16:1-8; Lc. 24:1-12; Jn. 20:1-10)

¹ Che gudejd sabd, dxej ni ruzilajz rexpeljñ Israel, che gusloj cayänij lo guedxliuj te jiu' stee xmaan, bidzujñ Marii Magdalen nájza stee Mariiga, siädhuiireni lo baa. ² Luxh alagujc te xuro ni basniib lo yuj, sa'csi biäd te angl xten Dios xhaguibaali te badzucajni guij ni niäuu ro' baaga, dxejc gurejni yejc guijga. ³ Rdimbichaduxhni si'c najc che rdinya', luxh xhajbni najc nolbäj si'c najc yejg ni riajb. ⁴ Che bahuii resoldaadni, bichebduxhreni, sädiidxreni, gujcreni si'c bengut. ⁵ Dxejc rájp guixhajg xte Diosga loj regunaa:

—Na'c guidxeybtu. Ananä caguilltu Jesús ni cuaj lo cruz. ⁶ Rutini ree sa'csi agubansacni sigajc ni najni. Coltahuii cadre gojtni. ⁷ Colguxun, colchaye'tz loj rexpeljñpacni agubansacni loj rebengut. Luxh naj agunijdni lojtu sääni región xten Galilee. Ro'c suhuiitu lojni. Dee najc diidx ni rniä lojtu.

⁸ Dxejcti rusquenduxh regunaaga, biriireni ro' baaga. Cadxeybreni, cabalazduxharenini sanäreni diidx loj rexpeljñpac Jesús. ⁹ Chela bidxaagreni Jesús lo nejz, rájpn: “Xchan”, lojreni. Sas gubigreni loj Jesús, bazuxhijbreni, gudääzreni guenni'ni, gojñrenini. ¹⁰ Dxejc rájpn lojreni:

—Na'c guidxejbtu. Colchanä diidx loj rexpenä, chääreni región Galilee, sa'csi ro'c suhuiireni loä.

Rediidx ni räjp resoldaad

¹¹ Lałni sää regunaaga, bidzujñ gaii soldaad ni huicanäjo ro' baa lo guejdxga, huisa'nreni diidx lo rebixhojz ni rnibee xcuent guiraa ni guzajc ro' baaga.

¹² Dxejc rebixhojz ni rnibee bachagsa'zarení con rebengool te bia'nreni diidx gudeedreni xhiroob meel lo resoldaad, ¹³ räjpreni lojreni:

—Scree colye'tz lo rebejn: “Lał ni nagayesnu, canäjnu ro' baa, biääd rexpejn pac Jesús guläxhiga'tzreni tiejxhni.” ¹⁴ Palga jientiajg gubernadoor dee, siohuiinuni te di yu' xhi gunni la'tu.

¹⁵ Dxejcti cua' resoldaad meel, bejnreni si'cni räjp rebixhojz. Luxh si'c bire'ch diidx loj guiraa rexpen Israel. Najli canisijceni si'c.

Baxhal Jesús rexpejn pacni

(*Mr. 16:14-18; Lc. 24:36-49; Jn. 20:19-23*)

¹⁶ Dxejcti sää retzubiteeb xpejn pac Jesús lo región Galilee, lo dajn cadro bia'n Jesús diidx guidaagnireni. ¹⁷ Cheni bahuiireni loj Jesús, bazuxhi-jbreni, gojnrenini, per yu' reni ractio'p lajzreni. ¹⁸ Dxejc gubig Jesús lojreni, guninäjnireni, räjpni:

—Arapä guiraa yälrnibee xhaguibaa näjza lo guedxliuj. ¹⁹ Ni'cni, colchäj, guideb guedxliuj colchagajn bejn gac xpenä, colgutiobnisreni, con laj Gueb Dios, näj laj Xi'n Dios näjza laj Sprit Dxan xten Dios. ²⁰ Colguluiireni gusoobreni guiraa rediidx ni guinibeä. Luxh lagajc narä suganää la'tu guiraa redxej, dxejli che nitloj guedxliuj. Sugacni si'c.

Diidx Xcuent Jesucrist Nani Bacuaa San Marcw

Baluu Juan ni rutiobnis

(Mt. 3:1-12; Lc. 3:1-9, 15-17; Jn. 1:19-28)

¹ Scree gusloj diidx xcuent Jesucrist, Xi'n Dios. ² Si'cni bacuaa toIsaías, ni gunii xtidx Dios, che räjp Dios:

Bahuii gan, guxhalä ni chanä xtidxä, ganidni cháani lojlu te guzucheeni xnezyujlu.

³ Riejn xse' ni rbedxa' nez loj reyubijdz:

“Colyuns'a'c xnezyuj Dad, colslii rexnezyulajzni.”

⁴ Biricaj Juan ni rutiobnis nez loj reyubijdzga. Rägajcni nanabpac gusiech-lajzreni, tiobnisgajczeni, te jia xtojreni. ⁵ Riädcuadiajg xhidajl reni rbäjz Judea, näjza reni rbäjz guedx Jerusalén. Dxejcti cheni ruxhobdojlreni lo Dios, rustiobnis Juanreni neñ gueu Jordán.

⁶ Xhajt Juan nacchee con guichlajd cameii, xsindoorni nacchee con guijd, niluxh gudajwni guxha't näjza dzunbäserguyjxh. ⁷ Caguluuini rebejn, rägajcni:

—Detzä siääd tej nani sajru loä, nani nicla di nungäjł surloä, cuää xcura'chni. ⁸ Narä abatiobnisä la'tu con nis, biädla laani guxhalni Sprit Dxan xten Dios te cuääzni neñ lastootu. Si'c gustiobnis nani jiääd detzä la'tu.

Batiobnis Juan Jesús

(Mt. 3:13-17; Lc. 3:21-22)

⁹ Dxejc, neñ redxejga, birii Jesús guedx Nasare't ni yu' Galilee. Dxejcru batiobnis Juan Jesús neñ gueu Jordán. ¹⁰ Che birii Jesús neñ nis, bahuiini bixal guibaa. siädyajł Sprit Dxan xten Dios yejci si'c te palom. ¹¹ Dxejcti guibaali biejn xse' te ni räjp:

—Luj najclu xi'nä ni sanälazä; rbanälazduxhälu.

Bateed bendxab prueb Jesús

(Mt. 4:1-11; Lc. 4:1-13)

¹² Sas baxhal Sprit Dxan xten Dios Jesús lo reyubijdz. ¹³ Dxejc guyu' Jesús ro'c tiuu dxej, guyu'ni cadro yu' reman. Sas gudiil bendxab nani rnibee, nani laa Satanás, xho niujjni te nusoob Jesús xtiidxni. Dxejcru biääd reangl xten Dios, biädhuiireneni.

Gusloj Jesús xtzuunni

(Mt. 4:12-17; Lc. 4:14-15)

¹⁴ Basälreni Juan neñ latzguiib. Dxejcti huij Jesús nez Galilee, huiluini xtidx Dios. ¹⁵ Dxejc räjp Jesús:

—Abidzujñ dxej, luxh yälrnibee xten Dios abidzujñ gajxh. Colsiejch lajztu, colchalilajz xtidx Dios.

Gurejdx Jesús tajp bejn ni rniaaz bäjł

(Mt. 4:18-22; Lc. 5:1-11)

¹⁶ Sasajti Jesús nez ro' nis xten Galilee, che bahuiini lo Simón näjza loj Andrés bejtz Simón. Cazälreni xquijxhreni lo nis, sa'csi rniaazreni bäjł.

¹⁷ Dxejc räjp Jesús lojreni:

—Coltanajł narä, te gunä cuedxtu bejn lacuaa ni guiniaaztu bäjł.

¹⁸ Lagajc dxejc basa'nreni rexquixhreni, sanätirenini.

¹⁹ Dxejc gusaj Jesús sche'n, sas bahuiini loj Jacoob näj Juan, rexi'n Zebedeo. Cayunsa'creni xquixhreni neñ xcanuureni. ²⁰ Guredxgajcni guiro'preni, dxejcti laareni basa'nreni xtadreni Zebedeo neñ canuu, näjza rexmosni, sanätirenini Jesús.

Te bejn nani guyu' bendxab neñ lastooni
(Lc. 4:31-37)

²¹ Bidzujntireni guedx Capernaum. Dxejcru sabd, dxej ni rusilajz rexpen Israel, biu' Jesús neñ guidobáz xten rexpen Israel. Dxejcti baluii Jesús rebejn ni tre' ro'c. ²² Bidxelojni rebejn xtiidxni, sa'csi caguluiinireni si'cpac te ni rnibee, xhet si'c'di remastr xten leiidi. ²³ Neñ xquidobázreni yu' te bejn yu' te bendxab neñ lastooni. Bendxabga guredxa', räjpni:

²⁴ —Jesús, ni siäd Nazare't, ¿xhicuent riu'lu loonu? ¿La siädgunitloju nuunu? Narä numbeälu, luxh nanä luj najclu bendxan ni siäd lo Dios.

²⁵ Dxejcti guidixa' Jesús lo bendxabga, räjpni lojni:

—Basäuu ro'lu, birii neñ lastoo niguiire.

²⁶ Sas bendxabga batienguij niguiiga, luxh cabedxa'ni biriini neñ lastoo niguiiga. ²⁷ Bidxeljcti guiraareni, canabdiidx loj sa'reni:

—¿Xhi dee? ¿Xhi dzuun nacoobre ruluiini? Niguiire rnibeeni näj re-bendxab, luxh ruzoobreni xtiidxni.

²⁸ Di niaclaa gucbee rebejn guideb nez Galilee xhi rujn Jesús.

Basiajc Jesús xnan suegr Pedr
(Mt. 8:14-15; Lc. 4:38-39)

²⁹ Che biriireni xquidobáz rexpejn Israel, huinä Jesús Jacoob näj Juan rolizj Simón näjza Andrés. ³⁰ Luxh xnan suegr Simón naga', yu'ni xliaa. Dxejc räjpreni lo Jesús:

—Cayacxhuuni.

³¹ Dxejcti gubig Jesús lojni, gunaazni naani, guläsnini; lagajc dxejc biriini xliaa. Dxejc gusloj cayunireni.

Xhidajl benracxhuu basiajc Jesús che huääz gubijdx
(Mt. 8:16-17; Lc. 4:40-41)

³² Che huääz gubijdx, luxh abiu' guxhijñ, biädnäreni guiraa rebenracxhuu loj Jesús, näjza renani yu' bendxab neñ lastooni. ³³ Luxh guideb guejdxga bidojrp ro' yu'ga. ³⁴ Basiajc Jesús xhidajl renani rajc garen-garen yälguijdx. Niluxh gulääzani xhidajl bendxab, niluxh dini nusaan ninii rebendxabga, sa'csi najnreni chu najcni.

Baluii Jesús nez Galilee
(Lc. 4:42-44)

³⁵ Che bara yääl, cäjyru bistie Jesús, biriini sääni te laad cadro ruti bejn. Ro'c cabejdx-canabni loj Dios. ³⁶ Dxejcti Simón näj resa'ni huitiilreni Jesús. ³⁷ Che bidxälrenini, räjpreni lojni:

—Guiraa rebejn caguiillu.

³⁸ Dxejc räjp Jesús lojreni:

—Col'cho' reguejdx ni yu' gajxh, te gusuleä xtidx Dios ro'c. Par ni'cpac biälä.

³⁹ Dxejcru cuansaj Jesús guideb nez Galilee, caguluiini xtidx Dios neñ reguidobáz xten rexpejn Israel. Gunibeezani biri rebendxab neñ lastoo xhidajl rebejn.

*Basiajc Jesús te bejn ni ral tiejxhni**(Mt. 8:1-4; Lc. 5:12-16)*

⁴⁰ Gubig te beŋracxhuu ni ral tiejxhni loj Jesús, bazuxhijbni. Dxejcti räjpnj lojni:

—Narä nanä sajc gusiajclu narä palga rlaizlu.

⁴¹ Balaslajz Jesús beŋracxhuuga, gunaazni ƚaani, rəpgajcni:

—Rlazä jiajclu. Biajc ƚaj.

⁴² Cheni guniini scree, biacgajc beŋracxhuuga. ⁴³ Dxejcti gulunejz Jesús bejnga. Per rəpƚgaani lojni:

⁴⁴ —Ahuiire, rutlojdi guiniilu dee. Huiluii tiejxhlu lo bixhojz. Badedgajc lo Dios nani rəjp to Moisés gudeed bejn lo Dios si'c te seen, te gacbee rebejn abiajclu.

⁴⁵ Dxejc sää bejnga. Sas gusloj cayujyni diidx lo rebejn xcuent guiraa nani gujcnj. Ni'cni diru ƚiajcdi niu' Jesús nicla tej guejdx. Cansajni te laad cadro ruti bejn. Niluxh guiranejz ri i rebejn, siädhuiireni Jesús.

2*Basiajc Jesús te bejn ni di guniib**(Mt. 9:1-8; Lc. 5:17-26)*

¹ Che agudejd balti dxej, biusac Jesús neŋ guedx Capernaum. Dxejcti biejn diajg rebejn arbäjzni. ² Bidopgajc xhidalduxh bejn. Gudxaj neŋ yu'. Nicla rolä' di ƚiaj ƚiisujreni. Dxejcti caguluii Jesús xtidx Dios lo rebejn. ³ Dxejcti bidzujn tajp bejn, nuureni te bejn ni digacti guiniib; siädƚäreneni lo Jesús. ⁴ Luxh di ƚiajcdi nidzujnreni cadro suga' Jesús, sa'csi yu' xhidajl bejn ro'c. Ni'c baxhalreni jejc yu' nejz cadro sujni. Dxejrcu cadro baxhalreni basiäjreni da' ni naga' beŋracxhuuga lojni. ⁵ Che bahuii Jesús rililaljzreni, dxejc räjpnj loj beŋracxhuuga:

—Xi'nä, agubicaj rextojllu.

⁶ Sas gaii bejn ni ruluii leii ni sobga' ro'c bejnreni xhigab neŋ lastooreni, naareni: ⁷ “¿Xhicuent rnii niguiire scree? Caniyajni Dios; rut rajcdi rudzucaj dojl. ¡Dioŋis rajc rudzucaj dojl!” ⁸ Dxejcti gucbegajc Jesús xhi xhigab cayujnreni. Dxejc räjpnj lojreni:

—¿Xhicuent rujntu xhigab si'c neŋ lastootu? ⁹ ¿La guyasiru gäbni loj beŋracxhuure: “Agubicaj rextojllu”, o la gäbni: “Huistie, cua' xta'lu, gusaj”?

¹⁰ Baj ƚaj, te gantu rajc rudzucaj Xi'n Dios, nani gujc Niguii, dojl lo guedxliujre, cania loj beŋracxhuure:

¹¹ —Lojlu rniä, ¡Huistie, cua' xta'lu, huij rolizlu!

¹² Lagajc dxejc huistie beŋracxhuuga, guläzni xta'ni, biriini ro'c nez loj guiraareni. Ni'cni bidxelo guiraareni. Dxejc gulä'preni xpala'n Dios, räjpreni: —Gajdpacnu guihuii sa' dzuunre.

*Gurejdx Jesús Levi**(Mt. 9:9-13; Lc. 5:27-32)*

¹³ Dxejrcu gubisac Jesús ro' nis xten Galilee, luxh che bidojp guiraa rebejn lojni, baluiini xtidx Dios lojreni. ¹⁴ Sasaj Jesús che bidxaagni Levi, xi'n Alfeo. Sobga'ni cadro rusquijxni rebejn. Dxejc räjpnj Jesús lojni:

—Gudanajl narä.

Sas huisuni, sanajltini Jesús.

¹⁵ Dxejc sobga' Jesús cayajwni rolizj Levi. Luxh sobganäj Jesús xhidajl reni rusquijx, ƚajza rebejdojl ni di chasanäj leii, ƚajza rexejnpacni, lo mex.

Xhidajlreni tre', luxh sanajlreni Jesús. ¹⁶ Dxejcru rebejn ni rului leii näj refarisee, che bahuiireni cayaunäjni renani rusquijx näjza rebendojl, räjpreni loj rexpejn_{pac} Jesús:

—¿Xhicuent rbenäj xmastrtu reni rusquijx näj rebendojl, luxh raunäjnireni, ränäjnireni?

¹⁷ Che biejn diajg Jesús xhi caniireni, räjpni lojreni:

—Renani nadip nadaan di guiquiin doctoor, per reni racxhuu rquuin doctoor. Dina niädtedxä rebe_{sa}'c, biädtedxä rebendojl, te gusiech lajzreni.

Gunabdiidxreni loj Jesús xcuent yälrucua'n

(Mt. 9:14-17; Lc. 5:33-39)

¹⁸ Cagucua'n rexpejn Juan näj rexpejn refarisee, renani najc rebenguidoo loj guedx Israel. Dxejc biääd gaii bejn loj Jesús, gunabdiidxreni lojni räjpreni:

—¿Xhicuent cagucua'n rexpejn Juan näj rexpejn refarisee luxh rexpejn_{pac}lu di gucua'n?

¹⁹ Dxejcti räjp Jesús lojreni:

—¿La rucua'n rebejn ni rdon chää cadro ru' yälru_{ch}naa che meer suga' bi'n? Che meer suga' bi'n lojreni, direni gucua'n. ²⁰ Per sidzujn dxej sibicaj bi'n lojreni, dxejc sii sucua'nreni.

²¹ 'Rut rucuaadi tla' ladcoob loj tla' ladyux, sa'csi ladcoob rxu'nni luxh rutiäjzni ladyuxga, dxejc xhiroobruni räjs. ²² Rutza rusäl_{di} bin ni gajd guilaj neñ guidyux ni abigaa. Sa'csi bin ni gajd guilajga sutiäj_{sni} guijdga che guilajni, luxh sinijt binga näjza guijdga. Ni'cni nanab gusäl_{ni} bincoob neñ guidcoobza.

Batojp rebejn ni rinajl Jesús triuu sabd

(Mt. 12:1-8; Lc. 6:1-5)

²³ Te sabd, dxej ni rusilajz rexpejn Israel, sasaj Jesús nez loj reyuya'n. Sas gusloj rexpejn_{pac}ni calääd_x doj lo triuu. ²⁴ Dxejc räjp refarisee, renani najc benguidoo loj guedx Israel, loj Jesús:

—Arniä, ¿xhicuent rujn rexpejn_{pac}lu dzuun ni di guchaag gunni neñ dxej ni rusilajznu, ä?

²⁵ Dxejcti räjp Jesús lojreni:

—¿La gajdtu go_l nani bejn toDavid te huält, laani näj resa'ni, ä? Che biääd_x xhi gauureni, gulaanreni. ²⁶ Biu' David neñ xyu' Dios cheni guyu' toAbiatar loj Dios. Abiatar sajcru loj rebixhojz ni guyu' neñ xquidoo rexpejn Israel. Dxejc gudajw toDavid reyätxtiil ni dzuub ro'c. Badeedzanini gudajw rebejn ni yunäjni. Luxh rebixhojz_{tis} rajc rajw yätxtiilga.

²⁷ Räjpza Jesús lojreni:

—Dios bejn dxe sabd sa'csi najnni naquiin_{pac} gusilajz bejn. Dini niujn sabd te gajda bejn_{ni}. ²⁸ Ni'cni narä, Xi'n Dios ni gujc Niguii, näjza sabd rnibeä.

3

Niguii ni nabijdz te naani

(Mt. 12:9-14; Lc. 6:6-11)

¹ Biu' Jesús stehuält neñ xquidobäz rexpejn Israel. Ro'c yu' te niguii nani nabijdz te naani. ² Niluxh ro'c cagula'tz rebejn Jesús don la susiaj_{eni} niguiiga sabd, dxej ni rusilajz rexpejn Israel, sa'csi r_{lajz}reni cue'creni xquej_{ni} loj nani rnibee rexpe_n Israel. ³ Dxejc räjp Jesús lo niguii nani nabijdz naani:

—Huistie, guzuj galäiire.

⁴ Dxejcti gunabdidxgaj_{ni} loj gaii rebejn_{ga}, räjpni:

—¿La laaca gunni dzunza'c, o la dzunguixdx, sabd, ä? ¿La suslaani yäl'nabajn, o la sugu'tni?

Luxh laareni biacdxireni. ⁵ Dxejc nadxe'ch bahuii Jesús lojreni, luxh guchuin lajzni, sa'csi guc najd lajzreni. Dxejc räjp Jesús loj niguiiga:

—Baslii naalu.

Dxejcti basliini naani. Biajctini. ⁶ Dxejcru biunejz refarisee. Guslogajczeni caguchaagreni diidx con reni nadxaag Herodes, te don xho ju'treni Jesús.

Xhidajl bejn bire' ro' nis

⁷ Jesús näjza rexpejn pacni sääreni ro' nis, luxh xhidajl bejn Galilee birinajlni. ⁸ Che gojnreni redzunro ni rujn Jesús, xhidajlreni biääd. Yu'reni birii Judea, yu'reni birii guedx Jerusalén, yu'reni birii Idumea, yu'zarenii birii nejz stelaad gueu Jordán, biriizarenii nez guedx Tiro, näj nez guedx Sidón, biädhuiireni loj Jesús. ⁹ Ni'cni räjp Jesús loj rexpejn pacni quuilreni te canuu, te na'c gutää rebenxhidaalgani. ¹⁰ Abasiajc Jesús xhidajl bejn racxhuu, ni'cni guiraasi bejn racxhuu caxa't lojni, te canrenini te jiajcreni. ¹¹ Niluxh che rhuii rebenxab lojni, ruzuxhijbreni lojni. Dxejcti rbedxa'reni räjpreni:

—Luj najclu Xi'n Dios.

¹² Dxejcti Jesús guidixa' lojreni te na'c niäjbreni chu najcni.

Gule Jesús tzubitiop bejn loj reni rinajlni

(Mt. 10:1-4; Lc. 6:12-16)

¹³ Birii Jesús sääni lo te dajne' cadro gurejdxni renani rlanjni cueni. Gubigtireni lojni. ¹⁴ Dxejcti guleni tzubitio'preni te sanäjreni laani, te guxhalnireni chaluireni xtidx Dios; ¹⁵ te ga'preni yäl'rnibee te gusiajcreni bejn racxhuu, te cuääzarenii rebenxab. ¹⁶ Retzubitio'p bejn ni gule Jesús najc: Simón, ni gulälajzani Pedr. ¹⁷ Dxejcti Jacoob con Juan, rexi'n Zebedeo, gulälaj Jesús Boanerges. Con xtiidxnu sälojni bejn ni nasesya', si'c guzii. ¹⁸ Näj Andrés, Felipe, Bartolomé, Mateo, Tomás, Jacoob xi'n Alfeo, Tadeo, Simón, ni di guidxejb rnigajc. ¹⁹ Näj Judas Iscariot, ni bato' Jesús loj reni rdxechlajz lojni. Sä'tireni rolizj te dade'.

Yäl'rnijaj loj Sprit Dxi' xte Dios

(Mt. 12:22-32; Lc. 11:14-23; 12:10)

²⁰ Dxejc bidopac rebenxhidaalga; nicla niajc niaunäj Jesús rexpejn pacni.

²¹ Che biejn diajg resa' Jesús dee, biädxhiirenini, sa'csi naarenii, yejcti cayajc.

²² Rebejn ni ruluii leii ni birii guedx Jerusalén bidzujnza lo Jesús, dxejc räjpreni:

—Beelzebú, nani rnibee rebenxab, yu' nejn lastoo niguiire. Niluxh nani rnibee rebenxab rudeed yäl'rnibee lo Jesús te cuääni bebenxab.

²³ Dxejc gurejdx Jesús rebejn ga, bijyni te cuent ni ruluii lojreni, räjpni:

—¿Xho gurilaagw bebenxab lagajc sabenxabni? ²⁴ Palga rebejn xten te yäl'rnibee la'reni, luxh tilnäj te cuaani ste cuaaga, di yäl'rnibee ga chu xchej.

²⁵ Palga te famiil rdilnäj lagajc sa'ni, di famiil ga chu xchej. ²⁶ Palga bebenxab nani rnibee tilnäj lagajc laani, di xcäl'rnibeeni chu xchej, sa'csi ni'c gun luuxni.

²⁷ Rut gacdi jiu' rolizj te niguidaan, cuanni xhixhtenni, palga dini gulibxgaani, si'ctis sajc cuanni xhixhtenni.

²⁸ Rniliäpac lojtu guiraa dojl näjza yäl'rnijaj xten rebejn sajc jia. ²⁹ Nani guiniyaj Sprit Dxi' xten Dios, digacdi guibicaj rextoljni, anuutisni xtoljni par tejpas.

³⁰ Räjpni si'c sa'csi caniireni yu' bebenxab nejn lastooni.

*Xnan con rebetzhuin Jesús**(Mt. 12:46-50; Lc. 8:19-21)*

³¹ Dxej cru bidzujn xnan Jesús, naj rebetzhuinni. Direni niu', baxhałtšreni chu huitejdxni. ³² Rebejn ni sobga' gabi Jesús räjpreni lojni:

—Xnanlu naj rebejtzlu suga' ro lä', caguuilreni luj.

³³ Dxejcti räjpreni lojni:

—¿Chu reni'c najc xnanä naj rebetzä?

³⁴ Bahui gajcni loj renani sobga' gabini, dxej räjpreni lojni:

—Redee najc xnanä, rebetzä. ³⁵ Chutis ni rujn ni rłajz Dios, ni'c najc betzä, bisianä, najza xnanä.

4*Xcuent niguii ni sale'c binij**(Mt. 13:1-23; Lc. 8:4-15)*

¹ Suga' Jesús ro' nis guslosac caguluiini xtidx Dios, luxh bidojpx xhidajl bejn cadro suga'ni. Xhidalduxh najcreni, ni'cni biu' Jesús neñ te canuu ni suga' ro' nisga. Dxejcti gurejni neñga, biääd guiraa bejn bia'tireni ro' nis. ² Dxej baluiniireni guiraloj, ganax cuent ni ruluu guniini. Che caguluiini, räjpreni lojni:

³ —Gucua diajgtu dee. Guyu' te niguii. Biriini sale'cni binij. ⁴ Che guslojni cabe'cni, yu' lajt biajb binijga cuä' nezyuj. Sas biääd reman xhaguibaa, gudajwreni binijga. ⁵ Stee lajt biajb binijga neñ guij cadro xheti xhidajl yuj. Binijga gulengajcni, sa'csi xheti xhidajl yuj ro'c. ⁶ Dxej, sa'csi lo jiaa yu' xlobaani, che birii gubijdx, bigolni, gubijdzitini. ⁷ Stee lajt biajb binijga neñ yaguejch. Dxejcti biroob reyaguejchga, luxh bejnreni balaa loj binijga, ni'cni gujcn ganax bilii. ⁸ Per stee lajtga biajb binij lo yusa'c. Gulejn reyäjilga, guroobreni, gucsa'ceni. Yu'reni cuaj galbitzuu xob, yu'reni cuaj gayojn xob, yu'zarenı cuaj tegayuu xob.

⁹ Dxej räjpreni lojni:

—Chutis ni rłajz guisheed, sucua diajgni.

¹⁰ Che asii xhidajl bejn, rebejn nani suga' gajx cadro suganäj Jesús guitzubitio'p xpejn pacni gunabdiidx lo Jesús xhi säloj cuentre. ¹¹ Dxej räjpreni Jesús:

—Dios abejn gacheetu te gantu xho najc yälxhiga'tz xten xcälrnibee Dios nani najc xhiga'tz najli. Niluxh lo ste'ca bejn con cuenttis rniä guiraa recosre, ¹² te mase cahuiireni direni gumbee, te mase cayiejn diajgrenti, direni gachee. Scree gacni, te na'c gusiejch lajzreni, te na'c guibicaj xtojłreni.

¹³ Räjpreni lojni:

—¿La ditu gachee cuentre? ¿Xhocha gacheetu xhidajłru cuent? ¹⁴ Niguiire nani sale'c binij najc si'c te nani ruluu xtidx Dios. ¹⁵ Yu' bejn ni najc si'c binij ni biajb cuä' nezyuj: riejn diajgrenti xtidx Dios nani ruluu bejn. Dxej che jiejn diajgrenti xtidx Dios, riääd Satanás rbägajcni xtidx Dios ni yu' neñ lastooreni. ¹⁶ Yu'za rebejn ni najc si'c binij ni biajb neñ reguij, renani che jiejn diajgrenti xtidx Dios, rbaa lajzreni rca'reni diidxga. ¹⁷ Niluxh direni nisudzu'tz, sa'csi guxii huilii lajzreni. Che rdejdreri trabajw o che rusacsı bejnreni xcuent xtidx Dios, rusaanreni xtidx Dios. ¹⁸ Yu'zarenı najc si'c binij ni biajb neñ yaguejch, riejn diajgrenti xtidx Dios, ¹⁹ dxej che ru'rueni yärsia' xcuent recos guedxliujre, rsia' lajzreni ga'preni meel, rłajzreni ga'prueni guiraloj recos, dxej riu' redee neñ lastooreni, rusäuuı lo xtidx Dios, xlia'si biejn diajgrenti xtidx Dios. ²⁰ Yu'za bejn ni riejn diajgrenti xtidx Dios, rlii

lajzreni diidxga, xhet xlia'ti biejn diajgreni xtidx Dios. Najcreni si'c binij ni biajb loj yusa'c. Yu' rebejn ni najc si'c nani cuaj galbitzuu xob lojni, yu'za rebejn ni najc si'c nani cuaj gayojn xob lojni, yu'za rebejn ni najc si'c nani cuaj tegayuu xob lojni.

Xhet yuchetzu'tzdi ni di guidzujn dxej sisäbdiidx
(Lc. 8:16-18)

²¹ Räjpa Jesús lojreni:

—¿La riädnätu te bajl te suuni dejtz te alm, o neñ te loon, ä? ¿La xhet nanabdi suuni jiaa te guzanijni, ä? ²² Xhet yuchetzu'tzdi ni di guidzujn dxej sisäbdiidx. Xhetiza xhicos naga'tztis. Naga'tzni naj, niluxh sidzujn dxej sule'ni. ²³ Pal yu' chu rlanj gusiieed, sucuadijgni.

²⁴ Räjpa Jesús lojreni:

—Colyunxgaa xhigab rediidx ni riejn diajgtu. Nani rusäl'tu loj xhigabtu, ni'cza guniidx Dios xca'tu, luxh sisiojbru yejc ni xca'tu. ²⁵ Renani rajp che'n yäl'najn, lojreni sudeedru Dios yäl'najn. Luxh renani xhetru rusäl'di loj xhigabreni, sudzucaj Dios yäl'najn nani rajpreni.

Xcuent binij ni roob

²⁶ Guniiza Jesús lojreni:

—Yäl'rnibee xten Dios najc si'c rsiajc te niguii che rbe'cni binij lo yuj, ²⁷ dxejc yäl riguesni, rdxee ristieni, dxejcti rliejn binijga, luxh di niguiiga gan xho roobni. ²⁸ Acanajn yujga rajc binij lojni. Galoo rii cuane'ga, sas rii doj lojni. Dxejcru rdxaj bejzde' neñ dojga. ²⁹ Dxejcti che aguyajl bedze'ga, ruxhal'ni chu ritiuugni, sa'csi abidzujn dxej ni guidojpmi.

Xcuent bedz muxhtas

(Mt. 13:31-32; Lc. 13:18-19)

³⁰ Räjpa Jesús:

—¿Xhini'c najc si'c najc xcäl'rnibee Dios? ¿Xhi te cuent guiniinu te guiluini-uni? ³¹ Si'c te bedz muxhtas ni rbej loyuj, si'c najcni. Bedz muxhtas najcni bedz bäze'ru loj guiralii bedze' ni yu' loj guedxliuj. ³² Dxejc che agurejni, roobni, rajcni yagroru loj recuaan. Dxejcti roob rexajcwni te rajc rujn reman xhaguibaa xpitiääzni neñ xpa'laani.

Si'c baluii Jesús ganax con cuent

(Mt. 13:34-35)

³³ Si'c ruluii Jesús rebejn xtidx Dios guniini xhidal cuent sa' redee, si'ctis ni rajc racbeereni. ³⁴ Con recuent ni ruluiitis gunii Jesús lojreni. Niluxh lo rexpejn'pacni basule'ni guiraa recuentre.

Rusiadxi Jesús bej näj nisdoo

(Mt. 8:23-27; Lc. 8:22-25)

³⁵ Lagajc gudxejga räjpmi loj rexpejn'pacni:

—Col'cho', chonnu stelaad nis xten Galilee.

³⁶ Basa'ntireni rebejn, sanätireni Jesús neñ canuu cadro sobgajcni. Dxejcti sgaii canuu sanajlni. ³⁷ Chela gubi' te beduxh, gusloj cayu' nis neñ canuuga. Cadxaj canuuga nis. ³⁸ Nagayejs Jesús dejtz canuuga, nagayejsni. Bacuäänreni Jesús, räpgajceni lojni:

—Dad mastr, ¿la dilu jiu siääznu neñ nis, ä?

³⁹ Dxejc huistie Jesús, guididxa'ni lo bejga, räjpmi lo nis:

—Guredxi.

Guläzgjajc bej, biacdxini. ⁴⁰ Räjpmi Jesús loj rexpejn'pacni:

—¿Xhicuent cadxebduxhtu? ¿La ditu chalilajz xtidxä, ä?

41 Luxh laareni bidxelojreni, räjpreni loj sa'reni:
—¿Chucha dee ni rnibee bej con nis, luxh ruzoobreni xtiidxni?

5

Nigui Gadara ni yu' bendxab nen lastooni
(Mt. 8:28-34; Lc. 8:26-39)

¹ Bidzujntireni stelaad ro' nisga, lo yuj xten Gadara. ² Si'ctis ni birii Jesús nen canuu, biädgajc te niguii lojni ni birii nen rebiliää cadro rga'tz bengut. Yu' bendxab nen lastoo niguiiga. ³ Rbäjzni nen rebiliääga luxh rut rajcdi rucuaaduuni, nicla con cadenguiib. ⁴ Xhidajl huält agachacuaduureni ni', naa niguiiga con cadenguiib, luxh litis batiuugni recadenguiibga, rut rajcdi rusiacdxini. ⁵ Si'ctis canzajni, dxej, yääl. Rbedxa'ni nen redajni, nen rebiliää, luxh cagutiugni tiejxhni con reguij. ⁶ Che bahuiini loj Jesús zijtru, baxuñni huichaglojni Jesús, bazuxhijbni lojni. ⁷ Dxejcti rbedxaduxhni, räjpni:

—¿Xhicuent siäädlu loä, Jesús, Xi'n Dios ni yu' jiaro? Rniabä lojlu nez loj Dios na'c gusacsilu narä.

⁸ Sa'csi agac cayäjb Jesús lojni:

—Luj, bendxab, birii nen lastoo niguiiga.

⁹ Dxejcti gunabdiidx Jesús räjpni:

—¿Chu laalu?

Dxejc räjpni:

—Narä laä Legión, nani säloj xhidaltro, sa'csi xhidajl najcnu.

¹⁰ Sanuutis canabni lo Jesús na'c guxhalni rebendxabga ste'ca guejdx. ¹¹ Ro'c tre' xhidalduxh cuch cuä' dane'ga, cayajwreni. ¹² Dxejc gunab rebendxabga loj Jesús, räjpreni:

—Baxhal nuure loj recuchre te jiu'nu nen lastooreni.

¹³ Dxejcti basaan Jesúsreni. Biriiti rebendxabga nen niguiiga, dxejc biu'reni nen lastoo recuchga. Yu' si'cti tiop mił cuch ro'c. Baxuñ recuchga, dxejc birolreni ro' guilaj, bitejbreni nen nis, gujttireni nen nisga.

¹⁴ Renani cayajp recuchga baxuñreni, huiyeiireni diidxga nen guejdx, näjza loniaa. Dxejc biääd bejn biädhuii nani gujc ro'c. ¹⁵ Che bidzujnreni cadro suga' Jesús, bahuiireni loj niguii nani guyu' rebendxabga nen lastooni. Sobga'ni ro'c, najcwni xhajbni luxh nasa'c yejcni. Niguiire najc nani guyu' bendxab ni laa Legión nen lastooni. Bidxejbti rebejn nani bahuii lojni. ¹⁶ Dxejcru rebejn ni bahuii xhi gujc ro', huiyeiireni diidx xho guzajc niguiire nani guyu' bendxab nen galoo, näjza nani guzajc recuch. ¹⁷ Dxejc gusloj canabreni loj Jesús jiunejzni.

¹⁸ Che biu' Jesús nen canuu, niguii nani guyu' bendxab nen lastooni gunabni loj Jesús, räjpni:

—Huinä narä.

¹⁹ Per di Jesús nusaan nijni. Räjp Jesús lojni:

—Huij rolizlu, lo resa'lu. Huiyei diidx lojreni xho bennäj Dadlu, näjza xho balaslajzni luj.

²⁰ Sä'ti niguiiga, gusloj cayujyni diidx nen reguejdx xten Decápolis xho bennäj Jesúsni. Guiraa rebejn bidxeloj.

Xindx'a'p Jairo näjza gunaa ni bahuaj xhajb Jesús
(Mt. 9:18-26; Lc. 8:40-56)

²¹ Che bidzunsac Jesús stelaad ro' nisga nen canuu, bidzujn xhidalduxh bejn cadro suga'ni. Bia'nti Jesús ro' nisga. ²² Dxejcru biääd te niguii nani

laa Jairo, ni rnibee nen xquidobáz rexpeñ Israel. Che bahuini loj Jesús, bazuxhijbni lojni. ²³ Canabpacni lojni, rájpmi:

—Xindxapá'ä acayejt. Gudaa, guzujlu naalu yejcmi, te jiajcmi, te guibajpmi.

²⁴ Sanäti Jesús bejnğa. Xhidajl bejn sanajlmi, luxh cagutäärenini. ²⁵ Loj rebenxhidaalga yu' te gunaa ni agujc tzubitio'p ijj racxhuuni yälguidxbäii.

²⁶ Agudedduxhni trabajw, abahuui xhidajl doctoorni. Xli'a'si abanijtni guiraa nani rajpmi, luxh xhet racnäjdini, alga rxuuruni. ²⁷ Sa'csi biejn diajgni xhini'c canii rebejn xcuent Jesús, gubig gunaaga nez dejtz Jesús, guideb nen rebejn, bahuajni xhajt Jesús. ²⁸ Cayujpmi xhigab, naani: “Palga narä falä xhajtisni, siacä.” ²⁹ Lagajc dxejc guläjz caxe' xtiejpmi, gucbeza tiejxhni abirii xcälracxhuuni. ³⁰ Gucbegajc Jesús yu' chu abasiajcmi. Gubiregajcmi nen rebenxhidaalga, rájpmi:

—¿Chuni'c bahuaj xhabä?

³¹ Dxejrcu rájp rexpeñpacni lojni:

—Rhuiilu benxhidaal cagutäälu, luxh naalu: “¿Chuni'c bahuaj xhabä?”

³² Sas cahuii Jesús nez ree, nez rec, te fiini loj nani bahuajni. ³³ Dxejc bidxejb gunaare, racsejsni, sa'csi gucbeeni xhini'c gujcmi. Dxejc biäädni, bazuxhijbni loj Jesús, räbliini loj Jesús guira'ti ni bejpmi. ³⁴ Dxejc rájp Jesús lojni:

—Xindxa'pä, abiajclu sa'csi huililajzlu. Gulecdxi lajzlu, huij rolizjzlu, abiajc xcälracxhuulu.

³⁵ Canisijc Jesús si'c che bidzujñ renani birii rolizjz dade' ni rnibee nen xquidobáz rexpeñ Israel. Rájpmi:

—Agujt xindxape'lu. ¿Xhicuent rusieedrulu Dad mastr?

³⁶ Dxejc che biejn diajg Jesús nani caniireni, rájpmi lo dade'ga:

—Na'c guidxejblu. Bililajztis.

³⁷ Luxh dini nusaanru nij chu ninäni, Pedrtis näj Jacoob näjza Juan bejtzni.

³⁸ Che bidzujñmi rolizjz dade'ga, bahuui Jesús bieji ni cayujñ rebejn ni rbedxa' roon. ³⁹ Biu'tini rájpmi:

—¿Xhicuent rujntu si'c? Gajd dxape're guet. Nagayejssini.

⁴⁰ Alga baxhiznäjrenini. Dxejc gunibee Jesús birii guiraa rebejnğa. Dxejcti huiinäni xcuzajn dxape'ga con renani sanäni. Biu'reni cadro naga' dxape're.

⁴¹ Gunaazni naa dxape'ga, dxejc rájpmi:

—Talita cumi —nani säloj con xtiidxnu: Dxape', lojlu rniä, huistie.

⁴² Dxejcti huistiegajc dxape'. Tzubitio'p ijj yu' dxape'ga. Bidxeloduxh rebejn ni bahuui guläs Jesús dxape'ga. ⁴³ Dxejc balijdx Jesús reni te rut lojdi chaye'tzreni xhini'c gujc. Gunibegajcmi gudeedreni xhi gauu dxape'ga.

6

Che guyu' Jesús Nazare't

(Mt. 13:53-58; Lc. 4:16-30)

¹ Dxejrcu birii Jesús ro'c, huijni lajdxni, sanäzani rexpeñpacni. ² Che bidzujñ sabd, dxej nani rusilajz rexpeñ Israel, gusloj caguluiini nen xquidobáz rexpeñ Israel. Bidxeloj xhidajl bejn nani biejn diajg rextiidxni, rájpmi:

—¿Caro bisieed niguiire guiraa recosre? ¿Xhi yälñajnre cua'ni ni'c rajc rujpmi rextzunduxh Dios con naani? ³ ¿La xhet laadi carpinteer, xi'n Marii, bejtz Jacoob, näj José, näj Judas, näjza Simón dee, ä? ¿La xhet reedi rbäjz rebisianhuinni?

Luxh bidxechlajzreni lojni. ⁴ Dxejc rájp Jesús lojreni:

—Catis rinälajzreni te ni rnii xtidx Dios. Lajdx tisni, lagajc loj resa'ni, rolijztisni, ro'c rut rinälajzdini.

⁵ Luxh di niajcdi niujn Jesús xhidajl milaagwr ro'c. Tiopchontis beñracxhuu basiajčni, bazujni naani yejcreni. ⁶ Bidxelo Jesús sa'csi di lajzreni nilii. Caguluiitini neñ guiraa reguejdx'e' ni ria'n gajxh nejzga.

Baxhal Jesús tzubitio'p bejn ni rinajl ni chaluireni xtidx Dios

(Mt. 10:5-15; Lc. 9:1-6)

⁷ Dxej cru gurejdxni guitzubitio'p xpejn pacni. Gusloj caguxhalni tiopgajreni; badeedzani yälrnibee lojreni te guinibeereni loj rebeñdxab. ⁸ Gunibeeni xhet chanädireni lo nejz, ganaxhtis te yajg te sanäjreni. Di nungäjł chanäreni nicla bisiuud, nicla yätxtiil, niclaza meel neñ dobdäjł. ⁹ Nungäjłza xcax gura'ch ni'reni, nägajc ga'preni tejtis gamangw, xhet tio'pdini. ¹⁰ Dxejcti räjpni lojreni:

—Cadrotis jiu'tu neñ te guejdx, col'ja'n neñ tejtis yu' guiraa redxej ni chutu guejdxga. ¹¹ Palga yu' te guejdx cadro direni gusaan jiu'tu luxh di rlaizreni cuadiajgrendi diidx ni sanätu, col'rii guejdxga, col'cuijb guxhuj ni'tu si'c te seen te gacbeereni xhet laadi bejnreni. Rniliäpac lojtu, guxiiru trabajw ted rebeñ Sodoma näj rebeñ Gomorra quela rebeñ ni yu' guejdx cadro direni gusaan jiu'tu.

¹² Dxejc biriireni, sääreni. Cayäbgajcreni nanabpac gusiejch lajz rebeñ.

¹³ Gulääzaren i xhidajl beñdxab dxejcti gudääbreni se't yejc xhidajl beñracxhuu, luxh biajcreni.

Xcälgujt Juan ni rutiobnis

(Mt. 14:1-12; Lc. 9:7-9)

¹⁴ Herodes najc nani rnibee dxejc. Biejn diajgni xpala'n Jesús, sa'csi guiralii rebeñ calä'p xpala'nni. Dxejc räjp Herodes:

—Juan nani rutiobnis ahuäjs loj rebeñgut, ni'c rajc rujjni remilagwre.

¹⁵ Sgaii bejn räjp:

—Laa Elías ni gunii xtidx Diosni.

Sgaiireni räjp:

—Laa te bejn ni rnii xtidx Dios, o sa' te rebeñ ni gunii xtidx Dios agujc xchero.

¹⁶ Che biejn diajg Herodes si'c, räjpni:

—Laa Juan dee, nani gunibeä biru' yejčni, luxh naj agubansacni loj rebeñgut.

¹⁷ Sa'csi lagajc Herodes gunibee biga' Juan, dxejc bacuaduurenini con cadenguiib neñ latzguiib, xcäl'nasa'c Herodías. Herodías gujc chääł Lib, bejtz Herodes, dxejc cua' Herodes gunaaga si'c chääłni. ¹⁸ Räjp Juan loj Herodes: —Xhet laadi rbäznäjlu chääł bejtzlu.

¹⁹ Ni'cni rdxechlajz Herodías loj Juan, luxh rlaizni ju'tnini, luxh di niajcdini ²⁰ sa'csi rdxejb Herodes Juan, sa'csi najjni beñsa'c, beñdxan najc Juan, ni'cni dini nusaan niujn Herodías latsiajni. Mase dini gacbesa'c ni rnii Juan, rucua-diagsa'cni xtiidxni. ²¹ Niluxh guyu' xmood Herodías. Che gojł laj Herodes, bayaanni rexpejn ni rnibee, näjza rebeñ nani sajz nez región Galilee. ²² Dxejcti biu' xindxap Herodías cadro cayajwreni, baya'ni nez lojreni. Bidxaglazduxh Herodes näjza rexpioozni baya' gunaaga, xindxap Herodías. Dxejc räjp Herodes lo gunaaga:

—Gunab ni rlaiztislö, narä sunidxäni.

²³ Dxej cru räplii Herodes lojni:

—Sunidxä xhitis ni guiniablu. Mase gala' yuj ni rnibeä.

²⁴ Biriitini neñ yu', huiye'tzni loj xnanni, räjpni:

—¿Xhini'c guiniabä lojni?

Dxejc räjp xnanni lojni:

—Gunab yejc Juan ni rutiobnis lojni.

²⁵ Huigajcni loj reii, sas gunabni lojni, räjpni:

—Rlazä gunidxgajclu loä yejc Juan ni rutiobnis. Neñ te pla't baniidx yejcn.

²⁶ Dxejcti guc-huinduxh lajz Herodes, sa'csi abadeedni xtiidxni lojni, luxh sa'csi abiejn diajg renani sobganäjni lo xmxeni, ni'c dipac rlazjni nudxojjni nani gunab gunaaga lojni. ²⁷ Baxhalgajc reii te soldaad ni rcanäj ro'c, baxhalnini, te chaxiini yejc Juan. ²⁸ Ni'c huij, dxejcti bagu'tni Juan neñ latzguüib, biädñätini yejc Juan neñ te pla't. Badeedtinini loj gunaaga. Dxejcti gunaaga badeednini loj xnanni.

²⁹ Che biejn diajg rexpejnpac Juan si'c, biädläsreni togoalga. Dxejcti bacua'tzrenini neñ te baa.

Bayaan Jesús gaii mil bejn

(Mt. 14:13-21; Lc. 9:10-17; Jn. 6:1-14)

³⁰ Che gubi' renani baxhal Jesús, bijreni diidx guiraa ni bejnreni nájza ni baluiireni. ³¹ Dxejc räjp Jesús lojreni:

—Coltaa, xtebnu choñnu cadro rut rbäjzdi, guisilaznu tudxe'n.

Räjp Jesús si'c sa'csi yu' xhidajl bejn ni sää, ni siääd, nicla gal gauureni.

³² Dxejcti sääreni neñ te canuu cadro rut rbäjzdi. ³³ Bahuii xhidajl bejn sääreni, biembereni Jesús. Dxejc xhidajlreni huini' ro'c, xhidajl guejdx biriireni, ganidreni bidzujñreni loj Jesús nájza rexpejnpacni, dxejcti bidojpreni lojni.

³⁴ Birii Jesús neñ canuu, bahuiini loj beñxhidaalga. Dxejc balazlajznireni, sa'csi najcreni si'c rexiiil ni ruti baxtoor xtenreni. Dxejc gusloj caguluuinireni guiraloj. ³⁵ Che gojl gudxej, gubig rexpejnpacni lojni, räjpreni:

—Rut rbäjzdi ree, luxh agudxej naj. ³⁶ Baxhal rebejn te chääreni lo reguejdx, nájza reñenche, te chasiireni yätxtiil gauureni sa'csi xheti xhi gauureni ree.

³⁷ Dxejc räjp Jesús lojreni:

—La'tu coldeed xhi gauureni.

Dxejc räjpreni loj Jesús:

—¿Xhixh sajł tiop gayuu meel yätxtiil chosiinu gauu guiraa rebeñxhidajlre?

³⁸ Dxejcti räjp Jesús lojreni:

—¿Bal yätxtiil rajptu? Colchahuii.

Che gojnreni balni dxejc räjpreni:

—Gaii yätxtiil, nájza tiop bäjł.

³⁹ Dxejcru gunibee Jesús räjpreni loj guiraa rebejn:

—Colcuej xcua-xcuaatu loj guixhaya'.

⁴⁰ Sas gurej xcua-xcuaareni. Yu' lajt gurej tegayuureni, yu' lajt gurej garol gayuureni. ⁴¹ Dxejcti cua' Jesús guigaii yätxtiilga nájza guiro'p bäjłga, bahuiini xhaguibaa, badeedni xquixhtios loj Dios. Dxejcti gula'ni yätxtiil nájza guiro'p bäjł, badeednini loj rexpejnpacni te badeedrenini loj guiraa rebeñxhidaalga. ⁴² Dxejc gudajw guiraareni, gudxaj xque'reni. ⁴³ Dxejcru batojpreni tzubitiop dxijm guidxadoo yätxtiil nájza bäjł ni bia'n. ⁴⁴ Luxh loj guiraa rebejn ni gudajw yu' si'cti gaii mil niguii.

Guzaj Jesús loj nis

(Mt. 14:22-27; Jn. 6:16-21)

⁴⁵ Gunibee Jesús jiu' rexpejn^{pacni} neñ canuu, chägajczeni Betsaida, ni tre' dejtz nis stelaad, lañi cagusadiidxni rebejn. ⁴⁶ Che gulujx basadiidxnireni, sääni neñ redane', sanabni lo Dios. ⁴⁷ Cheni acayu' guxhijn, yu' rexpejn^{pacni} neñ canuu galäii nis lañ ni suga' Jesús xtebni ro' nis. ⁴⁸ Dxejcti bahuii Jesús abadxajgreni cagusajreni xcanuureni, sa'csi säbduxh bej. Bejga rulanaareni nez dejtzreni stehuält. Dxejcru che acara yääl, gusaj Jesús loj nis, huijni cadro sasajreni, rlanjzni ninijdni lojreni. ⁴⁹ Dxejc che bahuiireni sasaj Jesús loj nis, naareni pet te benmalni, ni'c guredxa'reni. ⁵⁰ Guiraareni bahuiireni lojni, bidxebduxhzeni. Sas gunigajcni lojreni, räjpni:

—Colsutijp lajztu. Laa naräni. Na'c guidxejbtu.

⁵¹ Dxejcti huä'p Jesús neñ canuu cadro yu'reni. Lagajc dxejc biacdxi bej, luxh laareni bidxeloduxhzeni, ⁵² sa'csi direni niacbee xhini'c bennäj Jesús reyätxtiil. Guc najd lajzreni, ni'c direni niacbee.

Basiajc Jesús reben^{racxhuu} neñ guedx Genesare't
(Mt. 14:34-36)

⁵³ Gudejdreni lo nis, bidzujn^{reni} lo yuj xten Genesare't. Ro'c bacuaduureni canuu ro' nis. ⁵⁴ Che biriireni neñ canuu, biembegajc rebejn Jesús, ⁵⁵ dxejcti birii rebejn guideb nejzga. Guslojti siädnäreni beñ^{racxhuu} loj Jesús, naga' reben^{racxhuu}ga lo da'. Cadrotis riejn diajgreni yu' Jesús riädnäreni reben^{racxhuu}. ⁵⁶ Niluxh cadrotis rij Jesús, neñ reguedxbäz, neñ reguedxro, näjza loj reñch, rguixhzeni reben^{racxhuu} cadro rajc guii. Dxejcti rniabreni loj Jesús te gac caanreni xhajbni, niluxh biajc guiralii renani gudajñ xhajb Jesús.

7

Nani runijt lastoo bejn
(Mt. 15:1-20)

¹ Dxejcti refarisee, renani najc beñ^{guidoo} loj guedx Israel, näjza gaii rebejn ni ruluii leii, renani birii Jerusalén, bidojpreni loj Jesús. ² Bahuiireni cayajw gaii rexpejn^{pac} Jesús, luxh canii rebejn nacdxuudx naareni (dee säloj direni quiiib ñaareni si'ctis ni rdiib ñaa reben lajdxzeni). Ni'cni guniyajreni rexpejn^{pac} Jesús. ³ (Guiraa rebejn xten Israel, näjza refarisee, sasanäj nani baluii rebengool ni yu' guedx Israelreni. Direni gauu palga direni quiiib ñaareni balti huält. ⁴ Che rbi'reni rijreni lo guii, rguibsa'creni ñaareni, lojreni, ni'reni, dxejcti rajc rajwreni. Niluxh guyu' xhidajñ costumbr ni sasanäj^{jureni}, luxh yu' mood rguibreni rextrastreni näjza rexplooreni, näjza rextrastguibreni, näjza rexloonreni.) ⁵ Dxejc gunabdiidx refarisee näjza rebejn ni ruluii leii loj Jesús, räjpreni:

—¿Xhicuent di rexpejn^{pac}lu gun si'cni baluii rebengool, niluxh rajwreni guideb nacdxuudx ñaareni?

⁶ Dxejcti gunii Jesús lojreni räjpni:

—¡Beñ guijdx! Laaca gunii Isaías xcuenttu che guniini xtidx Dios. Scree cajni loj guijtz:

Guejdxre sanälajz narä con rextiidxni,
niluxh lastooreni zitro suga' loä.

⁷ Xli'a'si ruzuxhijbreni, sa'csi direni chanälajz narä.
Ruluiireni si'c xtiidx^{pac} Dios nani rnii rebejn.

⁸ Rusa'ntu xleii Dios, sasanädzu'tztu costumbr nani baluii rebengool. Rdibsa'c rexploortu, rextrasttu, luxh rujnzatu xhidajlru cos sa' redee.

⁹ Rājɣza Jesús lojreni:

—Rusa'ntu xtidx Dios te risanājtu recostumbr xtentu. ¹⁰ Sa'csi rājɣ Moisés: “Huinälajz xtdadlu con xnanlu.” Rājɣzani: “Suju'tpactu nani gudzubde yejc xtdadni o yejc xnanli.” ¹¹ Niluxh la'tu rniitu sajc gäb bejn loj xtdadni o loj xnanni: “Dina gapä xhi cojn gacnäälü” (nani säloj, abadedä guira'ti loj Dios). ¹² La'tu ditu gusaan gunru bejn por xtdadni nicla por xnanni. ¹³ Si'c rbälaztu xtidx Dios, te sasanājtu recostumbr nani ruluiitu, luxh xhidajl cos sa' dee rujntu.

¹⁴ Gurejdx Jesús guiraa rebejn, dxejc rājɣni loj guiraareni:

—Colcuadiajg, colyacbee xtidxä. ¹⁵ Rexhicos yälrajw ni rajw bejn, dini gunijt bejnğa, rediidx ni rii neñ lastoo bejn, näjza recos ni rujn bejn, ni'c runijt bejnğa. ¹⁶ Pal yu' chu rlajz guiseed, sucuadiajgni.

¹⁷ Dxejcti gula'reni loj rebenxhidaal, biu'reni neñ yu'. Dxejc gunabdiidx rexpejn pacni loj Jesús xhi säloj cuent ni guniini. ¹⁸ Basejc Jesús diidx lojreni, rājɣni:

—¿La näjza la'tu xheti xcäriejntu? ¿La di'tu gacbee xhitis yälrajw nani riu' neñ bejn digacdi gunijtni lastoo bejn, ä? ¹⁹ Sa'csi dini jiu' neñ lastooni; riu'ni xque'ni, rdejdtini.

Si'c guniini te baluiini guira'ti xhicos najc naya. ²⁰ Dxejc rājɣni:

—Rediidx ni rii neñ lastoo bejn, näjza recos ni rujn bejn, ni'c sii runijt lastoo bejn. ²¹ Sa'csi neñ lastoo rebejn rii rexhigabguijdx, näjza yälresnäjä chääl sa'ni, yälresnäjä ni xhet najcdi chäälni, yälругu't sa'ni, ²² yälгubaan, yälrlajzni ga'pni xhixhten bejn, yälłatsiaj, yälrusgueeni, yäl xheti xtujy lojni, yälrdxechlajz, yälrudzubde sa'ni, yälñayechlajzni, yälгuyalajz. ²³ Guiraa reyälłatsiajre neñ lastoo bejn riireni, luxh reni'csi runijt bejn.

Tej guna Sirofenicia ni bililajz xtidx Jesús (Mt. 15:21-28)

²⁴ Dxejc biriini ro'c, sääni nez guedx Tiro näjza nez Sidón. Ro'c bia'nni neñ te yu' sa'csi di rlajzni niacbee rebejn caro yu'ni, niluxh di niajcdi niuxhiga'tztisni. ²⁵ Biengajc diajg te guna ro'c yu' Jesús. Xindxape' gunaaga yu' beñdxab neñ lastooni. Bidzujñ gunaaga, bazuxhijbni lo Jesús. ²⁶ Gunaaga rniigriegw, najcni beñ Sirofenicia. Gunabni lojni guinibeeni guirii beñdxabga neñ lastoo xi'nni. ²⁷ Dxejc rājɣ Jesús lojni:

—Basaan gauxгаа rebiuux, sa'csi xhet laati gudzucajni xcuxtiil rebiuux te gudeednini loj rebä'cw.

²⁸ Dxejc gunii gunaaga, rājɣni loj Jesús:

—Yo, Dad. Näjza rebä'cue' ni suga' neñ mex rajw nani rtejb ro' rebiuux.

²⁹ Dxejcti rājɣ Jesús lojni:

—Laaca rniliulu. Huij rolijzlu. Abirii beñdxab neñ lastoo xindxape'lu.

³⁰ Luxh che bidzujñ gunaare rolijzni, a dxape' naga' lo da'. Gucbegajc gunaaga abirii beñdxab neñ lastoo dxape'ga.

Basiajc Jesús te bengop

³¹ Dxejcru birii Jesús stehuält lo rexyuj guedx Tiro, gudejdni nez Sidón näjza rexyuj Decápolis. Bidzujntini ro' nis xten Galilee. ³² Biädnä gaii bejn te niguii ni nacua't diajgni lo Jesús. Digacdiza guinisa'c niguiiga. Biäd nabreni lo Jesús nusujni naani yejc niguiiga. ³³ Dxejcti badzucanjini loj rebejn. Baquitzgajcni rebicueñaani neñ diajgni, dxejcru batiobxhejnni, gudajntini lujdxni. ³⁴ Bahuiini xhaguibaa, bazaa lajzni, dxejc rājɣni:

—¡Efata! —nani säloj bixal.

³⁵ Dxej cru bixalgajc rediajgni, gubangajc lujdxni, gunisa'cni. ³⁶ Dxejcti gunibee Jesús rutlojdi gäbreni, per che räjpni lojreni si'c, laareni batie'chrureni diidxga. ³⁷ Rdxeloduxhreni, räjpreni:

—Guira'ti laaca rujnni; ruxhalni diajg rediagcua't, luxh rusniini regop.

8

Bayaan Jesús tajp mil bejn

(Mt. 15:32-39)

¹ Neñ redxejga bidojpxhidalaro bejn, luxh xheti xhigauureni. Dxejcgurejdx Jesús rexpejn pacni ni rinajlni, räjpni lojreni:

² —Rulazlazä rebejnre, sa'csi naj rajc choñ dxej tre'reni loä, luxh xhet yu'di gauureni. ³ Niluxh palga guxhaläreni rolizjreni, xliajzreni, sidxajgreni lo nejz; sa'csi yu' renani zijtru siäädreni.

⁴ Dxej cru räjp rexpejn pacni lojni:

—¿Caro chaca'nu yätxtiil te cha xque' rebejnre ree, cadre rut rbäjzdi?

⁵ Sas gunabdiidx Jesús lojreni:

—¿Bal yätxtiil rajptu?

Dxej cru räjpreni:

—Gajdzisni.

⁶ Gunibee Jesús gurej rebenxhidaalga loj yuj. Sas cua'ni guigajdx yätxtiilga, badeedni xquixhtios lo Dios, gula'ni reyätxtiilga. Dxejcbadeednini loj rexpejn pacni te guteedrenini loj rebenxhidaal. Bateedtireni yätxtiilga lo rebenxhidaalga. ⁷ Rajpzareni gaii bälbäz, dxejcti badesac Jesús xquixhtios lo Dios, gunibeeni bateedzareni rebälbäzre loj rebenxhidaalga. ⁸ Dxejcgudajwreni, gudxaj xque'reni. Dxejcbatojpx rexpejn pac Jesús gajdz dxijm reyätxtiil näj rebäj dxuc ni bia'n. ⁹ Niluxh renani gudajwga najgreni si'cti tajp mil bejn. Dxejcti basadiidxnireni. ¹⁰ Biunägajc Jesús rexpejn pacni neñ canuu, biäädreni nez Dalmanuta.

Gunab refarisee te senro loj Jesús

(Mt. 16:1-4; Lc. 12:54-56)

¹¹ Biääd refarisee, renani najc rebenguidoo loj guedx Israel, guslojreni cayeinäjreni Jesús. Canabreni gunni te senro nani Diostis ni yu' guibaa sajcgun. Cagula'tzsireni, don xhi gunni. ¹² Dxejcti bazaa lajz Jesús neñ lastooni, räjpni:

—¿Xhicuent rlaiz rebejn ni nabajn naj fii gac resenro xten Dios? Rniliäpac lojtu, di rebejn ni nabajn naj fii nicla tej sen xhaguibaali.

¹³ Dxejcti basa'nnireni ro'c, biusacni neñ canuu, sä'tini stelaad nisga.

Levaduur xten refarisee

(Mt. 16:5-12)

¹⁴ Biallajzreni nica'reni yätxtiil, luxh xhetliidi sanädireni. Tejtis yätxtiil nuureni neñ canuu. ¹⁵ Cagulijdx Jesús rexpejn pacni, räjpni lojreni:

—Col̄susiñ, col̄nati levaduur xten refarisee, col̄natiza levaduur xten Herodes. (Nalajznu, xtiidxreni najc si'c levaduur.)

¹⁶ Dxejcti cayeinäj sa'reni diidx xcuent nani gunii Jesús lojreni, dxejcräjpreni:

—Sa'csi dinu jia'p yätxtiil, ni'c rniini scree.

¹⁷ Che gucbee Jesús xhini'c caniireni, räjpni:

—¿Xhicuent rniitu: “Sa'csi dinu jia'p yätxtiil”? ¿La gajdту fii, la gajdту gacbee? ¿La lahtis nacnajd lastootu? ¹⁸ ¿La yu' balojtu, luxh ditu fii? ¿La sojb

diajgtu luxh di diajgtu jiejn? ¿La dilajztu guizaj? ¹⁹ Che gula'a guigaii yätxttil te gudajw gaii mil niguii, ¿bal dxijm̄ yätxttil biujy batojptu?

Sas räjpreni lojni:

—Tzubitio'pni.

²⁰ —Che gula'a guigajdz yätxttil te gudajw tajp mil bejn, ¿bal dxijm̄ yätxttil biujy batojptu?

Sas räjpreni:

—Gajdzni.

²¹ Dxejc räjpni lojreni:

—¿La gajdtu gachesa'c xhi benä?

Basiajc Jesús te lotiä'p Betsaida

²² Bidzunñaj Jesús rexpejn pacni guedx Betsaida. Dxejc biädnäreni te lotiä'p loj Jesús, gunabreni loj Jesús caanni bejnga. ²³ Dxejc gunaazni ñaa lotiä'pga, guläänini neñ guejdx. Che batiobxhejn̄ni neñ rebalojni, basugajcni ñaani yejc baloj lotiä'pga, gunabdidxgajc Jesús:

—¿La yu' xhi rhuilu, ä?

²⁴ Luxh che bahuii bejnga räjpni:

—Rhuiä sasaj rebejn, luxh si'c yajg rhuiä lojreni.

²⁵ Basusac Jesús ñaani yejc rebaloj bejnga. Dxejc bejn Jesús bahuii bejnga. Bijaictini, zijtru gujc bahuisa'cni lo guiraa rebejn. ²⁶ Dxejcti baxhaļ Jesúsni rolizni, räjpni:

—Basquejn, huijga rolizlu, na'c jiu'lu neñ guejdx, na'c gäblu xhi gujclu lo rebejn ni yu' neñ guejdx.

Basule' Pedr Jesús najc Crist

(Mt. 16:13-20; Lc. 9:18-21)

²⁷ Birinäj Jesús rexpejn pacni lo reguejdx ni ria'n nez Cesarea xten Filipino. Lañi sasajreni lo nejz räjp Jesús loj rexpejn pacni:

—¿Chuni'c rnii rebejn nacä narä?

²⁸ Sas räjpreni lojni:

—Yu'reni rnii najclu Juan ni batiobnis, yu'zareni rnii najclu Elías, yu'zareni rnii najclu te rebejn ni gunii xtidx Dios.

²⁹ Dxejc räjpni lojreni:

—¿La'tu a'? ¿Chuni'c rniitu nacä narä?

Dxejc bazejc Pedr diidx, räjpni lojni:

—Luj najclu Crist.

³⁰ Dxejcti räjp Jesús lojreni:

—Rutlojdi gäbtu chu nacä.

Gunii Jesús xho guetni

(Mt. 16:21-28; Lc. 9:22-27)

³¹ Dxejcti gusloj Jesús caguluiini rexpejn pacni, räjpni:

—Narä nacä Xi'n Dios, ni gujc Niguii. Nanabpac tedä trabajwduxh. Sibälaz rebengool ni najc guxhtis neñ guedx Israel narä, näjza renani rnibee loj rebixhojz, näjza rebejn ni ruluu leii: sugu'treni narä, luxh ni riojn̄ dxej guibansacä lo rebengut.

³² Guyasi guniini rediidxre. Sas huinä Pedr Jesús telaad, dxejc räjpni loj Jesús:

—Na'c guiniilu si'c.

³³ Dxejc batzuré loj Jesús, bahuiini loj rexpejn pacni. Dxejc gudilñajni Pedr räjpni:

—Gubicaj loä, Satanás, luj dilu gun xhigab xten Dios, xhigab ni rujn rebejntis rujnlu.

³⁴ Dxejc gurejdxni rebenxhidaal con reni najc xpejn̄pacni, räjpni lojreni:

—Palga yu' chu rlaiz gac xpenäpac, sucuääz gunni ni rsia' lajzni gunni, sutedni trabajw si'c tej ni caj lo cruiz, sujiädnajni narä. ³⁵ Sa'csi nani rlaiz guslaa xcäl̄nabajni, sunijtni xcäl̄nabajni. Luxh nani runijt xcäl̄nabajni xcäl̄nasa'c narä, xcäl̄nasa'c xtidxä, siliaapac xcäl̄nabajni. ³⁶ Xlia' ga'p bejn guiraloj lo guedxliujre palga nitni lo Dios par tejjas. ³⁷ Xhet gacdi gudeed bejn te guibannäjni Dios. ³⁸ Nani guituinäj narä con rextidxä naj, cheni najc rebejn benđojl, narä, Xi'n Dios nani gujc Niguii, situinääzani che jiädnaä reangl xten Dios che jiälää lo xcäl̄rdimbicha' Xtdä.

9

¹ Dxejc räjp Jesús lojreni:

—Rniliäpac lojtu, yu'reni suga' ree nani di guet fixgaareni abiääd xcäl̄rnibee Dios.

Gubixhlo Jesús garenca (Mt. 17:1-13; Lc. 9:28-36)

² Che gudejd xho'p dxej, Jesús cua' Pedr, näj Jacoob, näjza Juan, laatisreni huinäni yejc te danro. Ro'c gubixhlojni garenca lojreni. ³ Gusloj rdimbicha' rexhajbni, gujc xhajbni nolbäj. Rut rajcti rusquijtz lajd lo guedxliujre si'c biquijtz xhajbni. ⁴ Dxejc baluuijoj Elías näjza Moisés lojreni, cayuinäjreni Jesús diidx. ⁵ Sas räjp Pedr loj Jesús:

—Dad, laaca dxunnu ree. Naj jiennu choñ yuguixa', tejni xtenlu, steeni xten Moisés, steeni xten Elías.

⁶ Si'c guniini sa'csi nicla niacheeni xhini'c guiniini, sa'csi cadxebduxhreni.

⁷ Dxejc biääd te za bejn balaa yejcreni. Neñ zaga biejn xse' te ni räjp:

—Dee najc xi'nä nani sanälazä, colcuadiajg xtiidxni.

⁸ Che batzuré lojreni, bahuiireni rutru suganäjti Jesús, xtebtis Jesús suga'.

⁹ Che siädjiäjtreni dajnga, gunibee Jesús rut lojdi guiniireni xcuent ni bahuiireni, guiban̄xgaasi Xi'n Dios nani gujc Niguii lo rebengut. ¹⁰ Basälcheerene rediidxre neñ lastooreni. Dxejcu canabdiidx lo sa'reni xhicha säloj guiban̄sacni lo rebengut. ¹¹ Sas gunabdiidxreni lojni, räjpreni:

—¿Xhicient rnii remastr xten leii naquinpac jiädxgaa Elías?

¹² Dxejcti bazejcnii diidx lojreni, räjpni:

—Guliireni siädxgaapac Elías, luxh sunsa'cni guira'ti xhi cos. Naj a', ¿xhicient caj lo guijtz xcuent Xi'n Dios ni gujc Niguii, sidejndi trabajwduxh, rutza jjudini? ¹³ Luxh narä rniä lojtu, abiääd Elías, luxh bennäjrenini si'ctis ni rlaizreni, si'cpac ni caj loj guijtz ni rusule' xcuentni.

Basiajc Jesús te biuux ni guyu' bendxab neñ lastooni (Mt. 17:14-21; Lc. 9:37-43)

¹⁴ Che asiäädreni cadro tre' sgaii rexpejn̄pac Jesús, bahuiireni loj xhidalro bejn ni tre' lojreni, luxh cayeinäj rebejn ni ruluu leiiireni. ¹⁵ Che bahuii guiraa rebejn loj Jesús, bidxeloduxhreni, baxun̄reni, huiye'tzreni xchan lojni.

¹⁶ Dxejc gunabdiidx Jesús lojreni:

—¿Xhini'c rusieinäjtu laareni?

¹⁷ Sas gunii tej reni yu' lo benxhidaalga, räjpni:

—Dad, ree siädnaä xi'nä lojlu, yu' bendxab neñ lastooni, nani rujn najcni gop. ¹⁸ Cheni rniaaznini, rutienta'ni xi'nä, luxh řiduxh bitzun ro'ni, näjza

rauya'ni ro'ni, luxh cabijdzni. Aräpä loj rexpejn̄paclu cuääreni beñdxabga, niluxh di niajcdi nibäärenini.

¹⁹ Dxejcti gunii Jesús lojreni, räjpni:

—La'tu, bejn̄ ni di chalilajz, ¿gucli chu'ä lojtu te chalilajztu? ¿Gucli gusieedtu narä? ¡Coltanäni loä!

²⁰ Dxejc biädnäreni biuuxga lojni. Che bahuii beñdxab lo Jesús, basnijni bi'nga, basälta'tinini lo yuj. Sädiidxni, luxh car̄ii bitzun̄ ro'ni. ²¹ Gunabdiidx Jesús loj xtadni:

—¿Gucli rajcni si'c?

Dxejc räjp dade'ga:

—Che gujclini biuxbáz. ²² Balti huält rusäl̄nini lo guiboo näjza lo nis te ju'tnini. Palga yu' xhi gac gunlu, balazlajz nuunu, gucnäj nuunu.

²³ Sas räjp Jesús lojni:

—¿Xhicuent rniabdiidxlu la sajc gacnääl̄u? Xhitis sajc gac par nani rililajz.

²⁴ Guredxa' xtad bi'nga, räjpni:

—¡Rililazä! Gucnäj narä te chaliiru lazä.

²⁵ Che bahuii Jesús bixa't xhidajl bejn̄ lojni, gudidxa'ni lo beñdxabga räjpni lojni:

—Beñdxab ni rujn̄ gop, narä canibeä, birii nen̄ lastoo bi'nga. Na'cru chulu nen̄ lastooni.

²⁶ Dxejcro guredxa' beñdxabga, luxh basnibzejsni bi'nga, dxejcro biriini nen̄ lastooni. Astoo te beñgut bia'n bi'nga ro'c. Xhidajl rebejn̄ räjp:

—Agujtni.

²⁷ Dxejc gunaaz Jesús naa bi'nga guläsnini. Guzuliiti bi'nga. ²⁸ Dxejcti che abiu' Jesús nen̄ yu', gunabdiidx rexpejn̄pacni lojni:

—¿Xhicuent di niajcdi nibäänu beñdxabga?

²⁹ Dxejc räjp Jesús lojreni:

—Di gacdi cuäätu sa' beñdxabre palga ditu cuedx-guinab lo Dios, palga ditu gucuan̄xgaa.

*Gunisac Jesús xho guetni
(Mt. 17:22-23; Lc. 9:43-45)*

³⁰ Dxejc biriireni ro'c, gudejdreni Galilee. Luxh di rlajz Jesús niacbee rebejn̄ sadejdreni nejzga, ³¹ sa'csi caguluiini rexpejn̄pacni. Cayäjpni lojreni: “Xi'n Dios ni gujc Niguii sidejdni ladznaa rebejn̄, niluxh sugu'trenini. Che guiza' chon̄ dxej gujtni, sibajjni stehuält.” ³² Niluxh laareni direni niacbee xhini'c guniini, bidxejbzareni niniabdiidxreni lojni.

*¿Chuni'c sajcro?
(Mt. 18:1-5; Lc. 9:46-48)*

³³ Bidzujntireni Capernaum. Che biu'ni nen̄ yu' räjpni lojreni:

—¿Xhini'c cagusiejytu lo nejz?

³⁴ Dxejc xhet guniitireni, sa'csi laareni cagusieinäj sa'reni lo nejz don chuni'c sajcro lojreni. ³⁵ Sas gurej Jesús, dxejc gurejdxni guitzubitio'p xpejn̄pacni, räjpni lojreni:

—Palga yu' chu rlajz gasajcro lojtu, sugacxgaani si'c te nani xhet sajcti, sugunzani xtzuun chutis.

³⁶ Dxejcti cua'ni tej biuxbáz, huinänini galäiireni. Dxejc gudääzni biuxbázga, räjpni lojreni:

³⁷ —Chutis ni gacnäj te rebiuxe're sa'csi rinälajzni narä, sacnäjni narä, luxh nani gacnäj narä, xhet narätis gacnäjtini, näjza xtadä nani baxhaḷ narä racnäjni.

*Nani di guiniyaj nuunu, xladnu yu'ni**(Lc. 9:49-50; Mt. 10:42)*³⁸ Dxejcti gunii Juan räjpni lojni:

—Bahuiinu lo te bejn ni rbää beñdxab con xcäl̄rnibee lajlu, niluxh dini sanäj nuunu. Sas huiye'tznu lojni na'c gunni si'c sa'csi dini sanäj nuunu.

³⁹ Dxejc räjp Jesús lojni:

—Na'c gudxojtnt gunni si'c sa'csi bejn nani rujn milagwr con xcäl̄rnibee laä digacdi guiniyagajcni narä. ⁴⁰ Nani di guidxagdijl nuunu, xlaadnu yu'ni.

⁴¹ Rniliäpac lojtu, chutis ni guniidx te bas nis lojtu sa'csi najctu xpejn̄pac Crist, siguijx Diosni xcuent nani bejn̄ni.

*Nani rujn jiajb bejn lo dojl**(Mt. 18:6-9; Lc. 17:1-2)*

⁴² 'Chutis ni gusiu' tej rebiuxe' ni rililajz narä nen̄ dojl, sugal̄ te guimolin yejn̄ni dxejcti gucuaarenini lo nisdoo. ⁴³ Palga tej ñaalu gun gunlu dojl, batiu'ni: hueenru natiujnglu chaläjzlu cadre yu' Dios quela sojb guiro'p ñaalu gusal̄reni luj gabijl, loj bajl ni di jiuui, ⁴⁴ cadre diza xpisiujgreni guet, diza bajl jiuui. ⁴⁵ Luxh palga tej ni'lu gun gunlu dojl, batiu'ni: hueenru natiujnglu chaläjzlu cadre yu' Dios quela sojb guiro'p ni'lu luxh chääl̄u gabijl, lo bajl ni di jiuui, ⁴⁶ cadre di xpisiujgreni guet, diza bajl jiuui. ⁴⁷ Luxh palga tej balojlu gun gunlu dojl, gulääni: hueenru chääl̄u cadre rnibee Dios natiä'p lojlu quela sojb guiro'p balojlu chääl̄u gabijl, ⁴⁸ cadre di xpisiujgreni guet, diza bajl jiuui.

⁴⁹ 'Si'cni rloj sejd yejc xhi cos yäl̄rajw, si'cza guiloj bajl yejc guiraareni. Guilojza sejd lo guira'ti ni rdeed bejn̄ lo Dios. ⁵⁰ Hueen najc sejd, luxh palga agudejd yäl̄nadzij yejcn̄i, çxho guntu te gacsacni nadzij? Colyajc nadzij la'tu, colguiban̄näsa'c sa'tu.

10*Baluu Jesús xcuent rälr̄uro'n sa'ni**(Mt. 19:1-12; Lc. 16:18)*

¹ Dxejcru birii Jesús ro'c huijni nez Judea näjza nez ro' gueu Jordán stelaad. Ro'c bidojp xhidajl bejn̄ lojni stehuält, sas guslosacni caguluiinireni si'ctis ni ruluinireni. ² Sas refarisee, renani najc rebenguidoo loj guedx Israel, gubigreni loj Jesús, cagula'tzreni Jesús. Ni'c gunabdiidxreni, räjpreni:

—¿La laaca gun niguii gusaan chääl̄ni, ä?

³ Dxejc laani bazejcn̄i diidx, räjpni lojreni:

—¿Xhini'c gunibee Moisés guntu?

⁴ Dxejcru räjpreni:

—Moisés basaan gudeedni te guitz gusaan chääl̄ni che guro'n̄mini.

⁵ Dxejc Jesús räjp lojreni:

—Sa'csi guyaa lajztu, ni'cni bacuaa Moisés diidxga lojtu. ⁶ Niluxh che birixtiej ben guedxliuj, “niguii con gunaa benchee Diosreni.” ⁷ “Ni'cni te niguii siriini loj xtadni, loj xnanni te cuänzäjni chääl̄ni. ⁸ Niluxh renani gujc tiop bejn̄ sajcreni si'c tejsi bejn̄”, dirureni gac tiop bejn̄, si'c tejsi bejn̄ gacreni. ⁹ Na'c gudzucaj bejn̄ lo sa bejn̄ni nani abachaag Dios lo sa'ni.

¹⁰ Che biu'reni nen̄ yu' gunabdiidxsac rexpejn̄pacni lojni xcuent rediidxre.

¹¹ Dxejc räjpni lojreni:

—Chutis niguii ni gusaan chääl̄ni, sas guchn̄aani ste'ceni, rujn̄ni dojl.

¹² Niluxh palga gunaa guro'n̄ chääl̄ni sas guchn̄aani ste'ca niguii, rujnzani dojl.

Gunab Jesús gunle' Dios yejc rebiuxbáz
(Mt. 19:13-15; Lc. 18:15-17)

¹³ Biädnäza rebejn biuxbáz lojni te gutzuub Jesús naani yejcreni, sas gu-didxa' rexpejn pacni lojreni. ¹⁴ Che bahuii Jesús xhi cayujn rexpejn pacni, bidxe' chni räjpni lojreni:

— Colsaan jääd rebiuxbáz loä. Na'c gudxojn tureneni, sa'csi xcälrnibee Dios najc xten reni najc nadolajz si'c najc biuxbáz. ¹⁵ Rniliäpac lojtu, chutis ni rrlajz jiu' lo xcälrnibee Dios nanab guzobdiajgreni xtidx Dios si'c ruzobdiajg rebiuxe' xtidx xtadreni. Palga dini gun si'c, dini jiu' lo xcälrnibee Dios.

¹⁶ Dxejcti gudääz Jesús rebiuxbáz, bazujzani naani yejcreni, gunab Jesús gunle' Dios yejcreni.

Te bi'n ni rapduxh guninäj Jesús
(Mt. 19:16-30; Lc. 18:18-30)

¹⁷ Che birii Jesús loj xnejzni, ruxuñ te niguii biäd lojni, bazuxhijbni. Dxejcti gunabdiidx niguiiga lojni räjpni:

— Dad, beñsa'c, çxhini'c gunä te xca'ä yäl nabajn par tejpas?

¹⁸ Sas räjp Jesús lojni:

— Çxhicuent rniilu loä beñsa'c? Tejtisni najc beñsa'c; Diostis najc beñsa'c.

¹⁹ Najnlu xhini'c gunibee Dios gunni: “Na'c guesnäjlü chää sa'lu, na'c ju'tlu, na'c cuanlu, na'c gusgueelu chutis, na'c cuäälü yejc xhixten sa'lu, huinäälajz xtadlu, xnanlu.”

²⁰ Dxejc räjp niguiiga lojni:

— Dad, guiraa redec cayunä cheni gucäli bi'n.

²¹ Che bahuii Jesús lojni, huinäälajznini, räjpni lojni:

— Tejtis nani cayäädx gunlu. Huij, huito' guiraa xhixtenlu, badeed xcuentni loj rebejn nani diga'p, dxejcti guniidx Dios xhidajl xhi ga'plu xhaguibaa. Gudanajl narä, mase tedlu trabajw.

²² Dxejc che biejn diajgni diidxre, guc-huin lajzni, xhet laadi yu'ni siini, sa'csi naclenduxh xhixtenni yu'.

²³ Dxejc bahuii Jesús guideb gabi lojreni, räjpni loj rexpejn pacni:

— Naganduxh jiu' rebejn nani yu'duxh xhixtenni lo xcälrnibee Dios.

²⁴ Dxejc bidxelo rexpejn pacni che biejn diajgreni rextiidxni. Dxejc räjp Jesús lojreni stehuält:

— ¡Aiiitu xi'näl, lacti naganduxh gusaan renani sanälajz xhixtenni guinibee Diosreni. ²⁵ Guyasiru ted te cameii ni' te guux quela gusaan te bejn ni yuduxh xhixtenni guinibee Diosni.

²⁶ Dxejc bidxeloduxh reni, räjpreni lojni:

— Çchuxhni'c sajç laa lo dojl?

²⁷ Dxejc bahuii Jesús lojreni, räjpni:

— Bejn digacdi gusläa sabejn ni, Diostis rajç rusläa bejn lo dojl, sa'csi Dios rac rujn guira'ti.

²⁸ Sas gusloj Pedr cayäjp lojni:

— Naj nuure ahuilälaznu guira'ti te siopnajl nu luj.

²⁹ Dxejc räjp Jesús:

— Rniliäpac lojtu, chutis nani cuälaz rolijzni, rebejtzni, rebisiajn ni, xtadni, xnanni, chäälni, rexi'nni, rexyujni, xcäl'nasa'c narä, näjza xcäl'nasa'c xtidx Dios, ³⁰ sica'ni lo guedxliujre te gayuu huält xhidajlru. Sica'ni rolijzni, rebejtzni, rebisiajn ni, xnanni, rexi'nni, rexyujni. Sisiunajlrenini naj, dxejc xhaguibaa sica'ni yäl nabajn par tejpas. ³¹ Xhidajl rebejn nani sajç lo guedxliujre

xhet sajcdireni xhaguibaa; niluxh rebejn nani xhet sajcdi lo guedxliujre, xhaguibaaru gasajczeni.

Gunisac Jesús diidx xho guetni
(Mt. 20:17-19; Lc. 18:31-34)

³² Dxejrcru sasaj Jesús, niydni lo rexpejnpacni sääreni Jerusalén, luxh cadx-elojreni. Cadxejbza rebejn nani sanajlreni. Dxejcti gulásac Jesús rexpejnpacni lo rebejn, gusloj cayäjpni lojreni guira'ti nani sacni. ³³ Räjpp Jesús:

—Sionnu Jerusalén, luxh narä, Xi'n Dios nani gujc Niguii, sidedä ladznaa rebixhojz nani rnibee näjza rebejn ni ruluii lei. Luxh sinibeereni guetä. Suteedreni narä lo rebenzajt nani digac xpejn Israel. ³⁴ Suxhisnäjreni narä, siguijnreni narä, sutiobxhejnzareni loä, dxejrcru sugu'treni narä. Che riojn dxej sibansacä.

Gunab Jacobo näjza Juan te yälhasa'c
(Mt. 20:20-28)

³⁵ Dxejcti gubig Jacobo näjza Juan, rexi'n Zebedeo, räjpreni lojni:

—Dad, rlaaznu gunlaalu nani guiniabnu lojlu.

³⁶ Dxejc räjp Jesús lojreni:

—¿Xhini'c rlanjtu gunä xcuent la'tu?

³⁷ Räjppreni:

—Cue tejnu cuä'lu ladbee, xteenu cue cuä'lu ladbägw che acanibeelu.

³⁸ Dxejc räjp Jesús lojreni:

—Ditu gan xhini'c rniabtu. ¿Xhixh sajca yätu nani yä'ä? ¿Xhixh sajca guirobnistu si'cni guirobnisä? Nalajznu, xhixh sajca tedtu trabajw nani tedä narä.

³⁹ Sas räjpreni lojni:

—Sajc tednuni.

Dxejc räjp Jesús lojreni:

—Guliini sajca yätu nani yä'ä, luxh guirobnistu si'cni guirobnisä narä. ⁴⁰ Te cue tejtu ladbee xtenä steetu cue xladbägwä, xhet xtenä dini te gunidxäni. Rebejn nani agule Dios, reni'c cue xladbeä, xladbägwä.

⁴¹ Luxh che biejn diajg stzuureni bidxe'chreni loj Jacobo näjza loj Juan.

⁴² Sas gurejdx Jesúsreni, räjpni lojreni:

—La'tu najntu renani rnibee lo rebejn nani digac xpejn Israel, rdxaglajz gasajcurenlo rebejn. Luxh rebejn ni sajca rnibeduxhreni lo rebejn. ⁴³ Xhet si'cdi guntu la'tu. Chutis nani rlanj gasajcru lojtu, riäj] gacni mos lojtu.

⁴⁴ Luxh chutis la'tu nani rlanj gasajcru, riäj] gacni xmos guiraatu. ⁴⁵ Di Xi'n Dios ni gujc Niguii niääd, te ga'ptisni mos, biäädzani te quiixni con xcäl'nabajni te laa xhidajl bejn lo dojl.

Basiajca Jesús Bartimeo, ni natiä'p lojni
(Mt. 20:29-34; Lc. 18:35-43)

⁴⁶ Dxejcti biäädreni Jericó. Che birii Jesús ro' guedx Jericó con rexpejnpacni näjza rebenxhidaal, cuä' nezyuj sobga' Bartimeo, xi'n Timeo. Natiä'p lojni. Ro'c cabääni gojn. ⁴⁷ Che biejn diajgni laa Jesús ni siääd Nasare't ni sadejd ro'c, guslojni rbedxa'ni, räjpni:

—Jesús, xi'n David, balazlajz narä.

⁴⁸ Xhidajlreni gudidxa' lojni, te jiäuu ro'ni. Dxejc laani dipru rbedxa'ni räjpni:

—Xi'n David, balazlajz narä.

⁴⁹ Dxejc guzudxi Jesús, gunibegajcni gucrejdx niguiiga.

Gurejdxreni lotiä'pga, räjpreni lojni:
—Basutijp lajzlu, gusulii, luj cabejdxni.

⁵⁰ Sas rolca xhablajzni gudixhni, huisuliini, biäädini lo Jesús. ⁵¹ Dxejc räjp Jesús lojni:

—Naja', çxhini'c rlanjlu gunä?

Dxejc räjp lotiä'pga loj Jesús:

—Dad, rlazä gunlu fiä.

⁵² Dxejcti räjp Jesús lojni:

—Huij, abiajclu sa'csi rililajzlu.

Lagajc dxejc gujc bahuiini. Sanajltini Jesús lo nejz.

11

Biu' Jesús Jerusalén

(Mt. 21:1-11; Lc. 19:28-40; Jn. 12:12-19)

¹ Cheni sadzujñreni gajxh Jerusalén, gudejdreni nen reguedx Betfagé näjza nen guedx Betania nez cuä' dajne' ni laa dan Oliib. Baxhal Jesús tiop xpejn pacni, ² räjpni lojreni:

—Colchäj guedxe' ni ria'n nez lojtu. Che guidzujñtu ro' guejdxga, sidxälu te bure' ni caduu. Gajd bejn cuibni. Colxhečni, coltanägajcni. ³ Palga yu' chu naa lojtu: “ÇXhicuent rujntu si'c?” Colye'tztis: “Dad caquiinni.” Dxejc suxhalgajcni bure'ga ree.

⁴ Säätireni ro'c. Dxejcro ronejz bidxälreni te bure' caduu ro' te lä'. Dxejcti baxhecrenini. ⁵ Gaii bejn ni tre' ro'c räjp lojreni:

—ÇXhicuent caguxhectuni?

⁶ Dxejc räjpreni loj rebejnga si'cni räjp Jesús lojreni gäbreni. Basangajc rebejnga sanäreni bure'ga. ⁷ Dxejcro biädnäreni bure'ga loj Jesús. Badzuubreni xhablajzreni dejtz bure'ga. Gubijbti Jesús bure'ga. ⁸ Xhidajlza bejn gudixh xhablajzreni lo nezyuj, sgaiireni gudi'ch balajg lo reyajg te gudixhneni lo nezyuj.

⁹ Rebejn ni nijd lojni näj reni sanajl dejtzni guredxa'reni, räjpreni:

—jColguiliä'p xpala'nni! Coldeed xquixhtiooz loj Dios sa'csi baxhalni nani siääd xcuentni. ¹⁰ Coldeed xquixhtiooz loj Dios sa'csi agubiré xcälrnibee toxtadnu David. jColguiliä'p xpala'n Dios ni yu' jiaro!

¹¹ Dxejcti biu' Jesús nen guedx Jerusalén. Biu'zani nen guidoro. Che bahuii Jesús guira'ti ni cayajc nenga, sanäni guitzubitio'p xpejn pacni, sääreni Betania sa'csi agudxej.

Batzubde Jesús yejc te yagiigw ni xhet cajdi lojni

(Mt. 21:18-19)

¹² Che bara yääl, biunejzreni Betania. Dxejcti gusloj calaan Jesús, ¹³ bahuiini zijt sojb te yag iigw caj balajg lojni. Sas gubigni, bahuiini don gaxäjsi caj iigw lojni. Xhet bidxäldini lojni; balajgtis caj lojni, sa'csi xhet xtiempdi iigw dxejc. ¹⁴ Sas gunii Jesús räjpni loj yag iigwga:

—Rutru gauudi ninejxh ni rcaj lojlu par tejpas.

Biejnza diajg rexpejn pacni.

Gulää Jesús renani ruto' näj renani rsii nen guidoo

(Mt. 21:12-17; Lc. 19:45-48; Jn. 2:13-22)

¹⁵ Dxejcti bidzujñreni guedx Jerusalén. Biu' Jesús nen guidoro. Gusloj cabääni renani ruto' näj renani rsii nen guideoga. Niluxh batiejxhni rexmex renani ruchaa meel, näjza reyagxhil xten renani ruto' paloom. ¹⁶ Diruni

nusaan nidednäjreni xhicos nez nen guidooga. ¹⁷ Dxejc caguluinireni, räpajcni lojreni:

—¿La et screedi caj loj guiitz? “Xyu’ä sirilaj yu’ cadro rninab guiraa rebenguedxliuj lo Dios.” La’tu abejntuni si’c xpiliää gubaan.

¹⁸ Rebixhojz ni rnibee näjza remastr xten leii biejn diajgreni nani gunii Jesús. Sas gudiireni xho ju’trenini, sa’csi rdxejbreni Jesús, sa’csi guiraa rebejn rdexloj rextidx Jesús. ¹⁹ Che biu’ guxhijn, birii Jesús guejdxga.

Gubijdz yagiigw ni bidzubde
(Mt. 21:20-22)

²⁰ Che bara yääl gudejdreni, bahuiireni agubijdz guideb yagiigw, näj rexlobaani. ²¹ Dxejc banaj lajz Pedr, räjpni loj Jesús:

—Dad, bahuii yagiigw nani batzubdelu yejnci, agubijdzni.

²² Dxejcti gunii Jesús räjpni lojni:

—Colchalilajz Dios. ²³ Rniliäpac lojtu, chutis nani gäb loj dajnre: “Gubicaj, bitejb loj nisdo”, luxh dini guntio’p lajzni, chalilajztsini scree gac nani guniini, sajcpac nani guniini. ²⁴ Ni’cni rniä lojtu, xhitis nani guiniabtu lo Dios che rninäjtni, colchalilajz xca’tuni, dxejc sica’tuni. ²⁵ Luxh che guiniabtu Dios, palga yu’ chu loj rdxechlajztu, colsiäjla lajztu, te näjza Xtadtu nani yu’ xhaguibaa gusiäjla rextojltu. ²⁶ Palga ditu gusiäjla lajztu con resa’tu, diza Xtadtu nani yu’ xhaguibaa gusiäjla lajzni rextojltu.

Yälrnibee xten Jesús
(Mt. 21:23-27; Lc. 20:1-8)

²⁷ Sas bidzunsacreni guedx Jerusalén. Lał ni sasaj Jesús nen guidoro, rebixhojz nani rnibee, näjza rebejn ni ruluu leii, näjza reguxhtis gubig lojni.

²⁸ Räjpreni lojni:

—¿Xhi yälrnibee rajplu, ni’c rujnlu redzuunre? ¿Chu baniidx yälrnibee rujnlu redzuunre?

²⁹ Dxejc räjp Jesús lojreni:

—Guiniabdidxäza lojtu. Coltzu’ni loä, dxejcti guiniäza xhi yälrnibeere rapä ni’c runä redzuunre. ³⁰ ¿Chu baxhał Juan ni batiobnis? ¿La Dios o la rebejn? Colnii loä naj.

³¹ Dxejcti gunii loj sa’reeni, räjpreni:

—Palga jie’tznu “Dios”, naani “¿xhicuent ditu nililajz xtiidxni?” ³² Diza niacti niäjbrei “rebejn” sa’csi rdxejbreni rebejnhidaal, sa’csi guiraa rebejn huililajz Juan gujc te bejn ni guniipac xtidx Dios.

³³ Dxejcti guniireni, räjpreni loj Jesús:

—Dinu guidon.

Sas räjp Jesús lojreni:

—Dizana guiniä xhi yälrnibeere rapä runä redzuunre.

12

Te xcuent rebenguijdx ni rbäzlaa
(Mt. 21:33-46; Lc. 20:9-19)

¹ Dxejcti gusloj caguseed Jesús rebejn con recuent ni ruluu, räjpni:

—Yu’ te bejn bazuj yaguub loj xyujni, bejnzani bazaani, dxejcru gudäänni te lajt cadro jä’t uubga. Dxejcti bejnni te yu’ jiaa, te ro’c cue nani ga’p lo xyujni.

² Badedlaatinini loj gaii bejn, sä’tini zijt. ² Che bidzujn xpäii uub, baxhał baxhuaan uubga te xmosni loj rebejn ni rbäzlaa ro’c, te xca’ni uub nani riäjla

xca' bejn̄ga. ³ Dxejc rebejn̄ ni rbázlaa ro'c gunaazreni mosga, gudijnrenini, luxh bazejcrenini siini ganaxni. ⁴ Dxejcru baxhaḷ baxhuaanga stee mos lojreni. Niluxh laareni bacuaareni guijni, gudilguijdxreni yejc mosga, xho rniadjni gubi'ni. ⁵ Dxejc baxhaḷ bejn̄ga stee mos, dxejc bagu'trenini. Baxhaḷni xhidajlrureni. Gaii gudilguijdxreni, sgaiini bagu'treni.

⁶ 'Yu'za tejtis xi'nni, luxh sanälajznini. Por lult näjza xi'nni baxhaḷni, naani: "Siucareni xi'nä." ⁷ Dxejc rebejn̄ nani rbázlaa ro'c räjp loj sa'reni: "Dee najc laa ni jiannäj ree. Colṭaa, guigu'tnuni, te xca'nu yujre." ⁸ Sas gunaazrenini, bagu'trenini. Guläätirenini lo yujga.

⁹ '¿Xhicha gun baxhuaan yaguubga rebejn̄re? Siädni luxh sugu'tni rebejn̄re, dxejcti gudeedni yujga loj ste ca bejn̄.

¹⁰ '¿La gajdtu goḷ guijtz ni rnii scree?
Guij nani guläcaj renani runchee yu',
ni'c agujc mastr ni guzuj galoo.

¹¹ Dad xtenu bejn̄ scree, cos sacduxhni nezlojnu.

¹² Dxejc rläjz reguxhtis nani bacuadiajg cuentre niniaaz Jesús, sa'csi gucbeereni laareni cacuaa Jesús diidxre. Sa'csi bidxejbreni rebejn̄xhidaal, ni'c basa'nrenini, sä'tireni.

Diidx xcuent reimpuet
(Mt. 22:15-22; Lc. 20:20-26)

¹³ Dxejcti baxhaḷreni gaii xpejn̄ refarisee näjza gaii xpejn̄ Herodes loj Jesús te gula'tzreni don xho gac guiniaazreni Jesús. ¹⁴ Dxejcti biädreni, räjpreni lojni:

—Dad, nadonnu luj najclu te bejn̄ ni rnili. Par luj guiraasi bejn̄ sajz tebloj, sa'csi dilu fii la sajz bejn̄ o la xhet sajcdi bejn̄. Luj ruluiipaclu xhini'c rläjz Dios gun bejn̄. ¿La laaca quiix bejn̄ reimpuet lo xcubieer César o la xhet laadi? ¿La guidiixnu o la dinu guidiix?

¹⁵ Dxejcti laani gucbegajcni rujnsireni si'cni rniabdiidxreni. Räjpni lojreni:

—¿Xhicient runnäjtu narä scree? Colṭanä te meelga loä, te fiä lojni.

¹⁶ Badeedtireni te meel lojni, dxejc räjpni lojreni:

—¿Chu yejc caj lojni, chu laj caj lojni?

Dxejc räjpreni:

—Xten César.

¹⁷ Dxejc räjp Jesús lojreni:

—Colṭeed nani najc xten César loj César; colṭeedza nani najc xten Dios loj Dios.

Baschelojni rebejn̄ga con xtiidxni.

Yäl'rniabdiidx xcuent yäl'rbaṅsacni lo rebengut
(Mt. 22:23-33; Lc. 20:27-40)

¹⁸ Sas biädhuui resaducee loj Jesús. Resaducee najc rebejn̄ nani rnii di rebengut guibaṅsac. Dxejc gunabdiidxreni lojni, räjpreni:

¹⁹ —Dad, xleii Moisés ruluii loonu, palga guet te niguii luxh gusa'n̄ni chäälni ruti xi'n̄ni, nanabpac xca' bejtzni chäälni, te chu xi'n̄ni con laani lacua niu' xi'n̄n tobejtzni. ²⁰ Guyu' gajdz niguii, bejtz najczeni. Sas cua' niguigalooga chäälni. Che gujtni ruti xi'n̄ni. ²¹ Dxejcti cua' ni rojppa gunaaga. Che gujtni, rut gajcdi xi'n̄ni. Si'cza gusajc ni riojnga. ²² Si'cza guläznäj gunaaga guigajdzreni. Per nicla tej reni di xi'n̄reni niu'. Dxejcti gujtz gunaaga. ²³ Guigajdzreni guläznäjreni gunaare. Cheni guibaṅsacreni lo rebengut, ¿chu chäälgacni?

²⁴ Dxejc bazejc Jesús diidx lojreni, räjpn:

—Et laadi rniitu, sa'csi ditu gumbesa'c rextidx Dios nani bacuaa reniguii lo guijtz, dizatu gumbee yälrnibee xten Dios. ²⁵ Che guibansacreni loj rebengut, direni guchnaa, rutz gudeedtireni te guchnaareni. Niluxh sajcreni si'c najc rexangl Dios nani yu' xhaguibaa. ²⁶ Palga canabdiidxtu la rbañsac rebengut, ðla di lajztu guisaj biltu guijtz ni bacuaa Moisés? Moisés bacuaa nani gunii Dios lojni neñ bajl, räjpn: “Narä nacä Xtios Abraham, Xtios Isaac, Xtios Jacob.” ²⁷ Palga Dios najc Xtios rebejnre, direni gac bengut, nabannäjreni Dios. Et laadi najc xhigabtu.

Yälrnibee ni sajcru
(Mt. 22:34-40)

²⁸ Dxejcru bidzujñ tej rebejn ni najn leii, biejn diajgni xhi caniireni, biejnza diajgni laaca gunii Jesús lojreni. Dxejcti gunabdiidxni loj Jesús:

—¿Xhi mandamient sajcru lo guiraareni?

²⁹ Dxejc räjñ Jesús lojni:

—Mandamient nani sajcru loj guiraareni najc dee: “Bacuadiajg luj, guejdx xten Israel, Dad Xtiosnu, Dad tejtis najcni. ³⁰ Chanälajzlu Dad Xtioslu guideb lastoolu, naj xaimlu, naj guideb xcäriejnlu, najza guideb xcälñadiplajzlu.” ³¹ Sigajcza najc mandamient ni rojppa: “Huinälajz sabejnlu si'ctis sanälajzlu lagajc luj.” Redee najc remandamient nani sajcru loj guiraareni.

³² Dxejcti räjñ bejnğa ni najn leii lojni:

—Laaca guniilu Dad. Tejtis najc Dios, luxh ruti chu stee najc si'c laani. ³³ Luxh sacduxh chanälajz bejn Dios guideb lastooni, naj xcäriejnni, najza xaimni, naj guideb xcälñadiplajzni, luxh chanälajzni resabejnni sigajc laani. Redee sajcru loj ni rujñ bejn che rudeedreni gojn lo Dios.

³⁴ Che bahuii Jesús laaca guniini, räjpn lojni:

—Guxii cayäädx te jiu'lu loj xcälrnibee Dios.

Sas rutru biajxhdi gunabdiidx loj Jesús.

Chu xi'n najc Crist
(Mt. 22:41-46; Lc. 20:41-44)

³⁵ Che caguseed Jesús neñ guidoro, räjpn:

—¿Xho mood rnii rebejn ni najn leii Crist najc xi'n David? ³⁶ Sprit Dxañ xten Dios basnii David che bacuaani:

Räjñ Dios loj Dad xtenä:

“Gurej ladbee xtenä, che gudzugäli reni rdxe'ch lojlu.”

³⁷ Palga lagajc David räjñ: “Dad, xtenä”, che guniini xcuent Crist, ¿xhoxh najc Crist xi'n David?

Rebenxhidaal nani yu' guejdxga bacuadiagsa'creni xtiidxni.

Gule'c Jesús xquej remastr xten leii
(Mt. 23:1-36; Lc. 11:37-54; 20:45-47)

³⁸ Lañi caguseedni rebejn, räjpn lojreni:

—Colsusin, na'c gu'chtu loj rebejn ni ruluii leii. Laareni rlanj sanäj relad-siool xtenreni. Rdxaglajzreni rnii bejn lojreni nez lo reguii. ³⁹ Rlajzarenii cuereni cadro rbej renani sajcru neñ reguidoo najza cadro ru' relanij.

⁴⁰ Rudzucajzarenii xhixten rebiuud, rniizarenii xhidalduxh diidx che rojreni le', te rusäuurenii loj rebejn. Castigwroru gac redee.

Gojn xten te biud proof
(Lc. 21:1-4)

⁴¹ Dxejcti gurej Jesús cuä' caj cadro rusäl bejn gojn. Cahuiini cagusäl rebejn meel neñ cajga. Xhidajl reni rajp cagusäl xhidajl meel nenga. ⁴² Che biääd te biud probob, basälni tiop melbáz ni sajc si'cti tej centaab. ⁴³ Dxejrcu gurejdx Jesús rexpejn pacni, räjpni lojreni:

—Rniliäpac lojtu, biud probobre basäl xhidajlrlo lo guiraa renani basäl neñ cajre, ⁴⁴ sa'csi guiraa reni abasäl che'nsi xhixtenreni. Luxh gunaare basäl guiraa nani rajpni. Ni'ctis najc nani gaunäjni.

13

Gunii Jesús sibijl guidoo (Mt. 24:1-2; Lc. 21:5-6)

¹ Cheni sariireni neñ guidoro, räjp tej rexpejn pacni lojni:

—Dad, bahuii lacti reguij, lacti reyu'.

² Dxejcti räjp Jesús lojni:

—¿La rhuillu loj reyu're? Nicla tej guij dija'n dzuub yejc sa'ni, guiraliireni sire'ch.

Recos ni gac che ameer nitloj guedxliuj (Mt. 24:3-28; Lc. 21:7-24; 17:22-24)

³ Dxejc sobga' Jesús yejc dajne' ni laa dan Oliib, cahuiini nez ro' guidoo. Che sugaxhtebreni, gunabdiidx Pedr näj Jacoob näjza Juan näjza Andrés lojni, räjpreni:

⁴ —Gunii loonu, ¿guc gac dee? ¿Xhi guihuiinu te gacbeenu asiäddzungajxh soob guiraa rediidxre?

⁵ Dxejcti gusloj gunii Jesús lojreni, räjpni:

—Colhuii, te rut gusgueedi la'tu, ⁶ sa'csi xhidalduxh bejn jiääd con laä, gäbreni: “Narä nacä Crist”, luxh rniisireni si'c, susguezareni xhidajl bejn.

⁷ 'Che jiejn diajgtu yu' guer näj yäl'nadxeeb xten guer, na'c guidxejbtu. Nanabpac gacni; et dxejcti nitloj guedxliuj. ⁸ Säjs nación yejc sanacióni, näj yäl'rnibee yejc sayäl'rnibeeni. Xhidajl lajt sajc xu, siliaanza bejn, luxh säjs rebejn yejc sa'ni. Redee najc ni guisloj guidxejb, gachuinza lajzni.

⁹ 'Dxejc la'tu col'susin sa'csi suteedreni la'tu ladz'naa reguxhtis, siguijnzareni la'tu neñ reguidoo. Sacrejdxtu lo regubieer näjza loj rereii xcäl'nasa'c narä, te si'c gac guiniitu xtidxä lojreni. ¹⁰ Nanabpac guirechxgaa xtidx Dios loj guiraa reben guedxliuj. ¹¹ Che guiniaazreni la'tu, che chanäreni la'tu loj reguxhtis, na'c gunxgaatu xhigab xhi diidx guiniitu. Col'ni nani jäjtis yejctu dxejc, sa'csi xhet la'ditu ni guinii, Sprit Dxan xten Dios ni guinii. ¹² Luxh suto' bejn lagajc bejtzni te guet bejtzni. Suto'za dad lagajc xi'nni. Säjs rebuiux yejc rexcusajnni te guet reguzajnga. ¹³ Sidxechlajz guiraa rebejn lojtu sa'csi najctu xpenä; nani ted guiraa retrabajwre, ni'c gudeed Dios xcäl'nabajnni.

¹⁴ 'Che fiitu loj nani najc yäl'rdxechlajz, nani najc yäl'runitloj, nani gunii Daniel ni gunii xtidx Dios. Che fiitu nani suga' cadro di nunyäj'l suuni, dxejcti suguxun renani yu' nez Judea chääreni nez neñ redajn. (Nani goł guijtze sugacheenini.) ¹⁵ Bejn nani suga' yejc yu' na'c jäjt'ni jiu'ni neñ te yu' xca'ni gaii xhixtenni. ¹⁶ Nani yu' loj niaa, di gal jäjt te xca'ni xhablajzni. ¹⁷ ¡Aii! Xhiza nalas chu regunaa ni nuu báz, luxh renani rusiä' xi'nni, neñ redxejga. ¹⁸ Col'nab loj Dios na'c sactu scree neñ rebäinajl. ¹⁹ Neñ redxejga su' trabajwduxh, nani gajd chu che benchielli Dios guedxliuj, luxh diruxi chu, dxejctis chuni. ²⁰ Paru di Dad gusia'tz redxejga, nicla tej bejn di laa. Susia'tzni redxejga sa'csi sanälajzni rexpejn nani aguleni.

21 'Dxejc palga yu' chu naa lojtu: "Colhunii, aree Crist", o "Colhuiire, ani suga' rec", na'c chalilajztuni. 22 Sa'csi su' bejn nani rniisi najcni Crist. Su'za reniguii nani rniisi rniireni xcuent Dios. Sujnzareni milaagwr, te gusgueereni, te palga sajcn, rlanjreni gusgueelireni renani agule Dios. 23 Ni'cni la'tu colsusin; agunixgaä lojtu guira'ti ni gac.

Xho gac che jiaäd Xi'n Dios ni gujc Niguii
(Mt. 24:29-35; 42-44; Lc. 21:25-36)

24 'Neñ redxejga, cheni luux retrabajwduxhga, sicäjy lo gubijdx, luxh diru bäii gusanij. 25 Sitejb rebalxhaguibaa, sinibsejs recos nani nasnä j rebalxhaguibaa. 26 Dxejcti suhuii rebejn loä, Xi'n Dios nani gujc Niguii, siälä nen reza guideb yälrbidexh xtenä, näjza xcäldimbicha'ä. 27 Dxejcti guxhalgacä rexanglä jiaätojpreni renani guleä guideb lo guedxliuj, cat nalooli guedxliuj näjza cadro nalooli guibaa.

28 'Colguiseed nani ruluii yagiigw. Cheni rii rebäte' lojni luxh che rcaj balajg lojni, acaxhnajntu bäii gusguj asadzungajxh. 29 Sigajcza, che fiitu acayajc recosre, sacheetu asiädgaxhä, ameer guidzunä. 30 Rniliäpac lojtu, rebejn ni nabajn dxejc, direni nitloj, fixgaareni gac recosga. 31 Sinitloj guibaa näjza guedxliuj, rextidxä di nitloj.

32 'Naj, rut najndi gac gac recosga, nicla rexangl Dios ni yu' xhaguibaa, niclaza narä Xi'n Dios, Xtadätis najn.

33 'Colhunii, colsusin, colnab loj Dios, sa'csi ditu gan gac guidzujn redxejga. 34 Dee najc si'c najc te bejn ni birii sää zijt. Che gajdlini guirii, badeedni xtzun rexmosni, luxh gunibeezani susin nani canäj rolä'. 35 Si'cza colsusin, sa'csi ditu gan gac jiaäd baxhuaan yu'ga, la jiaädni gudxej, o la jiaädni garol yääl, o la cäjy, o la jiaädni rsil. 36 Colsusin, te di guiga'tu nagayejstu che guidzujni. 37 Rediidx nani rniä lojtu, loj guiraa rebejn rniäni: colsusin.

14

Ruchaagreni diidx te guiniaazreni Jesús
(Mt. 26:1-5; Lc. 22:1-2; Jn. 11:45-53)

1 Riäädx tiop dxej guidzujn lanij, dxej ni ruzaa lajzreni gulaareni ladznaa reEgipto. Neñ redxejga rajwreni yätxtiil nani di saguij. Rebixhojz nani rnibee neñ guidoo xten rexpejn Israel näj rebejn ni ruluii leii rlanjreni niniaazreni Jesús con yälrusguee, te nugu'trenini. 2 Dxejcti räjpreni lo sa'reni: —Na'c jiennu scree neñ redxelanij, te na'c gun benguejdx biey.

Te gunaa ni basäl se't yejc Jesús Betania
(Mt. 26:6-13; Jn. 12:1-8)

3 Yu' Jesús Betania, rolizj Simón, nani guyu' guejch ni ral tiejxhni. Che sobga'ni lo mex, biääd te gunaa ca' te bo'tguij yu' setnard nenni. Rlianexhduxhni, sacduxhni. Dxejc gudi'chni yejn bo'tguijga, te basälni se'tga yejc Jesús. 4 Yu'za gaiireni ro'c ni bidxe'ch, räjp loj sa'reni:

—¿Xhicient banijtni setnejxhga? 5 Paru nido' se'tga, nijni si'cti chon gayuu denar, te nica' meelga rebejn ni xhet rajpdi meel.

Luxh caguidxa'reni loj gunaaga.

6 Dxejc räjp Jesús lojreni:

—Colsaanni, ¿xhicient ruxdojntu nani cayujn gunaare? Cos sacduxh dee bennäjni narä. 7 Guideb ni guibajntu, su' rebejn nani xhet rajpdi lojtu, luxh che rlanjztu saj gacnäjtureni. Narä et xchejdi chu'ä lojtu. 8 Gunaare abejnni nani gujctis bejnni. Abaslanexhxaani tiexhä, te chää tiexhä neñ

baa. ⁹ Rniliäpac lojtu, cadrotis guidzujn xtidx Dios, guideb lo guedxliuj, siniizareni xcuent nani bejn gunaare, te guinaj lajzreni gunaare.

Rlajz Judas guto' Jesús
(Mt. 26:14-16; Lc. 22:3-6)

¹⁰ Dxejcti huij Judas Iscariot, nani najc tej retzubitio'p xpejn_{pac} Jesús, loj rebixhojz nani rnibee te guto'ni Jesús lojreni. ¹¹ Che biejn diajg rebixhojz xtiidxni, bibalajzreni. Räjpreni sudeedreni meel lojni. Dxejcti caguuil Judas xho guto'ni Jesús.

Gudauxchej Dad con rexpejn_{pacni}
(Mt. 26:17-29; Lc. 22:7-23; Jn. 13:21-30; 1Co. 11:23-26)

¹² Biu'ti xmaan che rajwreni yätxtiil ni di saguij. Dxej lanijga, rugu'treni xiil, te ruzaa lajzreni dxej ni gulaareni ladz_{naa} reEgipto. Räj_p rexpejn_{pacni} loj Jesús:

—¿Caro rlajzlu chosucheenu te gauulu nadxej, dxelanij?

¹³ Dxej baxhałni tiop rexpejn_{pacni}, räj_{pni} lojreni:

—Colchäy neñ guejdx, ro'c guidxaagtu te niguii ni nuu te re' nis. Colchanajl niguiiga. ¹⁴ Cadro jiu'ni colye'tz loj bejn ni najc rolizni ro'c: “Naj Dad mastr, ¿con yu' cadro ria'n rebiooz, cadro gaunäjni rexpejn_{pacni} nadxej, dxelanij?”

¹⁵ Dxejcti guluiini lojtu te yu' ni sojb jiaaliga yejc sa'ni, ni asuchexгаа neñni. Colyujn xhi guidaunu ro'c.

¹⁶ Sas huij rexpejn_{pacni}, bidzujnreni neñ guejdxga. Bidxälreni te yu' si'cni räj_p Jesús lojreni. Ro'c bejnreni xhi gudajwreni dxelanij.

¹⁷ Che huääz gubijdx, bidzunäj Jesús guitzubitio'p xpejn_{pacni}. ¹⁸ Lałni sobga'reni lo mex cayajwreni, räj_p Jesús lojreni:

—Rniliäpac lojtu, tej la'tu ni cayaunää, suto'ni narä.

¹⁹ Dxejcti gusloj cayac-huin lajzreni, räj_p tebgajreni lo Jesús:

—¿La naräni?

Räpgajc steeni:

—¿La naräni?

²⁰ Dxejcti guniini, räj_{pni} lojreni:

—La tej retzubitio'p, tej ni cayajw loj xpla'tä. ²¹ Sa'csi narä Xi'n Dios nani gujc Niguii, sia'a, si'cpacni caj loj xtiidx Dios, per xhiza nalajz niguii ni guto' narä. Huentejti na'c niajl niguiire.

²² Lałni cayajwreni, cua' Jesús yätxtiil, badeedzani xquixhtiooz loj Dios dxej gula'nini, badeednini lojreni. Dxejcti räj_{pni}:

—Colca' yätxtiilre. Dee najc si'c tiexhä.

²³ Cuagajcni te bas. Che abadeedni xquixhtiooz loj Dios, badeednini lojreni, gu' guiraareni neñ basga. ²⁴ Dxejcti räj_p Jesús lojreni:

—Dee najc si'c xtienä ni ruluui diidx ni biä'nmu, nani guixe' xcuent xhidajl rebejn. ²⁵ Rniliäpac lojtu, diruna yä'a bin nani ri_i yejc uub, dxejli yä'äni stehuält loj xcäl_{rnibee} Dios.

Gunii Jesús sinii Pedr dini gumbeeni
(Mt. 26:30-35; Lc. 22:31-34; Jn. 13:36-38)

²⁶ Che gulu_{jx} biłreni te dij xten Dios, biriireni, sääreni nez dalje' ni laa dan Oliib. ²⁷ Dxej_{rcu} räj_p Jesús lojreni:

—Guiraatu sibälaztu narä naguxhij_n, sa'csi si'c cajni lo guijt_z: “Sugu'tä baxhtoor luxh suxun rexiiil.” ²⁸ Che guiba_{nsacä} loj rebengut, ganidä cha'a Galilee, dxejcti jiaäd_{tu}.

²⁹ Dxej_c räj_p Pedr loj Jesús:

—Palga guiraareni cuälazlu, narä dina cuälazälu.

³⁰ Dxejc räjp Jesús lojni:

—Rniliäpac lojlu, lagajc guxhijnre, nicla gajd guidgäi cuedxa' tiop huält, luj aguiniilu chon huält dilu gumbee narä.

³¹ Luxh laani sanuutis xtiidxni, räjpni:

—Cadro guetlu setäza, dina guiniä dina gumbeälu.

Luxh guiraa rexpejn_{pacni} gunii si'c.

Gunab Jesús loj Dios che yu'ni Getsemani

(Mt. 26:36-46; Lc. 22:39-46)

³² Dxejcti bidzujn_{reni} te lajt cadro laa Getsemani. Dxejc räjpni loj rexpejn_{pacni}:

—Colc_{uej} ree la_{lni} chanabä lo Dios.

³³ Dxejcru sanäni Pedr näj Jacob näjza Juan. Dxejc gusloj cayac-huinduxh lajz_{ni}, luxh cayu'ni yä_{lrsi}aduxh. ³⁴ Dxejc räjpni lojreni:

—Cayac-huinduxh lazá, an sugu'tni narä. Coljia'n ree, coltie'ch bacal.

³⁵ Sas gusajni tla', bazuxhijbni lo yuj, dxejcti gunabni lo Dios don la niajc nidedcaj nani sacni dxejc. ³⁶ Räjpni:

—Abba, xtadä, luj rajc rujnlu guira'ti: badzuc_{aj} retrabajwre loä. Xhet si'cni rlazädi narä, bejn si'cni rlazlu luj.

³⁷ Dxejc biäädni gunaaznireni nagayejsreni. Dxejc räjpni lo Pedr:

—Simón, ¿la nagayejslu? ¿La nicla te rate' diniajcdi nutie'chlu bacal?

³⁸ Coltie'ch bacal, colnab lo Dios, te na'c guntu dojl. Lastootu r_{lajz} gutie'chtu bacal, luxh tiejxhtu abadxajg.

³⁹ Huij Jesús stehuält, binabni loj Dios, guniini lagajc rediidx ni guniini galoo. ⁴⁰ Dxejcti biädsacni cadro tre'reni, gunazsacnireni nagayejsreni, sa'csi yuduxh bacal lojreni. Luxh direni nidxäl xhi niniireni lojni. ⁴¹ Ni riojn huält biäädni, dxejc räjpni lojreni:

—Agojl colguejs, colsilajz, agujc, abidzujn or ni ted Xi'n Dios ni gujc Niguui ladz_{naa} rebendojl. ⁴² Colchastie, colcho'. Asiäddz_{ungajxh} ni guto' narä.

Gunaazreni Jesús

(Mt. 26:47-56; Lc. 22:47-53; Jn. 18:2-11)

⁴³ Canisijcni scree, che bidzujn Judas, ni najc te retzubitio'p xpejn_{pacni}, siäd_{näni} xhidajl bejn. Ca'reni spaad, ca'reni yajg biriireni lo rebixhojz nani rnibee, näjza rebejn ni ruluii leiü, näjza rebengool nani najc guxhtis. ⁴⁴ Niluxh nani ruto' Jesús abadeedni te seen lojreni, räjpni:

—Nani guchagro'ä, ni'c najc laani. Colnaazni, colyaptzu'tz_{ni} te si'c chanätuni.

⁴⁵ Che bidzujn Judas, gubigni loj Jesús, räjpni lojni:

—Dad, Dad.

Sas bachagro'nini. ⁴⁶ Dxejcru gunaazreni Jesús ro'c.

⁴⁷ Dxejc tej reni suga' ro'c, gulää xspaadni, gudilguijdxni xmos bixhojz nani sajrcu, batiu'ni diajgni. ⁴⁸ Dxejc räjp Jesús loj rebejn:

—¿La siädxhiitu narä con spaad näjza garo't si'c rixiitu te gubaan? ⁴⁹ Guiraa dxej guyu'ä lojtu nen guidoo, caguluiätu xtidx Dios luxh difu niniaaztu narä. Scree cayajcni, te soob diidx ni caj lo reguijtz.

⁵⁰ Dxejcru rexpejn_{pacni} gulälazrenini, baxuntireni.

Bi'n nani baxun

⁵¹ Sanajlza te bi'n Jesús, nadejbni ganaxhtis te bariaad. Si'c gunaazrenini.

⁵² Dxejcti baxunni, libasa'nni bariaadga, sä'tini xhabääl_{ni}.

*Suga' Jesús loj reguxhtis**(Mt. 26:57-68; Lc. 22:54-55, 63-71; Jn. 18:12-14, 19-24)*

⁵³ Dxejc biädnäreni Jesús loj bixhojz ni sajcru. Bidojpb rebixhojz nani rnibee, näj rebengool ni najc guxhtis, näjza rebejn ni ruluu leii. ⁵⁴ Luxh Pedr zijt zijt sanajlni Jesús. Che bidzujntini lo xle' bixhojz ni sajcru, gurenäjni rebejn nani rajp ro'c, cagucha' lajzni lo bajl.

⁵⁵ Rebixhojz nani rnibee, näjza guiraa rebengool ni najc guxhtis, cagui-ilreni xhi tej xquej Jesús nidxälreni, te nugu'treni Jesús, xhet bidxäldireni. ⁵⁶ Xhidajl bejn gunii didxxhii, räjpreni et laadi rujn Jesús, niluxh di xtiidxreni nile', sa'csi garen garen guniireni. ⁵⁷ Dxejc huisulii gaii bejn ni guniireni stee didxxhii xcuent Jesús, räjpreni:

⁵⁸ —Nuunu biejn diaagnu guniini: “Sutiexhä xyu' Dios ni guc-chee con ñaa rebejn, luxh choñtis dxej guncheä steeni, ni nac-chee et con ñaadi rebejn.”

⁵⁹ Nicla si'c di xtiidxreni nile', sa'csi garen garenza guniireni.

⁶⁰ Dxejcti huisulii bixhojz ni sajcru galäii guiraa rebejn, gunabdiidxni loj Jesús räjpni:

—¿La digacdi guiniilu xhi guiniilu xcuent requej ni cabe'c reniguiire, ä?

⁶¹ Laani niäuuits ro'ni, xhet guniidini. Dxejcti gunabdidxsac bixhojz ni sajcru lojni, räjpni:

—¿La luj ni najc Crist, xi'n Dios nani rliä'p bejn xpala'nni, ä?

⁶² Dxejcti räjp Jesús lojni:

—Naräni. Suhuiitu loä, Xi'n Dios nani gujc Niguii, sobga'ä xladbee Dios ni rnibee, siäläza neñ reza ni tre' xhaguibaa.

⁶³ Dxejcru bixhojz ni sajcruga, batiäjsni tla' xhajbni, räjpni:

—¿Xhi jienrunu guidiilnu diidx xcuentni? ⁶⁴ Abiejn diajgtu xho guniyajni Dios. Naja', ¿xhi najtu?

Dxejcti guiraaareni räjp nungäjlpac guetni.

⁶⁵ Dxejc yu' reni gusloj cagutiobxhejn lojni, luxh basäuureni lojni, dxejc huääzreneni, räjpreni lojni:

—Gunii, ¿chuni'c huääzlu?

Luxh renani canäjni gudajp lojni.

*Gunii Pedr dini gumbee Jesús**(Mt. 26:69-75; Lc. 22:56-62; Jn. 18:15-18, 25-29)*

⁶⁶ Dxejc suga' Pedr lo yuj, nez lo le'ga, che biäd te xcriaad bixhojz ni sajcru.

⁶⁷ Luxh bahuiini cagucha' lajz Pedr, cadxelojni lojni. Dxejcti räjpni:

—Näj luj nadxaaglu Jesús ni siäd Nazare't.

⁶⁸ Dxejc Pedr basgueeni, räjpni:

—Dina gumbeäni. Dizana ganä xhini'c caniiilu.

Dxejcti biriini sääni ro' suaan. Dxejcti guredxa' guidgaii. ⁶⁹ Dxejc bahuisac criaadga lojni, räjpni loj renani suga' ro'c:

—Niguiire najc laa tejreni.

⁷⁰ Luxh laani basgueeni stehuält. Che gojl stera't, räpsac renani suga' ro'c loj Pedr:

—Guliipacni näj luj najclu tejreni, sa'csi beñ Galileelu, luxh guyasi riejn rniilu si'c rnii rebeñ Galilee.

⁷¹ Dxejc gusloj canii Pedr:

—Dios gun castiigw narä palga xhet guliidi ni caniä. Dios najc testiigw, dina gumbeä niguii nani caniiitu.

⁷² Dxejcti barojp huält guredxa' guidgail. Dxejc banalajz Pedr nani räjp Jesús lojni: “Che gajdli guidgail cuedxa' tiop huält, luj gacla choṇ huält aräjplu dilu gumbee narä.”

Dxejc guslojni cayoouni.

15

Suga' Jesús loj Pila't

(Mt. 27:1-2, 11-14; Lc. 23:1-5; Jn. 18:28-38)

¹ Che bara yääl bidxaag sa' rebixhojz ni rnibee, näj rebengool ni najc guxhtis, näjza rebejn ni ruluii leii, näjza guiralii reguxhtis. Dxejcti gusloj cachaagreni diidx xho gunreni. Baliibreni Jesús, sanätirenini, niluxh badeedrenini loj Pila't. ² Dxejc gunabdiidx Pila't loj Jesús räjpni:

—¿La luj ni najc reii xten rexpejn Israel, ä?

Räjp Jesús lojni:

—Si'cni guniilu, si'c najcni.

³ Dxejc gusloj rebixhojz nani rnibee cabe'c rexquej Jesús. ⁴ Gunabdidxsac Pila't lojni:

—¿Xhet rniidilu ä? Ahuii lacti xquejlu cabe'ceni.

⁵ Bidxeloj Pila't sa'csi nicla si'c xhetru guniidi Jesús.

Gunibeereni guet Jesús

(Mt. 27:15-31; Lc. 23:13-25; Jn. 18:38–19:16)

⁶ Dxelaniypac ruslaa Pila't tej rebejn ni yu' latzguiib. Ruslaani chutis te ni rniab rebejn. ⁷ Lo rebejn ni yu' latzguiib nadxaag te niguii ni laa Barrabás. Bagu'tni te bejn che nu'chni lo te cuaa bejn ni gudilnä j gubieer. ⁸ Dxejc bidojp xhidajl bejn loj Pila't, gunabreni lojni gunni si'tis rujnni casob lanij. ⁹ Dxejc gunabdiidx Pila't lojreni, räjpni:

—¿La rlanjtu guslaä reii xten rexpejn Israel, ä?

¹⁰ Sa'csi guchbegajcni rdexchlazj rebixhojz loj Jesús, ni'c bateedrenini lojni.

¹¹ Ni'cni baquiliä rebixhojz ni rnibee rebenxhidaal te gäbreni lo Pila't:

—Baslaa Barrabás loonu lacuaa ni guslaalu Jesús.

¹² Dxejc räjp Pila't lojreni stehuält:

—¿Xhini'c rlanjtu gunnä nani rniitu reii xten rexpejn Israel?

¹³ Dxejcru guredxa'reni:

—¡Bacuaani lo cruzj!

¹⁴ Dxejc räjp Pila't lojreni:

—¿Xhini'c xhet laati bejnni?

Dxejcti laareni rbedxa'urenini:

—¡Bacuaani lo cruzj!

¹⁵ Baslaati Pila't Barrabás, sa'csi rlanjz ni nuspaani lajz rebenxhidaal. Che gulujx gunibee Pila't, bia Jesús. Bateedti Pila't Jesús loj rexsoldaadni, te xcajni loj cruzj.

¹⁶ Dxejc huinä rexsoldaadni Jesús nen Pretoor, yu' cadre rujnreni yälguxhtis, ro'c batojpreni guiraa resa'reni. ¹⁷ Dxejcti bashuajcwreni Jesús te lad moraad, bencheereni te coron guejch basälreni yejcnini. ¹⁸ Guslogajc gaxuhi näjrenini, caniireni lojni:

—¡Colguiliä'p xpala'n reii xten rexpejn Israel!

¹⁹ Batiäjlneni te yabixhijl yejcnini, batiobxhejnrenini lojni, luxh guzuxhijbreni te rajnrenini. ²⁰ Che gulujx basacsíreni Jesús, gulääreni lad moraad ni najcwni, sas bashuajcwrenini xhajbpacni. Gulägajceni Jesús te cuaarenini lo cruzj.

*Bacuaareni Jesús loj cruzj**(Mt. 27:32-44; Lc. 23:26-43; Jn. 19:17-27)*

²¹ Te niguii ni laa Simón, ni siääd Cirene, sadejd ro'c, bazajni lo nejz. Niguiire najc xtd Alejandro näjza Rufo. Che sadejdni nejzga, la fuerz basguarenini xcruzj Jesús.

²² Dxejcti huinäreni Jesús cadro laa Gólgota, nani säloj: dan Calabeer. ²³ Ro'c badeedreni lo Jesús bin nani nu'ch mir lojni, dxejc laani naaddini niä'ni binga. ²⁴ Che gulujxti bacuaareni Jesús loj cruzj, gudzujtreni yejc rexhajnbi, te don xhini'c xca' tejpgareni.

²⁵ Agujc choñ or gulejn gubijdx che bacuaareni Jesús lo cruzj. ²⁶ Letreer cadro bacuaareni xtojlni scree bejnrenini: “Reii xten rexpejn Israel.”

²⁷ Bacuaazareni lo stiop cruzj tiop gubaan, tejni xladbee Jesús, xtee xladbäjgwini. ²⁸ Dxejc guzojb diidx ni caj loj guijtjz nani rni: “Loj rebengujdx bigabni.”

²⁹ Luxh renani sadejd nejzga guniyajreni Jesús, cagusniibreni yejcreni, räjpreni lojni:

—jJaa! Luj nutiejxhlu guidoo luxh chontis dxej niunchesacluni. ³⁰ Naj baslaa lagajc luj, biäjt loj cruzjga.

³¹ Näjza rebixhojz ni rnibee, näj rebejn ni ruluii lei, baxhiznärenini, räjp loj sa'reni:

—Ste'ca bejn ruslaani, xhoxh digacdi guslaani lagajc laani. ³² Naj sujiäjt Cristre, reii xten rexpejn Israel, lo cruzj te guihuiinu, te chalilaaznu.

Näj regubaan ni caj lo cruzj guniyajzareni Jesús.

*Xcälgujt Jesús**(Mt. 27:45-56; Lc. 23:44-49; Jn. 19:28-30)*

³³ Che gojl läidxej, bicäy si'cti choñ or. ³⁴ Che gudejd choñ orga, guredxa' Jesús dipro, räjpni con xtiidxni:

—Eloi, Eloi, ¿lama sabactani? —dee säloj: Xtiozä, Xtiozä, ¿xhicuent gulälazlu narä?

³⁵ Bejn diajg gaii bejn ni suga' ro'c räjpni si'c, dxejc räjpreni:

—Colcuadiajg, Elías cabejdxni.

³⁶ Sas baxuñ tejni, bahuajdxni te sponj loj binagr. Dxejcru basälñini yejc te yabixhijl, badeednini loj Jesús te yänini, räbgajcni:

—Colgusaan guihuiinu don la siädläjd Elíasni loj cruzj.

³⁷ Dxejcru guredxaduxh Jesús, gujtini. ³⁸ Dxejc lajd ni najl nen guidoro biräjsni, gujcnj tiop la', jiaali lo yujli. ³⁹ Suga' capitán nani rnibee te gayuu soldaad nez loj Jesús, luxh che bahuiini xho guredxa' Jesús scree näj xho gujtni, räjpni:

—Guli'pacni, niguiire najc Xi'n Dios.

⁴⁰ Suga'za gaii gunaa, zijt cadxelojreni. Lojreni yu' Marii Magdalen, näj Marii, xnan Jacob ni najc huinru, näjza José, näjza Salomee. ⁴¹ Che guyu' Jesús Galilee birinajl regunaare Jesús, luxh bahuiirenini. Yu'za xhidajlru regunaa ni biädnajl Jesús che biädni Jerusalén.

*Biga'tz Jesús**(Mt. 27:57-61; Lc. 23:50-56; Jn. 19:38-42)*

⁴² Biu' gudxhijn, luxh najcni dxe bispr che rusucheereni par sabd, dxej ni rusilajz rexpejn Israel. ⁴³ Biääd José ni siääd Arimatea, najcni te rebejn ni sajz loj reguxhtis. Näjza laani cabäjnzi xcälrnibee Dios. Guideb yälñabajn gunabni tiexh Jesús lo Pila't. ⁴⁴ Bidxelo Pila't alagujt Jesús, sas gurejdxni capitán ni

rnibee tej gayuu soldaad, gunabdiidxni lojni la balagujt Jesús. ⁴⁵ Che räjp capitánga lojni agujt Jesús, dxejc badeed Pila't tiexh Jesús loj José. ⁴⁶ Agusii José te bariaad, luxh che gulátni Jesús lo crujz, batejbnini neñ bariaadga. Dxejc gudixhni Jesús neñ te biliää ni caj cuä' te guilaj, dxejcro batzugni te guiro ro' biliääga. ⁴⁷ Bahuii Marii Magdalen näj Marii xnan José cadro biga'tz Jesús.

16

Huäjz Jesús loj rebengut

(Mt. 28:1-10; Lc. 24:1-12; Jn. 20:1-10)

¹ Che gudejd sabd, dxej ni rusilajz rexpejn Israel, Marii Magdalen näj Marii xnan Jacob näjza Salomee gusii setnejxh te chatääbreni se'tga tiexh Jesús. ² Che biu' xmaan, rsildooru, che calejn gubijdx, biäädreni ro' xpaani. ³ Cayäjp loj sa'reni:

—¿Chu gudzucaj guiroga ro' xpaani te jiu'nu?

⁴ Che gudixhlojreni, bahuiireni alagubicaj guijga, luxh najcni te guiroduxh. ⁵ Che biu'reni neñ biliääga, bahuiireni lo te bi'n sobga' ladbee neñ biliääga. Najcw bi'nga te ladnol ni najc siool. Dxejc bidxejb regunaaga. ⁶ Dxejcti räjp bi'nga lojreni:

—Na'c guidxeybtu. Caguultu Jesús ni siääd Nazare't, nani cuaj lo crujz. Rutiruni ree. Agubajjni lo rebengut, coltahuii cadro gudixhreni tiejxhni. ⁷ Colchäy, colchaye'tz lo rexpejnpacni, loj Pedr, ganidla Jesús guidzujñ Galilee, dxejcti guidzujntu. Ro'c fiitu lojni, si'cni guniini lojtu.

⁸ Biriitireni ro' biliääga, racsejslireni sa'csi cadxejbreni. Rut lojdi guniidi-reni sa'csi cadebduxhreni.

Baluiloj Jesús loj Marii Magdalen

(Jn. 20:11-18)

⁹ Gubajn Jesús loj rebengut rsildooru che biu' xmaan. Baluilojni galoo loj Marii Magdalen, nani agacgulääni gajdz bendxab neñ lastooni. ¹⁰ Dxejcti huij Marii Magdalen, huiye'tzni loj renani cuansanäj Jesús, renani cayac-huin lajzni, cayoonreni. ¹¹ Che biejn diajgreni ahuäzsac Jesús lo rebengut, luxh Marii abahuii lojni, di lajzreni nilii.

Baluiloj Jesús loj tiop xpejnpacni

(Lc. 24:13-35)

¹² Ste'ca najc Jesús baluilojni loj tio'p renani sasaj sääreni lo nejz. ¹³ Dxejcti gubi'reni, huiye'tzreni loj sgaiiga, luxh nicla xtidx reni'c di lajzreni nilii.

Baxhal Jesús repost

(Mt. 28:16-20; Lc. 24:36-49; Jn. 20:19-23)

¹⁴ Lult baluilojni loj guitzubiteebreni che sobga'reni lo mex. Gudidxa' Jesús lojreni, sa'csi di lajzreni nilii luxh guyaa lajzreni. Di lajzreni nilii xtidx renani bahuii loj Jesús che gubangajcni loj rebengut. ¹⁵ Räjp Jesús lojreni:

—Colchäj guideb lo guedxliuj, colñii xtidx Dios lo guiraa rebejn. ¹⁶ Nani chalilajz luxh tiobnisni, siliaani loj dojl; biäda nani di lajzni chalii sinijtni lo dojl. ¹⁷ Niluxh remilagwre jiannäj renani chalilajz: sibääreni bendxab xcuentä; siniireni ste'ca diidx; ¹⁸ guiniaazreni bäl con naareni; masque yäreni xhicos ni rugu't bejn, xhet gacdireni; susujreni naareni yejc rebenracxhuu luxh siajc rebenracxhuu.

*Huä'p Jesús xhaguibaa**(Lc. 24:50-53)*

¹⁹ Gulujxti gunii Dad Jesús si'c lojreni. Dxejc huäjsni sääni xhaguibaa. Ro'c huicueni cuä' Dios ladbee. ²⁰ Dxejcti laareni bire'chreni, guniireni xtidx Dios guiranejz. Lagajc Dadga gucnäjreni, bejnii milagwr te guchee bejn laapac xtidx Dios ni caniireni. Sugacni si'c.

Rediidx Nani Bacuaa Lucas Xcuent Jesucrist

Xhicuent bacuaa Lucas rediidxre

¹ Xhidajl bejn abacuaa lo guijtzc xcuent guiraa redzuun ni gujc nez loonu te cuäxnejzreni redzuunga ² si'cpac ni biääd rediidxga loonu. Rebejn nani bahuiloj guiraa recosre cheni guslojlireni, näjza reni gucnäj basule' xtidx Dios najc renani basule' rediidxga loonu. ³ Luxh sa'csi abilä, abahuiloä, abenduxhä xhigab xcuent guiragajc ni gusajc che gusoblojlini, ni'c runä xhigab laaca gucuaä rediidxre, xnejz-xnejzni lo guejblu, Dad Teófilo, ⁴ te gacbesa'c guejblu ni najc didxlii xcuent guiraa rediidx ni abisieed guejblu.

Te xangl Dios gunii xho gaal Juan ni rutiobnis

⁵ Cheni gujc Herodes reii xten región Judea, guyu' te bixhojz ni laa Zacarías, ni nadxaag lo rexpejn Abías. Chäälni laa Elisabe't, ni najcza te xagdoo bixhoz Aarón. ⁶ Guiro'preni najcreni nadolajz nez loj Dios, rusoobreni xtidx Dios näjza xleii Dios, ni'c digacdi gucuaquij bejnreni xcuent nicla tej dojl. ⁷ Luxh ruti xi'nreni, sa'csi chäälni digacdi chu xi'nni. Luxh guiro'preni anajcreni bengool.

⁸ Te dxej, laļ ni cayujn Zacarías dzuun nen guidoro si'c bixhojz nez loj Dios, ⁹ dxejc con daad bibee chuni'c jiu' nen yudxan xten guidoro te guze'creni yaal si'cni najc costumbr xten rebixhojzga. Dxejc si'c gulereni Zacarías gunni. ¹⁰ Laļ ni caguze'cni guxhyaal, suga' guiraa rebejn lo xle' guidoro, cabedx-canabreni lo Dios. ¹¹ Dxejcti baluiloj te xangl Dios lo Zacarías, suliiini ladbee lo dxan cadro cayejc guxhyaal. ¹² Che bahuii Zacarías lo xangl Dios, di jien xhi gunni, lacti bidxebduxhni. ¹³ Sas xangl Dios räjp lojni:

—Na'c guidxejblu, Zacaríi, sa'csi Dios abiejn diajgni xtiidxlu, luxh su' te xi'n chääl, Elisabe't; cuälajluni Juan. ¹⁴ Sibalazduxhlu, siroob lastoolu; xhidajl bejn sibalajz sa'csi gaalni, ¹⁵ sa'csi benro gac xi'nlu nez loj Dios. Dini yä bin, nicla maxcaal. Sibäjz Sprit Dxan xten Dios nen lastooni cheni gaallini. ¹⁶ Sujnni gusiechlajz xhidajl rexpejn Israel, guibi'reni lo Gueb Dios. ¹⁷ Juanre sinijdni loj Dad, sujni lagajc xhigab, sajpni lagajc yälmbibe ni gojp profe't Elias, te che jiejn diajgreni xtiidxni susiechlajz redad, susiäjlzareni diidx con rexi'nreni. Sigajcza rebejn ni di gusoob xtidx Dios sisieedreni gusoobreni xtidx Dios, te si'c jiädsucheeni lastoo rebejn te chalilajzreni xtidx Dad ni jiääd.

¹⁸ Gunabdiidx Zacaríi loj anglga, räjpni:

—¿Xho mood gacbeä guliilu? Sa'csi anacä bengol, sigajcza chälä.

¹⁹ Dxejcti räjp anglga lojni:

—Narä nacä Gabriel, runä dzuun lo Dios. Laani baxhalni narä te guininää luj, jiädnää didxhuenre loju. ²⁰ Luxh naj, sa'csi dilajzlu nilii xtidxä, sia'nlu gop, digacdiru guiniilu, cheni gaalli xi'nlu sinisaclu. Rextidxä sisiojb che guidzujn dxej che riäjł gacni.

²¹ Laļni cayajc dee, cadxeloj rebejn ni suga' nez ro' yudxan cabäjzreni guirii Zacaríi sa'csi cayaclaani nen yudxan. ²² Che birii Zacaríi, di nijacdiru niniini loj rebejn; dxejc gacbeereni yu' xhi cosro bahuini nen yudxan xten guidoo. Dxejc con seen guininäni rebejnğa, sa'csi xheti xse'ni te niniini.

²³ Che gulujx bejnni dzuun nen guidoro, gubi'ni rolizjni. ²⁴ Che gudejd redxej dxejcti bazeñ nuu Elisabe't, chäälni, báz, gaii bäi diruni nirii rolizjni.

Bejn̄ni xhigab, rāj̄pni: ²⁵ “Si’c bejn̄ Dad Dios narā n̄aj, gucnāj̄ni narā te diru bejn̄ cuālaz narā sa’csi ruti xi’nā.”

Biaddeed te xangl Dios diidx lo Marii gaal Jesūs

²⁶ Che gudejd xho’p bāii, baxhal Dios xangl̄ni Gabriel lo te guedx Galilee ni laa Nazare’t, ²⁷ te chahuini te dxapxteeb ni laa Marii. Agojt xtiidx̄ni te guchnaani te dade’ ni laa Josē. Dade’re najc xagdoō tōreii David. ²⁸ Biu’ anglre cadro sobga’ dxape’ga, rāj̄pni lojni:

—Xchan, dxa’p ni sanālajz Dios, ni agule Dios loj guiraa regunaa. Dios gacnāj̄lu. Abenle’ Dioslu loj guiraa regunaa.

²⁹ Luxh che bahuiini lo xangl Dios bidxelojni lo rextiidx̄ni, ruj̄nni xhigab: “¿Xhicuent caniini si’c loā?” ³⁰ Dxejc rāj̄p xangl Dios lojni:

—Na’c guidx̄ej̄blu, Marii; agule Dios luj. ³¹ Bacuadiajg diidx. Suulu bāz, su’ te xi’nlu. Che gaalni guirilajni Jesūs. ³² Laani saj̄cni te bejn̄ ni sacduxh. Sirilajzani Xi’n Gueb Dios ni yu’ xhaguibaro. Gueb Dios sujn̄ gacni reii sigajc ni gujc toxtadgoldooni David, ³³ te tejpas guinibeeni loj rexi’n Israel, luxh dipac xcāl̄rnibeeni nitloj.

³⁴ Dxejc gunabdiidx Marii lo xangl Dios, rāj̄pni:

—¿Xho mood gac dee? Ni dxapxteeb narā, gajd narā gumbeā niguii.

³⁵ Badzu’ xangl Dios diidxre lojni, rāj̄pni:

—Sprit Dxan xten Dios siād loj̄lu, xcāl̄rnibee Gueb Dios ni yu’ xhaguibaa suhuaj̄cwni luj si’c te za. Ni’cni bāz ni gaal saj̄cni te bendxan, sibālaj bejn̄ni Xi’n Dios. ³⁶ Nājza sa’lu Elisabe’t su’ te xi’nni luxh anaj̄cni te bengool; ni’cni gunaa nani najreni digacdi chu xi’nni agujc xho’p bāii nuuni bāz. ³⁷ Xheti te cos ni naganduxh̄tej nez loj Dios —rāj̄p Xangl Dios.

³⁸ Dxejcti rāj̄p Marii:

—Narā nacā xmos Xtadnu Dios; mbaj, sugunnāj̄ Dios narā si’ctisni gunii gueblu loā.

Dxejcti biunejz angl xten Dios lojni, sā’tini.

Bihuii Marii lo Elisabe’t

³⁹ Nen̄ redxejga, basquejn̄ Marii sāāni lo te guejdx̄ ni tre’ nen̄ redajn̄ xten Judea. ⁴⁰ Biu’ni roliz̄j Zacarīi, guniini xtiidx̄bee loj Elisabe’t.

⁴¹ Che biejn̄ diajg Elisabe’t guniini, biniib xi’nni xque’ni, gudxaj Sprit Dxan xten Dios lastoo Elisabe’t. ⁴² Dxejc dipduxh̄ guniini rāj̄pni:

—Abenle’ru Gueb Dios luj loj guiraa regunaa. Abenle’zani xi’nlu. ⁴³ ¿Chu narā te siādhūi xnan Xtioozā narā? ⁴⁴ Biej̄ntis diagā xtiidx̄lu, bibalazgajc xi’nā, biniibni xque’ā. ⁴⁵ Sibaa lajzlu, luj ni huililajz sisioj̄bpac nani gunii Xtadnu Dios.

⁴⁶ Dxejc rāj̄p Marii:

Xaimā rliā’p xpala’n Xtadnu Dios.

⁴⁷ Rbalazduxh̄za lastoā xcuent Dios ni rusl̄aa narā lo dojl̄.

⁴⁸ Sa’csi agule Dios narā, nacā te mos gunaa ni xhet saj̄c̄di, luxh n̄ajli sinīi rebejn̄ nājza reni churu chu lo guedx̄liuj, chicbaani loj guiraa regunaa.

⁴⁹ Sa’csi Gueb Dios ni rajp guiraa yāl̄rnibee abejn̄ xhidaj̄l cosro loā, dxanduxh̄ najc lajni.

⁵⁰ Dini cuāz̄gulaslajz̄ni guiraa rebejn̄ ni riu xtiidx̄ni, reni raj̄̄ni.

⁵¹ Xhidaj̄l cosnagaj̄n abej̄nni con lagajc naani, abat̄ie’chni renani rustioob lastooreni rliā’p lagajc xpala’nreni.

⁵² Abasajbni reni rnibee,
per reben_nadolajz bejn_ni gacreni be_nro.

⁵³ Bachajni xque' reni calaan,
badeedni ganax cossa'c,
niluxh badzu'ni rebejn ni yu' xhixtenreni xhet badeed dini lojreni.

⁵⁴ Gucnäjni nació_n xten xpejn Israel, ni najc xmos Dios.

Di lajzni niäl nulaslajznireni

⁵⁵ sa'csi si'c bia'n_ni diidx con retoxtadgoldoonu,
sinuu gulazlajzni toAbram näjza rexagdooni par tejpas.

⁵⁶ Dxejc bia'n Marii rolizj Elisabe't si'cti cho_n bäi, dxejc gubisacni rolizjni.

Che gojl Juan ni rutiobnis

⁵⁷ Che baza' xpäi Elisabe't, dxejc gojl xpäzni te bäz niguiini. ⁵⁸ Dxejc bidzujn rexpis_nreni näjza resa'ni biädhuiireni guiro'preni che gucbeereni lacti hueen gujc Dios con laani. Bibalaznäjrenini. ⁵⁹ Che gudejd xhujn dxej, huinäreni bäze'ga chuni bee. Rlajz rebejn nirilajz bäze'ga si'c laa xtadni, Zacarí. ⁶⁰ Niluxh xnanni räjp:

—Na'c, guirilajpacni Juan.

⁶¹ —¿Xhicuent? —räjpreni—. Ruti xfamillu ni laa si'c.

⁶² Dxejcti gunabdiidxreni con seen lo xtad bäze'ga te gacbeereni xho rlajzni guirilajz bäze'ga. ⁶³ Xtadni gunab te la' guijt, dxejc bacuaani: “Lajni najc Juan.” Dxejc guiraareni bidxelojreni. ⁶⁴ Luxh lagajc dxejc gujc gunii Zacarí stehuält, dxejc guslojni calä'pni xpala'n Dios. ⁶⁵ Bidxeloduxh rexpis_nreni xhini'c gujc ro'c. Luxh bire'ch diidx xcuent recosre guideb ne_n redajn xten Judea. ⁶⁶ Guiraa reni biejn diajg rediidxga gusloj cayujnreni xhigab, dxejc gunabdiidxreni loj sa'reni:

—¿Chuchani'c gac biuxe'ga?

Si'c guniireni sa'csi huenliisi abenle' Diosni.

Dij ni bil Zacarí

⁶⁷ Dxejcti biääd Sprit D_xan xten Dios ne_n lastoo xtadni Zacarí, gusloj caniini rediidx ni badeed Dios lojni, räjpni:

⁶⁸ Guiliä'pnu xpala'n Dios, Xtios rexpejn Israel, sa'csi abiädhuiini loonu, ni najcnu rexpejn_ni, te siädguslaani nuurnu ne_n dojl.

⁶⁹ Abaxhalni loonu te bejn ni rajp yälrusladuxh bejn ne_n dojl.
Najcni te rexagdo toxmosni David.

⁷⁰ Lagajc si'cni badeed Dios gunii redade' ni bacuaa xtiidxni lo guijt galoo:

⁷¹ Suslaani nuurnu loj reni rdxe'ch loonu,
näjza ladz_naa rebejn ni gulälaz nuurnu.

⁷² Te gulaslajzni retoxtadgoldoonu,
te soob diidx ni bia'n_ni con rebejn_nga.

⁷³ Scree bia'n_ni diidx con toxtadgoldoonu, Abram:

⁷⁴ Suslaani nuurnu ladz_naa rebejn ni rdxe'ch loonu,
te na'c guidxeebnu chunu lojni gusoobnu xtiidxni,

⁷⁵ con yäl_nabansa'c näjza yäl_nguxhtis guiraa redxej ni guibaj_nnu.

⁷⁶ Luxh luj, bäze', sirilajlu dade' nani rnii xtidx Gueb Dios ni yu' xhaguibaa,
sa'csi sinijdlu lo Dad te gusucheelu rexnezulajzni,

⁷⁷ te gunlu gacbee rexpejn_ni xho gac laani lo dojl,
te gac guibicaj xtoj_nreni.

⁷⁸ Sa'csi Dios sanälajz bejn,

nājza rulaslajzni bejn ni'cni xhaguibaali suxhalni xi'nni te jiādnāni te dxe-coob,

⁷⁹ te gusanijni lo rebejn ni nabajn lo yālxcăjy xten dojl,

nājza rebejn ni nabajn lo xpalaā yālgujt,
te guluiini xho sānu lo xnez yālrbecdxilajz.

⁸⁰ Dxejc gunis biuxe'ga, guyuduxh xcāriejni xcuent recos xten Dios. Gubajjni nez loj reyubijdz cheni bidzujni dxej che baluilojni loj rexpejn Israel, che gusloj cagusule'ni xtidx Dios.

2

Che gojl Jesús

(Mt. 1:18-25)

¹ Nen redxejga, gunibee Augusto César xcaj laj rebejn guideb guedxliuj lo xquijtzn. ² Ni'c nacobgucj yālbīgabre cheni najc Cirenio gobernadoor xten Siria. ³ Guiraa rebejn nanab chāāreni lagajc lajdxreni te ro'c guigabreni. ⁴ Ni'cni birii José guedx Nazare't Galilee, te huijni Judea, lo guedx Belén, cadro gojl toDavid, sa'csi najc José xagdoo toDavid. ⁵ Huināni Marii, nani guchnaani, huijreni guedx Belén te ro'c guigabreni. Luxh nuu Marii bāz. ⁶ Lalsi yu'reni guedx Belén, bidzujn dxej ni gaal xi'n Marii. ⁷ Ro'c gojl xi'n galooni, dxejc batejbnini te xzuudni. Dxejc gudixhnini cadro rusālreni guijxh rajw reguidxaa sa'csi xhetiru yu' xcalaareni jia'nreni.

Rexangl Dios nājza rebaxtoor

⁸ Gajxh guejdxga guyu' gaii baxtoor cayajpreni xhiilreni lo niaa guxhijn. ⁹ Chela baluiloj te xangl Dios, luxh bianij guideb gabireni con yālrđimbicha' xten Dios, dxejc bidxebduxhreni. ¹⁰ Sas anglga rājp lojreni:

—Na'c guidxejbtu, narā siādnāā lojtu te didxsa'c ni suspalajz guiraa ben guedxliuj. ¹¹ Nadxej gojl nen guejdx xten toDavid, tej ni guslaa bejn nen dojl, laani najc Crist ni najc Dad. ¹² Dee najc te seen lojtu, sidxāltu bāze'ga nadejbni nen te xzuudni, naga'ni cadro rusālreni guijxh rajw reguidxaa.

¹³ Lagajc dxejc guideb gabi anglga baluiloj naclejn xangl Dios, gulā'preni xpala'n Dios, rājpreni:

¹⁴ Collā'p xpala'n Dios ni yu' xhaguibaali.

Suchu yālrbecdxilajz lo reben guedxliuj ni balazlajzni.

¹⁵ Che gubi' rexangl Dios xhaguibaa, gusloj rebaxtoor canii loj sa'reni:

—Colcho' guedx Belén colchohuii ni guzajc ro'c ni gunii Xtadnu Dios loonu.

¹⁶ Rusquenduxhreni sāāreni, dxejc bidxālreni Marii nājza José nājza bāze' ni naga' nen cadro rusālreni guijxh rajw reguidxaa. ¹⁷ Cheni bahuiireni loj rebejn̄ga, bijreni diidx xhi rājp rexangl Dios lojreni xcuent bāze'ga.

¹⁸ Niluxh guiraa reni biejn diajg rediidxre bidxeloduxhreni xtidx rebaxtoorga. ¹⁹ Niluxh Marii gulucheeni guiraa rediidx ni biejn diajgni nen lastooni, rujntisni xhigab xcuent rediidxga. ²⁰ Dxejcti rebaxtoorga gubisacreni cayolreni, calā'pzareni xpala'n Dios xcuent guiraa rediidx ni biejn diajgreni nājza ni bahuiireni sa'csi guiraani gujc si'cni rājpreni lojreni.

Cheni huināreni Jesús chuni bee

²¹ Che gudejd xhujn dxej, huināreni bāze'ga chuni bee, dxejc gulāljajreni Jesús, lagajc laj ni rājp xangl Dios loj Marii guirilajni galooli guuni bāzga.

²² Che basa' redxej ni gac naya te nan si'cni gunibee toMoisés loj xquijtzn, huinājreni bāze'ga guedx Jerusalén, nen guidoro gunabreni gacnāj Diosni par tejpas. ²³ Bejnreni scree sa'csi caj lo guijtzn xten Dios: “Guiraa rexingangaloo

xten bejn guilia'tu lo sa'reni te gunreni xtzunä", räjp Dios. ²⁴ Bidzujñreni ro'c ca'reni te gojn si'cni rnibee rexquijt Dios: "Tio'p gugue' o tio'p palombäz."

²⁵ Neñ redxejga, neñ guedx Jerusalén rbäjz te dade' ni laa Simeón. Najcni te beñsacduxh, randuxhni Dios, cabäjzni jiaäd te bejn ni guslaa rexpejn Israel. Rbäjz Sprit Dxan xten Dios neñ lastoo Simeón. ²⁶ Sprit Dxan abejn gacbeeni dini guet anse fiini loj Crist ni guxhał Dios. ²⁷ Dxejcti räjp Sprit Dxan xten Dios lojni chääni guidoro. Lałni yu'ni neñ guidoo, bidzujñ José con Marii, biädnäreni báz Jesús, te gunnäjreni Jesús nani rnibee xtidx Dios gunreni. ²⁸ Dxejc gudääz Simeón baze'ga, gusloj calä'pni xpala'n Dios, räjpni:

²⁹ Dad, asajc gusaanlu guetä con yälrbedxilajz, sa'csi abasooblu nani bia'n diidx gunnäjlu xmoslu.

³⁰ Sa'csi abahuiloä nani siädguslaa nuurnu neñ dojl,

³¹ ni abasujlu nez loj guiraa rebeñ guedxliuj.

³² Laani najc bianij ni susanij loj rebejn ni di gac xpejn Israel, näjza nani gac xpala'n rexpejnlu guedx Israel, lajdxlu.

³³ Bidxeloj José näjza xnan Jesús rediidx ni canii Simeón xcuent baze'ga.

³⁴ Dxejc benle' Simeón yejcreni, dxejc räjpni lo Marii xnan Jesús:

—Bahuii gan; baze're biääd te loj rexpejn Israel chu reni sibälaz xtiidxni, te chuzä reni sililajz xtiidxni. Laani gacni te seen nani sibälaz bejn, ³⁵ te si'c jienloj xhi xhigab rujn cade tej rexpejn Israel neñ lastooreni. Dxejcti par luj sajcnı asdoo chääz te spaad lastoolu, sa'csi gac-hiunduxh lastoolu.

³⁶ Suga'za te nane' ni laa Ana ro'c, rniini xtidx Dios xcuent recos ni churu gac. Najcni xindxa'p Fanuel, ni najc famıl xten Aser. Anajcni beñgolduxh. Bachnaani che najcni dxaphuin, luxh gajdztis ijz guläznäjni chääłni che bia'nni biuud. ³⁷ Najcni te gunabiuud ni yu' tajbitajp ijz. Diruni guirii guidoro, ro'ctis yu'ni dxej, yääl te yu'tisni lo Dios con yälrucua'n näjza yälrbedx-riab lo Dios. ³⁸ Che gubigni lojreni lagajc dxejc, badeedni xquixtios lo Dios sa'csi abidzujñ tej ni guslaa rebejn lo dojl. Dxejc gusloj caniini diidx xcuent báz Jesús loj guiraa renani cabäjz yälruslaa xten Jerusalén.

Che gubi'reni guedx Nazare't

³⁹ Che gulujx bejn xcuzejnı guiraa recos ni caj lo xquijt Dios gunreni, gubisacreni Galilee, lo guedx Nazare't, lajdxreni. ⁴⁰ Gunıs biuxe'ga, guc nadaanni, guc nasıñruzani sa'csi cayacnäj Diosni.

Che biu' Jesús guidoro

⁴¹ Casob ijz rij rexcuzejn Jesús guedx Jerusalén te rinäreni te gojn xten lanij pascw. ⁴² Che basa' Jesús tzubitio'p ijz, huij guiraareni guedx Jerusalén si'c najc costumbr gac lanijga. ⁴³ Che gulujx lanijga, gubisacreni. Bia'n Jesús guedx Jerusalén, luxh nicla xnanni niclaza José direni niacbee bia'nni. ⁴⁴ Bejnreni xhigab pet siädsanäjni rebeñsa'ni. Si'c guzejreni tebdxej, dxejc gudiılrenini loj resa'reni, näjza loj reni rumbeereni, ⁴⁵ direni nidxälni. Dxejc gubisacreni guedx Jerusalén te huitiılrenini ro'c.

⁴⁶ Choñ dxej gudiılrenini dxejc bidxälrenini neñ guidoro, sobga'ni nez galäıi rebejn ni najn leiı, cacuadiajgnı xtiidxreni, cayujnzani yälgunabdiidx lojreni. ⁴⁷ Luxh guiraareni cacuadiajg xtiidxni, cadxeloduxhreni yälınajñ xtenni, näjza rediidx ni cagudzu'ni lojreni. ⁴⁸ Che bahuii rexcuzejnı lojni, bidxelojreni. Dxejc räjp xnanni lojni:

—Xi'nä, çhıcient bennäjlu nuurnu scree? Narä näjza xtdalu cayunduxhnu xhigab caguılnu luj nezree, nezre'c.

49 Dxejcti räjp Jesús lojreni:

—¿Xhicuent caguilltu narä? ¿La ditu gan riäj]l gunä xtzun Xtradä, ä?

50 Luxh laareni direni niacbee rediidx ni guniini lojreni.

51 Dxejcti gubinäjnireni guedx Nazare't, sanuuni rusoobni xtiidxreni. Luxh Marii guluchetisni guiraa recosre neñ lastooni. 52 Duurtis gunis Jesús, caroobruza xcälñajnni. Sanälajz Diosni, sanälajzza guiraa rebejnñi.

3

Yälrusule' Juan ni rutiobnis

(Mt. 3:1-12; Mr. 1:1-8; Jn. 1:19-28)

1 Neñ redxey cheni agujc tzuun ijz najc Tiberio César reii, Poncio Pila't najc gobernadoor xten Judea; Herodes najc gobernadoor xten Galilee; Felipe, bejtz Herodes najc gobernadoor xten Iturea näjza Traconite; Lisantias najc gobernadoor xten Abilinia. 2 Lagajc neñ redxeyga Anás näjza Caifás najc rebixhojzro xten guidoro guedx Jerusalén. Neñ redxeyga biääd xtidx Dios lo Juan, xi'n Zacarií cheni rbäjzni nez lo reyubijdz. 3 Ni'c cuanzaj Juan guideb nez reyuj xten gueu Jordán, ro'c basule'ni xcuent yälrusiechljaz, yälrobnis ni nanab gunreni te gudzucaj Dios xtoj]reni. 4 Si'cni caj lo xquijtz Isaías, dade' ni gunii xtidx Dios, cadre räjpni:

Riejn xse' te ni rbedxa' nez loj reyubijdz:

“Colyunsac xnezyuj Dad, colslii rexnezyulajzni.”

5 Guiraa cadre sojb gueed sidxe'ni,

guiraa relom sibicajreni,

guiraa renezyuj ni xhet naliidi, siliireni,

guiraa renezyudxuudx, saccsa'creni.

6 Dxejcti guiralii bejn suhui loj nani guxhal Dios.

7 Che bahuii Juan siääd xhidalduxh bejn te guirobnisreni, räjpni lojreni:

—iLa'tu benguijdx ni najc si'c bälñialajz! ¿Chuni'c balijdxtu guxuntu loj xcälrdxe'ch Dios ni siädgajxh, ä? 8 Colguchaa xmoodtu te si'c fii bejn guliini abasiechljaztu. Na'c cuentis rniitu lagajc neñ lastootu “Abram najc xtradnu”, sa'csi narä rniä lojtu, sajz xca' Dios reguijre te con laareni guncheeni bejn gac rexagdoo toAbram. 9 Aguibyajg naga' cuä' xlobaa reyajg; ni'cni guiraa reyajg nani di ninexhsa'c xcaj lojni, sidinreni te checreni.

10 Dxejcti gunabdiidx rebejn lojni, räjpreni:

—¿Xhini'c nanab jiennu?

11 Dxejcti badzu' Juan diidxre räjpni:

—Ni rajp tio'p xhajbni, sugudeedni tejni lo bejn ni xhet rajpdi. Sigajcza gun reni rajp xhi gaureni, quisrenini loj ni xheti xhi gauni.

12 Näjza gaii bejn nani rusquijx xcuent reimpuet bidzujñ lojni te guirobnisreni, dxejcti gunabdiidxreni lo Juan räjpreni:

—Dad, mast; ¿Xhini'c nanab jiennu?

13 Räjp Juan lojreni:

—Na'c gusquijxtu bejn maazdi ni nungäj]l quiixreni.

14 Näjza gaii resoldaad gunabdiidx lojni räjpreni:

—¿Nurnu a'? ¿Xhini'c nanab jiennu?

Dxejcti räjpni lojreni:

—Na'c guchejbtu bejn; na'c gäbtu chale'ctu xcälquij bejn ni xhet bejndi parsi guniidxreni meel lojtu; colbalaznäj nani rujntu gaan.

15 Cadxeloj rebejn, cayujñreni xhigabduxh, naareni, “pet Juan najc Crist ni jiäd.” 16 Dxejcti badzu' Juan diidxre, räjpni loj guiraa rebejn:

—Guliipac rutiobnisä la'tu con nis, luxh siääd tej ni sajcru loä, nani nicla gac surloä, cuää xcura'chni. Laani sutiobnisni con Sprit Dxiän xten Dios te cuääzni nen lastootu näjza con guiboo, sa'csi rajpruni yälrnibee loä. ¹⁷ Aca'ni pal te gusiani triuu te cuääni triusa'c lo guijxh te cucheeni triuu nen ngodx xtenni, dxejcti reguixhtriuga suze'cnini lo bajl ni rejc par tejpas.

¹⁸ Rediidxre näjza xhidajl yälrulijdx gunii Juan te basule'ni redidxcoob loj rebejn. ¹⁹ Näjza lo Herodes ni najc gobernadoor basule' Juan diidx, gudilnäjnini sa'csi xhet laadi cayujnni, sa'csi rbäznäjni Herodías, chääl bejtzni Felipe, näjza xcuent sgaii dojl ni bejnini. ²⁰ Di Herodes niu xtidx Juan, alga bejnini stee dojl, basälni Juan nen latzguiib.

Che gurobnis Jesús

(Mt. 3:13-17; Mr. 1:9-11)

²¹ Che batiobnis Juan rebejn, näjza Jesús birobnis. Cheni cabedx-canabni lo Dios, bixal xhaguibaa, ²² dxejc biäjt Sprit Dxiän xten Dios si'c te palom, bidzujnni cadro suga' Jesús. Dxejc xhaguibaali biejn xse' te ni räjp:

—Luj, najclu xi'nä ni sanälazä. Rbanälazduxhä luj.

Resa' Jesús

(Mt. 1:1-17)

²³ Yu' Jesús galbitzoo ijz che gusloj cayujnni dzuun ni badeed Dios gunni. Rchalo rebejn najcni xi'n José, xi'n Elí. ²⁴ Elí gujc xi'n Matat. Matat gujc xi'n Leví. Leví gujc xi'n Melqui. Melqui gujc xi'n Jana. Jana gujc xi'n José. ²⁵ José gujc xi'n Matatías. Matatías gujc xi'n Amós. Amós gujc xi'n Nahum. Nahum gujc xi'n Esli. Esli gujc xi'n Nagai. ²⁶ Nagai gujc xi'n Maat. Maat gujc xi'n Matatías. Matatías gujc xi'n Semei. Semei gujc xi'n José. José gujc xi'n Judá. ²⁷ Judá gujc xi'n Joana. Joana gujc xi'n Resa. Resa gujc xi'n Zorobabel. Zorobabel gujc xi'n Salatiel. Salatiel gujc xi'n Neri. ²⁸ Neri gujc xi'n Melqui. Melqui gujc xi'n Adi. Adi gujc xi'n Cosam. Cosam gujc xi'n Elmodam. Elmodam gujc xi'n Er. ²⁹ Er gujc xi'n Josué. Josué gujc xi'n Eliezer. Eliezer gujc xi'n Jorim. Jorim gujc xi'n Matat. ³⁰ Matat gujc xi'n Leví. Leví gujc xi'n Simeón. Simeón gujc xi'n Judá. Judá gujc xi'n José. José gujc xi'n Jonán. Jonán gujc xi'n Eliaquim. ³¹ Eliaquim gujc xi'n Melea. Melea gujc xi'n Mainán. Mainán gujc xi'n Matata. Matata gujc xi'n Natán. ³² Natán gujc xi'n David. David gujc xi'n Isaí. Isaí gujc xi'n Obed. Obed gujc xi'n Booz. Booz gujc xi'n Salmón. Salmón gujc xi'n Naasón. ³³ Naasón gujc xi'n Aminadab. Aminadab gujc xi'n Aram. Aram gujc xi'n Esrom. Esrom gujc xi'n Fares. Fares gujc xi'n Judá. ³⁴ Judá gujc xi'n Jacob. Jacob gujc xi'n Isaac. Isaac gujc xi'n Abraham. Abraham gujc xi'n Taré. Taré gujc xi'n Nacor. ³⁵ Nacor gujc xi'n Serug. Serug gujc xi'n Ragau. Ragau gujc xi'n Peleg. Peleg gujc xi'n Heber. Heber gujc xi'n Sala. ³⁶ Sala gujc xi'n Cainán. Cainán gujc xi'n Arfaxad. Arfaxad gujc xi'n Sem. Sem gujc xi'n Noé. Noé gujc xi'n Lamec. ³⁷ Lamec gujc xi'n Matusalén. Matusalén gujc xi'n Enoc. Enoc gujc xi'n Jared. Jared gujc xi'n Mahalaleel. Mahalaleel gujc xi'n Cainán. ³⁸ Cainán gujc xi'n Enós. Enós gujc xi'n Set. Set gujc xi'n Adán. Adán gujc xi'n Dios.

4

Che biricaj bendxab loj Jesús

(Mt. 4:1-11; Mr. 1:12-13)

¹ Jesús, sa'csi rbäjz Sprit Dxiän xten Dios lastooni, biunejzni gueu Jordán, dxejc huinä Sprit Dxiän xten Diosni lo reyubijdz. ² Ro'c bia'nni tiuu gubijdx,

tiu guxhijn. Ro'c bidzujn bendxab ni rnibee te rrlajzni gunni gusoob Jesús xtiidxni. Luxh calaan Jesús, sa'csi gajdni gau guiraa nen redxejga. ³ Dxejc räjp bendxab lojni:

—Palga guliilu Xi'n Dioslu, gunibee gac reguijre yätxtiil.

⁴ Badzu' Jesús diidx lojni räjpni:

—Acaj loj reguijtz xcuent Dios: “Xhet ganaxdi yätxtiil gun sajc guibajn bejn, näjza guiraa diidx nani rnii Dios sujn guibajn bejn.”

⁵ Dxejcti huinä bendxab Jesús jiaa yejc te dajn. Teratbäztis baluilojni guiraa reguedxro ni tre' lo guedxliuj. ⁶ Dxejc räjp bendxab lojni:

—Narä sunidxä guiraa yälrnibee näjza reyäl'nasa'c ni yu' loj reguejdxga sa'csi xtenä guiraareni, luxh sajc gudedäni lo chutis ni rrlazä. ⁷ Palga luj suzuxhijblu loä, guiliä'plu xpala'nä, guiraani sajc xtenlu.

⁸ Dxejc Jesús badzu' diidx, räjpni lojni:

—Acaj loj xquijtz Dios: “Dad Xtiostislu ganlu, luxh lojtisni chulu gunlu dzuun.”

⁹ Dxejcti huinä bendxabni lo guedx Jerusalén, huinäni jiaa yejc xques guidoro. Dxejc räjp bendxab lojni:

—Palga guliilu najclu Xi'n Dios, gutiäjs lo yuj ¹⁰ sa'csi si'c caj loj rexquijtz Dios:

Suxhal Dios rexanglni te ga'preni luj,

¹¹ guiniaazreni luj didi jiajblu lo guij.

¹² Badzu' Jesús diidx lojni, räjpni:

—Cajza lo rexquijtz Dios: “Na'c fallu Dad ni najc Xtioozlu.”

¹³ Che baluux bendxab rextiidxni, gubicajni lo Jesús sa'csi dini niujn gaan nusoob Jesús xtiidxni. Guläjzni guidzujn stee dxej te gusacsíruni Jesús.

Gusloj Jesús cayujn xtzuunni

(Mt. 4:12-17; Mr. 1:14-15)

¹⁴ Dxejc gubi' Jesús lo rexyuj Galilee räjpni yälrnibee xten Sprit Dzan. Bire'ch diidx xcuentni guiraa nen reguejdx ni tre' nejzga. ¹⁵ Ruluiini nen reguidobáz luxh guiraa rebejn rliä'p xpala'nni.

Jesús guyu' guedx Nazare't

(Mt. 13:53-58; Mr. 6:1-6)

¹⁶ Dxejcti huij Jesús guedx Nazare't cadro gulaani. Che gojl dxej ni rusilajz rexpejn Israel, biu'ni nen guidobáz sigajc ni rujnpani, dxejc huisuliini te bilni ¹⁷ reguijtz xten Dios. Badeedreni lojni guijtz ni bacuaa Isaías; cheni baxhalni guijtzga, bidxalni cadro rnii scree:

¹⁸ Sprit Dzan xten Dios suganäj narä,

sa'csi agule Dios narä te gusule'ä xtidxcoobni lo rebenprob.

Baxhalni narä te gusiaca lastoo renani di lastooreni cuedxi,

te gusule'ä yälruslaa lo rebejn ni yu' lo dojl,

te gusiaca baloj reben lotiä'p, te guslaä reben ni cadejd trabajw,

¹⁹ te gusule'ä abiu' ijzsa'c che rulaslajz Dios rebejn.

²⁰ Dxejc basäu Jesús reguijtzga, badeednini loj bejn ni cayacnä nen guidooga, dxejc gurejni. Sa'csi guiraa rebejn ni sobga' nen guidooga cahuidzu'tzreni lojni, ²¹ gusloj guniini, räjpni lojreni:

—Lagajc nadxej guzobj rediix ni caj lo reguijtzre nez loj guiraatu.

²² Guiraareni sarü guniireni xcuent Jesús, bedxeloduxhareni redixsaruduxh ni guniini lojreni. Gunabdiidxreni loj sa'reni, räjpreni:

—¿La et xi'ndi José dade're, ä?

²³ Dxejc räjp Jesús lojreni:

—Siniipactu rediidxre loä: “Doctoer, basiajc lagajc luj”; siniizatu loä: “Recos ni biejn diajgnu bejnlu nez guedx Capernaum, lagajc recosga bejn nez ree cadro najc lajdxlu.”

²⁴ Dxejc huinuu xtiidxni, räjpni lojreni:

—Rniliäpac lojtu, nicla tej redade' ni rnii xtidx Dios, di reben lajdxreni jiu xtiidxni. ²⁵ Luxh rniliä lojtu, che gubajñ Elías lo guedxliuj, guyu' xhidajñ gunabiuud guedx Israel che di nisguij ñajb choñ ijz garol, dxejc guyu' yälrianduxh guideb guejdxga. ²⁶ Luxh di Dios nuxhal Elías rolijz nicla tej regunabiuud ni guläjz guedx Israel, alga baxhalñini lo benzijz, rolijz te gunabiuud ni rbäjz Sarepta, gajxh guedx Sidón. ²⁷ Sigajcza che gubajñ Eliseo lo guedxliuj, guyu' xhidajñ beñ racxhuu ni rañ tiejxhrene guedx Israel, luxh dini nusiajc nicla tejreni, alga basiajcnini dade' ni laa Naamán, ni siääd te guedxzijz ni laa Siria.

²⁸ Che biejn diajg reni sobga' neñ guidoo rextidx Jesús, bidxechduxhrene, ²⁹ huisuliireni, gulääreneni neñ guejdxga. Dxejc huinäreneni yejc dajn cadro tre' guejdxga cadro yu' te balaro, te ro'c rlanjreni nustejbreneni. ³⁰ Dxejc Jesús sigaj gudejñni galäiireni, sä'tini ste'ca lajt.

Gulää Jesús beñdxab lastoo te dade'

(Mr. 1:21-28)

³¹ Dxejc huij Jesús guedx Capernaum, te guejdx xten Galilee. Ro'c gusloj cagusule'ni diidx loj rebejñ che gojl dxej ni rusilajz rexpejñ Israel.

³² Bidxeloduxhrene xtiidxni sa'csi rusule'ni si'c te bennajñ, si'c te ni rnibee.

³³ Neñ guidooğa suga' te dade' ni rbäjz te beñdxab neñ lastooni. Guredxa'ni ³⁴ räjpni:

—¡Aii! ¡Basaan nurru! ¿Xhicuent riächu'lu loonu Jesús ni siääd Nasare't? ¿La siäädlu te gunitlojlu nuurnu, ä? Narä numbeälu, nanä najclu Xin Dxan Dios.

³⁵ Gudidxa' Jesús lo beñdxabga, räjpni lojni:

—Basäu ro'lu, birii lastoo niguiire.

Dxejcti beñdxabre basäl niguiiga lo yuj nez loj guiraareni, dxejc biriini neñ lastoo dade'ga, per xhet bejñdini dade'ga. ³⁶ Bidxeloduxh rebejñga, dxejc gusloj caniireni lo sa'reni, räjpreni:

—¿Xhi diidx najc redee? Bahuii xho rnibee dade're rebeñdxab con yälrnibee, luxh rusooß rebeñdxab xtiidxni, riireni lastoo bejñ.

³⁷ Dxejc gusääd xtidx Jesús lo guiraa reguejdx ni tre' guideb gabi guejdxga.

Rusiajc Jesús xnan xueerg Pedr

(Mt. 8:14-15; Mr. 1:29-31)

³⁸ Birii Jesús guidobäz, huijni rolijz Simón. Dxejc naga' xnan sueerg Simón, cayacxhuuni, yu'ni xliaduxh. Sas gunabduxhrene lojni te gusiajcnini.

³⁹ Gubig Jesús loj nane'ga, gudidxa'ni xliaaga, luxh lagajc orga biriini xliaa. Dxejc huistiegajcni, gusloj cayujñni mandaad, cahuiinireni.

Rusiajc Jesús xhidajñ yälracxhuu

(Mt. 8:16-17; Mr. 1:32-34)

⁴⁰ Lañ ni cayäáz gubijdx, guiraa reni rajp beñracxhuu ni rajc garen garen yälracxhuu biädnäreni rebejñga lo Jesús. Dxejc laani batzuubni ñaani yejc tejgareni, dxejc biajc rebeñracxhuuga. ⁴¹ Loj rebeñracxhuuga, yu'reni birii beñdxab neñ lastooreni, rbedxa'reni räjpreni:

—Luj najclu Xi'n Dios.

Luxh Jesús gudilñajni rebeñdxab, dini nusaa niniireni sa'csi laareni najñreni najcni Crist ni cabäjzreni.

*Rusule' Jesús xtidx Dios**(Mr. 1:35-39)*

⁴² Che bianij, biriini lo guejdx, huijni te lajt cadro rut rbäjzdi. Niluxh gudiil rebejn, dxejc bidzujnreni cadro suga'ni. Rlajzreni nusuääzreneni te di nuini. ⁴³ Dxejc Jesús räjp lojreni:

—Nanab cha'a chasule'ä rextidx xcuent xcälrnibee Dios xhidajlruza guejdx, ni'cni baxhalpac Dios narä.

⁴⁴ Dxejc si'ctis cuanzaj Jesús basule'ni xtidx Dios nen guiraa reguidobäz nen reguejdx xten Galilee.

5*Che gunaazreni xhidajl bäj**(Mt. 4:18-22; Mr. 1:16-20)*

¹ Cheni suga' Jesús ro' nis ni laa Genesare't, gubig xhidajl bejn lojni te jiejn diajgreni xtidx Dios. ² Dxejc bahuii Jesús tio'p barcw ni suga' ro' nisga, rud yu'di nenreni sa'csi rebejn ni rniaaz bäj abiriireni nen rebarcw te caguiibreni xquijxhreni ro' nisga. ³ Dxejc biu' Jesús nen te barcw ni najc xten Simón, dxejc gunab Jesús chää barcwga lo nis te la', te guibicajni ro' yuj. Dxejc gurej Jesús nen barcwga, ro'cli guslojni caguluini rebejn. ⁴ Che gulujx xtiidxn, räjpni loj Simón:

—Huinä barcw cadro jäätro, colcuua xquijxhtu lo nis te guiniaaztu bäj.

⁵ Räjp Simón lojni:

—Mastr, guideb yääl biennu dzuun, luxh dinu niniaaz nicla tej bäj, niluxh naj agunibeelu gusalpacnu guijxh lo nis.

⁶ Cheni basälreni xquijxhreni lo nis, gunaazreni xhidalduxh bäj, dxejc guslojli caräjs xquijxhreni. ⁷ Dxejc bejnreni seen loj resa'reni ni yu' nen stee barcwga te jädyacnäjreni. Bidzujntireni, bachajreni guiro'p barcw. Gudxaduxh rebarcw, ameer niääzreni nen nis. ⁸ Che bahuii Simón Pedr recosre, bazuxhijbni nez loj Jesús, dxejc räjpni:

—Gubicaj loä Dad, sa'csi narä nacä te bendojl.

⁹ Si'c guni Simón sa'csi bidxejb laani näjza guiraa rebejn ni yunäjni sa'csi gunaazreni xhidalduxh bäj. ¹⁰ Näjza Jacob näjza Juan, rexi'n Zebedeo, ni runnäj Simón dzuun, näjzareni bidxejbreni. Per Jesús räjp lo Simón:

—Na'c guidxejblu, najli gusloj cuedxlu bejn lacuaa ni guiniaazlu bäj.

¹¹ Dxejc, che bidzujnäjreni rebarcw ro' nis, basa'reni guiraa xhixtenreni, te sanajreni Jesús.

*Basajc Jesús te bejn ni ral tiejxhni**(Mt. 8:1-4; Mr. 1:40-45)*

¹² Cheni guyu' Jesús tej reguejdx, bidzujn te bejn lojni ni rajc lepra te yälguidxduxh ni ral tiejxhni. Che bahuiini loj Jesús, bazuxhijbni, basajbni lojni lo yuj, räjpni lojni:

—Dad, palga rlajzlu, sajc gusajclu narä.

¹³ Dxejc batzuub Jesús naani yejcn räjpni lojni:

—Rlazä jiajclu. Susiacälu.

Che guniini redidxre, biagajc bej racxhuuga. ¹⁴ Dxejcti gunibee Jesús lojni rut lojdi gäbni xhi guzajcni. Räjpni lojni:

—Huijtis lo bixhojz te fiini lojlu, huisa'nza gojn xcuent ni biajclu si'cni rnibee xleii Moisés, te filoj rebejn abiajclu.

15 Luxh xpala'n Jesús sanuutis cayä'pruni, guixe-guixee care'ch diidx xcuentni. Rdojpza xhidalduxh bejn te gucuadiajgreni xtidx Jesús nájza te gusaijncni yälracxhuu xtenreni. 16 Yu'za huält riunejz Jesús rijni relajt cadro ruti rebejn, te ro'c rbedx-rniabni lo Xtadni Dios.

Basiajz Jesús te bejn ni digacdi guiniib

(Mt. 9:1-8; Mr. 2:1-12)

17 Te dxej lalni caguluüini rebejn, nejzga sobga' gaii farisee nájza gaii bejn ni ruluii leii garen-garen reguejdx, siädreni guideb nez reguejdx xten Galilee, nájza región Judea, nájza guedx Jerusalén. Dxejc huenliisi rluijoj suganäj xcälrnibee Dios Jesús te rajc russiajncni rebenracxhuu. 18 Dxejz bidzujñ gaii dade' nuureni lo te lonbáz te bejn ni di gacdi guiniib, rlajzreni gusiu'renini nen' yu' te quixhrenini nez loj Jesús. 19 Niluxh direni nidxäl canejz niu'reni sa'csi nadäduxh ro'c sa'csi tre' xhidajl rebejn. Dxejz huäpnäjrenini yejc yu'ga, badzucajreni gaii tej, dxejz basajbreni xloon beñracxhuuga yejcli yu'ga te gujc bidzujñni nez loj Jesús. 20 Che bahuii Jesús yälrlililajz xtenreni, räjpni loj beñracxhuuga:

—Dade', agubicaj xtojllu.

21 Dxejz rebejn ni ruluii leii nájza refarisee gusloj cayujnreni xhigab, naareni: “¿Chucha niguiire ni caniyajni Dios con rextiidxni? Ruti te bejn ni sajc gudzucaj xtojñ rebejn, Diostis rudzucaj dojl.”

22 Dxejz gucbee Jesús xhi xhigab cayujnreni, ni'c räjpni lojreni:

—¿Xhicuent rujntu xhigab si'c nen' lastootu? 23 ¿Xhini'c najc guyasiru guiniini: “Agubicaj rextojllu”, o guiniini: “Huistie, guzaj”, ä? 24 Mbaj naj, suluiä nez lojtu Xi'n Dios ni gujc Xi'n Niguii rajp yälrnibee, yälñadip lo guedxliujre te gudzucajni xtojñ rebejn.

Dxejz räjpni lo bejnga ni digacdi guiniib:

—Lojlu rniä, jhuistie, guläs xloonlu, huij rolizjzlu!

25 Lagajc dxejz nez lojreni huistiegajc bejn ni digacdi guiniib, guläsni xloonni cadro naga'ni, dxejz siini rolizjni, calá'pni xpala'n Dios.

26 Guiraareni rdxeloduxhreni recosga, dxejz guslojreni calá'preni xpala'n Dios, rdxejbliireni räjpreni:

—Abihuiinu cosro, cos ni guidxeloj bejn nadxej.

Rbejdx Jesús Leví

(Mt. 9:9-13; Mr. 2:13-17)

27 Che gudejd gulujx recosre, birii Jesús ro'c. Dxejz bahuiini lo te bejn ni rusquijx xcuent impuest, nani laa Leví. Sobga'ni lo te mex cadro rusquijxni impuest; ro'c bahuii Jesús lojni. Räjp Jesús lojni:

—Gudanajl narä.

28 Dxejz huisu Leví, basa'nni guiraa recosga, dxejz sanajlni Jesús.

29 Dxejz bejn Leví te lanij rolizjni par Jesús. Biäd xhidajl bejn ni rusquijx xcuent impuest nájza sgaii bejn; sobganäjnireni lo mex. 30 Dxejcti refarisee nájza rebejn ni ruluii leii guslojreni cayeinäjreni rexpejñpac Jesús, räjpreni:

—¿Xhicuent raunäjtu, ränäjtu rebejn ni rusquijx impuest nájza rebendojl, ä?

31 Dxejz badzu' Jesús diidxre, räjpni lojreni:

—Rebejn ni nadaan di guiquiini te doctoor, ganaxtis rebejn nani racxhuu rquiinreni te doctoor. 32 Dina niädtedxä rebensa'c, narä biädtedxä rebendojl te gusiechljazreni.

Gunabdiidxreni loj Jesús xcuent yälrucua'n

(Mt. 9:14-17; Mr. 2:18-22)

³³ Dxej gunabdiidx rebejn ga loj Jesús, rájpreni:

—¿Xhicuent lacti rucua'n rexpejn Juan nájza rexpen refarisee, lacti rbedx-rniabreni loj Dios; niluxh rexpejn paclu alga rajwreni, rá'reni?

³⁴ Badzu' Jesús diidxre lojreni, rájpreni:

—¿La sajz gucua'n rebejn ni yu' lo te sa' lałni yunäjreni bi'n, ä? ³⁵ Niluxh sidzujn dxej cheni sibicaj bi'n lojreni, dxej sii sucua'nreni.

³⁶ Guniiza Jesús cuentre lojreni, rájpreni:

—Rut rucuaadi te remiend ladcoob loj te ladyujxh, sa'csi che rxu'n ladcoob rutiäjzni ladyujxhga, dxej xhiroobruni guiräjs, luxh diza ladcoob guchaag lo ladyujxh. ³⁷ Di gacdi gusälni bincoob neñ te guidbiejw sa'csi bincoobga sutiäsa'ni guidbiejwga dxej sixe' binga, sixijnza guidbiejwga. ³⁸ Ni'cni nanab gusälni bincoob neñ guidcoob si'c sigucheeza guiro'preni. ³⁹ Luxh nicla tej bejn ni agu' bin ni yu' agujc xchej rlaiz yä bincoob, sa'csi säjbni: “Bin ni yu' agujc xchej najc huenru.”

6

Rutie' rexpejn Jesús triuu dxej nani rusilajzreni
(Mt. 12:1-8; Mr. 2:23-28)

¹ Te dxej ni rusilajz rexpejn Israel sasaj Jesús nájza rexpejn pacni nez loj reyuj cadre naga' triuu. Dxej, sa'csi calaanreni gusloj caläädxreni doj lo triuu te cayajwrenini. ² Dxej gunabdiidx gaii refarisee ni najc beñguidoo, rájpreni lojreni:

—¿Xhicuent rujntu dzuun ni di nungäjł guntu che rajł dxej ni rusilajznu?

³ Dxej rájpre Jesús lojreni:

—¿La gajdte goł loj reguijtz xhi bejn toDavid cheni calannäjni rebejn nani sanäni, ä? ⁴ Biu'ni neñ xquidoo Dios, gudajwni yätxtiil nani di nungäjł gau bejn sa'csi xtebtis rebixhojz rajc rajwni, luxh badeedni yätxtiilga gudajw resa'ni.

⁵ Rájpre Jesús lojreni:

—Sigajcza narä, Xi'n Dios ni gujc Niguii, rnibeä dxej ni rusilajztu.

Niguii ni nabijdz naani
(Mt. 12:9-14; Mr. 3:1-6)

⁶ Che gojł stee dxej ni rusilajz rexpejn Israel, biu'ni neñ te guidobäz, dxej guslojni caguluimi rebejn. Lagajc ro'c sobga' te dade' ni nabijdz naani ladbee. ⁷ Dxej remastr xten leii nájza refarisee cagula'tzreni te don la susiajčni bejn ga dxej ni rusilajzreni, sa'csi caguuilreni xho gucuaquijreni Jesús. ⁸ Niluxh laani najjni xhi xhigab cayujnreni, dxej guniini lo dade' ni nabijdz naani, rájpreni:

—¡Huisulii! ¡Gudaa nez galäiire!

Dxej huisulii bejn ga, gubigni lojni. ⁹ Dxej rájpre Jesús lojreni:

—Rlazä guiniabdidxä lojtu dee: ¿Xhini'c najc huen gunni che rajł dxej ni rusilajznu? ¿La te dzunsa'c o la te dzunguijdx? ¿La gacnäjnu bejn laa xcäl'nabajñni o la gudzucajnu yäl'nabajñni, ä?

¹⁰ Che gulujx bahuii Jesús loj guiraa rebejn ni tre' guideb gabini, rájpreni loj bejn ni nabijdz naani:

—¡Baslii naalu!

Dxej bejn ni si'c, luxh biacgajc naani. ¹¹ Dxej bidxechduxh rebejn ni tre' ro'c, gusloj canabdiidxreni lo sa'reni xhi gunnäjreni Jesús.

Gule Jesús guitzubitio'p rexpejn'pacni

(Mt. 10:1-4; Mr. 3:13-19)

¹² Neñ redxejga, huij Jesús loj te dajn te huininäjni Xtadni Dios. Ro'c gudejdni yäl cabedx-canabni lo Dios. ¹³ Che bianij lo yuj, gurejdxni rexpejn'i. Ro'c guleni tzubitio'preni te gacreni xpejn'pacni. Gulälajireni reapost. ¹⁴ Renani guleni najc Simón ni gulälajni Pedr; Andrés, bejtz Simón; Jacoob; Juan; Felipe; Bartolomé; ¹⁵ Mateo; Tomás; Jacoob xi'n Alfeo; Simón ni nagab loj rexpejn' cananista; ¹⁶ Judas, bejtz Jacoob; näjza Judas Iscariote ni guto' Jesús loj rebixhojz.

Ruluii Jesús xhidajl bejn

(Mt. 4:23-25)

¹⁷ Che biätnäjä Jesúsreni yejc dajnga, guzudxireni yejc te danbäs sa'csi suga' xhidajl bejn ro'c. Siädreni guiraa nez reguedx Judea, näjza guedx Jerusalén näjza reguejdx ni tre' gajxh nisdoo Tiro con Sidón. Rebejnga bidzujn'reni te gucuaiajgreni xtidx Jesús, te gusiajczanireni xcälracxhuureni. ¹⁸ Guiraa ni rdejzda trabajw yu' bendxab neñ lastooreni näjza reni'c biajc. ¹⁹ Guiraa rebejn' rlanj caan Jesús, sa'csi rusiajcn'i guiraareni con xcälrnibeeni.

Balijdx Jesús rebejn

(Mt. 5:1-12)

²⁰ Dxejc bahuii Jesús loj rexpejn'pacni räjpni lojreni:
—Chicbaatu, bejn' nani xheti xhixtentu, sa'csi xtentu najc cadre rnibee Dios xhaguibaa.

²¹ 'Chicbaatu, bejn' nani calaan naj, sa'csi suniidx Dios lojtu nani rniabtu.

'Chicbaatu, bejn' nani roon naj sa'csi susiäj'l Dios lajztu dxejrcu suxhijztu.

²² 'Chicbaatu, bejn' nani rdxechlajz bejn' lojtu, rbääreni la'tu te laad, rniya-jreni la'tu, luxh rbälazreni lajtu si'c te cos guijdx sa'csi rililajztu xtidx Xi'n Dios ni gujc Niguii. ²³ Colguibalajz neñ redxejga, na'c gac-huin lastootu sa'csi sunidxduxh Dios xhi xtentu xhaguibaa. Sigajcza basacs'i retoxtadgoldooreni rebejn' nani gunii xtidx Dios galoo.

²⁴ 'Probe'zatu, la'tu benrajp, sa'csi agojptu xcäl'nasa'ctu, xcäl'rbalajztu lo guedxliujre.

²⁵ 'Probe'tu nani rajp guiraloj xhixtentu naj, sa'csi sidejdtu yäl'rliaan.

'Proobzatu ni ruxhijztu naj, sa'csi sonduxhtu sidejdtu yäl'huinduxh, yäl'nalas.

²⁶ 'Probe'tu palga rliä'p rebejn' xpala'ntu naj, sa'csi si'c bejn' retoxtad-goldooreni rebejn' ni gunii didx-xhii lacuaa niniireni xtiidxpac Dios.

Chanälajzni rebejn' nani rdxe'ch lojni

(Mt. 5:38-48; 7:12)

²⁷ Räjpzani:

—La'tu ni cacuaiajgtu rextidxä rniä diidxre lojtu: colchanälajz rebejn' ni rdxe'ch lojtu, colyujn' dzunsa'c loj rebejn' ni rdxechlajz lojtu. ²⁸ Benle' yejc re-bejn' ni rgube la'tu. Gunab lo Dios xcuent rebejn' ni rcuaquij la'tu. ²⁹ Palga yu' chu rlanj quini te laad lojlu, badeedza stelaad quinni. Palga yu' chu gudzucaj xhablojiaalu, badeedza näj xcamangwlu xca'ni. ³⁰ Xhitis ni guiniabreni lojlu, badeedni; ni gudzucaj te xhi xtenlu lojlu, na'c guiniabsacluni lojni. ³¹ Sigajc ni rlanjlu gunnäjä bejn' la'tu, si'cza la'tu colyennäjä bejn'.

³² 'Palga la'tu sanälajztistu rebejn' nani sanälajz la'tu, xlia'sini, sa'csi sigajcza rujn' rebendojl. ³³ Palga guntu hueen lojtis rebejn' ni rujn' hueen lojtu, xhet laadi cayujntu, sa'csi sigajcza rujn' rebejn' ni nabajn' neñ dojl. ³⁴ Palga gud-dlaatu lojtis reni rujntu xhigab gunidxsacni lojtu, çxhi cos hueen rchalotu

rujntu? Ni rebendoj̄l rudedlaazareni loj rebejn̄ ni najnreni siguixsac ni nasääbreni. ³⁵ La'tu, nanab chanälajztu rebejn̄ ni rdxe'ch lojtu, guntu hueen lojreni, gudedlaatu loj rebejn̄, na'c gunlojtu xcasactu recos ni rudedlaatu, te si'c guroob gac nani guzalajz Dios lojtu; te si'c gactu xi'n Gueb Dios ni nabajn̄ xhaguibaa. Sa'csi si'cza najc Dios huenduxh loj reni di gudeed xquixtios lojni, najza loj rebendoj̄l. ³⁶ Colgulasajz resa'tu si'c rulasajz Xtdanu Dios guiraa rebejn̄.

Colgulasajz sa'tu

(Mt. 7:1-5)

³⁷ Räjpzani:

—Na'c guntu yälguxhtis nani rujn̄ bejn̄, naatu xhet laadi rujnni; te na'cza gun Dios yälguxhtis rextoj̄l̄tu. Na'c gucuaquijtu bejn̄ te sigajcza di Dios gucuaquij la'tu. Colgusiäjl̄-lajz dojl̄ ni rujn̄ sa'tu, te si'cza gusiäjl̄-lajz Dios rextoj̄l̄tu. ³⁸ Colgudeed loj bejn̄ ni rquiinreni te si'cza guzalajz Dios ni rquiintu. Suniidxreni xca'tu te mediid guidxadoo, sibetijp ni yu' nenni, cupe'tlini gusälreni nen̄ xpolstu. Dios suniidx lojtu lagajc con mediid ni rudedtu loj rebejn̄.

³⁹ Guniiza Jesús stee cuent räjpn̄i:

—¿La sajc guluii te bejn̄ lotiä'p nez yuj lo stee bejn̄ lotiä'p, ä? ¿La di guiro'preni guitejb̄ nen̄ te gueed, ä? ⁴⁰ Te bejn̄ ni casieed di gacdi guisiee-druni loj ni najn̄ xmastrni. Te bejn̄, che agulujx bisieedni, sajcn̄i si'cni najc mastr xtenni.

⁴¹ ¿Xhicuent cahuiilu guixhe' ni yu' baloj bejtzlu, luxh dilu fii yagro ni yu' balojlu? ⁴² O, ¿xho mood gäblu lo bejtzlu: “Guidon cuää guixhe' ni yu' balojlu”; luxh dilu gachee yu' te yagro balojlu, ä? ¡Benguijdx! Guläxgaa yagro ni yu' balojlu, dxejc sajc fisa'clu te cuääl̄u guixhbäz ni yu' baloj bejtzlu.

Ninexhsa'c ni rcaj loj te yajg sujn̄ gumbeeni yajg

(Mt. 7:17-20; 12:34-35)

⁴³ Räjpzani:

—Xheti te yagsa'c ni rudeed ninejxh ni xhet sajcdi, xhetiza te yajg ni xhet sajcdi ni rudeed ninexhsa'c. ⁴⁴ Sa'csi tebgaj reyajg rusenlojni xhi yajgn̄i xuent ninejxh ni rcaj lojni. Di bejn̄ gutie' iigw lo reyaguejch, diza bejn̄ gutiu' uub lo te yag balagrej̄n. ⁴⁵ Rebensa'c rnii didxsa'c, sa'csi xhigabsa'c yu' nen̄ lastooni. Niluxh rebenguijdx rnii ganax didxguijdx sa'csi xhigabguijdx yu' nen̄ lastooni, sa'csi ro'ni rnii nani yu' nen̄ lastooni.

Tio'p bejn̄ ni benchee tio'p yu'

(Mt. 7:24-27)

⁴⁶ Räjpzani:

—¿Xhicuent rniitu loä: “Dad, Dad,” luxh ditu gun nani rniä guntu? ⁴⁷ Guiniä lojtu chuni'c najc si'c bejn̄ ni riääd loä, rucua diajgn̄i xtidxä luxh rusoobni xtidxä. ⁴⁸ Najcn̄i si'c te bejn̄ ni benchee rolijzn̄i, ganid gudäänni jiät, dxejcti bejn̄ni cimient yejc te guilaj. Cheni biäjt nisro ro' gueuu, bidijn̄ nisro cuä' yu'ga, luxh nicla nusniibnini, sa'csi yu'ga sobgadzu'tz yejc te guilaj. ⁴⁹ Niluxh reni ruadiajg xtidxä, dxejc direni guzoob xtidxä, najreni si'c te bejn̄ ni bejn̄ xyu'ni loj yujxh, dini niujn̄ cimient xten yu'ga. Dxejcn̄i biäjt nisro, bidijn̄ni cuä' yu'ga, dxejc li gurebä'n yu'ga, gunitlojtni.

7

Basiajc Jesús xmos te beņ roman ni rnibee
(Mt. 8:5-13)

¹ Che gulujx gunii Jesús loj rebejn, huijni te guejdx ni laa Capernaum. ² Ro'c yu' te ben roman ni rnibee, yu' te mos lojni, luxh sanälazduxhni mosga. Cayacxhuduxh mosga, ameerli guetni. ³ Che biejn diajg capitán cagusä'treni Jesús, baxhalgajcni gaii bengool lo rexpejn Israel te chagajnneni Jesús jiäädni te gusajcni xmos dade'ga. ⁴ Che gubigreni loj Jesús, gusloj gunabduxhreni lojni, räjpreni lojni:

—Dade're najc beñsa'c, nungäjl gacnäjluni ⁵ sa'csi sanälajzni lajdx rexpejn Israel, luxh lagajc laani gunibee guc-chee xquidobäznu.

⁶ Dxejcti huinä Jesúsreni. Cheni siäddzungenjxhreni royu', baxhal capitánga gaii xamiigwni, gäbreni loj Jesús:

—Si'c naj capitán: “Di rlazä gotalä xtzuuunu. ¿Chu narä te jiu'lu rolizä? Xhet sacädi. ⁷ Ni'c dina niapä baloor te lagajc narä niädganä guejblu, sa'csi rajplu yälrnibeduxh niluxh narä rut nacädi. Ni'cni gunibeetis jiajc xmosä, luxh laani siacgajcni. ⁸ Sa'csi narä nacä xmos rebejn ni rnibee, luxh rnibeäza loj resoldaad. Che gäpä lo tejni: Huij rec, rijni; che gäpä loj steeni: Gudaa ree, riäädni; che gäpä loj xmosä: Bejn dee, rungajcni.”

⁹ Che biejn diajg Jesús rediidxre, bidxeloduxhni, gubiréni loj rebejn ni siädnajni, räjpni lojreni:

—Rniliäpac lojtu, nicla lo rexpejn Israel gajdna guidxälä te bejn ni rililajzduxh si'c ni rililajz capitánre.

¹⁰ Che gubi' rebejn ni huij loj Jesús rolijz capitán, bahuiireni abiajc xmosni.

Baspansac Jesús xi'n te gunabiuud

¹¹ Neņ redxejga, huij Jesús te guejdx ni laa Naín. Huinäni rexpejn pacni näjza xhidajl bejn ni sanajlni. ¹² Che bidzujjni gajxh ro' guejdxga, bahuiini sacua'tzreni te bengut, te bi'n ni najc xtebtis xi'n te gunabiuud. Xhidalduxh bejn sacua'tzni. ¹³ Che bahuii Jesús loj gunabiuudga, biani nane'ga, räjpni lojni:

—iNa'c roonlu!

¹⁴ Dxejc gubig Jesús lo rebejn ni sanä bengutga, dxejc guzudxi reni nuu bengutga. Dxejc räjp Jesús loj bengutga:

—iBi'n!, narä rniä lojlu; iHuistie!

¹⁵ Dxejc huistie bengutga, sobga'ni guslojni caniini. Dxejc badeed Jesúsni lo xnanni. ¹⁶ Che bahuiireni xhini'c gujc, bidxejbreni, bidxeloduxhreni, guslojreni calä'preni xpala'n Dios, räjpreni:

—Te niguisacduxh ni rniä xtidx Dios abidzujn nez loonu.

Caniizareni:

—Lagajc Guejb Dios abiädhuii rexpejn ni.

¹⁷ Dxejc bire'ch diidx xcuent Jesús guideb nez reguedx Judea näjza guiraa reguejdx ni tre' nejzga.

Xpejn Juan ni rutiobnis huinabdiidx loj Jesús
(Mt. 11:2-19)

¹⁸ Rexpejn pac Juan ni rutiobnis bij rediidxga lojni che yu'ni latzguiib. ¹⁹ Dxejc baxhalni gaiireni lo Jesús te sanabdiidxreni: “¿La guliipac najclu Crist ni jiääd o sibäjznu chu stee bejn, ä?” ²⁰ Dxejcti gubig rexpejn Juan loj Jesús, räjpreni:

—Juan ni rutiobnis baxhaļ nuurnu te guiniabdiidxnu lojlu: “¿La luj najc Crist ni jiaad o la sibajznu chu stee bejn?”

²¹ Lagajc dxejc che bidzujnreni, basiajc Jesús xhidajl bejn ni rajc garen-garen yalgujdx, ni yu'za reben_{nd}xab lastooreni, basiajczani baloj ni di fii. ²² Dxejcti badzu' Jesús diidxre, rajpni:

—Colchaye'tz lo Juan guiraa ni abahuiitu najza ni abiejn diajgtu. Colye'tz lojni: “Relotiä'p ruhuisac; reben_{coj} rsiasa'c; reben ni raļ guejdx tiejxhni, abiajc tiejxhni; rediagcua't riensac diajgreni; reben_{gut}, agubansacreni; luxh loj reben_{proob} nani cabajz xcälracnäj Dios riejn diajgreni rsiule' xtidx Dios xcuent xho laa bejn lo dojl. ²³ Chicbaa nani rumbee narä, nani di cuälaz narä.”

²⁴ Cheni sii rexpejn Juan, gusloj Jesús caniini xcuent Juan loj rebejn, rajpni: —¿Chuni'c huihuiitu nez lo reyubijdz? ¿La te nijt ni rusniib bej, ä? ²⁵ ¿Xhini'c huihuiitu? ¿Te bejn ni sucheduxh, ä? La'tu najntu rebejn ni sucheduxh najza reni nabansa'c, rolijz re'reii yu'reni. ²⁶ ¿Chuxhni'c biriitu huihuiitu? ¿Te niguii ni rnii xtidx Dios, ä? O'n, rniliä lojtu, luxh te ni sacduxhru loj guiraa reniguii ni rnii xtidx Dios. ²⁷ Juan najc niguii ni ruzä't rexquijt Dios cadre caj scree: Narä guxhaļä te niguii nani guinii xtidxä, te nidni lojlu, te laani guzucheeni xnezyujlu nez lojlu.

²⁸ Rniliäpac, loj guiraa rexingaan regunaa, nicla tejni gajd guiricaj ni najc te bensacduxhru nez loj Dios si'c najc Juan ni rutiobnis. Niluxh nani guxiiru sajc lo xcälrnibee Dios ni jiaad, sajcruni loj Juan.

²⁹ Che biejn diajg rebejn najza reni rusquijx impuest rextiidxni xcuent Juan, gubeereni rujn Dios yalguxhtissa'c, sa'csi abatiobnis Juanreni. ³⁰ Niluxh refarisee najza rebejn ni ruluii leiü gulälazreni nani niujn Dios par laareni, sa'csi direni nicäbj nutiobnis Juanreni. ³¹ Rajpza Jesús lojreni:

—¿Xhocha guiniä najc rebejn nani tre' naj? ³² Najcreni si'c rebixbäz nani rguijt nez lo guii cadre rdo', rbedxa'reni loj sa'reni, rniiireni: “Bielnu te bizej te guya'tu, niluxh ditu nuya'. Bielzanu te dij ni nabaduxh dxejcti dizatu nioon.” ³³ Sa'csi che biäad Juan, dini niauxha't, dizani niä' bin, luxh rajptu: “Yu' bendxab lastooni.” ³⁴ Dxejcti biälä narä, Xi'n Dios ni gujc Niguii, rauä, rä'ä. Dxejc rajptu: “Bahuilaa, dade're rauxha't, rä'zani, najcni xamiigw reben_{doj} najza rebejn ni rusquijx reimpuest xten gubier.” ³⁵ Ni'cni xcälnajn Dios huenliisi rien_{loj} loj dzuun ni rujn rebejn ni najn.

Jesús huij rolijz Simón ni najc farisee

³⁶ Dxejc tej refarisee gunii loj Jesús, rajpni:

—Jiaadlu rolizä te guidaunu.

Dxejc huij Jesús rolijzni, ro'c gurejni lo mex. ³⁷ Rbajz te gunagubejxh lo guejdxga. Che biejn diajgni satajw Jesús rolijz fariseega, bidzunnäjni te bo't guidxa se't nejxh, luxh bo'tga najc si'c onix, botsa'cni. ³⁸ Che biu' gunaaga, bidzujni lo ni' Jesús, guslojni cayoorni. Con nisbee caguiibni ni' Jesús, dxejc caguspjdzni ni'ni con xquidxejcti. Dxejc bachagro'ni ni'ni bazaazani setnejxhga ni' Jesús. ³⁹ Che bahuii farisee ni gurejdx Jesús rolijzni, recosre, bejnni xhigab: “Palga gulii najc niguiire Xi'n Dios, sacbeeni chu najc najza xho najc gunaare ni cagajn ni'ni, sacbeezani najcni te gunado_{ld}uxh.” ⁴⁰ Dxejc gunii Jesús loj fariseega, rajpni:

—Simón, yu' xhi rlazä guiniä lojlu.

Dxejc rajp fariseega lojni:

—Guniini, Dad mastr.

⁴¹ Dxejc rajp Jesús lojni:

—Tio'p bejn nazääb meel lo te bejn ni rudedlaa meel. Tej reni nazääb si'cti gaiigayuu meel. Steeni nazääb si'cti tiubitzuu meel. ⁴²Cheni di niajcdi niguijxreni xti'nreni, basiälajzni xti'n guiro'preni. Naj gunii loä, çchu tejreni sianälajzru dade'ga, ä?

⁴³Badzu' Simón diidxre lojni, räjpni:

—Rchaloä bejn ni nazääbru lojni.

Dxejc räjp Jesús:

—Laaca rniilu.

⁴⁴Dxejc gubiré Jesús, bahuini loj gunaaga. Dxejc räjpni loj Simón:

—¡Bahuii loj gunaare! Che biu'ä rolijzlu, dilu nuniidx nis te nidiib ni'ä. Per gunaare gudibnäjni ni'ä nisbee ni birii balojni, dxejc baspijdzni ni'ä con xquidxejcní. ⁴⁵Dilu nuchagro' narä, luxh laani cheli biu'ä ree, gajdni cuääz guchagro'ni ni'ä. ⁴⁶Dilu nusäl se't yecä, niluxh laani basäl'ni se't ni rlianexhduxh ni'ä. ⁴⁷Ni'cni rniä lojlu, dojl xten gunaare, luxh xhidalduxh najcreni, abadzucaj Dios redojlga sa'csi huenliisi sanälajzni Dios. Luxh rebejn ni rudzucaj Dios guxii xtoj'reni, guxiiza sanälajzreni Dios.

⁴⁸Dxejcti räjpni loj gunaaga:

—Agubicaj rextojllu.

⁴⁹Dxejc rebejn ni sobga' lo mex con laani, che biejn diajgreni rediidxre, gusloj canii lo sa'reni, räjpreni:

—¿Chuchani'c najc niguiire, ni'cni rudzucajlini xtoj' bejn, ä?

⁵⁰Räjp Jesús loj gunaaga:

—Agulaalu lo xtojllu sa'csi ahuililajzlu; huij naj, bascuexdi lajzlu.

8

Regunaa ni gucnäj Jesús

¹Dxejcti gusloj huij Jesús guiraa reguejdx näjza rerench, cagusule'ni xtidx Dios, caguluiini xcuent xcäl'rnibee Dios loj rebejn. Sanäni rexpejn'pacni ²näjza gaii gunaa ni abasiajcní, agulääni rebendxab lastooreni, näjza basiajcní xcälguijdxreni. Tejni laa Marii ni laaza Magdalen, ni gulää Jesús gajdz bendxab nen lastooni. ³Stee gunaa laa Xuan, ni najc chää! Chuza, ni ruhuii xhixten Herodes. Stee gunaa laa Susan. Guyu'za sgaii gunaa. Guiraa reni'c rudeed lagajc xhixtenreni te rio' recos ni rquineni.

Xcuent bejn ni rbe'c binij

(Mt. 13:1-9; Mr. 4:1-9)

⁴Dxejcti bire' xhidajl bejn lojni ni birii xhidajl reguejdx. Lojreni gunii Jesús con te cuent ni ruluii, räjpni:

⁵—Birii te bejn sale'c binij. Cheni cabe'cni binij, yu' binij ni bitejb cuä' nezuyj. Che sadejd rebejn baläjreni yejc binijga, biääza remane' ni rutajt xhaguibaa, gudajwrenini. ⁶Yu'za lajt bitejb binijga nen reguij cadre xheti xhidajl yuj. Che gulejn binijga, gubidzgajcni sa'csi xheti xcojp ro'c. ⁷Yu'za lajt bitejbni nez nen reyaguejch. Che gulejnni, di reyaguejch nusaan niroob gälga. ⁸Yu'za lajt bitejb binijga lo yusa'c, ro'c gucduxhni. Cheni guroobni, yu' binijga gujc te gayuu xob loj teja binij ni gule'c dade'ga.

—Che gulujx guniini scree, dxejc guniini dip räjpni:

—Palga sajc gucuadiajgtu rediidxga, colcuadiagsa'cni.

Xhicuent gunii Jesús recuent

(Mt. 13:10-17; Mr. 4:10-12)

⁹Dxejcti gunabdiidx rexpejn'pacni lojni räjpreni:

—¿Xhi säloj cuentre?

¹⁰ Dxejc räjpni lojreni:

—Lojtu ni najc rexpejnä suniidx Dios yäl'najn te gacheetu reyäl'xhiga'tz xten xcäl'ribeeni. Loj chutis stee bejn, siniä recuent lojreni te mase cadxelojreni, direni fisa'c, luxh mase cacuadiajgreni, direni gachesa'c.

Rusule' Jesús xcuent ni rbe'c binij

(Mt. 13:18-23; Mr. 4:13-20)

¹¹ Räjpszani:

—Sree säloj cuentre, rebini najc si'c xtidx Dios. ¹² Binij ni biajb lo nezyuj najc si'c rebejn ni rucua diajg xtidx Dios. Dxejc riääd bendxab, riäddzucajni rediidxga lastooreni te na'c chalilajzreni xtidx Dios, te na'cza laareni lo dojl. ¹³ Binij ni biajb neñ regui najc si'c rebejn ni rucua diajg xtidx Dios, rbaalazreni; per sa'csi xheti xlobaareni, nalajznu, direni gandzu'tz xtidx Dios, rililajzreni te bo'c, per che rsacsí rebejnreni, rbälazreni xtidx Dios. ¹⁴ Binij ni biajb neñ reyaguejch najc si'c rebejn ni rucua diajg xtidx Dios, per laj ni sanuureni xnejzreni, rijia'nreni lo recos guedxliuj, lo yäl'nasa'c ni ruhuiireni, najza rujnreni si'tis ni rlajz tiejxhreni. Reni'c rujn runijtreni xtidx Dios, ni'cni direni guzoob xtidx Dios, direni chanuu te gunreni xtzunsa'c Dios. ¹⁵ Binij ni riabj lo reyusa'c najc si'c rebejn nani rucua diajg xtidx Dios, ni rililajz diidxga guideb te lastoya ni najc hueen. Randzu'tzreni xtidx Dios, dxejc rudeedreni te yäl'nasa'c, nalajznu ruzoobreni xtidx Dios, rujnreni xtzunsa'c Dios.

Xhet yu'di ni naga'tz par tejpas

(Mr. 4:21-25)

¹⁶ Räjpszani:

—Ruti te bejn ni rucua guij te bajl dxejc rusäuni te caj yejc bajlga, dizani gusujnini dejt te loon. Alga rusoobnini neñ candilieer loj te mex te guzanijni guideb neñ yu'ga te reni jiu' fiireni lo bajlga. ¹⁷ Xhet yu'di ni yuchetzu'tzdi ni di guidzujñ dxej guiluüini; xhet yu'diza ni naga'tz naj ni di guidzujñ dxej gachee bejnni.

¹⁸ Ni'cni colcuadiagsa'c diidx; sa'csi guiraa rebejn ni rajp yäl'racbee, sajprureni yäl'najn. Luxh reni di ninuu rucua diajg xtidx Dios, lojni sibicaj naj ni abacuadiajgñi, ni rchaloni najñni.

Xnan Jesús con rebejtzni

(Mt. 12:46-50; Mr. 3:31-35)

¹⁹ Dxejc bidzujñ xnan Jesús najza rebejtzni cadro suga'ni, niluxh di niajcdi nibigreni lojni sa'csi tre' xhidalduxh bejn ro'c. ²⁰ Dxejcti huisa'n te bejn diidx loj Jesús, räjpni:

—Xnan guejblu najza rebejtz guejblu suga' rolä', luxh rrlajzreni fiireni lo guejblu.

²¹ Badzu' Jesús diidxre lojreni, räjpni:

—Xnanä najza rebetzä najc rebejn ni rucua diajg, ni ruzoobza xtidx Dios.

Basiacdxí Jesús te beduxh

(Mt. 8:23-27; Mr. 4:35-41)

²² Te dxej biu' Jesús najza rexpejn pacni neñ te barcw. Dxejc räjpni lojreni:

—Colcho' stelaad ro' nisre.

Basyu'reni barcw lo nis, sä'tireni. ²³ Cheni sadejdreni galäii nisga, gudiejs Jesús neñ barcw. Dxejc gubi' te beduxh lo nisga, luxh sa'csi lacti nadip ro'

bejga, gusloj cayu' nis neñ barcw, ameerli jiaáz barcwga lo nis. ²⁴ Dxejcti huicuaänreni Jesús, räjpreni lojni:

—¡Mastr! ¡Mastr! ¡Cayääznu lo nis!

Che gubajjni, huistieni, dxejc gudidxa'ni lo bejga näjza lo nis ni cayäsjaia. Dxejc guläjz bejga, guredxiza nisga. ²⁵ Dxejc räjpni lojreni:

—¿Con xcälirililajztu, ä?

Per laareni bidxeybreni, bidxeloduxhreni, canabdiidxreni lo sa'reni:

—¿Chuni'c najc nigiire te rnibeeni bej näjza nis, luxh rusobdiajg bej näjza nis xtiidxn?

Te beñ Gadara ni guyu' rexsprit bendxab lastooni
(Mt. 8:28-34; Mr. 5:1-20)

²⁶ Bidzujntireni lo yuj xten Gadara ni tre' stelaad ro' nis nez loj reyuj xten Galilee. ²⁷ Cheni biäjt Jesús neñ barcw baläjni lo yuj, gubig te bejn ni siääd guejdxga lojni. Agujc xchej yu' rebendxab neñ lastooni. Dini gacw xhajbni, dizani cuääz neñ yu', alga rbäjzni cadro yu' rebaa. ²⁸ Che bahuiini loj Jesús bazuxhijbni nez lojni, guredxa'ni räjpni:

—¿Xhicuent riädchu'lu loonu, luj, Jesús Xi'n Gueb Dios ni rbäjz xhaguibaa? Rniabduxhä lojlu, na'cru gusacsilu nuurnu.

²⁹ Guniini rediidxre sa'csi canibee Jesús guirii rebendxabga neñ lastoo bejnre. Agujc xchero cazob rniaaz rebendxabga bejnga ruliib rebejn ni'ni, naani con cadenguiib te guilibdzu'tzni, te xhet gundini bejn. Niluxh laani rutiugya'ni recaden, dxejc rebendxabga rinärenini nez lo reyubijdz. ³⁰ Jesús gunabdiidx lojni, räjpni:

—¿Chu laalu?

Dxejc badzu'ni diidxre loj Jesús räjpni:

—Legión najc laä.

Si'c guniini sa'csi xhidalduxh najc rebendxab ni yu' neñ lastooni. ³¹ Dxejc gunabduxhreni loj Jesús na'c guxhalsacnireni cadro biriireni. ³² Lagajc dxejc suga' xhidajl cuch cayajwreni guixa' lagajc nejzga lo te bala'. Dxejc gunab rebendxabga loj Jesús te gusaanni jiu'reni neñ recuchga. Che cuäjb Jesús, ³³ birii rebendxabga neñ lastoo dade'ga, biugajcreni neñ recuchga. Che biu'reni neñ recuch, baxuñ recuchga bitejbreni ro' te bala', dxejc białjbreni lo nis, ro'cti gujtreni.

³⁴ Baxuñ reni cayajp recuchga che bahuiireni xhini'c gujc ro'c, huisa'nreni diidx lo rebenguejdxga näjza lo reben rench. ³⁵ Dxejc biädhuui rebejn xhini'c gujc ro'c. Che bidzujnreni cadro suga' Jesús, bahuiireni loj bejn ni birii bendxab lastooni. Sobga'ni cuä' ni' Jesús, najcwni xhajbni, luxh xhetru rajcdi yejcn; dxejc bidxebduxh rebejnga. ³⁶ Sas reni bahuiioj xho gujcn, bijreni diidx xho basiajc Jesús bejn ni guyu' rebendxabre lastooni. ³⁷ Dxejc guiraa reben Gadara näjza reguejdx ni tre' nejzga, gunabreni jiunejz Jesús ro'c sa'csi cadxebduxhreni. Ni'cni biu' Jesús neñ barcw te gubisacni nejz cadro siäädni. ³⁸ Dade' ni birii rebendxab lastooni gunabni lo Jesús gusaanni chanajlnini, niluxh Jesús gunibee jia'nni, räjpni lojni:

³⁹—Gubi' rolijzlu te güilu diidx recosro ni bejn Dios xcuent luj.

Dxejc sääni, batie'chni diidx guideb lo guejdxga xhi bennäj Jesúsni.

Xindxa'p Jairo näjza te gunaa ni gudajñ xhajb Jesús
(Mt. 9:18-26; Mr. 5:21-43)

⁴⁰ Che gubi' Jesús stelaad nis, bibalajz rebejn gubi'ni, sa'csi cabäjzpacreni guibisacni. ⁴¹ Dxejc bidzujn te bejn ni laa Jairo, ni rnibee te guidobäz, bazuxhijbni nez loj Jesús, gunabni chanänini rolizjni ⁴² sa'csi yu' tejtis xindxa'pni. Yu'ni tzubitio'p ijz, luxh cayacxhuuni, ameerli guetni. Lałsi sää Jesús rolizjni, birinajl xhidalduxh bejnni, catäälirenini.

⁴³ Loj rebejnğa nadxaag te gunaa ni agujc tzubito'p ijz cayacxhuuni, cayajcni yälguidxbäii. Xlia'si abanijtni guiraa xhixtenni cua' renani rujn remeed. ⁴⁴ Gubig gunaaga dejtz Jesús te gudajnni ro' xhajbni. Lagajc dxejc biacgajcni.

⁴⁵ Dxejcti gunabdiidx Jesús räjpni:

—¿Chuni'c najc ni gudajn narä, ä?

Guiraa rebejn räjp:

—Dinu gan.

Räjpza Pedr:

—Mastr, ni yu'lu galäii reben xhidajl, luxh cagutäälireni luj. ¿Xhicuent riabdiidxlu: “¿Chu gudajn narä?”

⁴⁶ Räjppac Jesús lojni:

—Yu' chu gudajn narä, sa'csi gucbeä yu' chu basiajc xcälrmibeä.

⁴⁷ Che gucbee gunaaga anajn Jesús gudajnni xhajbni, bidxejbni, racsejslini gubigni loj Jesús, bazuxhijbni lojni. nez loj guiraa rebejn räjpni xhicuent gudajnni xhajbni näjza xho biacgajcni.

⁴⁸ Dxejc räjp Jesús lojni:

—Huij. Gulecdxilajzlu, xinda'pä. Abiajclu sa'csi huililajzlu.

⁴⁹ Lałni canii Jesús si'c bidzujn te bejn ni siäd roliz Jairo, ni rnibee te guidobäz. Räjpni loj Jairo:

—Agujt xindxa'plu. Na'cru gutajllu xtzuum Dad Mastr.

⁵⁰ Che biejn diajg Jesús rediidxga, räjpni loj Jairo:

—Na'c guidxejblu. Huililajztis te jiac xindxa'plu.

⁵¹ Che bidzujnreni rolizjni, xtebtis Pedr, Jacob, Juan näjza xcuzejn dxape'ga biunäjni nen yu'ga. Peta rebejn ni siädnajlni bia'nreni rolä'.

⁵² Cayonduxh guiraa rebejn ni sobga' nen yu'. Dxejc Jesús räjp lojreni:

—Na'c roontu, gajd dxape're guet, nagayejstisni.

⁵³ Alga baxhiznäjrenini, sa'csi anajnreni agujt dxape'ga. ⁵⁴ Dxejcti gunaaz Jesús naa dxape'ga, dip guniini, räjpni lojni:

—jDxape', huistie!

⁵⁵ Dxejc gubansac dxape'ga, huistiegajcni. Dxejc gunibee Jesús gudeedreni xhi gauni.

⁵⁶ Bidxeloduxh rexcuzajnni. Per gunibee Jesús na'c güireni diidx xhini'c gujc ro'c.

9

Ruxhal Jesús guitzubitio'p rexpejnpacni

(Mt. 10:5-15; Mr. 6:7-13)

¹ Batie' Jesús guitzubitio'p rexpejnpacni te badeedni yälrnibee lojreni te cuääreni reben dxab lastoo rebejn, näjza te gusiajcreni reben racxhuu.

² Baxhalnirenini te gusule'reni diidx xcuent xcälrmibee Dios näjza te gusiajcreni reben racxhuu. ³ Dxejc räjpni lojreni:

—Xhet chanäditu lo nejz, nicla baston, nicla bols, nicla yätxtiil, nicla meel; na'cza chanätu tio'p xhajbtu; tejtisni chanätu. ⁴ Chutis rolizj bejn cadre

guidzujntu, ro'c coljia'n cheni guiriilitu lo guejdxga. ⁵ Palga direni gusaan jiu'tu rolizreni, che jiunejztu lo guejdxga, colcuijb guxhuj ni'tu si'c te seen direni nililajz xtiidxtu.

⁶ Dxejc biriireni sääreni garen-garen reguejdx, cagusule'reni xtidx Dios, cagusiajczareni rebenracxhuu cadrotis rdzujnreni.

Xho gujt Juan ni rutiobnis
(Mt. 14:1-12; Mr. 6:14-29)

⁷ Che biejn diajg Herodes ni rnibee guiraa ni cayujn Jesús, guyu'ni yärsia', dini gan xho gunni xhigab, sa'csi yu' reni canii laa Juan ni agubansac lo rebengut. ⁸ Sgaiireni canii abaluliloj Elias. Yu'zareni canii pet laa stee niguii ni gunii xtidx Dios galoo ni agubansac. ⁹ Per räjp Herodes:

—Lagajc narä gunibeä biru' yejc Juan ni rutiobnis, ¿chuchani'c najc niguiire ni riejn diaga xhidajl didxro xcuentni?

Dxejc rlaizpac Herodes fii lojni.

Bayaan Jesús gaii mil bejn
(Mt. 14:13-21; Mr. 6:30-44; Jn. 6:1-14)

¹⁰ Che gubi' rexpejnpacni, bijreni diidx loj Jesús xhini'c bejnreni. Sas huiinä Jesúsreni te lajt cadre ruti bejn, gajxh te guejdx ni laa Betsaida.

¹¹ Che gucbee rebejn caro sääreni, huinajlrenini bidxälrenini. Che siädreni lojni huichaglojnireni, sas gusloj cagusule'ni lojreni xcuent xcälrmibee Dios. Basiajczani rebejn ni cayacxhuu.

¹² Che gusloj cayäz gubijdx, gubig rexpejnpacni loj Jesús, räjpreni lojni:

—Gojs loj rebejnre, agojl jiireni te chatilreni xhi gaureni, näjza cadre tedreni guxhijñ lo rerench, neñ reguedxbäz, sa'csi ree xhet yu'di.

¹³ Dxejcti räjp Jesús loj rexpejnpacni:

—¿La'tu colgudeed xhi gaureni!

Dxejc räjpreni lojni:

—Xhet rajpdinu, gaiitis yätxtiil näjza tio'p bäjl. Ni'ctis yu' palga dinu chasiiru xhi gau reben xhidajlre.

¹⁴ Luxh najc rebejnnga si'cti gaii mil niguii. Dxejc räjp Jesús loj rexpejnpacni: —Colyejtz lojreni cuereni xcua-xcuaareni, si'cti tiubitzugajreni te cuaa.

¹⁵ Si'c bejnrenini, sas gurej guiraa rebejnnga si'c. ¹⁶ Dxejc cua' Jesús gaii yätxtiilga näjza tio'p bäjlga, guläsni lojni xhaguibaa, badeedni xquixtios lo Dios xcuent yälrajwga. Che gulujx badeedni xquixtios gula'ni reyätxtiilga näjza rebäjlgga, dxejc sanuutis badeednini loj rexpejnpacni te gudisrenini loj rebejnnga. ¹⁷ Guiraa reben xhidaalga gudajw, gudxaj xque'reni. Dxejcti batojpreni ni bia'n bachajreni tzubitio'p dxijm yätxtilbiujy näjza bälbuijy ni bia'n.

Gunii Pedr Jesús najc Crist
(Mt. 16:13-19; Mr. 8:27-29)

¹⁸ Te dxej lañi cabedx-canab Jesús lo Dios, xtebni näjza rexpejnpacni, gunabdiidxni lojreni, räjpni:

—¿Chuni'c rnii rebejn nacä?

¹⁹ Dxejc räjpreni lojni:

—Yu'reni rnii najclu Juan ni rutiobnis; yu'zareni rnii najclu Elias; sgaiireni rnii najclu stee niguii ni gunii xtidx Dios galoo ni agubansac.

²⁰ Dxejc gunabdiidxni lojreni, räjpni:

—¿La'tu a? ¿Chuni'c rniitu nacä?

Dxejc räjp Pedr lojni:

—Luj najclu Crist Xi'n Dios ni cabääznu.

Jesús rnixгаа xho guetni
(Mt. 16:20-28; Mr. 8:30-9:1)

²¹ Dxejc gunibee Jesús lojreni, räjpni:

—Na'c gäbtu si'c lo rebejn.

²² Räjpzani lojreni:

—Nanab ted Xi'n Niguii trabajwduxh; rebengool xten guidoo, näjza rebixhojz, näjza rebejn ni ruluii xleii Moisés sibälazreni narä, naareni dina gacä Crist ni cabääznu. Sugu'treni narä Xi'n Dios ni gujc Niguii, niluxh sibansacä ni riojn dxej.

²³ Dxejc räjpni loj guiraareni:

—Palga chu tejturu rlaiz guirinajl narä, nanab jällajzni xhixtenni, te guixee guixee guntisni nani gudedä gunni. ²⁴ Sa'csi nani rlaiz guiniazdzu'tzni xcäl'nabajñni, sunijtni yäl'nabajñ lo Dios; luxh nani runijt xcäl'nabajñni xcuent xtixdä, sica'ni yäl'nabajñ par tejpas. ²⁵ Sa'csi çxhi gaan gun te bejn palga xca'ni guideb guedxliuj, luxh gunijtni xcäl'nabajñni lo Dios? ²⁶ Niluxh nani guituinäj narä näjza xtixdä, sigajcza narä, Xi'n Dios ni gujc Niguii, situinäzani cheni jäälä si'c reii guideb yälrdimbicha' xten Xtadä näjza rexanglñi. ²⁷ Guliipac rniä lojtu, yu' gaii reni suga' ree, ni di guet, suhuixgaareni xcäl'rnibee Dios.

Bachaa xho rluiloj Jesús
(Mt. 17:1-8; Mr. 9:2-8)

²⁸ Gudejdti xhujn dxej gunii Jesús diidxre, dxejru huinä Jesús Pedr näjza Jacobo näjza Juan, huijreni jiaa yejc te dajn te guredx-gunabni loj Dios. ²⁹ Lañni cabedx-canab Jesús lo Dios, bidxaa xho ruluii lojni; dxejc xhajbni gujc nolbäj, rdimbicha'lini. ³⁰ Biricajza tio'p dade' caninäjrenini. Redade'ga najc to Moisés näjza Elías. ³¹ Rdimbicha'za redade'ga. Caninäjreni Jesús xcuent xho guetni guedx Jerusalén. ³² Luxh Pedr näjza resa'ni guyuduxh bacal lojreni; che bire'ch bacal lojreni bahuiireni lo yälrdimbicha' xten Jesús näjza loj guiro'p redade' ni caninäjni. ³³ Cheni agojl juunejz redade'ga loj Jesús, räjp Pedr loj Jesús:

—Dad, Mastr, huenduxh suga'nu ree. Basaan jiencheenu choñ yue', tejni par luj, tejni par Moisés, steeni par Elías.

Luxh di Pedr gaan xhini'c caniini. ³⁴ Lañni caniini si'c, bire' te za gusloj cayajt yejreni, dxejc bidxejbreni che biu'reni neñ zaga. ³⁵ Dxejcti biejn diajgreni neñ zaga te xse' te ni gunii, räjpni:

—Dee najc Xi'nä ni sanälazä, coñcuadiajg xtiidxni.

³⁶ Che gulujx guniini rediidxga, bahuiireni sugaxteb Jesús. Dxejc niäutis ro'reni neñ redxejga, rut lojdi bijreni diidx xcuent ni bahuiireni ro'c.

Basiajc Jesús te biuux ni guyu' beñdxab lastooni
(Mt. 17:14-21; Mr. 9:14-29)

³⁷ Barayääl cheni biäjtreni yejc dajnga, xhidalduxh bejn cabäjz Jesús. ³⁸ Dxejcti te dade' ni nadxaag rebejnğa guredxa'ni, räjpni loj Jesús:

—Mastr, balaslajz narä, gudahuui xi'nä, sa'csi xtebtisni najcni xinganä.

³⁹ Luxh beñdxab rniaazni, sas ruscuedxa'nini, rajcni si'c yäl'gudixbej, rbääni bitzuñ ro'ni, rusacsíduxhniini, luxh dini gusaanni. ⁴⁰ Agunabä loj rexpejn paclu nibääreni beñdxabga, luxh di niajcdini.

⁴¹ Dxejc badzu' Jesús diidxre, räjpni:

—jBejn ni di chalilajz, benguijdx! ¿Gucli chunäätu, gucli gunä huant la'tu? jGudanä xi'nlu ree!

⁴² Dxejc che cabig biuuxga lojni, basälta' bendxabga biuuxga lo yuj, sas gusloj cayajcni si'c yälguidxbeduxh. Dxejc gudidxa' Jesús loj bendxabga, basi-acgajcni biuuxga, dxejc badeednini lo xtadni. ⁴³ Guiraa rebejn bidxeloduxh yälrnibeduxh xten Dios.

Rnii Jesús stehuält xho guetni
(Mt. 17:22-23; Mr. 9:30-32)

Lałni cadxeloj rebejn lo recos ni bejn Jesús, räjpni loj rexpejnpacni:

⁴⁴—Cołcuadiajgsa'c rediidxre, na'cza jiallajztreni, sa'csi sutedreni narä Xi'n Dios ni gujc Niguii ladznaa rebejn.

⁴⁵ Niluxh di rexpejnpacni niacbee xhi säloj rextiidxni, sa'csi Dios bacua'tznini lojreni te di niacbeerenini. Bidxejbzarenini niabiidiixreni loj Jesús xhi säloj rediidxga.

Chuni'c sajcru
(Mt. 18:1-5; Mr. 9:33-37)

⁴⁶ Guslojza rexpejn Jesús canabdiidx lo sa'reni:

—¿Chuchani'c sajcru loonu?

⁴⁷ Per gucbee Jesús xhi xhigab cayujnreni. Dxejc cua'ni te biuxbäz, bazujnini cuä'ni, ⁴⁸ räjpni lojreni:

—Chutis ni xca' te biuxe' sa'csi sanälajzni narä, naräni rca'ni luxh ni rca' narä, rca'ni xtadä ni baxhał narä. Ni najc maazru nadolajz lojtu, ni'c najc ni sajcru.

Nani di guiniyaj nuurnu, xladnu yu'ni
(Mr. 9:38-40)

⁴⁹ Dxejc räjp Juan loj Jesús:

—Mastr, bihuiinu loj te bejn ni rbää repxendxab nen lastoo bejn con xcälrnibee lajlu. Dxejc rie'tznu lojni na'cru gunni si'c, sa'csi dini sanäj nuurnu.

⁵⁰ Dxejc räjp Jesús lojreni:

—Na'c gudxojtuni, sa'csi nani di guiniyaj nuurnu, xladnu yu'ni.

Jesús gudidxa' loj Jacoob näjza Juan

⁵¹ Che siäddzujn redxej ni chää Jesús xhaguibaa, bejnini xhigab chääpacni guedx Jerusalén. ⁵² Baxhałni gaii bejn gunijd lojni chääreni te guejdx xten Samaria te satiilreni cadro jia'nreni ro'c. ⁵³ Luxh rebejn samaritan di rlaizreni gudedlaarenini te lajt cadro jia'nreni, sa'csi najnreni chääreni guedx Jerusalén. ⁵⁴ Che biejn diajg Jacoob näj Juan, tio'p xpejnpacni, si'c, sas räjpreni loj Jesús:

—Dad, ¿La rlaizlu guinibeenu jiajt guiboo xhaguibaali te guze'cni guiraa rebenguejdxga si'cni bejn Elías?

⁵⁵ Dxejc bahuii Jesús lojreni, gudidxa'ni lojreni, räjpni:

—Ditu gaan chuni'c rnibee lastootu. ⁵⁶ Sa'csi narä Xi'n Dios ni gujc Niguii dina niälä te gudzucaä xcäl'nabajn rebejn. Narä biälä te guslääreni lo dojl.

Dxejcti huijreni garenca guejdx.

Reni rlaiz niranjl Jesús
(Mt. 8:19-22)

⁵⁷ Lałni sääreni lo nezyuj, biääd te bejn gunii loj Jesús, räjpni:

—Dad, narä rlaiz jiadnalä guejblu cadrotis chää guejblu.

⁵⁸ Dxejc badzu' Jesús diidxre lojni, räjpni:

—Rebäjz rajp xpiliääreni, remane' ni rutajt rajp xpitiääzreni, niluxh narä Xi'n Dios ni gujc Niguii, dina gapä nicla te lajt cadre guscugä yecä.

⁵⁹ Dxejcti räjp Jesús lo stee bejn:

—Gudanajl narä.

Luxh laani räjpni:

—Dad, basaan suchacua'tzxaää xtadä, dxejcru jiadnalä guejblu.

⁶⁰ Dxejc räjp Jesús lojni:

—Basaan suchacua'tz rebejn ni najc si'c bengut, resabengutreni. Per luj, huij, huisule' diidx xcuent xcälrnibee Dios.

⁶¹ Dxejc räjp steeni lojni:

—Dad, rlazä jiadnalälu, niluxh basanxgaa chasadidxä resa'a ni tre' rolizä.

⁶² Dxejc räjp Jesús lojni:

—Nani ruzuj naani yejc garaad, dxejc rudzuré lojni ruhuiini nez dejtzni di gacdi gunni dzuun lo xcälrnibee Dios.

10

Ruxhal Jesús regayonbitzuu

¹ Che gulujx reni'c, gule Jesús gayonbitzuu bejn, baxhalnireni tio'pgajreni te basnijdnireni lojni loj reguejdx cadre nanab tedni. ² Räjpni lojreni:

—Guliipacni, cayacduxh cose'ch, niluxh guxii najc rebejn ni gun dzuun gutie'nini. Ni'cni colguiniab lo baxhuaan xten cose'ch te guxhalni xhidajlru bejn ni gun dzuun gutie' xcose'chni. ³ Colchäj la'tu; colhuii xho ruxhalä la'tu si'c xiil galäii recuyo't sa'csi sunnäjreni la'tu si'ctisni rälazreni. ⁴ Na'c chanätu ngodx, niclaza guijxh, niclaza xcura'chtu, luxh na'c sudxitu guininäjtu bejn lo nejz. ⁵ Cheni jiu'tu rolizj te bejn, ganiddoo colye'tz: “Sucuedxilajz reni rbäjz ree.” ⁶ Palga najcni te bejn ni rdaxglajz yälrbecdilajz sia'n xcälrbecdilajztu ro'c, luxh palga dini gac, sibi' xcälrbecdilajztu lojtu. ⁷ Coljia'n lagajc rolizj bejn cadre guidzujntu. Ro'c coltajw, colyä'za xhitis ni guniidxreni, sa'csi nani rujn dzuun, riäj l xca'ni xcuent dzuunga. Coljia'n tejtis lajt dxejtis ni chutu lo guejdxga. ⁸ Xhitis te guejdx ni jiu'tu, palga jureni la'tu, colgajw xhitis ni guniidxreni lojtu. ⁹ Colgusiajc rebenracxhuu ni yu' ro'c, colye'tz lojreni: “Abidzujngajxh xcälrnibee Dios.” ¹⁰ Palga jiu'tu te guejdx cadre di rälazreni gucuadijgajreni xtiidxtu, colrii lo nezuyj, ro'c colye'tz lojreni: ¹¹ “Guxhuj xten lajdxtu ni rcaj ni'nu, rudzu'nuni nez lojtu si'c te seen sa'csi ditu nililajz xtiidxnu. Colgacbee dee, abidzujngajxh xcälrnibee Dios lojtu.” ¹² Ni'cni rniliäpac lojtu, che gac fis xten Dios, nalasru gac fis xten Dios lo guejdxga loj ni gujc guedx Sodoma ni guyu' galoo.

Reguejdx ni di niu xtidx Jesucrist (Mt. 11:20-24)

¹³ Räjzpazani:

—iProbe'tu ben guedx Corazín! iProbe'zatu ben guedx Betsaida! Paru nuhuii rebenzajt ni gubajñ guedx Tiro näjza Sidón remilaagwr ni benä nez lojtu, pet gucli nusiechlazreni, niajcwreni ladnagas, nibejzaren i cobdäj si'c te seen abasiechlazreni. ¹⁴ Che gun Dios fis rextojl rebejn guedxliuj, guxiiru gac xfis Dios lo rebenzajt ni gubajñ guedx Tiro näjza Sidón. Fisroru gun Dios reguedx Corazín näjza Betsaida. ¹⁵ Luxh luj guedx Capernaum, rchalolu siajslu xhaguibaa, alga siajblu gabijlli, cadre gaclu fisro xten Dios.

¹⁶ Räjzpazani lo rexpejñpacni:

—Ni riu xtiidxtu, laa xtidxä ni riuni. Nani di jiu xtiidxtu, laa xtidxä ni dini jiu. Luxh ni di jiu xtidxä, laa xtiidx ni baxhaļ narä ni dini jiu.

Rbi' regayonbitzuu

¹⁷ Che gubi' regayonbitzuu bejn nani baxhaļ Jesús, rbaduxh lajzreni, räjpreni:

—Dad, näjza rebeᅇdxab rusobdiajg xtiidxnu che rusä'tnu lajlu.

¹⁸ Räjp Jesús lojreni:

—O'n. Ni'cni narä bahuiä che gunijt xcäl'rnibee beᅇdxab, bitejᅇbni xhaguibaa si'c bianij xten guzii. ¹⁹ Colgacbee. Narä runidxä yäl'rnibee lojtu te guläjtü yejc bäl näjza yejc naxejb; runidxäza yäl'rnibee te guntu gaan lo xcäl'rnibee beᅇdxab. Xhetliidi gun daan la'tu. ²⁰ Na'c guibalajztistu sa'csi rusobdiajg rebeᅇdxab xtiidxtu; colguibalajzru sa'csi acuaj lajtu lo xquijtz Dios xhaguibaa.

Bibalajz Jesús

(Mt. 11:25-27; 13:16-17)

²¹ Lagajc dxejc bibalaznäj Jesús Sprit Dxan xten Dios, dxejc räjpni lo Dios:

—Rliä'pä xpala'nlu Xtaᅇä ni rnibee xhaguibaa näjza guedxliuj, sa'csi bacua'tzlu xnezyujlu lo rebeᅇn nanduxh, per baluiilu xnezyujlu loj rebeᅇn ni najc nadolajz si'c te biuxbäz. O'n, Xtaᅇä, sa'csi si'c rlaizlu gunlu.

²² 'Guiraa recosre abaniidxlu loä Xtaᅇä. Dadtis najn chuni'c najc Xi'nni, rutru najndi chu najcni. Rutza najndi chuni'c najc Guejblu Xtaᅇä, xtebtis narä ni najc Xi'nlu, con rebeᅇn ni rlažä gumbee luj.

²³ Dxejc bahuii Jesús loj rexpejᅇpacni, räjpni lojtsireni:

—Chicbaa la'tu näjza renani ruhuii guiraa nani cahuilojtu. ²⁴ Sa'csi rniliä lojtu, balti redade' ni gunii xtidx Dios galoo, baltiza rereii rlaiz nuhuiireni guiraa ni cahuilojtu, niluxh direni nuhuiini. Rlaizreni niejn diajgreni rediidxre ni cayejn diajgtu, luxh di diajgreni niejnini.

Xcuent te behuen ni siääd Samaria

²⁵ Dxejc huisulii te mastr xten leii, huininäjni Jesús, rlaizni nuxhiidni Jesús lo xtiidxni, gunabdiidxni lojni:

—Dad, Mastr, ¿xhini'c nanab gunä te guibaᅇnää Dios par tejpas?

²⁶ Sas räjp Jesús lojni:

—¿Xhini'c caj lo guijtz xten leii? ¿Xho roļluni?

²⁷ Dxejc badzu'ni diidxre, räjpni:

—Chanälajzlu Dad, Xtioslu guideb lastoolu, guideb xaimlu, guideb xtijplu, näjza guideb xcäriejᅇnlu. Huinälažza resa'lu si'ctis ni sanälajzlu lagajc luj.

²⁸ Dxejc räjp Jesús lojni:

—O'n, laaca rudzu'lu diidx. Palga gunlu si'c, sajplu yäl'ᅇabajᅇre.

²⁹ Per mastr xten leii, rlaizni nidedbiani ni'cni gunabdiidxni loj Jesús räjpni:

—¿Chuni'c najc resa'ä?

³⁰ Dxejc räjp Jesús lojni:

—Te beᅇn laadxnu birii guedx Jerusalén, sääni guedx Jericó. Dxejc lo nezyuj biricaj gaii gubaan, gulajᅇreni guiraa xhixtenni, näjli xhajᅇbni ni najcwni. Sas gudijᅇrenini, basa'nrenini ro'c, guxii cayäädx nugu'trenini. ³¹ Gudejd te bixhojz ni siääd laadxnu, sazaj lagajc nezyujga, cheni bahuiini lojni, alga gudejdni stee laad, sä'tini. ³² Gudejdza te levita, beᅇn ni rujᅇza dzuun ᅇn guidoo. Che bidzujᅇni cadro naga' bejᅇga, gudejdni stelaad, sä'tini. ³³ Dxejcti te beᅇn Samaria, laļni sääni biaj, gudejdni nezyujga, bidzujᅇni cadro naga' bejᅇga. Che bahuiini lojni, balasajᅇzᅇni. ³⁴ Gubigni loj bejᅇga, basäļni

se't nãjza bin loj bejn ni nadxãlgujdx, dxejc batejbnini te la' lajd. Dxejc bascujiybnini dejtz lagajc xmanni, huinãnini cadro rudedlaareni yu', ro'c cuanãjnini. ³⁵ Che bara yããl, gulããni tio'p meel badeedni lo baxhuaan yu'ga. Dxejc rãjpnì: “Cuanãlaa bejnre; palga gunijtrulu, siguixãtini lojlu che guibi'ã.” Sã'tini.

³⁶ Dxejc rãjpnì Jesús lo mastr xten leii:

—¿Chu tej lo guidxon rebejnnga najc si'c sa' xten dade' ni biajb ladzãnaa gubaan?

³⁷ Dxejc rãjpnì loj Jesús:

—Ni balaslajz bejnnga.

Dxejc rãjpnì Jesús lojni:

—Huij te sigajcza chayejnlu.

Bidzujn Jesús rolijz Mart nãjza Marii

³⁸ La'ni huinuu xnezyujni, bidzujnini te guejdx. Ro'c bidxaagni te gunaa ni laa Mart ni huinãnini rolijzni. ³⁹ Yu' te bãjl Mart ni laa Marii, luxh laani gurejni cuã' ni' Jesús te cacuadiajgni xtiidxni. ⁴⁰ Mart cagusquejnini cayujnini xhi gaureni. Sas gubignì loj Jesús, rãjpnì lojni:

—¿La dilu jiu rusanxteb bãlã narã te xtebã cayunã remandaad? ¿Gojs lojni gacnãjni narã!

⁴¹ Dxejc rãjpnì Jesús lojni:

—Mart, Mart, cayuduxhlu yãrsia', riulu xhidajl cos, ⁴² luxh yu' tejtis ni nanabpac. Agule Marii ni najc huenru, rut sajcdi gudzucajnini lojni.

11

Rului Jesús xho guiniabni lo Dios

(Mt. 6:9-15; 7:7-11)

¹ Te huãlt cabedx-canab Jesús loj Xtadni Dios, suga'ni te lajt. Che gulujx cabedx-canabni, gunii te xpejnãpacni lojni, rãjpnì:

—Dad, baluii nurnu xho cuedx-guiniabnu lo Dios, si'c baluii Juan ni batiobnis rexpejnãpacni.

² Dxejc rãjpnì Jesús lojreni:

—Che cuedx-guiniabtu lo Dios, scree colnii:

Xtadnu ni yu' xhaguibaa,

suchã'p xpala'nlu, sujiããd xcãl'rnibeelu.

Sugac si'ctisni rlaizlu gac lo guedxliuj si'cpac rajcni xhaguibaa.

³ Guira dxej baniidz xcu'nnu si'ctis ni rquiinnuni.

⁴ Basiãjl lajzlu redojl xtenu si'cni riãjl lajznu redojl ni rujn rebejn loonu.

Na'c gusaanlu jiajbnu lo xcãl'rnibee bejdxab.

Basãaa nuurnu lo dojl.

⁵ Dxejc rãjpnì Jesús lojreni:

—Paru tejtü yu' te xamiigwni, luxh guidzujnini rolijzni garol yããl, gãbni: “Xamigwã, banidxlaa choj yãtxtiil, ⁶ sa'csi bidzujn te xamigwã rolizã ni bazaj biaj, luxh xhet ra'pãdi te gudedã xhi gauni.” ⁷ Xhixh sinii ni naga' nen xyu'ni, gãbni: “Na'c riãdtie'chlu bacał loã. Niãu rolã' luxh rexi'nã naga' cuã'ã, digacdi chãstieã te gunidxã xhi gunidxã lojlu.” ⁸ Rniliã lojtu, mase dini chastie te gudeednini sa'csi najcni xamiigwni, sistieni, sudeedni nani rquiintisni te na'cru gutie'chni bacałni. ⁹ Sigajcza rniã lojtu, palga guiniabtu xhi guiniabtu, sica'tuni. Palga chatiiltu xhi chatiiltu, sidxãltuni. Palga chasejtu rolã', suxhalreni rolã' lojtu. ¹⁰ Sa'csi chutis ni rniab, rca'ni nani rniabni; chutis ni rguuil xhi cos, rdxãlnini; nani rusejz rolã', suxhalzarenì lojni.

11 'Paru tejtü ni najc dad, jïääd te xi'ntu guiniabni te yätxtiil lojtu, çla sudeedtu te guij, ä? O palga guiniabni te bäjl, çla sudeedtu te bäj, ä? 12 O palga guiniabni te tzutbejt, çla sudeedtu te naxejb, ä? 13 Palga la'tu, ni najc bendojl, rajc rudeedtu cossa'c loj rexi'ntu, aticaxh Dios ni yu' xhaguibaa sudeedni Sprit Dxan xtenni loj renani rniabni lojni.

Rucuaquijreni Jesús, rniireni rajpni yälrnibee xten bendxab
(Mt. 12:22-30; Mr. 3:19-27)

14 Gulää Jesús te bendxabgop lastoo te bejn. Che birii bendxabga lastoo bejnga, guslogajc canii bejnga, dxejc bidxeloduxh reben xhidaalga. 15 Dxejc yu' reni räjp:

—Niguiire rbää rebendxab con yälrnibee xten Beelzebú ni rnibee loj rebendxab.

16 Sgaiireni rlaiz guquuilrenini, ni'c canabreni gunni te seen ni siääd xhaguibaali. 17 Niluxh laani gucbeeni xhi xhigab cayujnreni dxejc räjpni lojreni:

—Xhitis gubieer ni rlia' sa'ni lo sa'ni, luxh tilnäjä te cuaani stee cuaaga, di gaçlaa sinijt gubierga lo guedxliuj. Palga te famiil rdilnäjä lagajc sa'ni, di gaçlaa sinitloj famiilga. 18 Palga guiliä' sa' rebendxab, çxho mood chanuu xcälrnibee reni? Dee rniä sa'csi la'tu rniitu narä rbää rebendxab con lagajc yälrnibee xten Beelzebú. 19 Palga si'c najcni, çchuni'c rudeed yälrnibee loj rexpejntu te rbääreni bendxab? Lagajc laareni ruluii xhet laadi rujntu xhigab. 20 Palga narä rbää rebendxab con xcälrnibee Dios, ni'cni ruluiiloj abidzujn xcälrnibee Dios lojtu.

21 'Cheni suga' te bendaan, ca'ni guuib, canäjni rolizjni, rutliidi ruhualdi rexhixtenni. 22 Niluxh che jïääd stee ni nadipru lo bendaanga, rudxagdijlnini, rujjni gaanni, dxejc rudzucajni xquuibni ni badeed yälbendaan lojni, dxejc sajc chanäni guiraa rexhixtenni. 23 Reni xhet yu'di xladä, rdxe'chreni loä. Ni di gutopnäjä narä, rutie'chni.

24 Räjpzani:

—Cheni rii te bendxab nen lastoo te bejn, ricansajni nez lo reyubijdz, caguiilni cadro gusilajzni. Che cad rdxäldini, rujjni xhigab, naani: “Guibisacä rolizä cadro biriä.” 25 Cheni guibi'ni, rdxälni lastoo bejnga si'c te yu' ni entis gulujx bilioobni, suchesa'cni. 26 Dxejcti rixiini sgajdz bendxab ni rujnru latsiaj lojni. Dxejc riu'reni nen lastoo bejnga, dxejc nalasru ria'n bejnga loj ni gujcn galoo.

Chicbaa renani riu xtidx Dios

27 Laç ni canii Jesús rediidxre, te nane' ni yu' lo reben xhidaalga dipli guiniini, räjpni:

—çChicbaa nan ni biädnälu guedxliuj! Chicbaa nani basçlaa luj.

28 Luxh laani räjpni:

—Xhet si'cdi najcni; chicbaaru rebejn ni rucuaadiajg xtidx Dios, ni ru-zoobza xtiidxni.

Rebenquijdx rniab te milagwr si'c te seen

(Mt. 12:38-42; Mr. 8:12)

29 Sanuutis cadojp rebejn gabi Jesús, dxejc guslojni caniini, räjpni:

—Rebejn ni yu' naj benguidxduxhreni, rniabzarenite milagwr si'c te seen; niluxh xhetru seendi fiireni, seentis xten Jonás, dade' ni gunii xtidx Dios galoo fiireni. 30 Lagajc si'c ni gujc Jonás te seen loj rebejn guedx Nínive, si'cza narä, Xi'n Dios ni gujc Niguii, gacä te seen lo rebejn ni nabajn naj.

³¹ Cheni guidzujn dxej ni gac fis sistie te nane' ni gujc rein lo reyuj ni tre' ladbäjgw, sucuaquijni rebejn ni tre' guedxliuj naj sa'csi laani biriini zitduxh te bacuadajg pacni yäl'najn xten Salomón. Ree suga' galäiitu tej ni sacduxhru lo Salomón, ³² luxh ditu chalilajz xtiidxni. Rebejn ni guläjz guedx Nínive sisiunäj rebejn ni nabajn naj neñ redxej ni gac fis. Dxejc sucuaquijreni rebejn ni nabajn naj sa'csi laareni, che huináli Jonás xtidx Dios lojreni, basiechläjzreni, basa'nreni xtojreni. Ni suga' lojtu naj sajcruni lo Jonás, niluxh ditu jiu xtiidxni.

Ni rusanij xcäriejn bejn

(Mt. 5:15; 6:22-23)

³³ Räjzani:

—Rut rucuaguji te bajl, te gusujnini te lat xhiga'tz, niclaza neñ te caj. Susujni bajlga jiaa te rajc ruhuisa'c chutis ni riu' neñ yu'. ³⁴ Balojlu najc si'c bajl xten xcäriejnlu. Palga ruhuisa'c balojlu, guideb xcäriejnlu yu' si'c bianij. Palga rajc balojlu dilu fisa'c, guideb xcäriejnlu yu' si'c lo nacäjy. ³⁵ Gunatiro te di gac xpianijlu yäl'nacäjy. ³⁶ Palga guideb xcäriejnlu yu' bianijtis, xheti te lajt nacäjy, sajc fisa'clu guira'ti, si'c najc che rusanij te bajl neñ yu'.

Rucuaquij Jesús refarisee näjza rebejn ni najn lei

(Mt. 23:1-36; Mr. 12:38-40; Lc. 20:45-47)

³⁷ Che gulujx gunii Jesús, biädgajn te farisee Jesús chääni rolijzni te chatajwni. Sä'tireni. Che biu' Jesús, gurejni lo mex. ³⁸ Bidxeloj fariseega sa'csi dini niguiib naani si'cpac caj lo xleii Moisés gunreni te gaureni, sa'csi rujnreni xhigab si'c racnayareni lo Dios. ³⁹ Dxejcti räjz Jesús lojni:

—La'tu ni najc refarisee, rguibtu nez dejt te bas näjza te pla't, niluxh la'tu guidxa lastootu yäl'gubaa näjza yällatsiaj. ⁴⁰ ¡Beñ nadduxh! ¿La ditu gacbee? Nani benchee dejtzni, bencheeza nenni. ⁴¹ Colyajc nadolajz, colyacnäj rebejn con ni rniitu, dxejc guiraa recos sajc naya par la'tu.

⁴² ¡Probe'zatu, beñ farisee! Rudeedu lo Dios tej lo tejga tzuu ni rajptu: rudeedu bedzxtiil näjza ruud, näj guiraa recuane' ni rajptu lo le', niluxh ditu jiu xcäl'guxhtis Dios näjza xcäl'rinälajz Dios. Dee nanab guntu ganid, luxh na'cza gusaantu guntu ni alacayujntu par Dios.

⁴³ ¡Proobza la'tu reben farisee! Rchagläjztu rbejtu lo reyagxhil xten rebejn ni sajc neñ reguidobäz; rchagläjztu saru rnii rebejn “xchan Dad” lojtu che rijtu lo guii.

⁴⁴ ¡Probe'zatu! La'tu najctu si'c rebaa ni di guzen, rsiaj rebejn yejc cadre naga'reni luxh direni gan.

⁴⁵ Dxejcti badzu' tej rebejn ni ruluii lei diidxre lojni, räjzni:

—Dad mastr, che rniilu rediidxre, rniyajlu nuurnu.

⁴⁶ Dxejc räjz Jesús lojreni:

—¡Probe'za la'tu rebejn ni ruluii lei! Sa'csi rnibeetu gun rebejn recos naganduxh ni najc si'c te cargw naduxh ni di gacdi guu bejn. Luxh la'tu di rläjztu fałtuni nicla con te bicuenabäztu.

⁴⁷ ¡Proobzatu! Sa'csi runcheetu xpa redade' ni gunii xtidx Dios galoo, luxh najctu rexaj renani bagu't redade'ga. ⁴⁸ Ni'cni najnpactu xhi gusajreni, rchagläjzatu redzuun ni bejn retoxtadgoldootu; si'cza gunnäjtu narä sa'csi laareni bagu'treni redade'ga, dxejc la'tu runcheetu xpaareni.

⁴⁹ 'Ni'cni gunii Dios, sa'csi yuduxh xcäl'najjni, räjzni: “Suxhalä reniguii ni guinii xtidxä näjza reapost, luxh sugu'treni gaiireni, susacsizareni sgaiireni.” ⁵⁰ Loj rebejn ni nabajn naj siniab Dios gudeedreni cuent xcuent

xtiejn guiraa redade' ni gunii xtidx Dios ni bagu'treni cheni guc-cheeli guedxliuj. ⁵¹ Guislojni xtiejn toAbel, nájza xtiejnli Zacarías ni bagu'treni galáii nez lodxan nen guidoro. Ni'cni rniä lojtu, siniab Dios cuent xten xcälgujt guiraareni loj rebejn ni nabajn naj.

⁵² 'iProbe'za la'tu, rebejn ni ruluii leii! Sa'csi rniitu la'tistu rajptu yäl'najn, luxh di rlajztu chalilajztu xtidx Dios, dizatu gusaan chalilajz rebejn ni rlajz chalilajz xtidx Dios.

⁵³ Cheni räjp Jesús rediidxre, bidxe'ch rebejn ni ruluii leii nájza refarisee lojni. Dxejc guslojreni canabdiidxreni xhidalduxh diidx, ⁵⁴ te cagula'tzreni don la sajc guiga'ni lo xhitis te diidx ni guiniini.

12

Jesús ruluii xcuent levaduur

¹ La_l ni caniini, bidojp xhidajl mi_l bejn ro'c, calaro'li sa'reni. Dxejc gusloj canixгаа Jesús loj rexejnpacni, räjpni lojreni:

—Colnati levaduur xten refarisee, rusgueereni rniitisreni xhidajl diidx luxh direni gunni. ² Sa'csi xheti xhi niäu lojni ni di guxal lojni luxh xheti xhi naga'tz ni di jienloj. ³ Ni'cni guiraa ni guniitu lo nacäy, sien_{ni} lo bianij xten dxej. Luxh ni gunii xhiga'tztu nen reyu' ni niäudzu'tz, sibedxa'renini rediidxga yejcli reyu'.

Chuni'c nanab guidxejbtu (Mt. 10:28-31)

⁴ Räjpszani:

—Rniä lojtu, xamigwä, na'c guidxejbtu rebejn ni sajc ju't tiejxhtu, dxejc xhetru sajcdi gunreni. ⁵ Guiniä lojtu chuni'c nanab guidxejbtu. Colguidxejb nani che abadzucajni yäl'nabajn rajpni yäl'mibee gusa'ni la'tu gabijl lo bajl ni cayejc par tejpas. Ni'csi colguidxejb.

⁶ 'Anajntu sajc jio' gaii mane' tio'p melbäz, luxh di Dios jäällajz nicla tej remane'ga. ⁷ Rexquidxejctu abigab tebgajni. Na'c guidxejbtu; la'tu sajcrutu loj xhidajl remane'ga.

Reni riembee Jesús nez loj rebejn (Mt. 10:32-33; 12:32; 10:19-20)

⁸ Räjpszani:

—Rniä lojtu, guiraa rebejn nani rcäjp rililajzni xtidxä nez loj rebejn, narä Xi'n Dios ni gujc Niguii sicäpä najcni xpenä nez loj rexangl Dios. ⁹ Luxh reni di guicäjp rililajzni xtidxä nez loj rebejn, sigajcza sunnäani nez loj rexangl Dios xhaguibaa.

¹⁰ 'Chutis ni guini_i te didxnaj xcuentä, susiäällajz Dios laani. Niluxh chutis ni guiniyaj Sprit Dxan xten Dios, di Dios gusiäällajz xtojlni.

¹¹ 'Cheni chanäreni la'tu nez loj reben guidobäz o nez loj reguxhtis, na'c guntu xhigab xhi gudzu'tu diidx o xhini'c guiniitu, ¹² sa'csi che guidzujn or ni guiniitu, Sprit Dxan xten Dios suluini xhini'c guiniitu.

Reyäl'nasa'c rusajb bejn nen dojl

¹³ Te niguii ni nadxaag rebejn xhidaalga räjpni loj Jesús:

—Dad, Mastr, gojs lo betzä guniidxni gala' xhixtenä ni basa'n toxtadnu loonu.

¹⁴ Dxejc räjp Jesús lojni:

—Dade', çchuni'c gule narä gunä yälguxhtis o gacä abogaad lojlu, ä?

¹⁵ Dxejc räjpsac Jesús lojreni:

—Colnatiro, colgantzu' te di rlaiztistu ga'ptu yäl'nasa'ctis sa'csi xcäl'nabajñ bejn dini gac yäl'rajptis xhidajl xhi cos.

¹⁶ Dxejcti bij Jesús te cuent, räjpni lojreni:

—Guyu' te ben rapduxh. Racduxh cose'ch lo rexcäjlni. ¹⁷ Dxejcti gusloj bejnni xhigab: “¿Xhocha gunä? Dina gapä cadro cucheä recose'ch.” ¹⁸ Sas bejnni xhigab: “Ananä xhini'c gunä. Gudzulä reyu' cadro rgucheä recose'ch, te gustiobä reyu'ga, te ro'c cucheä guiraa recose'ch näjza rehxixtenä.” ¹⁹ Dxejcti siniä lo lastoä: “Lastoä, agulucheelu xhidajl xhi cos, sajlni xhidajl ijz. Basilajz naj, gudajw, gu', bibalajz.” ²⁰ Dxejc räjp Dios lojni: “¡Ben najd! Lagajc guxhijñre siniabä xaimlu. ¿Dxejca'? ¿Chu xca' guiraa recos ni gulucheelu?” ²¹ Si'c sisiajc guiraa rebejn ni rguiiltis xcäl'nasa'creni lo guedxliujre, niluxh xhet rajpdireni loj Dios.

Rcanäj Dios rexi'nni

(Mt. 6:25-34)

²² Che gojl stera't, räjp Jesús loj rexpejñpacni:

—Ni'cni rniä lojtu, na'c rujntu xhigab xcuent xho guibajñtu o xhini'c gautu te guibajñtu, niclaza xcuent lajd ni gacwtu. ²³ Yäl'nabajñ sajcruni lo yäl'rajw; tiejxhni sajcruni lo lajd ni rajcw bejn. ²⁴ ¡Colhuii rebaloo! Direni cue'c binij, dizareni gutojp cose'ch, dizareni ga'p nicla yu' nicla te cadro chuchee cose'ch, per rudeed Dios xhi rajwreni. ¿La xhet sajcdirutu loj rebalooga, ä? ²⁵ Luxh ¿Chu tejtü palga runduxhni xhigab sajz tioobruni sgarol metr? ²⁶ Palga di gacdi guntu nicla te cosbäz, ¿xhicuent ru'tu yärsia' xcuent xhi stee cos?

²⁷ ¡Colhuii xho rga' reguino'ch! Direni gun dzuun, dizareni gun lajd lo dzujb, luxh rniä lojtu, nicla reii Salomón con guiraa xcäl'nasa'cni, dini nisiuchee si'c rsiuchee reguiiga. ²⁸ Palga rusuchee Dios recuaan ni rga' lo niaa, ni rial nadxej, luxh guixee-huijdx, che agubijdzni, rejçni lo däj, aticaxh Dios suniidx xhi gacw la'tu, ¡bejn nani guxii rililajz! ²⁹ Ni'cni rniä na'c runtejtü xhigab xho quiiltu xhini'c gautu, xhini'cza yätu, na'c chutistu yärsia'. ³⁰ Si'ctis rujñ rebenguedxliuj guideb xtijpreni rguuilreni rehxicosre. Niluxh xtadtü ni yu' xhaguibaa anajñni xhini'c rquiintu. ³¹ La'tu colquiiltis xcäl'nibee Dios, dxejcti laani suniidxzani guiraa recos ni rquiintu.

Yäl'nasa'c ni yu' xhaguibaa

(Mt. 6:19-21)

³² Räjzpzeni:

—La'tu ni najc rexilä'ä, na'c guidxejbtu, sa'csi rbaali lajz Dios, aguleni la'tu te la'tu guntu yäl'guxhtis lo xcäl'nibeeni. ³³ Colguto' xhixtentu, colgudeedni loj rebejn ni caquinduxhni, te si'c guntu te bols ni di jiuuxh, te chu yäl'nasa'c nenñi xhaguibaa cadro di gubaan jiu' niclaza xcabäj rehxicos. ³⁴ Sa'csi cadro rajptu xcäl'nasa'ctu, ro'cza yu' lastootu.

Nanab susiñtu

³⁵ Räjzpzeni:

—¡Colsusin! ¡Colhualguij rebajl! ³⁶ Colyujñ si'c remos ni cabäjz guibi' xlamreni ni säa te sa', te çeni guibi'ni guxhagajçreni rolä'. ³⁷ Chicbaa remos ni susiñ che guibi' xlamreni. Rniliäpac lojtu, lagajc xlamreni sajçwni xhajbni sibe'cni rexmosni lo mex, dxejc lagajc laani sudeedni xhi gau-reni. ³⁸ Mase guidzujñni garol yääl, mase guidzujñni çäjyru, palga guidxälni arexmosni susiñ, ¡chicbaa remosga! ³⁹ Colyacbeepac, paru gacbee baxhuaan xten yu' xhi or guidzujñ gubaan rolizjni, dini gusaan guxhalreni rolizjni te

cuanreni xhixtenni. ⁴⁰ Nájza la'tu col_susin, sa'csi or ni ditu gun xhigab jiädni, sidzujñ Xi'n Dios ni gujc Niguii.

*Te mos gujdx
(Mt. 24:45-51)*

⁴¹ Dxejc gunabdiidx Pedr lojni, räjpni:

—Dad, ¿la lootisnu ruyjlu cuentre o la najcni par guiraa rebejn?

⁴² Dxejc räjp Jesús lojreni:

—¿Chuni'c najc mos hueen, mos nasin, ni rusannäj xlamni guiraa rexmosni te gudeedni xhi gaureni che gal oor, ä? ⁴³ Chicbaa mosga palga laaca cayunni che guibi' xlamni. ⁴⁴ Rniliäpac lojtu, lamga sudeed guiraa rexhixtenni te xcanäj mosgani. ⁴⁵ Per palga gun mosga xhigab nen lastooni: “Saclaa guibi' xlamä”, sas guislojni gusacsini resamosni, gunaa sigajc niguii, dxejc guisloj gauni, yäni, soozni; ⁴⁶ sibi' xlamni te dxej ni xhet cabäjzdinini, or ni dini gun xhigab guidzujñni. Dxejc sii sudeedni te castigwro lojni, sutiäjlni te duu dejtzn dxejc sinibeeni jüni, guidxaagni rebejn ni di gusobdiajg diidx.

⁴⁷ Mosga ni najn xhini'c rlanj xlamni gac, luxh dini susin, dizani guzoob xtiidxni, sutiälduxhrene duu dejtzn. ⁴⁸ Niluxh mos ni di gan xhi rlanj xlamni gac, ni'c rujñni redzuun ni di xlamni guidxagljaz gac, guxiiru castiigw gacni. Reni rca' xhidajl, xhidajlza riäjñ gudeedreni; loj reni rca' yälmbeduxh, xhiroobza siniabni lojni.

*Rlia' Jesús bejn lo sa'ni
(Mt. 10:34-36)*

⁴⁹ Räjpza Jesús:

—Narä biälä te gucuaguä guedxliujre; jmalaii alagusloj cayejcni! ⁵⁰ Niluxh nanab tedä te yälrobnis ni säloj te trabajwduxh, ni'c cayuduxhä yärsia' cheni chale'lini. ⁵¹ ¿La rujntu xhigab biälä te jiädnää yälrbexdi loj guedxliuj, ä? Rniä lojtu, dini gac si'c. Alga biälä te guilia'ä bejn lo sa'reni. ⁵² Silia' sa' te famil; loj gaiireni, sidxe'ch choñreni loj tio'preni, luxh tio'preni sidxe'chza lo choñreni. ⁵³ Silia' sa'reni; sidxe'ch dad lo xingaanni, luxh xingaanga sidxe'chza lo xtadni; nane' sidxe'ch lo xinxax'pni, luxh xinxax'pga sidxe'chzani lo xnanni; nansuegr sidxe'chni lo xculijzni, luxh gulijzga sidxe'ch lo xnansuegrni.

*Reseen xten retiem
(Mt. 16:1-4; Mr. 8:11-13)*

⁵⁴ Caniiza Jesús lo reben xhidajlga, räjpni:

—Cheni rhuiitu räjs reza nez lad jät, rniitu: “Siajb nisguij.” Luxh riabjni.

⁵⁵ Che rbi' bej nez lad danbägw, rniitu: “Sacnalaa nadxej”, luxh si'c rajcni.

⁵⁶ jBejn ni rusguee! La'tu racheetu xhi säloj reseem ni rien lo guedxliuj näjza xhaguibaa, ¿xhicuent ditu gan xhi säloj retiem ni dxunnu naj, ä?

*Basiäjñ diidx con rebejn ni rdxe'ch lojlu
(Mt. 5:25-26)*

⁵⁷ Räjpzani:

—¿Xhicuent ditu quiil lagajc la'tu xhini'c najc hueen, xhini'c najc laaca te guntuni? ⁵⁸ Sa'csi palga yu' chuni'c chale'c xquejlu lo guxhtis, lalni sanäni luj ro jusgaad, basiäjñ diidx con laani lo nejz, te na'c chanäni luj lo reguxhtis, sa'csi dxejc reguxhtis sutedreni luj lo reguixhajg te gusaürene luj nen latzguuib. ⁵⁹ Luxh rniä lojlu, dilu guirii ro'c hasta gusa'lu quiixlu guiraa lojreni.

13

Colgusiejch lajztu te di guettu

¹ Lagajc dxejc, gubig gaii reni huisa'nreni diidx loj Jesús xcuent gaii ben Galilee ni bagu't Pila't nen guidoo, bagu'chni xtiejnreni con xtiejn reman ni siädnäreni si'c gojn lo Dios. ² Sas räjp Jesús lojreni:

—¿La rujntu xhigab si'c gusajc reben Galileega sa'csi najcrueni bendojl lo rebejn lajdxreni? ³ Narä rniä, dini gac si'c. Palga di'tu gusiechlajz sigajcza sejt guiragajctu. ⁴ O xcuent guitzunchon rebejn nani gujt che gubixh te or ni laa Siloé yjcreni, ¿La rujntu xhigab najcrueni ben dojl lo rebejn ni rbäjz guedx Jerusalén, ä? ⁵ Narä rniä, dini gac si'c. Palga di'tu gusiechlajz, sigajcza sejt guiragajctu.

Xcuent te yag iigw

⁶ Dxejcti gusloj bij Jesús te cuent ni ruluiini lojreni, räjpni:

—Te dade' gojp te yagiigw ni basujni lo xyujni. Sas huihuiini don la caj ninejxh lojni. Luxh xhet ninejxhdi bidxälni. ⁷ Dxejc räjpni loj bejn ni canäj xyujni, agujc chon ijz siädtilä ninejxh lo yajgre, luxh xhetini. Batin yajgre. ¡Xlia'si sujni lo yuj! ⁸ Luxh xmosni räjp lojni: “Dad, basaanni steb ijz, guslää yuj ni'ni, gusälä abonni. ⁹ Palga xcaj ninejxh lojni steb ijz, laaca, palga dini xcaj, dxejc guitinnuni.”

Rusijc Jesús te gunaa

¹⁰ Te dxej ni rusilajz rexpejn Israel caguluii Jesús nen te guidobäz. ¹¹ Ro'c suga' te nane' ni agujc tzunbichon ijz racxhuuni. Bendxab cagusoodni, niluxh di gacdi suliiini. ¹² Che bahuii Jesús lojni, gurejdxnini, dxejc räjp Jesús lojni:

—Gunaa, abasaan yälgujidxga luj.

¹³ Che basujni naani yejcni, lagajc dxejc gujc gusulii nane'ga. Dxejc guslojni calä'pni xpala'n Dios. ¹⁴ Luxh dade' ni rnibee guidobäz bidxe'chni sa'csi basijc Jesús nane'ga che najcni dxej ni rusilajzreni, ni'c gusloj cayäjpni loj rebejn:

—Xho'p dxej sajc gun bejn dzuun; nen redxejga sajc jiäädtu te jiajctu, per na'c jiäädtu dxej ni rusilajz rexpejn Israel.

¹⁵ Dxejc badzu' Jesús diidxre, räjpni lojni:

—¡Ben rusguee! ¿La di chutis tejtü guxhec xconni o xpurni te chanänini yäni nis, mase najcni dxej ni rusilajz bejn, ä? ¹⁶ Luxh nane're najc te xagdoos Abram, nani numbee Dios, ni agujc tzunbichon ijz baliib bendxabni, ¿la digacdi guixecni lo xcälgujidxni mase najcni dxej ni rusilajz bejn, ä?

¹⁷ Che gunii Jesús rediidxre, bianxtujy rebejn ni rdxe'ch loj Jesús, luxh reben xhidaalga cabalazduxhreni sa'csi cayujn Dios redzunro nez lojreni.

Xcuent bedz muxhtas

(Mt. 13:31-32; Mr. 4:30-32)

¹⁸ Ni'cni räjp Jesús lojreni:

—¿Xhocha najc xcälrnibee Dios? ¿Xhicha cojn guiniä najcni tebloj? ¹⁹ Najcni si'c te bedz muxhtas ni rbe'c te bejn lo xyujni. Luxh che guiroobni, rajcni te yagro. Dxejc riääd remane' ni rutajt siädyunchee xpitiäzäni loj rexhajcwni.

Xcuent cojb ni rusaguj

(Mt. 13:33)

²⁰ Guniiza Jesús stehuält te gacheereni xho guire'ch rextidx Dios. Räjpni lojreni:

—¿Xhicha cojn guntebloä xcälrnibee Dios? ²¹ Najcni si'c levaduur ni rugu'ch te gunaa lo choñ mediid arin, luxh rusaguijni guiraa cojba.

Dää rolä' cadre jiu'ni xhaguibaa
(Mt. 7:13-14, 21-23)

²² Huinuu Jesús xnejzni sääni guedx Jerusalén. Lañi sadejdni reguejdx näjza rerench caguluiini rebejn. ²³ Dxejc gunabdiidx te bejn lojni, räjpni:

—Dad, ¿la guxii najc rebejn ni calaa loj rextojlreni, ä?

Dxejc räjpni lojreni:

²⁴ —Dää rolä' cadre jiu' bejn xhaguibaa. Ni'cni coltip lajztu te jiu'tu ro'c, sa'csi xhidajl bejn rlanj jiu'reni ro'c, niluxh direni gun gaan. ²⁵ Cheni abasäu baxhuaan xten yu' rolä', dxejc la'tu ni suga' detz yu' guisloj gusejstu rolä', guiniitu: “Dad, baxhal-laa rolä'”, dxejc laani sudzu'ni diidx, siniini: “Dina ganä caro siäädту.” ²⁶ Dxejc guislojtu guiniitu: “Bidunnäänu, bidaunäänu, bidunnäänu luj, baseedlu nuurnu lo xnezyuunu.” ²⁷ Dxejc siniini lojtu: “Rniliä lojtu, dipacnä gumbeä la'tu. Coljij guiraatu, beñlatsiaj.” ²⁸ Dxejcti sonduxhtu, chubejli läjyту che fiitu abiu' toAbram, con toIsaac, con toJacoob, näjza guiraa redade' ni gunii xtidx Dios, suga'reni lo xcälrnibee Dios xhaguibaa, luxh la'tu di gacdi jiu'tu. ²⁹ Dxejga sidzujn xhidajl benzijт ni siääd ladjiaa, ladjiät, ladbäjgw, näjza ladbee, te jiu'reni lo xcälrnibee Dios xhaguibaa, ro'c sibejzareni lo mex. ³⁰ Luxh yu' reni rujntu xhigab guxii sajcreni naj, sacduxhrene dxejc. Yu'za reni rchalotu sacduxh naj, xhet sajcdireni dxejc.

Jesús biin xcuent guedx Jerusalén
(Mt. 23:37-39)

³¹ Lagajc dxejga, bidzujn gaii refarisee, räjpreni lojni:

—Huij, biunejz ree, sa'csi Herodes rlanj ju'tlu.

³² Dxejc laani badzu'ni diidxre lojreni, räjpni:

—Gojz lo bäjzga, beñ rusguee: “¡Bahuii! cabää rebendxab lastoo rebejn, cagusiacä rebejn ni racxhuu nadxej näjza guixee, luxh huijdxli guluxä xtzunä.” ³³ Niluxh mase si'c gacni nanab chanuä xnezyuä nadxej näjza guixee, huijdx, sa'csi di gacdi guet te dade' ni rnii xtidx Dios ste'ca guejdx, guejdxтis Jerusalén sajс guetni.

³⁴ ¡Probe'tu, la'tu beñ Jerusalén! Rugu'ttu redade' ni riädni xtidx Dios lojtu, rucuaazatu guij yejc rebejn ni ruxhal Dios lojtu. Balti huält rlazä nuchagä sa'tu si'c ruchagsa' te guidco'c rexquidbäzni lajd xhigani, niluxh ditu nicäjp.

³⁵ Bahuii xho bianxteb xquidootu. Ni'cni arnixgaä lojtu, dirutu fii loä cheni guidzujnli dxej ni guiniitu loä: “Chicbaa ni siääd xcuent Dios.”

14

Rusiajc Jesús te bejn ni guidxa guij

¹ Che gojl te dxej ni rusilajz rexpejn Israel, huitajw Jesús rolijz tej ni rnibee loj refarisee. Cagula'tz gaii refarisee, guidon xhini'c gun Jesús, ² sa'csi nez loj Jesús suga' te dade' ni guidxa guij tiejxhni. ³ Dxejc gunabdiidx Jesús lo rebejn ni ruluii leii näjza lo refarisee, räjpni lojreni:

—¿La sajс gusiajсni te beñracxhuu dxej ni rusilajz bejn o la di gacdinì?

⁴ Per laareni dxtis suga'reni, niäutis ro'reni. Dxejc cua' Jesús beñracxhuuga, basiajсni, gunibeezani biunejzni. ⁵ Dxejc räjpni loj refarisee:

—Chu la'tu ni rajp te bur o te gon, palga iajbni neñ te bisie, ¿la ditu chalägajсni mase najcni dxej ni rusilajz bejn, ä?

⁶ Dxejc di niajсni nudzu'reni diidx lojni.

Reni bidon chää sa'

7 Cheni bahuii Jesús xho rchaglajz rebejn rbereni latsa'c te cuereni cuä' rebejnro, bijni te cuent ni ruluii lojreni, räjpni:

8 —Cheni guidontu chäätu te sa', na'c guntu te cuetu cuä' rebenro, te di guidzujn te benronu lojlu, 9 dxejc jiaäd bejn ni cayujn lanij, naani lojlu: “Badeed cue dade're ro'c.” Dxejc situjylilu chacuelu ste'ca lajt lo le'li.

10 Maazru hueen, cheni guidonlu chäälu te sa', huicue lo mex ni zuj lo le' te che guidzujn bejn ni cayujn lanij, naani lojlu: “Xamigwä, gudaä cuelu nen yu' cadre rbej rebenro.” Si'c sä'p xpala'nlu nez loj guiraa rebejn ni sobganäjlu lo mex. 11 Sa'csi ni rlanj chä'p xpala'nni nez loj rebejn, sianxtujyni nez lojreni. Luxh bejn ni najc nadolajz, sä'p xpala'nni nez loj guiraa rebejn.

12 Räjpszani loj bejn ni cagudeed xhi gaureni:

—Cheni gunlu te lanij o gutedlu bejn lo xmexlu, na'c cuedxtislu rexamigwlu con rebejtzlu, con resa'lu, niclaza rexpisnlu ni najc ri'cw, sa'csi laareni sigajcza sibejdxreni luj che gunreni te lanij, luxh si'c agudijxreni ni badeedlu lojreni. 13 Che gunlu te lanij, alga gurejdx rebenproob, rebencoj, näjza rebenlotiä'p, 14 dxejcti sibaa lajzlu sa'csi laareni di gacdi gunidxsacreni ni badeedlu lojreni; luxh si'c siguixsac Dios ni bejnlu che gal dxej ni guibañsac rebejn loj rebenjut.

Xcuent te laniro

15 Che biejn diajg tej reni sobga' lo mex, räjpni loj Jesús:

—Chicbaa rebejn ni gau yätxtiil cadre rnibee Dios.

16 Dxejc räjp Jesús lojni:

—Guyu' te dade' ni bejn te laniro rolijzni. Gunibeeni bidon xhidajl bejn te jiaätaunäjrenini. 17 Che bidzujn or ni gaureni, baxhał dade'ga te xmosni chatejdxni rebejn ni abidon, räjpni lojreni: “Colchäj, asuchee lo mex.” 18 Dxejc guiragajczeni gusloj cayäjb di gacdi chääreni. Tejni räjp: “Entis gusiä te la' yuj, luxh naj nanab chahuiä xho najcni. Goslaa di gacdi jiaälä.” 19 Steeni räjp: “Gusiä gaii nejs gon, luxh nanab chahuiä xho rujnreni dzuun. Goslaa di gacdi jiaälä.” 20 Steeni räjp: “Entis bachnaä ni'cni di gacdi jiaälä.” 21 Che gubi' mosga, badeedni diidx lo xlamni xhi räjp rebejnga lojni. Dxejc bidxechduxh lamga, räjpni lo xmosni: “Basquejn huij ladneyuj näjza ladneyuj däa, gudanä rebenproob, rebencoj, rebenlotiä'p, rebennatiujnc.” 22 Si'c bejn mosga. Che gubi'ni räjpni lo xlamni: “Dad, abenä si'c ni gunibeelu, luxh lajtru yagxhiil.” 23 Dxejc räjp lamga lo xmosni: “Huij lo reneyuj ni sii loj reguedxziyt, gudanäj rebejn ni guidxaaglu nejzga, te cha bejn rolizä. 24 Rniliä lojtu, nicla tej reni bidon ganid di gau xhuj nani benä.”

Ni nanab gunni te chanajlni Crist

25 Lał sasaj Jesús lo nejz, xhidalduxh bejn sanajlni. Dxejc gubiréni, gusloj cayäjpni lojreni:

26 —Palga yu' chu tej ni jiaäd loä, ni di cuälaz xtadni, xnanni, chäälni, rexi'nni, rebejtzni, näjza rebisiajnni, nägajcza xcäl'nabajnni, di gacdi gacni te rexpenä. 27 Palga yu' chutis tej ni di rlanj tedni trabajw te jiaädajlni narä, di gacdi gacni te rexpenäpac. 28 Chu tejtü ni rlanj gun te yuro, ni di gunxgaa xhigab lacti meel chanä yu'ga, te guidon la sajc guluuxnini. 29 Didi cheni abejanni recimient, di gacdi guluuxnini, dxejc guiraa reni fii lojni suxhiznäjnrenini, 30 säjpreni: “¡Bahuilaa! Bejnre gusloj bencheeni te yu' per di niajcdi nuluuxnini.” 31 ¿Chu te reii ni gun xhigab chachagdijlni stee reii, ni di gunxgaa xhigab don laa sajc gunni gaan con tzuu mił soldaad loj stee reii ni

siääd con gajl mil soldaad, ä? ³² Palga di gacdi gucuanäjnni, che gacbeeni zijtli siääd stee reiiga, suxhalni te xpejnni chanab yälrbedxi lojni. ³³ Ni'cni palga chutis tejtü di gusaan rehxixtenni te jiädnajlni narä, di gacdi gacni te rexpənäpac.

Che diru sejd gac nadzujy
(Mt. 5:13; Mr. 9:50)

³⁴ Räjpzani:

—Huen najc sejd. Per cheni diruni gac nadzujy, çxho gacru gac nadzujyni?
³⁵ Xhetru sajcdini, nicla te chääni loj yuj, niclaza te chääni lo abon. Gusältis bejn sejdga. Reni rälaj gucuadiajg xtidxä, sucuadiagsa'creni.

15

Xcuent xiil ni gunijt
(Mt. 18:10-14)

¹ Guiraa reni rusquijx impuest näjza rebədojł cabigreni loj Jesús, te cuadi-ajgreni rextiidxni. ² Refarisee näjza rebejn ni ruluii leii gusloj camojmreni, räjpreni:

—Bejnre rusaan rbig rebədojł lojni, luxh raunäjzanireni.

³ Dxejcti bij Jesús cuent ni ruluiire lojreni, räjpni:

⁴—Chutejtu ni rajp tegayuu xiil, palga chanijtntejni, çla dini gusaan stapbitzuubigaa rexiilni lo niaa te chatiilni xile' ni gunijt, hasta guidxällinini, ä?
⁵ Luxh che guidxälñini sibaduxh lajzñi, dxejc sutzuubnini ro xhajcwni. ⁶ Che guidzujñni rolizñi sutojpní rexamiigwni näjza rexpisñni te gábni lojreni: “Colguibalazñä narä sa'csi abidxälä xile' ni gunijt.” ⁷ Rniä lojtu, sigajcza su'ru yälrbalajz xhaguibaa xcuent tejtis bejn ni guibig lo Dios ni gusiechlazj xtojłni quela xcuent tapbitzubigaa bejn ni di guiquiñ gusiechlazreni xtojłreni.

Xcuent meel ni gunijt

⁸ Räjpzani:

—Sigajcza te gunaä ni rajp tzuu meel, palga chasälñi tejni, çla dini gusanij te bajl te guloobni neñ yu' hasta guidxälñini, ä? ⁹ Luxh che guidxälñini, sutojpní rexamiigwni näjza rexpisñni, säjpní lojreni: “Colguibalazñä narä sa'csi abidxälä meel ni gunijt.” ¹⁰ Rniäza lojtu, sigajcza sibalajz rexangl Dios xhaguibaa xcuent te beñdojł ni rusiechlazñi.

Te bejn ni baxun te xi'nni

¹¹ Dxejc bijza Jesús cuentre lojreni:

—Guyu' te dade' ni yu' tio'p xingaanni. ¹² Dxejc xi'nni ni najc huinruga, räjpni lo xtadni: “Dad, baniüdx yálnasa'c nani nungäjł xca'a.” Sas badeed xtadni xerensni. ¹³ Di niacaa, balsi dxej gudejd, chela bato' xinhuinni guiraa xhixtenni, dxejc sääni, bidzujñni te guedxzijt. Ro'c banijnti guiraa xmeelni lo recosgujdx. ¹⁴ Che abanijnti guiraa xhixtenni, biääd te gubinduxh guedxzijtga cadro yu'ni. Sas guslojzani calaanni. ¹⁵ Dxejc huitiilni dzuun lo te benguejdxga. Baxhal bejnğani te huigajpní cuch lo xyuj dade'ga. ¹⁶ Luxh calanduxhni bejnñi xhigab malaii sajç gauni recuaan ni najc si'c lia ni cayajw recuch, niluxh rut badeeddi xhi niäjwni. ¹⁷ Lał ni cadejđni trabajwga, bianij xcäriejnñi bejnñi xhigab, naani: “Balti rexmos xtadä rausa'c, ria'nru xhi gaureni. Luxh narä ree calanduxhä, ameerli guetä. ¹⁸ Guibi'älis ladxä, rolizj xtadä, gäpä lojni, Dad, banitā lo Dios näjza lojlu. ¹⁹ Diru nungäjł guirilaä xi'nlu. Cua' narä si'c te xmoslu.” ²⁰ Dxejc gunazgajcni nejz te gubi'ni rolizj xtadni.

'Cheni zijtru siäädni, bahuii xtdadni lojni. Dxejc balaslajznini, ruxuñlini, huichaglojnini, sas gudääznini, bachagro'ni lojni. ²¹ Dxejc räjp xi'nni lojni: "Dad, abanitä lo Dios näjza lojlu. Diru nungäjł guirilaä xi'nlu." ²² Per räjp xtdadni loj rexmosni: "Coltanä te ladsa'c, colshuajcwnini xi'nä, colgusäl te niil bicueñaani, ccajza te gura'ch ni'ni. ²³ Coltanä te biseř ni guro' colgu'tni. ĵColšquejn te guidaunu, jiennu te lanij! ²⁴ Sa'csi xi'näre abenä xhigab gujtņi, luxh naj si'cni agubaņsacni, gunijtni niluxh naj abidxäjłni." Dxejc guslojreni bejnreni te lanij.

²⁵ 'Laļ ni cayajc dee, xingangalooni cayujņ dzuun lo niaa. Che gubi'ni, siäddzungajxhni rolizjni, che biejn diajgni cayel rolizjni, caguya'zareni. ²⁶ Dxejcti gurejdxni te mos, gunabdiidxni lojni xhi cayajc royu'. ²⁷ Dxejc räjp mosga lojni: "Gubisac bejtzlu, luxh xtdadlu gunibee gujt te biseř guro' te gac lanij sa'csi nadaanni gubi'ni." ²⁸ Dxejc bidxe'ch xingangalooni. Naadtini jiu'ni rolizjni. Che gucbee xtdadni naadtini jiu'ni, bihuii xtdalnini te gunabni jiu'gani. ²⁹ Dxejc räjpni lo xtdadni: "ĵBahuilaa! Agujc xchej cayunä dzuun lojlu, luxh rusobdiagä guiraa xtiidxlu, per nicla tej huält gajdlu guniidx nicla te dxibe' loä te gunä te lanij con reexamigwä. ³⁰ Luxh naj ni abidzujņ xi'nlure, ni banijt xmeellu con regunadxab, xhoxh bagu'tlu te biseř guro' te cayujņlu xlanijni." ³¹ Dxejc räjp xtdadni lojni: "Xi'nä, sugagajclu loä, luxh guiraa ni rapä najc xtenlu. ³² Niluxh naj riäjłpac jiennu lanij, guibalaaznu, sa'csi bejtzlu ni benä xhigab agujt, agubi'ni naj, najcni si'cni gubaņsacni; gunijtni, naj abidxäjłni."

16

Xcuent te ni rnibee loj remos

¹ Dxejc cayujyza Jesús stee cuent loj rexpejņpacni, räjpni:

—Guyu' te beņrajņ ni guyu' lojni te ni rnibee loj rexmosni. Dxejc biääd reni badeedreni diidx lojni, räjpreni: "Bejņ ni rnibee loj rexmoslu xhetlaadi cayujņni cagunijtni rexhixtenlu." ² Dxejcti gurejdx xlamnini, räjpni lojni: "ĴXhi dee ni riejn diagä caniireni xcuentlu, ä? Naj guniidxlu loä cuent xte xtzauņlu, sa'csi dirulu chanuu guinibeelu lo rexmosä." ³ Dxejc bejnaga bejn xhigab: "ĴXhichani'c gunä naj ni gudzucaj xlamä dzuun loä? Dina ga'pä yälrstijņ te gunä dzuun lo niaa, luxh situjyä chanabä gojņ. ⁴ Ananä xhini'c gunä te che dirunä ga'pä dzuun, sibejdx reexamigwä narä rolizjreni." ⁵ Dxejcti gurejdxni tebgajreni rebejņ ni nazäab lo xlamņi, dxejc räjpni loj ni bidzuxgaa: "ĴLac nazääbłu lo xlamä?" ⁶ Dxejc räjpni: "Nazäbä si'c te gayuu baril se't." Dxejc räjpni lojni: "Basquejn, cua' guijtze, bacuaa tiubituutis baril nazääbłu lojni." ⁷ Dxejc gunabdiidxni loj steeni, räjpni: "ĴLuj a'? ĴLac nazääbłu lo xlamä?" Dxejc räjpni lojni: "Te gayuu dximro triuu." Dxejc räjpzani: "Aree xquijtzu; bacuaa tajtis dximro." ⁸ Bidxeloj xlamņi, gulä'pni xpala'n beņgujdxga ni gunibee sa'csi bisijņi bejņni recosga. Dxejc räjpza Jesús, rebejņ ni di gumbee xtidx Dios nadxällajzreni lo rextzuunreni con sa'reni loj rebejņ ni arumbee xtidx Dios.

⁹ 'Rniä lojtu, colquuil rexamiigwtu con reyälınasa'c ni räjpnu loj guedxliujre, te che abaraj xhixtentu, sica' Diostu xhaguibaa cadro yu' roliztu par tejpas.

¹⁰ 'Renani runsa'c dzuun lo te dzunbäz, sajca gunsa'cni dzuun lo te dzunro, luxh reni di gacdi gunsa'c dzuun lo te dzunbäz, di gacdiza gunsa'cni dzuun lo te dzunro. ¹¹ Ni'cni palga xhetlaadi cuarälņajtu

reyäl'nasa'c xten guedxliuj, 1xho guniidx Dios reyäl'nasa'c xtenni lojtu! ¹² Palga xhetlaadi cuaräl'näjtü xhixten bejn, 2chu guniidx lojtu ni gac xtenpactu, ä?

¹³ 'Nicla tej mos di gacdi gunni dzuun lo tio'p lam, sa'csi sidxe'chni lo tejni, steeni sinälajzni o susobdiajgpacni xtidx tejni, sibälazni steeni. Di gacdi gun bejn xtzun Dios laj ni sanälajztisni xcäl'nasa'cni.

¹⁴ Mbaj naj, refarisee, sa'csi rchaglazduxhrene meel, cacuadiagdzu'tzreni xtiidxni, dxejc caguxhisnäjreni Jesús. ¹⁵ Dxejcti räjp Jesús lojreni:

—La'tu najctu bejn ni ruhuii rebejn lojtu, naareni bensacduxhtu, niluxh acanajn Dios xhi xhigab rujntu nen lastootu. Sa'csi guiraa ni rchalojtu najc yäl'nasacduxh, guiraa ni'c rbixhlajz Diosni.

Xleii Moisés con xcäl'rnibee Dios

¹⁶ Räjpzani:

—Dxejli ni biäd Juan ni rutiobnis, guyu' xleii Moisés, näjza xtidx redade' ni gunii xtidx Dios. Cheni biäd Juan gusloj rsule' didxsa'c xcuent xcäl'rnibee Dios, ni'cni xhidajl bejn cagusutijp lajzni te jiu'reni loj yäl'rnibeega.

¹⁷ 'Per guyasiru nitloj xhaguibaa näjza guedxliuj quela di jialoj guiralii rediidx ni bacuaa Moisés; nicla tej diidxga di nitloj.

Ruluii Jesús xcuent ruro'n sa' bejn (Mt. 19:1-12; Mr. 10:1-12)

¹⁸ Räjpzani:

—Palga guro'n te bejn chääl'ni, dxejc guchnaani stee gunaa, rujnni dojl, luxh nani ruchnaa te gunaa ni abaro'n chääl'nini, niguiiga rujnzani dojl.

Te benrajp näjza Lázaro

¹⁹ Räjpzani:

—Guyu' te benrajp ni rchaglajz rajcwni ganax reladsacduxh, luxh guixe-guixe rujnni laniro. ²⁰ Guyu'za te benproob ni laa Lázaro ni rniab gojn, ricueni ro xlä' benrajpja, yu' guejdx ni rgaadz tiejxhni. ²¹ Rlajzni maläii xho gunni gauni nani rtejb loj xmex benrajpja, luxh direni gusaan. Dxejc rebä'cw sääd rilejp loj reguejdx ni rgaadz ni guidxa tiejxhni. ²² Guyu'ti te dxej gujt benproobga, biädläs rexangl Dios xaimni, huinärenini cadro yu' Abram xhaguibaa. Dxejcti näjza benrajpja gujt, huicua'tztirenini. ²³ Che yu'ni gabijl cadro rij guiraa rebendojl, ro'c cadejdni trabajwduxh. Dxejcti guläsni lojni, bahuiini zitduxh cadro suganäj Abram Lázaro. ²⁴ Dxejcti guredxaduxh benrajpja, räjpni lo Abram: "1Xtadä Abram! Balazlajz narä, baxhal Lázaro guhuajdxni yejc bicuenaani nis te gusiäl'yujni ludxä, sa'csi ree cadedä trabajwduxh lo guiboo." ²⁵ Luxh räjp Abram lojni: "Xi'nä, basaa lajzlu che gubajnlü lo guedxliuj gojplu guira'ti xhixtenlu, luxh sigajcza Lázaro gudejdni trabajwduxh. Per naj ree casilajzni, naj luj cadejdü trabajwduxh. ²⁶ Luxh di gacdi jääd Lázaro ro'c, sa'csi yu' te baladuxh ni rlia' sa'nu, te mase rlanj bejn guirui ree te tedreni lojlu ro'c, di gacdini. Di gacdzia ted reni yu' ro'c te jäädreni loonu." ²⁷ Dxejcti räjp benrajpja lojni: "Rniabduxhä lojlu, xtadä, baxhallaa Lázaro chääni roliz xtadä, ²⁸ sa'csi ro'c yu' gaii betzä, te chalijdxni laareni, te gusiechlajzreni, te di näjza laareni jäädreni ree cadro redej bejn trabajwduxh." ²⁹ Dxejc räjp Abram lojni: "Arajpreni gujtz cadro caj xleii Moisés näjza xtidx redade' ni gunii xtidx Dios, sugusobdiajgrenti redidixga." ³⁰ Luxh benrajpja badzu' diidxre, räjpni lojni: "Gulii dad Abram, per palga chäs te bejn loj rebengut, chanii lojreni, dxejc sii pet susiechlajzreni." ³¹ Dxejc räjp Abram lojni: "Palga direni gusobdiajg xtidx to Moisés näjza xtidx

redade' ni gunii xtidx Dios, dizareni chalilajz xtidx te bejn ni guibaṅsac loj rebeṅgut.”

17

Riesgw jiajbni lo dojl
(Mt. 18:6-7, 21-22; Mr. 9:42)

¹ Rājp Jesús loj rexpejnṅpacni:

—Siäädṅpac recos ni gun jiajb bejn lo dojl. Proobza bejn ni rujn riajb bejn lo dojl. ² Maaz guliibni te guij xten molin guejnni, gusäl bejnni lo nisdoo cadro jiätro quela gunni jiajb rexi'nä ni ahuililajz xtidxä. ³ ¡Colṅsusiñ!

Palga gun bejtzlu dojl lojlu, baliḃdxni. Palga gusiechljazni, basiäjł diidx con laani. ⁴ Masque gajdz huält nen teb dxej gunni dojl lojlu, palga jiädniini lojlu gajdz huält, naani: “Xhet laadi benä, basiäjł lajzlu”, basiäjł lajz con laani.

Bastioob xcälřirilaaaznu

⁵ Gunii rexpejnṅpacni lo Jesús, räjpreni:

—Dad, baniidxru yälřirilajz loonu.

⁶ Dxejc räjp Jesús lojreni:

—Palga rajptu yälřirilajz, mase najcni si'cti te bedzbāz xten muxhtas, sajc gābtu lo yagro rec: “Biliādxa' ro'c, guzuj galāii nisdoo”, susobdiajg yajgga xtiidxtu.

Ni riäjł gun te mos

⁷ Rājṅpazni:

—¿Chu tejtṅni ni rajp te mos ni riga'n o ni rigajp rexquidxaani ni gābni lojni che guibi'ni lo niaa: “Biu'ga, gurej lo mex te gaulu”? ⁸ Dini gāb si'c. Niluxh sājpni lojni: “Bachaa xhajblu. Bejn xhi gauā, gudanāni loā. Che luux gauā, yā'ā, dxejc sajc gauzalu, yāzalu.” ⁹ Dini gudeed xquixtios lo mosga sa'csi rujnṅni recos ni gunibeeni sa'csi si'c riājł gunni. ¹⁰ Sigajcza la'tu, che luux guntu guiraa redzuun ni guniā guntu, riājł guiniitu lo Dios: “Najcnu mos ni xhet sajcdi, nani riājł jiennu, ni'ctis biennu.”

Basiajc Jesús tzuu bejn ni rał tiejxhreni

¹¹ Lał ni sasaj Jesús nez guedx Jerusalén, gudejdni loj región Samaria nājza región Galilee. ¹² Che biu'ni tej reguejdxga, huichagloj Jesús tzuu bejn ni rajc te yālguijdx ni rał tiejxhreni, niluxh zijtru guzujreni. ¹³ Dxejc rbedxa'reni räjpreni:

—Jesús, Dad, Mastr, balaslajz nuurnu.

¹⁴ Che bahuii Jesús lojreni, räjpni lojreni:

—Colchāj, te fii rebixhojz abiajctu.

Lał ni sääreni, bia tiejxhreni. ¹⁵ Dxejc tejreni, che bahuiini abiajčni, gubiguxuṅni, cabedxa'ni calā'pni xpala'n Dios. ¹⁶ Bazuxhijbni nez loj Jesús, basajbni lojni lo yuj cagudeedni xquixtios loj Jesús. Luxh bejnre najc te benzijt, te beṅ Samaria. ¹⁷ Dxejcti räjp Jesús lojni:

—¿La et tzuudi najc reni biajc, ā? ¿Con sgaäreni? ¹⁸ ¿La rutru gubi'di loā te guiliā'preni xpala'n Dios, xtebtis benzijtre, ā?

¹⁹ Dxejc räjp Jesús loj bejnre:

—¡Huisulii, huij! Abiajclu sa'csi huililajzlu.

Xho guidzujñ xcälřimbee Dios
(Mt. 24:23-28, 36-41)

²⁰ Dxejc, sa'csi agunabdiidx refarisee loj Jesús guc guidzujñ xcäl̄rnibee Dios, badzu'ni diidxre, räjpni lojreni:

—Di xcäl̄rnibee Dios guidzujñ con seen ni sajc fiitu. ²¹ Diza bejn naa: “Bahuii, aniree”, o “Anirec”, sa'csi abidzujñ xcäl̄rnibee Dios lojtu.

²² Dxejc räjp Jesús lo rexpejñpacni:

—Sidzujñ dxej rlaizgatu fiitu te dxej sa' ni chu che jiädsac Xi'n Dios ni gujc Niguii, luxh ditu fiini. ²³ Luxh siniireni lojtu: “Aniree”, o “Anirec”, per na'c chäätu, na'cza chanajltu reni rihuii. ²⁴ Sa'csi sigajc ni rien che rdinya' te laad xhaguibaa hasta stelaad xhaguibaa, si'cza gac che jiälä narä, Xi'n Dios ni gujc Niguii, che gal dxej guibi'ä. ²⁵ Luxh ganiddoo sidedä trabajwduxh, sa'csi sibälaz rebeñ guedxliuj ni tre' naj narä. ²⁶ Si'cni gujc nen redxej cheni gubajñ toNoé, si'cza gac nen redxej che jiälä narä, Xi'n Dios ni gujc Niguii. ²⁷ Nen redxej ni gubajñ toNoé gudajwreni, gu'reni, bachñaareni, badeedzareni xindxa'preni guchnaa bejn, bidzujñli dxej cheni biu' toNoé nen barcwro ni bencheeni. Dxejc biääd nisguiduxh, gujt guiraa rebeñ dojl, guzääbreni lo nis. ²⁸ Sigajcza gujc nen redxej ni gubajñ toLo't: gudajwreni, gu'reni, gusiireni, bato'reni, gule'creni binij, bencheezareni rolijzreni. ²⁹ Niluxh cheni birii Lo't lo guedx Sodoma, biajb guiboo xhaguibaali, najza te däj ni rudxuii, gunitlojti guiraa rebeñ dojl, huejcreni. ³⁰ Sigajcza gac nen redxej cheni jiälä narä, Xi'n Dios ni gujc Niguii.

³¹ 'Dxejga, palga yu' chu niä'p yejc yu', diru gal̄di jiäjtñi te chalääni rexhixtenni ni yuchee nen yu'; palga yu' chu suga' nezjiät, di gal̄diruni guibi'ni rolijzñi. ³² Colgusnaj lajztu xhi gujc chääł toLo't. ³³ Ni rlaiz ga'p xcäl̄nabajñni lo guedxliujre, sunijtni, nani gunijt xcäl̄nabajñni lo guedxliujre xcuent rextidxä, xcäl̄nabajñni rajpni xhaguibaa.

³⁴ 'Rniä lojtu, guxhijnga ni jiälä lo tio'p reni naga' lo te da', chää tejni, steeni jia'n. ³⁵ Lo tio'p gunaa ni cayo't, chää tejni, steeni jia'n. ³⁶ Lo tio'p bejn ni yu' lo niaa, chää tejni, steeni jia'n.

³⁷ Che biejn diajgreni rediidxre, gunabdiidxreni lojni, räjpreni:

—Dad, ¿caro gac recosre?

Badzu' Jesús diidxre, räjpni:

—Cadro naga' te mangut, ro'c rdojñ regolbetz.

18

Xcuent te gunabiuud con te juejz

¹ Bijza Jesús te cuent ni ruluii lojreni, te guisieedreni xho riajl cuedx-guiniabreni lo Dios lacuaa gac-huin lajzreni, ² räjpni lojreni:

—Te guejdx guyu' te juejz ni di chalilajz xtidx Dios, dizani jiu rebejn.

³ Lagajc guejdxga guyu' te gunabiuud. Guixe-guixee rijni lo juejz, rniabni lojni gunni yäl̄guxhtis lo bejn ni rdxe'ch lojni. ⁴ Balti dxej naadti juejzga gun yäl̄guxhtisga. Dxejcti bejnñi xhigab, naani: “Mase dina guidxebä Dios, dizana jiuä rebejn, ⁵ sa'csi gunabiuudre sanuutisni siäädni loä, abasiedliini narä, gunälis yäl̄guxhtis xten gunaaga, te di chanuutis riädgusieedni narä.”

⁶ Dxejc räjp Jesús lojreni:

—Riejñ diajgtu xtidx juejzgujdxga, ⁷ Naj ¿xho di Dios, ni najc hueen, gucuaadijg xtidx rexi'nni ni rbedx-rniab lojni dxej-yääl? Di gaclaa gunni yäl̄guxhtis xcuent reni aguleni. ⁸ Ni'cni rniä lojtu, sungajcni yäl̄guxhtis par laareni. Luxh che guibi' Xi'n Dios ni gujc Niguii, ¿la sidxäl̄ni bejn ni rililajz xtiidxni lo guedxliuj?

Xcuent te farisee con te ni rusquijx impuest

⁹ Bij Jesús stee cuent ni ruluui loj rebejn ni rluiisi najc beŋsa'c, ni rchalo xhet sajcdi resabejnreni. Räjpmi:

¹⁰ —Tio'p dade' huij guidoo te huinabreni lo Dios. Tej ni najc farisee, steega najc te dade' ni rusquijx impuest. ¹¹ Sulii fariseega laĵ ni canabni lo Dios, räjpmi: “Dad, Dios, runidxä xquixtios lojlu sa'csi dina gacä si'c najc rebejn ni najc gubaan, ni najc beŋ nadiplajz, ni najc bendojĵ, dizana gacä si'c najc bejnre ni rusquijx impuest. ¹² Rucua'nä tio'p huält neŋ te xmaan, luxh rudedä te tzuu lo te beex loj guiraa ni runä gaan.” ¹³ Niluxh bejn ni rusquijx impuest, zijtru suga'ni, dini guiliäs lojni xhaguibaa. Catiälnaatisni lastooni, caniini lo Dios, räjpmi: “Dad, Dios, jbalaslajz narä, nacä te bendojĵ!” ¹⁴ Rniliäpac lojtu, ni rusquijx impuest rbaali lajzmi gubi'ni rolizjmi sa'csi badzucaj Dios rextojĵni, niluxh di Dios nudzucaj rextojĵ beŋ farisee. Sa'csi guiraa rebejn ni rlaiz guiliä'p lagajc xpala'nni, susanxtiujy Diosreni, dxejc reni di rlaiz guiliä'p lagajc xpala'nreni, siliä'p Dios xpala'nreni.

Benle' Jesús yejc rebixbüz

(Mt. 19:13-15; Mr. 10:13-16)

¹⁵ Yu'reni siädnä rexpiuxbäzreni loj Jesús te guzujni naani yejcreni. Che bahuii rexpejn pacni si'c, gusloj cadilidiidxreni con rebejn te na'c jäädnäreni rebixue'. ¹⁶ Dxejc gurejdx Jesúsreni, räjpmi lojreni:

—Colgusaan jääd rebixue' loä, na'c gudxojnjureni, sa'csi xcälrnibee Dios najc xten reni najc nadolajz si'c rebixbäze're. ¹⁷ Rniliäpac lojtu, chutis ni rlaiz jiu' lo xcälrnibee Dios nanab gusobdiajgreni xtidx Dios si'c rusobdiaj rebixue' xtidx xtadreni. Palga dini gun si'c, dini jiu' lo xcälrnibee Dios.

Te bi'n ni rajp xhidajĵ xhixtenni

(Mt. 19:16-30; Mr. 10:17-31)

¹⁸ Te bi'n ni rnibee gunabdiidx loj Jesús, räjpmi:

—Dad, mastrsa'c, çxhini'c nanab gunä te xca'ä yäl'nabajn par tejpas?

¹⁹ Dxejc räjpmi Jesús lojni:

—çXhicuent rniilu narä: “Mastrsa'c”? Rutru najcdi beŋsa'c, xtebtis Dios.

²⁰ Anajnlü xho najc remandamient ni caj lo xleii Moisés: “Na'c guesnäjlü gunaa ni di gac chäällu; na'c ju'tlu bejn; na'c cuanlu, na'c guiniilu didx-xhii xcuent bejn; bazoob xtidx xtadlu, xnanlu, bahuiizaren.”

²¹ Dxejc räjpmi bi'nga lojni:

—Guiraa remandamientre rusobä cheni gucäli biuux.

²² Che biejn diajg Jesús xtiidxni, räjpmi lojni:

—Tejtis cayäädx gunlu. Bato' guiraa rexhixtenlu, gudisni loj rebejn ni xhet rajpmi dxejc sajplu xcäl'nasa'clu xhaguibaa. Dxejc gudanajĵ narä.

²³ Che biejn diajg bi'nga rediidxre, guc-huinduxh lajzmi, sa'csi najcni te bejn ni rapduxh. ²⁴ Dxejc rdxelotjis Jesús lojni, guc-huinza lajzmi räjpmi:

—Naganduxh jiu' rebenrajpmi lo xcälrnibee Dios. ²⁵ Guyasiru ted te cameii ni' te guux lo ni jiu' rebenrajpmi lo xcälrnibee Dios.

²⁶ Reni biejn diajgmi rediidxre, räjpmi:

—çChuxhni'c sajç laa lo dojĵ, palga si'c najcni?

²⁷ Dxejc räjpmi Jesús lojreni:

—Guira'ti ni di gacdi gun rebejn, guyasi rajç rujn Diosni.

²⁸ Dxejc räjpmi Pedr lojni:

—Dad, nuurnu abasa'nnu guiraa rexhixtenu te siopnalnu luj.

²⁹ Dxejc badzu' Jesús diidxre lojni, räjpmi:

—Rniliäpac lojtu, chutis ni gusaan rolijzni näjza rexcuzajnni, rebejtzni, chäälni, xi'nni xcuent xcälrnibee Dios, ³⁰sica'ni xhiroobru lo guedxliujre, luxh sica'ni yäl nabajñ par tejpas.

Rusule' Jesús stehuält xho guetni
(Mt. 20:17-19; Mr. 10:32-34)

³¹Gurejdx Jesús rexpejn pacni te laad, te räjpni lojreni:

—Naj chonnu guedx Jerusalén cadro nanab soob rediidx nani bacuaa dade' ni gunii xtidx Dios galooli xcuent Xi'n Dios ni gujc Niguii. ³²Sutedrenini ladzña rebenzijt, suxhiznäjrenini, susacsärenini, sutiobxhejnlireni lojni, ³³luxh che luux quinenrenini, dxejc sugu'trenini, luxh ni riojn dxej siban sacni loj rebengut.

³⁴Dxejc laareni direni niacbee rediidxre, dizareni gan xhini'c caniini, sa'csi najcreni diidx ni di gacdi gacbeereni.

Rusiajc Jesús te beñ lotiä'p
(Mt. 20:29-34; Mr. 10:46-52)

³⁵Cheni sadzujñ Jesús te guejdx ni laa Jericó, sobga' te beñ lotiä'p ro' nezyuj, canabni gojn. ³⁶Che biejn diajgni cadejd xhidajl bejn lo nezyujga, gunabdiidx beñ lotiä'pga xhini'c cayajc. ³⁷Dxejc räjpreni:

—Jesús ni siääd Nazare't cadejdni nezga.

³⁸Dxejc guredxa'ni räjpni:

—¡Jesús, xi'n toDavid, balaslajz narä!

³⁹Rebejn ni nijd lojreni gudilnäjreni beñ lotiä'pga te jiäu ro'ni, niluxh laani dipru guredxa'ni, räjpni:

—¡Xi'n toDavid, balaslajz narä!

⁴⁰Dxejc guzudxi Jesús ro'c, gunibeeni jiädnäreni bejnga lojni. Che bidzujñni lojni, gunabdiidx Jesús lojni, räjpni:

⁴¹—¿Xhini'c rlajzlu gunnäá luj?

Badzu' beñ lotiä'pga diidxre, räjpni:

—Dad, rlazä jien loä.

⁴²Dxejc räjp Jesús lojni:

—¡Sujien balojlu! Abiajclu sa'csi huililajzlu.

⁴³Lagajc dxej, biengajc lojni, calä'pni xpala'n Dios, huinajlni Jesús. Luxh guiraa rebejn ni bahuii xhi guzajcni, gulä'pzareni xpala'n Dios.

19

Huij Jesús rolizj te bejn ni laa Zaqueo

¹Dxejc biu' Jesús guedx Jericó, sadejdzani guejdxga. ²Ro'c rbäjz te beñrapduxh, ni laa Zaqueo, ni rnibee lo reni rusquijx xcuent impuest. ³Rlajz Zaqueo fini loj Jesús te gumbeenini, per digacdi fini lojni sa'csi najcni te beñxhate', luxh xhidajl bejn siädsaj guideb gabi Jesús. ⁴Ni'c baxunni gunijdni lojreni, huä'pni lo te yajgro ni suga' gajxh nez cadro ted Jesús te si'c sajc fiini loj Jesús. ⁵Che gudejd Jesús nejzga, guläsni lojni jiaa, bahuiini cadro sobga' bejnre. Dxejc räjpni lojni:

—Zaqueo, basquejn biäjt ro'c, lagajc nadxej rlazä chajia'nä rolizjlu.

⁶Dxejcti biätguxun Zaqueo lo yajgga, rbalazduxhni huinäni Jesús rolizjni.

⁷Che bahuii guiraa rebejn xhi gujc, gusloj camojmreni, direni jiulajz, räjpreni:

—Jesús sajjia'n rolizj te bendojl.

⁸ Dxejcti huisulii Zaqueo, räjpni loj Jesús:

—Bahuilaare, Dad, gala' xhixtenä gudedä loj rebenproob; luxh palga yu' chu loj cua'ä xhixtenni con yälrusguee, sudzu'ä lojni tajp huält si'cti ni cua'ä.

⁹ Räjp Jesús lojni:

—Lagajc nadxej gubicaj xtojllu näjza xtojł reni rbäjz rolizlzu, sa'csi guliipac najclu te xagdoo toAbram. ¹⁰ Pues Xi'n Dios ni gujc Niguii biädtil rebenđojł te guslaani rebejnğa ni gunijt nenđojł.

Xcuent tzuu meel

¹¹ Lal ni cagucuaadijgreni xtidx Jesús, bijzani te cuent ni ruluii, sa'csi asiäddzujngajxhzeni guedx Jerusalén, luxh laareni rujnreni xhigab sisloj guinibee Jesús si'ctisni guidzujnni guejdxga. ¹² Dxejc räjpni lojreni:

—Guyu' te bejn, benrajpni, huijni te guejdx zijtro te gacni reii, dxejc guibisacni. ¹³ Che gajdni guirii, gurejdxni tzuu xmosni, te badeedni lo tebgajreni te melpla'ti ni sacduxh, räjpni lojreni: “Colyujn dzuun con meelre che guibisacäli.” Sä'tini. ¹⁴ Per reben lajdxni dipacreni guichaglaz bejnğa, ni'c baxhaleni gäii bejn te saye'tzreni: “Di rlajzdinu gacni xreiiinu.” ¹⁵ Luxh empac gujcni reii, dxejc guibisacni lajdxni. Che bidzujnni gurejdxni rexmosni ni badeedni meel cua'reni, te gacbeeni lac bejn tebgajreni gaan. ¹⁶ Ni bidzujn ganid räjpni lojni: “Dad, xmeellu bejn gaan stzuu meel.” ¹⁷ Dxejc räjp reii lojni: “Hueenca, luj najclu te mossac, sa'csi laaca bejnlu dzuun lo te dzunbäz, naj sunidxä guinibeelu loj tzuu guejdx.” ¹⁸ Bidzujn stee mos lojni, räjpni: “Dad, xmeellu bejn gaan gäii meel.” ¹⁹ Dxejcti räjpni lojni: “Luj guinibeelu loj gäii guejdx.” ²⁰ Bidzujnti stee mos lojni, räjpni: “Dad, aree xmeellu, guluchedzu'tzäni nen te baai ²¹ sa'csi bidxebä guejblu, sa'csi najc guejblu te ben nadiplajz, rutojpp guejblu cadro di guejblu nuzuj, luxh rliäsä guejblu cose'ch cadro di guejblu nibe'c.” ²² Dxejcti räjp reii lojni: “¡Mosguidx! lagajc ro'lu birii diidxi ni gunälu yälguhxtis. Palga najnlu nacä te ben nadiplajz, najnlu rutopä cadro dina nusuä, najnlu rliäsä cose'ch cadro dina nibe'cä, ²³ ¿xhicuent dilu nisa'n xmelä nen te bancw te che nibi'ä nica'a xmelä nägajc xi'n meelga?” ²⁴ Dxejc räjpni loj reni suga' ro'c: “Colgudzucaj meelga lojni, colgudeedni loj ni rajp tzuu meel.” ²⁵ Laareni räjpreni: “Dad, per laani arajpni tzuu meel.” ²⁶ Dxejc badzu' reii diidxre lojreni, räjpni: “Ni'cni rniä, reni rajp, sica'rueni, niluxh reni di ga'p lojreni sibicaj guiraa recosbäz ni rajpreni. ²⁷ Luxh xcuent reni rdxe'ch loä, ni di rlajz niacä reii lojreni, coltanäreni ree, colgugu'treni nez loä.”

Che biu' Jesús guedx Jerusalén

(Mt. 21:1-11; Mr. 11:1-11; Jn. 12:12-19)

²⁸ Che gulujuj guniini guiraa rediidxre, huinuuni xnejzni, sääni nez lo guejdx Jerusalén. ²⁹ Che asadzungajxhni reguejdx ni laa Betfagē näjza Betania, gajxh lo dajn ni laa Oliib, baxhalni tio'p rexpejnpacni, ³⁰ räjpni lojreni:

—Colchäj lo guejdx' ni suga' lad rec. Che guidzujntu, guidxältu caduu te bur huin ni gajd bejn cuib. Colguxhecni, coltanäni ree. ³¹ Palga yu' chu guini-abdiidxi lojtu: “¿Xhicuent caguxhectuni?” colye'tz lojni: “Dad caquiinnini.”

³² Sä'ti rexpejnpacni nani baxhalni, bidxälreni manga sigajctisni räjp Jesús.

³³ Cheni caguxhecni bure'ga, rexpaxhuaan bure'ga räjp lojreni:

—¿Xhicuent caguxhectu bure'ga, ä?

³⁴ Dxejc badzu'reni diidxre, räjpreni:

—Sa'csi caquiin Dadni.

³⁵ Sas huinäreni bure'ga loj Jesús, gudixhrenei xhajbreni dejtzni, te gubijb Jesúsni. ³⁶ Guideb cadre gudejd Jesús gudixhrenei xhajbreni lo nezyuj cadre tedni. ³⁷ Cheni ameer guidzujjni bajaad xten dan Oliib, gusloj cabaa lajz guiraa rebejn, rbexda'lireni calä'preni xpala'n Dios sa'csi bahuiireni guiraa remilagwr ni bejnii. ³⁸ Räjpreni:

Chichaa reii ni siääd xcuent Xtdadnu Dios te guinibeeni loonu.
Sucuedxilajz guiraa reni yu' guibaa, chä'p xpala'n Dios xhaguibaali.

³⁹ Dxejc gaii refarisee ni suga' galäii rebejn, räjpreni loj Jesús:

—Mastr, gudidxa' lo rebejn ni siädnaajllu te na'cru guiniireni si'c.

⁴⁰ Dxejc Jesús räjpreni lojreni:

—Rniliä lojtu, palga redee gusaü ro'reni, sibexda' reguijre.

⁴¹ Che bidzujjni gajxh, che bahuiini guedx Jerusalén, biin Jesús xcuent guejdxga, ⁴² räjpreni:

—¡Maläii gabeelu, masque neñ redxejre, xhini'c sajc guniidx yälrbexdilajz lojlu! Per naj naga'tzni, luxh digacdi fiilu lojni. ⁴³ Sidzujñ dxejga lojlu, cheni jiäd reni rdxe'ch lojlu sujnreni si'c te guralyuj guideb gabilu, nez lojlu sigajc nez dejtzlu sisiujreni. ⁴⁴ Susälta'reni luj lo yujli. Sugu'treni rebejn ni rbäjz ro'c, luxh nicla gusaanreni cuib te guij yejc sa'ni sa'csi dilu niembee dxej ni biäd Dios biädhuiilu.

Rusia Jesús neñ guidoro

(Mt. 21:12-17; Mr. 11:15-19; Jn. 2:13-22)

⁴⁵ Dxejcti biu' Jesús neñ guidoro, guslojni cabääni rebejn ni caguto' näjza reni casii. ⁴⁶ Dxejc räjpreni lojreni:

—Loj rexquijtz Dios caj rediidxre: “Rolizä sajc te yu' cadre jiädnahtu lo Dios”, niluxh la'tu abejntuni si'c te biliää xte gubaan.

⁴⁷ Guixe-guixee caguluii Jesús neñ guidoro, luxh reni rnibee loj rebixhojz näjza rebejn ni ruluii leii, näjza rebengool xte guejdxga caguuilreni mood te ju'trenini, ⁴⁸ luxh direni nidxäjl xho niujnrenini sa'csi guiraa rebejn cacuadiagdzu'tzreni xtiidxni.

20

Xcälrnibee Jesús

(Mt. 21:23-27; Mr. 11:27-33)

¹ Te dxej suga' Jesús neñ guidoro, caguluiini rebejn, cagusule'zani diidx xcuent xho guibicaj xtojlni, che bidzujñ reni rnibee loj rebixhojz näjza rebejn ni ruluii leii näjza rebengool, ² räjpreni lojni:

—¿Xhi yälrnibee rujnlu recosre? ¿Chu baniidx yälrnibeega lojlu?

³ Dxejcti räjpreni Jesús lojreni:

—Narä sigajcza gunä te yälgunabdiidx lojtu, colgudzu' diidxre loä, ⁴ ¿chuni'c baxhal Juan te gutiobnisni rebejn? ¿La Dios o la rebejn, ä?

⁵ Niluxh laareni guslojreni canabdiidx lo sa'reni, räjpreni:

—¿Xhichani'c jie'tznu? Palga jie'tznu Dios baxhalni, dxejc naani loonu: “¿Xhixhcuent ditu ninilajz xtiidxni?” ⁶ Palga jie'tznu: “Rebejn baxhalni”, guiraa rebejn sucuaa guij yejcnu, ju'tlireni nuurnu sa'csi laareni rujn-pacreni xhigab gunii Juan xtiidx Dios.

⁷ Dxejc badzu'reni diidxre, räjpreni:

—Dinu guidon chuni'c baxhal Juan te biädtiobnisni.

⁸ Dxejc räjpreni Jesús lojreni:

—Dizana guiniä xhi yälrnibee rapä te runä recosre.

*Xcuent remosgujdx**(Mt. 21:33-44; Mr. 12:1-11)*

⁹ Dxejc gusloj canii Jesús loj rebejn, bijni cuentre lojreni, rájpmi:

—Guyu' te bejn bazuj yaguub lo xyujni. Dxejc badeedlaanini lo gaii bejn cháäreni meed, sá'tnini zijt, gucladuxhni ro'c. ¹⁰ Che bidzujn dxej ni guidojpc cose'ch, baxhalni te xmosni sanab cose'ch ni riäjł xca'ni. Per laareni gudijnreni mosga, xhetliidi badeedreni chanáni lo xpaxhuaan yujga. ¹¹ Dxejcti baxhalni stee mos lojreni. Dxejc sigajcza gudilnäjrenini, gudijnrenini, luxh xhetza badeeddireni lojni, ganaxni gubi'ni lo xlamni. ¹² Dxejcti baxhalni ni riojn mos lojreni, per sigajcza gudinduxhrenini, barilaagwrenini.

¹³ "Dxejc bejn baxhuaanga xhigab, naani: "¿Xhichani'c gunä? Suxhalä xi'nä ni sanälazä; che fiireni lojni, pet siureni xtiidxni." ¹⁴ Dxejc che bahuii reni go'n-meed lo xi'nni, dxejc rájpmi lo sa'reni: "Laa deeni gac xtenni reyujre. Do'o guigu'tnuni te nuurnu xca'nu yujre gacni xtennu." ¹⁵ Dxejcti barilaagwrenini lo yujga, sas bagu'trenini.

Dxejc gunabdiidx Jesús lojreni, rájpmi:

—¿Xhichani'c gunnä xpaxhuaan yujga reben guijdxre, ä? ¹⁶ Sidzujpmi, sugu'tni guiraa reni cayujn dzun-meed lo yujga, dxejc sudeedni yujga lo garenca bejn.

Che biejn diajgreni rediidxre, rájpmi:

—iNa'c gusaan Dios gacni si'c!

¹⁷ Bahuii Jesús lojreni, dxejc rájpmi:

—¿Xhixhni'c caj lo guijtzc ni bacuaa redade' ni gunii xtiidx Dios galoo? Ro'c cajni:

Guij nani guläcaj renani runchee yu',

ni'c agujc guisa'c ni guzuj galoo.

¹⁸ Chutis ni jiajb yejc guijga, sianduxhni, per nani jiajb guijga yejcmi siujpaci, li däj gacni.

*Xcuent reimpuest**(Mt. 21:45-46; 22:15-22; Mr. 12:12-17)*

¹⁹ Reni rnibee loj rebixhojz, näjza reni ruluii leii rlajzreni guiniaazreni Jesús lagajc orga, sa'csi gucbeereni lojreni gunii Jesús cuentre, luxh xhet bejndireni sa'csi rdxejbreni rebejn. ²⁰ Dxejc cagula'tztisrenini, baxhalreni gaii bejn te gunsireni si'c ni najczeni bendxan, te gucuadiajgreni xtiidxni don gaxäjssi guiga'ni lo te diidx te guteedrenini lo yälguxhtis, yälrnibee xte gubernadoor. ²¹ Dxejc gunabdiidxreni lojni, rájpmi:

—Dad, Mastr, nadonnu laaca rnii guejblu, laaca ruluii guejblu, luxh di guejblu fixgaa la yu' chu najc bejn, ruluusa'c guejblu xnez lo Dios. ²² Gunilaa loonu, ¿la laaca guidiixnu reimpuest loj xcubieer César o la xhet laadini, ä?

²³ Sas gucbegajc Jesús cayujnsireni yälgunabdiidxga, dxejc rájpmi lojreni:

—¿Xhicuent runnäjtu narä scree? ²⁴ Baluii loä te xmeeltu. ¿Chucha yejc caj lojni, chucha laj caj lojni?

Dxejc rájpmi:

—Xten César.

²⁵ Dxejc rájpmi lojreni:

—Coldeed lo César nani najc xten César; coldeedza lo Dios nani najc xten Dios.

²⁶ Luxh direni niujn gaan niga'ni loj nicla te diidx ni guniini nez loj rebejn. Rdxelajtisreni lo rextiidxni, biäuti ro'reni, guzudxireni.

*Rniabdiidxreni xcuent yälrbañsac lo rebengut**(Mt. 22:23-33; Mr. 12:18-27)*

²⁷ Dxejc huij gaaɪ resaduceos huihuiireni loj Jesús. Di resaduceos chalilajz rbaɪsac beɲn lo rebɛɲgut. Ni'cni gunabdiidxreni loj Jesús, ²⁸ rǎjpreni:

—Dad, Mastr, basa'n Moisés guijtɔ loonu, lojga caj: “Palga guet te beɲn, gusaanni cháälɪni ruti xi'nɪni, nanabpac xca' bejtɔni gunaaga te chu xi'nɪni con laani xcuent tobejtɔni.” ²⁹ Guyu' gajdz niguii, bejtɔ najcɪreni. Sas cua' niguigalooga cháälɪni. Che gujtɪni ruti xi'nɪni. ³⁰ Dxejcti cua' ni rojɔɔga gunaaga. Che gujtɪni, rutiza xi'nɪni. ³¹ Sigajcza guzajz ni riojnga. Si'cza gulǎsnǎj gunaaga guigajdzɪreni. Guiraareni gujt, nicla tejɪreni di xi'nɪreni niu'. ³² Dxejcti nǎj gunaaga gujt. ³³ Guigajdzɪreni gulǎsnǎjɪreni gunaare, ni'cni, che guibaɪsacɪreni lo rebɛɲgut, ¿chu cháäl gacɪni, á?

³⁴ Dxejc rǎjɔ Jesús lojɪreni:

—Lo guedxliujɪre ruchɪnaa rebeɲn, rudeedzarenɪ xindxa'pɪreni ruchɪnaa. ³⁵ Niluxh rebeɲn ni agule Dios te cháälɪreni xhaguibaa, nǎjza te guibaɪsacɪreni loj rebɛɲgut, di reni'c guchɪnaa, dizarenɪ gudeed xindxa'pɪreni guchɪnaa, ³⁶ sa'csi diru gac guetɪreni, anajcɪreni si'c najc rexangl Dios. Laarenɪ najc xi'n Dios sa'csi abaspaɪsac Diosɪreni. ³⁷ Moisésli basule' xcuent ni rbaɪsac rebeɲ loj rebɛɲgut che bacuaani diidx xcuent yajɔ ni gurebajl. Ro'c gurejdxɪni Dios rǎjɔɔni: “Xtios Abram, Xtios Isaac, nǎjza Xtios Jacobo”, ni'cni nabajɪnpacɪreni lo Dios. ³⁸ Sa'csi di Dios gac Xtios rebɛɲgut; najcni Xtios rebeɲn ni nabajɪn par tejpas, sa'csi par laani guiraa rebeɲn nabajɪn.

³⁹ Dxejc gaaɪ reni ruluuɪ leii badzu'reni diidxɪre, rǎjɔɔɪreni lojɪni:

—Mastr, laaca guniilu.

⁴⁰ Sa'csi dirurenɪ niajɔ niniabdiidxrurenɪ lojɪni.

Chu xi'n najc Crist

(Mt. 22:41-46; Mr. 12:35-37)

⁴¹ Dxejcti rǎjɔ Jesús lojɪreni:

—¿Xho mood rniirenɪ Crist najc xi'n toDavid, á? ⁴² Ni lagajc toDavid bacuaa lo reguijɔɔ ni laa reSalmo:

Dad Dios rǎjɔ lo Xtadǎ:

⁴³ “Gurej xladbeǎ cheni guidzujɪni dxej ni gudzugǎ guiraa ni rdxe'ch lojlu te gacbeerenɪ luj rɪnibeelu guira'ti.”

⁴⁴ ¿Xho mood gacɪni xi'nɪni palga rɪni toDavid lojɪni “Dad”?

Rucuaquij Jesús reni ruluuɪ leii

(Mt. 23:1-36; Mr. 12:38-40; Lc. 11:37-54)

⁴⁵ Guiraa rebeɲn cagucuadiajɔ che rǎjɔ Jesús loj rexpejɪnpacɪni:

⁴⁶ —Coɔyajɔ cuidaad reni ruluuɪ leii, sa'csi rdaxaglaɔzɪreni rajcwrenɪ lajɔ siol, rlaɔzɪreni saru guini guiraa rebeɲn “xchan” lojɪreni, rlaɔzɪreni jiu bejɪreni nez loguii, rlaɔzɪreni cuereni lo reyagxhilsa'c nen reguidobǎz, nǎjza cadro rajc lanij. ⁴⁷ Rudzucaɔzarenɪ rexhixten regunabiuud, dxejc roɔɔrenɪ rele' siolduxh che rniabrenɪ lo Dios te fii rebeɲn, te naa beɲn najcɪreni beɲdxan, luxh lojɪreni suxhǎl Dios te castigwroru.

21

Gojɪn xten te gunabiuud

(Mr. 12:41-44)

¹ Nen guidoro bahuii Jesús cagusǎl rebeɲraɔɔ gojɪn nen te guijɪn cadro rdojɔ gojɪn. ² Bahuiizani lo te gunabiuud, lacti proobni. Basǎlɪni xcojɪnni nen guijɪnga, tio'ptis melbǎz basǎlɪni. ³ Dxejc rǎjɔ Jesús:

—Rniliäpac lojtu, gunabiuud proobga basälruni loj guiraa reni casäl gojn, ⁴sa'csi guiraa reddec ni cagusäl xcojnni casälreni tudxe'nsi xmeelreni, niluxh gunaare loj xcälproobni, basälni guiragajc ni rajpni te jio' xhi gauni.

Räjp Jesús sibijl guidoro
(Mt. 24:1-2; Mr. 13:1-2)

⁵Yu' reni cayujy diidx xcuent guidoro, räjpreni:

—Lacti sacruduxh rienni sa'csi guisa'c naccheeni, suchenäjzani xhidajl recossa'c ni badeed bejn si'c gojn.

Dxejc gunii Jesús lojreni, räjpni:

⁶—Sidzujn dxej sibijl guiralii ni cahuiitu, nicla tej guij di jia'n yejc sa'ni, guiragajcni sibijl.

Reseen ni chu che nitloj guedxliuj
(Mt. 24:3-28; Mr. 13:3-23)

⁷Dxejc gunabdiidx rexpejn pacni lojni, räjpreni:

—Dad, Mastr, ¿guc gacni? ¿Xhi seen chu che gac recosga?

⁸Räjp Jesús lojreni:

—¡Colsusin te na'c gusgueereni la'tu! Sa'csi xhidajl reni jiaäd sinii: “Narä nacä Crist”, o “Asiädgajxh redxej che jiaädni”, per na'c chalilajztu xtiidxreni, na'cza chanajltureni. ⁹Luxh che jiejn diajgtu cayajc guer cadilnäjä sa' bejn, na'c guidxejbtu, sa'csi ganid recosga gac, luxh gad gal di nitloj guedxliuj.

¹⁰Dxejc sanuu cayäjpni lojreni:

—Säjs te nación, sucuanäj stee nación, näjza te ladx bejn sucuanäj stee lajdx bejn. ¹¹Sajcza xuro, su' gubijn, su'za yälgujdx nez ree nez rec. Luxh xhaguibaali sien guiraloj ni ruchejb näjza seenro.

¹²Luxh ganid gac recosre, siniaazreni la'tu, sirinajlreni la'tu, suteedreni la'tu trabajw. Suteedreni la'tu lo reben guidobäz, susälzarenii la'tu neñ latzguiib, sinäzarenii la'tu dee loj reii näjza gubernador sa'csi rinälajztu xtidxä. ¹³Luxh guiraa nez sajctu te gac gusule'tu xtidxä lojreni. ¹⁴Na'c gunxgaatu xhigab neñ lastootu xhini'c guiniitu lojreni, ¹⁵sa'csi narä sunidxä diidx guiniitu, sunidxä yälnajn lojtu te digac gudzu'reni diidx lojtu niclaza gacdi guiniyajreni xtiidxtu. ¹⁶Näjza rex cuzajntu sibire lojtu, suto'reni la'tu, sigajcza rebejtztu, resa'tu, rexamiigwtu, luxh yu'tu sugu'treni. ¹⁷Guiraa rebejn guedxliuj sibälaz la'tu sa'csi rinälajztu xtidxä. ¹⁸Niluxh ni'cla tej xquidxejctu di nitloj. ¹⁹Luxh palga sutijptis lajztu, sajptu yäl nabajn par tejpas.

²⁰'Che fiitu tre' xhidajl soldaad guideb gabi guedx Jerusalén colyacbee abidzujn dxej ni guibijl ni. ²¹Dxejc reni yu' guedx Judea, nanab guxunreni chacuatzlojreni neñ redajn; reni yu' guedx Jerusalén, nanab jiunejzreni ro'c; reni suga' lo niaa, na'c guibi'reni lo guejdxga, ²²sa'csi neñ redxejga sujn Dios fis lo guejdxga te soob rediidx ni caj lo reguijtz xten Dios. ²³Probe'za regunaa ni nuu báz neñ redxejga, näjza regunaa ni ca' báz, sa'csi su' yälhuinduxh lo guedxliuj, näjza fis ni gun Dios loj rebejnga. ²⁴Yu'reni guet lo guer, yu'zarenii chää pres, sijreni balti guedxzijt. Dxejc rebenzijt sinibee guedx Jerusalén che guiza'li redxej ni gusaan Dios guinibee rebejn ni di gac xpejn Israel.

Cheni jiaäd Xi'n Niguui
(Mt. 24:29-35, 42-44; Mr. 13:24-37)

²⁵Räjpzani:

—Dxejc su' seen lo gubijdx nájza lo báii, nájza loj rebajle' ni yu' xhaguibaa. Luxh lo renacion guedxliuj su' rebejn yársia', di jien xhi gunreni, sidxeb-duxhreni sa'csi siejn diajgreni chubeduxh lo nisdoos, sásduxh nis ni rájs lo nisdoos. ²⁶ Sitol rebejn xcuent yálrdebduxh che gunreni xhigab xhicharuni'c gac lo guedxliuj, sa'csi náj guideb guibaa sinibsejs. ²⁷ Dxejcti suhuiireni lo Xi'n Dios ni gujc Niguui, siáadni lo te za guideb xcálrnibeeni, nájza yálrdimbichaduxh. ²⁸ Che guisloj gac recosre, colsutijp lajztu, colguiliás yejctu, colguibalajz sa'csi asadzujn dxej gusilajztu.

²⁹ Guniizani stee cuent lojreni, rájpní:

—¡Colhuii lo yagiigw nájza lo guiraa reyajg! ³⁰ Che fiitu acabääni be'n, colyacbee lagajc la'tu, abidzungejxh báii nisguuj. ³¹ Sigajcza che fiitu agusloj cayajc recosre, colyacbee asiáddzujn xcálrnibee Dios.

³² 'Rniliápac lojtu, guiraa recosre sajc ansde guet rebejn ni yu' naj. ³³ Guibaa nájza guedxliuj sinitloj, rextidxá dini nitloj.

³⁴ ¡Colsusin lagajc la'tu! Na'c gusaantu cha lajztu yálräusa'c, yálrä', yálga'ptu xhixtentu, dxejc ditu gacbee che bidzujn dxejga. ³⁵ Sa'csi si'c sidzujn dxejga loj guiraa rebejn guedxliuj. ³⁶ Colsusin, colbejdx, colguiniabtis lo Dios, te gac laatu lo guira'ti ni gac, gacza suutu nez loj Xi'n Dios ni gujc Niguui.

³⁷ Rdxee ruluii Jesús nen guidoro dxejc guxhijn sajia'nni yejc dan Oliib.

³⁸ Rsilru ristie rebejn te rdzujnreni lo Jesús nen guidoro casob rsil, te gucua-diajgreni rextiidxni.

22

Ria'nreni diidx xho guiniaazreni Jesús (Mt. 26:1-5, 14-16; Mr. 14:1-2, 10-11; Jn. 11:45-53)

¹ Siáddzungejxh dxe lanij che rajwreni yátxtiil ni di säguuj, laaza lanijga pascw. ² Dxejc reni rnibee loj rebixhojz nájza rebejn ni ruluii leii caguiilreni xho gunreni te ju'treni Jesús, sa'csi rdxejbreni rebengejdx.

³ Dxejc biu' bendxab lastoo Judas ni laaza Iscariote, ni najc tej retzubi-tio'p xpejn pacni. ⁴ Dee huininájni dade' ni rnibee loj rebixhojz nájza loj reni rnibee rexcuxhtis guidoo. Gunináj Judasreni xho gunni te guteedni Jesús ladznaareni. ⁵ Dxejc bibalajzreni, bia'nreni diidx guudeedreni meel lojni. ⁶ Cuájbtí Judas, dxejcní guslojni caguiilni xho gunni guteedni Jesús ladznaareni che rut bejndi suga'.

Xchej xten Dad Jesús (Mt. 26:17-29; Mr. 14:12-25; Jn. 13:21-30; 1Co. 11:23-26)

⁷ Bidzujn dxe lanij che rajwreni yátxtiil ni di säguuj, che rugu'tzarení te xiil si'c ni caj lo xleii to Moisés. ⁸ Dxejc baxhal Jesús Pedr nájza Juan, rájpní lojreni: —Colchayejn xchej xten pascw te guidaununi.

⁹ Dxejc laareni gunabdiidxreni lojni, rájpní:

—¿Caro rlaizlu choyennuni?

¹⁰ Rájpní Jesús lojreni:

—Cheni jiu'tu lo guejdx, sidxaagtu te dade' ni nuu te re' nis. Colchanajlni, coljiu' roliz bejn cadro jiu'ni laani. ¹¹ Dxejc colye'tz lo bejn ni najc rolizni ro'c: “Si'c naj Dad Mastr: ¿Con yu' cadro sajc gauxchenää rexpená naj pascw?” ¹² Dxejc guluiini lojtu te yu' ni sojb jiaa yejc stee yu'. Asuchexgaa yu'ga. Ro'c colyejn xhi guidaunu.

¹³ Sã'tireni. Si'ctis ni räjp Jesús lojreni, si'cpac bidxälreni. Dxejc bejnreni xchej xte lanij pascw gaureni.

¹⁴ Che bidzujñ or, gurenäj Jesús rexpejn pacni lo mex. ¹⁵ Dxejc räjpni lojreni: —Guyuduxhä gaan gaunääpactu xchej xten pascw ansde tedä trabajw-duxh. ¹⁶ Sa'csi rniä lojtu, diruna gaunää la'tu pascw cheni guidzujñli dxej ni gacni lo xcälrnibee Dios.

¹⁷ Dxejc cua'ni te co'p, badeedni xquixtios lo Dios, räjpni:

—Colyã' dee, colgudeedni lo sa'tu. ¹⁸ Sa'csi rniä lojtu, diruna yã'ä nis ni riijejc uub stehuält cheni guidzujñli xcälrnibee Dios.

¹⁹ Dxejcti cua'ni yãxttiil, badeedni xquixtios loj Dios, gula'nini, gudisnini lojreni, räjpni:

—Dee najc si'c tiexhä ni gudedä ju'treni xcuenttu. Colyejn screeza te guinalajztu narä.

²⁰ Si'cza bennäjni co'p che gulujx gudajwreni, räjpni lojreni:

—Ni yu' nen co'p najc si'c xtienä ni guixe' che ju'treni narä xcuenttu te si'c jiu' didxcoob ni jia'n Dios con rebejn ni aguleni.

²¹ 'Per bahuilaare, bejn ni guto' narä sobganäj narä lo mexre. ²² Guliipacni, Xi'n Dios ni guj Niguüi sinuu tedni loj nezyuj ni abalüi Dios lojni. Luxh proobza bejn ni guto' narä.

²³ Dxejc gusloj canabdiidxreni lo sa'reni, ¿chuchani'c gunni?

Cayejyreni chuni'c najc beñroru

²⁴ Sas gusloj cayejyreni, don chuni'c guibee gac beñro lojreni.

²⁵ Dxejcti räjp Jesús lojreni:

—Rereii ni rnibee lajdx bejn ni digac xpejn Israel, rnibeereni lojreni astoo xtenpacreni najc reguejdxga. Luxh rebeñguejdxga rniilacti hueen najc rereiiiga. ²⁶ Per la'tu na'c gactu si'c. Nani najc beñgoolru lojtu, ni'c riäjli gacni si'c najc ni huinru lojtu. Luxh nani rnibee riäjli gacni si'c mos. ²⁷ ¿Chuni'c sajrcu lo bejn? ¿La bejn ni rbej lo mex te gauni o la ni ruted xhi gaureni lo mex? ¿La xhet sajcdiru bejn ni sojb lo mex, ä? Niluxh narä yu'ä lojtu si'c ni ruted xhi gauni.

²⁸ 'La'tu najctu ni gusunäj narä guideb ni gudedä retrabajw ni gudedä.

²⁹ Ni'cni narä runidxä yälrnibee lojtu sigajc ni baniidx xtad yälrnibee loä, ³⁰ te gautu, yätu lo xmexä xhaguibaa, te cuezatu lo yaxxhil cadro guntu yälguxhtis loj rexpejn guitzubitio'p rexagdo Israel.

Räpxгаа Jesús di Pedr guicäjñ numbeeni

(Mt. 26:31-35; Mr. 14:27-31; Jn. 13:36-38)

³¹ Räjp Jesús loj Simón:

—Simón, Simón, agunab beñdxab ni laa Satanás luj te gusniibni luj si'c rusniib bejn xob te jiani. ³² Narä agunabä lo Dios xcuentlu te na'c jiaädx xcälrililajzlu. Luxh luj che gusiejch lajzlu, guibi'lu, bastioob lastoo resa'lu.

³³ Räjp Simón lojni:

—Dađ, narä sirinalälu; mase gusaüreni luj latzguiib, näjza narä siäunäälu; mase ju'treni luj, näjza narä setnäälü.

³⁴ Dxejcti räjp Jesús loj Simón:

—Pedr, rniä lojlu, nicla gajd guidgaii cuedxa' nadxej niluxh luj alaräjplu choñli huält, dipaclu gumbee narä.

Nanab soob rediidx ni bacuaareni xcuent Jesús

³⁵ Dxejc gunabdiidx Jesús lojreni räjpni:

—Che ganaxtu baxhalä la'tu, xhet bolsdi sanätu, nicla carteerdi, niclaza stee gura'chdi, ¿la yu' xhi biquiintu, xhi biäädx lojtu, ä?

Dxejc räjpreni:

—Xheti.

³⁶ Dxejc räjpni lojreni:

—Luxh naj rniä lojtu, ni rajp bols, suchanänini; sigajcza carteer. Luxh ni di ga'p espaad, guto'ni xchamarni te siini tejni. ³⁷ Sa'csi rniä lojtu, sisiojb rediidx ni caj lo requijtz Dios xcuentä, cadro caj: “Bigabnäjni reben latsiaj.” Guiraa ni caj lo reguijtz xten Dios xcuentä nanab soobpacni.

³⁸ Dxejc räjpreni lojni:

—Dad, aree tio'p espaad.

Dxejc räjpni lojreni:

—Sajl reni'c.

Rbedx-rniab Jesús loj Dios
(Mt. 26:36-46; Mr. 14:32-42)

³⁹ Dxejcti birii Jesús, si'cni rujnpacni, sääni nez dajn ni laa Oliib. Dxejc sanajl rexpejnpacni. ⁴⁰ Che bidzujnreni ro'c, räjpni lojreni:

—Colcuedx, colnab lo Dios te na'c jiajbtu lo dojl.

⁴¹ Dxejc gubicaj Jesús lojreni, huijni te lajt zite' cadro suga'reni, si'cti cadro rdzujn te guib te rucuaanini. Ro'c bazuxhijbni, gurejdx-gunabni lo Dios, ⁴² räjpni:

—Xtadä, palga rlajzlu, baslaa narä loj trabajwduxhre. Niluxh na'c gacni si'c ni rlazä narä. Bejn si'cni rlajzlu gunlu.

⁴³ Dxejc biricaj te xangl Dios lojni te badeedni yälrutiplajzni. ⁴⁴ Lałni cadejdni trabajwduxh, cayac-huinduxh lajzni, cabedx-canabrui lo Dios. Guzunislini gusloj catejb lo yuj biniduxh si'c rejn lojni.

⁴⁵ Cheni huisuni, gulujx gurejdx-gunabni lo Dios, huijni cadro suga' rexpejnpacni. Ro'c bidxälnireni nagayejs guiraareni sa'csi cayac-huin lajzreni.

⁴⁶ Dxejc räjpni lojreni:

—¿Xhicuent nagayejstu? ¡Colchastie! ¡Colnab lo Dios te na'c jiajbtu lo dojl!

Che gunaazreni Jesús
(Mt. 26:47-56; Mr. 14:43-50; Jn. 18:2-11)

⁴⁷ Lał ni canii Jesús lojreni, bidzujn xhidajl bejn. Tej rexpejnpacni ni laa Judas, nijdni nez loj rebejnnga. Dxejcti gubigni loj Jesús, te bachagro'ni loj Jesús. ⁴⁸ Dxejc räjp Jesús lojni:

—Judas, ¿la con te yälruchagro' ruteedlu Xi'n Dios ni gujc Niguui ladzña rebejnre, ä?

⁴⁹ Che bahuii reni suganäj Jesús xhini'c cayajc ro'c, gunabdiidxreni loj Jesús, räjpreni:

—Dad, ¿la sixa'tnu yejcreni con spaad, ä?

⁵⁰ Sas tej rexpejn Jesús gudilnäj te mos xten ni rnibee loj rebixhojz, batiu'ni diajgni ladbee. ⁵¹ Dxejc räjp Jesús lojreni:

—¡Agujc! ¡Colgusaanreni!

Dxejc gudajn Jesús diajg mosga, basiajcnini. ⁵² Gunigajc Jesús loj reni rnibee loj rebixhojz näjza reni najc guixhajg xten guidoo näjza rebejgool, guiraa reni siädxiinini, räjpni:

—¿La siädnätu spaad näjza garo't, astoocanu siädxiitu te gubaan, ä? ⁵³ Cheni suga'a lojtu guixe-guixee nen guidoo, ditu nuhual narä. Per dee najc xortu, luxh arnibee yälmacäy la'tu.

*Di Pedr guicäjɔ numbeeni Jesús**(Mt. 26:57-58, 69-75; Mr. 14:53-54, 66-72; Jn. 18:12-18, 25-27)*

⁵⁴ Dxejcti gunaazreni Jesús huinärenini roliz bixhojz ni rnibee lo guiraa rebixhojz. Siädnäjl Pedrni zit-zijt. ⁵⁵ Che bidzujnreni gule'creni guiboo galäii lole' xten bixhojzga, gurejreni guideb gabi, te bidxa' lajzreni. Näj Pedr nadxaag lojreni gurej ro'c. ⁵⁶ Dxejc te gunaä ni rujn dzuun ro'c, che bahuiini sobga' Pedr ro'c, rdxelojtisi lojni, räjpni:

—Näj niguiire guyunäj Jesús.

⁵⁷ Dxejc basuni' Pedr räjpni:

—Nan, dina gumbeäni.

⁵⁸ Che gojl stera't, che bahuii stee bejn lojni, räjpni lojni:

—Näj luj najclu te rexpeljni.

Per Pedr räjp lojni:

—Gurniälojlu, Dad, dina gacä xpejñni.

⁵⁹ Che gudejd si'cti teb or, räjp stee bejn lojni:

—Guliipacni, näj bejnre guyunäjni, sa'csi laani najczani te bejn Galilee.

⁶⁰ Dxejc räjp Pedr lojni:

—Gurniälojlu Dad, dipacna ganä xhini'c caniilu loä.

Lałni canii Pedr rediidxre, guredxa' te guidgaii, ⁶¹ luxh gubiréza Jesús, bahuidzu'tzni lo Pedr, dxejc banalajz Pedr nani gunii Jesús lojni, räjpni: “Che gajd guidgaii cuedxa', abazuni'lu choñ huält, räjpļu dilu gumbee najrä.”

⁶² Dxejcti guc-huin lajz Pedr, biriini ro'c, ronduxhni.

*Rniyajreni Jesús**(Mt. 26:67-68; Mr. 14:65)*

⁶³ Rebejn ni canäj Jesús, gusloj caguxhisnäjärenini, caguijnzareneni. ⁶⁴ Dxejc basäurenini lojni, gudajpreni lojni, räjpreni lojni:

—¡Gunii chuni'c gudijnlu!

⁶⁵ Luxh guiralaj cayäjbreni lojni, caniyaduxhrenini.

*Bidzunäjreni Jesús nez loj rebixhojz**(Mt. 26:59-66; Mr. 14:55-64; Jn. 18:19-24)*

⁶⁶ Che bara yääl, bidojɔ rebengool ni rnibee, näjza reni rnibee loj rebixhojz, näjza rebejn ni ruluii lei, huinäreni Jesús te suuni nez lojreni neñ yu' cadre rujnreni yälguxhtis. Dxejcti räjpreni lojni:

⁶⁷ —Palga luj najclu Crist, bicäjɔni loonu.

Dxejc badzu' Jesús diidxre lojreni, räjpni:

—Palga guicäpäni, ditu chalilajz. ⁶⁸ Luxh palga gunä te yälgunabdiidx lojtu xcuent Crist, ditu gudzu' diidxga loä. ⁶⁹ Per ñajli sibej Xi'n Dios ni gujc Niguii xladbee Gueb Dios ni yu' xhaguibaa.

⁷⁰ Dxejc gunabdiidx guiraarenini lojni, räjpreni:

—Mbaj pues, ¿la luj najclu Xi'n Dios, ä?

Dxejc badzu' Jesús diidxre lojreni räjpni:

—Nacäni, si'cni najtu la'tu.

⁷¹ Dxejc räjpreni lo sa'reni:

—¿Xhirucxhamaaz rlaiztu? Dirunu guiquiin diidx guinii bejn, sa'csi lagajc nuurnu abiejn diajgnu diidx ni guniini lagajc laani.

23

*Jesús nez loj Pila't**(Mt. 27:1-2, 11-14; Mr. 15:1-5; Jn. 18:28-38)*

¹ Dxejc huisu guiraareni, huinäreni Jesús nez loj Pila't. ² Ro'c guslojreni cabe'creni xquejni, räjpreni:

—Bidxälnu bejnre cayujnni biegy lo rexpejnnu. Räjpzani xhet nanabdi quixnu impuest lo reii César. Caniizani laani najcni Crist, nalajznu najczani reii.

³ Dxejc gunabdiidx Pila't lojni, räjpni:

—¿La luj ni najc reii xten rexpejn Israel, ä?

Sas badzu' Jesús diidxre räjpni:

—Najcni lagajc si'c ni guniilu.

⁴ Dxejc räjp Pila't loj reni rnibee loj rebixhojz näjza loj guiraa rebejn:

—Dina guidxälä nicla tej dojl xten bejnre.

⁵ Niluxh laareni sanuutis caniireni, dipru caniireni, räjpreni:

—Guiraa reben Judea cayu' yärsia' xcuent xcäl_ruluiini. Guslojni guedx Galilee, luxh reeli sanuu caguluiinini.

Jesús nez loj Herodes

⁶ Che biejn diajg Pila't rediidxre, gunabdiidxni: “¿La Galilee siääd bejnğa?”

⁷ Cheni räjpreni ro'c siäädni, baxhalnini loj Herodes ni najc gubernadoor xten Galilee, sa'csi neñ redxejga yu' Herodes guedx Jerusalén. ⁸ Che bahuii Herodes loj Jesús, bibalajzni sa'csi agujc xchej rlanjzi fiini lojni, sa'csi abiejn diagni diidx xcuent ni cayujnni. Luxh rlanjzi fiini gunni te milaagwr.

⁹ Xhidajl yälgunabdiidx bejn Herodes, luxh xhet guniidi Jesús. ¹⁰ Ro'c suga'za reni rnibee loj rebixhojz näjza rebejn ni ruluii leii, cabecduxhrureni xquejni.

¹¹ Dxejc gulälaz Herodes näj rexsoldaadni Jesús, baxhiznäjrenini, ni'c bashuajcwenini te ladsa'c sa' ni rajcw reii, dxejcti baxhalsacrenini loj Pila't. ¹² Lagajc dxejga, Pila't näjza Herodes gujcreni amiigw, luxh galoo bidxe'ch lo sa'reni.

*Gunibeereni guet Jesús**(Mt. 27:15-26; Mr. 15:6-15; Jn. 18:39–19:16)*

¹³ Dxejc gurejdx Pila't reni rnibee loj bixhojz, näjza rebengool ni najc guxhtis, näjza rebenguejdx. ¹⁴ Dxejc räjpni lojreni:

—La'tu biädñatu bejnre loä, najtu caguquini rebejn gunreni biegy, luxh narä agunabdiidxä guiraloj lojni nez lojtu, luxh abahuiitu dina nidxälä nicla tej dojl ni cagucuaquijtuni. ¹⁵ Niclaza Herodes di nidxäl nicla tej dojl, ni'cni baxhalsacnini loonu, luxh abahuiitu xhet dojldi bejnne te guetni. ¹⁶ Ni'cni quinäni, dxjecti guslääni.

¹⁷ Najc costumbr rusläa Pila't te bejn ni yu' neñ latzguiib casob rajc lanijre.

¹⁸ Per guiraareni guredxa'reni si'c tejsi bejn, räjpreni:

—¡Bagu't bejnre, basläa Barrabás!

¹⁹ Barrabás najc ni basälreni latzguiib sa'csi batojpni te cuaa bejn ni bacuanäj resoldaad xten Rom, näjza sa'csi yu' chu bagu'tni. ²⁰ Rlajzpac Pila't gusläani Jesús, ni'c gunisacni lojreni, ²¹ niluxh rebejn dipru guredxa'reni, räjpreni:

—¡Bacuaani lo cruzj, bacuaani lo cruzj!

²² Riojn gunisac Pila't lojreni, räjpni:

—¿Xhi dojlduxh bejnne? Xhetlidi dojl rdxälä bejnne te guetni. Ni'cni siguinäni dxejc suslääni.

²³ Luxh laareni sanuutis guredxa'reni, gunabreni xcajni lo crujz. Luxh sa'csi guredxa'tisreni, bejntireni gaan gujc si'c ni rlanjreni. ²⁴ Dxejc cuäjb Pila't gunibeeni gac si'c ni gunabreni. ²⁵ Dxejc baslaani bejn ni yu' latzguiib sa'csi bejnini bieje, bagu'tzani bejn, dxejc badeedni Jesús lojreni te gunnäjrenini si'ctis ni rlanjreni.

Che cuaj Jesús lo crujz

(Mt. 27:32-44; Mr. 15:21-32; Jn. 19:17-27)

²⁶ Cheni sanäreni Jesús xcaj lo crujz, gunaazreni te bejn ni laa Simón ni siääd guedx Cirene; basaj bejnga lo niaa. Dxejc basguurenini crujz, siädnajltini dejt Jesús.

²⁷ Siädnajlza xhidalduxh bejn, näjza xhidajl gunaa ni cayonduxh, cabedxa'reni sa'csi cayac-huinduxh lajzreni xcuent Jesús. ²⁸ Dxejc gubiré Jesús, räjpni lojreni:

—Gunaa Jerusalén, na'c roontu xcuentä, colyoon lagajc xcuenttu näjza xcuent rexi'ntu. ²⁹ Sa'csi sidzujñ dxej gäbreni: “Chicbaa regunaa ni di gacdi chu xi'nni, chicbaaza reni di nuxi'n, renani di nusiä' báz.” ³⁰ Dxejc guisloj rebejn gäb loj redajn: “Coljiajb yejcnu”, säjhzareni loj relom: “Colgucua'tz nuurnu.” ³¹ Palga scree runnäjreni narä ni nacä si'c te yagnaga, aticaxh gunnäjreni la'tu ni najc si'c te yagbijdz.

³² Sanäzareni tio'p beñgujdx xcajzareni loj recruijz, guetnäjreni Jesús. ³³ Che bidzujñreni te lajt ni laa Calabeer, ro'c bacuaareni Jesús lo te crujz, bacuaazareni guiro'p reñgujdxga lo stio'p crujz, tejni xladbee, steeni xladbäjgwni. ³⁴ Cheni cagucuaa rebejn reni lo crujz, gunii Jesús, räjpni:

—Xtadä, badzucaj xtojñ rebejnre, sa'csi direni gan xhini'c cayujñreni.

Dxejc gudzujt resoldaad daad yejc xhajbni, te gudisreni xhajbni cua'renini. ³⁵ Suga' rebejn ro'c cadxelojtisreni. Näjza reguxhtis caguxhisnäreni laani, cayäjpreni:

—Balti bejn baslaani, naj suguslaani lagajc laani palga guliini laani najcni Crist ni gule Dios.

³⁶ Näjza resoldaad caguxhisnäjni, gubigreni lojni te badeedreni bin-nii yäni. ³⁷ Dxejc räjpreni lojni:

—Palga guliij najclu reii xten rexepejn Israel, baslaa lagajc luj.

³⁸ Luxh bacuaareni gaii diidx loj te baräjd ni cuaj yejc crujz. Con didx griegw, con didx latín, näjza didx hebreo, bacuaareni scree: “Dee najc Reii xten rexepejn Israel.”

³⁹ Te reben gujdx ni najl lo te crujz ni caj cuä'ni caniyajni Jesús, räjpni lojni:

—Palga luj najclu Crist, baslaa lagajc luj nägajcza nuurnu.

⁴⁰ Per beñgujdx ni najl lo crujz stelaadga gudidxa'ni loj stee beñgujdx ni caniyaj Crist, räjpni:

—¿La dilu guidxejb Dios? ¡Ni cayajczalu tejsi castiigw! ⁴¹ Per nuurnu cayajcnu castiigw ni riäjñ gacnu te guidiixnu redojl ni bienu. Luxh laani xhet dojldi bejnini.

⁴² Dxejc räjpni loj Jesús:

—Bazalajzlu narä che guidzujñlu lo xcälñrimeelu.

⁴³ Dxejc badzu' Jesús diidxre, räjpni lojni:

—Rniliäpac lojlu, lagajc nadxej chunäjlu narä xhaguibaa.

Che gujt Jesús

(Mt. 27:45-56; Mr. 15:33-41; Jn. 19:28-30)

⁴⁴ Agojl si'cti läidxej. Dxejc bicäy guidēb guedxliuj, si'c bianxcäy si'cti rcahonti. ⁴⁵ Bicäy lo gubijdx, luxh ladró ni najl neñ yudxanro xten guidoro, biräjsni gucni tio'p la'. ⁴⁶ Dxejcti guredxa' Jesús, räjpni:

—Xtadä, ladzñaalu rutedä xaimä.

Che guniini si'c, gujtini.

⁴⁷ Che bahuii capitán ni rnibee loj resoldaad guiraa ni guzajc, gulä'pni xpala'n Dios, räjpni:

—Guliipacni, xhet dojlđi bejn bejnre.

⁴⁸ Guiraa rebejn ni suga' ro'c ni bahuii guiraa ni guzajc ro'c, gubi'reni rolizreni, cayäazreni lagajc lastooreni. ⁴⁹ Luxh guiraa reni rumbee Jesús, näja regunaa ni biädñajni che biriilini Galilee, zijtru bia'nreni cahuiireni guiraa recos ni cayajcre.

Che biga'tz Jesús

(Mt. 27:57-61; Mr. 15:42-47; Jn. 19:38-42)

⁵⁰ Guyu' te bejn ni laa José, lacti huen najcni, luxh laaca rujnni guira'ti. Siädni guedx Arimatea, región Judea. Nadxaagzani loj reni rnibee neñ guidoro xten rexpejn Israel. ⁵¹ Cabäjjza José jiäd yälrnibee xten Dios, ni'cni dini nidxagljaz nani bejn resa'ni. ⁵² Dxejcti huijni lo Pila't, gunabni tiejxh Jesús. ⁵³ Che gulätnini lo cruzj, batejbnini neñ te bariaad, dxejcti bacua'tznini neñ te baa ni guc-chee cuä' te guilaj. Nacoob baaga, nicla tej bejn gajd guiga'tz ro'c. ⁵⁴ Dxejga najc dxej ni rusucheereni guira'ti, luxh agojl jiu' dxej ni rusilajzreni.

⁵⁵ Regunaa ni guzanäj Jesús che biriilini Galilee huihuiireni robaaga te bahuiireni xho gudixhrenei togoolda neñ baa. ⁵⁶ Che gubi'reni rolizreni bencheereni recuaan ni rlianexhduxh näj te ni najc si'c te saj ni rlianexhduxh ni ruzaareni retogool. Dxejcti basilajzreni dxej ni rusilajz bejn, si'cni caj lo xleii Moisés gunreni.

24

Che gubañsac Jesús lo rebengut

(Mt. 28:1-10; Mr. 16:1-8; Jn. 20:1-10)

¹ Dxej ni gosloj xmaanga, rsildooru huiñä regunaaga robaa recuaan ni rlianejxh ni bencheereni. ² Che bidzujñreni, bahuiireni agubicaj guiñ ni rusäu ro' baa. ³ Dxejche biu'reni neñ baaga, direni nidxäl tiejxh Jesús. ⁴ Lañ ni cadxelojreni, di jien xhi gunreni, biricaj tio'p dade' gusuj cuä'reni. Rdimbichaduxh xhajbreni. ⁵ Bidxebduduxh regunaaga, basajbreni lojreni lo yuj. Dxejc räjp redade'ga lojreni:

—¿Xhicuent siädtiltu te bejn ni nabajñ lo rebengut, ä? ⁶ Rutini ree. Agubañsacni. Colgusnaj lajtu rediidx ni guniini cheni guyusijcni Galilee, ⁷ che najni lojtu: “Riäjñ jiajb Xi'n Dios ni gujc Niguii ladzña rebendojñ, xcjazani lo cruzj, dxej ni riojn dxejga sibañsacni loj rebengut.”

⁸ Dxejc banaj lajz regunaa xtidx Jesús, ⁹ biriireni robaa, gubi'tireni te bijreni diidx lo retzubiteeb rexpejñpacni näja loj rebejn ni yunäjreni. ¹⁰ Reni huisa'n diidx loj rexpejñpac Jesús najc redee: Marii Magdalen, näja Xuan, näja Marii xnan Jacobo, näja sgaii gunaa. ¹¹ Niluxh rexpejñpacni bejn xhigab didxnayäälñi, direni nililajz xtidx regunaaga.

¹² Dxejc huisu Pedr, ruxuñlini huijni ro' baa. Che gudixhlojni, bahuiini neñ baaga, ganaxtis bariaad dzuub te laad. Dxejc gubi'ni rolizñi, rdxelajtisni xcuent ni gujc.

*Ni guzajc lo nezyuj ni sii guedx Emaús
(Mr. 16:12-13)*

¹³ Lagajc dxejga, tio'p rexpejn_{pacni} sääreni te guejdx ni laa Emaús, ni ria'n si'cti tzubiteeb kilómetro loj guedx Jerusalén. ¹⁴ La_l ni sasajreni lo nezyujga, cayujyreni diidx xcuent reni gujc ro'c. ¹⁵ La_l ni caniireni gubig Jesús lojreni, gusloj sasanäjnireni. ¹⁶ Luxh mase cahuiireni lojni, yu' xhi badxojn niembeerreni. ¹⁷ Dxejc gunabdiidx Jesús lojreni, räjpni:

—¿Xhini'c rujytu la_l ni sasajtu, ä? ¿Xhicuent cayac-huin lajztu?

¹⁸ Tejreni ni laa Cleofas badzu' diidxre, räjpni:

—Guiraasi bejn najn xhi gujc ne_n guedx Jerusalén. ¿La lujtis bia'nlu nen guejdxga ni di gan xhi gujc ro'c, ä?

¹⁹ Dxejcti räjp Jesús lojreni:

—¿Xhini'c gujc ro'c?

Dxejc räjpreni lojni:

—Recos xcuent Jesús ni siääd guedx Nazare't, ni gujc te niguii ni gunii xtidx Dios, räjpni yäl_{rn}ibeduxh xten Dios loj redzuun ni rujn_n näjza loj rediidx ni rniini, nez loj Dios näjza nez loj rebejn. ²⁰ Näjza xho bejn reni rnibee loj rebixhojz näjza rexcuxhtisnu, bateedrenini ladznaa reni gunibee guetni, dxejc bacuaarenini lo cruzj. ²¹ Niluxh nuurnu cabääznu laani gacni nani nus_{laa} rexpejn Israel ladznaa rebenzijt. Naj agujc cho_n dxej ni gujc recosre. ²² Luxh yu' gaii gunaa ni nadxaag loonu ni baschelojreni nuurnu. Barsil, che huijreni robaa xtenni, ²³ direni nidxäl tiejxhni. Biädsä'reni diidx loonu najreni bahuiireni lo tio'p xangl Dios ni räjp lojreni, aguba_{nsac} Jesús lo rebe_{ngut}. ²⁴ Dxejcti huihuii gaii sa'nu robaa, bahuiizareni najcni si'ctis ni naj regunaaga loonu, niluxh direni nuhuii loj Jesús.

²⁵ Dxejc räjp Jesús lojreni:

—¡Lacti nayääl tre' xcäriejntu! Lacti ne_n rililajztu xtidx redade' ni gunii xtidx Dios xcuent Crist. ²⁶ ¿La di nungäjl tedxgaa Crist retrabajwduxhre dxejcti jiu'ni lo xcäl_{rdimbicha}' Dios, ä?

²⁷ Dxejc gusloj cagusule'ni guiraa rediidx ni caj lo xquijtz Dios xcuent Crist. Guslonäjni xtidx Moisés, dxejc huinuuni basule'ni guiraa reguijtz ni bacuaa redade' ni gunii xtidx Dios.

²⁸ Che bidzuj_nreni guejdx cadre sääreni, bejn Jesús si'cni chanuuni chääni lo nezyuj. ²⁹ Dxejc laareni bascuääzrenini te jiannäjnireni, räjpreni lojni:

—Biannäj nuurnu, sa'csi acayajc gudxey, agojl jiu' guxhijj.

Dxejcti biu' Jesús te jiannäjnireni. ³⁰ Cheni sobganäjnireni lo mex, cua'ni yätxtiil, benle'nini, dxejc gula'nini, gudisnini lojreni. ³¹ Lagajc dxejc, baxhal Dios balojreni, biembeerreni Jesús, dxejc laani gunitlojni lojreni. ³² Dxejcti räjpreni lo sa'reni:

—¿La di lastoonu nibeguiboo cheni siädniini loonu lo nezyuj, che cagusule'ni xtidx Dios?

³³ Dxejc dirureni nibäjz ro'c, alga gunasgajczeni nez, gubi'reni guedx Jerusalén. Ro'c bidxälreni abidojp xpejn_{pac} Jesús näjza sgaii bejn. ³⁴ Dxejcti bijreni diidx loj guiro'preni bidzuj_n, räjpreni:

—Guliipac guba_{nsac} Jesucrist, luxh baluilojni loj Simón.

³⁵ Dxejc guiro'p reni bidzuj_n bijzareni diidx ni gusajczeni lo nezyuj, näj xho biembeezareni Jesús che gula'ni yätxtiil.

*Baluiloj Jesús loj rexpejn_{pacni}
(Mt. 28:16-20; Mr. 16:14-18; Jn. 20:19-23)*

³⁶ Canisi'creni rediidxre chela baluiloj lagajc Jesús galäiireni, guniini xchan lojreni, räjpni:

—¿Colcuedcxi lajztu!

³⁷ Per laareni rdxeløjreni bidxejbreni, naareni cahuiireni lo te sprit.

³⁸ Dxejc räjp Jesús lojreni:

—¿Xhicuent cadxejbtu? ¿Xhicuent rac tio'p lastootu? ³⁹ ¿Colhuui reñaä, näjza reni'ä! Lagajc naräni. Colcajn narä te fiipactu laa naräni, sa'csi anajntu di te sprit ga'p bääl niclaza tzujt si'c rapä narä.

⁴⁰ Che guniini rediidxga, baluigajcni reñaani näjza reni'ni. ⁴¹ Laļ ni cadx-eløjreni, di gacdi chalilajzreni, sa'csi cabaduxh lajzreni, räjpni lojreni:

—¿La yu' xhi rajptu gauä ree, ä?

⁴² Dxejc badeedreni te la' bälbigue', näjza te la' seer ni yu' tzujn. ⁴³ Ni'c cua'ni gudajwnini nez lojreni. ⁴⁴ Dxejc räjpni lojreni:

—Dee najc xtidxä ni rniä lojtu cheni yusicä lojtu, rniä riäjļ soob guiraa rediidx xcuentä ni caj lo xleii Moisés, näjza lo rexquijtz redade' ni gunii xtidx Dios näjza ni caj lo rexquitz Salmos.

⁴⁵ Dxejcti basanijni xcäriejnreni te gucbeereni xhi säloj rediidx ni caj lo rexquijtz Dios xcuentni. ⁴⁶ Dxejc räjpni lojreni:

—Scree caj lo reguijtz: Nanab guet Crist, dxejc ni riojn dxej, guibañsacni loj rebengut. ⁴⁷ Sire'chza diidx xcuent xho ruslaa Crist rebejn neñ dojļ che rusiejchreni lajzreni, che rililajzreni xtiidxni. Guedx Jerusalén guislojni, dxejc sire'ch diidx guideb guedxliuj. ⁴⁸ La'tu najctu testiigw guiraa recosre. ⁴⁹ Narä suxhaļä Sprit Dxañ xten Dios lojtu, ni'c coljia'n guedx Jerusalén cheni jädļäzļini neñ lastootu, guniidxni yälrnibee ni siääd xhaguibaali.

Huäjs Jesús xhaguibaa

(Mr. 16:19-20)

⁵⁰ Dxejc huiñä Jesúsreni stelaad guedx Jerusalén gajxh lo te guejdx ni laa Betania. Ro'c guläsni ñaani, benle'ni yejcreni. ⁵¹ Laļ ni cayujnni si'c, gubicajni lojreni, huäjsni xhaguibaa. ⁵² Peta laareni gulujx gojnrenini, dxejc cabalazduxhreni gubi'reni guedx Jerusalén. ⁵³ Ro'c guixe-guixee guyu'reni neñ guidoro, calä'preni xpala'n Dios. Sugacni si'c.

Redidxhuen Xten Jesucrist Ni Bacuaa San Juan

Xtidx Dios najc te Niguii

¹ Galodoo che gusloj guira'ti, ala yu' Diidx. Luxh nani najc Diidxga yunäj Dios, luxh Diidxga najc Dios. ² Che gajd gac-cheeli guedxliuj, yunäjni Dios. ³ Xcuent laani benchee Dios guedxliuj näjza guira'ti ni yu' lojni. Guiraa recos ni yu' di gacdi niu'reni paru rutini. ⁴ Laani gojþ yälñabajn. Yälñabajnga najc bianij xten rebejn. ⁵ Luxh bianijga rdimbicha' nez lo yälçäjy, niluxh yälçäjyga di niajcdi nusuiinini.

⁶ Guyu' te niguii birilaj Juan, ni baxhał Dios. ⁷ Laani biädni te basule'ni diidx. Biädsule'ni diidx xcuent bianij te nililajz guiraa rebejn diidx xcuent bianij. ⁸ Laani dini gac bianij, laani biädsule'ni diidx xcuent bianij. ⁹ Laa bianijpacga ni rusanij lastoo guiraa rebejn, luxh naj abiädni lo guedxliujre.

¹⁰ Nani najc Diidxga guyu' lo guedxliujre, xcuent laazani guc-chee guedxliujre, luxh di reben guedxliujre nililajz chu najni najcni. ¹¹ Biädni loj rexpeñ Israel, niluxh rexpejñni direni nicäjb niu'ni lojreni. ¹² Dxejc loj guiraa reni cuäjb guyu'ni lojreni, loj renani huililajz xtiidxni, loj reni'c badeedni yälñabee gacreni xi'n Dios. ¹³ Laa reni'c ni di gac si'c xi'n beñ guedxliuj, ni gojl sa'csi rlajz te biniet chu xi'nni, dee najcpacreni Xi'n Dios sa'csi sudeedni yälñabajn par tejpas lojreni.

¹⁴ Diidxga gujc te beñ guedxliuj. Guläjzni lo guedxliujre, bahuilojzanu xcälrdimbicha'ni, si'c yälrdimbicha' xten xingan xteb xtdadni, laani najcpacni nani sanälajz nuurnu, nani rni didxlii loonu. ¹⁵ Juan gunii xcuent Jesús. Guredxa'ni, räjpni:

—Laa dee ni rniä, nani siäd detzä sajcruni loä, sa'csi laani ganidni nabajñni loä.

¹⁶ Sa'csi guiraanu cua'nu xcälñasaduxhni, yälracnäj detz yälracnäj. ¹⁷ Leii xten Dios biädni toMoisés, niluxh yälracnäj näjza redidxlii biädni Jesucrist. ¹⁸ Rut chu tejdi abahuii lo Dios, xinxtebni ni yunäjpac Dios, laani basule'ni diidx xcuent Dios loonu.

Juan ni rutiobnis gunii chuni'c najc Jesucrist (Mt. 3:11-12; Mr. 1:7-8; Lc. 3:15-17)

¹⁹ Dee najc diidx nani gunii Juan ni rutiobnis che baxhał rexpeñ Israel rebixhojz näjza rexpeñ guidoo ni laa levitas, biriireni guedx Jerusalén te sanabdiidxreni lo Juan, räjpreni lojni:

—¿Luj chu najclu?

²⁰ Dxejcti bicäjþni lojreni, xhet bacua'tzdini lojreni, räjpni:

—Et narädi nacä Crist ni jiäd.

²¹ Dxejcti gunabdiidxreni lojni, räjpreni:

—¿Chuxhni'c najclu? ¿La lujni najc Elías?

Räjpni:

—Dina gacäni.

Räjpreni:

—¿La najclu te dade' ni gunii xtidx Dios ni cabäaznu jiäd?

Dxejc räjpni:

—Dina gacäni.

²² Räjpreni:

—¿Chuxhni'c najclu? Te chonänu diidx loj reni baxhaļ nuure. ¿Xhi rniilu, chuxhni'c najclu?

²³ Räj Juan:

—Narä nacä nani rbedxa' nez lo reyubijdz si'c ni gunii Isaías, ni gunii xtidx Dios scree: “Colyensa'c xnezuyj Dad.”

²⁴ Rebejn ni baxhaļ redee najc reni rniireni “farisee”. ²⁵ Dxejc gunabdiidxreni stee, räjpreni lo Juan:

—¿Xhicuent rutiobnislu palga dilu gac Crist ni jiääd niclaza Elías niclaza stee niguii ni rnii xtidx Dios ni cabääznu jiääd, ä?

²⁶ Dxejcti räj Juan lojreni:

—Narä rutiobnisä con nis, niluxh galäiitu yu' tej nani ditu gumbee. ²⁷ Laa dee ni siääd detzä niluxh di nungäļ nicla surloä cuää xcura'chni, sa'csi sajcruni loä.

²⁸ Guiraa recosre gujc stelaad cadro laa Betábara, ni ria'n stelaad ro' gueu Jordán cadro cagutiobnis Juan.

Jesús najc Xile' xten Dios

²⁹ Che bara yääl, bahuui Juan siääd Jesús lojni. Dxejc räjpreni:

—¡Colhuii! Aree Xile' xten Dios nani rudzucaj xtojļ reben guedxliuj.

³⁰ Lagajc xcuent dee ni rniä cheni guniä lojtu: “Detzä siääd te niguii ni sajcruni loä, sa'csi ganidli narä agac nabajñni.” ³¹ Luxh dina niembeäni, per biädtiobnisä con nis te guluiä lo rexpejn Israel chu najcni.

³² Guniiza Juan stee diidx xcuentni, räjpreni:

—Narä bahuiä biäjt Sprit Dxan xten Dios xhaguibaa si'c te palom guzudxini yejcti. ³³ Dina niembeäni, per nani baxhaļ narä gutiobnisä con nis, laani najni loä: “Cheni filu jiäjt Sprit Dxan xten Dios xhaguibaa si'c te palom, sudxini yejc te bejn, laanini najc ni gutiobnis con Sprit Dxan xten Dios.”

³⁴ Narä abahuia lojni, ni'cni rniliä: “Dee ni najc Xi'n Dios.”

Reni gujc xpejn Jesús ganiddoo

³⁵ Che bara stee yääl, sugasac Juan ro'c, suganäjni tio'p rexpejñni.

³⁶ Bahuiini lo Jesús che sasajni, dxejc gunii Juan, räjpreni:

—¡Colhuii! ¡Laa dee ni najc Xiil xten Dios!

³⁷ Biejn diajg guiro'p rexpejñpac Juan diidxga, dxejc sanajlreni Jesús. ³⁸ Che gubiré Jesús bahuiini siädnajlreni, dxejc räjpreni:

—¿Xhi caguilltu?

Räjprebejnnga:

—Mastr, ¿caro rbäjzlu?

³⁹ Badzu' Jesús diidxre, räjpreni:

—Coltaa, te fiitu.

Dxejcti huijreni te bahuiireni caro rbäjzni ro'c. Biannäjrenini ro'c sa'csi agojļ si'cti rcatajpc gudxej.

⁴⁰ Tej reni biejn diajgni xtidx Juan laa Andrés, bejtz Simón Pedr dxejc huinäjñni Jesús. ⁴¹ Ganiddoo huitiilni bejtzni, dxejc räjpreni lojni:

—Abidxälnu Mesías nani sälojza Crist ni cabääznu jiääd.

⁴² Sas huinänini loj Jesús. Che bahuui Jesús lojni, räjpreni:

—Luj najclu Simón xi'n Jonás; sirilajlu Cefas nani sälojza Pedr.

Gurejdx Jesús Felipe näjza Natanael

⁴³ Bara yäälga rlaɟz Jesús cháä nez Galilee. Dxeɟc bidxaagni Felipe, räjpni lojni:

—Gudanajl narä.

⁴⁴ Felipe siääd guedx Betsaida, guedxro ni najcxa lajdx Andrés näjza Pedr.

⁴⁵ Felipe bidxaag Natanael räjpni lojni:

—Abidxälnu bejn nani bacuaa toMoisés xcuentni lo reguijtz xten leii agujc xchej, nani bazä'tza reniguii ni gunii xtidx Dios, Jesús xi'n José ni siääd Nazare't.

⁴⁶ Räjp Natanael:

—¿La saɟc guirii te beɟsa'c guedx Nazare't, ä?

Räjp Felipe lojni:

—Gudaa, te filu.

⁴⁷ Che bahuii Jesús siääd Natanael nez lojni, räjpni:

—Colhuii te beɟ Israelpac nani dipacni gusguee.

⁴⁸ Räjp Natanael:

—¿Xho numbeelu narä?

Badzu' Jesús diidxre lojni räjpni:

—Che gajd Felipe cueedx luj, che suga'lilu ni' te yagiigw, bahuiä lojlu.

⁴⁹ Badzu' Natanael diidxre, räjpni:

—Mastr, luj najc Xi'n Dios, luj najc Reii xten rexpen Israel.

⁵⁰ Räjp Jesús lojni:

—Sa'csi rniä lojlu, “bahuiä suga'lu ni' yagiigw”, ¿ni'c rililajzlu, ä? Xhidajl cosroru suhuiilu.

⁵¹ Dxejcti räjpzani:

—Rniliäpac lojtu, suhuiitu guixal xhaguibaa, näjza rä'p riäjt rexangl Dios yeɟc Xi'n Dios ni guɟc Niguii.

2

Te sa'ni guyu' guedx Caná xten Galilee

¹ Che gudejd choɟ dxej, guyu' te sa' guedx Caná xten Galilee. Ro'c guyu' xnan Jesús. ² Huijza Jesús näjza rexpejn pacni, sa'csi bidoɟreni cháäreni lo sa'ga.

³ Gubijdz bin. Dxej räjp xnan Jesús lojni:

—Dirureni ga'p bin.

⁴ Dxej badzu' Jesús diidxre räjpni:

—¿Xhicuent rniilu si'c loä, xnanä? Gajd xhorä guidzujɟ.

⁵ Niluxh räjp xnanni loj remos ni tre' ro'c:

—Colyejn guira'ti si'ctis ni guiniini lojtu.

⁶ Suga' xho'p guesguij nani rdxaj nis te rdiib naa rexpejn Israel te racnarenari te si'c guisa' xleii toMoisés. Neɟ tejga guesguijga ru' si'cti te gayuu litr nis. ⁷ Räjp Jesús loj remos:

—Colguchaj reguesguijre nis.

Dxejcti bachadoo rebejɟgani. ⁸ Dxejcti räjp Jesús lojreni:

—Colca' che'n ni naj te colchanäni lo nani cahuii cayajc sa're.

Dxejcti huiinä remosga che'n bin lojni. ⁹ Che gu' dade'ga che'n nis ni gubixhloj bin (luxh dini gan caro siäädni, remostis ni gulä'p nis, ni'ctis najn). Dxejcti gurejdx dade'ga bi'n. ¹⁰ Dxejcti räjpni:

—Guiraa rebejn rudeedreni binsa'c räxgaa rebejn, dxejcti che agudxaj xque'reni, rudeedreni bin nani di xcuent, niluxh luj gulucheelu binsa'cre najli.

¹¹ Seenre najc ganiddoo ni gusloj bejn Jesús; bejnnini nen guedx Caná xten Galilee. Seenga bazäbdiidx yäl̄rnibee xtenni luxh ni'cni huililajz rexpejn̄pacni xtiidxni.

¹² Che gudejd sa'ga, huijni guedx Capernaum con xnanni, rebejtzni näjza rexpejn̄pacni. Ro'c bia'nreni tio'p-choñ dxej.

Basia Jesucrist guidoro

(Mt. 21:12-13; Mr. 11:15-18; Lc. 19:45-46)

¹³ Sa'csi abidzungajxh lanij pascw xten rexpejn̄ Israel cheni rnalajzreni guxhijn̄ ni gudejd guixhajg xten yäl̄gujt nen Egipto, ni'c sää Jesús guedx Jerusalén. ¹⁴ Nen guidoro bidxäl̄ni xhidajl bejn̄ nani ruto' gon, xiil, palom näjza reni sobga' caguchaa melzijt. ¹⁵ Dxejc bejnni te chico't con gaii duu, gulääni regon con rexiiil nen guidoo. Batie'chni xcoobr rebejn̄ nani ruchaa melzijt, barexh-xhätni rexmexreni. ¹⁶ Räjzani loj reni caguto' repalom:

—Colcuää redee, na'c rujntu rolizj xtaää si'c te guii cadro rdo' guiraloj.

¹⁷ Dxejcti banajlajz rexpejn̄pacni xhi caj lo reguijtz ni bacuaa redade' ni gunii xtidx Dios: “Gucnaj lazä xcuent ni runnäjreni rolizjlu.”

¹⁸ Dxejcti gunabdiidx reni najc xpejn̄ Israel lojni, räjpreni:

—¿Xhi seen guluiilu loonu naj te fiinu arajplu yäl̄rnibee te abejnlu recosre?

¹⁹ Badzu' Jesús diidxre räjzni:

—Colgutzuil guidoore, luxh narä nen choñtis dxej sunchesacäni.

²⁰ Räjz rexpejn̄ Israel lojni:

—Tiubixho'p ijz guclaa ni guc-chee guidoore, ¿Xhixh sajg gunchesacluni nen choñtis dxej, ä?

²¹ Niluxh laani caniini xcuent guidoo ni najc lagajc tiejxhni. ²² Ni'cni cheni gubansacni loj rebeñgut, banajlajz rexpejn̄pacni rediidxre ni guniini, dxejc huililajzreni nani caj lo rexquijtz Dios näjza rediidx ni gunii Jesús.

Numbee Jesús guiraa rebejn̄

²³ Cheni guyu' Jesús guedx Jerusalén cadro cayajc lanij pascw, lañ ni cayajc lanijga, xhidajl rebejn̄ huililajz xtiidxni, bahuiizareni remilagwr ni bejnni. ²⁴ Luxh di Jesús nililajz xtidx rebejn̄ga, sa'csi arumbeeni xho najc rebejn̄. ²⁵ Niluxh dini niqiiin chu gäb lojni xho najc bejn̄, sa'csi lagajc laani anancheeni xho najc lastoo tejga bejn̄.

3

Jesús con Nicodem

¹ Guyu' te niguii lo rexpejn̄ refarisee ni laa Nicodem, najcni te beñroru loj reni rnibee rexpejn̄ Israel. ² Te guxhijn̄ biädxhiga'tzni nez loj Jesús, räjzni lojni: —Mastr, nadonnu lo Dios siääd̄lu si'c te ni ruluii, sa'csi rut rajcdi rujn sa' remilagwr nani rujnlu palga di Dios sunäjni.

³ Dxejcti räjz Jesús lojni:

—Rniliäpac lojlu, nani di gaal stehuält, di gacdi fiini xcäl̄rnibee Dios xhaguibaa.

⁴ Dxejcti räjz Nicodem lojni:

—¿Xho gac gaal te bejn̄ stehuält niluxh anajcni bengool? ¿Xhixh sajg chusacni xque' xnanni stehuält te galsacni, ä?

⁵ Badzu' Jesús diidxre räjzni:

—Rniliäpac lojlu, nani di gaal con nis, näjza con Sprit Dxañ xten Dios, di gacdi jiu'ni lo xcäl̄rnibee Dios xhaguibaa. ⁶ Nani rajl xi'n beñ guedxliujre, ni'c najctisni bejn̄ guedxliuj, luxh nani rajl por Sprit Dxañ xten Dios, Spritza

najcni. ⁷ Na'c rdxelojlu sa'csi rniä: "Nanabpac gaallu stehuält." ⁸ Rbi' bej cadrotis rlajzni; riejn diajglu rubejni niluxh dilu gan caro siäädni, dizalu gan caro sääni. Si'cza rebejn guedxliuj direni gan xho rajl rexpejn Dios stehuält con Sprit Dxan xten Dios.

⁹ Badzu' Nicodem diidxre, räjpni:

—¿Xho mood sajc gac recosre?

¹⁰ Räjp Jesús lojni:

—¿La najclu te mastr xten rexpejn Israel luxh dilu gan recosre, ä?

¹¹ Rniliäpac lojlu, aguniinu xcuent recos ni nadonnu, abasule'nu recos ni abahuiloonu, niluxh la'tu ditu nililajz xtiidxnu. ¹² Palga ditu chalilajz xtiidxnu che guniinu xcuent recos guedxliuj nani rniinu: ¿Xho chalilajztu xtiidxnu palga guiniinu xcuent recos xhaguibaa?

¹³ Rut chutejdi ahuä'p xhaguibaa, xtebtis nani biäjt xhaguibaa, lagajc Xi'n Dios ni gujc Niguii. ¹⁴ Lagajc si'cni guläsjaaa toMoisés bäl guuib lo yajg nen reyubijdz, sigajcza nanab chäs Xi'n Dios ni gujc Niguii jiaa; ¹⁵ te guiraa renani chalilajz xtiidxni direni nit lo Dios, sica'reni yäl'nabajn par tejpas.

Xho huinälajz Dios reben guedxliuj

¹⁶ Sa'csi huinälazduxh Dios rebejn guedxliuj, ni'cni badeedni biääd Xinxtebni lo guedxliuj, te guiraa renani chalilajz xtiidxni direni nit lo Dios, sa'csi sajpreni yäl'nabajn par tejpas. ¹⁷ Sa'csi di Dios nuxhał xi'n'ni te gusnijtni rebejn guedxliuj, alga baxhalnini te laa rebejn nen xtojreni xcuentni.

¹⁸ Nani chalilajz xtiidxni näjza chalilajz najcni chu najni najcni dini nit, luxh nani di chalilajz xtiidxni agunijtni sa'csi dini nililajz xtidx Xinxteb Dios. ¹⁹ Ni'cni dee najc yäl'nijtga: abiääd bianijga loj guedxliuj, biädnä Xi'n Diosni, niluxh rebejn guedxliuj bidxaglazruren yäl'nacäjäy cadro tre'reni, gulälazreni bianijga sa'csi xhet laadi najc xtzunreni. ²⁰ Guiraa reni rujn dzunguijdx, rbälaz bianijga, dizareni guibig loj bianijga, didi gululioj bianijga rextzunguijdxreni. ²¹ Luxh reni rusooob didxlii, rbigreni loj bianijga, te bianijga rululioj najc rextzunreni redzunsac xten Dios.

Rnisac Juan ni rutiobnis xcuent Jesús

²² Dxejcti biääd Jesús näjza rexpejn'pacni nez lo reyuj xten Judea. Ro'c guyunäjnireni, batiobnisza rexpejn'pacni rebejn. ²³ Juan ni Rutiobnis cagutiobniszani bejn te lajt ni laa Enón ni tre' gajxh Salim, sa'csi ro'c yu' sijn nis. Ro'c sää rebejn lojni te cagutiobnisnireni. ²⁴ Dxejc gajdreni gusäu Juan nen latzguuib.

²⁵ Dxejcti gusloj rexpejn Juan cayujy diidx con gaii xpejn Israel xcuent yäl'rdiib naareni ni najc xcostumbr rexpejn Israel. ²⁶ Dxejc biädreni lo Juan, räjpreni:

—Mastr, dade' nani guyunäjlu stelaad gueu Jordán, nani basule'lu xcuentni, adade'ga cagutiobnis, luxh guiraa rebejn asää lojni.

²⁷ Dxejc badzu' Juan diidxre, räjpni lojreni:

—Nicla tej bejn digacdi ga'p te xhi cos palga di Dios gudeedni lojni.

²⁸ Lagajc la'tu nancheetu guniliä: "Dina gacä Crist ni cabäjztu jiääd." Guniaza: "Narä nacä nani biädniyd lojni." ²⁹ Che rajc sa', nani sobganäj dxa'p, ni'c najc bi'n ni gac chääl'ni, luxh xamigw bi'n nani suga' ro'c, riejn diajgni rniini, rbalazduxhni sa'csi riejn diajgni xse' bi'n. Sigajcza abibaduxh lazá xcuentni.

³⁰ Nanab gacni laani benroru, bensajcru, biädla narä riajł gacä benhuinru, ni guxiiru sajc lojni.

Nani siääd Xhaguibaa

³¹ 'Nani siääd jiaali, ni'c rnibee guirali, niluxh nani najc beñ guedxliuj ni'c rnii xcuent recos guedxliuj. Nani siääd xhaguibaa ni'c rnibee guirali.
³² Nani bahuini, nani biejn diajgni, ni'c rusule'ni niluxh guxii rililajzreni xtiidxni. ³³ Nani rililajz diidx ni rusule'ni, bejnga ruluiloj guliipac najc xtidx Dios. ³⁴ Nani baxhal Dios, ni'c rnii xtidx Dios sa'csi che ruedeed Dios Sprit xtenni, dini gudeed guxiini. ³⁵ Dad Dios sanälajzni xingaanni, abadeedzani guiraliiti chu ladznaani. ³⁶ Nani rililajz xtidx xingaanni arajp yälñabajn par tejpas, luxh ni di chalilajz xtidx xi'nni, dini fii yälñabajn, siääd xcälrdxe'ch Dios yejcn, sujn Dios castiigwni.

4

Rdxaag Jesús te gunaa Samaria

¹ Che gucbee Jesús abiejn diajg refarisee xhidajlru beñ sanajl Jesús luxh guxiiru sanajlreni Juan, luxh cagutiobnisreni, ² (niluxh xhet Jesúsdi cagutiobnis. Rexpeljñni ni catiobnis), dxejc ³ biriini Judea gubisacni nez Galilee.

⁴ Lañ ni sasajni, nanab tedni nez Samaria. ⁵ Ni'c bidzujñni te guedxro xten Samaria ni laa Sicar, gajxh nejz loj te la' yuj ni badeed toJacoob lo xi'nni toJosé. ⁶ Ro'c sojb te bisie ni rniireni "xpisie Jacob". Sa'csi abadxajg Jesús siädsajni, gurejni ro bisiega. Agojl läidxej. ⁷ Bidzujñ te gunaa siädlä'pni nis, dxejc räjp Jesús lojni:

—Baniidx che'n nis yä'ä.

⁸ Sa'csi rexpeljñpacni asääreni guejdxga sasiireni xhi gaureni.

⁹ Räjpni guna samaritaŋga lo Jesús:

—¿Xho mood rniablu nis loä, luj ni najc te beñ Israel luxh narä nacä gunaa samaritan?

(Sa'csi di rexpeljñ Israel chanä sa'reni rebejn Samaria.) ¹⁰ Räjp Jesús lojni:

—Paru najnlu xhini'c najc yälñulaslajz xten Dios, paru numbeelu chuni'c canab nis lojlu, luj siniablu lojni te laani guniidxni nisnabajñ lojlu.

¹¹ Räjpni gunaaga lojni:

—Dad, xhet ca'dilu te guiliä'plu nis, luxh bisiere najc jiätduxh. ¿Caxh chaca'lu nisnabajnga, ä? ¹² ¿La beñrorulu lo toxtadgoldoonu Jacob ni basa'n bisiere cadro huä'p nis gu'ni, gu'za rexi'nni, näjza rexquidxaani, ä?

¹³ Badzu' Jesús diidxre lojni, räjpni:

—Guiraa reni rä' nis bisiere, siojlreni stehuält. ¹⁴ Luxh nani yä nis nani gudedä, diruni jiojl, sa'csi nis nani gudedä neñ lastooni sajnci si'c te bisie nani rdatis nisni te gudeedni yälñabajñ par tejpas.

¹⁵ Dxejcti räjp gunaaga lojni:

—Dad, baniidx nisga yä'ä, te na'cru jiolä, te na'cruza guibi'ä jiädlä'pä nis ree.

¹⁶ Räjp Jesús:

—Huij, huitejdx chäälü gudanäni ree.

¹⁷ Räjp guna loj Jesús:

—Ruti chälä.

Räjp Jesús lojni:

—Laaca guniilu, ¹⁸ sa'csi aguyu' gaiili chäällu. Luxh nani rbäznäjlu ñaj dini gac chäällu; guliica najlu.

¹⁹ Che biejn diajg gunaaga si'c, räjpni:

—Dad, rchaloä najclu te niguii ni rnii xtidx Dios. ²⁰ Retoxtdadgoldoonu gojnreni Dios lo dajnre, luxh la'tu rniitu guedx Jerusalén najc cadro nanab ganni Dios.

²¹ Räjþ Jesús lojni:

—Gunaa, huililajx xtidxä, sidzujñ or cheni nicla lo dajnre, niclaza guedx Jerusalén ditu chagajñ Dad Dios. ²² La'tu rajntu Dios nani ditu gumbee, nuunu rajñnu Dios nani rumbeenu; sa'csi yälrusläa bejn lo dojl siääd xcuent rexejñ Israel. ²³ Niluxh sidzujñ or, luxh alabidzujñni, che reni guliipac rajñ Dad, reni'c neñ lastooreni, lo xcäriejnreni sajñreni Dios. Sa'csi sa' bejnre rguuñ Dad Dios te ganrenini. ²⁴ Dios najc te Sprit. Reni rajñ Dios nanab ganrenini neñ lastooreni, lo xcäriejnreni, guideb xtijpreni sa'csi rumbeerenini.

²⁵ Räjþ gunaa lojni:

—Ananá siääd Mesías ni laaza Crist. Cheni jiäädni, laani susule'ni guiraliiti loonu.

²⁶ Räjþ Jesús lojni:

—Narä ni caniä lojlu, nacä laani.

²⁷ Dxejc bidzujñ rexejñpacni, bidxelojreni sa'csi gunii Jesús lo gunaaga, niluxh rut gunabdiidxdi xhi rlaizni, niclaza rut gunabdiidxdi xhini'c caninäjni gunaaga. ²⁸ Dxejcti basa'n gunaaga xtie'ni, sä'tini guedxroga. Dxejcti räjpni loj rebejn:

²⁹ —Coltaa, fiitu te niguii ni gunii loä guira'ti nani abenä. ¿La et laadi dee Crist ni cabäaznu jiääd, ä?

³⁰ Dxejc birii rebejñguejdxga, bidzujñtireni lojni. ³¹ Reni najc rexejñpacni canabduxhrenei gau Jesús, räjpreni:

—Mastr, gudajw.

³² Laani räjpni:

—Narä rapä xhi gauä nani ditu gumbee.

³³ Dxejcti räjp rexejñpacni lo sa'reni:

—¿Xhaa yu' chu abiädnä xhi gudajwni, ä?

³⁴ Räjþ Jesús:

—Yälrajw xtenä najc gunä si'cni rlaiz nani baxhañ narä, näj guluxä xtzuunni. ³⁵ La'tu rniitu riäädx tajp bäii te guire' cose'ch. Narä rniä colguiliäs lojtu, colfisa'c loniaa, abiquijt regäjñ, agojñ guire' cose'ch. ³⁶ Nani rujñ dzuun rutie' cose'ch rca'ni xcuentni, luxh ni caca'ni najc par yälñabajñ par tejpas, te tejsi guibalazñäj nani gule'c binij näj nani batie' cose'ch. ³⁷ Sa'csi guliñ najc diidx nani rnii bejn, rniireni: “Tejni rbe'c binij, ste'cani rutie'ni.” ³⁸ Narä abaxhañ la'tu gutie'tu cose'ch nani ditu nibe'c; ste'ca najc nani bejn dzuun gule'cni binij, dxejc la'tu jiu'tu gutie'tu cose'ch loj xtzuunni.

³⁹ Xhidajñ reben Samaria huililajx xtidx Jesús xcuent rediidx ni räjp gunaaga lojreni che räjpni: “Guniini loä guiraliñ nani abenä.” ⁴⁰ Ni'cni, che biääd reben guedx Samaria lojni gunabreni loj Jesús jia'nni lajdxreni. Dxejc bia'nni ro'c tio'p dxej. ⁴¹ Dxejc xhidajñrurenini huililajx xtiidxni ni guniini lojpacreni. ⁴² Dxejcti räjpreni loj gunaaga:

—Dirunu chalilajx ganaxtis xcuent diidx ni guniilu loonu, sa'csi lagajc nuure abiejen diajgnu xtiidxni, ni'c nancheenu dee najcpac ni rusläa rebejn guedxliuj loj dojl. Laani najc Crist ni cabäaznu jiääd.

Basiajc Jesús xi'n te bejn ni rujñ xtzuun gubier

⁴³ Che gudejd tio'p dxej, biriini guedx Samaria, huinuuni xnezyujni nez Galilee. ⁴⁴ Sa'csi lagajc Jesús gunii, räjpni: Te bejn nani rnii xtidx Dios di reben

lajdxcpacni chanälajz xtiidxni. ⁴⁵ Che bidzujñni rexyuj Galilee, reben Galilee huichaglojrenini sa'csi näj laareni huijreni lanij pascw guedx Jerusalén, ro'c bahuiireni guiraa redzuun nani bejnñi.

⁴⁶ Gubisacni, bidzujñni guedx Caná xten Galilee cadro bejnñi bidxaa nis gujñi bin. Dxejcti guyu' te dade' nani rujn xtzuum ñeii. Guedx Capernaum naga' te xi'nni cayacxhuu. ⁴⁷ Che bejnñi diajg dade'ga abirii Jesús Judea, abidzujñni nez Galilee, huijni lo Jesús, gunabduxhni lojni chääni te gusiajñi xi'nni nani naga' cuentro, ameerli guetni. ⁴⁸ Dxejcti räjp Jesús lojni:

—Paru ditu fii reseen, remilagwr, ditu chalilajz chuni'c nacä narä.

⁴⁹ Dade' ni rujn xtzuum ñeii, gunii lojni, räjpni:

—Do'o Dad, te di guet xi'nä.

⁵⁰ Räjp Jesús lojni:

—Huij. Di xi'nlu guet.

Huililajz dade'ga, sä'tini. ⁵¹ Che gubi'ni rolijzni, birii rexmosni, huichaglojni, badeedreni diidx nabajñ xi'nni.

⁵² Dxejcti gunabdiidxni:

—¿Corti gusloj cayajñi?

Räjpñi lojni:

—Naii si'cti rcatej gudxej biriini xliaa.

⁵³ Dxejcti gucbee dade'ga lagajc orga ni räjp Jesús lojni: “Di xi'nlu guet.” Dxejc dade'ga näjza guiraa rebejn ni yu' rolijzni huililajzreni Jesús najc ni cabäjzreni jääd.

⁵⁴ Dee barojp seen ni bejn Jesús cheni biriini Judea, biu'ni Galilee.

5

Bejn Betesda nani naxu'n

¹ Che gujcti recosre, guyu' te lanij xten rexpejn Israel, dxejc huij Jesús guedx Jerusalén. ² Guedx Jerusalén, gajxh ro' puert ni laa xten rexiil, yu' te guipilro nis; xtidx hebreo laani Betesda. Cuä' guipilroga caj gaii cordoor. ³ Ro'c naga' xhidajl bejn racxhuu, yu' bejn ni di fii, beñcoj, näj bejn nani bixu'n tiejxhni. Cabäjzreni guiniib nisga ⁴ sa'csi gucti-guc riääd te xangl Dios rusniib nisga. Dxejc bejn nani gun gaan chachu' lo nis ganiddoo che guiniibni, riajñi lo xhitis yälgujdx ni rajñi. ⁵ Ro'c guyu' te bejn racxhuu nani agujc galbitzibixhujñ ijz cayacxhuuni. ⁶ Cheni bahuii Jesús naga'ni, badeedzani cuent lacti xchero racxhuuni, räjpni lojni:

—¿La rlajzlu jiajclu?

⁷ —Dad —räjp beñ racxhuuga lojni—, dina gapä chu gusal narä neñ nis cheni rniib nisre. Cheni rlazä chachu'ä lo nis, stee bejn rujn gaan narä, ganidni richu'ni lo nisga.

⁸ Räjp Jesús lojni:

—Huistie, guläs xta'lu, guzaj, huij.

⁹ Lagajc dxejc biajç bejnnga, guläsni xta'ni, gusloj gusajni. Niluxh dxejga najc dxej nani rusilajz rexpejn Israel, ¹⁰ ni'c räjp rexpejn Israel lo bejn ni biajçga:

—Nadxej najc dxej ni rusilajz bejn. Di gacdi guulu xta'lu.

¹¹ Laani räjpni:

—Nani basiajç narä, laani naj loä: “Guläs xta'lu, gusaj.”

¹² Dxejc gunabdiidxreni lojni:

—¿Chuni'c naj lojlu “Guläs xta'lu, gusaj”?

¹³ Dxejcti beŋ racxhuu ni biajcgā dini gaan, sa'csi gunitloj Jesús, biriini ro'c laĵ ni tre' xhidajĵ beŋ lajtga. ¹⁴ Che bidxaagni Jesús stehuält neŋ guidoro, räjp Jesús lojni:

— Ahuii, ŋaj ni abiajclu, na'c gunlu doĵĵ stehuält, didi sajclu xhi stee ni najc cuentroru.

¹⁵ Sä'ti beŋnga, huiye'tzni loj rexpejŋ Israel laa Jesús ni basiajčni. ¹⁶ Ni'cni gusloj rexpejŋ Israel carinajĵreni Jesús, rĵajzreni guiga'ni te ju'trenini, sa'csi rujnni redzuunga dxej ni rusilajzreni. ¹⁷ Luxh räjp Jesús lojreni:

— Xtaďā Dios ŋajli cayujnni dzuun, ni'cni nājza narā cayunā dzuun.

¹⁸ Ni'cni rĵajzru rexpejŋ Israel ju'tni, xhet ganaxdi sa'csi rujnni dzuun dxej ni rusilajzreni, per nājza sa'csi räjpni Dios najc Xtaďni, rniizani tebloj najčni con Dios.

Yälrbiee xten Xi'n Dios

¹⁹ Badzu' Jesús diidxre räjpni lojreni:

— Rniliä, rniliäpac lojtu. Di gacdi gun Xi'n Dios dzuun xtebni, palga dini fixgaa rujn Xtaďni dzuunga, sa'csi guira'tis dzuun ni rujn Xtaďni, dzuunga rujnza Xi'nni sigajc rujn Xtaďni. ²⁰ Sa'csi rinälajz Dad xi'nni, ruluini lo xi'nni guiraa redzuun nani rujnni, luxh dzunroruza suluini lojni gunni, te guidxelojtu. ²¹ Sigajc ni rliäs Dios rebengut, rudeedni yälŋabajŋ lojreni, sigajcza sudeed xi'nni yälŋabajŋ lo renani rĵajztsini. ²² Nicla Dad di gun yälguختis, alga badeedni guralii yälguختis gun Xi'nni, ²³ te guiraa beŋ guiliä'p xpala'n xi'nni si'cni rliä'preni xpala'n Dad. Nani di guiliä'p xpala'n Xi'nni, dizani guiliä'p xpala'n Xtaďni ni baxhaĵni biäädni.

²⁴ 'Rniliä, rniliäpac lojtu, nani rucuadiajg xtidxä, ni chalilajzzani nani baxhaĵ narä, ni'c rajpni yälŋabajŋ par tejpas; niluxh dini ted lo yälguختis, alga abiriini lo yälguĵt, agudejđni lo yälŋabajŋ. ²⁵ Rniliä, rniliäpac, sidzujŋ or, luxh alabidzujŋni, cheni siejŋ diajg rebengut xse' Xi'n Dios, luxh reni riejŋ diajgni diidxga sibansacreni lo rebengut. ²⁶ Si'cni rajp Dad Dios yälŋabajŋ lagajcsi laani, sigajcza badeedni lo Xi'nni ga'pni yälŋabajŋ lagajcsi laazani. ²⁷ Badeedzani lojni yälrbiee te gunni yälguختis, sa'csi najčni Xi'n Dios ni gujč Niguii. ²⁸ Na'c rdxelojtu rediidxre, sa'csi sidzujŋ or cheni guiraa reni yu' neŋ baa siejŋ diajgreni xse'ni ²⁹ siriizareni neŋ baa. Reni beŋ dzunsa'c siriireni te guibansacreni loj yälŋabansa'c, niluxh reni beŋ dzunguijđx, siriireni te guibansacreni te tedreni lo xcälguختis Dios.

Nani ruluiloj yälrbiee ni rajp Jesús

³⁰ 'Xhet rajcđi runä lagajcsi narä. Sigajc ni riejŋ diagä, sigajcza runä yälguختis. Luxh yälguختis ni runä laaca najčni sa'csi dina quilä gunä nani rĵazätis, rguilätis gunä si'c ni rĵajz Dad nani baxhaĵ narä. ³¹ Palga narätis rniä diidx lagajc xcuentä, xhet sajcđi diidxga. ³² Yu' stee nani rniliä diidx xcuentä, luxh nancheä diidx ni rniini xcuentä sacduxhni, guliipacni. ³³ La'tu abaxhaĵtu chu huij lo Juan, huinabdiidxreni lojni "ču najc bejŋga", niluxh badzu'ni diidx lojreni guniini diidx guliipac xcuent chu nacä. ³⁴ Narä dina jiuä diidx nani rnii rebejŋ xcuentä luxh canisacä rediidxre te laatu lo xtoĵĵtu. ³⁵ Juan gujč si'c te bajĵ ni ralgujĵ, basanijzani. Luxh la'tu huihuiituni bibalajztu lo xpianijni balsi dxej. ³⁶ Luxh narä rapä xhi ruluilojru chu nacä lo diidx ni gunii Juan; sa'csi lagajc dzuun nani baniidx Xtaďā gunä, lagajc redzuun ni runä, huenliisi ruluilojreni Xtaďā Dios baxhaĵ narä. ³⁷ Xtaďā ni baxhaĵ narä lojtu agunilii chu nacä. Gajdpactu jiejŋ diajg xse'ni, gajdzatu fii lojni. ³⁸ Dizatu ga'p xtiidxni neŋ lastootu, sa'csi di lajztu chalii xtiidx nani

baxhaĵ narä. ³⁹ La'tu roĵduxhtu reguijtz xten Dios sa'csi rchalotu si'c sidxäلتو yäl'nabajĵ par tejpas, luxh lagajc reguijtzga rusule' chu narä. ⁴⁰ Naadditu jiäädту loä te ga'ptu yäl'nabajĵ par tejpas.

⁴¹ 'Narä dina quilä chu bejĵ guiliä'p xpala'nä nez loä. ⁴² Luxh narä anumbeäту, ananä ditu chanälajz Dios neĵ lastootu. ⁴³ Narä biälä xcuent Xtadä, luxh ditu gucuadiajg xtidxä; paru jiääd chu stee bejĵ xcuentcani, ni'c sii sucuadiajgtu xtiidxni. ⁴⁴ Xho gac chalilajztu, ni rliä'ptu xpala'n lagajc sa'tu. Ditu quiiĵ xho gac guiliä'p Gueb Dios xpala'ntu. ⁴⁵ Di naatu pet narä ni chale'cä xquejtu lo Xtadä. ToMoisés ni chale'c xquejtu, luxh rujntu xhigab lagajc xleiini gacnäy la'tu. ⁴⁶ Paru la'tu nililajzfactu xtidx toMoisés, dxejc niliiza lajztu xtidxä sa'csi xcuentä bacuaa toMoisés lo reguijtz. ⁴⁷ Palga ditu chalilajz nani bacuaani lo reguijtz, ¿xho chalilajztu rediidx nani caniä lojtu, ä?

6

Bayaan Jesús gaii miĵ niguii

(Mt. 14:13-21; Mr. 6:30-44; Lc. 9:10-17)

¹ Che gulujx gujc recosre, dxejc sää Jesús stelaad nezro' nisdoo xten Galilee, nani nriizareni nisdoo xten Tiberias. ² Sanajĵ xhidajĵ bejĵni sa'csi rhuireni remilagwr ni rujĵni lo rebeĵracxhuu. ³ Dxejcti huä'p Jesús yejc te dajĵ, ro'c gurenäĵni rexpejĵpacni. ⁴ Niluxh ameer gac lanij pascw xten rexpejĵ Israel, cheni rudeedreni xquixhtios lo Dios xcuent dxej ni biriireni Egipto. ⁵ Cheni guläs Jesús lojni, bahuiini siääd xhidalduxh bejĵ, siäädreni nez lojni, dxejcti räjpni loj Felipe:

—¿Caro guisiinu yätxtiil te gau rebejĵre?

⁶ Dxejc räjpzani si'c te don xhi xhigab gun Felipe, luxh laani anajĵni xho gunni. ⁷ Räjp Felipe lojni:

—Di tio'p gayuu beex yätxtiil gaĵ te gaureni tlagaj.

⁸ Tej rexpejĵpacni ni laa Andrés, bejtz Simón Pedr, räjp lojni:

⁹—Ree suga' te biuux ca' gaii yätxtiil con tio'p bäjĵ, ¿xhixh sajĵ ni'c gau rebeĵ xhidajĵre?

¹⁰ Dxejcti räjp Jesús:

—Colyejtz loj rebejĵre cuereni.

Yuduxh guixa' ro'c. Dxejcti gurej reniguii. Si'cti gaii miĵ najc reniguii.

¹¹ Dxejcti cua' Jesús yätxtiilga, badeedni xquixtios lo Dios, gudisni yätxtiilga lo rexpejĵpacni. Dxejcti rexpejĵpacni gudisreni loj rebejĵ nani sobga'. Sigajcza gudisreni rebäjl si'ctisni rĵajzreni gaureni. ¹² Che gulujx gudajwreni, gudxaj xque'reni, dxejcti räjp Jesús loj rexpejĵpacni:

—Colgutie' guiraa reyätxtilbiujy nani bia'n te xhet nitdi.

¹³ Batie'tireni reyätxtilbiujy, guläsreni tzubitio'p dxijĵ yätxtilbiujy nani bia'n lo gaii yätxtiilga nani gula' gudajwreni. ¹⁴ Che bahuii rebejĵnga resean, remilagwr nani bejĵ Jesús, dxejc räjpreni:

—Guluiipacni, laa dee ni najc niguii ni rniĵ xtidx Dios nani cabääznu jiääd lo guedxliuj.

¹⁵ Sas che gucbee Jesús cayujĵreni xhigab jiädnaazreni te niujĵreni gacni reii te guinibeeni lojreni, biriini ro'c, xtebni gubisacni neĵ dajĵ.

Gusaj Jesús lo nisdoo

(Mt. 14:22-27; Mr. 6:45-52)

¹⁶ Che gojl guxhijn, bidzujn rexpejn pacni lo nisdoo. ¹⁷ Biu'reni neņ te barcw te tedreni lo nisdoo nez guedx Capernaum. Abicäjy lo yuj niluxh gajd Jesús guibi' lojreni te chääni. ¹⁸ Gusloj cayäjs nisdoo xcuent te beduxh nani cabi'. ¹⁹ Ni'cni che gusajreni si'cti gaii o xho'p kilómetro, bahuiireni siäddzungejxh Jesús lo barcw, lo nisdoo siädsajni. Bidxebduxhreni. ²⁰ Luxh laani räjpni lojreni:

—Naräni. Na'c guidxejbtu.

²¹ Dxejcru cuäjbreni biu'ni neņ barcw. Dxejcti bidzungejcreni stelaad lo yuj cadro sääreni.

Caguiil rebejn Jesús

²² Che bara yääl, rebejn nani bia'n stelaad ro' nisdoo, bahuiireni asanä rexpejn pacni barcwbäz nani suga' ro'c, niluxh di Jesús nij, xtebsireni sääreni. ²³ Luxh bidzungejxh sgaii barcw nani birii guedx Tiberias, te lajt ni tre' gajxh cadro gudajwreni yäxtiil che gulujx badeed Jesús xquixtios lo Dad. ²⁴ Che bahuii rebejn ruti Jesús ro'c, niclaza rexpejñni, biu'reni neņ rebarcw, sääreni guedx Capernaum satiilreni Jesús.

Jesús najc yäxtiil xten yäl nabajn

²⁵ Che bidxälreni Jesús stelaad ro' nisdoo, räjpreni lojni:

—Mastr, ¿guc bidzujñlu ree?

²⁶ Badzu' Jesús diidxre, räjpni lojreni:

—Rniliä, rniliäpac lojtu, caguiiltu narä sa'csi gudajwtu, gudxaj xque'tu, et sa'csi bahuiiditu remilagwr nani benä. ²⁷ Na'c guntu dzuun ganax par yälrajw nani rnitloj. Coļejn dzuun par yälrajw nani di nitloj, ni runiidx yäl nabajn par tejpas. Yälrajwre suniidx Xi'n Niguii, sa'csi loj rebejn baluii Xtadni, Diospac, laani najc Xi'npacni.

²⁸ Dxejcti räjpreni:

—¿Xhini'c jiennu te gac jienpacnu dzuun ni rļajz Dios?

²⁹ Räjp Jesús lojreni:

—Dee najc ni rļajz Dios guntu: chalilajztu xtidx narä, nani baxhaļni.

³⁰ Räjpreni lojni:

—¿Xhi seen gunlu te guihuiinu xcälrnibeelu te cholilajznu xtiidxlu? ¿Xhi dzuun rujñlu? ³¹ Retoxtadnu gudajwreni yäxtiil ni laa mana loj reyubijdz si'cni caj loj reguijtz: “Badeedni yäxtiil ni biajb xhaguibaa gudajwreni.”

³² Räjpza Jesús:

—Rniliä, rniliäpac lojtu, xhet toMoisésdi ni badeed yäxtiil ni biajb xhaguibaa. Xtadä ni suniidx yäxtiil nani siäädpac xhaguibaa. ³³ Sa'csi yäxtiil xten Dios najc bejn ni siääd xhaguibaa, niluxh laani rudeedni yäl nabajn par tejpas loj rebeņ guedxliuj.

³⁴ Räjpreni:

—Dad, baniidx yäxtiilga loonu.

³⁵ Dxejcti räjp Jesús lojreni:

—Narä nacä yäxtiil xten yäl nabajn nani riäjļ jiaäd; chutis ni jiaäd loä diruni guiliaan, niluxh chutis ni rililajz xtidxä diruni jiojļ par tejpas. ³⁶ Aguniä lojtu, la'tu ditu chalilajz, luxh abahuiitu loä. ³⁷ Guiraa renani abaniidx Xtadä loä, siäädni loä, niluxh chutis ni jiaäd loä dina cuälazäni. ³⁸ Sa'csi narä siälä xhaguibaali te gunä si'c ni rļajz Xtadä, xhet si'cđi ni rļazädi. ³⁹ Dee najc ni rļajz Xtadä nani baxhaļ narä: na'c nit nicla tej renani baniidxni loä, te guspansacä guiragajcreni che gal dxej lult ni riäjļ jiaäd. ⁴⁰ Scree rļajz nani

baxhaḷ narä: guiraa renani fii lo Xi'n Dios, näj chalilajzreni xtiidxni, xca'reni yäl'nabajñ par tejpas niluxh narä suspañsacäreni che gaḷ dxej lult ni riäjḷ jiaäd.

⁴¹ Rediidxre bejn gosloj casiejy rexpejn Israel xcuent Jesús sa'csi räjpni: "Narä nacä yätxtiil ni biäjt xhaguibaa." ⁴² Dxejcti räjpreni:

—¿La et Jesúsdi, xi'n José dee, ä? Nuure numbeenu xtadni, xnanni, ¿xhoxh rniini xhaguibaa biäjtñi?

⁴³ Dxejc räjp Jesús lojreni:

—Na'c rusieinäj sa'tu. ⁴⁴ Rut rajcdi riääd loä palga di Xtaďä ni baxhaḷ narä jiaďnāni loä, te guspansacāni che gaḷ dxej lult ni riäjḷ jiaäd. ⁴⁵ Loj reguijtz ni bacuaa redade' ni gunii xtidx Dios caj scree: "Suluui Dios guiraareni." Ni'cni guiraa reni rucuaďiaj xtidx Xtaďä, reni rsieed lojni, reni'c ni jiaäd loä.

⁴⁶ 'Dinā guiniä yu' chu abahuui lo Dios; tejtis ni abahuui lojni: nani baxhaḷ Dios, ni'ctis abahuui lojni. ⁴⁷ Rniliä lojtu che rniä: nani chalilajz xtidxä, ni'c rajp yäl'nabajñ par tejpas. ⁴⁸ Narä nacä yätxtiil nani rudeed yäl'nabajñ.

⁴⁹ Retoxtadtu gudajw mana ni bastejb Dios lo reyubijdz, dxejcti gujtzareni.

⁵⁰ Dee najc yätxtiil ni siääd xhaguibaa, te chutis ni gau yätxtiilga dini guet.

⁵¹ Narä nacä yätxtilbajñ ni siääd xhaguibaa. Palga yu' chu gau yätxtiilre, sibajñni par tejpas. Yätxtiil nani runidxä narä te xca' rebeñ guedxliuj yäl'nabajñ najc lagajc bältiehxä.

⁵² Dxejcti gosloj casiejy rexpejn Israel räjpreni:

—¿Xho gac guniidx dee bältiejxhni guidaunu, ä?

⁵³ Räjp Jesús:

—Rniliä, rniliäpac lojtu, palga ditu gau bältiejxh Xi'n Dios ni gujc Niguii, palga dizatu yä xtiejñni, digacdi ga'ptu yäl'nabajñ. ⁵⁴ Nani gau bältiehxä, nani yäza xtienä, ni'c rajp yäl'nabajñ par tejpas, niluxh suspañsacāni che gaḷ redxej lult. ⁵⁵ Sa'csi bältiehxä najc te yäl'rausa'cpac, xtienä najcza te yäl'rasa'cpac.

⁵⁶ Nani gau bältiehxä, nani yäza xtienä, ni'c yu'pac con narä, luxh narä yu'äza con laani. ⁵⁷ Xtaďä ni baxhaḷ narä rajp yäl'nabajñ par tejpas. Narä nabañä xcuent laani. Sigajcza nani rajw narä, sibajñzani xcuent narä. ⁵⁸ Dee najc yätxtiil nani biääd xhaguibaali; dini gac si'c mana ni gudajw xtadtu dxejc empac gujtreni, sa'csi nani gau yätxtiilre sibajñni par tejpas.

⁵⁹ Recosre baluui Jesús neñ te guidobäz laḷ ni guyu'ni guedx Capernaum.

Diidx xten yäl'nabajñ par tejpas

⁶⁰ Che biejn diajgreni si'c, xhidajl rexpejñpacni räjp:

—Naganduxh najc rextiidxni. ¿Chu laa nani gac cuadiajgñi?

⁶¹ Dxejcti gucbee Jesús cagusiejyreni xcuent rediidxga, dxejc gunabdiidxni räjpni:

—¿La rusieed rediidxre la'tu, ä? ⁶² ¿Xhicha guntu paru fiitu chä'p Xi'n Dios ni gujc Niguii cadro guyu'ni galoo? ⁶³ Sprit xten Dios najc ni rudeed yäl'nabajñ; bältiejxhni xhet rujndini gaan. Rediidx nani guniä lojtu najc didxlii xcuent recos xten Sprit, luxh rediidxga rudeed yäl'nabajñ par tejpas. ⁶⁴ Luxh laḷtis yu' lojtu reni di chalilajz.

Sa'csi Jesús nancheeni galooli chu reni'c di chalilajz, anajnzani chuni'c guto'ni, gutedni laani ladzñaa rebeñ dojl. ⁶⁵ Dxejcti räjpni:

⁶⁶ Lagajc dxejc gosloj cabicaj xhidajl rebeñ ni agujc xchej gusanäj Jesús, dirureni nisianäj Jesús. ⁶⁷ Dxejcti räjp Jesús loj guidzubitio'p rexpejñpacni:

—¿La nägajcza la'tu rlaiztu jiitu, ä?

⁶⁸ Badzu' Simón Pedr diidxre, räjpni:

—Dad, ¿chuloj chonnu? Luj rajplu diidx ni rudeed yäl'nabajñ par tejpas.
 69 Nuure abiolilaaaznu, anajñnu najclu Crist Xi'n Dios nani nabajñ.

70 Badzu' Jesús diidxre, räjpni:

—¿La et lagajc narädi guleä guitzubitio'ptu? Luxh tejtu najc beñdxab.

71 Diidxga guniini xcuent Judas Iscariote, xi'n Simón, sa'csi Judas najc ni guto'ni mase nadxaagni lo guitzubitio'p rexpejñpac Jesús.

7

Di rebejtz Jesús chalilajz

1 Che gujcti recosre, cansaj Jesús nez reyuj xten Galilee, di rlajzni jia'nni nez reguedx Judea sa'csi rlajz reben ro'c ju'tni. 2 Luxh ameer gal lanij xten cose'ch xten guidoguijd, te relanij xten rexpejñ Israel. 3 Ni'c räjp rebejtz Jesús lojni:

—Na'c jia'nlu ree. Huij Judea te näjza rexpejñpacu fii redzunro nani rujñlu.

4 Sa'csi rut rujñdi xtzuumni xhiga'tz palga rlajzni gacbee bejñ xhi dzuun rujñni, te gumbee bejñni. Palga rujñpacu redzuunre, baluüini lo guiraa reben guedxliuj.

5 Guniireni si'c lojni sa'csi nicla rebejtzni di chalilajz xtiidxni. 6 Dxejcti räjp Jesús lojreni:

—Gajd xhorä guidzujñ, niluxh par la'tu xhitis or najc hueen. 7 Di gacdi guidxe'ch reben guedxliuj lojtu, luxh rdxe'chreni loä sa'csi narä rñiliä xcuentreni: dzunguijd najc xtzuumreni. 8 La'tu colchäj lanij; narä dina cha'a lanijga sa'csi gajd xhorä gal.

9 Che gulujx guniini si'c lojreni bia'ntini nez Galilee.

Huij Jesús lanij xten retabernaculos

10 Dxejcti che asää rebejtzni lanij, dxejc näjza laani sääni lanij, luxh dini nusäbdiidx, si'c xhiga'tz sääni. 11 Dxejcti caguil rexpejñ Israelni lo lanijga, räjpreni:

—¿Concha niguiiga?

12 Lo rebejñ xhidaalga yu' xhidajl bejñ ni cagusiejyreni xcuentni. Yu'reni räjp: “Hueen najcni”, per sgaiireni räjp: “Dini gac hueen. Cagusgueeni rebeñguejdx.”

13 Nicla tejreni xhet casäbdiidxdiren xhini'c caniireni. Direni guinii dip sa'csi rdxejbreni rexpejñ Israel nani rnibee.

14 Agurojl lanij, che biu' Jesús neñ guidoro. Dxejcti gusloj caguluiini.

15 Dxejcti rdxejoj rexpejñ Israel nani rnibee, räjpreni:

—¿Xho najn dee guiraloj, niluxh dini nisieed xleii toMoisés?

16 Badzu' Jesús diidxre, räjpni:

—Yäl'rului nani caluiyä et xtenädini, xten nani baxhal naräni. 17 Palga yu' chu rlajz gun nani rlajz Dios, sacbeeni la xten Dios najc reyäl'rului xtenä, o la lagajcsi narä rbää diidx ni caguluiä. 18 Nani rusule'ni diidx nani lagajc laani rbääni, ni'c rñiini diidxga te guiliä'p rebejñ xpala'nñi, luxh nani rguil chä'p xpala'n nani baxhalni, ni'c ni rñii didxlii, xheti yäl'rusguee neñ lastooni. 19 ¿La di toMoises nuniiidx leii lojtu, ä? Niluxh nicla tejtu di gusoob xtidx leiiga. ¿Xhicuent rlajztu ju'ttu narä, pes?

20 Badzu' reben xhidajlga diidxre, räjpreni:

—¡Xpriet beñdxab yu' lastoolu! ¿Chuni'c rlajz ju'tlu?

21 Badzu' Jesús diidxre lojreni, räjpni:

—Tejts dzuun benä con xcälrnibeä, dxejc guiraatu cadxelojtu sa'csi benäni dxej ni rusilajztu. ²² Ni'cni baniidx to Moisés lojtu yälru'tu bee, luxh etlaadini guläxtejnini, agac guläxtej retoxtadgoldootuni. La'tu rusäلتu bee rebiuux mase najcni dxej nani rusilajztu. ²³ Mbaj pes, palga rajc rusäلتu bee bejn te dxej nani rusilajztu didi nit xleii Moisés, çxhicient rdxe'chtu loä sa'csi basiacäpac te bejn te dxej nani rusilajztu, ä? ²⁴ Na'c rujntu yälguxhtis si'ctis ni rlajztu. Colyejn yälguxhtis con yälguxhtis xten Dios.

Rusule' Jesús casiäädni

²⁵ Dxejcti gusloj gaii bejn Jerusalén cayujn yälgunabdiidx, räjpreni:

—çLa etlaadi dee ni caguuilreni te ju'trenini, ä? ²⁶ Ani asuga', caniini nez loj guiraa rebenguejdx, niluxh rut rudxoindini. çXhaa ahuuilajz reguxhtis, regubier laani najcpacni Crist, ä? ²⁷ Niluxh nuure nadoncheenu caro siääd niguiire, niluxh che jiääd Crist, rut gacbeedi caro siäädni.

²⁸ Caguluii Jesús neñ guidoo che biejn diajgni rediidxre, dxejc dipduxh guniini, räjpni:

—La'tu numbeetu narä, najntu caro siälä; luxh dina niälä lagajcsi narä; nani baxhal narä guliipac nabajjni, luxh la'tu ditu gumbeeni. ²⁹ Luxh narä numbeäni, sa'csi lojni biriä, laani baxhalzani narä.

³⁰ Dxejc rälzreni niniaazrenini, niluxh rut gunaazdini, sa'csi gajd xhorni gal. ³¹ Xhidajl bejn lo reben xhidajlga huililajz xtiidxni, dxejcti räjpreni:

—Cheni jiääd Crist, çxhixh sujnruni milagwr loj nani rujn dee, ä?

Ruxhal refarisee guixhajg guiniaaz Jesús te jiäuni

³² Che biejn diajg refarisee xhi canii rebejn xcuent Jesús, laareni näjza rebixhojz nani rnibee lo rebixhojz baxhalreni guixhajg te guiniaazreni Jesús te jiäuuni. ³³ Sas räjp Jesús lojreni:

—Bale'si dxej su'ä lojtu, dxejcti guibi'ä loj nani baxhal narä. ³⁴ Siguilutu narä, niluxh ditu guidxäl narä, sa'csi cadro cha'ä digacdi jiäädtu.

³⁵ Ni'c gunii rexpejn Israel lo sa'reni; räjpreni:

—çCharo chääni ni'c di gacdi guidxälunni? çXhaa sijni loj rexpejn Israel nani nare'ch nez lajdx regriegos te guluiini regriegos? ³⁶ çXhi säloj diidxre nani guniini loonu: “Siguilutu narä, niluxh ditu guidxäl narä, sa'csi cadro cha'ä di gacdi jiäädtu”?

Regueu nisnabajn

³⁷ Lult dxe lanij, ni najc dxero, gusulii Jesús dipduxh guniini, räjpni:

—Palga yu' chu cayojl, sujjiäädni loä te yäni. ³⁸ Nani chälilajz xtidxä si'cni caj lo rexquijtz Dios neñ lastoolini siliejn nisnabajn.

³⁹ Rediidxre guniini xcuent Sprit Dxan nani churu jiädläz neñ lastoo reni rililajz xtiidxni, sa'csi gajd Sprit Dxan jiääd, sa'csi gajd Jesús guibansac lo rebengut.

Gucgala'rebejn

⁴⁰ Lo reben xhidajlga yu' reni biejn diajgreni rediidxga, dxejc räjpreni:

—Guliipacni, dade're najc laapac ni siääd, si'c ni rnii xtidx Dios.

⁴¹ Yu'zareni räjp:

—Dade're najc Crist ni cabäaznu.

Yu'za sgaii ni räjp:

—Gurniälojtu jiääd Crist nez Galilee. ⁴² Ni loj rexquijtz Dios caj riäljpac gac Crist te rexagdoe toreei David, jiäädzani guedx Belén, lagajc guejdx cadro siääd toreei David.

⁴³ Dxejcti gucgala' rebejn̄ xcuent Jesús. ⁴⁴ Yu'reni rlaiz chääni pres luxh rut biajxdi gunaazni.

Di reguxhtis chalilajz biääd Crist

⁴⁵ Gubi' reguixhajg xten guidoo loj rebixhojzro näjza refarisee. Dxejcti gunabdiidxreni loj reguixhajg, räjpreni:

—¿Xhicuent ditu niädnäni?

⁴⁶ Badzu' reguixhajg diidxre, räjpreni:

—¡Gajdpac te bejn̄ guinii si'cni rnii bejn̄ga!

⁴⁷ Dxejc räjp refarisee:

—¿La näj la'tu abasgueeni, ä? ⁴⁸ ¿Xhixh loj regubier o loj refarisee yu' chu tej ni ahuililajz xtiidxni, ä? ⁴⁹ Reben̄ xhidajlre ni di gan xleii toMoisés, reni'c agunijtpac.

⁵⁰ Nicodem, nani huij lojni te guxhijn̄, najc te refarisee. Laani räjpni lojreni:

⁵¹ —Lo xleinu caj: digacdi guntu yäl̄guxhtis te bejn̄ palga gajdту gucuadi-agxgaa xtiidxni, te don xhi bejn̄ni.

⁵² Badzu'reni diidxre räjpreni lojni:

—¿La näjza luj siäädlu Galilee, ä? Biłsa'c xhi caj lo xquijtz Dios, suhuuilu nicla tej nigui nani rnii xtidx Dios di jiääd nez Galilee.

Gunaa nani biga' caräl̄guixh con te niguii

⁵³ Dxejc cade tejreni sii rolizjreni.

8

¹ Dxejcti huij Jesús nez dan Oliib. ² Rsilru gubi'ni, bui'ni nen̄ guidoo. Luxh sanuutis siääd guiraa rebenguejdx lojni. Dxejc ro'c gurejni, gusloj caguluinireni. ³ Dxejcti biääd refarisee näjza reben̄ najn, biädnäreni te gunaa nani biga' caräl̄guixh con te niguii. Basujrenini galäii reni suga' ro'c. ⁴ Räjpreni loj Jesús:

—Mastr, gunaare biganäj te niguii caräl̄guixhreni, niluxh yu' chäälni. ⁵ Loj leii xten Moisés caj guicuaanu guij yejc sa' gunaaga te guetni. Luj ¿xhicha naalu?

⁶ Si'c räjpreni lojni te gaxäjsi gunijtni te diidx te gac cue'creni xquejni. Niluxh Jesús basajbtisni lojni lo yuj, gusloj cagucuaani lo yuj con bicueñaani.

⁷ Dxejc sanuutisreni canabdiidxreni, huisutini, räjpreni:

—Nani yu' lojtu ni xhettipac xtojlni, ni'c ganiddoo sugucuaani guij yejc gunaare.

⁸ Basabsac lojni lo yuj sanuutis cagucuaani con bicueñaani lo yuj. ⁹ Luxh laareni che biejn̄ diajgreni diidxga, sa'csi yu' xtojlni, gusloj biriireni tebgajreni, ganid ni najc bengolru, dxejcti ni najc huiuru. Dxejcti bianxteb Jesús näjza gunaa ni suga' galäiireni. ¹⁰ Dxejc gusulii Jesús, luxh sa'csi rutru lojdi bahuini, xtebtis gunaaga, räjpni lojni:

—Gunaa, ¿con reni cabe'c xquejlu? ¿La rut bacuaquiidiru luj, ä?

¹¹ Räjp Gunaaga:

—Nicla tejreni, Dad.

Dxejcti räjp Jesús lojni:

—Niclaza narä dina gucuaquiäru luj. Huij, na'cru gunlu dojl.

Jesús najc bianij xten guedxliuj

¹² Gunii Jesús lo rebejn̄ stehuält, räjpni lojreni:

—Narä nacä bianij xten guedxliuj; nani jiadnajl narä dini sa lo yäl_nacä_jy, sica'ni bianij ni rudeedpac yäl_nabaj_n.

¹³ Dxejcti räjp refarisee lojni:

—Luj canilu diidx lagajcsi xcuentlu. Xhet sajcdi sa' diidxga.

¹⁴ Badzu' Jesús diidxre, räjpni lojreni:

—Masque lagajc narä rniä diidx xcuentä, sajc xtidxä, guliipacni, sa'csi ananä caro siälä, ananäza caro cha'ä. Niluxh la'tu ditu gan caro siälä, niclaza caro cha'ä. ¹⁵ La'tu rujntu yälguxhtis si'c najctis rexhigab xten beñ guedxliuj. Narä rut lojdi runä yälguxhtis. ¹⁶ Palga gunä yälguxhtis, yälguxhtis xtenä laaca najcni, sa'csi et xtebädi runä yälguxhtis, sa'csi narä näj Xtaä ni baxhal narä rien_nuni. ¹⁷ Luxh lo xleitu caj diidxre: “Che rniä tio'p bejn tejsi diidx, didxliini, col_chalilajzni.” ¹⁸ Narä rniäläpac diidx lagajc xcuentä, dxejcti Xtaä nani baxhal narä rniälizani diidx xcuentä.

¹⁹ Räjpreni loj Jesús:

—¿Caro yu' xtaälu?

Räjp Jesús lojreni:

—Ditu gumbee nicla narä, niclaza Xtaä; paru niembeetu narä, niem-beezatu Xtaä.

²⁰ Rediidxre gunii Jesús cadro re' gojn, la_l ni caguluini neñ guidoro niluxh rut gunaazdini sa'csi gajd xhor_ni guidzuj_n.

Cadro cha'ä, la'tu digacdi jiaädu

²¹ Gunisac Jesús lojreni, räjpni:

—Narä sia'ä, luxh la'tu siguiiltu narä, niluxh loj xtoj_ltu sejtту. Cadro cha'ä di gacdi jiaädu.

²² Räjp rexpejn Israel loj resa'reni:

—¿Xhaa sugu'tni lagajc laani, ni'cni najni di gacdi chonnu cadro chääni?

²³ Räjp Jesús lojreni:

—La'tu najctu beñ lo yuj. Narä nacä beñ ni siääd jiaa. La'tu najctu beñ guedxliujre. Luxh narä dina gacätis beñ guedxliujre. ²⁴ Ni'cni guniä lojtu, sejtту lo xtoj_ltu sa'csi palga ditu chalilajz nacä chu nacä, sejtpactu lo xtoj_ltu.

²⁵ Dxejcti räjpreni lojni:

—¿Chuxh najclu?

Dxejcti badzu' Jesús diidxre lojreni, räjpni:

—¿Xhini'c guniä lojtu galooli? ²⁶ Xhidajl diidx rlazä guiniä, xhidajlza yälguxhtis rlazä gunä xcuenttu sa'csi ditu chalilajz, per nani baxhal narä najc beñ guliipac; nani biejn diagä guniini, rediidxga rniä loj reben guedxliuj.

²⁷ Luxh laareni direni niachee la xcuent Dad Dios ni caniini. ²⁸ Ni'cni räjp Jesús lojreni:

—Cheni guliästu Xi'n Niguui jiaa, dxejc sacbeetu laa narä ni baxhal_ni, luxh xhetliidi runä lagajcsi xcuentä. Si'cni baluii Dad narä, si'ctis rniä. ²⁹ Nani baxhal narä suganäjni narä. Gajd Dad gusanxteb narä, sa'csi runätis ganax redzuun nani rchaglajzni.

³⁰ La_l ni caniini si'c, xhidajlreni huililajz xtiidxni.

Rexi'n Dios con remos xten dojl

³¹ Dxejcti räjp Jesús lo rexpejn Israel nani huililajzga:

—Palga la'tu sutijptu, guzoobtu xtidxä, dxejc guliipac najctu xpenä.

³² Sumbeezatu nani najc didxgului, niluxh didx guliiga susläa la'tu lo xtoj_ltu.

³³ Räjpreni lojni:

—Rexagdoo toAbraham najcnu, rut chu lojdi gudo'nu si'c mos. ¿Xho mood naalu “siliaatu”?

³⁴ Räjƿ Jesús:

—Riniliä, rniliäpac lojtu, chutis ni rujn dojl najc mos xten dojl. ³⁵ Nani najc mos, dini jia'n rolijz xlamni guideb guibajnni, niluxh nani najc xi'n lamga, ni'c sii sia'n rolijz xtdadni guideb guibajnni. ³⁶ Ni'cni, palga rusläa xi'nni la'tu lo dojl, dxejcsii apac gulaatu. ³⁷ Ananä najctu xagdoo toAbraham, luxh la'tu rlanjtu ju'ttu narä sa'csi di xtidxä jiu' lo xcäriejntu. ³⁸ Narä rniä nani abahuiä con Xtäädä; luxh la'tu rujntu nani biejnza diajgtu lo xtadtu.

³⁹ Badzu'reni diidxre, räjƿreni lojni:

—Xtadnu najc toAbraham.

Dxejc räjƿ Jesús lojreni:

—Palga la'tu najcpactu xi'n toAbraham, sujntu sa' dzuun ni bejn toAbraham. ⁴⁰ Luxh naj rlanjtu ju'ttu narä, sa'csi rniliä rediidx nani baluii Dios loä. ;Di toAbraham niujn si'c! ⁴¹ La'tu rujntu xtzuum xtadtu.

Dxejc räjƿreni lojni:

—Nuure dinu gac xi'n chälbejn̄di; nuure tejtis xtadnu yu', laani najc Dios.

⁴² Dxejcti räjƿ Jesús:

—Paru guliini najc xtadtu Dios, ninälajztu narä sa'csi loj Dios biriä siälä ree. Xhet lagajcsi xcuentä siälädi; Dios baxhaļ narä. ⁴³ ¿Xhicuent ditu gacbee rediidx ni rniä lojtu? Sa'csi di rlanjtu gucuadiajgtu rextidxä. ⁴⁴ Xtadtu najc bendxab. La'tu najctu xi'nni, rlanjtu guntu nani rlanjtisni guntu. Xtadtu galooli najcni te ni rugu't, dini suu xlaad didxlii, sa'csi xheti didxlii neñ lastooni. Che rniini didx-xhii, si'c rniini sa'csi si'cpac najcni, sa'csi najcni beñ didx-xhii, najczani xtd didx-xhii. ⁴⁵ Niluxh narä rniä didxlii, ni'c ditu chalilajz xtidxä. ⁴⁶ ¿Chu tejtı sajc guluii te dojl ni benä? Narä rniä didxlii. ¿Xhicuent ditu chalilajz xtidxä, ä? ⁴⁷ Nani najc xpejn̄ Dios, ni'c rucuardiajg xtidx Dios. Sa'csi la'tu ditu gac xpejn̄ Dios, ni'cni ditu gucuadiajg xtidxä.

Ansdę toAbraham, agac nabaj̄n Crist

⁴⁸ Dxejcti badzu' rexpejn̄ Israel diidxre, räjƿreni lojni:

—Laaca rniinu luj najclu te bejn̄ ni siääd Samaria, bendxab yu' lastoolu.

⁴⁹ Räjƿ Jesús lojreni:

—Xhet bendxabdi yu' lastoä. Nani runätis rliä'pä xpala'n Xtäädä, luxh la'tu alga rbälaztu narä. ⁵⁰ Luxh narä dina quilä chu guiliä'p xpala'nä, yu' chu rguuil guiliä'p bejn̄ xpala'nä, niluxh laani rujnni yalguxhtis. ⁵¹ Rniliäpac lojtu, nani riu, nani rusoob xtidxä, dipacni guet.

⁵² Dxejcti räjƿ rexpejn̄ Israel lojni:

—Naj agucbeepacnu yu' bendxab lastoolu. ToAbraham näjza reniguii nani gunii xtidx Dios, guiraareni agujt. Luxh luj rniilu: “Nani riu, nani ruzoob xtidxä, dipacni guet.” ⁵³ ¿Xhixh sajcrulu lo toxtadnu Abraham, ä? Ni laani gujtni, gujtzä reniguii ni gunii xtidx Dios. ¿Chuxh rchalolu najclu?

⁵⁴ Badzu' Jesús diidxre, räjƿni lojreni:

—Palga lagajc narä rliä'pä xpala'nä, xhet sajcdi xpala'nä. Per nani rliä'p xpala'nä najc Xtäädä, lagajcza Xtäädä ni rniitu najc Xtıostu. ⁵⁵ Niluxh la'tu ditu gumbeeni. Narä numbeäni. Peru guiniä dina gumbeäni, sacä te beñ didx-xhii si'c najctu la'tu. Niluxh dee, numbeäpacni, luxh riuä ni rniini, rusobä xtiidxn̄i. ⁵⁶ ToAbraham toxtadgoldootu, bibalajzni sa'csi nuhuini dxej nani jiälä, niluxh bahuiinini dxejc bibalazduxhni.

⁵⁷ Dxejcti räjƿ rexpejn̄ Israel lojni:

—Nicla gajdlu chu tiubitzuu ijz, ¿xho naalu abahuiilu lo toAbraham?

⁵⁸ Räjƿ Jesús lojreni:

—Rniliäƿac lojtu, che gajdli guibajƿ toAbraham, agac nabaƿä narä.

⁵⁹ Dxejcti cua'reni guij te nucuaareni yejc Jesús, per di Jesús niga', biriini neƿ guidoro, gudejdnı galäiireni. Sä'tini.

9

Basiac Jesús te bejn ni natiä'ƿ balojni che gojllini

¹ Che cadejd Jesús te lajt, bahuiini sobga' te bejn ni che gojlli bejnğa agajc natiä'ƿ balojni. ² Dxejc gunabdiidx rexpeljƿacni lojni, räjpreni:

—Mastr, ¿chuni'c bejn dojl, la bejnre o la xcuzaƿnni, ni'c natiä'ƿ balojni che gojlnı, ä?

³ Räjƿ Jesús:

—Nicla laani, niclaza xcuzaƿnni di niujƿ dojl. Si'c gojlnı te xcuent ni sajc bejnre suhuii bejn xho najc xtzuun Dios. ⁴ Nanab gunä xtzuun nani baxhaƿ narä ƿaj ni najc rdxee, sa'csi cheni guidzujƿ guxhijƿ rut gacdi gun dzuun.

⁵ Laƿni yu'ä lo rebejn guedxliuj, nacä xpianij guedxliuj.

⁶ Che gulujx guniini si'c, batiobxhejnı lo yuj, bejnı bajƿ con xhejnı, gudääbnı con bicueƿaani lo rebaloj lotiä'ƿga. ⁷ Dxejcti räjpni:

—Huij, huitiib lojlu neƿ nis ni laa Siloé. Laj nisga säloja “baxhaƿni”.

Dxejcti huijnı. Huitiibni lojni. Che gubi'ni, aruhuiini. ⁸ Dxejcti rexpisıƿ lotiä'ƿga, ƿaj renani galoo bahuiireni natiä'ƿ lojni, räjpreni:

—¿La et laadi dee ni rbej te rutie'ni gojn, ä?

⁹ Yu'reni räjp:

—Laanini.

Yu'zareni räjp:

—Et laadini, rujnsı lojni si'c.

Laani räjpni:

—Laa naräni.

¹⁰ Räjƿreni lojni:

—¿Xho mood ariƿ balojlu?

¹¹ Dxejcti räjp dade'ga nani gujc lotiä'ƿ:

—Dade' ni laa Jesús bejn bajƿ, gudääbnıni baloä, dxejcti najni: “Huitiib lojlu neƿ te nis ni laa Siloé”, dxejcti che huitibä loä, lagajc dxejc biƿ loä.

¹² Dxejcti räjpreni lojni:

—¿Con dade'ga ƿaj?

Räjƿti bejnğa:

—Dina ganä.

Reben farisee bejn yälgunabdiidx lo dad lotiä'ƿ nani biajc lojni

¹³ Huinäreni nani gujc lotiä'ƿga nez loj refarisee. ¹⁴ Luxh sa'csi najcni dxej ni rusilajzreni che bejn Jesús bajƿ ni gudääbnı loj lotiä'ƿga te biajc balojni, ¹⁵ gunabdiidxsac refarisee loj dade' nani biajc balojni, xho mood ariƿ balojni ƿaj.

Laani räjpni lojreni:

—Bajƿ gudääbnı loä, dxejc gudibä loä, ƿaj aruhuiä.

¹⁶ Dxejc yu' refarisee ni räjp:

—Di dade' ni bejn dee gac xpejn Dios, sa'csi dini jiu dxej ni rusilajz xpejn Israel.

Yu'zareni räjp:

—¿Xho gac gunni sa' remilagwrga paru najcni beṇ dojl?

Ni'cni gula' sa'reni, gujcreni tio'p gala'. ¹⁷ Dxejcti gunabdidxsacreni lo ni gujc lotiä'p:

—Luj a', ¿xhi rniilu xcuent nani basiajc balojlu?

Dxejc räjp dade'ga:

—Narä rniä najcni te beṇ nani rniü xtidx Dios.

¹⁸ Luxh rexpejn Israel naaddireni chalii lajzreni gujcpacni te lotiä'p ni abien balojni, dxejcti gurejdxreni xcuzañ dade' ni gujc lotiä'pga. ¹⁹ Dxejcti gunabdiidxreni lojreni, räjpreni:

—¿Laa xi'ntu dee nani najtu cheni gojllini natiä'p lojni? ¿Xhoxh arien lojni naj?

²⁰ Badzu' rexcuzajnni diidxre, räjpreni:

—Nadonnu laa xi'nnuni, luxh che gojlni natiä'p lojni. ²¹ Niluxh dinu guidon naj xho mood arien lojni, dikanu guidon chu basiajc balojni. Colguiniabdiidx lojni, anajcni bengool, lagajc laani sajc guiniini xhi gusajcni.

²² Si'c gunii xcuzañni sa'csi rdxejbreni rexpejn Israel, sa'csi agac bia'nreni diidx sibääreni, dirureni gusaan jiu' neṇ guidoo chutis te beṇ ni naa Jesús najcrist nani abiääd. ²³ Ni'cni räjp rexcuzajnni:

—Anajcni bi'n ni ayu' xcäriejnni. Lojni colguiniabdiidx.

²⁴ Dxejcti guredxsacreni nani gujc lotiä'pga, räjpreni lojni:

—Gulä'p xpala'n Gueb Dios. Nuure nadonnu beṇ dojl najc dade'ga.

²⁵ Dxejcti badzu' dade'ga diidxre, räjpni:

—Dina ganä la najcni beṇ dojl o la dini gac. Tejtis nanä: gucä lotiä'p, luxh naj arien balaö.

²⁶ Stehuält gunabdiidxreni, räjpreni lojni:

—¿Xho bennäjni luj? ¿Xho bejnni basiajcn balojlu?

²⁷ Badzu' dade'ga diidxre, räjpni:

—Ni aguniä guira'ti lojtu, luxh la'tu ditu jiu xtidxä. ¿Xhicuent rlanjtu guinisacäni? ¿Xhixh näj la'tu rlanjtu gactu xpejñpacni, ä?

²⁸ Dxejc gudilnäjrenini, räjpreni:

—Luj najclu xpejñni, per nuure najcnu xpejñ toMoisés. ²⁹ Anadonnu guninäj Dios toMoisés, niluxh dade're dinu guidon casiäädni.

³⁰ Dxejcti räjp dade' lojreni:

—Dee najc te cos ni guidxeloy beṇ: la'tu ditu gan casiäädni, jniluxh laani basiajcn balaö! ³¹ Nadoncheenu di Dios cuadiajg xtidx rebeṇ dojl; palga yu' chu rajñ Dios, ni rusoozba xtiidxni, rucudiajg Dios xtidx sa' beṇga. ³² Che guslojli guedxliuj gajd diajgñu jieñ xcuent te beṇ nani rusiajc baloj te beṇ lotiä'p nani natiä'p lojni cheni gojllini. ³³ Palga xhet lo Diosdi siääd dade're, xhet sajcdi gunni.

³⁴ Badzu'reni diidxre räjpreni lojni:

—Luj, lo dojlpac gojllu, ¿xho jiädluuilu nuure?

Dxejcti guläärenini neṇ guidoro, barilaagwrenini.

³⁵ Biejñ diajg Jesús guläärenini neṇ guidoro, che bidxälñini, räjpni lojni:

—¿La rililajzlu xtidx ni najc Xi'n Dios ni gujc Niguui, ä?

³⁶ Badzu'ni diidxre, räjpni:

—¿Chuni'c najcni, Dad, te chalilazä xtiidxni?

³⁷ Räjp Jesús:

—Abahuuilu lojni, lagajcza laani caninäjlu naj.

³⁸ Dxejcti räjpni:

—Rililazä Dad.

Dxejcti bazuxhijbni te gojñnini.

³⁹ Räjþ Jesús:

—Par yälguختis biälä lo guedxliujre, te fii renani di lojni jien, niluxh reni rien lojni sajcreni lotiä'p.

⁴⁰ Refarisee nani suganäjreni, che biejn diajgreni diidxre, räjpreni:

—¿Xhixh najczanu beñ lotiä'p, ä?

⁴¹ Räjþ Jesús:

—Paru najctu lotiä'p, rut gucuaquijditu xtojltu, ñaj sa'csi rniitu rien lojtu, sicaquijtu rextojltu.

10

Jesús najc te baxtorsa'c

¹ 'Rniliä, rniliäpac lojtu, nani di jiu' ro' gurajl xte rexiiil, alga richu'ni stelaad, rä'pni cuä' gurajl, ni'c najcni te gubaan. ² Nani riu' nez ro' gurajl xten rexiiil, laani najc xpaxtoorreni. ³ Che guidzujñ baxtoor, ruxhal nani rcanäj ro lä', te jiu'ni. Rexiiilga numbeereni xse' baxtoor, dxejctiru laani rbejdxni rexiiilga, tebgaj xiilga yu' lajni, rinäzanireni cadro naga' guixasa'c.

⁴ Che rii rexiiilga neñ gurajl, sanä baxtoorgareni, luxh numbee rexiiilga xse'ni, ni'c rsianäjreni baxtoorga. ⁵ Luxh dipacreni chanä' te baxtoor nani direni gumbee, ruxunreni lojni sa'csi direni gumbee xse' garenca bejn.

⁶ Bij Jesús rediidxga lojreni, niluxh direni niacbee xhi säloj ni guniini.

⁷ Dxejcti gunisac Jesús diidx lojreni; räjpni:

—Rniliä, rniliäpac lojtu, narä nacä si'c roxlä' xcurajl rexiiil. ⁸ Guiraa reni abiääd galoo, najczeni ganax gubaan luxh di rexiiil nucuadiajg xse'ni. ⁹ Narä nacä si'c rolä' xten gurajl, nani jiu' nejzga, silaani loj xtojlni, siu'ni, siriini te guidxälñi guixasa'c gauni.

¹⁰ 'Ni najc gubaan riäädtsini te cuanni, te ju'tni, te guxhiñzani, niluxh narä siälä te ga'ptu yälñabansa'c, yälñabajñ par tejpas. ¹¹ Narä nacä baxtorsa'c; luxh baxtorsa'c sudeed lagajc xcälñabajñni xcuent rexiiilni. ¹² Niluxh te mos ni rajxh, di gac baxtoorpac, ni xhet xtendini najc rexiiil, che rhuini siääd te cuyo't, ruxunni, li rbälazni rexiiil. Dxejc rniaaz cuyo't rexiiil, rutie'chzani rexiiil. ¹³ Mosga ruxun sa'csi najcni mostis, luxh dini jiu xhi rsiajc rexiiil.

¹⁴ 'Narä nacä baxtorsa'c; numbeä reni najcpac rexilä; rexilä numbeezareni narä ¹⁵ sigajc numbee Xtaää narä, sigajc numbeäza Xtaää; luxh sudeää xcälñabana xcuent rexiiilga. ¹⁶ Rapäza ste cuaa xiil, ni di gac xten gurajlre; näjza laareni nanab chaxiä, te gušobdiajgreni xtidxä, te guidxagsa' guiro'p cuaareni, gacreni tejtis gurajl, tejtisza baxtoor.

¹⁷ 'Narä siguixäza xcälñabana, guetä, te dxejcru siliässacä xcälñabana, guibañsacä, ni'cni sanälajz Xtaää narä. ¹⁸ Rut sajcdi ju't narä, lagajc narä gudedä xcälñabana, guetä. Rapä yälñibee te gudedä xcälñabana, guetä, rapäza yälñibee te xcasacä xcälñabana te guibañsacä, sa'csi dee najc yälñibee ni baniidx Xtaää löä.

¹⁹ Xcuent rediidxre gula' sa' rexpejn Israel, gujcreni tio'p gala'.

²⁰ Xhidajlreni canii:

—¿Xhicuent riutuni? ¿La ditu gan te beñdxab yu' lastooni? Yejcni rajc. Xhigac rcuadiajgtu xtiidxni.

²¹ Dxejc ste cuaareni:

—Dini gac. Di rediidxre gac xtidx te beñdxab. ¿Xhixh sajç rusiajc beñdxab baloj relotiä'p, ä?

Rdxe'ch rebejn loj Jesucrist

²² Lagajc neṅ redxejga gujc lanij xten xquidoo rexpejn Israel guedx Jerusalén. ²³ Najcni bäi najl. Biu' Jesús guidoro, sasajni nez neṅ cordoor ni laa xten Salomón. ²⁴ Gubig rexpejn Israel guideb gabi Jesús, räjpreni lojni:

—¿Gucli gucua'tzlu loonu chu najclu? Palga luj najclu Crist ni cabääznu jiaäd, guiniliini loonu tejpas.

²⁵ Dxejc badzu' Jesús diidxre, räjpni lojreni:

—Aguniä lojtu si'c, niluxh ditu nililajz. Redzuun nani runä xcuent xcälrnibee Xtaäd, huenliisi ruluilojreni chuni'c nacä. ²⁶ La'tu ditu chalilajz sa'csi ditu gac rexilä. ²⁷ Rexilä numbee xse'ä, luxh narä numbeäzaren, riädnajzaren narä. ²⁸ Narä rudedä yäl'nabajn par tejpas loj rexilä, luxh direni nitlo par tejpas. Rutza laadi nani sajz gudzucajreni ladzñaä. ²⁹ Xtaäd baniidxreni loä, laani najcni guroobru, nadipru loj guiraareni. Rut laadi nani sajz gudzucajreni ladzñaä Xtaäd. ³⁰ Narä näjza Xtaäd najcnu tejsi.

³¹ Dxejc gulässac rexpejn Israel guij, te nucuaareni yejc Jesús. ³² Dxejcti räjp Jesús lojreni:

—Xhidajl dzuun xten Xtaäd abaluiä lojtu, ¿lo redzuunga, xhi tej dzuun rujn gucuaatu guij yecä?

³³ Dxejcti räjp rexpejn Israel lojni:

—Xcuent redzuun ni rujnlu dinu gucuaa guijlu. Sa'csi guniyajlu, ni'c nucuaanu guij yejclu. Beṅ guedxliujlu, luxh najlu najclu tejsi con Dios.

³⁴ Badzu' Jesús diidxre, räjpni lojreni:

—¿La et loj xleiiditu caj rediidxre: “Narä rniä, la'tu najc redios”?

³⁵ Nancheenu digacdi guidxaa xquijtz Dios. Palga gulalajni redios rebejn nani bejn yälguxhtis loj rexpejn Israel, dxejc ³⁶ naj ¿xhicuent guniitu loä: “Caniyajlu Dios”, sa'csi guniä lojtu narä nacä Xi'n Dios? Ni gule Dios narä, baxhalni narä lo guedxliujre. ³⁷ Palga dina gunä redzuun xten Xtaäd, na'c chalilajztu rextidxä. ³⁸ Luxh palga runnäni, mascä ditu chalilajz xtidxä, colchalilajz ni ruluüi reyälmilagwr nani runä, te gacbeetu par tejpas, Xtaäd yunäj narä, narä yunääza laani.

³⁹ Che rlaajreni niniaazrenini stehuält, laani biriini ladzñaareni.

⁴⁰ Dxejcti sääni, gubisacni nez stelaad gueu Jordán, nejzga huijia'nni, cadre gusloj batiobnis Juan. ⁴¹ Xhidajl bejn bidzujn lojni ro'c, räjpreni:

—Di Juan niujn nicla tej yälmilagwr luxh guiraa rediidx ni gunii Juan xcuent dade're najc didxliipac.

⁴² Xhidalduxhreni huililajz xtiidxni ro'c.

11*Gujt Larz*

¹ Yu' te dade' ni cayacxhuu ni laa Larz. Rbäjzni guedx Betania, lajdxza rebisiajnni Marii näjza Mart. ² Mariire, bisiajn Larz, najc nane' ni basäl setnejxh ni' Jesús, batiaazani ni'ni con xquidxejcn. ³ Ni'cni baxhal guiro'p bäjlre diidx loj Jesús, räjpreni lojni:

—Dad, xamiigwlu nani sanälajzlu cayacxhuu.

⁴ Che biejn diajg Jesús rediidxga, räjpni:

—Di yälracxhuure ju'tni, sa'csi yälracxhuure najc te guluilojni xcälrnibee Dios. Te guluilojza yälracxhuure xcälrnibee Xi'n Dios.

⁵ Sanälajz Jesús Mart, bäjlni, näjza Larz, ⁶ che räjpreni lojni cayacxhuu Larz, bia'nni stio'p dxej cadre yu'ni. ⁷ Dxejcti räjpni loj rexpejn pacni:

—Colcho', chonnu stehuält región Judea.

⁸ Räj p rexpejn ni lojni:

—Mastr, gajd gac xchej r lajz rexpejn Israel ni rnibee nucuaa guij vejclu te nugu'treni luj, luxh naj r lajzlu chäsac lu ro'c.

⁹ Dxejcti räj Jesús lojreni:

—¿La xhet tzubitio'p ordi yu' lo tebdxej, ä? Palga sa bejn rdxee, dini jiajb sa'csi ruhuini lo bianij nani yu' lo guedxliujre. ¹⁰ Palga chasajni guxhijn, siliaro'ni, sa'csi xheti bianija.

¹¹ Dxejcti räj Jesús lojreni:

—Nagayejs xamigwä Larz. Cha'a te chacuänäni.

¹² Dxejcti räj rexpejn pacni lojni:

—Dad, palga agudiesni, pet siajcti.

¹³ Jesús canii lojreni agujt Larz, niluxh rexpejn pacni bejn xhigab caniini xcuent yälrejs xten bacaltis.

¹⁴ Ni'cni guniliipac Jesús räj pni lojreni:

—Agujt Larz. ¹⁵ Rbalazä sa'csi rutinu ro'c, te chalilajztu xtidxä. Colcho' te chohuiinuni.

¹⁶ Dxejcti Tomás ni rniizareni “cua'ch”, räj pni loj resa'ni:

—Colcho' te guetnäzanuni.

Jesús najc yäl r bäsac lo yäl gujt

¹⁷ Che bidzujn Jesús lo guejdxga, agujct tajp dxej biga'tz Larz. ¹⁸ Guedx Beta-nia tre' gajxh lo guedx Jerusalén, si'cti tio'p garol kilómetro. ¹⁹ Xhidajl rexpejn Israel abidzujn, siädhuireni Mart, näjza Marii, te di gac-huin lajzreni sa'csi gujt bisiajnreni. ²⁰ Che gucbee Mart abidzujn Jesús, biriini huichaglojnini; niluxh Marii bia'n rolijzreni. ²¹ Dxejcti räj p Mart lo Jesús:

—Dad, paru suga'lu ree, di bisianä niejt. ²² Narä nanä suniidx Dios guiraa nani guiniablu lojni.

²³ Jesús räj pni lojni:

—Sibäsac bisiajnlu.

²⁴ Räj p Mart lojni:

—Acananä sibäsacni che guidzujn dxej ni guibäsac bejn loj rebengut dxej lult che gun Dios yäl guxhtis.

²⁵ Dxejcti räj Jesús lojni:

—Narä nacä yäl rusapäsac bejn loj rebengut, näjza yäl nabajn par tejpas. Nani rililajz rextidxä, masä agujcti, sibäsacni. ²⁶ Chutis tej bejn ni nabajn ni chalilajz xtidxä, dini nitloj par tejpas, ¿riliiga lajzlu ni, ä?

²⁷ Dxejcti räj p Mart lojni:

—Rililazäni, Dad. Ahuililazä luj najclu Crist, Xi'n Dios nani bia'n diidx guxhal Dios lo guedxliujre.

Biin Jesús cuä' xpaä Larz

²⁸ Che guluux gunii Mart, huitejdxni bäljni Marii, xhiga'tz räj pni lojni:

—Abidzujn Mastr. Cabejdxzani luj.

²⁹ Che biejn diajg Marii rediidxga, huisugajcti, sahuini Jesús. ³⁰ Gajd Jesús jiu' guejdxga, lajtis suga'ni cadro bidxaagni Mart. ³¹ Rexpejn Israel nani biäd cuenäj Marii, ni cahuii didi gac-huin lajzni, che bahuireni hisui Marii, sääni, näjza laareni huirinajlreni Marii, naareni pet lo baa sayoonni.

³² Ni'cni che bidzujn Marii cadro suga' Jesús, bazuxhijbni lojni, räj pni:

—Dad, paru suga'lu ree, di bisianä niejt.

³³ Che bahuii Jesús cayoon Marii, nájza rexpejn Israel ni siädnajl Marii, guchuin lastooni, biääd te rsliajz lastooni. ³⁴ Dxejcti räjpni lojreni:

—¿Caro bacua'tztuni?

Räjpreni lojni:

—Dad, gudaä ree te fiilu.

³⁵ Dxejcti biin Jesús. ³⁶ Ni'cni cayäjp rexpejn Israel:

—Colhuii, lacti sanälajznini.

³⁷ Yu'zareni räjp:

—Dade're basiajc beñ lotiä'p. ¿Xha di niajcdi nusiajcní bejnre te di niejtñi, ä?

Gubansac Larz

³⁸ Guc-huinduxh lastoo Jesús, gubigni lo baa. Baaga najc si'c te biliää, suga' te guiro ni rusäuureni ro'ni. ³⁹ Dxejcti räjp Jesús lojreni:

—Colgudzucaj guijga.

Mart, ni najc bisiajn beñgutga, räjpni lojni:

—Dad, pet acaladxuudxni, sa'csi agujc tajp dxej gujtñi.

⁴⁰ Dxejc räjp Jesús lojni:

—¿Et rniä lojlu, palga rililajztu, suhuuilu xcäl'rníbee Dios, ä?

⁴¹ Dxejcti badzucajreni guijga. Guläs Jesús lojni xhaguibaa, räjpni loj Xtadni:

—Xtadä, runidxä xquixtios lojlu sa'csi abiejn diajglu xtidxä. ⁴² Narä nanä guliica rucuadaijglu xtidxä, luxh naj caniäni xcuent rebejn ni tre' ree, te chalilajzreni luj baxhällu narä.

⁴³ Che gulujuj guniini rediidxga, guredxa'ni räjpni:

—¡Larz! ¡Gudaä ree!

⁴⁴ Dxejc birii beñgutga neñ biliää. Naliib reñaani, reni'ni, niäuu te baii lojni. Dxejcti räjp Jesús lojreni:

—Colgusläani, colgusaan jiini.

Bachaagreni diidx xho guiniaazreni Jesús

(Mt. 26:1-5; Mr. 14:1-2; Lc. 22:1-2)

⁴⁵ Xcuent dzunrore huililajz rextidx Jesús xhidajl rexpejn Israel nani huinajl Marii, che bahuiireni xhi bejn Jesús. ⁴⁶ Yu' reni huihuii loj rexpejn Israel ni laa farisee, bijreni diidx xhi bejn Jesús. ⁴⁷ Dxejcti refariseega, nájza rebixhojz ni rníbee, bire'reni bidxagsa'reni lo Junt Suprem, räjpzareni:

—¿Xho jiennu? Niguire cayujn xhidajl milagwr. ⁴⁸ Palga guisaannuni si'c, guiralii bejn sililajz xtiidxni, sinajlrenini. Dxejcti jiääd reben roman ni rníbee, gudzucajreni xcäl'rníbeenu, sudzujlzareni lajdxnu.

⁴⁹ Dxejc Caifás, bixhojzro ni riäjil gunibeeni lo rebixhojz ijzga, räjpni lojreni:

—La'tu xhetliidi najnditu. ⁵⁰ Ditu gun xhigab laaca guet tejtis bejn xcuent guideb guejdx, didi nitloj guideb lajdxnu.

⁵¹ Niluxh Caifás dini ninii diidxre xcuentcani. Sa'csi ijzga rníbeeni lo rebixhojz, lagajc Dios badeed diidxga guniini. Ni'c gunixgaani guet Jesús xcuent naciön xten rexpejn Israel. ⁵² Luxh xhet ganaxtis xcuent naciön ga, nájza te guire' guiraa rexpejn Dios nani nare'ch loj guideb guedxliujre.

⁵³ Ni'cni dxejlíga bachaag rebejn ga diidx te don xho gunreni gugu'treni Jesús.

⁵⁴ Ni'cni diru Jesús nisiaj nez loj rexpejn Israel. Biriini región Judea, huijni te lajt gajxh nez lo reyubijdz, lo te guejdx ni laa Efraín. Ro'c biannäjni rexpejn pacni.

⁵⁵ Guxii dxej cayäädx guidzujñ lanij ni laa pascw ni rujn rexpejn Israel. Xhidalduxh rebeñguejdx huij guedx Jerusalén te gusiareni lastooreni, te gac gunreni lanij xten pascw. ⁵⁶ Cansajreni caguuilreni Jesús; che yu'zareni nen guidoro, canabdiidx lo sa'reni, räjpreni:

—¿Xhi najtu? ¿La siäädni lanijre o laa dini jiääd, ä?

⁵⁷ Refarisee näjza rebixhojz ni rnibee loj rebixhojz, agunibeereni palga yu' chu najn caro yu' Jesús, chaye'tzni lojreni te guiniaazrenini.

12

Gudäáb te gunaa se't ni' Jesús

(Mt. 26:6-13; Mr. 14:3-9)

¹ Che riäädx xho'p dxej gal lanij pascw, huij Jesús guedx Betania cadro rbäjz Larz nani baspañsac Jesús loj rebeñgut. ² Ro'c bejnreni te xchej te gau Jesús. Mart bateed xchejga, näjza Larz sobganäj Jesús näjza rexpejn pacni lo mex. ³ Dxejcti bidzujñäj Marii si'cti garol litr se't ni rlianexhduxh si'c nard. Sacduxh se'tga. Dxejcti gudäábni se'tga lo reni' Jesús, baspijdzni ni'ni con xquidxejçni. Guideb neñ yu'ga gulanejxh se'tga. ⁴ Dxejcti räjp Judas Iscariot, xi'n Simón, ni najc te rexpejn pac Jesús, lagajc ni abejñ xhigab guto'ni Jesús, räjpni:

⁵ —¿Xhicuent di se'tre nido' choñ gayuu denar te nidis meelga loj rebeñproob? (Choñ gayuuga najc si'cti ni xca' te niguui paru gunni dzuun tzubiteb bäii.)

⁶ Gunini si'c, xhet sa'csi riadini reproob, per sa'csi laani najçni te gubaan, luxh laani ca'ni bols cadro rucbee meel, luxh rbääni meel lojga te rca'nini. ⁷ Ni'cni räjp Jesús lojni:

—Na'c gudxojn luni; subasälxgaanini, che gajd guidzujñ dxej nani guiga'tzá.

⁸ Dxej-yääl yu' rebeñproob lojtu, luxh narä dina chuä lojtu xchej.

Laareni rlajzreni nugu'tzareni Larz

⁹ Dxejç che guçbee xhidajl xpejn Israel yu' Jesús rolizj Larz ni gubañsac lo rebeñgut, bidzujñreni, xhet xcuentis Jesús. Biäädreni te fiizareni loj Larz nani baspañsacni lo rebeñgut. ¹⁰ Dxejcti rebixhojz ni rnibee bachaagzareni diidx te ju'tzareni Larz, ¹¹ sa'csi xhidajl rexpejn Israel salilajzreni xtidx Jesús sa'csi bahuiireni gubañsac Larz.

Biu' Jesús guedx Jerusalén

(Mt. 21:1-11; Mr. 11:1-11; Lc. 19:28-40)

¹² Che bara yääl, rebejn xhidajl ni bidzujñ lanij biejn diajgreni asiäddzujñ Jesús guedx Jerusalén, ¹³ dxejcti batiu'reni naa reyagzijñ, biriireni neñ guejdx, sachaglojrenini. Guredxa'reni, räjpreni lo Jesús:

—¡Colguiliä'p xpala'n Dios! ¡Chicbaa nani siääd xcuent Dad nani najc reii lo rexpejn Israel!

¹⁴ Bidxäl Jesús te burbäz, gubijbnini, si'cni caj lo reguijtz:

¹⁵ Na'c guidxejbtu, bejn ni rbäjz neñ guedx Sión.

¡Colhuii! Reii xtentu asiääd, bijbni dejtz te burbäz.

¹⁶ Di rexpejn pacni niachee recosga che gujçreni, niluxh che gubañsacni loj rebeñgut, dxejç banaj lajzreni recos nani caj lo guijtz xcuentni, näjza guiraa recos ni bejn rebejn lo Jesús te guzojb rediidxga.

¹⁷ Rebeñ xhidajl ni suganäjni che gurejdxni Larz te biriini neñ baa che baspañsacni lo rebeñgut, bijzareni diidx xcuent guiraa ni bahuiireni. ¹⁸ Ni'cni

biädchagloj reben xhidajlgani, sa'csi abiejn diajgreni laani bejnmi milagwrre.

¹⁹ Ni'cni räjp referisee lo sa'reni:

—Aruhüitu xhet sajcdi jienmu. ¡Colhuii! Empac sana]l guideb guedxliujni.

Riädtiil regriegw Jesús

²⁰ Yu' gaii bengriegw nadxaag lo rebejn ni biädted lanij guedx Jerusalén.

²¹ Rebejnre bidzujn loj Felipe nani siäd guedx Betsaida xten Galilee, gusloj gunabreni lojni, räjpreni:

—Dad, rlaaznu guihuiinu lo Jesús.

²² Biäd Felipe, räjpni loj Andrés, dxejcti guiro'preni huiye'tzreni lo Jesús.

²³ Dxejcti räjp Jesús lojreni:

—Abidzujn or ni chä'p xpala'n Xi'n Dios ni gujc Niguii. ²⁴ Rniliäpac lojtu, palga di te xob binij jiajb lo yuj, nen xhunc cadro cueni, te rianxtebni, guetni, dini guiliejn. Luxh palga guetni, siliejnni, rajca te nisro lojni, rajc xhidajl xob binij. ²⁵ Nani sanälajc xcäl'nabajnmi, sunijtnini, luxh nani rbälaz xcäl'nabajnmi lo guedxliujre, sica'ni yäl'nabajn par tejpas. ²⁶ Palga yu' chu tej ni rrajz chu loä, sujiädnajlmi xnezyuä, te cadro yu'ä, ro'cza cuäaz ni ru' loä. Palga yu' chu gun xtzunä, siliä'pza Xtaä xpala'nmi.

Rnixgaa Jesús guetni

²⁷ Räjzpzeni:

—Naj cayac-huin lastoä. ¿Xhichani'cza gäp lo Xtaä? ¿La siniä: Dad, gucnäj narä te di tedä or ni siäd? Ni te tedäpac orga biälä lo guedxliujre. ²⁸ Xtaä, bejn si'cni riäjl gac te guiliä'p bejn xpala'nlu.

Dxejcti xhaguibaali biejn te xse' te ni räjp:

—Agulä'pä xpala'nä, siliä'pä xpala'nä stehuält.

²⁹ Ni'cni lo rebejn ni tre' ro'c, ni biejn diajgreni se'ga, yu' reni räjp:

—Lascanu gunii te guzii.

Guyu'zarenä räjp:

—Te xangl Dios ni gunii lojni.

³⁰ Dxejc räjp Jesús lojreni:

—Et xcuentädi gunii xse' ni gunii, xcuenttis la'tu guniini. ³¹ Naj abiädä xcäl'guxhtis Dios lo guedxliuj. Naj sibicaj xcäl'rnibee nani rnibee lo guedxliujre.

³² Naj, che guiliäsreni narä jiaa lo guedxliuj, te galä ro'c, sutie'ä guiraa bejn loä.

³³ Rediidxre gunii Jesús te canixgaani xho guetni. ³⁴ Räjp rebejn lojni:

—Nuure biejn diajgnu bilreni lo leii, Crist ni jiäd sibajn par tejpas. ¿Xho mood rniilu, nanab chäs Xi'n Dios ni gujc Niguii jiaa lo guedxliuj? ¿Chuxhni'c najc Xi'n Dios ni gujc Niguii ni ruzä'tlu?

³⁵ Dxejcti räjp Jesús lojreni:

—Sera'tsi yu' bianij lojtu. Col'saj la] ni rajptu bianijga, te di guiniaaz yäl'xcäy la'tu, sa'csi ni rsiaj loj nacäy, dini gan caro chäani. ³⁶ La] ni rajptu bianij, col'chalilaj bianijga te gactu rexi'n bianij.

Gunii Jesús rediidxga lojreni, dxejcti biunejzni ro'c, bicuatzlojni.

Xhicuent di rexpejn Israel nililaj xtidx Jesús

³⁷ Xhidajl remilagwr bejn Jesús nez loj rexpejn Israel, niluxh direni nililaj xtiidxni, gulälazreni nani baxha] Dios lojreni. ³⁸ Ni'cni guzobj diidx nani gunii Isafas, ni gunii xtidx Dios galoro, räjpni:

Dad, ¿chuni'c huililaj xtiidxlu?

¿Chuloj baluulu xcäl'rnibeduxhlu, ä?

³⁹ Ni'cni di najcdi nililajzreni, sa'csi guniiza Isaías, räjpmi:

⁴⁰ Abascäjyni lojreni,
abennajdmi lastooreni,
te di rebalojreni fii,
te di lastooreni gachee,
te di gusiejch lajzreni,
te di gusiacäreni.

⁴¹ Rediidxre gunii Isaías, sa'csi bahuiini xcälrdimbicha' Jesús xhaguibaa, dxejc guniini xcuentni.

⁴² Dxejcti gaii rebejn ni rnibee huililajz xtiidxni che räjpmi abaxhał Diosni, niluxh bidxejbrei reben farisee, ni'c direni nicäjpm ahuililajzreni, te di gurilaagwreni laareni, gudxojnreni jiu'reni neņ guidoo. ⁴³ Sa'csi rdxaglajrurenii guiliä'p rebejn xpala'nreni luxh guxiiru rlajzreni guiliä'p Dios xpala'nreni.

Xtidx Jesús sigubee rebejn

⁴⁴ Dxejcti gudidxa' Jesús:

—Nani chalilajz xtidxä, et ganaxdi ni caniä rililajzmi, näjza xtidx Xtađä nani baxhał narä rililajzmi. ⁴⁵ Nani ruhuii loä, ruhuiizani loj ni baxhał narä. ⁴⁶ Narä biälä si'c bajl lo guedxliujre, te guiraa renani chalilajz xtidxä, dirurenii chu lo yälcäjy. ⁴⁷ Nani riendiajg xtidxä, luxh dini gusoob rediidxga, dina gunä yälguxhtis lojmi, sa'csi dina niälä te gunä yälguxhtis rebenguedxliuj, biälä te guslaä reben guedxliuj lo dojl. ⁴⁸ Nani rbälaz narä, ni di gusoob xtidxä, yu' chu gun yälguxhtis xtojłmi; lagajc rediidx nani guniä gun yälguxhtis xtojłreni che gał lult dxej. ⁴⁹ Sa'csi narä dina niädniä lagajc xcuentä, lagajc Dad ni baxhał narä, lagajc laani gunibeeni xhini'c guiniä, xhini'c guluiä. ⁵⁰ Luxh nancheä gunibeeni chu yäl'nabajn par tejpas. Ni'cni rediidx nani rniä, rniäreni si'cpacni gunii Xtađäni loä.

13

Jesús gudiibni ni' rexpejnpacni

¹ Che gajd gał dxe lanij ni laa pascw, najn Jesús asiäddzngajxh xorni, or ni junejzmi lo guedxliujre te chääni lo Xtađni. Luxh sa'csi agajc sanälajzmi rexpejnpacni nani yu' lo guedxliujre, sinälajznanireni par tejpas.

² Ni'cni lał ni cayauxchejreni biu' beņdxab neņ lastoo Judas Iscariote, xi'n Simón, te guto'ni Jesús. ³ Sa'csi agucbee Jesús abateed Xtađni guira'ti ladznaani, gucbeezani loj Dios biriini, lo Dios guibi'zani, ⁴ ni'c huisu Jesús lo xchejga, gulääni xhablojiaani, gudojpmi te tuäi, batejbnini xque'ni. ⁵ Dxejcti cea'ni nis neņ te chaa, guslojmi gudiibni ni' rexpejnpacni, baspijzmi ni'reni con tuäiiga. ⁶ Che bidzujpmi loj Simón Pedr, räjpmi Pedr lojmi:

—Dad, ¿xhixh luj siguiiblu ni'ä?

⁷ Dxejc räjpmi Jesús lojmi:

—Nani cayunä dilu gacheeni naj, guixee-huijdx sacheeluni.

⁸ Räjpmi Pedr lojmi:

—¿Dipaclu quibi ni'ä!

Räjpmi Jesús lojmi:

—Palga dina quibä ni'lu, digacdiru gaclu xpeñä.

⁹ Räjpmi Pedr lojmi:

—Dad, na'c quibi ni'ätis näjza ñää näjza yecä gudiib.

¹⁰ Räjpmi Jesús lojmi:

—Nani agojz di guiquiin gagsacni; ni'tisni guidiib, sa'csi naya guidebni; nayazatu, per xhet guiraaditu naya.

¹¹ Sa'csi anajnni chu guto'ni, ni'cni guniini: “Xhet guiraaditu naya.”

¹² Ni'cni che gulujx gudiibni ni' rexpejnni, gotsacni xhajbni, guresacni lo mex, räjpni:

—¿La najntu xhini'c benä lojtu, ä? ¹³ La'tu rniitu narä, Mastr näjza Dad. Luxh laaca rniitu sa'csi nacäni. ¹⁴ Mbaj, palga narä ni nacä Dad, nacäza Mastr, gudibä ni'tu, la'tu sigajcza riäjł quibtu ni' resa'tu. ¹⁵ Sa'csi abaluiä lojtu xho gacni, te chanuu guntu sigajc ni' benä lojtu. ¹⁶ Rniliä, rniliäpac lojtu, di te mos gac beñroru lo xlamni; diza te ni rij xmandaad bejn gac beñroru loj nani baxhalni. ¹⁷ Palga najntu recosre, chichaazatu palga si'c guntu.

¹⁸ “Dina guiniä diidxre lo guiraatu. Numbeä reni aguleä, niluxh nanab soob xtidx Dios ni caj lo rexquijtzi. Scree najc rediidxga: “Nani rajw xcuxtilä, ni'c agubiréni, agulälazni narä.” ¹⁹ Ni'cni agunixgaäni, che gajdni gac, te che gacni chalilajztu nacä chu rniä nacä. ²⁰ Rniliä, rniliäpac lojtu, nani riu xtidx nani ruxhalä, riuazani xtidxä; luxh nani riu xtidxä, riuazani xtidx nani baxhalä narä.

Räjp Jesús chuni'c guto'ni

(Mt. 26:20-25; Mr. 14:17-21; Lc. 22:21-23)

²¹ Che gulujx gunii Jesús rediidxre, guc-huinuxh lastooni, dxejc guniliini: —Rniliä, rniliäpac lojtu, tejtü suto' narä.

²² Dxejc gusloj cadxeloj rexpejnni lo sa'reni, di jien chuchani'c cagusä'tni.

²³ Tej rexpejnni nani sanälajzruni sobga' cuä'ni. ²⁴ Dxejcti bejn Simón Pedr seen lojni te guiniäbdiidxni loj Jesús chu xcuent caniini. ²⁵ Dxejc nani sobga' cuä'ni, gubigruni loj Jesús, gunabdiidxni lojni, räjpni:

—Dad, ¿chuni'c rusä'tlu?

²⁶ Dxejcti räjp Jesús lojni:

—Guhuadxä te la' yätxtiil. Loj nani gudedäni, ni'c najcni.

Dxejcti bahuaidxni tla' yätxtiil, badeednini loj Judas Iscariote, xi'n Simón.

²⁷ Che gulujx gudajw Judas yätxtiilga, biu' beñdxab lastooni. Dxejcti räjp Jesús lojni:

—Ni rlaizlu gunlu, bejngani.

²⁸ Nicla tej reni sobga' lo mex direni niacbee xhicuent räjpni lojni si'c.

²⁹ Sa'csi Judas ca' bols meel, gaiireni bejn xhigab pet guniini si'c sa'csi yu' xhi chasiini par lanij, o pet yu' xhi gudeedni loj reben ni xhet rajpdi. ³⁰ Che gudajw Judas yätxtiilga, birigajcni, luxh abiu' guxhijñ.

Didxcoob ni gunibee Jesús

³¹ Dxejcti che abirii Judas lojreni, räjp Jesús lojreni:

—Naj sienloj xcälrnibee Xi'n Dios ni gujc Niguui, luxh lojni sienloj xcälrnibee Dios. ³² Palga suluuloj Xi'n Dios ni gujc Niguui xcälrnibee Dios, dxejc suluulojza Dios xcälrnibee Xi'n Dios ni gujc Niguui, luxh siojb gunnini. ³³ Rexi'nä nani sanälazä, diru gac xchej chunää la'tu. La'tu siguiiltu narä, per si'cni räpä lo rexpejn Israel si'cza rniä lojtu naj: Di gacdi jäädü cadro cha'a. ³⁴ Te didxcoob rniä guntu: Colchanälajz sa'tu. Sigajc ni sanälazä la'tu, sigajcza colchanälajz sa'tu. ³⁵ Palga rinälajz sa'tu, si'c sacbee guiraa beñguedxliuj najcpectu rexpñä.

Xhini'c gun Pedr loj Jesús

(Mt. 26:31-35; Mr. 14:27-31; Lc. 22:31-34)

³⁶ Dxejcti räjp Simón Pedr loj Jesús:

—Dad, ¿caro chäälu?

Räjp Jesús lojni:

—Cadro cha'ä digacdi jiadnajllu narä naj; niluxh sidzujn dxej jiaädlu ro'c.

³⁷ Räjp Pedr lojni:

—Dad, ¿xhicuent digacdi jialä naj? Palga rquiin guetä xcuentlu, suguetä.

³⁸ Räjp Jesús lojni:

—¿La guliilu guetlu xcuentä, ä? Rniliäpac lojlu, nicla gajd guidgäi cuedxa' chon huält, säjblu dilu gumbee najrä.

14

Jesús najc nezyuj lo Dad

¹ Dxejcti räjp Jesucrist lojreni:

—Na'c chutu yärsia'. Rililajztu xtidx Dios, colchalilajzza xtidxä. ² Yu' xhidalduxh yu' cadro rbäjz Xtääd. Palga xhet si'cdi najcni, dizana niniä lojtu si'c. Sia'ä chasucheä rey'u' par la'tu. ³ Luxh palga chasucheä cadro cuääztu, che guluxäni, sibusacä, te chanäätu ro'c, te cadro yu'ä, ro'cza chutu. ⁴ La'tu anajntu caro cha'ä, anajnzatu nezyuj ni chäätu.

⁵ Dxejcti räjp Tomás loj Jesús:

—Dad, dinu guidon caro chäälu, ¿xho guidonnu nezyujga, ä?

⁶ Räjp Jesús lojni:

—Narä nacä nezyuj. Narä nacä didxliipac, nacäza yäl'nabajn. Por narätis sajchää bejn cadro rbäjz Xtääd. ⁷ Palga la'tu niembeetu chuni'c nacä, niembeezatu Xtääd. Luxh najli abiembeepactuni sa'csi acahuiitu lojni.

⁸ Räjp Felipe loj Jesús:

—Dad, basaan guihuiinu loj Xtädlu; ni'ctis rlaaznu.

⁹ Dxejcti räjp Jesús lojni:

—Felipe, ¿la gajdlu gumbee narä, luxh lacti xchej yu'ä lojtu, ä? Nani ruhuii loä, abahuiini lo Xtääd. ¿Xhicuent rniablu fiilu lo Xtääd, ä? ¹⁰ ¿La dilu chalilajz najrä yunää Xtääd, luxh Xtääd yunäjzani narä, ä? Rediidx nani rniä dina guiniäni lagajc xcuentä, sa'csi Xtääd ni yunäj narä laani rujn lagajc rextzuunni. ¹¹ Colchalilajz xtidxä, che rniä narä yunää Xtääd, luxh Xtääd yunäj narä. O palga ditu chalilajzni sa'csi najcni xtidxä, colchalilajzni sa'csi abahuiitu rextzuun ni runä. ¹² Rniliäpac lojtu, nani chalilajz xtidxä, sajgunni redzuun nani runä, luxh sujnni dzunroru sa'csi sia'a cadro yu' Xtääd. ¹³ Luxh guiraa ni guiniablu lo Xtääd xcuentä, narä sunäni, te guluiloä xcalrniabee Xtääd. ¹⁴ Narä sunä xhitis ni guiniabtu por laä.

Ria'n diidx guxhal Jesús Sprit Dxan

¹⁵ Räjzani:

—Palga sanälajztu narä, susoobtu xtidxä. ¹⁶ Dxejc siniabä lo Xtääd, te guniidxni stee nani gacnäjtu te chunäjni la'tu par tejpas. ¹⁷ Nalajznu, Xpriet Dxan xten Dios, ni rnili. Di gacdi xca' reben guedxliujni, sa'csi direni fii lojni, niclaza gumbeerenini. Niluxh la'tu numbeetuni sa'csi yunäjni la'tu, yu'ni nen lastootu. ¹⁸ Dina gusanbisiäbä la'tu; sibusacä jiaädhuiä la'tu. ¹⁹ Diru gac xchej, dxejc diru reben guedxliuj fii loä, niluxh la'tu suhuiitu loä. Sa'csi nabanä, la'tu nabajnzatu. ²⁰ Nen redxejga, dxejc sacbeetu yunää Xtääd, la'tu yunäjtu narä, luxh narä yunääza la'tu. ²¹ Nani numbee Xtääd, nani rusoobza xtidxä, ni'c ruluiini sanälajzpacni narä. Luxh Xtääd sinälajzza nani sanälajz narä, najza narä chanälazä bejnnga, luxh sululoä lagajc narä lojreni.

²² Dxejcti räjp Judas (xhet Iscariótedi) lojni:

—Dad, ¿xhini'c gunlu te guluilojlu lojtisnu, xhet näjdi loj reben guedxluujdi, ä?

²³ Dxejcti räjp Jesús lojni:

—Nani sanälajz narä, ni'c riu xtidxä. Ni'c chanälajz Xtradä, dxejc jio-pläznäänuni guiro'pnu Xtradä. ²⁴ Nani di chanälajz narä, dini jiu xtidxä. Luxh rediidx nani biejn diajgtu, et xtidxädini; xtidx Xtradäni ni baxhaļ narä.

²⁵ 'Caniä guiraa rediidxre lojtu laļni yu'ä lojtu, ²⁶ per Sprit Dxañ xten Dios nani jädyaçnäjtu, nani guxhaļ Xtradä xcuentä, laani suluiini lojtu guira'ti, näjza susnajni lajztu guiraa rediidx nani aguniä lojtu. ²⁷ Yälrbecdxilajz rusa'nä lojtu, xcälrbecdxilazä runidxä lojtu, et si'cdini runiidx guedxluujdi najc nani runidxä lojtu. Na'c chutu yärsia', na'cza guidxejbtu. ²⁸ Abiejn diajgtu ni guniä lojtu: Sia'ä luxh siälsacä lojtu. Paru ninälajzpacktu narä, sibalajztu xcuentä che guniä sia'ä lo Xtradä, sa'csi Xtradä najc beñroru loä. ²⁹ Scree agunixgaäni lojtu, te che soobni, dxejcru chalilajztu xtidxä.

³⁰ 'Diruna guiniduxhä lojtu, sa'csi asiääd nani rnibee loj guedxliujre, luxh digacdi guinibeeni narä; ³¹ riäjl gac recosre te gacbee reben guedxliuj sanälazä Xtradä, rusobäza xtidx Xtradä, runä nani gunibeeni. Coļchastie, coļcho' jiunejznu ree.

15

Jesús najc si'c te yaguub

¹ Rāpzani:

—Narä nacä si'c te yaguub. Xtradä najc si'c nani rusuj yajgga. ² Rebejn najc si'c reñaa yajgga. Guiraa reñaa yajgga nani xhet cajdi lojni rutiugni. Luxh guiraa reñaa yajgga ni caj ninejxh lojni, rusianini te xcajru ninejxh lojreni.

³ La'tu anajctu beñnaya xcuent rediidx nani aguniä lojtu. ⁴ Coļguibaññaj narä, sigajc ni nabannää la'tu. Digacdi xcaj ninejxh lo te ñaa yajg palga agurujgni lo yaguub. Sigajcza la'tu, palga guibicajtu loä, di gacdi guntu xtzunä.

⁵ 'Narä nacä si'c yaguub. La'tu najctu si'c reñaa yajgga. Nani riannäj narä, naräza riannääni, ni'c sajc runduxhni xtzunä, sa'csi che guibicajni loä, xhet sajcdi gunni. ⁶ Nani di chupac loä, sibicajni si'c reñaa yajg nani rdin sa'csi xhetru rcajdi lojni, dxejcti rbijdzni, rusäl bejñreni lo däj te checni.

⁷ 'Palga chupactu loä, palgaza chupac xtidxä lastootu, coļnab nani rla-jztistu, luxh narä sunidxäpacni. ⁸ Che gunpacktu xtzun Dios, dxejc fii bejn najcpacktu xpenä, siliä'p bejn xpala'n Xtradä, Dios. ⁹ Si'cpacni sanälajz Xtradä narä, sigajcza sanälazä la'tu. Coļchanuu lo xcälrinälazä. ¹⁰ Palga jiutu rextidxä, sinuutu lo xcälrinälazä, sigajc ni abasobä xtidx Xtradä, luxh rinuä lo xcälrinälajz Xtradä.

¹¹ 'Rniä rediidxre lojtu te guibalaznäjtu narä, te si'c guibalazduxhpactu.

¹² Dee najc diidx ni rnibeä guntu: coļchanälajz sa'tu si'cni sanälazätu. ¹³ Xheti te yäl-sanälajz ni guroobru lo yäl-sanälajzre, gudeed te bejn xcäl'nabajñni, guetni lacuaa resa'ni. ¹⁴ La'tu najctu resa'ä palga gusoobtu diidx nani guinibeä guntu. ¹⁵ Diruna cuäläa "mos" la'tu, sa'csi di remos gan xhi rujn xlamreni. Luxh narä aguläläa la'tu "rexamigwä", sa'csi guira'ti rediidx ni biejn diağä lo Xtradä aguniäza rediidxga lojtu. ¹⁶ Et la'ditu gule narä, narä guleä la'tu. Guleä la'tu te guntu xtzun Xtradä, te na'cza nitloj dzuunga. Te guira'tiza nani guiniabtu lo Xtradä por laä, ni'cza guniidxni lojtu. ¹⁷ Dee rnibeä guntu: coļchanälajz sa'tu.

Rbälaz rebejn guedxliuj Jesús näjza rexejñni

¹⁸'Palga cuälaz reben guedxliuj la'tu, anajntu agulälazxgaareni narä. ¹⁹Paru najctu ben guedxliujre, sinälajzreni la'tu. Per ditu gac ben guedxliuj, sa'csi narä guleä la'tu te jiutu xtidx Xtaäd, ni'cni rbälaz reben guedxliuj la'tu. ²⁰Colsnaj lajztu diidx nani guniä lojtu, 'di te mos gac benroru lo xlamni'. Palga basacsireni narä, susacsizareni la'tu. Palga rusoobreni xtidxä, susoobzareni xtidxtu. ²¹Guiraa recosre sunnäjreni la'tu xcentä sa'csi direni gumbee nani baxhal narä.

²²'Paru dina niädniä lojreni direni niujn dojl xten xcälrdxechlajzreni loä, per naj di gacdi guiniireni direni gacbee yu' xtojlrreni. ²³Nani rbälaz narä, rbälazzani Xtaäd. ²⁴Palga dina niunä nez lojreni remilagwrru, sa' nani rutru rajcdi rujn, direni niajp dojlga; sa'csi abahuiireni redzuunga, ni'c agulälazreni narä, näjza Xtaäd. ²⁵Bejnreni si'c te guzojb diidx nani cuaj lo guijt z agujc xchero: "Gulälazreni narä, luxh xhetlidi benä."

²⁶'Che jiääd nani gacnäj la'tu, laani sini xluentä, chu nacä. Laani najc Sprit ni yu' lo Xtaäd, siniini didxlii. Narä suxhaläni lojtu; lo Xtaäd guiriini jiädni lojtu. ²⁷Näjza la'tu siniitu diidx xluentä, chu nacä, sa'csi guyu'tu loä cheni gusloäli cagusule'ä diidxga.

16

¹'Rediidxre nrixgä lojtu, te didi yu' xhi gun jiajbtu te gunijttu lo xtidxä. ²Sidzujñ dxej sibääreni la'tu dirureni gusaan jiu'tu nen guidoro. Sidzujñ or chutis ju't tejt, suchaloni cayacnäjni Dios. ³Guiraa recosre sujñreni sa'csi direni gumbeepac Xtaäd, niclaza narä. ⁴Agunixgä rediidxre lojtu, te che guidzujñ orga sinaj lajztu xluent rediidx ni guniä lojtu.

Redzuun ni rujn Sprit Dxan xten Dios

'Dina niniä rediidxre lojtu che gusloä cagusule'ä diidx, sa'csi suganä la'tu. ⁵Naj agojl guibi'ä loj nani baxhal narä, luxh nicla tejt di guiniädiidx: "¿Caro chäälü?" ⁶Dxejc sa'csi aguniä recosre lojtu, ni'c cayac-huin lastootu. ⁷Luxh nniläpac lojtu, hueenru par la'tu cha'ä. Palga dina cha'ä, di gacdi jiääd lojtu nani racnäj. Niluxh palga cha'ä, suxhaläni lojtu. ⁸Luxh laani, che jiädni lo guedxliujre, susanijni xcäriejn rebejn te gabeereni xluent dojl, näjza xluent xcäl'nabannaya Dios, näjza xluent yäl'guxhtis xten Dios. ⁹Guluiizani xluent dojl lojreni sa'csi direni chalilajz xtidxä. ¹⁰Guluiini xcäl'nabannaya Dios lojreni sa'csi sibusacä lo Xtaäd, luxh dirutu fii loä. ¹¹Guluiini xluent yäl'guxhtis xten Dios lojreni sa'csi abejn Dios yäl'guxhtis loj ben dxab nani nrabee lo guedxliujre.

¹²'Yu' xhidajlr lo diidx rlazä guiniä lojtu, niluxh digacdi gabeetureni naj. ¹³Che jiääd Sprit xten didxlii xten Dios, laani susanijni xcäriejntu te gabeetu guiraa redidxguli, sa'csi dini guiniä diidx xluentcäni, siniitisni ganax rediidx nani gudeed Dios lojni te guiniini. Siniizani xluent recos nani churu gac. ¹⁴Laani siliä'pni xpala'nä sa'csi sica'ni xhixtenä, suluinini lojtu. ¹⁵Guiraa ni rjap Xtaäd najc xtenä, ni'cni rniä suluini xhixtenä lojtu.

Xcäl'rac-huin lajztu sibixloj ni yäl'rbalajz

¹⁶'Sbale'si dxej, dxejc dirutu fii loä; dxejctiru sgaii dxej suhuisactu loä sa'csi narä sia'a lo Xtaäd.

¹⁷Dxejcti räjp rexejñpacni lo sa'reni:

—¿Xhini'c caniini loonu? Sbale'si dxej, dxejc dirutu fii loä, dxejctiru sgaii dxej suhuisactu loä, näjza: sa'csi sia'a lo Xtaäd. ¹⁸Ni'cni cayäjpreni lo sa'reni: ¿Xhi dee rniini, "sbale'si dxej"? Dinu gacbee xhini'c caniini.

¹⁹ Gucebe Jesús xhini'c rlaizreni guiniabdiidxreni lojni, dxejcti räjpni lojreni:

—Canabdiidx lo sa'tu xhi säloj nani guniä che guniä, sbale'si dxej, dxej dirutu fii loä; dxejcru sbale'si dxej, suhuisactu loä. ²⁰ Rniliäpac lojtu, la'tu soontu, niluxh reben guedxliujre sibalazduxhreni. Sac-huinduxh lastootu niluxh yälrac-huinre sibixhlojni yälrbalajz. ²¹ Te gunaa che gaal xi'nni, rdejndi trabajw, dxejcti che aguyu' xi'nni, riäl lajzni gudejndi trabajw, dxejc arbaa lajzni gojl xi'nni te niguii lo guedxliujre. ²² Ni'cni, sigajcza rac-huin lastootu naj, dxejcti che jiädhuisacätu, dxejc sii sibalajztu nen lastootu, luxh rut gacdi gudzucajdi yälrbalajzga.

²³ Nen redxejga xhetiru xhi yälguiniabdiidxd guntu loä. Rniliäpac lojtu, nani guiniabtu lo xtadä xcuentä, laani suniidxnini lojtu. ²⁴ Naj xhet canabditu xcuentä. Colnabni, te xca'tuni, te guibalajztu.

Jesús, nani abejn gaan lo guedxliujre

²⁵ Aguniä guiraloj lojtu con cuent ni ruluii, niluxh sidzujn dxej che diruna guiniä cuent ni ruluii lojtu. Siniä didxguyasi lojtu xcuent Xtradä. ²⁶ Nen redxejga guiniabtu por laä. Luxh dizana guiniä siniabä narä loj Xtradä par la'tu, ²⁷ sa'csi lagajcza Xtradä sanälajzni la'tu, sa'csi la'tu sanälajztu narä, luxh ahuililajzatu loj Dios biriä biälä lo guedxliuj. ²⁸ Biriä lo Xtradä xhaguibaa, biälä lo guedxliujre, siunezäza lo guedxliujre, sibisacä lo Xtradä xhaguibaa.

²⁹ Räjp rexpejn pacni lojni:

—Naj sii caniilu guyasi, dini gac si'c redidx-xhiga'tz xten cuent ni ruluii. ³⁰ Naj sii gucebeenu racheelu guira'ti rexhicos, xhetru nanabdi guiniabdiidxrunu lojlu; ni'cni ahuililajznu biriilu lo Dios ni yu' xhaguibaa.

³¹ Räjp Jesús lojreni:

—¿La rililajzpacktu naj, ä? ³² Asiäddzungajxh teb or luxh ala bidzujn orga, che guire'chtu, cade tejtü xnez-xnejztu, te gusanxtebtu narä, luxh dina jianxtebä sa'csi Xtradä suganäj narä. ³³ Aguniä rediidxre lojtu te cuedxi lastootu lo guedxliujre xcuentä. Lo guedxliujre sidejdpactu trabajw, colgusutijp lastootu sa'csi narä abenä gaan loj guedxliujre.

17

Gunab Jesús lo Dios xcuent rexpejn pacni

¹ Che gulujx guniini loj rexpejn pacni rediidxga, guläsni lojni xhaguibaa, räjpni lo Dios:

—Xtradä, abidzujn or; gulä'p xpala'n xi'nlu te guiliä'pza xi'nlu xpala'nlu, ² sigajc ni badeedlu lojni yälrnibee loj guiraa reben guedxliuj, te gac gudeedni yäl nabajñ par tejpas lo guiraa renani badeedlu lojni. ³ Redee rajp yäl nabajñ par tejpas; numbeereni luj ni najc tejtis GuebDios, näjza narä Jesucrist nani baxhañ lo guedxliujre.

⁴ Narä gulä'pä xpala'nlu lo guedxliujre, abaluxä dzuun nani baniidxlu gunä ree. ⁵ Naj Xtradä, gulä'p xpala'nä con luj, con bala'n, con yälrdimbicha' ni gopä galooli che gajdi guirixtiej guedxliuj.

⁶ Loj rebejn nani baniidxlu loä, ni gulelu lo reben guedxliujre, loj reni'c abasule'ä, abaluiä chu najclu. Xtenpaclu najcreni, baniidxlureni loä, luxh rapdzu'tzreni xtiidxlu. ⁷ Naj agucbeereni guiraa rediidx ni guniä lojreni lojpaclu siäädni. ⁸ Sa'csi rediidx nani baniidxlu loä, aguniä rediidxga lojreni, luxh ahuililajzreni rediidxga, agucbeepacreni lojlu biriä, ahuililajzreni lujpac baxhañ narä.

⁹ Narä rniabä xcuentreni, dina guiniabä xcuent reben guedxliujre, ganaxtis xcuent renani abaniidxlu loä, sa'csi laareni najcreni xpejnlu. ¹⁰ Guiralii ni najc xtenä, najczani xtenlu. Guira'tiza ni najc xtenlu najczani xtenä. Agulä'pzareni xpala'nä.

¹¹ Narä diruna jia'nä lo guedxliujre, laareni sia'nrureni lo guedxliujre. Luxh narä siälä lojlu. Xtaďä ni najc Dxanro, gucnäj renani baniidxlu loä con xtiidxlu, nani baniidxlu loä te gunreni tejsi xhigab sigajcni riennu nurnu tejsi xhigab. ¹² Che guyunääreni lo guedxliujre, gucnää con xtiidxlu guiraa renani baniidxlu loä, luxh nicla tejreni di ninitloj, xtebtis nani gunijt te gusojb ni caj lo xtidx Dios.

¹³ Luxh naj sibusacä lojlu. Caniä rediidxre lał ni yu'ä lo guedxliujre, sa'csi rlazä guibaa lajzreni si'c ni rbaa lazä. ¹⁴ Abasule'ä xtiidxlu lojreni, luxh rebejn guedxliuj rdxe'chreni lojreni sa'csi direni gac bejn guedxliujre sigajc ni dizana gacä bejn guedxliujre. ¹⁵ Dina guiniabä cuäälureni lo guedxliujre, rniabä gudzucajlureni loj bendxab. ¹⁶ Direni gac bejn guedxliuj, sigajc ni dizana gacä narä bejn guedxliuj. ¹⁷ Basyareni con xtiidxlu, sa'csi xtiidxlu najc didxguliipac. ¹⁸ Sigajc ni baxhallu narä lo guedxliujre, sigajcza ruxhaläreni te chääreni guideb guedxliuj. ¹⁹ Xcuentreni rudedä lagajc narä, te näj laareni gacnayareni con xtidxguliipaclu. ²⁰ Dina guiniabä xcuent laatisreni, rniabäza xcuent guiraa renani churu chalilajz xtidxä ni gusule'reni. ²¹ Rlazä gun guiraareni tejsi xhigab, sigajc ni rujnlu, Xtaďä, si'c runäza; te sigajc ni yu'äza con luj, sigajcza chureni con nuurnu, te gacbee reben guedxliuj luj baxhallu narä. ²² Yälrnibee ni baniidxlu loä, lagajc yälrnibeega badedä lojreni te gunreni tejsi xhigab, si'cni riennu tejsi xhigab. ²³ Narä cayunnääreni dzuun, luj cayunnäjlu narä dzuun, te jiennu tejsi dzuun, te gacbee rebejn guedxliuj luj baxhallu narä, luxh sanälajlureni si'cni sanälajzalu narä.

²⁴ Xtaďä, guiraa renani baniidxlu loä, rlazäza chureni cadro chuä xhaguibaa, te fiireni xcälrnibeä nani baniidxlu, sa'csi huinälajzlu narä galooli che gajdlı guirixtiej guedxliujre. ²⁵ Xtaďä ni rujn cossa'ctis, di rebejn guedxliuj gumbeelu, luxh narä numbeälu, luxh redee agucbeezareni luj baxhallu narä. ²⁶ Aräpä lojreni chu najclu; säpazaru lojreni te chu yäl'sanälajz sa' ni rajplu par narä neñ lastooreni, te cuäzäza neñ lastooreni.

18

Xho gunaazreni Jesús

(Mt. 26:47-56; Mr. 14:43-50; Lc. 22:47-53)

¹ Che gulujx gunii Jesús rediidxga, huinäni rexpejnpacni dejtz gueu Cedrón. Ro'c yu' xhiroob yuj cadro sojb guiraloj reyajg. Ro'c biu' Jesús näjza rexpejnpacni. ² Anajn Judas, nani guto' Jesús, caro rij Jesús con rexpejnpacni sa'csi si'csi-si'c rdxaag sa'reni ro'c. ³ Dxejcti Judas, che biääd lojni te cuaa soldad roman, näj rebixhojz ni rnibee, näjza refarisee, huinätinireni ro'c, ca'reni balguejd näjza lintern, näjza spaad näjza lans. ⁴ Ni'cni Jesús, sa'csi ananxgaani xhini'c sacni, gubigni lojreni, räjpni lojreni:

—¿Chu rguüiltu?

⁵ Räjpreni lojni:

—Jesús nani siääd guedx Nazare't.

Räjp Jesús lojreni:

—Laa naräni.

Näjza Judas ni bato'ni suganäjnireni. ⁶ Che gunii Jesús lojreni: “Laa naräni”, biäxhanreni, biajbreni lo yuj. ⁷ Dxejcti gunabdidxsac Jesús lojreni:

—¿Chu rguuiltu?

Dxejc räjpzarení stehuält:

—Jesús nani siäd guedx Nazare't.

⁸ Räjp Jesús lojreni:

—Aguniä lojtu, laa naräni. Palga narä rguuiltu, colgusaan jii redee.

⁹ Guniini rediidxga te gusojb rediidx nani guniini che räjpni: “Loj guiraa ni baniidxlu, nicla tejni di ninijt.” ¹⁰ Dxejcti Simón Pedr, sa'csi ca'ni te spaad, guläänini, batiuugni diag ladbee xten xmos bixhojzroga. Laj mosga najc Malco. ¹¹ Dxejcti räjp Jesús lo Pedr:

—Guluchee spaad xtenlu neñ xpaguinni. ¿La dina tedä trabajwduxh nani agunibee Xtadä tedä, ä?

Jesús nez loj bixhojzro

(Mt. 26:57-58; Mr. 14:53-54; Lc. 22:54)

¹² Dxejcti resoldaadga näjza comandant, näjza reguxhtis ni rnibee rexpejn Israel, gūnaazreni Jesús baliibrenini. ¹³ Dxejcti ganid huinärenini lo Anás, sa'csi najcni xtadsueegr Caifás, luxh ijzga biäjł najc Caifás bixhojzro ni rnibee lo rebixhojz. ¹⁴ Caifás najc nani baliidx rexpejn Israel nanab guet te niguii xcuent rebeñguejdxga.

Cadro gunii Pedr dini gumbee Jesús

(Mt. 26:69-70; Mr. 14:66-68; Lc. 22:55-57)

¹⁵ Simón Pedr näjza stee xpejnpacni huinajł dejtž Jesús. Luxh numbee bixhojzro bejnğa, biunäjzani Jesús lo xle' bixhojzro. ¹⁶ Bia'nti Pedr rolä'ğa. Dxejc birii xpejnpac Jesús nani numbee bixhojzroga, guniini lo nani cayajp rolä'ğa, te biu' Pedr nez lo le'ğa. ¹⁷ Dxejcti räjp mos gunaa ni rcanäj rolä', räjpni lo Pedr:

—¿La et näjdi luj najclu te xpejnpac Jesús, ä?

Räjp Pedr loj gunaaga:

—¡Xho gacäni!

¹⁸ Dxejcti sa'csi cayacnalduxh, caguse'creni boo te cagucha'lajzreni. Näjza Pedr suganäjreni, cagucha'lajzni ro guibooga.

Bixhojzro cayujn yälgunabdiidx lo Jesús

(Mt. 26:59-66; Mr. 14:55-64; Lc. 22:66-71)

¹⁹ Dxejcti gosloj cayujn bixhojzro yälgunabdiidx loj Jesús xcuent chuni'c najc rexpejnpacni näjza xcuent xhini'c ruluini.

²⁰ Dxejcti räjp Jesús lojni:

—Narä xhet xhiga'tzdi guniä rextidxä, guniäni lo guiraa rebejn guedxliuj. Basule'ä diidx neñ rexquidobäztu näjza neñ guidoro cadro re' guiraa rexpejn Israel, nicla tej diidx dina ninixhigatzädi. ²¹ ¿Xhicuent cayujnlu yälgunabdiidxga loä? Gunabdiidx loj renani biejn diajg xhini'c guniä lojreni. Laareni najnreni xhini'c guniä.

²² Che gulujx gunii Jesús rediidxre, te rexpejn bixhojzroga huääz loj Jesús, räjpni lojni:

—¿La si'c rudzu' bejn diidx loj bixhojzro, ä?

²³ Dxejcti räjp Jesús lojni:

—Palga xhet laadi guniä, baluii narä xhi diidxga najc xhet laadi, niluxh palga laaca najc ni guniä, ¿xhicuent huääzlu loä?

²⁴ Dxejcti guideb naliibni baxhal Anásni lo bixhojzro lo ni laa Caifás.

Gunisac Pedr dini gumbee Jesús

(Mt. 26:71-75; Mr. 14:69-72; Lc. 22:58-62)

²⁵ Sugasijc Pedr ro' guiboo, cagucha'lajzni, che räjpreni lojni:

—¿La et näjdi luj najclu te xpejn̄pac niguiiga, ä?

Badzu'ni diidxga räjpni:

—¡Xho gacäni!

²⁶ Dxejcti te xmos bixhojzroga, sa'csi sa'ni najc mos ni batiu' Pedr diajgni, räjpni lojni:

—¿La et lujdi ni bahuiä neñ huert con laani, ä?

²⁷ Dxejcti räjp Pedr stehuält:

—Nicla gumbeäni.

Cuantis guniini si'c, guredxagajc te guidgäi.

Jesús nez loj Pila't

(Mt. 27:1-2, 11-14; Mr. 15:1-5; Lc. 23:1-5)

²⁸ Dxejc birinäjreni Jesús rolijz Caifás, huinäreneni rolijz gubernadoor cadro laaza Pretorio, niluxh direni niu' ro'c sa'csi ameer guiliejn gubijdx, te di gacdxuudxreni dxejc di gacdi gaureni lani pascw. ²⁹ Ni'cni birii Pila't lojreni räjpni lojreni:

—¿Xhi yälquij xten niguiire siädle'ctu loä?

³⁰ Dxejcti räjpreni lojni:

—Paru di niguiire niajc te beñ latsiaj, dinu niopnäni ladzña guejblu.

³¹ Räjp Pila't lojreni:

—Colchanäni, colhuui xho gunnäjtuni yälguixhtis con lagajc xleitu.

Dxejc räjp rexpejn̄ Israel lojni:

—Di xleitu gusaan ju'tnu te bejn̄.

³² Guniireni si'c te guzojb diidx nani gunii Jesús xcuenti xho guetni.

³³ Ni'cni biusac Pila't neñ Pretorio, gurejdxni Jesús räjpni lojni:

—¿La luj najclu reii xten rexpejn̄ Israel, ä?

³⁴ Dxejcti räjp Jesús lojni:

—¿La lagajc luj rniilu si'c, ä? O ¿laa yu' chureni'c naj lojlu si'c?

³⁵ Dxejcti räjp Pila't lojni:

—¿Xhixh näj narä nacä te xpejn̄ Israel? Lagajc reben̄ lajdxlu näjza rebixhojz bateedlu ladzñaä. ¿Xhi bejnlu?

³⁶ Dxejcti räjp Jesús lojni:

—Xcälrnibeä dini gac yälrnibee sa' ni yu' guedxliujre. Paru najc xcälrnibeä te yälrnibee sa' ni yu' guedxliujre, ala cagucuaa rexpänä te di tedä ladzña rexpējn̄ nani rnibee Israel. Naj di xcälrnibeä gac yälrnibee sa' ni yu' lo guedxliujre.

³⁷ Ni'cni räjp Pila't lojni:

—¿Reii najclu, ä?

Räjp Jesús lojni:

—Laaca najlu nacä reii. Par ni'cpac golä, par ni'cpacza biälä lo guedxliujre, partis gusule'ä didxliipac. Guiraa renani najn didxlii, reni'c rucuaadjgreni xtidä.

³⁸ Räjp Pila't lojni:

—¿Xhini'c najc didxlii?

Che guniini si'c gunisacni loj rexpejn̄ Israel:

—Dina guidxälä nicla tej xtoj̄l bejnre. ³⁹ Niluxh la'tu rajptu te costumbr, casob lani pascw, ruslaanu te bejn̄ ni yu' neñ latzguuib. ¿Xhi najtu? ¿La rlanjtu guslaä ni najc reii xten rexpejn̄ Israel, ä?

⁴⁰ Dxejcti guiragajcreni guredxa', räjpreni:

—¡Na'c guslaalu niguiiga! ¡Baslaa Barrabás!

Niluxh Barrabás najc te gubaan.

19

¹ Ni'cni gunibee Pila't gudiynreni Jesús con duu ni yu' guechguuib lojni.

² Bejn resoldaad te coronguejch, bazalrenini yejc Jesús. Dxejcti bahua-jcwrenini te ladmoraad. ³ Dxejcti gusloj gubigreni lojni, te rájpreni lojni:

—¡Gubajn par tejjpas Reii xten rexpejn Israel!

Dxejc huääzreni lojni.

⁴ Dxejcti birisac Pila't, rájpmi lojreni:

—¡Colhuui! Acabääni nez lojtu, te gacbeetu dina guidxäl nicla tej xtojlni.

⁵ Dxejcti birii Jesús nez lojreni, yu' coronguejch yejcmi, najcwzani lad-moraadga. Dxejcti rájpmi Pila't lojreni:

—¡Colhuui! ¡Aree niguiire!

⁶ Ni'cni, che bahuii rebixhojzro näjza rexquixhajgreni lojni, guredxa'reni, rájpmi:

—¡Colgucuaani lo cruzj! ¡Colgucuaani lo cruzj!

Rájpmi Pila't lojreni:

—Lagajc la'tu colchanäni te gucuaatuni lo cruzj. Per narä dina guidxälä nicla tej xtojlni.

⁷ Dxejcti rájpmi rexpejn Israel lo Pila't:

—Nuurnu rajpmi te lei, luxh xcuent leiiga, nanab guetni sa'csi najni najcni Xi'n Dios.

⁸ Che biejn diajg Pila't rediidxga, bidxejbruni, ⁹ biusacni neñ Pretorio, rájpmi loj Jesús:

—¿Caro siäädlu?

Per xhet rájpmi Jesús lojni.

¹⁰ Dxejcti rájpmi Pila't lojni:

—¿La dilu guinii loä? ¿La dilu gan narä rapä yälrnibee te gucuaälu lo cruzj, rapäza yälrnibee te guslaälu, ä?

¹¹ Rájpmi Jesús lojni:

—Xhetliidi yälrnibee niajplu loä paru dilu nica'ni xhaguibaali. Ni'cni bejn nani bato' narä lojlu rapduxhruni dojl loj ni rajpmi.

¹² Ni'cni gudiil Pila't xho nuslaani Jesús, niluxh rexpejn Israel rbedxaduxhrene, rájpmi:

—Palga luj guslaaluni, dilu gac xamiigw reii César, sa'csi chutis ni rni najcni reii, najcni xcontraar César.

¹³ Che biejn diajg Pila't rediidxre, gulääni Jesús, dxejcti gurej Pila't lo yagxhiil cadro rujnmi yälguxhtis, cadro laa Litóstroros con didx-griegw sälojni naga' guisa'c, con didx-hebreo laani Gabata. ¹⁴ Najcni dxej vispr lani pascw, si'cti läidxej, dxejcti rájpmi loj rexpejn Israel:

—Colhuui, aree xreittu.

¹⁵ Ni'cni guredxa'reni rájpmi:

—¡Suguetni! ¡Suguetni! ¡Bacuaani lo cruzj!

Dxejcti rájpmi Pila't lojreni:

—¿La sucuaä xreittu lo cruzj, ä?

Dxejcti rájpmi rebixhojz ni rnibee lojni:

—Rutru reiidi rajpmi, Césartis najc xreiiu.

¹⁶ Ni'cni bateed Pila't Jesús lojreni te chacuaarenini lo cruzj.

Che bacuaarenini lo cruzj

(Mt. 27:32-44; Mr. 15:21-32; Lc. 23:26-43)

¹⁷ Dxejcti cua'reni Jesús, biriini ro'c guideb nuuni xcruzjni, cheni bidzujñireni te lajt ni laa lajt xten Calabeer, con didx hebreo laani Gólgota. ¹⁸ Ro'c bacuaarenini lo cruzj. Bacuaazareni tio'p niguii lo stio'p cruzj, teygani te laad cuá' Jesús. ¹⁹ Dxejc bacuaa Pila't diidx ni cháa' yejc xcruzjni; rediidxga najc scree: "Jesús, beñ Nazare't, Reii xten rexpejn Israel." ²⁰ Xhidajl bejn bil diidx ni caj yejc xcruzjni, sa'csi lajt cadre bacuaarenini lo cruzj najc gajxh ro' guejdxga, luxh didx hebreo, diidx griegw, nájza didx latin bacuaareni rediidxga. ²¹ Dxejcti rájp rebixhojzro xten rexpejn Israel loj Pila't:

—Na'c nucuaalu: "Reii xten rexpejn Israelni", laacaru nacuaalu: "Laani najni, najcni reii xten rexpejn Israel".

²² Dxejcti rájp Pila't lojreni:

—Nani abacuaá, abacuaá. Si'c jia'nni.

²³ Dxejcti resoldaad, che gulujx bacuaareni Jesús lo cruzj, cua'reni rehxablojiaani bejnrenini tajp la', te cade tejreni cua'reni te la'ni. Luxh yu' stee xhajibni ni laa tunica, nadijbni, guejnni hasta lo yuj guc-cheeni. ²⁴ Ni'cni rájpreni lo sa'reni:

—Na'c guitiájznuni; do'o guidzujtnu te daad lojni, te don chu xten gacni.

Si'c bejnreni te gusojb xtiidx Dios cadre caj scree: "Batiájsreni xhablojiaá; yejca xhabá ni bia'n gudzujtreni daad."

Ni'cni bejn resoldaad recosre. ²⁵ Niluxh cuá' xcruzj Jesús suga' xnanni, con bájl xnanni, ni laa Marii cháäl Cleofas, nájza Marii Magdalen. ²⁶ Che bahuii Jesús loj xnanni, dxejc bahuiizani loj xpejn pacni nani sanálazduxhni, rájp Jesús loj xnanni:

—Nan, ¡bahuii, aro'c xi'nlul!

²⁷ Dxejcti rájp Jesús loj xpejn pacni nani sanálazduxhni:

—¡Bahuii, aro'c xnanlu!

Ni'cni dxejcli siná nani najc xpejn pacni xnan Jesús rolizj pacni.

Xho gujt Jesús

(Mt. 27:45-56; Mr. 15:33-41; Lc. 23:44-49)

²⁸ Ni'cni, sa'csi najn Jesús alagujc guiraa recos ni nanab gac te soob rextidx Dios, rájpreni:

—Cayolá nis.

²⁹ Ro'c suga' te guejs vinagr, nenga bahuajdxreni te esponj dxejc bacuaarenini lo te yajg ni laa hisopo, gulásreni esponjga batzugrenini ro'ni.

³⁰ Che gulujx gu' Jesús vinagrga, rájpreni:

—Agulujxni.

Dxejcti basajb yejcní, baslaani xaimni.

Xhi bejn te soldaad lo Jesús

³¹ Dxejga najc dxe vispr xte lani pascw, che ru' mandaad par lanijga. Rexpejn Israel di rrajzreni nia'n rebejn ga lo recruij, sa'csi dxe sabdga najc dxej ni rusilajzreni. Ni'cni gunabreni lo Pila't guxhalni chu qui'ch ni'reni te guetreni, te jiájtreni loj recruij. ³² Dxejcti bidzujñ resoldaad, gudi'chreni guiro'p ni' nani caj te laad, sigajca bennájreni stee ni caj ste laadga. ³³ Che gubigreni lo Jesús, bahuiireni alagujtñi, direni nigui'ch ni'ni. ³⁴ Tej soldaadga baqui'tzni te lans ro' xcustiini, dxejc bixe' rejn nájza nis. ³⁵ Lagajc nará Juan bahuiá recosga, ni'cni caniá rediidxre, luxh diidxga guliipacni. Lagajc nará naná didxguliipac caniá, te chaliiza lajztu xcuenti. ³⁶ Sa'csi si'c gujc guira'ti, te guzojb xtidx Dios cadre caj: "Nicla tej xtzuajtñi di guech." ³⁷ Sigajca lo stee guijtzc caj diidxre: "Sidxelojreni loj nani biguijtzc te lans."

*Huicua'tzreni Jesús**(Mt. 27:57-61; Mr. 15:42-47; Lc. 23:50-56)*

³⁸ Che gulujx recosga, dxejcti huij José, te beñ Arimatea, nacxhiga'tzni te xpejñ Jesús, sa'csi rdxejbn rexpeljñ Israel, ni'c huijni loj Pila't, gunabni loj Pila't te laani guiliätñi Jesús lo cruzj. Cuäjzba Pila't, dxejc biääd José gulätñi Jesús, sanätini togoalga. ³⁹ Nájza Nicodemü biääd dxejc, nani galoo huininäj Jesús te guxhijñ. Biädñäni si'cti tiuu kil te dänejxh ni najc si'c yaal ni laa mirra nájza áloes. ⁴⁰ Dxejcti cua'reni Jesús batejbrenini te la' lad lino, basälzareni dájga ni laa mirra con áloes, sa'csi si'c najc xcostumbr rexpeljñ Israel che rucua'tzreni te togoal. ⁴¹ Gajxh cadre cuaj Jesús lo cruzj, yu' te huert, neñ huertga yu' te bacoob si'c te biliää, cadre nicla tej bejñ gajd guiga'tz. ⁴² Sa'csi abidzujñ dxej vispr lani pascw xten rexpeljñ Israel, luxh gajxh suga' biliääga, neñga gudixhrene Jesús; si'c biga'tztini.

20*Gubañsac Jesús loj rebengut**(Mt. 28:1-10; Mr. 16:1-8; Lc. 24:1-12)*

¹ Primer dxej xten xmaanga, cäjyru, gajd lo guedxliuj jianij che huij Marii Magdalen lo baaga. Che bidzujñni ro' baaga, bahuiini agubicaj guij ni suga' ro' baaga. ² Dxejcti ruxuñni gubi'ni te huiye'tzni lo Simón Pedr nájza lo stee xpejñpac Jesús ni sanälazduxhni, räjpni lojreni:

—Ahuilää'reni Dad neñ baa, luxh dinu guidon caro sanärenini.

³ Dxejc biriguxuñ Pedr nájza stee bejñga, huijreni nez lo baa. ⁴ Ruxun guiro'preni. Niluxh stee bejñga ruxuñduxhruni loj Pedr. Laani ganid bidzujñni lo baaga. ⁵ Dxejcti guretänñi te bahuiini neñ ba-biliääga. Bahuiini te laad naga' relajdtis nani bidejb Jesús, luxh dini niu' neñ baaga. ⁶ Dxejc bidzujñgajc Pedr, biugajcni neñ baaga, bahuiini naga' relajdga te laad. ⁷ Bahuiizani lajd ni guyu' yejcn, ni'c nie'tni saru, naga'ni te laad. ⁸ Dxejcti biu' stee bejñga nani bidzujñ ganid. Che bahuiini neñ baaga, huililajzñi gubañsac Jesús. ⁹ Sa'csi gajdreni gachee ni caj lo reguijtz, cadre caj nanab guibañsacni loj rebengut. ¹⁰ Dxejc gubisac guiro'p rexpeljñpacni rolizreni.

*Baluiloj Jesús loj Marii Magdalen**(Mr. 16:9-11)*

¹¹ Laltis suga' Marii cuä' baaga, cayoorni. Ni'cni lañ ni cayoorni, basajb lojni te bahuiini neñ baaga. ¹² Dxejcti bahuiini lo tio'p xangl Dios, najcwreni ladnolbäj, sobga'reni, tejni nez cadre gojt yejc Jesús, steeni nez cadre gojt ni'ni. ¹³ Dxejcti räjpreni lojni:

—Nane', ¿xhicuent roonlu?

Räjpni lojreni:

—Sa'csi sanäreni Dad, luxh dina ganä caro huisa'nrenini.

¹⁴ Che gulujx guniini si'c, gubiréni, dxejc bahuiini loj Jesús suga' ro'c, niluxh dini niembee Jesús. ¹⁵ Dxejc räjp Jesús lojni:

—Nane', ¿xhicuent roonlu? ¿Chu rguillu?

Marii bejñ xhigab laa dade' ni rcanäj huertga, ni'c räjpni lojni:

—Dad, palga luj sanäluni, gunii caro gudixhluni te guiliäsäni te chanääni.

¹⁶ Dxejcti räjp Jesús lojni:

—¡Marii!

Dxejc gubiré Marii, räjpni neñ xtidx hebreo:

—¡Raboni!

(Säloj diidxga “Mastr”).

¹⁷ Dxejcti räjp Jesús lojni:

—Na'c guiniaazlu narä sa'csi gadna cha'a lo Xtadä xhaguibaa. Huij loj re-betzä, huiye'tz lojreni, cha'a lo Xtadä, näjza Xtadtu, loj Xtiozä näjza Xtiooztu.

¹⁸ Dxejcti huij Marii Magdalen, bidzujñni loj rexpejn̄pacni badeedni didx-coob, räjpni:

—Abahuiä lo Dad Jesús.

Räjpzani lojreni guiraa recos ni gunii Jesús lojni.

Baluiloj Jesús loj rexpejn̄pacni

(Mt. 28:16-20; Mr. 16:14-18; Lc. 24:36-49)

¹⁹ Che gojl gudxey, najcni dumingw, primer dxej xten xmaan, abiäudzu'tz ro lä' ro' yu' cadro tre' rexpejn̄pacni, sa'csi rdxejbreni rexpejn̄ Israel. Chela bidzujñ Jesús, guzujni nez galäiireni, räjpni lojreni:

—Suchu yäl̄rbedxi lastootu.

²⁰ Che guniini si'c, baluigajcni reñaani lojreni näjza cuä' xcustiini. Ni'cni bibaduxhlajz rexpejn̄pacni che bahuiireni lo Dad Jesús. ²¹ Dxejc räjp Jesús lojreni stehuält:

—Suchu yäl̄rbedxi lastootu. Si'c ni baxhal Xtadä narä, si'cza ruxhalä la'tu.

²² Che gulujx guniini rediidxga, balejbni yejcreni, räjpni, lojreni:

—Suguibajñ Sprit Dxan xten Dios nen̄ lastootu. ²³ Rextojl rebejn̄ nani siäl̄lajztu, sibicajreni. Rextojl rebejn̄ nani ditu jiäl̄lajz, siannäireni redojlga.

Tomás bahuii lo Jesús ni gubañsac

²⁴ Tomás, ni laaza Didimo, najcni te retzubitio'p xpejn̄pac Jesús. Rutini che biäd Jesús loj rexpejn̄pacni. ²⁵ Dxejcti räjp rexpejn̄pacni lojni:

—Abihuiinu loj Jesús, agubañsacni loj rebengut.

Dxejcti laani räjpni lojreni:

—Palga dina fiä loj reñaani cadro caj seen xten reclaab, palga dina guqui'tzä bicuenaä cadro guyu' claabga, guqui'tzäza ñaa cadro bixal cuä'ni, di lazä chalii gubañsacni loj rebengut.

²⁶ Che gudejd xhujñ dxej, tresac rexpejn̄pacni nen̄ yu', nadxaagza Tomás lojreni. Niäudzu'tz yu'ga, luxh chela gucbeereni abidzujñ Jesús, guzujni galäiireni, räjpni lojreni:

—Suchu yäl̄rbedxi lastootu.

²⁷ Dxejcti räjpni loj Tomás:

—Baqui'tz bicuenaalu ree loj patnaä, basälza ñaalu cuä'äre, na'c ractio'p lajzlu, huililajzpac gubañsacä loj rebengut.

²⁸ Dxejcti räjp Tomás lojni:

—¡Xtadä, Xtioozä!

²⁹ Dxejcti räjp Jesús lojni:

—Sa'csi abahuiilu loä, Tomás, huililajzlu. Chicbaa renani mase direni fii, rililajzreni xtidxä.

Xhicuent bacuaani reguijtzre

³⁰ Xhidalroduxhru dzuun bejn̄ Jesús nez loj rexpejn̄pacni, nani di nicaj lo guijtz. ³¹ Redzuunre nani bejn̄ Jesús nani cuaj lo guijtzre cuajni te chalilajztu diidxre: Jesús najc Crist, nani cabäjz rebejn̄ jiäd, Xi'n Dios. Luxh che chalilajz te bejn̄ xtiidxni, sajñni yäl̄nabajñ par tejpas.

¹ Dxejcti baluiloj Jesús loj rexpejn̄ni ro' nisdoo ni laa Tiberias. Scree baluilojni lojreni. ² Nadxaag sa' rebejn̄re: Simón Pedr, Tomás ni laaza Didimo, nájza Natanael, nani siáäd Caná xten Galilee, rexi'n Zebedeo, nájza stio'p rexpejn̄pacni. ³ Dxejcti rájp Simón Pedr loj resa'ni:

—Chanazá bájł.

Rájpreni lojni:

—Nájza nuure chonnu.

Dxejcti sääreni, huá'preni nen̄ te barcw. Guideb guxhijnga xhet bájłdi gu-naazreni. ⁴ Che acayanij loj guedxliuj, suga' Jesús ro' nisdooğa, di rexpejn̄ni niembeeni. ⁵ Ni'cni rájp Jesús lojreni:

—Rexi'ná, ¿la xhet bájłdi rajptu, ä?

Rájpreni lojni:

—Xhet rajpdinu.

⁶ Dxejcti rájpn̄i lojreni:

—Colgusäl xquixhtu ladbee xten barcwğa, te ro'c siniaaztuni.

Dxejcti bacuaareni guiixhğa ladbee xten barcwğa, dxejcti ameer diniajcđi nibääreni guiixhğa ro'c sa'csi gudxadotzu'tzni bájł. ⁷ Dxejcti bejn̄ nani sanälazduxh Jesús, rájp loj Pedr:

—Laa Dad Jesús.

Che biejn̄ diajg Simón Pedr laa Dad Jesús, gotgajcni xhablojiaani sa'csi ladxhagiättis najcwni sa'csi canaazni bájł, dxejcti gutiäjsni lo nisdoo. ⁸ Sgaa rexpejn̄pacni biädnäreni rebarcwğa sa'csi ameer guidzujn̄reni ro' nisdooğa, si'cti tegayuu metrtis cayäädx. Siädnäzarenı guiixh guidxa rebájł. ⁹ Che bidzujn̄reni ro' nisdoo, bahuiireni re' guiboo, ro'c dzuub te bájł nájza yätxtiil cage'. ¹⁰ Dxejcti rájp Jesús lojreni:

—Coltaná gaaı bájł nani entis gunaaztu.

¹¹ Dxejcti huij Simón Pedr, gulääni guiixhğa, guidxani bälro. Guyu' si'cti te gayuu garol con choñ bájł nen̄ guiixhğa, niluxh dini niräsyá' mase guyu' xhidalduxh bájł nen̄ni. ¹² Dxejcti rájp Jesús lojreni:

—Coltaa te gauxharejntu.

Nicla tej rexpejn̄pacni dini niabdiidx lojni: “¿Chu luj?” sa'csi anajn̄reni laa Jesúsni. ¹³ Dxejcti cua' Jesús yätxtiil, badeedni lojreni, sigajcza rebájł.

¹⁴ Dee najc ni riojn̄ huält baluilojni loj rexpejn̄pacni, che gubañsacni loj rebeñgut.

Jesús rninäj; Simón Pedr

¹⁵ Che gulujx gudajwreni, rájp Jesús loj Simón Pedr:

—Simón xi'n Jonás, ¿la sanälajzrulu narä loj chu stee, ä?

Rájpn̄i lojni:

—O'n, Dad, luj najnlu sanälazä luj.

Rájp Jesús lojni:

—Gojp rexilä'ä.

¹⁶ Rápsacni lojni ni rojp huält:

—Simón, xi'n Jonás, ¿la sanälajzlu narä, ä?

Rájpn̄i lojni:

—O'n, Dad, Luj najnlu sanälazä luj.

Rájpn̄i lojni:

—Gojp rexilä.

¹⁷ Rápsacni lojni ni riojn̄ huält:

—Simón xi'n Jonás, ¿la sanälajzlu narä?

Guc-huin lastoo Simón Pedr sa'csi gunabdiidx Jesús lojni choñ huält: “¿La sanälajzlu narä?” Dxejcti räjp Simón lojni:

—Dad, luj najnlu guira'ti. Luj najnlu sanälazä luj.

Räjp Jesús lojni:

—Gojp rexilä. ¹⁸ Rniliäpac lojlu, che gujclu bi'nru, lagajc luj rajcwlu xhajblu, rijlu cadrotis rlanjzlu. Che anajclu bengool, susgaatislu ñaalu te gushuajcw ste'ca bejn xhajblu, te chanäreni luj cadre di rlanjzlu.

¹⁹ Luxh diidxga gunii Jesús te cagusule'ni xho gugu'treni Pedr te guiliä'pni xpala'n Dios. Che gulujx guniini si'c, räjpni loj Pedr:

—Gudanajl narä.

²⁰ Che gubiré Pedr, bahuiini loj stee xpejn, nani sanälajzru Jesús, siädnajl ni dejtreni. Lagajc bejnre ni gurej cuä' Jesús lo lult xchej, ni räjpza loj Jesús: “Dad, ¿chuni'c najc nani guto'lu?” ²¹ Ni'cni, che bahuii Pedr lojni, räjpni loj Jesús:

—Dad, deea', ¿xhi gun dee?

²² Dxejcti räjp Jesús lojni:

—Palga rlazä jia'nni che guibisacäli loj guedxliujre, ¿xhixh najcni? Basaanni. Luj gudanajl narä.

²³ Ni'cni bire'ch diidx lagajc loj resa'ni, di bejnğa guet. Di Jesús niäjb lojni dini guet, alga räjpni: “palga rlazä jia'nni loj guedxliujre che guibisacäli lo guedxliujre, ¿xhixh najcni?”

²⁴ Luxh bejnğa najc narä, xpejn Jesús nani bahuijoj guiraa recosre, nani bacuaazareni. Anadonnu didxliipac najc recos nani rniini.

²⁵ Yu'ru xhidalduxh dzuun ni bejn Jesús. Palga gucuaanu guiralii redzuun ni bejn Jesús, nicla lo guedxliujre di gal chu reguijtz cadre xcajni.

Redzuun Rexpejn̄ Dios

Siädä Sprit Dxan xten Dios te cuääzni neñ lastootu

¹ Xamigwä Teófilo, abacuaä lojlu xcuent guiraa recos nani bejn Jesucrist nájza nani baluui Jesucrist, che guslojlini, ² hasta dxejli ni huäjśni xhaguibaa. Gunibexgaani xhini'c gun renani guleni gac xpejn̄pacni. Sprit Dxan xten Dios baluui Jesucrist xhi guiniini lojreni. ³ Gudejd Jesucrist trabajwduxh, dxejcti gujtni. Dxejc gubañsacni lo rebengut, baluilojni lo rexpejn̄pacni. Tiuu dxej baluilojni loj rexpejn̄pacni balti huält te gacheereni agubañsacni. Guniizani lojreni xcuent xcäl̄rnibee Dios.

⁴ Che gudejd tiuu dxejga, batojp Jesucrist rexpejn̄pacni, gunibeeni na'c guiriireni guedx Jerusalén, cuääzreni jiädä Sprit Dxan xten Dios nani aguniipac Dios jiädä. Räj̄pni:

—Dee abiejn̄ diajgtu guniä lojtu. ⁵ Juan batiobnis con nis, luxh naj guxii dxej cayäädx dxejcru siädä Sprit Dxan xten Dios te cuääzni neñ lastootu. Si'c guirobnistu —räj̄pni.

Huäj̄s Jesucrist siini xhaguibaa

⁶ Lagajc dxejc che abidojpreni loj Jesucrist, gunabdiidxreni lojni:

—¿La naj gudedsaclu yäl̄rnibee lo rexpejn̄ Israel, ä?

⁷ Dxejcti räj̄p Jesucrist loj rexpejn̄pacni:

—Di riäj̄l gacheetu xcuent redxej nájza retieemp nani abasobxgaä Dios con xcäl̄rnibeeni. ⁸ La'tu sica'tu yäl̄rnibee che abiädä Sprit Dxan xten Dios neñ lastootu. Dxejc chatie'chtu xtidxä nájza rextzunä neñ guedx Jerusalén, neñ guiraa reguedx Judea, neñ guiraa reguedx Samaria, nájza neñ guideb guedxliuj —räj̄pni.

⁹ Gulujxtis gunii Jesucrist rediidxga, luxh lał̄ni cahuii rebejn̄ lojni huäj̄śni xhaguibaa, sa'csi gurejdx Diosni. Dxejc biädä te za, biu'ni neñ zaga. Ro'cti diru rebejn̄ nuhuii lojni. ¹⁰ Lał̄ni cadxelodxi rebejn̄ xhaguibaa cadre gunitloj Jesucrist, tiop angl xten Dios ni najcw ladnol suga' gajxh cadre suga'reni.

¹¹ Dxejc räj̄p reangl loj rebejn̄:

—¿Xhi räj̄ctu beñ Galilee? ¿Xhicuent cadxelojtu xhaguibaa? Abahuiitu xho huäj̄s Jesucrist siini xhaguibaa. Lagajc si'c guibisacni —räj̄preni.

Gulereni Matías ni najc apostcoob

¹² Dxejc birii rebejn̄ yejc dajne' ni laa Dan Oliib, siireni guedx Jerusalén. Dan Oliib suga' gajxh Jerusalén. Gusajrenini si'cni rnii leii saj̄c sareni dxej ni rusilajzreni. ¹³ Che biu'reni Jerusalén, bidzuj̄nreni ro' yu' cadre rbäzlaareni. Yu'ga najc jiaa yejc stee yu'. Ro'c rbäzlaa Pedr nájza Jacob, Juan, Andrés, Felipe, Tomás, Bartolomé, Mateo, Jacob xi'n Alfeo, Simón nani laaza Zelote, nájza Judas bejtz Jacob. ¹⁴ Ro'c yu' guiraareni nájza regunaa nájza Marii xnan Jesucrist nájza rebetzhuin̄ Jesucrist. Cabejdx, canabreni loj Dios; tejsi najc xhigab xten guiraareni.

¹⁵ Nadxagsa' te gayuu gaj̄l bejn̄. Dxejcti huisulii Pedr galäiireni, räj̄pni loj rebejn̄:

¹⁶ —Caniä lojtu, resa'ä, nanabpac soob xtidx Sprit Dxan xten Dios ni bacuaa toDavid lo guijtz xcuent Judas, nani bato' Jesucrist loj renani gu-naazni. ¹⁷ Gujc Judas sa'nu, bejnzani lagajc dzuun ni biennu. ¹⁸ Cua' Judas meel ni badeedreni lojni che bato'ni Jesucrist. Che gulujx bejn̄ni dzunguijdx

ni bejn, badesacni meel lojreni. Gusiireni te la' yuj. Dxejcti lagajc Judas basäl duu guejn, guzäbnajni lo bej, gujtni. Gusaguijni, dxejcti biräjs xque'ni birii guiraa reziini. ¹⁹ Che biejn diajg rebejn Jerusalén si'c, gulälajreni yujre Acéldama, ni säloj yurejn. ²⁰ Neñ guijtzi ni laa Salmos abacuaa toDavid rediidxre:

Sujianxteb rolijzni;
na'c cuääzru bejn rolijzni;
näjza:

Suxca'za ste'ca niguii xtzuunni.

²¹ Naj nanab cuenu stee niguii —räjp Pedr—. Nanab gacni tej ni gusanäj nuunu guideb redxej ni guyunäj Jesucrist nuunu, ²² dxejli ni gusloj batiobnis Juan hasta dxej ni huäjs Jesucrist xhaguibaa. Te gacnä j niguiire nuunu gusule'nu diidx gubansacpac Jesucrist lo rebengut.

²³ Dxejc gulääreni tiop niguii lojreni, tejni laa José Barsabás ni rbälajreni Justo, steeni laa Matías. ²⁴ Gurejdx, gunabreni lo Dios, räjpreni:

—Dad, Dios, ni rachee lastoo guiraa rebejn, baluii loonu con ni najc niguii ni agulelu loj guiro'p niguiire, ²⁵ te jiu'ni lo dzuun näjza lo yälapost ni basa'n Judas cheni sääni garenca nejz —räjpreni.

²⁶ Dxejcti gudzujtreni daad te gulereni lo guiro'preni. Che biajb daad, gulereni Matías. Dxejc bigabnä j Matías stzubiteeb reapost te gujcreni tzubitiop apost.

2

Biääd Sprit Dxan xten Dios

¹ Che bidzujn dxej ni rajc lanij xten Pentecostés, tre' guiraareni tejsi lajt neñ te yu', ² chela gusloj cayubej xhaguibaa si'c te beroduxh, bachajni guideb neñ yu' cadre suga'reni. ³ Dxejc bahuiireni astoo carechxteb xhidajl bale' casanij rebajlga yejc teja reni sojb ro'c. ⁴ Biu'ti Sprit Dxan xten Dios neñ lastoo guiragajreni. Dxejc gusloj caniiireni garen-garen didxsaj si'ctisni badeed Sprit Dxan xten Dios guiniireni.

⁵ Neñ redxejga, xhidajl rexpejn Israel ni sasanä jpc xtidx Dios bidzujn guedx Jerusalén. Xhidajl lajt biriireni siäädreni. ⁶ Che biejn diajgreni guyubej beduxhga, bidoj reben xhidaalga, bachaag sa'reni. Rdxeloduxh reben xhidaalga sa'csi cayejn diajgreni canii reapost xtidxsajpc cade tejnreni.

⁷ Cadxelojreni räjpreni:

—¡Bahuilaaare! ¿La et beñ Galileedi renani canii, ä? ⁸ ¿Xhoxh riejn diajgnu caniiireni xtiidxpacnu si'ctis ni rniinu laadxnu, ä? ⁹ Najcnu beñ nación Partia, beñ nación Media, beñ región Elam, beñ Mesopotamia, beñ Judea, beñ estad Capadocia, beñ región Ponto, näjza beñ Asia. ¹⁰ Najczanu beñ distrit Frigia, beñ estad Panflia, beñ nación Egipto, näjza bejn ni siääd stelaad Cirene, te estad neñ Africa. Loj rebejn ni siääd Roma yu' reni najc xpejn Israel, yu'za reni bazuxhijb lo Dios sa'csi rililajzreni si'cni rililajz rexpejn Israel. ¹¹ Yu'za beñ Creta. Yu'za beñ nación Arabia. Guiragajcnu riejn diajgnu caniiireni xtiidxpacnu si'ctis ni rniinu laadxnu. Caniiireni loonu xcuent recosroduxh ni cayujn Dios.

¹² Bidxeloduxh reben xhidaalga, dijiejn xhi xhigab gunreni. Räjpreni lo sa'reni:

—¿Xhi säloj dee?

¹³ Dxejcti guyu' rebejn ni baxhiznä jreni, räjpreni:

—Agusojz redee.

Gunii Pedr loj rebejn

¹⁴ Dxejcti gusulii Pedr näjza tzubiteeb sa'ni, guredxa'ni guniini lo reben xhidaalga:

—Guejbtu, rexpejn Israel, nani rbäjz distrit Judea näjza guedx Jerusalén. Colcuadiajg diidx nani guiniä. ¹⁵ Xhet sojzdinu si'cni cayujntu xhigab. Rsilru naj, entis gojl rcagaa. ¹⁶ Dxejc scree gunii Joel che guniini xtidx Dios agujc xchero. ¹⁷ Räj p Dios:

Sidzujn dxej che guxhalä Xsprit Dxanä cuääzni neñ lastoo guiraa rebejn. Rexingaantu näjza rexindxa'ptu sinii xtidxä xcuent recos ni gajd gac.

Rexi'ntu sinixcal,
rextadgoldootu suluiloj bacial recos nani guluiä lojreni.

¹⁸ Guxhalä Xsprit Dxanä loj guiraa reni siädnajl narä.

Siniireni rediidx ni gudedä lojreni xcuent recos nani gajd gac.

¹⁹ Suluiä lojtu balti senro xhaguibaa näjza lo guedxliuj.

Resenro ni gac najc rejn con guiboo, luxh guxh sire' si'c te za.

²⁰ Sicäjy loj gubijdx, sajc bäii si'c rejn.

Sajc guiraa recosre,
dxejrcu sidzujn dxeduxh che jälsacä narä, Dios.

²¹ Dxejc guiraa rebejn nani cuedx guiniab gacnä j Diosreni, reni'c siliaa lo dojl.

²² Räj p Pedr lojreni:

—Rexpejn Israel, colcuadiajg xtidxä. Dios baluii Jesucrist, beñ Nazare't, lojtu por recosro, remilagwr, reseen nani bejni nez lojtu. Lagajc Dios badeed yälrnibee loj Jesucrist te bejni redzunroga. La'tu nancheetu dee.

²³ Galooli ananchee Dios xhi guntu loj Jesucrist Xi'nni. Basaanza Dios bateedtu Jesucrist ladznäa rebenguijdx te bacuaareni Jesucrist lo cruzj te bagu'trenini. ²⁴ Baspansac Dios Jesucrist, basläa Diosni ladznäa yälgujt, sa'csi di niajcdi nica' yälgujtni par tejpas, sa'csi laani rnibee lo yälgujt. ²⁵ Che gubansac Jesucrist, guzojb diidx ni bacuaa David lo guijtz xcuent Jesucrist. Räj p David lo Dios:

Guira dxej ruhuiä lojlu, Dios.

Suga'lu xladbeä cayacnäjlü narä te di guidxejb lastoä.

²⁶ Ni'cni bibalajz lastoä, guniäza lojlu lacti rbaa lazä.

Rbalazä sa'csi suhuiilu narä che guetä.

²⁷ Dizalu gusaan jia'n xaimä neñ baa.

Dizalu gusaan gudx tiejxh xi'nlu nani sanälajzlu.

²⁸ Abaluiilu löä xho guibanä par tejpas.

Sibalazduxhä sa'csi guibanä luj,

si'c räj p David xcuent Jesucrist.

²⁹ Räj p Pedr:

—Guyasi guiniä lojtu agujc xchero gujt David. Aguyutzu'tzni neñ baa. Sajc guihuiinu baa cadre biga'tz David. ³⁰ Gunii David xtidx Dios. Che nabajni David bia'n diidx gudeed Dios te xajni ni guirilaj Crist, luxh laani gacni reii si'cni gujc David. ³¹ Sa'csi baluixgaa Dios recosre lo David, ni'c räj p David sibansac Crist lo rebengut sa'csi di Dios gusaan jia'n xaimni neñ baa, dizani gusaan gudx tiejxhni. ³² Guläs Dios Jesucrist lo rebengut. Nuure bahuiloonuni, najcnu testi gw gubansacni lo rebengut. ³³ Gurejdx Dios Jesucrist. Naj nabajni Jesucrist xhaguibaa, nabejni xladbee Dios ro'c canibeeni. Badeed Dios Xsprit Dxanni loj Jesucrist si'cni bia'n diidx. Naj

abaxhal Jesucrist Sprit Dxaan lo guedxliuj. Jesucrist cayujn guira'ti nani cahuiitu, nani cayejn diajgtu nadxej. ³⁴ Di David nij xhaguibaa, sa'csi lagajc David räjp:

Gunii Dios lo Dad nani rnibee loä: “Gurej xladbeä

³⁵ che guidzujnli dxej gudzugä guiraa reni rdxe'ch lojlu te gacheereni luj rnibeelu guira'ti.”

³⁶ 'Rniliäpac lojtu —räjp Pedr—. La'tu bacuaatu Jesús lo cruzj. Ni'cni, colgacbee, guiraatu xpen Israel, abejn Dios gac Jesúsre Dad nani rnibee loonu.

³⁷ Che biejn diajgreni laareni bacuaareni Jesús lo cruzj, guc-huinduxh lajzreni. Räjpreni lo Pedr näjza lo reapost ni suga' ro'c:

—Aiilu, resa'nu, ¿xhini'c jiennu naj?

³⁸ Dxejcti räjp Pedr lojreni:

—Colgusiech lajztu, colguirobnisza, sa'csi ni'c najc te seen rlaiztu chanajltu Jesucrist, te si'c jia xtojltu. Dxejc suniidx Dios Sprit Dxaan cuääz nen lastootu.

³⁹ Si'c rlaiz Dios guniidx Xsprit Dxanni lojtu näjza loj rexi'ntu, näjza lo rebejn ni rbäjz zijtru, näjza loj guiragajc rebejn nani cueedxni —si'c gunii Pedr lo rexepejn Israel.

⁴⁰ Dxejcru gunii Pedr xhidajlru diidx, balijdxni rebejn:

—Colguirii loj reben latsiaj ni re' lo guedxliuj naj, te laatu lo dojl.

⁴¹ Xhidajlreni huililajz rediidxga. Dxejcti gurobnisreni sa'csi huililajzreni xtidx Dios. Lagajc dxejga huililajz si'cti choñ miñ bejn. ⁴² Sanuutis rusobreni diidx ni baluui reapost, bibalazduxhreni sa'csi bidxaag sa'reni con rexepejn Jesucrist, gudaunäj sa'reni si'c gudaunäj Jesucrist rexepejnpacni, bidojpreni tejsi lajt te guniireni lo Dios.

Xho gubajñ rexepejn Jesucrist galoo

⁴³ Bidxeloduxh guiraa rebejn luxh bejn reapost redzunro, remilagwr.

⁴⁴ Bichaag sa' renani huililajz xtidx Dios. Bachagsa'reni xhixtenreni te tejsi gojpreni guiraa xhixtenreni. ⁴⁵ Bato'reni xhixtenreni, dxejcti badeedreni meel lo sa'reni si'ctis ni caquiin chutis tejreni. ⁴⁶ Guixe-guixee bidojpreni nen guidoro xten Israel. Tejsi najc rexhigabreni. Gudaunäj sa'reni rolizj cadetejreni, guiraareni bibalaznäduxh sa'reni. ⁴⁷ Gulä'preni xpala'n Dios. Guiraa rebejn gunii rexepejn Jesucrist najc beñsa'c. Guixe-guixee batie' Dios xhidajlru bejn nani rililajz xtiidxni, badzucajni rextojlreni, dxejc bachaa-greni lo rexepejn Jesucrist.

3

Biajc niguii nani racxhuu ni'ni

¹ Guyu' te dxej säa Pedr näjza Juan nez loj guidoro si'cti rcachon gudxej.

² Guyu' te niguii nani racxhuu ni'ni, digacdi sani che gojllini. Guixe-guixee rile'c bejn niguiiga ro' puertroga xten guidoro. Puertroga laa Sacrü. Ro'c rbejni rniabni gojn lojreni riu' guidoo. ³ Che bahuiini agojl jiu' Pedr näjza Juan nen guidoroga, gunabni te gojn lojreni. ⁴ Dxejcti bahuii Pedr näjza Juan lojni. Räjp Pedr lojni:

—¡Bahuii loonu!

⁵ Che biejn diaj niguiiga xtidx Pedr, bahuiini lojreni sa'csi naani sudeedreni meel lojni.

⁶ Räjp Pedr lojni:

—Xhetliidi meeldi rapä, nani rapätis sunidxä lojlu. Xcuent xcälrnibee Jesucrist, beñ Nazare't, rniä lojlu: ¡Gusulii! ¡Gusaj! —räjpn.

⁷ Dxejcti gunaaz Pedr ñaani, guläsnini. Biligajc ni'ni, gusutijp ni'ni. ⁸ Huisuyäl'ni, gusajni. Biunäjni Pedr näjza Juan neñ guidoro. Rsiajni, rtiäsnini, calä'pni xpala'n Dios. ⁹ Bahuii xhidajl bejn lojni neñ guidoro, rsiajni, calä'pzani xpala'n Dios. ¹⁰ Biembeereni laa niguii ni rbej ro' puertro xten guidoro, rñiabni gojn. Guiraareni bidxeloduxhrene bahuiireni xhi gusajc niguii ni gucxhuu ni'ni.

Baluii Pedr xtidx Dios neñ cordoor xten guidoro

¹¹ Ro' guidoroga yu' te cordoor ni laa Cordoor xten Salomón. Ro'c suga' Pedr näjza Juan, naztzu'tz niguiiga ñaareni. Ruxuñ guiraa rebejn bidzujñ neñ cordoorga. Bidxeloreni sa'csi arsiay niguii ni gucxhuu ni'ni. ¹² Che bahuii Pedr lo rebejn räjpni lojrene:

—¿Xhicuent rdxeloj gueb'tu, rexpejn Israel? Pet naatu nuure basiajcnu ni' niguiire. Xhet nuudire basiajcnu ni'ni. Xcuent xcäl'rnibee Jesucrist biajc ni' niguiire. ¹³ Xtiooznu, ni najc Xtiooz toxtadgoldoonu Abram, toxtadgoldoonu Isaac, näjza toxtadgoldoonu Jacob, lagajc Diosga abadeed yäl'rnibee loj Xi'nni Jesús. Niluxh la'tu bateedtuni ladzñaa reguxhtis. Che rlanj Pila't ni rnibee nus'laa Jesucrist, ditu nicäjb niriini, alga guniyajtuni nez loj Pila't. ¹⁴ Niluxh la'tu baro'ntu Xi'n Dxan xten Dios nani rujñ ganax dzunsa'c. Alga gunabtu birii te niguii nani bagu't bejn. ¹⁵ Jesucrist rudeed yäl'ñabajn, luxh la'tu gunabtu bacuaareni Jesucrist lo cruiz. Gulässac Dios Jesucrist lo rebengut. Bahuiloonu nabajn Jesucrist, najcnu testiigw gubansac Jesucrist lo rebengut. ¹⁶ Cahuiitu loj niguiire nani gucxhuu ni'ni, luxh rumbeetuni. Xcäl'rnibee Jesucrist basiajc niguiire, sa'csi huililajzñi. Sa'csi huililajznu xtidx Jesucrist, ni'c biajcni te najcni si'cni rhuiituni ñaj.

¹⁷ 'Rexpejn Israel, narä nanä di'tu niacbee, diza rexcuxhtistu niacbee laa Xindxan xten Dios ni bacuaatu lo cruiz. ¹⁸ Scree gujc te guzojb xtidx Dios ni cuaj lo guijtz agujc xchero. Diidxre bacuaa reniguii ni gunii xtidx Dios, Crist xten Dios sidejd trabajwduxh. ¹⁹ Ni'cni col'siechajztu, col'guibi' loj Dios te guibicaj xtojltu. Dxejc susiälyuj Dios lastootu, sujñni gac nacoob guira'ti, si'cni bia'n diidx gacni. ²⁰ Lojtu suxhalza Dios Jesucrist nani rnibee, nani aguleni galooli. ²¹ Naj nungäj'l jia'n Jesucrist xhaguibaa dxejli guscoob Dios guiralii recos si'cni bia'n diidx gac, si'cni gunii Dios lo reniguii nani gunii xtiidxni lo retoxtadgoldootu agujc xchero. ²² Scree gunii to Moisés lo retoxtadgoldoonu, räjpni: "Xtadnu Dios suxhal te niguii sa' narä nani cueni lo resa'tu. Siniini xtidx Dios. Col'gusobdiajg guiralii diidx nani guiniini lojtu. ²³ Renani di gusoob rextiidxni, sinitlojrene, direni gac rexpejn Dios."

²⁴ Räjpza Pedr:

—Sigajca agunii guiralii reniguii nani gunii xtidx Dios. Si'c agunixgaa to Samuel, näjza guiraa reniguii ni siädñajni, xcuent recos ni cayajc neñ redx-ejre. ²⁵ La'tu najc xajg reniguii ni gunii xtidx Dios. La'tu biannäjtu diidx nani gunii Dios loj retoxtadgoldoonu. Bia'n diidx, räjp Dios loj toxtadgoldoonu Abram: "Jiädjiajl te xajglu ni gupalazduxh reben guedxliuj, sa'csi sus'laanireni lo dojl." ²⁶ Dxejcti ganiddoo lojtu baxhal Dios Jesucrist te guibaa lajztu che gusiejch lajztu, te na'cru guntu dojl —räjp Pedr.

¹ La¹ ni caniireni lo rebejn, ro'c bidzujn rebixhojz xten Israel nájza nani rnibee lo resoldaad xten guidoro nájza resaduceos. ² Bidxe'chduxhrene sa'csi cagulijdxrene rebejn, cayájpreni:

—Sibansac rebejn lo rebengut sa'csi gubansac Jesucrist lo rebengut.

³ Gunaaz reguxhtisreni, biáureni sa'csi agudxej luxh abiáu jusgaad. Neñ latzguib barareni yáäl. ⁴ Xhidajl reni biejn diaj xtiidxreni huililajz xtidx Dios. Si'cti gaii mil niguii huililajz xtidx Dios.

⁵ Che bara yáäl, bachaag sa' guiraa rebengool, renani rnibee guedx Jerusalén, nájza rebejn ni ruluui leii, ⁶ nájza Anás ni rnibee guiraa rebixhojz, nájza xpagojzni ni laa Caifás, nájza Juan, nájza Alejandro, nájza guiraa reniguii ni najc sa' rebixhozro ni rnibee. ⁷ Gunibeereni biáäd Pedr nájza Juan gusuj galáiiireni te gunabdiidxreni lojreni:

—¿Chu xcálrnibee rajptu? ¿Chu laj basá'ttu te basiajctu niguiire?

⁸ Dxejcti sa'csi cayu Pedr diidx ni canii Sprit Dyan xten Dios neñ lastooni, rájpi lojreni:

—Canía lo guejbtu, reguxhtis nájza rebengool xten rexpejn Israel, ⁹ palga canabdiidxtu xhicuent gucnájnu niguii nani gucxhuu ni'ni, palga canabdiidxtu xho basiajctnu niguiiga, ¹⁰ gusule'nu xcuent dee te gacbeetu te gacbeeza guiraa rexpejn Israel. Xtidx Jesucrist najc yálrnibeduxh. Diidxga abasiajc ni' niguiire, xhet rajcdini suga'ni nez lojtu. La'tu abacuaatu Jesucrist lo crujz, niluxh Dios gulásni lo rebengut. ¹¹ Di'tu ninälajz xtidx Jesucrist. Laani najc si'c te guij nani rbäcajtú che runcheetu te yu'. Per Dios abejn najc Jesucrist si'c guij nani maazru nacsac, nani guyu' squiin xte yu'. ¹² Xtebtis Jesucrist ruslaa bejn lo dojl, ruti stee bejn lo guedxliuj nani baxhal Dios te guslaani bejn lo dojl —si'c rájp Pedr.

¹³ Che biejn diajreni xtidx Pedr, bidxelojreni sa'csi di Pedr nájza Juan guidxejb, dizareni guitujy. Dxejcti rájp rebixhojz ni sajcrú lo sa'reni:

—Direni ganduxh guijtjz, bejntisreni.

Dxejcti gucbeereni gusanäj redee Jesucrist, lojni bisieedreni. ¹⁴ Bahuiiza rebixhojz lo niguii ni abiajc ni'ni, suganájni guiro'preni. Ro'cti xhetru gujcdi gunii rebixhojz sa'csi laaca bejnreni. ¹⁵ Dxejcti gunibee rebixhojz birii guidxojnreni telaad te bij rebixhojz diidx ensilaareni. ¹⁶ Rájpreni lo sa'reni:

—¿Xhi jiennáanu reniguiire? Guiraa reben Jerusalén anaj xcuent dzunroduxhre ni cayujnreni. Digacdi gucuatzlaaznuni. ¹⁷ Per te di guire'ch xtidx Jesucrist ste'ca guejdx, do'o gulijdxnu guidxojnreni te na'c guiniirureni xtidx Jesucrist ste'ca guejdx.

¹⁸ Huixisac rebixhojzreni. Dxejcti rájpreni lojreni:

—Na'c guluirutu xtidx Jesucrist, na'cru guiniitu xtiidxni.

¹⁹ Dxejc gunii Pedr nájza Juan, rájpreni lojreni:

—¿Colguinii loonu chu xtiidx sajcrú guicuaadiaagnu? ¿Xtiidx la'tu, o xtiidx Dios? ²⁰ Digacdi gusáunu ro'nu. Nanabpac gusule'nu diidx xcuent recos nani abahuiinu nájza rediidx ni abiejn diajgnu.

²¹ Balidxsac rebixhojzreni te na'cru guiniireni xtidx Jesucrist. Dxejc baslaa rebixhojz guiro'preni, sa'csi xhetru niajcdi niujnreni lo Pedr nájza Juan, sa'csi canii rebejn bejnreni te dzunsa'c. Xhidajl rebejn gulá'pza xpala'n Dios sa'csi bahuiireni xhini'c gujc ro'c. ²² Sa'csi niguii ni basiajcreni xcuent yálmilagwr agudejdni tiuu iijz.

Guredx-gunab rexpejn Jesucrist lo Dios

²³ Che baslaa rebixhojz guiro'preni, gubi'reni lo sa'reni ni najc rexpejn Jesucrist. Bijreni diidx guiraa ni gunii reguxhtis xten rebixhojz najza rebengool lojreni. ²⁴ Che biejn diajg rexpejn Jesucrist xtiidxreni, tejtis xhigab bejnreni guredx-gunabreni lo Dios, räjpreni:

—Xtadnu Dios, nani benchee xhaguibaa najza guedxliuj najza nisdoo najza guira'ti ni yu' lojreni, nenreni, ²⁵ nani bejn basoob toDavid xtidx Sprit Dyan te bacuaani xtiidxlu, räjpmi:

¿Xhicuent guyuduxh reben guedxliuj yärsia'?

¿Xhicuent bejn rexpejn Israel xhigab ni xhet sajcdi?

²⁶ Bidxagsa' re'ei lo guedxliuj najza reguxhtis xten reguejdx te gudxojnreni xtzun Dios najza xten Dad Crist nani baxhal Dios, si'c gunii toDavid.

²⁷ Aguzojb diidxre, sa'csi lo guejdxre bidxagsa' Herodes najza Poncio Pila't najza rexpejn Israel najza rebenzijt nani di gac xpejn Israel. Bidxechnäjreni Xi'nlu nani najc Crist ni baxhallu. ²⁸ Naj abejnreni dzunguidx si'cni galooli guniilu gac. ²⁹ Naj Guejblu Xtiosnu, bahuii xho cagusacsireni nuure, gucnäj nuure te gutiplaaznu, te na'c guidxeebnu guiniinu xtiidxlu, sa'csi najcnu rexpejnlu. ³⁰ Baniidx xcälrnibeelu loonu te guisajcnu rebejn, te jienzanu redzunro, remilajgwr con xcälrnibee Xi'ndxanlu Jesucrist.

³¹ Che gulujx gurejdxreni lo Dios, gusloj canibsejz yu' cadro tre'reni, cayac si'c te xu. Dxejcti biääd Sprit Dyan xten Dios basutijpruni lastooreni. Dxejc dirureni nidxejb guniireni xtidx Dios.

Rudeedreni xhixtenreni lo sa'reni

³² Guiraa renani huililajz xtidx Dios, tejsi xhigab bejnreni. Rut chu tejdireni bejn guinibexteb xhixtenni: bachaagreni sa' rehxixtenreni te xca' guiraareni nani rquiinreni. ³³ Gucnäj Dios reapost, gusutzu'tzreni bijreni diidx bahuilojreni loj Jesucrist che gubansacni lo rebengut. Gucnäj Dios guiraa rexpejn Jesucrist, luxh gopduxh reben guejdx respe'treni. ³⁴ Ni'cla tejreni di niääd xhixtenni sa'csi renani gojp xyujni, rolijzni, bato'renini, dxejcti biädnäreni xcuentni, ³⁵ badeedreni meelga lo reapost. Dxejcti gudis reapost meelga lo guiraa renani rquiinni. ³⁶ Guyu' te niguii ni laa José. Lajdxni najc Chipre, ni re' lo nisdoo. Najcni sa' rexfamil levita. Reapost gulälajni Bernabé (ni säloj xtiidxreni bejn ni rbecdxi lajz sa'ni). ³⁷ Scree gulälajrenini sa'csi bato'ni te la' yuj xtenni, dxejcti badeedni meel ni cua'ni lo reapost.

5

Ananías naj chäälni rujn dojl

¹ Guyu' stee niguii ni laa Ananías. Chäälni laa Safira. Bato'reni te la' yuj. ² Niguiire biannäjni gala' meel, dxejc sgala' meelga badeedni lo reapost si'c guiraa xcuent yujga luxh chäälni nanchee xhi cayujjni. ³ Dxejcti räjpmi Pedr lojni:

—Ananías, ¿xhicuent rusooblu xtidx Satanás ni rnibee lo rebendxab, ä? ¿Xhicuent rlaizlu gusgueelu Sprit Dyan xten Dios? Biannäjlu gaii meel ni cua'lu che bato'lu te la' yuj. ⁴ Che gajdlu guto' yujga, xtenluni. Che bato'lu yujga, ¿la xhet xtendilu meel ni cua'lu? ¿Xhicuent bejnlu xhigab nen lastoolu gunlu dee? Loj Dios guniilu didx-xhii, xhet loodinu.

⁵ Che biejn diajg Ananías xtidx Pedr, biajbni lo yuj, gujtni. Bidxebduxh rebejn che biejn diajgreni xhi gusajcni. ⁶ Sas gubig gaii bi'n batejbreni Ananías nen lajd. Dxejcti sanärenini huicua'tzrenini nen baa.

⁷ Pet agujc chon or gujtni chela bidzujn cháäl Ananías. Dini gan agujt cháälni. ⁸ Räj p Pedr lojni:

—Gunii, ¿la bato'tu xyujtu si'cni naj cháällu huijni, á?

Räj p Safira lojni:

—O'n, si'c huijni.

⁹ Dxejcti räj p Pedr lojni:

—¿Xhicuent bejnlu tejsi xhigabguijdx con cháällu? ¿Xhicuent rlanjtu gusueetu Sprit Dxan xten Dios? Ro lá' siáad renani huicua'tz cháällu. Naj nájza luj chacua'tzreni nen baa.

¹⁰ Si'tcis biajb Safira, gutgajczani. Dxejcti bidzujn rebi'n, bahuiireni agujtni. Dxejcti guläsrenini, biriireni huicuatgzajcneni cuä' baa cadre biga'tz cháälni. ¹¹ Bidxebduxh guiraa rexpejn Jesucrist, nájza guiraa rebejn nani biejn diajgni recosre.

Bejn reapost xhidajl redzunro, remilagwr

¹² Xhidajl redzunro, remilagwr bejn reapost nez loj rebenguejdx. Nadxaag sa' rexpejn Jesucrist, caguchaagreni diidx nen cordoor ni laa Salomón.

¹³ Guyu' xhidajl bejn ni di nuchaag lo rexpejn Jesucrist sa'csi bidxebreni guchaagreni lojreni. Rebenguejdxga guläpduxhneni xpala'n rexpejn Jesucrist.

¹⁴ Nen redxreja xhidalduxh rebejn huililajz xtidx Jesucrist, niguii sigajc gunaa. ¹⁵ Dxejcti gulääreni lo nezuyj rebejn nani cayacxhuu. Siädnä rebejn benracxhuu naga' lo da', te gaxäjsi ted xpala Pedr yejcreni che ted Pedr ro'c, te si'c jiajcreni. ¹⁶ Guedx Jerusalén bidzujn xhidajl rebejn ni siáad ste'ca guejdx. Biädnäreni rebejn ni cayacxhuu nájza balti bejn ni yu' benxdab nen lastooreni. Con xcälrnibee Jesucrist basiajc reapost reben racxhuu, gulääzareni rebenxdab nen lastoo balti bejn.

Gudejd reapost trabajw

¹⁷ Dxejcti bidxechlajz bixhojz ni rnibee, nájza reniguii ni laa saducee, sa'csi calä'p rebenguejdx xpala'n reapost sa'csi basiajcreni reben racxhuu.

¹⁸ Gunaazreni reapost. Basäurenini nen latzguiib. ¹⁹ Niluxh yäälga, biáad te angl xten Dios, baxhalni ro' latzguiibga. Dxejcti gulääni reapost nen latzguiib. Räj pni lojreni:

²⁰ —Colchäj guidoro. Ro'c colguinii lo rebejn xho gac guibanäjreni Dios par tejpas.

²¹ Che biejn diajgreni si'c, rsildooru biu'reni nen guidoro, ro'c baluiireni xtidx Dios lo rebejn.

Dxejc bixhojz nani rnibee, nájza rebengool, bachagsa'reni gurejdxreni guiraa reguxhtis xten guidoo, nájza guiraa reguxhtis xten rexpejn Israel. Dxejcti gunibeereni jiädnä reguixhajg reapost nani biäu nen ladtguiib. ²² Che bidzujn reguixhajg latzguiib, bahuii reguixhajg nen latzguiibga, niluxh rut yu'di nen latzguiib. Che gubi'reni biädnäreni diidx, räj pni loj reguxhtis:

²³ —Che bidzujnu latzguiib, niäudzu'tz ro' latzguiib luxh resoldaad ni cayajp ro' latzguiib suga' guiro'p laad. Che baxhalnu ro' latzguiib, rut yu'di nen latzguiib.

²⁴ Che biejn diajg bixhojz ni rnibee, nájza capitán nani rnibee resoldaad xten guidoro, nájza rebixhojz, ben tio'p lajzreni, räj p lo sa'reni:

—¿Xhini'c gujc? ¿Xhoni gac naj? —räj pni.

²⁵ Dxejcti bidzujn te niguii, räjpni lojreni:

—Reniguii ni basäutu nen latzguuib, areni suga' nen guidoro, luxh cagului-ireni rebejn —räjpni.

²⁶ Dxejcti sanä capitán xten resoldaad rexcuxhtis guidoro te biädnäreni reapost, luxh direni nusacsí reapost sa'csi rdxejbreni nucuaareni guij yejcreni.

²⁷ Che bidzupnäreni reapost, räjpreni suureni nez loj reguxhtis xten Israel, sas gunii bixhojz ni rnibee, ²⁸ räjpni loj reapost:

—¿Et agunibeenu lojtu na'cru guiniitu xtidx Jesucrist? Xhoxh naj cagutie'chtu rediidxga lo guiraa rebejn nen guedx Jerusalén. La'tu rlanjtu caaquijtu nuure bagu'tnu Jesucrist.

²⁹ Dxejc räjp Pedr näjza reapost lojreni:

—Nanabpac gusoobnu xtidx Dios, lacuaa gusoobnu xtidx bejn. ³⁰ Bagu'ttu Jesucrist che bacuaatuni lo cruzj. Niluxh Xtios xtagoldoonu guläsni lo rebengut. ³¹ Naj agule'c Diosni xladbeeni cadro rnibeeni, abadeedza Dios yälrnibee loj Jesucrist te guslaani nuure, te si'c rlanjni guibicaj xtoj l guiraa rexpejn Israel nani gusiechlajzreni. ³² Bahuiloonu xhi bejn Dios. Ni'c cagusule'nu. Nadoncheenu Sprit Dxan xten Dios cayacnäj nuure te gusule'nu rediidxre. Badeed Dios Sprit Dxan xtenni lo guiraa renani susoob xtiidxni.

³³ Che biejn diajg reguxhtis rediidxga, bidxechduxhrenei, rlanjzreni nugu'treni reapost.

³⁴ Dxejcti huisulii te niguii ni laa Gamaliel, nani najc te farisee nani ruluii leii xten Israel, rebejn rapduxh respe't dade'ga. Gunibee Gamaliel guirii reapost nen yu'ga.

³⁵ Dxejcti räjp Gamaliel lo rebixhojz:

—Guejbtu rexpejn Israel, colyensa'c xhigab xhini'c rlanjtu gunnäjtu reniguii-ire. ³⁶ Colzaa lajztu gajd gac xchej guyu' tej ni laa Teudas, räjpni rnibeduxhni. Dxejc huinajl tajp gayuu bejn. Che bagu'trenini, bire'ch guiraa rexpejnni, xhetru bejndireni. ³⁷ Nen ijz ni guyu' cens, biriiza Judas ni siäd Galilee. Dxejc gurejdxni xhidajl bejn ni huinajlni. Bagu'tza bejn, dxejcti bire'chza guiraa reni huinajlni. ³⁸ Naj rniä, colguibicaj, colgusaan reniguii-ire, rexpejn Jesús. Palga guejbcareni cayujnreni dzuunre, xtebcani sinitlojni. ³⁹ Palga xtzuum Dios ni cayujnreni, digacdi guscuaäznu dzuunga, sa'csi guidilnu guidxe'ch Gueb Dios loonu.

⁴⁰ Bichagljaz rebixhojz xtiidx Gamaliel. Gurejdxreni reapost, dxejcti gudijnreni reapost, gunibeereni loj reapost na'cru guiniireni xtidx Jesús. Dxejc baslaarenini. ⁴¹ Biriitireni nez loj rebixhojz. Cabaduxh lajzreni sa'csi gujc gudejdreni trabajw xcuent Jesucrist. ⁴² Guixe-guixee laltis baluiireni xtidx Jesucrist nen guidoro näjza rolizj bejn. Cagusule'reni diidx lo rexpen Israel:

—Jesús najc Crist nani cabääztu jiäd.

6

Gulereni reniguii ni gudeed yäxtiil lo rexpejn Jesucrist

¹ Nen redxejga, xhidallo gujc rexpejn Jesucrist. Niluxh gusloj camojm rexpejn Jesucrist nani rnii didx griegw. Räjpreni:

—Xhet laadi cayujn rebejn ni rnii didx hebreo. Rebiuud nani rnii didx hebreo rca'ru loj rexpuiudnu. Rebiuud ni rnii didx hebreo rca'ru xhi gaureni che rguisreni xhi gau rebiuud guixe-guixee.

² Dxejcti batie' guitzubitio'p reapost guiraa rexpejn Jesucrist, räjpreni lo guiraareni:

—Et laadi guisaannu guluiinu xtidx Dios te quisnu xhi gau rebiuud. ³ Ni'c nanab cuetu lo resa'tu gajtz niguii nani najntu najc bensa'c, nani rbäjz Sprit Dxan xten Dios neñ lastooreni, nani yu' xcäriejnreni. Reniguiire quis xhi gaureni. ⁴ Te si'c sajc chanuutis guiniabnu lo Dios, guiluiizanu xtidx Dios lo rebejn.

⁵ Guiralii rebejnğa bidxagljazreni diidxga. Dxejcti gulereni Esteban, te niguii ni rililajzpac xtidx Dios, rbäjzza Sprit Dxan xten Dios neñ lastooni. Gulezareni Felipe, Prócoro, Nicanor, Timón, Parmenas; gulezareni Nicolás nani siädä guedx Antioquia. Nicolás najc te proselite, nalajznu, dini gac xpejn Israel, per basoobni xleii toMoisés che gajdni chalilajz xtidx Jesucrist. ⁶ Sas biädnä rexpejn Jesús guigajtz niguiiga lo reapost. Dxejcti guredx-gunab reapost lo Dios xcuent reniguiiga, batzuubreni ñaareni yejc reniguiiga si'c te seen abiu'reni lo xtzunreni.

⁷ Birechduxh xtidx Dios. Xhidajl beñ Jerusalén huililajz xtidx Dios, näjza xhidajl bixhojz.

Gunaazreni Esteban sanärenini lo rebixhojz nani rnibee

⁸ Gucnäduxh Dios Esteban, bejnini redzunro, remilagwr nez lo rebejn. ⁹ Dxejc reben guidoo ni laa Libertados gusloj cadilnä Esteban. Lojnreni nadxaag beñ Cirene, näjza beñ Alejandria, näjza gaii beñ Cilicia, näjza sgaii bejn ni siädä reguedx Asia. ¹⁰ Reniguiire di niajcdi nuzejcreni diidx lo Esteban, sa'csi nasinduxhni, luxh cayacnä Sprit Dxan xten Diosni. ¹¹ Dxejcti baquilreni sgaii niguii ni di gac xpejn Jesús, te räjpreni:

—Biejn diaagnu caniyaj Esteban toMoisés näjza Dios.

¹² Scree gujc bache'chreni rebejn näjza rebejn ni ruluii leii näjza rebengool. Dxejcti bachagsa'reni, gunaazreni Esteban. Huinärenini lo reguxhtis xten Israel. ¹³ Dxejcti biädnäreni reniguii nani baquilreni te guniireni didx-xhii. Räjp reniguiire:

—Entis rniyaj Esteban leii xten toMoisés näjza guidodxanre. ¹⁴ Abiejnza diaagnu gunii Esteban: “Jesús nazareno sutzujl guidoro, suchaazani leii nani baniidx toMoisés loonu.”

¹⁵ Dxejcti guiraa rebejn ni sobga' ro'c bahuiireni lo Esteban, bahuiireni rujn lojni si'c rujn loj te angl xten Dios.

7

Diidx ni basule' Esteban lo rebixhojz

¹ Dxejcti räjp te bixhojz nani rnibee lo Esteban:

—¿La gulii si'c guniilu, ä?

² Räjp Esteban lojnreni:

—Colgucuaadijg rextidxä, guejbtu dad, näjza resa'ä. Xtioznu ni sacduxh, ni rnibee, baluiloj lo toxtadgoldoonu Abram che guläjzni Mesopotamia, che gajdni chaläjz neñ guedx Harán. ³ Räjp Dios loj toAbram: “Birii lajdxtu, basa'n guiraa resa'lu. Huij cadrotis guluiä lojlu” ⁴ —räjp Esteban—. Dxejcti birii toAbram lajdx reCaldeos. Huiläjzni guedx Harán. Che gujt xtdäni, biädnä Dios toAbram nez ree, cadre rbääznu ñaj. ⁵ Di Dios nuzalajz nicla tla' yuj cadre suu te ni' toAbram. Niluxh räjp Dios sudeedni yujga lo rexaj toAbram, jiannäjreni yujga che guet toAbram. Niluxh nicla gajd xi'n toAbram chu dxejc. ⁶ Stee huält räjp Dios lo toAbram: “Rexi'nlu, rexagdoolu, siläjzreni si'c benzijt. Ladxbajn gacreni mos, ro'c susacsí bejnreni si'cti tajp gayuu ijz.”

⁷ Räjp Dios: “Narä sunä castiigw rebejn ni gusacsíreni che najcreni mos. Narä

cuää rexagdoolu ro'c, te ree guzuxhijbreni loä nen guejdxre”, si'c räjp Dios⁸ —räjpza Esteban—. Dxejcti si'c bia'n Dios diidx con toAbram, gunibee Dios gutiuug Abram lagajc laani, te chuni bee; ni'c najc te seen xten diidx ni bia'n Dios con Abram. Guyu' te xi'n toAbram, ni laa Isaac. Che guyu'ni xhujñ dxej, basälza toAbram beegani si'c te seenza. Sigajcza bennäj Isaac x'i'nni Jacoob. Sigajcza bennäj Jacoob guitzubitio'p rexi'nni nani najc rexpengdoo xpen Israel.

⁹ Räjp Esteban:

—Guitzubiteb rexi'n Jacoob guyu' te yälrudxojn lo bejtzreni José. Dxej batoreni José lo te beñ Egipto. Dxejc Dios goptzu'tz José.¹⁰ Che gudejd José trabajwduxh, gucnäj Diosni. Badeed Dios yälñasinduxh lojni. Bejn Dios bichaglajz reii Faraón José. Badeed reii Faraón gujçni gubernadoor xten Egipto. Gunibeeza José guira'ti xhixten reiiga.

¹¹ Räjpza Esteban:

—Che bidzujñ dxej gujç te gubijn, guiraa nen reguedx Egipto näjza guiraa nen reguedx Canaán, trabajwduxh cadejd guiraa rebejn. Xhet guyu'di xhi niajw retoxtadgoldoonu.¹² Che biejn diajç xtadgoldoonu Jacoob yu' xhi gaureni nen reguejdx xten Egipto, ro'c baxhałni rexi'nni, bica'reni xhi gaureni te huält.¹³ Che huijreni stehuält, dxejc bazäbdiiidx José lojreni laani najc bejtzreni. Biembeeza Faraón resa' José.¹⁴ Dxejcti baxhał José diidx jiääd xtadni Jacoob, näjza guiraa resa'ni, cuääzreni Egipto. Najc rebejnga si'cti gayonbitzubigaii bejn.¹⁵ Si'c gujç te huij Jacob guedx Egipto. Ro'c guläjzni, ro'c gujtni. Ro'c gujtz retoxtadgoldoonu.¹⁶ Dxejcti huiinäreni rextzujtreni loj Siquem te biga'tzsacreni nen baa nani gusii toxtadgolnu Abram lo rexi'n Hamor nen guedx Siquem.

¹⁷ Räjp Esteban:

—Che bidzungajxh dxej, si'c diidx ni bia'n Dios con toxtadgoldoonu Abram, bidalduxh rexpengdoo nen guedx Egipto.¹⁸ Dxejcti guyu' te xreii Egipto ni di gan guiraa redzunsac nani bejn toxtadgoldoonu José.¹⁹ Reiiga basgueeni rexpengdoo, basacsínireni, trabajwduxh bateedni rexpengdoo. Gunibee reiiga basälreni guiraa rebäz niguii te di laareni, te guetreni.²⁰ Nen redxejga, gojl Moisés. Che gujç Moisés bäz, te bäz daani, saru rujñ lojni, huiñälajz Diosni. Gułaaani choñ bäii rolizjni.²¹ Dxejc huisälrenini, te guzobj xtidx Faraón. Dxejc lagajc xindxa'p Faraón bidxälni Moisés, cua'nini baslaanini si'c xi'nni.²² Bisieed Moisés guiraa ni najñ reben Egipto. Gunisa'cni diidx, bensa'cni dzuun.

²³ Räjp Esteban:

—Che guyu'ni tiuu ijj, banaj lajzni resa'ni ni najc xpejn Israel, huijni cadro rbäjzreni.²⁴ Dxejc bahuiini casacsí te beñ Egipto te beñ sa'ni. Sas bagu'tni beñ Egipto.²⁵ Bejn Moisés xhigab pet sacbee resa'ni cayacnäjä Diosni te guslaani rexpejn. Luxh di resa'ni niacbee si'c.²⁶ Che bara yääl, bahuii Moisés cadilñäj sa'reni tiop xpen Israel. Räjp Moisés lojreni: “Cołcuedxi, Dad. Lagajc sa'tu cadilñäjtu. ¿Xhicuent rdijltu?” si'c gunii Moisés, te na'cru tilñäj sa'reni.²⁷ Dxejcti nani cayunniälajzga, balanaani Moisés, räjpni loj Moisés: “¿Chu baniidx yälñibee lojlu te jiädñibeelu nuure?”²⁸ ¿La rlaizlu ju'tlu narä si'c bagu'tlu beñ Egipto naii?” —räjpni—. ²⁹ Che biejn diajç Moisés rediidxga, baxuñni, huijni zijt. Huiläzsijcni guedx Madián. Ro'c bachñaani, guyu' tiop xingaaani.

³⁰ Räjpza Esteban:

—Che gudejd tiuu ijz, bidzujñ te dxej cansajni nez lo reyubijdz ni naga' guideb gabi dajn ni laa Sinaí. Ro'c bahuiini te bajl neñ te yaguejch. Neñ bajlga baluiloj angl xten Dios lo Moisés. ³¹ Bidxeloduxh Moisés che bahuiini si'c. Dxejcti gubigni te rlazjni nuhuisa'cni yajgga. Dxejch biejn diajgni gunii Dios, rájpi lo Moisés: ³² “Nará nacá Xtiós rextadgoldoolu, nará nacá Dios xten Abram, nájza xten Isaac nájza xten Jacoboob.” Dxejcti gucsez Moisés sa'csi bidxebduxhni, diruni nuhuisa'c yajgga. ³³ Dxejcti rájpi Dios lojni: “Gulää xcura'chlu. Yuj cadro suga'lu najc dxan, sa'csi nará yu'á ree. ³⁴ Abahuiä xho cagusa'csi reben Egipto rexpeneä. Abiejn diagä xho roonreni. Naj abiälä te guslää rexpeneä. Gudaa naj, suxhaälälu chäälu Egipto.”

³⁵ Rájpi Esteban:

—Dios badeed yälrmibee lo Moisés nani baze' rextadgoldoonu che rájpreni: “¿Chu baniidx yälrmibee lojlu te jiädniibeelu nuure?” Baxhał Dios Moisés te guinibeeni xpejñ Dios, gucnájza Dios Moisés baslääni rexpeljñi neñ naciõñ Egipto si'c gunii angl xten Dios che baluilojni lo Moisés neñ yaguejchga. ³⁶ Gulää Moisés rebejnnga. Ganiddoo bejn Moisés redzunro, yälrdxeloj neñ naciõñ Egipto nájza ro' nisdoo ni laa nido xniaa. Tiuu ijz cuansaj rextadgoldoonu neñ yubijdzroga, ro'c bejnza Moisés redzunro, remilagwr. ³⁷ Lagajc Moisésre gunii xtidx Dios che rájpi loj rexpejñ Israel: “Sibe Dios lo rexajgtu te niguii ni najc sigac nará. Siniini xtidx Dios. Colgusoob xtiidxni.” ³⁸ Lagajc Moisés guyunáj rebejñ neñ yubidzro. Xangl Dios gunináj Moisés neñ dajn xten Sinaí. Dxejcti badeed Moisés rediidx ni gunibee Dios lo rextadgoldoonu. Laareni basa'nreni diidxga loonu.

³⁹ Rájpi Esteban:

—Niluxh di rextadgoldoonu nusoob rextidx Moisés. Di rlazjreni guinibee Moisésreni. Canaduxhlaizreni naciõñ Egipto. ⁴⁰ Che sää Moisés dajn Sinaí, rájpreni loj Aarõn bejtz Moisés: “Benchee banájbc gac xtiooznu, te nidreni loonu, te chanajlnuren. Chu gan con Moisésre ni baluui nezyuj che gulääni nuure guejdx reEgipto.” ⁴¹ Sas bencheereni te banájbc ni najc si'c te gonbää. Dxejcti bagu'treni guidxaa te badeereni rejnga lo banájbc te bazuxhijbreni lojni. Bibalazduxhneni sa'csi abencheereni banájbcga. ⁴² Dxejcti gubicaj Dios loj rexpejñ Israel sa'csi bejnreni si'c. Basaan Dios gojñreni gubijdx, nájza bäii, nájza rebal xhaguibaa. Gujçni si'cni caj lo guijtzi ni bejn reniguii nani bacuaa rextidx Dios. Rájpi Dios:

La'tu beñ Israel, cheni cuansajtu tiuu ijz nez lo reyubijdz,

¿la par nará bagu'ttu guidxaa, ä?

¿La loä baniidxtu xtejnreni, ä?

⁴³ Xho gacni si'c, rájpi Dios.

Cuansanájtu te yu' najcw guijd cadro chu te banájbc.

Nennga guyu' banájbc ni laa Moloc, nani najtu najc xtiootu.

Gojñzatu balbäze' xten xtiootu ni laa Remfán.

Redios ni bencheetistu reni'c gojñtu.

Ni'cni sibää la'tu ree guxhaälä la'tu stelaad guedx Babilonia.

⁴⁴ Guniiiru Esteban, rájpi lojreni:

—Neñ reyubijdz gojpi rextadgoldoonu te yu' najcwni guijd. Gujçni xquidooreni. Ro'c guninájreni Dios. Benchee rextadgoldoonu yu' najcw guijdgä si'cni guinibee Dios che baluuiini lo Moisés xhoni gacni. ⁴⁵ Che gujt Moisés, Josué guinibee lacuaa toMoisés, huináni rextadgoldoonu naciõñ Canaán. Batzujñreni yuro ni najcw guijd te náj ni'c huinäreni Canaán. Gulää Dios rebejñ ni gulájz neñ reguedx Canaán. Dxejcti bia'n rextadgoldoonu

neņ reguejdxga. Bazuxhijbreni lo Dios neņ yuguijd ni najc xquidooreni che gojlli xtiemp reii David. ⁴⁶ Huinälajz Dios David. Räjþ David lo Dios: “Rlazä gunä te guidoo par guejblu, Dios xten nuure, rexpejn Israel.” ⁴⁷ Dxejcti di Dios nusoob xtidx David. Alga Salomón, xi'n David, ni'c benchee xquidoro Dios. ⁴⁸ Naj di Dios guiquiin te yu' nani runchee bejn. Scree bacuaa te niguii nani gunii xtidx Dios. Räjþ Dios:

⁴⁹ Si'c najc te yagxhilsa'c cadro rnibee reii, si'c najc xhaguibaa cadro rbeä. Si'c te bancw cadro rsiuj ni' reii, si'c najc guedxliuj nani bencheä.

Dina guiquinä guncheetu te xyu'ä.

Dina guiquinä te lajt cadro gusilazä, räjþ Dios.

⁵⁰ ¿La et naädi benchee guiraa nani ruhuiitu?, räjþ Dios.

⁵¹ Räjþ Esteban lojreni:

—Te beņ nadduxh najctu. Ditu jiu xtidx Dios. Niäu lastootu, niäüza diajgtu. Di'tu chanälajz xtzuum Sprit Dxañ xten Dios, dizani cuääz neņ lastootu. Si'c bejn retoxtadgoldootu, si'cza rujntu. ⁵² Basacsí retoxtadgoldootu guiralii reniguii nani gunii xtidx Dios. Nicla tejni direni niu. Bagu't retoxtadgoldootu guiraa reniguii nani gunii siääd te niguidxan xten Dios. Naj abiääd niguidxanga, Jesucrist laani, luxh la'tu huinatuni lo guxhtis te gunibeetu gujtni. ⁵³ La'tu biannäjtu leii nani gunii reangl xten Dios loj Moisés, luxh la'tu ditu nuquadijg rediidxga.

Bagu'treni Esteban

⁵⁴ Che biejn diajgreni rextidx Esteban, bidxe'chduxhreni, rauya' läjireni sa'csi rdxe'chreni lo Esteban. ⁵⁵ Rbäjz Sprit Dxañ xten Dios neņ lastoo Esteban, ni'cni bahuitzu'tzni xhaguibaa, ro'c bahuiini yälrdimbichasejz xten Dios. Bahuiizani suga' Jesucrist xladbee Dios. ⁵⁶ Räjþ Esteban lojreni:

—Colhuilaa. Narä cahuiä xhaguibaa cadro yu' Dios, ruhuiäza loj Xi'n Dios nani gujc Niguii; ani suga' xladbee Dios.

⁵⁷ Guredxaduxhreni basäuzareni diajgreni. Dxejcti baxunreni bixa'treni yejc Esteban. ⁵⁸ Dxejc gudobyujrenini, gulääreni Esteban neņ guejdxga. Ro'c bacuaareni guij yejc Esteban. Che cacucuaareni guij yejcní, guläyarení xhajbreni; te niguii ni laa Saulo biannäj xhajbreni. ⁵⁹ Laļ ni cacucuaareni guij yejcní, gunii Esteban loj Jesucrist räjþni:

—Guejblu, Dad Jesucrist, cua' narä.

⁶⁰ Dxejcti biajb Esteban, bazuxhijbni, guredxa'ni räjþni:

—Dad Jesucrist, na'c gudzuublu dojre yejc rebejnre, na'c cacucuaquijlureni. Gulujxsi guniini si'c, gujtni.

8

Saulo basacsí rexpejn Jesucrist

¹ Rbaduxh lajz Saulo bagu'treni Esteban.

Lagajc dxejga gusloj gudejd rexpejn Jesucrist trabajwduxh neņ guedx Jerusalén. Dxejcti bire'ch rexpejn Jesucrist. Biunejzreni ro'c sääreni nez guiraa reguedx Judea näjza nez guiraa reguedx Samaria. Xtebtis reapost bia'n Jerusalén, direni nire'ch.

² Reniguii nani sanälajz Dios huicua'tz Esteban. Cayonduxhreni sa'csi riareni gujt Esteban. ³ Biäädza Saulo, guixe-guixee basacsíni rebejn nani huililajz xtidx Dios. Biu'ni rolizreni, gunaazni reniguii näjza regunaa te basäunireni neņ latzguuib.

Basule' rexpejn Jesucrist xtidx Dios nez región Samaria

⁴ Che bire'ch rebejn nani huililajz xtidx Dios, basule'reni xtidx Dios nez cadrotis sääreni. ⁵ Tej rebejnğa laa Felipe. Siini nez te guedx Samaria. Ro'c basule'ni xtidx Dios. Räjpmi:

—Jesús najc Crist nani cabäjztu jääd.

⁶ Ro'c bachagsa' rebejn bacuadiajgreni rextidx Felipe, bahuiizareni redzunro, remilagwr nani bejn Felipe. ⁷ Gaii bejn yu' bendxab neñ lastooreni. Che gunibee Felipe guirii rebendxab lastoo rebejnğa, guredxa' rebendxabga, dxejcti biriireni neñ lastoo rebejnğa. Yu'za xhidajl bejn nani digacdiru guiniib, yu'za reni rajc ni'reni, ñaareni. Con xcälrnibee Jesucrist basiajc Felipe guiraa rebejnğa. ⁸ Sa'csi gujc si'c, bibalazduxh guiraa rebejn neñ guejdxga.

⁹ Guyu' te niguii ni laa Simón neñ guejdxga. Bisieedni bejnmi xhidajl redzuun yälbidxaa, basgueeni rebenguejdxga. Bidxeloduxh rebenguejdx lojni. Räjpmi lo rebejn rutru chu stee bejn ni najc maazru benro lojni. ¹⁰ Luxh guiraa rebejn, rebiuux, rebengool, rebenrajp, rebenpooob bacuadiajgreni xtidx bidxaaga, räjpmi:

—Laani rajpmi yälrnibee xten Dios.

¹¹ Xchero basgueeni rebejn, bidxelojreni rextzunyaälbidxaani. Guiraa rebejn huililajz xtiidxni. ¹² Dxejcti baluii Felipe xcuent xcälrnibee Dios, näjza xcuent Jesucrist. Xhidajl rebenguejdxga huililajz rediidx nani gunii Felipe. Dxejcti birobnisreni, niguii näjza gunaa. ¹³ Nägajcza Simón huililajz rediidxga dxejc gurobniszani. Dxejc guyunäj Simón Felipe. Che bahuii Simón lo redzunro, remilagwr nani cayujn Felipe, bidxeloduxh Simón.

¹⁴ Che biejn diajg reapost ni yu' guedx Jerusalén huililajz reben Samaria xtidx Dios, baxhalreni Pedr näjza Juan ro'c. ¹⁵ Che bidzujn guiro'preni guejdxga, gunabreni lo Dios xcuent rebejn ni huililajzga te gudeed Dios Sprit Dxan xteni lojreni, ¹⁶ sa'csi gajd Sprit Dxan xten Dios jäädläjz neñ lastooreni. Che huililajzreni, gurobnistisreni te gucbee rebejn chuni'c najc rexpejn Jesucrist. ¹⁷ Dxejc batzuub Pedr näjza Juan ñaareni yejc tejga renani ahuililajz xtidx Dios, dxejc badeed Dios Sprit Dxan xteni biädläjzmi neñ lastooreni.

¹⁸ Che bahuii Simón biädläjz Sprit Dxan xten Dios lastoo rebejn ni batzuub reapost ñaani yejcreni, rläjz Simón nudeedni meel loj reapost, ¹⁹ räjpmi lojreni:

—Colguniidx yälrnibee loa te si'cza gudzubä ñaa yejc rebejn, te jiu' Sprit Dxan xten Dios neñ lastooreni.

²⁰ Dxejcti räjpmi Pedr lojni:

—¡Sunitloj xmeellu con luj! Xho gunlu xhigab siilu Sprit Dxan xten Dios nani rudedxlia' Dios. ²¹ Digacdi gunlu dzuun ni riennu, sa'csi xhet laadi najc lastoolu nez loj Dios; yu' dojl neñ lastoolu. ²² Basie'ch lajzlu, badzucaj rexhigab guijdx xtenlu. Guredx-gunab lo Dios, top susiäjläjz Dios xtojllu ni bejnlu neñ lastoolu. ²³ Naj narä nanä ruguilazduxhlu, luxh runduxhlu xhigabguijdx.

²⁴ Dxejcti räjpmi Simón lo guiro'preni:

—Colñab loj Dios xcuentä te na'c sacä si'cni caniiu.

²⁵ Che gulujxti bijreni diidx xcuent ni bahuilojreni bejn Jesucrist, che gulujx basule'reni xtidx Jesucrist loj reben Samaria, gubisacreni Jerusalén.

Felipe näjza te dade' ni siääd nación Etiópía

²⁶ Dxejcti biäd te xangl Dios, räjpmi lo Felipe:

—Huij lo nezyuj ni rii guedx Jerusalén, ni rij nez guedx Gaza. Nezyujga rdejd lo reyubijdz.

²⁷ Sã'ti Felipe. Che bidzujñni lo nezyujga, bidxaagni te dade' ni siãäd naciõn Etiopía. Najnci te eunuco, najczani xcuxhtis reina Candace. Laani rgucheeni guiraa xmeel reinaga. Biãäd dade'ga guedx Jerusalén te sagajñni Dios. ²⁸ Siãdbisacni lajdxni. Sobga'ni neñ te gare't saruduxh, cayolñi xtidx Isaías, nani bacuaa xtidx Dios agujc xchero. ²⁹ Dxejcti räjp angl xten Dios lo Felipe:

—Gubig cuã' gare'tga, guninäj dade'ga.

³⁰ Che gubig Felipe cuã' gare'tga, biejn diajgni cayol dade'ga rextidx Isaías. Dxejcti räjp Felipe lojni:

—¿La racbeelu ni caj lo guijtz nani cayollu, ä?

³¹ Dxejcti räjp dade'ga lojni:

—¿Xho gacbeäni palga rut gusule'dini loã?

Sas räjp dade'ga lo Felipe chã'pni neñ gare'tga.

³² Cadro cayol dade'ga neñ guijtz ni caj xtidx Dios rnii scree: Di xiil cuedxa' che rinã bejnñi cadro guetni; dxitis raa xiil che ruhuajrenini.

Si'c te xiil najc niguiire,

xhet rniidini mase rusacsíduxhrenini.

³³ Basacsíduxhrenini.

Reguxhtis ni niujñ yãlguxhtisni xhet laliidi bejnreni.

Xhet si'cti nunyãjl gunreni.

¿Xho guiniinu yu' xpejñni?

Ni abagu'trenini. Diruni guibajñ lo guedxliuj.

³⁴ Dxejcti gunabdiidx beñ Etiopía, räjpni lo Felipe:

—Gunilaa loã, chuni'c ruzã't niguii nani bacuaa reguijtzre, ¿la ruzã'tni lagajc laani o la ruzã'tni ste'ca bejn, ä?

³⁵ Gusloj basule' Felipe rediidx nani abil dade'ga. Dxejcti basule'ni rediidx xcuent Jesucrist. ³⁶ Lañ ni sääreni lo nezyuj, bidzujñreni te lajt cadro yu' nis. Dxejc räjp dade'ga lo Felipe:

—¡Bahuii, ree yu' nis! ¿Xhi rudxojn tiobnisã?

³⁷ Dxejc räjp Felipe lojni:

—Palga rililajzlu xtidx Dios neñ lastoolu, sajç tiobnislu.

Dxejc räjp dade'ga lo Felipe:

—Rililazã Jesús najc Crist Xi'n Dios.

³⁸ Dxejc gunibee dade'ga gusudxi gare't, sas biãjt guiro'preni, biu'reni neñ nis, ro'c batiobnis Felipe dade'ga. ³⁹ Che biriireni neñ nis, huinã Sprit Dxan xten Dios Felipe ste'ca lajt. Dxejc diru dade'ga nuhuii lo Felipe. Sã'ti dade'ga lajdxni, cabalazduxhni. ⁴⁰ Dxejcti chela gucbee Felipe abidzujñni guedx Azoto. Baluizani xtidx Dios neñ guiraa reguejdx che bidzujñlini guedx Cesarea.

9

Huililajz Saulo rextidx Jesucrist (Hch. 22:6-16; 26:12-18)

¹ Lałtis cagusacsí Saulo rexpejñ Jesucrist. Rlajzñi ju'tni guiraareni, ni'c huijn lo bixhojz nani rnibee, ² gunabni gac te guijtz chanãni lo reguidoo neñ guedx Damasco te palga guidxãlni reni najc xpejñ Jesucrist neñ reguidooga, niguii sigac gunaa, guliubnirenini, jiãdnãnirenini guedx Jerusalén te jiãurenini.

³ Lañ sasajni lo nezyuj, asiãddzungajxhni guedx Damasco, basaniya' te bal

xhaguibaa, basanijni guideb gabi cadro siädsaj Saulo. ⁴ Dxejc biajbni lo yuj, biejn diajgni te xse' bejn nani canii lojni:

—Saulo, Saulo, ¿xhicuent rusacsilu narä, näjza rexpeña?

⁵ Räjþ Saulo lojni:

—¿Chuluj Dad?

Räjþni lo Saulo:

—Narä nacä Jesucrist, nani cagusacsíduxhlu. Niluxh lagajc luj cadejdlu trabajw si'c rajc te gon ni rucuaní' yejc caru'ch.

⁶ Bidxebduxh Saulo, racsejsni räjþni:

—Dad, ¿xhini'c rlajzlu gunä?

Dxejc räjþ Jesús loj Saulo:

—Huistie, biu' guedx Damasco. Ro'c suluii te niguii xhini'c gunlu.

⁷ Rebejn ni siädnä Saulo sugadxireni, bidxejbreni sa'csi biejn diajgreni te xse' bejn, luxh rut lojdi bahuiireni. ⁸ Che huistie Saulo lo yuj, baxhalni lojni, niluxh di lojni jien. Dxejc gunaazreni naani, sanärenini guedx Damasco. ⁹ Ro'c guyu'ni choñ dxej, natiä'p balojni, dini niä', dizani niajw.

¹⁰ Guedx Damasco rbäjz te xpejn Jesucrist ni laa Ananías. Baluiloj Jesucrist loj Ananías lo te bacad, räjþ Jesucrist lojni:

—Ananías.

Dxejc räjþ Ananías lojni:

—Anaree Dad.

¹¹ Räjþ Jesucrist lojni:

—Huistie te chäálu lo nezyuj ni laa Ladbee cad rbäjz Judas. Ro'c guiniab-diidxlu con te niguii ni laa Saulo, bejn Tarso. Cabejdx, canabni loä naj. ¹² Lo bacad abahuiini siäd te niguii ni laa Ananías te gutzuubni naani yejcní te fiini stehuält.

¹³ Dxejcti räjþ Ananías lojni:

—Dad, abiejn diagä xho basacsí niguiiga rexpejnlu nen guedx Jerusalén.

¹⁴ Luxh rebixhojz ni rnibee abadeed guijtjz lojni te guiniaazni ree guiraa rebejn nani rbedx-rniab lojlu, chanänireni jäureni.

¹⁵ Dxejcti räjþ Jesucrist lojni:

—Huij, narä aguleäni te gunni xtizunä. Suluiini xtizunä loj rebenzijt nani digac xpeñ Israel, näjza loj reni rnibee renacion, näjza loj rexpejn Israel.

¹⁶ Narä suluiä lo Saulo trabajwduxh ni tedni te jäädnajni narä.

¹⁷ Dxejcti sää Ananías, bidzujñni ro yu' cadro rbäzlaa Saulo. Batzuubni naani yejc Saulo. Dxejcti räjþ Ananías loj Saulo:

—Betzä Saulo, Jesucrist ni rnibee, nani baluiloj lojlu lo nezyuj cheni siädldu, lagajc laani baxhalni narä te fiilu stehuält, te jäädläjzja Sprit Dzan xten Dios nen lastoolu.

¹⁸ Lagajc dxejc bitejb si'c xmelbäj l yec baloj Saulo, biacgajc balojni, bahuisa'cni stehuält. Dxejc huistieni, gurobnsigajcni. ¹⁹ Dxejc gudajwni, guc nadaanni stehuält. Xchej guyunäj Saulo rexpejn Jesucrist nen guedx Damasco.

Gusloj basule' Saulo xtiz Dios nen guedx Damasco

²⁰ Dxejcti gusloj basule' Saulo xtiz Dios nen reguidoo xten rexpejn Israel, räjþni:

—Jesucrist najc Xi'n Dios nani gujc Niguii.

²¹ Che biejn diajgreni xtizxni, bidxelorení, räjþ lo sa'reni:

—¿La xhet laadi niguiire ni rusäu rexpejn Jesucrist nen latzgüib guedx Jerusalén, ä? Lagajcza dee bidzujn ree te guliibni rexpejn Jesucrist te chanänireni guedx Jerusalén lo rebixhojz.

²² Dxejcti gusutzu'tz Saulo guniini xtidx Dios. Basacajnni rexpejn Israel nani rbäjz Damasco sa'csi basule'pacni Jesús najc Crist nani rnibee.

Baxun Saulo guedx Damasco

²³ Che gudejd xhidajl dxej, bachagsa' rexpejn Israel te nugu'treni Saulo. ²⁴ Dxejcti gucbee Saulo xhi xhigab bejnreni. Dxej, yääl cabäjzreni Saulo ro' guiraa renezyuj ni rdzujn guejdxga te ju'trenini. ²⁵ Dxejcti che gojl te yääl basäl rexpejn Jesucrist Saulo nen te dximro, basiäjtreni dxijmga nez ro' te padeer ni dejd gabi guejdxga. Basiäjtrenini nez dejtz padeerga, te si'c baxunni guejdxga.

Bidzujn Saulo guedx Jerusalén

²⁶ Che bidzujn Saulo guedx Jerusalén, rljazni nuchaagni loj reni rililajz xtidx Jesucrist, niluxh guiraaeni bidxejbrenini sa'csi direni gan ahuililajzni xtidx Dios. ²⁷ Dxejcti huinä Bernabéni lo reapost, bijni diidx xcuent Saulo. Räjþ Bernabé lojreni:

—Baluiloj Jesucrist lo Saulo loj nezyuj. Guninäþ Xtioznu Saulo loj nezyuj, ni'cni gusutzu'tz Saulo basule'ni xtidx Jesucrist guedx Damasco.

²⁸ Dxejc bia'n Saulo guedx Jerusalén, bidxaagni lo rexpejn Jesucrist. ²⁹ Dxejcti gusutzu'tz Saulo gusloj bijni xtidx Jesucrist lo rebejn. Dxejcti gudilnäþ Saulo rexpejn Israel nani rnii didx griegw. Laareni rdxech-duxhrenei, rljazreni nugu'treni Saulo sa'csi direni nichaglajz xtidx Jesucrist. ³⁰ Che gucbee rexpejn Jesucrist si'c, huinäreni Saulo guedx Cesarea, ro'c gulääreni Saulo, baxhalrenini guedx Tarso.

³¹ Dxejc guredxi lajz guiraa renani huililajz xtidx Dios nen reguedx Judea, nen reguedx Galilee, näjza nen reguedx Samaria, sa'csi diru Saulo nusacsí rexpejn Jesucrist, luxh guc xhidajlrureni. Basoobreni xtidx Jesucrist, bisieerdureni rextiidxni, gucnäjza Sprit Dxan xten Diosreni.

Biajc Eneas

³² Che gusloj sahuui Pedr guiraa renani huililajz xtidx Dios, huihuiizani rexpejn Jesucrist nani yu' guedx Lida. ³³ Ro'c bidxälni te niguii ni laa Eneas. Agujc xhujn iijz naga' niguiiga cayacxhuuni. Abixu'ñ tiejxhni, digacdiru guiliini.

³⁴ Dxejcti räjþ Pedr lo Eneas:

—Eneas, cagusiajc Jesucrist guejblu. Huistie, guläs xta'lu.

Lagajc dxejc biajcní, huistietini.

³⁵ Guiraa rebejn ni rbäjz guedx Lida, näjza reben ni rbäjz guedx Sarón, bahuiireni abiajc niguii ni cayacxhuu. Dxejc xhidajlreni nen reguejdxga huililajz xtidx Dios.

Gubanþac Dorcas

³⁶ Nen guedx Jope yu' te gunaa ni laa Tabita; rniizarenini Dorcas con xtidx griegw. Gunaaga huililajz xtidx Dios, rudeedzani xhi rquiin rebenþroob, najczani huenduxh loj chutis bejn. ³⁷ Gucxhuu gunaaga, dxejc gujtni. Che gulujx bahuajz rebejn togoalga, huitixhrenei nen te yu' ni najc jiaa yejc sa'ni. ³⁸ Sa'csi gajxh guedx Jope tre' guedx Lida, luxh biejn diajg rexpejn Jesucrist ro'c yu' Pedr, baxhalreni tiop dade' saxii Pedr. Räjþ redade'ga loj Pedr:

—Bejn huen salu chonnu Jope nanajga.

³⁹ Dxejc sanägajc Pedr redade'ga. Che bidzujñreni, huinäreni Pedr neñ yu' cadro naga' togunaaga. Ro'c cayonduxh guiraa regunabiuud, baluiireni lo Pedr guiraa rexhajbreni nani benchee Dorcas, ni badeed Dorcas lojreni che nabajñni. ⁴⁰ Dxejcti gunibee Pedr birii guirareni neñ yu'. Dxejc bazuxhijbni, guredx-gunabni loj Dios. Dxejc gubirèni bahuini loj togoolga, räjpni:

—Tabita, huistie.

Dxejcti baxhal gunaaga balojni; che bahuini loj Pedr, gurejni. ⁴¹ Dxejc gunaaz Pedr ñaani, basuliinini, dxejcti gurejdx Pedr regunabiuud nájza sgaii reni najc rexpejn Jesucrist. Baluiini gunaaga lojreni te bahuilojreni agubañsacni. ⁴² Gucbegajc rebeñ guedx Jope xhini'c gujc, dxejcti xhidajl rebejñga huililajz xtidx Jesucrist. ⁴³ Xchejza guyu' Pedr ro'c, guläjzni roliz dade' ni laa Simón, nani ruscoodz guijd.

10

Pedr con Cornel

¹ Guedx Cesarea guyu' te niguii ni laa Cornel. Rnibeeni te gayuu resol-daad lo te cuaa ni laa Italiano. Cornel najc benzijt, dini gac beñ Israel. ² Bensacduxh najc Cornel, nájza guiraa resa'ni, sacruduxh rusobreni xtidx Dios. Rudeedni gojn lo rebeñ proob xten Israel. Guixe-guixee rbejdx, rniabni lo Dios. ³ Te dxej, si'cti rcachon gudxej, si'c lo bacal bahuini loj xangl Dios, räjpni loj Cornel:

—¿Conlu Cornel?

⁴ Che bahuini Cornel xangl Dios, bidxejbni, bidxelojni, räjpni lojni:

—¿Xhini'c, Dad?

Dxejcti räjp angl xten Dios lojni:

—Che rniilu lo Dios, riejn diajg Dios xtiidxlu, che rudeedlu meel lo rebeñ proob, ruhuii Dios ni rujnlu, ni'cni rnalajz Dios luj. ⁵ Naj baxhal tiop niguii cháa guedx Jope te chaxiireni Simón Pedr. ⁶ Rbäjzni roliz te dade' ni laa Simón nani ruscoodz guijd. Roliz Simón sojb gajxh ro' nisdoo. Simón Pedr gusule' xhini'c nanab gunlu.

⁷ Che sii angl xten Dios, gule Cornel tiop mos xtenni nájza te xsoldaadni nani sanälajz Dios. ⁸ Dxejc bij Cornel diidx lojreni xcuent ni gusajcni, dxejc baxhalni redade'ga guedx Jope.

⁹ Che bara yääl, sääreni lo nezyuj. Asiäddzungajxhrene guedx Jope, pet si'cti läidxejni. Lagajc orga huä'p Pedr yecyu' te guininäjni Guejb Dios.

¹⁰ Calanduxh Pedr, rlanjzni gauni. Lal ni cayujñreni xhi gauxhuejni, gusloj canixcalni. ¹¹ Bahuini bixal xhaguibaa, bahuizani biäj'te bariadro nani naliib guidap xi'ni. Siädjiätchäiini gajxh nez loj Pedr. ¹² Neñ bariaadga yu' guiraa reman ni yu' lo guedxliuj nani rsianäj guidap ni'ni, nájza renani rxeeb si'c bäl, nájza renani rutajt. ¹³ Gunii Dios lo Pedr, räjpni lojni:

—Pedr, huisu te ju'tlu man gaulu.

¹⁴ Dxejc räjp Pedr lojni:

—Na'c Dad. Nunc gauä sa' remandxuudxga, abia'a dina gauä reman nani rnii xleilul najc mandxuudx.

¹⁵ Gunisac Dios loj Pedr, räjpni:

—Na'cru guiniilu nacdxuudx reman nani abasia.

¹⁶ Che gujc chon huält gujc si'c, huä'psac bariaadga xhaguibaa. ¹⁷ Lal ni cayujñ Pedr xhigab xhichani'c säloj nani bahuini, bidzujñ reniguii ni baxhal Cornel ro' yu'ga, sa'csi agunabdiidxreni caro rbäjz Simón nani ruscoodz guijd.

18 Che bidzujnreni rolä'ga canabdiidxreni la ro'c rbäjz te dade' ni laa Simón Pedr. 19 Laḷ ni cayujn Pedr xhigab xcuent ni bahuiini, gunii Sprit Dxaan xten Dios lojni, räjpni:

—Bahuii, chon dade' caguiillu. 20 Biäjät yejc yu're te jinälureni. Na'c gunlu xhi stee xhigab, sa'csi lagajc narä baxhaläreni lojlu.

21 Dxejcti biäjät Pedr jiaaga, bidzujnni cadro suga' redade'ga, räjpni lojreni:

—Narä nacä ni caguiillu. ¿Xhi siäädttu?

22 Räjp reniguiiga lo Pedr:

—Cornel, nani rnibee te gayuu soldaad, te bensa'c, te bejn ni rajn Dios, te bejn ni sanälajz rexpejn Israel, laani baxhal nuure lojlu, sa'csi räjp angl xten Dios lojni, jiopxiinu luj te jiejn diajgnu xtiidxlu.

23 Dxejcti gurejdx Pedr rebejnğa, biu'reni nen yu'. Ro'c bia'nreni te guxhijn. Che bara yääl, Pedr näjza sgaai ben Jope ni najc xpejn Jesucrist, sanä redade' ni baxhal Cornel.

24 Che bara yääl, bidzujnreni guedx Cesarea. Abatojp Cornel resa'ni näjza reexamigwni rolizjni. Cabäjzreni guidzujn Pedr. 25 Che bidzujn Pedr ro yu', huichagloj Cornelni, bazuxhijbni lo Pedr. 26 Dxejc gunaaz Pedr naani, guläsnni, räjpni lojni:

—Huisulii, sa'csi narä nacä te niguiitis sigajc najclu.

27 Cayuiireni diidx, biu'reni nen yu'. Che biu'ni bahuii Pedr nadxagsa' rebejn nen yu'. 28 Räjp Pedr lojreni:

—Anajntu xhi caj lo leii xten rexpejn Israel: digacdi guchaag te xpejn Israel loj benzijt nani digac xpejn Israel, digacdiza jiu'ni rolizjni. Niluxh agunii Dios loä lo te bacal, te gacbeä digacdiru jiuä releiire. Abaluu Dios narä sajc guchagsa'ä chutis bejn. 29 Ni'cni, che gurejdxtu narä biälgacä. Naj rniabdidxä, ¿xhicuent gurejdxtu narä?

30 Dxejcti räjp Cornel loj Pedr:

—Gudajp dxej si'cti rcachon gudxej, cabedx-canabä lo Dios rolizä chela baluiloj te niguii najcw te ladno ni rdimbicha'. 31 Najni loä: “Cornel, che rbedx-rniablu lo Dios, riejn diajg Dios xtiidxlu, che ruedeclu meel lo reben proob, racbee Dios, di lajzni jial luj. 32 Ni'cni naj baxhal tiop dade' chää guedx Jope te chaxiireni Simón Pedr nani rbäzlaa roliz Simón ni ruscoodz guijd. Rolizjni sojb gajxh ro' nisdoo. Che guidzujnni, laani gusule'ni xtidx Dios lojtu.” 33 Dxejc baxhalä chu biädxiiilu. Xquixtiostelu biäädllu. Naj anadxagsa'nu ree nez loj Dios te jiejn diajgnu rextidx Dios ni baniidxni lojlu guiniilu loonu.

Basule' Pedr xtidx Dios roliz Cornel

34 Dxejcti räjp Pedr lojreni:

—Naj gucheliä tebloj rinälajz Dios guiraa bejn; rebenzijt sigajc rexpejn Israel. 35 Niluxh rinälajz Dios chutis ben guedxliuj nani ruzuxhijb lojni, nani rusoob rextiidxni, nani laaca nabajn. 36 Badeed Dios xtiidxni loj rexpejn Israel, basule' Dios biääd Jesucrist te gac chanälaznu Dios te cuedxilajznu, sa'csi Jesucrist rnibee guideb guedxliuj. 37 Che gulujx baluii Juan ni rutiobnis xcuent yälrobnis, dxejc gusloj basule' Jesucrist xtidx Dios nez reguedx Galilee. La'tu najntu xho bire'ch xtidx Jesucrist guideb nez nen reguedx Judea. 38 Nancheetu xho badeed Dios yälrnibee loj Jesucrist, ben Nazare't. Badeedza Dios Sprit Dxaan xteni te cuääzni nen lastooni. Nancheetu xho bejni redzunro, remilagw, basiajcn rebejn nani caguteed bendxab trabajwduxh. Redzunroga bejni sa'csi bennäj Diosni dzuun. 39 Bahuiiloonu guiraa redzuun ni bejn Jesucrist nen reguedx Israel näjza guedx Jerusalén.

Bacuaa rexpejn Israel Jesucrist lo cruzj, ro'c gujtñi. ⁴⁰ Dxejcti che biojn dxej, guläs Dios Jesucrist lo rebengut, gubansacni, badeed Dios yälñibee lojni te gujc biädluiloj Jesucrist loonu. ⁴¹ Di Jesucrist nululoj loj chutis bejn. Lojtis renani agule Dios gutie'ch diidx gubansac Jesucrist lo rebengut, loj reni'c baluilojni. Nuure nadxagnu loj reni gule Dios. Bidaunänuni, bidunnäänuni che gubansacni lo rebengut. ⁴² Baxhalni nuure chatie'chnu diidx loj guiraa rebejn, chosule'pacnu Dios gule Jesucrist te gacni juejz xte rebenbajn näjza xte rebengut. ⁴³ Galooli bacuaa renani gunii xtidx Dios lo guijtjz, räjpreni: “Guiraa rebejn ni chalilajz xtidx Jesucrist sudzucaj Dios xtojlneni.”

Biädlajz Sprit Dxan xten Dios nen lastoo rebenzajt

⁴⁴ Lañ ni canii Pedr rediidxga, biädlajz Sprit Dxan xten Dios nen lastoo renani huillilajz xtiidxni. ⁴⁵ Bidxeloy guiraa rexpejn Israel nani huinä Pedr sa'csi biädlajz Sprit Dxan xten Dios nen lastoo renani najc benzajt. ⁴⁶ Gucheereni biu' Sprit Dxan xten Dios lastoo rebenzajt sa'csi bejn Sprit Dxan guniireni stee didxsaj nani gajdreni guisieed, calä'pzareni xpala'n Dios. ⁴⁷ Dxejcti räjp Pedr lo rexamiigwni:

—Chu laa ni gudxojn yälrobnis lo rebejnre, ni sigajc biädlajz Sprit Dxan xten Dios nen lastoonu, abiädlajzni nen lastoo rebejnre.

⁴⁸ Dxejcti gunibee Pedr gurobnisreni te gachee bejn najcreni xpejn Jesucrist. Dxejcti gunabreni loj Pedr jia'nni ro'c tiop-choñ dxej.

11

Basule' Pedr xho biädlajz Sprit Dxan xten Dios lastoo rebenzajt lo rexpejn Jesucrist nen guedx Jerusalén

¹ Reapost, näjza renani huillilajz xtidx Jesucrist nen reguedx Judea, bejn diajgreni huillilajz rebenzajt ni digac xpejn Israel xtidx Dios. ² Che bidzujñ Pedr guedx Jerusalén, rexpejn Israel nani rrajz chu guiraa rexpejn Jesucrist bee si'cni bejn toAbram, gudilñajreni Pedr. ³ Räjpreni lo Pedr:

—¿Xhicuent biu'lu rolijz benzajt nani xhet yu'di bee si'c nuure? ¿Xhicuent gudaunäjlore, ä?

⁴ Dxejcti basule' Pedr diidx xho gujc huijni loj rebenzajt:

⁵ —Yu'ä guedx Jope. Cabedx-canabä lo Dios, dxejc si'c gunixcalä, bahuiä bixal xhaguibaa, siädjiäjt te bariadro, naliib guidap xi'ni. Siädjiätchäiini nez loä. ⁶ Che bahuisa'cä, nenğa yu' guiraloy reman ni yu' lo guedxliuj nani rsianäj guidap ni'ni, renani rbäjz nen dajn, renani rxeeb si'c bäl, näjza renani rutajt. ⁷ Dxejcti bejn diagä naj Dios loä: “Pedr, huisu. Bagu't man gaulu.” ⁸ Dxejcti räpä: “Digacdinä Dad. Nicla tej gadna gauä te man nani rñii leii xtenlu najc mandxuudx.” ⁹ Dxejc gunisac Dios loä: “Na'cru guiniilu nacdxuudx recos nani abasia Dios.” ¹⁰ Che gujc choñ huält gunii Dios si'c, huä'psac bariaadga xhaguibaa. ¹¹ Lagajc orga bidzujñ choñ dade' ro yu' cadro yu'ä. Guedx Cesarea biriireni, biädxiireni narä. ¹² Dxejc gunii Sprit Dxan xten Dios loä: “Huinä reniguiire. Na'c gun tiop lajzlu.” Dxejcti huinää xho'p ben Jope, dade' nani rililajz xtidx Jesucrist. Che bidzunnu guedx Cesarea, biu'nu rolijz Cornel. ¹³ Basule' Cornel diidx loonu xho baluiloj te angl xten Dios lojni lagajc rolijzni. Räjp angl xten Dios lojni: “Baxhal tiop dade' chää guedx Jope te chaxiireni Simón ni rñiireni Pedr. ¹⁴ Laani siniini xtidx Jesucrist te gacheelu con resa'lu xhini'c nanab gunlu te guslaa Dios la'tu lo rextojltu.” ¹⁵ Che gusloj cagusule'ä xtidx Dios lojreni, biu' Sprit Dxan xten Dios nen lastooreni si'c biu'ni lastoonu galooli. ¹⁶ Dxejcti banaj lazä rextidx Dad

Jesucrist che najni: “Juan abatiobnis con nistis, biädla narä suxhalä Sprit Dxan xten Dios te cuääzni neñ lastootu.”

¹⁷ Dxejc räjpza Pedr:

—Palga badeed Dios Sprit Dxan xtenni lojreni si'c baniidxni Sprit Dxan xtenni loonu che huililajznu xtidx Jesucrist, ¿chu narä? te niäpä lo Dios: “Na'c gudeedlu Sprit Dxan xtenlu lojreni.”

¹⁸ Che biejn diajg reben Jerusalén rediidxga, biäuu ro'reni, dirureni ni-dilnäj Pedr. Alga gulä'preni xpala'n Dios, räjpreni:

—Näjza rebenzijt nani digac rexpejn Israel abasaan Dios gusiechljazreni te guibanäjreni Dios par tejpas.

Rexpejn Jesucrist ni yu' guedx Antioquía

¹⁹ Che gujt Esteban bire'ch renani huililajz rextidx Jesucrist. Bire'chreni lo yuj Chipre ni re' lo nisdoo, lo reguedx Fenicia, näjza lo guedx Antioquía sa'csi cadejdreni trabajduxh. Basule'reni rextidx Jesucrist lojtis rexpejn Israel. ²⁰ Lojreni nadxaag gaii beñ Chipre, näjza gaii beñ Cirene. Redee bidzujñ guedx Antioquía. Ro'c gusloj caniireni lo benzijt nani rnii didx griegw. Basule'reni lo rebenzijtga guiraa xcuent Jesucrist. ²¹ Gucnäj Diosreni caniireni xtiidxni. Xhidajl rebejnğa huililajz xtidx Jesucrist, basoobreni xtiidxni.

²² Che biejn diajg rexpejn Jesucrist ni yu' guedx Jerusalén rililajzreni, baxhal'reni Bernabé guedx Antioquía. ²³ Che bidzujñ Bernabé guedx Antioquía, bibalazduxhni che bahuiini xho cayunnäj Dios rebejnğa. Dxejcti balijdx Bernabéreni: gutijp lajzreni gusoobreni xtiidxtis Jesucrist. ²⁴ Bensa'c najc Bernabé. Rililazduxhni xtidx Jesucrist. Racnäjduxh Sprit Dxan xten Diosni. Xhidajl rebejn huililajz xtidx Jesucrist guejdxga.

²⁵ Che birii Bernabé guejdxga, huijni guedx Tarso satiilni Saulo. ²⁶ Che bidxälni Saulo, huinänini guedx Antioquía. Ro'c bia'nreni tebijz, bachagsa'reni renani huililajz te baluiireni xtidx Jesucrist lo xhidalduxh bejn. Ganid beñguejdxga gulälaj “Cristianos” renani rililajz xtidx Jesucrist.

²⁷ Neñ redxejga birii gaii dade' nani rnii xtidx Dios. Guedx Jerusalén biriireni, bidzujñreni guedx Antioquía. ²⁸ Huisulii te dade'ga ni laa Agabo. Gucnäj Sprit Dxan xten Diosni te guniini siääd te gubijn guideb guedxliuj. Luxh gujc gubijnga neñ reijz ni gunibee reii Claudio ni sajcru. ²⁹ Dxejcti rexpejn Jesucrist ni rbäjz guedx Antioquía bejn xhigab cade tejreni gudeed meel chää lo rexpejn Jesucrist ni rbäjz neñ reguedx Judea. ³⁰ Batojpreni meel, baxhal'renini lo rebengool ni rnibee rexpejn Jesucrist ro'c. Saulo näjza Bernabé huinä meelga che huijreni Judea.

12

Gujt Jacob, biäu Pedr neñ latzguiib

¹ Neñ redxejga, trabajduxh bateed reii Herodes gaii rexpejn Jesucrist. ² Gunibeeni gujt Jacob betz Juan, biru' guejnii. ³ Che bahuii Herodes bibalazduxh rexpejn Israel sa'csi bagu'tni Jacob, gunibeeni gunazgajceni Pedr. Dee gujc neñ redxe lanij che rajwreni yätxtiil ni di saguij. ⁴ Che gunaaazreni Pedr, biäuni neñ latzguiib. Gunibee Herodes biääd tajp cuaa soldaad cuanäjreni ro' latzguiib. Tapgaj soldaad cuanäj ro' latzguiibga cade xho'p or. Bejn Herodes xhigab cuääni Pedr te guetni nez loj rexpejn Israel che ted lanij. ⁵ Yu'ti Pedr neñ latzguiib, dxejcti durtis cabejdx, canab rexpejn Jesucrist lo Dios xcuent Pedr.

Gulää Dios Pedr neŋ latzguiib

⁶ Bidzujnti dxe bispr dxej ni rlaŋz Herodes nibää Pedr nez loj rexpejn Israel. Yälga nagayejs Pedr galäii tiop soldaad. Caden naliib guiro'p naa Pedr. Stioop soldaad canäj ro' latzguiib. ⁷ Chela baluiloj te angl xten Dios, bianij te bajl nani basanij neŋ latzguiib. Dxejcti gunaazni xhajcw Pedr, basniibnini te gubajjni. Räjjni lo Pedr:

—Basquejnga, huistie.

Dxejcti bixec recaden, bitejbreni naa Pedr. ⁸ Räj p xangl Dios lo Pedr:

—Gojt xhajblu, baläj xcura'chlu.

Si'c bejn Pedr, dxejc räj p xangl Dios lo Pedr:

—Gojt xhablazlu, gudanajl narä —räjjni.

⁹ Biriitini latzguiib sanajlni angl xten Dios. Niluxh dini gun xhigab guliipac nani bejn xangl Dios. Bejnii xhigab pet canixcalni. ¹⁰ Gudejdreni nez loj te soldaad, gudedgajczeni nezloj steeni, dxejc bidzujnreni ro' puertguiib xten latzguiib nani caj lo nezyuj ni rdejđ galäii guejdxga. Xtebca bixal puertroga, biriireni gusajreni tebezyuj. Dxejcti te squin gunitloj xangl Dios. Xtebtis Pedr sasaj lo nezyuj. ¹¹ Dxejc si'cni gubajn Pedr, bejnii xhigab:

—Naj sii nanä baxhal Dios te xanglni basläa narä ladznaa Herodes te digacđi gun rexpejn Israel nani rlaŋzreni gunnäjreni narä.

¹² Che gucbee Pedr xhi gusajcni, huijni rolijz Marii, xnan Juan ni rniireni Marcw. Ro'c nadxagsa' xhidajl rexpejn Jesucrist, cabedx-canabreni lo Dios xcuent Pedr. ¹³ Cagusejz Pedr rolä', dxejc gubig te dxa'p ni laa Rode, bacuadajgni ro lä'. ¹⁴ Che biembeee Rode xse' Pedr, sa'csi bibalazduxhni, biallajzni nuxhalni ro lä'. Alga baxunni biusacni neŋ yu', räjjni lojreni:

—Pedr suga' ro lä'.

¹⁵ Dxejcti räjpreni lo Rode:

—Yejclu cayajc.

Dxejcti duurtis gunii dxape'ga suga' Pedr ro lä'. Dxejcti räjpreni loj Rode:

—Xho gacni Pedr. Pet biejn diajglu gunii xangl Dios ni rcanäj Pedr.

¹⁶ Dxejcti lałtis cagusejz Pedr ro lä'. Che baxhalreni ro lä' bidxeloduxhzeni bahiireni lo Pedr. ¹⁷ Dxejcti bazääb Pedr naani te na'cru jieyreni. Dxejc bij Pedr diidx xho baxhal Dios ro' latzguiib. Dxejc räjjni:

—Colchaye'tz lo Jacob näjza lo rexpejn Jesucrist guiraa ni gusacä nayääl.

Dxejcti birii Pedr ro'c, huijni ste'ca lajt.

¹⁸ Che bara yääl, rsildooru, bieiduxh resoldaad sa'csi direni gan xho gujc birii Pedr neŋ latzguiib. ¹⁹ Gunibee Herodes huitiilreni Pedr, gunabdi-idxzani lo resoldaad xho gujc birii Pedr, dxejc gunibeeni gujt resoldaad ni cuanäj latzguiib che birii Pedr. Dxejcti birii Herodes reguedx Judea, xchej huijia'nni guedx Cesarea.

Gujt Herodes

²⁰ Bachechduxh reben Tiro näjza reben Sidón Herodes, ni'cni diruni gusaan guto' rebejn nez cadro rnibeeni xhi gau reben Tiro näjza reben Sidón. Ni'c biääd xhidajlreni te guiniabreni jäjł lajzni, te na'cru guidxe'ch Herodes lojreni. Abenxgaareni xamiigwreni Blasto, mos ni yu' lo reii Herodes, mos ni sajru lo guiraa rexmos Herodes. Guninäj Blasto Herodes xcuentreni te na'cru guidxehnäj Herodes rebejnga. ²¹ Basoobtini te dxej te guininäjnireni. Caxega gojt Herodes xhajb reiini, gurejni lo xyacxhil reiini. Dxejcti gusloj caniini didxsa'c loj rebejnga. ²² Guredxa' rebejn räjpreni lojni:

—Huenduxh najc diidxre. Guejblu najc te dios, xhet xtiidxdi niguii najc diidxre.

²³ Lagajc dxejc biääd te angl xten Dios, bejnni gusloj cayacxhuu Herodes, gudajw rebisiujg Herodes, gujtnti sa'csi basaanni gunii rebejn najcni te dios, sa'csi dini niliä'p xpala'n Dios.

²⁴ Xhidajl bejn biejn diajgni xtidx Dios, huililajzreni xtidx Dios.

²⁵ Che gulujx badeed Bernabé näjza Saulo meel ni batojp reben Antioquia lo rebengool, biriireni guedx Jerusalén. Sanäreni Juan ni rniireni Marcw lo guedx Antioquia.

13

Gule Sprit Dxan xten Dios Bernabé näjza Saulo

¹ Lo rexpejn Jesucrist ni rdxaag sa' guedx Antioquia guyu' gaii niguii ni gunii xtidx Dios, näjza gaii niguii ni rusule' xtidx Dios loj guiraa rexpejn Jesucrist. Loj redee nadxaag Bernabé, näj Simón ni rniireni Negr; näj Lucio, bejn Cirene; näj Manaén ni gulanäj reii Herodes gujcni si'c bejtzni; näjza Saulo. ² Bidzujn te dxej cagucua'nreni lał ni cabedx-canabreni lo Dios, dxejc räjp Sprit Dxan xten Dios lojreni:

—Colcue Bernabé näjza Saulo te gunreni dzuun ni rlazä gunreni.

³ Che gulujx bacua'nreni, che gulujxza guredx-gunabreni lo Dios, batzubenreni naareni yejc guiro'preni, te si'c baxhalreni Bernabé näjza Saulo te guluireni xtidx Dios ste'ca lajt.

Guio'preni baluii xtidx Dios lo reben Chipre

⁴ Baxhal Sprit Dxan xten Dios Saulo näjza Bernabé guedx Seleucia. Ro'c biu'reni nen barcw, sääreni nez yuj ni tre' galäii nisdoo, ni laa Chipre. ⁵ Che bidzujnreni Chipre, biu'reni guedx Salamina. Ro'c basule'reni xtidx Dios nen guiraa rexquidoo rexpejn Israel. Näj Marcw gucnäjreni. ⁶ Che cuansajreni guideb yuj Chipre, bidzujnreni guedx Pafos. Ro'c bidxaagreni te niguii ni laa Barjesús. Najcni te bidxaa, najczani te xpejn Israel. Cagusgueeni rebejn guejdxga, räjpni xtidx Dios caniini, niluxh dini gac xtidx Dios. ⁷ Bidxaaare nu'ch lo rexpejn Sergio Paulo, nani najc gubernadoor xten Chipre. Nasinduxh Sergio Paulo. Gurejdxni Bernabé näjza Saulo, sa'csi rlazjni jiejn diajgni xtidx Dios. ⁸ Dxejcti Barjesús, ni laaza Elimas, bidxagdijl ni guiro'preni sa'csi di rlazjni chalilajz Sergio Paulo xtidx Dios. ⁹ Saulo, nani laaza Pabl, bahuitzu'tz loj Barjesús. Batijp Sprit Dxan xten Dios lastoo Pabl, räjpni loj Barjesús:

¹⁰ —Rusgueduxhlu rebejn, najclu benlatsiaj, benguidxduxhlu, najclu xi'n Satanás, bendxab ni rnibee. Rdxehnäjzalu guiraa recossa'c xten Dios. ¿Guc cuääz guxhiidlu xtidxlii Jesucrist te di chalilajz bejn xtidx Jesucrist? ¹¹ Naj siääd xcastiigw Dios yejclu. Xhidajl dxej sicäjy lojlu, xhetliidi filu —räjp Pabl.

Gujcsi räjpni si'c, bicäigajc lojni. Dxejctiru cuansajni caguilni chu guiniaaz naani guluini canejz chääni. ¹² Che bahuii Sergio Paulo xhi gusajcni, huililajzni xtidx Dios, sa'csi bidxeloduxhni xcuent xcärlului Dios.

Bidzujn Pabl näjza Bernabé guedx Antioquia xten distrit Pisidia

¹³ Che baluux Pabl näjza resa'ni xtzunreni guedx Pafos, biu'reni nen barcw, gudejdreni lo nisdoo, sääreni guedx Perge nen estad Panfilia. Che bidzujnreni guejdxga, gubisac Juan, ni rniireni Marcw, Jerusalén. ¹⁴ Dxejcti birinäj Pabl resa'ni guedx Perge, sääreni guedx Antioquia nen distrit Pisidia. Dxej te dxe sabd, dxej ni rusilajz rexpejn Israel, biu'reni nen xquidoo rexpejn Israel, ro'c gurejreni. ¹⁵ Che gulujx bil te dade' reguijtz xten Dios ni

laa leii nájza reprofe't, baxhal reguxhtis xten guidoo chu huigajñreni, rájpreni lo Pabl nájza Bernabé:

—La'tu sa'nu, palga rajptu te diidx ni gulijdx rebejnre, colguiniini.

¹⁶ Dxejc huisulii Pabl, gulásni ñaani bejnni seen lo rebejn te cuadiajgreni xtiidxni. Rájp Pabl lojreni:

—Colcuadiajg, la'tu rexpejn Israel, guiraatu ni rajñ Dios. ¹⁷ Galooli gule Xtios rexpejn Israel retoxtadgoldoonu. Luxh che gulájzreni nacióñ Egipto, bidalduxh retoxtadgoldoonu. Gucnájduxh Diosreni bejnni remilagwr, te guláánireni guedx Egipto. ¹⁸ Tiuu ijz gulájzreni lo reyubijdz. Xhidajl huált direni nusoob xtidx Dios, niluxh empac gucnájza Diosreni. ¹⁹ Guyu' gajz nacióñ gulájz neñ reyuj ni laa Canaán. Dios bejn gunitloj reguejdxre, te gudisni reyujga loj retoxtadgoldoonu. ²⁰ Dxejcti badeed Dios reniguii ni gujc juejz, gunibeereni rebejn. Tajp gayugarol ijz gunibeereni rexpejn Israel. Samuel nani gunii xtidx Dios gujc lult juejz. ²¹ Dxejcti gunab rexpejn Israel te reii lo Dios te gunibee reiiga lojreni. Badeedti Dios Saúl xi'n Cis, sa' toBenjamín. Gunibeeni tiuu ijz. ²² Che badzucaj Dios Saúl, badeedni gunibee toreei David. Rájp Dios: “Agucbeá David xi'n Isaí rujñ tejsi xhigab con narä. Susoobni xtidxä sujñni guiralii ni rlazä gac.”

²³ Rájpza Pabl:

—Galooli bia'n diidx lo rexagdo David guxhal Dios te bejn ni gudzucaj xtojñnu, ni guslaa nuure lo dojl. Naj aguzojb diidxga. Jesucrist najc bejnğa, rudzucajni xtojñnu, ruslaani nuure lo dojl. ²⁴ Che gusloj cagulijdx Juan rebejn, baluiini nanabpac gusiechlajz rexpejn Israel, tiobnisreni te jia xtojñreni. ²⁵ Niluxh guxii riäädx guluux Juan dzuun ni badeed Dios gunni che rájpi lo rebejn: “¿Chu rujntu xhigab nacä narä? Dina gacä Crist nani bia'n diidx guxhal Dios. Colñuii, detzä siääd tej ni sacduxhru loä; nicla gac surloä te cuää xcura'chni.”

²⁶ Rájpza Pabl:

—Rniä lojtu sa'ä, rexagdo toAbram, nájza lo chutis ni rajñ Dios, loonu baxhal Dios xtiidxni ni rusule' xho rudzucaj Jesucrist xtojñnu, xho ruslaani nuunu lo dojl. ²⁷ Rebejn Jerusalén, nájza renani rnibeereni, direni niembee Jesucrist nani rnibee, dizareni niacbee diidx xcuent Dios nani bacuaa reniguii ni gunii xtidx Dios agujc xchero, luxh rolreni xtidx Diosga gasob sabd. Niluxh che bagu'treni Jesucrist, guzobj xtidx Dios ni caj lo guijtza. ²⁸ Balijdxreni Pila't ju'tni Jesucrist, luxh xhet bejndini te guetni. ²⁹ Che bagujc guiraa ni caj lo guijtzc xcuent Jesucrist, gulätreni Jesucrist lo cruzj, bacua'tzrenini neñ baa cuä' te guilaj. ³⁰ Dxejcti guläs Dios Jesucrist lo rebengut. ³¹ Balti huált baluiloj Jesucrist lo rexamigwñi nani biädñajlñi nez rexyuj Galilee, renani biädñajlzani nez guedx Jerusalén. Bahuilojreni gubansac Jesucrist lo rebengut, te naj rusule'reni diidx xcuent Jesucrist.

³² Naj siopñanu xtidx Diosre lojtu te guibalajztu. Agujc xchero bia'n Dios diidxre con retoxtadgoldoonu. ³³ Guläs Dios Jesucrist te huile' diidxga par nuure, rexagdooreni. Agujc xchero gunii Dios te diidx ni caj neñ Salmo ni bacuaa toDavid. Lo Salmo ni rojñp rájñp Dios: “Luj najclu xi'nä. Nadxej guleälu te guinibeelu.”

³⁴ Rájpza Pabl:

—Dxejcru stee lajt caj xcuent ni guläs Diosni lo rebengut te nuncru guetni. Scree bacuaa te niguii, rájñp Dios: “Sunidxä recossa'c lojlu si'c ni bia'nä diidx con toDavid.” ³⁵ Ni'cni bacuaaza toDavid neñ stee Salmo ni gunii Dios, guniini: “Dipaclu gusaan gudx tiejxh Xi'nlu nani sanälajlzu.” ³⁶ Che gulujx

gunibee toDavid lo retoxtadgoldoonu, si'cni badeed Dios gunni, dxejc gujtñi. Biga'tznäjni retoxtadgoldooni. Niluxh guyujdx tiejxh toDavid. ³⁷ Niluxh guläs Dios Jesucrist lo rebengut, ni'c di tiejxhni niujdx. ³⁸ Ni'cni colyacbee, la'tu resa'ä, Jesucristre, bejn ni cania xcuentni, laani rudzucajni rextojlñu. ³⁹ Chutis ni rililajz xtidx Jesucrist ruslaa Jesucristni loj guiraa rextojlñi nani digacdi guibicaj mascä rusoobni guiralii ni caj lo leii xten toMoisés. ⁴⁰ Colšusinj te na'c sajctu recos ni caj lo guijtñi ni bacuaa te niguii nani bacuaa xtidx Dios:

⁴¹ Colhuilaa, la'tu ni ruxhiznäj xtidx colguidxeloj, colnitloj, sa'csi naj ni nabajntu sunä te dzunro, te milagwr nez lojtu, niluxh dipac lajztu chalii, mascä jääd chu gusule'pacni lojtu.

⁴² Gulujxti xtidx Pabl, biunejz rebejn. Che birinäj Pabl Bernabé biädñi rebejnre lojreni, räjpreni:

—Jiädsactu ste xmaan te gusule'rutu rediidxre loonu.

⁴³ Che care'ch rebejnğa, xhidajl rexpejn Israel, näjza xhidajl rebenzajt nani rusoob xtidx Dios si'c rujñ rexpejn Israel, birinajlreni Pabl näjza Bernabé. Dxejc balijdxreni rebejn ni siädñajlreni, räjpreni lojreni chanuutis chalilajzreni didxlii xcuent Jesucrist.

⁴⁴ Che gojlti stee sabd, dxej ni rusilajz rexpejn Israel, xhidalduxh rebenguejdx bire' te gucuaiajgreni guinii Pabl xtidx Dios. ⁴⁵ Che bahuii rexpejn Israel guiraa rebejn ni bire', bidxechlajzreni, gucnadareni. Dxejc gusloj cadxagdiñ rexpejn Israel Pabl. Che rniini te diidx, laareni rniireni "didxxhiini". Caniyajzreni Pabl näjza Bernabé, caguereni lojreni. ⁴⁶ Luxh di Pabl niclaza Bernabé nidxejb. Gusutijptisreni, räjpreni lo rebejn:

—Nungäjñ ganid lojtu guiniinu xtidx Dios, sa'csi la'tu najctu rexpejn Israel. Niluxh ditu chalilajz xtidx Dios, lagajc la'tu caniiu digacdi guibanñajtu Dios par tejpas. Ni'c sibire' loonu, te guiniinu xtidx Dios lo rebenzajt ni digac xpejn Israel. ⁴⁷ Sa'csi si'c agunibee Xtiosnu. Scree caj xtidx Dios lo guijtñi: Suxhalätu te guluiilu rextidxä lo rebenzajt ni digac xpejn Israel, te chalilajz rebejnğa xtidxä, te laareni lo xtojñreni, cadrotis yu'reni lo guedxliuj, räjp Dios.

⁴⁸ Che biejn diajg rebenzajt rediidxre, bibalazduxhreni, gulä'preni xpala'n xtidx Dios. Renani gule Dios galooli huililajz xtidx Dios. Xhidajl najceni. ⁴⁹ Bire'ch xtidx Dios guideb nez reguejdxga. ⁵⁰ Dxejc rexpejn Israel balijdx regunaa ni sajcu, näjza reniguii ni sajcu neñ guedx Antioquia, te bidxechnäjreni Pabl näjza Bernabé, barilaagwreni Pabl näjza Bernabé te biunejzreni guedx Antioquia. ⁵¹ Dxejcti Pabl näjza Bernabé gubijb guxhuj ni'reni si'c te seen te gacbee rebejn xhet laadi bejnreni. Sä'tireni guedx Iconio. ⁵² Baspaa Dios lajz rexpejn Jesucrist guedx Antioquia xten Pisidia. Bazutijpza Sprit Dxan xten Dios lastooreni.

14

Guyu' Pabl näj Bernabé guedx Iconio

¹ Che bidzujñ Pabl näjza Bernabé guedx Iconio, biu'reni xquidoo rexpejn Israel. Basule'reni xtidx Dios lo rexpejn Israel näjza lo rebenzajt. Xhidajl rebejnğa huililajz xtidx Dios. ² Niluxh sgaii rexpejn Israel nani di chalilajz xtidx Jesucrist balijdx rebenzajt te bidxechnäjreni rebejn nani huililajz xtidx

Jesucrist. ³ Ni'cni bia'n Pabl nájza Bernabé lo guejdxga balti dxej. Gusutzu'tz guiro'preni guniireni xtidx Jesucrist. Badeed Dios bejnreni redzunro, remi-lagwr xcuent xcârnibee Dios te bahuui bejn cayacnâj Diosreni. ⁴ Guyu' tiop cuaa bejn nen guejdxga. Gala' guejdxga huililajz xtidx Dios nani gunii Pabl nájza Bernabé, ⁵ dxejc sgalá' guejdxga bacuadaiajg xtidx rexpejn Israel. Dxej bire' te cuaa rexpejn Israel, nájza benzijt, nájza reguxhtis, rlajzreni nidxagdijlreni reapost, rlajzarení nucuaareni guij yejc Pabl nájza Bernabé. ⁶ Dxejc gucbeereni xhi rlajzreni gunreni, ni'c baxunreni ro'c huijreni nez reguedx Licaonia, ro'c bidzujnreni guedx Listra, guedx Derbe, nájza reguejdx ni re' nejzga. ⁷ Che bidzujnreni ro'c, cadrotis huijreni basule'reni xtidx Dios.

⁸ Guedx Listra guyu' te niguii ni digacdi sa, che gojllini racxhuu ni'ni. ⁹ Cagucuadaiajg niguiiga xtidx Pabl. Che bahuui Pabl lojni, gucbee Pabl rililajz niguiiga xtidx Dios, rililajzani sajz gusiajc Diosni. ¹⁰ Dxejcti dip gunii Pabl lojni, rájjni:

—jHuisulii!

Dxejcti huisuyä'ni, gusajni. ¹¹ Che bahuui rexpejn Licaonia xhi bejn Pabl, lagajc xtiidxreni guniireni, rájpreni lo sa'reni:

—jRedios abiäd'luiloj loonu si'c niguii!

¹² Gulälajreni Bernabé Júpiter, si'c laa tej rextiosreni. Dxejcti Pabl gulälajreni Mercurio, si'c laa stee rextiosreni, sa'csi laani rniiruni lo guiro'preni. ¹³ Dxejcti te bixhojz xten xquidoo Júpiter cua' tiop gon najl guii guejnreni. Biäd'näni regonga ro' xquidoo Júpiter ni suga' ro' guejdxga. Rebejn nájza bixhojz rlajzreni nugu'treni regon te ganreni Bernabé nájza Pabl si'c rajnreni rextiosreni. ¹⁴ Che biejn diajg reapost xhi cayajc, batiäjsreni tla' xhajbreni si'c te seen direni guichag'rajz xhi cayujn rebejn'ga. Ruxunreni bidzujnreni lo rebejn, rájpreni lo rebejn:

¹⁵ —Colcuadiajg xtiidxnu. ¿Xhicuent cayujn guejbtu recosre? Ni lagajc sabejntu najcnu, lagajc bejn guedxliuj najcnu. Rusule'nu xtidx Dios lojtu te lacuaa ruzuxhijbtu lo redios ni runchee bejn, guzuxhijbtu lo Gueb Dios ni nabajn par tejas, ni benchee xhaguibaa nájza guedxliuj, nájza nisdo, nájza guiralii ni yu' lojreni, nenreni, ¹⁶ Galoo basaan Diosga gun rebejn guedxliuj si'ctis ni rlajzreni. ¹⁷ Huen najc Dios, rudeedni nisguij, rudeedni rajc xhi rajw rebejn, rdxaj xque'reni, rbaa lajzreni. Ni'cni riembeepacnu yu' Dios.

¹⁸ Xhidajl diidx guniireni te cháii bejnreni gaan guredxi rebejn, sa'csi rlajzpac rebejn nugu'treni regon.

¹⁹ Dxejcti bidzujn gaii xpejn Israel siäd'reni guedx Antioquia nájza guedx Iconio. Baquilreni rebejn Listra te gucuareni guij yejc Pabl. Bacuaareni guij yejc Pabl, gudobxhajxhreni gulääreni ro' guejdxga, sa'csi naareni agujtini. ²⁰ Dxejc la' ni suga' rexpejn Jesucrist guideb gabi cadre naga' Pabl, huistieni, biusacni guejdxga. Che bara yääl, huinäni Bernabé sääreni guedx Derbe.

²¹ Che bidzujnreni guejdxga, basule'reni rextidx Dios lo rebejn'ga. Xhidajlreni huililajz xtidx Dios. Dxejc gubi'reni, biu'reni guedx Listra, nájza guedx Iconio, nájza guedx Antioquia. ²² Balijdxreni rebejn nani huililajz xtidx Dios, gucnäjreni rebejn'ga te batiplajz rebejn'ga, rájpreni lo rexpejn Jesucrist:

—Colsnaj lajztu xtidx Dios. Susacsí rebejn la'tu, sidejdtu trabajw te jiu'tu cadre rnibee Dios.

²³ Dxejcti gule reapost gaii dade' ni najc bengool te fiireni rexquidoo xpejn Jesucrist. Che gulujx bacua'nreni, la' ni guredx-gunabreni lo Dios, basadiidxreni rebejn, rájpreni: “Gacnäj Jesucrist la'tu ni huililajz xtiidxni.”

Gubisac guiro'preni guedx Antioquía xten Siria

²⁴ Che gudejd Pabl nájza Bernabé distrit Pisidia, bidzujñreni estad Panfilia. ²⁵ Basule'reni xtidx Dios lo reben Perge, dxejcti biriireni ro'c sääreni guedx Atalia. ²⁶ Che bidzujñreni guejdxga, biu'reni nen barcw, gudejdreni lo nisdoo te bidzujñreni stee guejdx ni laaza Antioquía. Ni'c najc guejdx ni biriireni che sääreni. Lo guejdxre yu' rexpejn Jesucrist ni gunab lo Dios xcuntreni, gacnäj Diosreni, baxhalreni Pabl nájza Bernabé chasule'reni xtidx Dios nen guiraa reguejdx. Naj abaluux Pabl nájza Bernabé dzuunga. ²⁷ Che bidzujñreni guejdxga, bachagsa' rexpejn Jesucrist. Dxejcti bijreni diidx lo rebejnğa guira'ti ni bennäj Dios laareni, nájza xho badeed Dios huililajz rebenzjzt nani digac rexpen Israel. ²⁸ Xchej biannäjreni rexpejn Jesucrist ro'c.

15

Bidxagsa'zarenen nən guedx Jerusalén

¹ Nen redxejga bidzujñ gaii dade' ni siääd nez Judea, caguluiireni rexpejn Jesucrist, räjpreni lojreni:

—Palga ditu gusal' bee si'c gunibee toMoisés, di Dios guslaatu lo xtojltu.

² Che biejn diajg Pabl nájza Bernabé rediidxga, bidxagdijñreni redade'ga. Dxejc gule rexpejn Jesucrist Pabl nájza Bernabé nájza sgaii rexpejn Jesucrist chääreni guedx Jerusalén te guininäjreni reapost nájza rebengool te guidon xho gac xcuent beega.

³ Huisunejz rexpejn Jesucrist ni najc beñ Antioquía Pabl nájza rebejn ni sanäjreni, sääreni guedx Jerusalén. Gudejdreni reguedx Fenicia, nájza reguedx Samaria. Cadrotis gudejdreni bijreni diidx lo rexpejn Jesucrist ahuililajz rebenzjzt xtidx Dios. Bibalazduxh rexpejn Jesucrist che biejn diajgreni rediidxga.

⁴ Che bidzujñreni guedx Jerusalén, huichagloj rexpejn Jesucristreni. Dxejcti bij Pabl nájza Bernabé diidx lo reapost, lo rebengool nani rnibee rexpejn Jesucrist, nájza lo rexpejn Jesucrist, guiraa redzunro nani cayunnäj Diosreni.

⁵ Dxejc huisulii gaii refarisee ni ahuililajz xtidx Dios, räjpreni lojreni:

—Che chalilajz rebenzjzt xtidx Dios, nanab churenii bee, nanabza gusoo-breni leii xten toMoisés.

⁶ Dxejcti bachagsa' reapost nájza rebengool nani rnibee rexpejn Jesucrist, te don xho gunreni. ⁷ Huisulii Pedr, räjpni lojreni:

—Guejbtu, resa'ä, anajntu xho bejn Dios gubalti ijz. Gule Dios narä lo guiraanu te gusule'ä xtidx Dios loj rebenzjzt, te chalilajzreni xtidx Dios.

⁸ Luxh Dios, nani numbechee lastoo guiralii bejn, badeed seen huililajzpac rebenzjzt xtiidxni. Badeed Dios Sprit Dxan xtenni lojreni si'c te seen te gacbee bejn najczeni xpejnmi. Sigac baniidxni Sprit Dxan xtenni loonu galoo, si'cza badeednini lo rebenzjzt. ⁹ Sigajc rinälajz Dios nuunu, sigajcza rinälajzni rebenzjzt. Che huililajz rebenzjzt xtiidxni, basia Dios lastooreni. ¹⁰ Naj ¿xhicuent rusieedtu Dios, ä? Di niajcdi nisianäj retoxtadnu releiiga, digacdiza chosanäjnu releiiga naj. ¿Xhicuent rlaiztu chasanäj rebenzjzt releiiga? ¹¹ Xhet si'cti gacni sa'csi Dios ruslaa nuure lo xtojlnu che rililajznu xtidx Jesucrist, luxh si'cza ruslaani rebenzjzt lo dojl che rililajzreni xtidx Jesucrist —räjp Pedr.

¹² Che gulujx gunii Pedr, dxitis gurej rebejn, bacuadiajgreni xtidx Bernabé, xtidx Pabl. Guiro'preni bijreni diidx xho cayujn Dios redzunro, remilagwr nez lo rebenzjzt.

¹³ Che gulujx gunii guiro'preni, xhet guniidi rebejn. Jacobtis räjp lojreni:

—Sa'ä, colcuadiajg xtidxä. ¹⁴ Agunii Simón ni rniireni Pedr lojtu xho ganiddoo baxhal Dios laani lo rebenzijt te gurejdx Dios rexpejn ni nadxaag lo rebenzijt. ¹⁵ Luxh si'cza caj lo guijt. Agujc xcheroduxh bacuaa renigui nani gunii xtidx Dios, che räjpni:

¹⁶ Sidzujñ dxej ni guibisacä.

Sunä guzuxhijb guiraa rebejn nez loä si'c bazuxhijb rexpejn Israel che gubajn toDavid.

Si'c gunä,

¹⁷ te jädgajñ rebejn narä te gacä Xtiosreni,

näzja guiraa rebenzijt nani najc rexpenä jädgajñ narä,

¹⁸ si'c räjp Dios nani galooli baluiloj guiraa redzuunre.

¹⁹ Dxejcti räjp Jacob lojreni:

—Dee najc xhigab ni runä. Na'cru gusieednu rebenzijt ni cagusiechla-zreni, renani salilajz xtidx Dios. ²⁰ Gucuaanu te guijt, jie'tznu lo rebenzijt: Na'c gaureni xhi cos ni basuj bejn loj rebanäjb, sa'csi dinu chalilajz xcuent rebanäjb. Na'cza guesnäjreni bejn ni di gac chäälni, na'cza gaureni bääl nani gurerejn, na'cza gaureni rejn. ²¹ Dee gucuaanu te di guche'chreni xpejn Israel sa'csi nen guiraa reguejdx galooli yu' rexpejn Israel nani roj leii xten toMoisés gasob sabd —räjp Jacob.

²² Che biejn diajg reapost näzja rebengool nani rnibee, näzja guiraa rexpejn Jesucrist xtidx Jacob, bichagljazreni xtiidxni. Dxejcti gulereni tiop sa'reni chanä Pabl näzja Bernabé guedx Antioquía. Gulereni Judas ni rniireni Barsabás näzja Silas. Guiro'preni najc bejn ni sajru loj rexpejn Jesucrist.

²³ Dxejcti bejnreni guijt huinäreni. Bacuaareni rediidxre:

“Nuure reapost, näzja rebengool ni rnibee, näzja rexpejn xquidoo Jesucrist ruxhalnu xtixtios lojt, resa'nu nani rbäz guedx Antioquía näzja estad Siria näzja estad Cilicia. ²⁴ Rucuaanu gujtzre sa'csi biejn diaagnu birii gaii resa'nu ree biädsieedreni la'tu con xtiidxreni, cayu'tu yärsia' sa'csi najreni lojtu nanab chutu bee si'c gunibee toMoisés, guibajnzatu si'c rnii leii xten toMoisés. Xhet nuudinu gunibeenu jädniiireni si'c. ²⁵ Ni'cni biennu xhigab guxhalnu lojtu tiop dade' ni gulenu loj resa'nu te chanäreni Bernabé näzja Pabl, nani sanälaaznu. ²⁶ Agajc balti huält rljazreni nugu'treni Bernabé näzja Pabl, luxh direni guidxiejb gusule'reni xtidx Jesucrist. ²⁷ Naj ruxhalnu Judas näzja Silas lojtu. Laareni susule'za guiraa rediidxre lojtu. ²⁸ Tejsi najc xhigabnu con Sprit Dxaan xten Dios. Di rlaaznu gutaalrunu leii ni chasanäjt. Releiitis nani nanab rusooobnu rucuaanu lojtu. ²⁹ Na'c gautu xhicos ni basuj bejn lo rebanäjb, sa'csi dirunu chalilaaz xcuent rebanäjb. Na'cru gautu rejn, na'cza gautu bääl nani gurerejn, na'cza guesnäjt nani digac chäältu. Palga gusoobtu recosre, laaca cayujntu. Sacrü guibajntu. Sujiannäjt Dios.”

³⁰ Dxejcti basadiidx rexpejn Jesucrist Judas näzja Silas huinäreni Pabl näzja Bernabé guedx Antioquía. Che bidzujñreni ro'c batojpreni guiraa rebejn nani huililajz xtidx Dios te bil'reni guijtza lojreni. ³¹ Che biejn diajg rexpenzijt Jesucrist diidx ni caj lo guijtza, bibalazduxhreni sa'csi gulecdxi diidxga lastooreni. ³² Dxejcti basule' Judas näzja Silas xtidx Dios lojreni, sa'csi ruede Dios xtiidxni loj guiro'preni. Xhidajl diidx guniireni te balijdxreni rexpejn Jesucrist. Lacti gulecdxi rediidx ni guniireni lastoo guiraa rexpejn Jesucrist. ³³ Ro'c bia'nreni xchej, dxejcru cuäjb rexpejn Jesucrist gubi'reni te gudeedreni xtixtios loj reni baxhal'reni.

³⁴ Dxejc Silas bejn xhigab jia'nni ro'c. ³⁵ Luxh Pabl nájza Bernabé bia'n guedx Antioquia. Guiro'preni baluii, basule'reni xtidx Dios loj rebejn. Guyu'za sgaii dade' ni gucnäjreni.

Huihuisac Pabl rexpejn Jesucrist neñ guiraa reguejdx

³⁶ Che gudejd xhidajl dxej, räjp Pabl lo Bernabé:

—Do'o guibi' lo guiraa reguejdx cadro basule'nu rextidx Dios te chohuiinu don xho yu' rexpejn Jesucrist.

³⁷ Niluxh Bernabé rlaiz chanäreni Juan ni laa Marcw. ³⁸ Naaddi Pabl chääni, sa'csi birii Marcw lojreni che guyu'reni nez Panfilia, diruni nisianäj Pabl nájza Bernabé. ³⁹ Dxejc gudildiidxreni. Gubicajtireni lo sa'reni. Ni'c sanä Bernabé Marcw, biu'reni neñ barcw, sääreni Chipre ni re' galäii nisdoo. ⁴⁰ Dxejcti Pabl gule Silas te sanänini. Badeed rexpejn Jesucrist xtixtios lojreni, räjpreni gacnäj Diosreni. ⁴¹ Lał ni sasajreni gudejdreni guiraa reguedx Siria nájza guiraa reguedx Cilicia, ro'c gucnäjreni guiraa rexpejn Jesucrist, basule'ruren i xtidx Jesucrist lojreni.

16

Huinä Timoteu Pabl näj Silas

¹ Bidzun̄sac Pabl nájza Silas reguedx Derbe nájza Listra. Ro'c bidxaagreni te xpeñ Jesucrist ni laa Timoteu. Xnanni najc beñ Israel ni huililajz xtidx Jesucrist. Xtadni najc beñ griegw. ² Didxsa'ctis rni rexpeñ Jesucrist ni yu' Listra nájza Iconio xcuent Timoteu. ³ Rlaiz Pabl chanäni Timoteu. Dxejcti basäl Pabl bee Timoteu te gujctni si'c xpeñ Israel, te xhet naadi rexpejn Israel, sa'csi guiraareni nanchee xtd Timoteu najc beñ griegw. ⁴ Che bidzujreni cade tej reguejdx, basule'reni xtidx reapost nájza rebengool nani rnibee xpeñ Jesucrist guedx Jeurusalén, te gusoob rexpejn Jesucrist diidx ni bacuaareni lo guijtz. ⁵ Bazutijp xtidx Dios lastoo renani huililajz xtidx Jesucrist. Guixegüxee xhidajlru bejn huililajz xtidx Dios xcuent Jesucrist.

Lo te bacad gunii te niguii lo Pabl

⁶ Che gudejdreni distrit Frigia, nájza estad Galacia, di Sprit Dxi xten Dios nusaan nusule'reni xtidx Jesucrist neñ reguedx Asia. ⁷ Bidzujntireni gajxh estad Misia. Dxejc rlaizreni nijreni estad Bitinia, niluxh di Sprit Dxi xten Dios nusaan nijreni ro'c. ⁸ Ni'c gudejdtireni stelaad estad Misia, bidzujnreni guedx Troas. ⁹ Te yäl si'c lo te bacad bahuu Pabl suga' te beñ Macedonia. Canabdixh niguiiga lo Pabl, räjpni:

—Gudaa ladxä, estad Macedonia, te gacnäjl nuunu.

¹⁰ Che bara yäl ni gunixcał Pabl, gudilgajcnu te barcw te chonnu estad Macedonia, sa'csi gucheenu Dios najc nani caguxhal nuure te guluiini xtiidxni lo rebeñ Macedonia. Narä, Lucas, ni cagucuaä rediidxre, gusanää Pabl nájza Silas.

Che guyu' Pabl con Silas guedx Filipos

¹¹ Biu'tinu neñ barcw ro' guedx Troas. Bidzun̄nu Samotracia, te yuj ni re' neñ nisdoo. Che bara yäl bidzun̄nu guedx Neápolis. Ro'c biriinu neñ barcw, ¹² bionnu guedx Filipos, guejdx nani sajru lo estad Macedonia. Guedx romanni. Ro'c bia'nnu tiop choñ dxej. ¹³ Che gojl sabd, dxej ni rusilajz rexpejn Israel, biriinu guejdxga bionnu ro' te gueuu, sa'csi biennu xhigab ro'c jiaäd rexpejn Israel te guininäjreni Dios. Ro'c gurejnu, guniinu lo renane' nani bire' ro'c. ¹⁴ Lojreni nadxaag te nane' ni laa Lidia, te benzijt

ni digac xpejn Israel. Guedx Tiatira siäädni. Ruto'ni ladmuraad ni sacduxh. Rajn gunaaga Dios si'c rajn rexpejn Israelni. Bacuadiaigni xtidx Jesucrist ni cagusule' Pabl. Gucnäj Dios nane'ga te huililajzni xtiidxni. ¹⁵ Birobnisni, näjza guiraa reni rbäjz rolizjni. Dxejc guniini loonu:

—Palga ruhuiitu guliä rililazä xtidx Dios, coltaa rolizä te ro'c cuääztu.

Lacti gunab nane'ga nuunu, ni'c huijia'nnu rolizjni.

¹⁶ Te dxej cheni sionnu cadro rrinäj bejn Dios, bidxaagnu te dxa'p nani yu' te beñdxab neñ lastooni. Rajp rexpaxhuaanni melduxh sa'csi rusule' dxa'pğa recos ni gajd gac. ¹⁷ Birinajl dxa'pğa Pabl näjza nuure. Rbedxa' dxape'ga, räjpni:

—Reniguiire najc xmos Dios nani rnibee guideb guedxliuj. Ruluiireni loonu xho laanu lo xtojnu —räjp dxape're.

¹⁸ Balti dxej birinajl dxape'ga nuure, entis caniini rediidxga lo rebejn. Lacti basieed dxape'ga Pabl, ni'c gubiréni, räjpni lo beñdxab ni yu' neñ lastoo dxape'ga:

—Xcuent xcälrnibee Jesucrist rniä lojlu: “Birii neñ lastoo dxape'ga.”

Lagajc dxejc birii beñdxab neñ lastoo dxape'ga.

¹⁹ Che bahuii rexpaxhuaan dxape'ga diru dxape'ga gun gaan melro, gu-naazreni Pabl näjza Silas. Dxejcti gudobxhaxhrenei guiro'preni nez roguui cadro suga' reguxhtis. ²⁰ Che bidzunnäjreni Pabl näjza Silas lo reguxhtis, räjp rexpaxhuaanni lo reguxhtis:

—Reniguiire najc xpejn Israel. Cayujnreni biey lo guejdxre.

²¹ Caguluiireni garenca leii nani digacdi gusoobnu sa'csi najcnu beñ roman. ²² Dxejcti bidxehnäj rebejn Pabl näjza Silas. Gunibee rejuejz gulääreni xhajb Pabl, näjza xhajb Silas, te batiäjlni baar guideb tiejxh guiro'preni.

²³ Che gulujx gudinduxhrenei Pabl näjza Silas, biäureni neñ latzguiib. Dxejcti räjp reguxhtis lo reguixhajg:

—Colgapdzu'tzreni, di gusaantu guiriireni.

²⁴ Basäl guixhajgreni neñ latzguiib. Guyu' ni'reni neñ te baräjd ni sojb gueed te di guxunreni.

²⁵ Garolyääl guninäj Pabl näjza Silas Dios, gusloj cayolreni dij ni rliä'p xpala'n Dios. Biejn diajg guiraa rebejn ni yu' neñ latzguiib cayolreni. ²⁶ Chela gujc te xuduxh, basniib guideb latzguiibga. Bixal guiraa repuert, birucya' guiraa recaden, bixal ro' rebaräjd cadro naaz ni'reni. ²⁷ Che gubajñ guixhajg ni canäj latzguiib, bahuiini naxhal latzguiib, gulääni spaad xtenni, te rlanjni nugu'tni lagajc laani, sa'csi naani abadxun reni niäu neñ latzguiib. ²⁸ Dxejc guredxa' Pabl, räjpni lo guixhajgga:

—Na'c gunlu si'c. Bahuii, guiraliinu suga'nu ree.

²⁹ Dxejc gunibee guixhajg biääd te bajl te biu'ni neñ latzguiib. Racsejsni biäädni bazuxhijbni nez loj Pabl näjza nez loj Silas. ³⁰ Dxejcti gulää guixhajgreni neñ latzguiib. Gunabdiidxni räjpni lojreni:

—¡Colguinii, dade'! ¿Xhini'c nanab gunä te guslaa Dios narä lo dojl?

³¹ Räjp Pabl näjza Silas lo guixhajg:

—Huililajztis xtidx Dios xcuent Jesucrist, luj näjza guiraa reni yu' rolizjlu, te guslaa Diostu lo dojl.

³² Basule' Pabl näjza Silas rextidx Dios lojni näjza loj guiraa rebejn ni yu' rolizjni. ³³ Lagajc dxejc, garol yääl, huinä guixhajgreni gudiibni dejtzeni cadro batiuug baarreni. Dxejcti batiobnisreni guixhajg näjza guiraa reni yu' rolizjni. ³⁴ Dxejc huinä guixhajgreni rolizjni, ro'c badeedni xhi gudajwreni.

Laani nájza guiraa reni yu' rolijzni bibalazduxhreni sa'csi huililajzreni xtidx Dios.

³⁵ Che bara yáäl, baxhał reguxhtis stiop guixhajg rájpnı lo guixhajg nani cuanáj latzguiib:

—Basłaa reniguiiga.

³⁶ Dxejcti huiye'tz guixhajgga lo Pabl, rájpnı:

—Anaj reguxhtis guslaätu. Naj colcháj, gacnáj Dios la'tu, saru cháatu.

³⁷ Niluxh rájp Pabl loj reguixhajg:

—Nuure najczanu beñ roman. Batiäjłreni baar detznu nez loj guiraa rebejn. Nicla niniabdiidxreni la yu' xhi dojl biennu. Basäurenı nuure nen latzguiib. Leii xten roman di gusaan gac reben roman si'c. Luxh naj rłajzrenı guslaärenı nuure xhiga'tz. ¡Dinu guirii si'c! Lagajc laarenı sujiädsläärenı nuunu.

³⁸ Che huiye'tz reguixhajg diidxga lo reguxhtis, bidxebduxhreni che biejn diajgrenı beñ roman najc Pabl nájza Silas. ³⁹ Dxejcti biäd reguxhtis, guläärenı Pabl nájza Silas, gunabrenı jiäjłajzrenı. Gunabduxhrenı lo Pabl nájza Silas; rájprenı:

—Coljiunejz guejdxre.

⁴⁰ Che biriirenı nen latzguiib, huijrenı rolijz Lidia. Balijdxrenı rexpajn Jesucrist, gulecdxirenı lajz rexpajn Jesucrist. Dxejcti biunejzrenı guejdxga.

17

Cadxechduxh guiraa reben Tesalónica

¹ Che gudejrenı reguedx Anfıpolis, nájza guedx Apolonia, bidzujnrenı guedx Tesalónica cadro yu' te xquidoo rexpajn Israel. ² Ro'c basule' Pabl xtidx Dios si'c ni rujncacni. Choñ sabd, dzej ni rusilajz rexpajn Israel, basule'ni xtidx Dios lojrenı. ³ Basule' Pabl xtidx Dios ni caj lo guijtız ni bacuaa reniguii ni gunii xtidx Dios galooli. Caj lo guijtızga: “Nanab ted Crist trabajwduxh, guetni, niluxh sibansacni lo rebengut.”

Dxejcti rájp Pabl lojrenı:

—Ruia lojtu diidx xcuent Jesús; lagajc Jesúsre najc Crist —rájpnı.

⁴ Yu' rexpajn Israel huililajz xtidx Dios, gusanäjrenı Pabl nájza Silas. Nájza xhidalduxh beñ griegw nani rajn Dios nájza xhidajł reguna griegw ni sajcro huililajz xtiidxni. ⁵ Luxh yu' rexpajn Israel ni di chalilajz, ni bidxechlajz. Bati'e'reni gaii beñploj, beñlatsıaj, bejnrenı biejy nez galäii. Biu'reni rolijz Jasón caguilrenı Pabl nájza Silas te cuäärenı guiro'prenı nez lo rebejn. ⁶ Niluxh che direni nidxäl Pabl nájza Silas, alga Jasón guläärenı nájza gaii renani rililajz xtidx Dios, sanäärenı redee lo reguxhtis, cabedxa'reni:

—Reniguiire ni abejn bieiduxh guideb guedxliuj abidzujnrenı laadxnu,

⁷ luxh badeed Jasón rolijzni jia'nrenı. Direni gusoob leii xten César, najrenı yu' stee reii ni laa Jesús.

⁸ Che biejn diajg reguxhtis nájza rebejn diidxre, guyu'reni yärsia'. ⁹ Cua' reguxhtis meel lo Jasón nájza lo rexamigwnı. Rájjp reguxhtis sudesacrenı meelga che jii Pabl nájza Silas, jiunejzrenı lo guejdxga. Dxejcti baslaärenı Jasón nájza rexamigwnı.

Che guyu' Pabl con Silas guedx Berea

¹⁰ Che biu' guxhijn, baxhalgajc rexpajn Jesucrist Pabl nájza Silas ste guejdx ni laa Berea. Che bidzujnrenı guejdxga, biugajcrenı xquidoo rexpajn Israel.

¹¹ Hueenru najc reben Berea loj reben Tesalónica, sa'csi rbaalı lajzrenı

bacuadiajgreni xtidx Pabl ni guniini xcuent Jesucrist. Guixe-guixee bilreni guijtz cadre caj xtidx Dios te gucbeereni la guli rextidx Pabl. ¹² Xhidajl rexepejn Israel najza xhidajl bejn griegw ni sajcru, gunaa sigajc niguii, huililajz xtidx Dios. ¹³ Che gucbee rexepejn Israel ni rbajz guedx Tesalónica caguluii Pabl xtidx Dios guedx Berea, biäädreni guedx Berea. Che bidzujnreni lo guejdxga bejnreni bieyj ro'c. ¹⁴ Dxejcti baxhal rexepejn Jesucrist Pabl, huijni ro' nisdo. Niluxh Silas najza Timoteu bia'n guedx Berea. ¹⁵ Dxejcti rebejn ni guzanäj Pabl huinänini guedx Atenas. Ro'c räjp Pabl lo rebejn ni biädnäni gudeedreni diidx lo Silas najza Timoteu jädgajczeni lojni. Dxejcti rebejn ni sanä Pabl gubisac guedx Berea.

Guyu' Pabl guedx Atenas

¹⁶ Lal ni guläjz Pabl guedx Atenas, guyuduxhni yärsia' sa'csi bahuiini rajn guiraa rebejn rebanäjb nani runchee lagajc bejn. ¹⁷ Ni'c nen xquidooreni gudildiidx Pabl rexepejn Israel najza rebenzijt ni rajn Dios si'c rajn rexepejn Israelni. Guixe-guixee gudildiidxni chutis bejn ni re' lo guii. ¹⁸ Dxejcti biäd gaii bejn lojni. Yu' reni rolduxh guijtz ni bacuaa epicúreos, yu'za renani rolduxh guijtz ni bacuaa estoicos, gudildiidxreni Pabl. Yu' reni räjp lo sa'reni:

—¿Xhicha guinii bejnre loonu? Entis naxhal ro'ni.

Yu'zaren i räjp lo sa'reni:

—Pet calä'pni xpala'n tiop dioscoob.

Si'c guniireni sa'csi biejn diajgreni bazä't Pabl “Jesús” najza “Resurreccion”, ni säloj yälgubansac lo rebengut. ¹⁹ Dxejcti gunaaazreni Pabl sanärenini nez dajn ni laa Areópago. Ro'c yu' si'c te jusgaad. Räjpreni lo Pabl:

—Rlaaznu gacbeenu xhi diidx ruluilu, ²⁰ sa'csi rujylo diidx nani dinu jiacbee. Ni'cni bejn huen, basule' diidxre loonu te gacbeenu xhi sälojreni —räjpreni.

²¹ Reben Atenas najza rebenzijt ni yu' ro'c rutedreni redxej rniireni didxcoob lo sa'reni, o rucuardiajgreni didxcoob. Ni'cpac rchagljazreni.

²² Galäii Areópago huisulii Pabl, räjpni lojreni:

—Colcuadiajg guejbtu, bejn Atenas. Abahuiä xho randuxhtu xhidajl banäjb.

²³ Che siädsä lo guejdxre, bahuiä lo rexpanäjbtu. Bahuiäza loj te piään cadre caj rediidxre: “Dios ni dinu jiembee.” Narä ranä Diosga. Rumbeä Diosga nani rajntu mase ditu gumbeeni. Susule'ä xtiidxni lojtu.

²⁴ Räjp Pabl:

—Diosre benchee guedxliuj najza guiralii ni yu' lo guedxliuj, sa'csi rnibeeni xhaguibaa najza guedxliuj. Di Diosre cuääz lo piään ni claza nen reguidoo ni runchee bejn. ²⁵ Diza Diosre guiquiin chu gacnäjni sa'csi lagajc Diosre ruded yäl'nabajn, yäl'nadaan, najza guiralii nani rquiin reben guedxliuj.

²⁶ Räjp Pabl:

—Guiralii reben guedxliuj najc rexagdoo tejsi gunaa najza tejsi niguii. Desde galooli gunibee Diosga bal ijz chu renacion, najza cati gunibee renacionga. ²⁷ Benchee Dios guiraa reben guedxliuj te quiiireni Dios te chalilajzreni xtiidxni. Luxh suga' Dios gajxh cadetejnu, ²⁸ sa'csi Dios rujn nabajnnu lo guedxliuj, runiidxni rsiaanu lo guedxliuj, runiidxzani rdajlruxcäl'nabannu lo guedxliuj. Laaca bacuaa rexpennajntu: “Najcnu xi'n Dios, sa'csi benchee Diosnu.” ²⁹ Ni'cni, sa'csi najcnu xi'n Dios, di nungäjil jiennu xhigab najc Dios si'c rebanäjb ni nac-chee pla't, o guij, o yajg si'ctis ni runchee bejn rexpanäjbtu. ³⁰ Nen redxej ni di bejn niembee Dios, diza Dios niujn castiigwreni. Niluxh naj gunibee Dios gusiechljaz guiraa rebejn, ³¹ sa'csi

abasoobni te dxej cheni gac Jesús juejz lo guiraa reben guedxliuj. Agule Diosni gacni juejz, sa'csi rumbechee Jesucrist chu najc benguijdx, chuza najc beŋsa'c. Rnilií Jesucrist rediidx ni najc guliitis. Guläs Dios Jesucrist, baspaŋsacnini lo rebengut, te gacbeenu rajp Jesucrist yälrnibee lo guiraa recos.

³² Che biejn diajg rebejnga gubaŋsac Jesucrist lo rebengut yu' reni baxhiznäj xtiidxní. Yu'za reni räjp:

—Sucuadijgrunu xcuent ni rusule'lu.

³³ Dxejcti birii Pabl lojreni. ³⁴ Yu'za reni huinajlñi, huililajzreni xtidx Dios. Lojreni nadxaag te dade' ni laa Dionisio ni najc te juejz lo Areópago; näjza te nane' ni laa Dámaris. Guyu'za sgaii bejn ni huililajz.

18

Guyu' Pabl guedx Corinto

¹ Biriiti Pabl guedx Atenas, huijni guedx Corinto. ² Ro'c bidxaagni te dade' ni najc beŋ Israel, ni laani Aquila. Ponto najc lajdxni. Biädgajni ro'c, biriini Roma, sa'csi gunibee reii Claudio guirii guiraa rexpejn Israel guedx Roma. Birinäj Aquila Priscila cháälñi. Biriireni Italia, biädreni guedx Corinto. Bihuii Pablreni, ³ sa'csi lagajc dzuun ni rujnreni rujnzani. Tejsi lajt guläjzreni te bejn jjonreni tejsi dzuun. Runcheereni yuguijd. ⁴ Gasob sabd, dxej ni rusilajz rexpejn Israel, basule' Pabl xtidx Dios neŋ xquidoo rexpejn Israel. Rlajzní chalilajz rexpejn Israel näjza beŋ griegw ni digac xpejn Israel diidx ni rniini xcuent Jesucrist.

⁵ Dxejcti birii Silas näjza Timoteu Macedonia. Che bidzujnreni guedx Corinto, gusloj rusule'tis Pabl xtidx Dios guixe-guixee, guniliini lo rexpejn Israel:

—Jesús najc Crist ni runloj rexpejntu guxhał Dios.

⁶ Dxejcti bidxechnäj rexpejn Israelni, guniyajzarení xtiidxní. Dxejcti gubijb Pabl xhajbni si'c te seen diruni jiureni, caguro'nnireni. Räjzpani lo rexpejn Israel:

—Lagajc la'tu rajptu dojl nittu lo Dios. Xhet dojldi rapä narä. Aguniä xtidx Jesucrist lojtu. Naj lo rebejn nani di gac beŋ Israel gusule'ä xtidx Jesucrist —räjpní.

⁷ Dxejcti biriini lojreni, huijni rolijz Justo, te bejn ni rajn Dios si'c rajn rexpejn Israelni. Rolijzní sojb cuä' xquidoo rexpejn Israel. ⁸ Crisp, ni rnibee xquidoo Israel, huililajz xtidx Jesucrist. Huililajzza guiraa reni rbäjz rolijzní. Xhidajlza beŋ Corinto huililajz xtidx Jesucrist, dxejcti birobnisreni. ⁹ Gojl te yääl gunii Dios lo te bacał, räjpni lo Pabl:

—Na'c guidxeyblu. Guniitis, na'c gusäulu ro'lu, ¹⁰ sa'csi narä suganää luj. Rut gacdi gun latsiajlu. Aguleä xhidalduxh bejn lo guejdxre te gacreni xpenä —räjp Dios.

¹¹ Ni'c bia'n Pabl ro'c tebizgarol. Baluiini xtidx Dios lojreni.

¹² Che gujc Galíon gubernadoor xten Acaya, tejsi xhigab bejn rexpejn Israel bidojpreni te gunaazreni Pabl. Sanäreni Pabl jusgaad cadro yu' Galíon.

¹³ Räjzpani lo Galíon:

—Niguiire cagului rebejn gaŋreni Dios garena mood, xhet si'cti ni caj lo xleiiinu —räjzpani.

¹⁴ Agojl ninii Pabl, che räjp Galíon lo rexpejn Israel:

—Palga gulanni o bagu'tni te bejn, dxejc yu' xtojlni te gucuadiagä xtiidxtu.

¹⁵ Per la'tu cadxe'chtu xcuent diidx, xcuent laj bejn, xcuent ni caj lo leii

xtentu. Gubernadoor narä, xho gucuadiagä diidxga. Lagajc la'tu colchahuii xho guntu yälguxhtis —räjp Galíon.

¹⁶ Gunibee Galíon barilaagw resoldaad rexpejn Israel. ¹⁷ Dxejc gunaaz reGriegw Sóstenes nani rnibee xquidoo rexpejn Israel. Batiäjłreni baar dejtj Sóstenes nez ro' jusgaad xten Galíon. Niluxh nicla niu Galíonreni.

Chon huält huihuii Pabl rexpejn Jesucrist

¹⁸ Bia'nti Pabl Corinto xchej. Dxejc badeed Pabl xtixtios lo rebejn nani huililaz xtidx Jesucrist, biriini ro'c. Sanäni Priscila näjza Aquila, biu'reni neñ barcw te siireni nez estad Siria. Dxejc ganid gudejdreni guedx Cencrea, cadreo bahuaj Pabl yejcní si'c te seen yu' xhi diidx bia'nni con Dios. ¹⁹ Che bidzujłreni guedx Éfeso, basa'n Pabl Priscila näjza Aquila ro'c. Biu' Pabl xquidoo rexpejn Israel, ro'c bachaagni diidx con rexpejn Israel. ²⁰ Dxejcti che gunabreni jia'n Pabl ro'c xchej, naaddini jia'nni. ²¹ Badeedni xtixtios, räjpni lojreni:

—Nungäjłpac chatedä laniro guedx Jerusalén. Siälsacä ree palga gusaan Dios jiälä.

Bisucni neñ barcw, biriini guedx Éfeso. ²² Che bidzujłni guedx Cesarea, biriini neñ barcw, huijni guedx Jerusalén. Che bidzujłni, guniini xchan lo reapost näjza lo rexpejn Jesucrist. Dxejc huijni guedx Antioquia xten Siria. ²³ Che gudejd balti dxej, biriini guejdxga, gudejdni guideb estad Galicia näjza guideb distrit Frigia. Neñ cade tej reguejdxga, balijdxni rexpejn Jesucrist te gutijpru lajzreni.

Baluii Apolos xtidx Dios neñ guedx Éfeso

²⁴ Neñ redxejga, te dade' ni laa Apolos bidzujł guedx Éfeso. Najcni xpejn Israel, gojłni guedx Alejandría xten Egipto. Lacti rajc rnisa'cni, nanduxhzani xtidx Dios. ²⁵ Nanduxhni xtidx Dios xcuent Jesucrist. Laaca basule'ni xtidx Dios, guideb xcälñabajłni rinälajzni Dios. Niluxh xcuent Jesucrist najntisni yälrobnis xten Juan. ²⁶ Nicla nidxejb Apolos gusloj caniini neñ guidoo xten rexpejn Israel. Che biejn diajg Priscila näjza Aquila xtiidxni, huinärenini rolizreni. Ro'c basule'rurení xtidx Dios nani gajdni gan. ²⁷ Dxejc, sa'csi abejn Apolos xhigab chääni reguejdx ni tre' nez Acaya, bacuaa rexpejn Jesucrist guiłzt lo rexpejn Jesucrist ni yu' neñ reguejdxga te gacnäjreni Apolos. Gucnäduxh Apolos rebejn nani badeed Dios huililajz xtidx Dios neñ reguejdxga, ²⁸ sa'csi gunilii Apolos nez loj guiraa rebejn xhet laadi rnii rexpejn Israel. Di niajcdi nuzejc rexpejn Israel diidx lo Apolos sa'csi ganax con xtidx Dios ni bacuaa reniguii ni gunii xtidx Dios galoo basule'ni: “Jesús najc Crist nani cayunlojtu guxhał Dios.”

19

Guyu' Pabl guedx Éfeso

¹ Lał ni guyu' Apolos guedx Corinto, huij Pabl xhidajł reguejdx neñ región Asia, dxejcti bidzujłni guedx Éfeso cadreo bidxaagni gaii bejn nani huililajz xtidx Dios. ² Gunabdiidx Pabl lojreni:

—Che huililajztu xtidx Dios, ¿la biädłajz Sprit Dxan xten Dios neñ lastootu, ä?

Räjłpreni lojni:

—Nicla gajd diajgnu jiejn la yu' te Sprit Dxan xten Dios.

³ Räjłp Pabl lojreni:

—¿Xho birobnistu, pues?

Räjpreni lojni:

—Birobnisnu si'cni baluii Juan tiobnis bejn.

⁴Dxejcti räjpreni Pabl lojreni:

—Gullicha bastiobnis Juan che basiejch lajz rebejn xtojreni. Räjpreni Juan lo rebejn: “Colchalilajz xtidx bejn ni siääd detzä.” Bejn ni basä'tni najc Jesucrist —räjpreni Pabl.

⁵Che biejn diajgreni rextidx Pabl birobnisreni te gacbee rebejn najczeni xpejn Jesucrist. ⁶Che batzuub Pabl naani yejcreni, biu' Sprit Dxaan xten Dios nen lastooreni. Dxejcti gusloj caniiireni garen-garen didxsaj. Guslojza caniiireni diidx ni badeed Dios lojreni. ⁷Si'c tzubitio'p dade' gusajc si'c.

⁸Si'c choñ bääi, guixe-guixee gunii Pabl rextidx Dios, basule'ni xcuent xcäl'ribee Dios loj rebejn nen xquidoo rexpejn Israel. Dini nidxejb guniini loj rebejn.

⁹Dxejcti guyu' reni gucnajd, dirureni nililajz xtidx Dios. Che gusloj caniya-jreni xtidx Dios lo rebejn, biunejz Pabl ro'c sanäni rexpejnni ni rililajz xtidx Jesucrist. Sanä Pablreni te bidxagsa'reni ro scueel xten mastr Tiranno. Ro'c bidxagsa'reni te guixe-guixee basule' Pabl xtidx Dios lojreni. ¹⁰Tiop ijz bejn Pabl si'c, ni'c guiraa rebejn ni rbäjz Asia biejn diajgreni xtidx Dios. Rexpejn Israel sigajc reben griegw biejn diajgreni xtidx Dios. ¹¹Gucnäz Dios Pabl bejn ni xhidajl dzunro, remilagwr. ¹²Ni'cni biääd bejn ca'reni bääi, ca'reni tla' lajd te guxheebreni relajdga lo Pabl. Dxejcti rinäreni relajdga lo rebejn ni racxhuu, luxh riacgajc rebejn ni racxhuuga, rigajcza rebejndxab lastoo renani yu' bejndxab.

¹³Dxejcti guyu' gäi beñ Israel nani entis rcansaj, direni cuääz tejsi guejdx. Najczeni bejn ni rbää bejndxab lastoo rebejn. Bejn redee xhigabcoob, naareni cuääreni bejndxab xcuent laj Jesucrist, ni'cni räjpreni lo renani yu' bejndxab nen lastooni:

—Xcuent xcäl'ribee Jesucrist nani ruluii Pabl nrubeenu guiriilu nen lastoo bejnga —räjpreni.

¹⁴Guyu' gajdz xi'n Esceva, te beñ Israel, nani sajcro lo rebixhojz. Rujn redee dzuun rbääreni rebejndxab nen lastoo rebejn. ¹⁵Che gunii rexi'n Esceva loj bejndxabga si'c, räjpreni bejndxab ni yu' nen lastoo bejnga lojreni:

—Rumbeä Jesucrist, rumbeäza Pabl. ¿La'tu, chu la'tu? Dina gumbeä la'tu.

¹⁶Dxejcti bixa't niguii nani yu' bejndxab nen lastooni yejcti rexi'n Esceva, gudinduxhnireni, basäl'ta'nireni, batiäjsni xhajbreni. Dxejcti baxunreni biri-ireni nen yu'ga, bidxäl'gijdxazareni biräsya' xhajbreni. ¹⁷Dxejcti guiraa reben Éfeso, rexpejn Israel sigajc beñ griegw, gucbee xho bennäj bejndxab renigui-iga. Bidxebduxh rebejnga, luxh huä'p xpala'n Jesucrist.

¹⁸Xhidalduxh reni huililajz xtidx Dios biääd lo rexpejn Jesucrist. Cacäjpreni guiraa recos xhet laadi nani rujnreni. ¹⁹Xhidajl reni najc bidxaa biädnä reguijtz cadro caj yäl'najn xten rebidxaa. Dxejcti base'creni reguijtzga nez loj guiraa rebejn. Bejnreni cuent lacti meel saj reguijtzga. Sajczeni tiubitzuu miñ melpla't. ²⁰Xhidalduxh rebejn huililajz xtidx Dios. Batjpreni Dios lastoo rexpejnni. Gulä'p guiraa'reni xpala'n Dios.

²¹Che gulujx recosre, bejn Pabl xhigab chääni guedx Jerusalén, niluxh tedxgaani reguejdx ni re' nez Macedonia näjza Acaya, bejnzeni xhigab, naani:

—Che ahua'a Jerusalén, nanabza cha'a guedx Roma.

²² Ni'cni baxhal Pabl Timoteu nájza Erasto, tio'p renani racnájni, huijreni Macedonia, luxh laani bia'nni Asia.

Bidxechduxh reben Éfeso

²³ Nen rexhejga, guyuduxh rebejn yársia' sa'csi baluui Pabl xtidx Dios. Direni nichagljaz care'ch xtidx Dios. ²⁴ Te dade' ni laa Demetrio runchee ni'ch pla't xten banájb ni laa Diana, ni najc banájb xten guejdxga. Demetrio nájza guiraa replateer ni rujn ni'ch xten Diana runduxhrenei gaan meel ro'c. ²⁵ Gurejdx Demetrio guiraa replateer ni rujn reni'chga, rájpmi lojreni:

—Colcuadiajg, la'tu resa'ä: najntu rbäänu melro lo dzuun ni riennu. ²⁶ Abahuiitu niguiire ni laa Pabl. Abiejnza diajgtu xtiidxni. Rájpmi lo rebejn: “Xhet diosdi najc reni racchee con naa bejn.” Guedx Éfeso nájza guideb naciön Asia cagusiejchni lajz bejn, xhidalduxh bejn salilajz xtiidxni. ²⁷ Ni'c ries nitlo xtzunnu palga diru bejn sii ni'ch ni riencheenu. Luxh riesza diru bejn jiädgajn Diana nen xquidoro Diana. Naj reben Asia, nájza guiraa reben guedxliuj randuxh Diana, banájb ni sajcro, niluxh palga diru rebejn gan Diana, pet sinitlojni —rájpmi.

²⁸ Che biejn diajg replateer xtiidxni, bidxe'chduxhrenei, guredxa'reni rájpmi:

—Sacduxh Diana xtios reben Éfeso.

²⁹ Guideb guejdx guyu' bieje. Dxejcti ruxunrenei bidxagsa'reni lo yuj cadro rajc rexjuntreni. Gunaazreni Gayo nájza Aristarco, ben Macedonia ni rinajl Pabl. ³⁰ Rlajz Pabl niu'ni cadro bidxagsa' rebejn, niluxh di rexpejn Jesucrist nusaanni. ³¹ Gaii guxhtis ni rnibee Asia, sa'csi najcreni xamijgw Pabl, baxhal'reni diidx lo Pabl, rájpmi:

—Na'c cháälu cadro nadxagsa' rebejnnga —rájpmi.

³² Lo rebejn ni re'ga, yu' reni rbedxa' tej diidx, sgaiireni rbedxa' garenca diidx. Te bieiduxh cayajc. Xhidalduxh rebejnnga nicla gan xhicient bidxagsa'reni. ³³ Dxejcti gulää rexpejn Israel te dade' ni laa Alejandro lo reben xhidaalga, te guiniini lo rebejn. Dxejcti basääbni naani lo rebejn te gac dxi rebejn. Rlajz Alejandro guiniini xcuent rexpejn Israel loj guiraa rebejn, te di guidxe'chrenei lo rexpejn Israel. ³⁴ Niluxh che gucbee rebejn najc Alejandro ben Israel, tiop or guredxaduxhrenei, rájpmi:

—Sacduxh Diana xtios reben Éfeso.

³⁵ Dxejcti biääd secretaar xten guejdxga lo rebejn, gunibeeni guc dxi rebejn, te rájpmi lojreni:

—Colcuadiajg, la'tu ben Éfeso, caguidxäjł te ben guedxliuj ni di gacbee reben guedx Éfeso rajnpac Diana, nani xhaguibaali bitejb lo guedxliuj. ³⁶ Sa'csi rediidxre najc gulii, nungäjł cuedxitu, na'c guntu recos gujdxre. ³⁷ ¿Xhicient gunaaztu reniguii ni siädnätu ree? Direni gac gubaan ni rbajn recos guidoo, dizareni niniyaj xtiosnu. ³⁸ Naj palga rlajz Demetrio nájza rebejn ni najc pleteer chale'c quej, naxhal jusgaad, suga' reguxhtis. Ro'c suchale'creni xquejreni. ³⁹ Niluxh palga yu' xhi stee, nanab gub te junt xte reben'guejdx si'c ni caj lo xleiinu. ⁴⁰ Ries jii xquejnu lo gubier, naareni bidojpmu te guidxagdłnu gubier. ¿Dxejca'? ¿Xhi jie'tznu xcuent ni bidxagsa'nu ree?

Dxejcti rájpmi:

—Agojl, coljiunejz.

⁴¹ Che gunii secretaar si'c, bire'ch rebejn, biunejzreni ro'c.

20

Huihuisac Pabl rexpejn Jesucrist ni yu' Macedonia nájza Grecia

¹ Che bire'ch rebejn, gurejdx Pabl rexpejn Jesucrist biäd lojni, te bali-djdxnireni. Badeedni xtixtios lojreni. Sä'tini nez reguedx Macedonia. ² Guiraa reguejdxga cadro gudejdi, baliidxni rexpejn Jesucrist, basule'runi xtidx Dios lojreni. Dxej sääni reguedx Grecia. ³ Che bidzujñni Grecia, bia'nni ro'c chon bäii. Dxejcti niu' Pabl neñ barcw te nijni reguejdx Siria. Niluxh che biejn diajgni cabäz-xhiga'tz rexpejn Israelni te guiniaazrenini, gunaazni nezyuj, gubi'ni nez Macedonia. ⁴ Huinäni Sópater, xi'n Pirios, te beñ guedx Berea; náj Aristarco nájza Secondo, beñ guedx Tesalónica; náj Gayo, beñ guedx Derbe; náj Timoteu; náj Tíquico nájza Trófimo, beñ Asia. ⁵ Guiraa redee gunijd loonu, huiläjzreni nuure guedx Troas. ⁶ Guedx Filipos bidxaag Pabl narä, Lucas. Ro'c gudejdxni lanij xten rexpejn Israel che rajwreni yätxtiil ni di saguij. Biriitinu guejdxga, biu'nu neñ barcw te sonnu nez guedx Troas. Gaii dxej gusaanu neñ barcw, dxejc bidzunnu guedx Troas. Ro'c bia'nnu gajdz dxej.

Baluu Pabl xhidalduxh xtidx Dios lo rexpejn Jesucrist guedx Troas

⁷ Che gojl dumingw, primer dxej xman, bidxagsa'nu te bidaunu yätxtiil si'c gudaunäj Jesucrist rexpejn pacni galoo che gajdñi guet. Abejn Pabl xhigab guira yääl guiriini guejdxga. Che biu' guxhijn, gusloj cagusuleduxh Pabl xtidx Dios, huinuuni si'cti garolyäälli. ⁸ Yu' cadro bidxagsa'nu najc jiaa yejc stiop yu'. Xhidalduxh balgandeel cagusanij ro'c. ⁹ Sobga' te bi'n ni laa Eutico ro' te bentaan. Lañ ni cagusuleduxh Pabl xtidx Dios lo rebejn, gunaaz bacal bi'nga, gudiejsni, bitejñni lo yuj desde yu' ni riojn pis. Che huiläsrenini, agujñi. ¹⁰ Dxejcti biäjñ Pabl lo yuj cadro bitejñ bi'nga. Bazuxhijb Pabl cadro naga' bi'nga, gudäözñni. Dxejcti räjp Pabl lojreni:

—Na'c chutu yärsia'. Agubansacni. Baspajñ Diosni.

¹¹ Dxejcti huäpsac Pabl lo yujiaaga. Ro'c bidaunu yätxtiil si'c gudaunäj Jesucrist rexpejn pacni galoo che gajdñi guet. Gunii Pabl lojreni xchejru, che bianijli lo guedxliuj. Dxejc biunejñi. ¹² Xhetliidiru rajcñi bi'nga nani gubansac, nani guläs Pabl. Bibalazduxhrenei, huisa'nrenini rolizñi.

Biu'nu neñ barcw, bionnu guedx Mileto

¹³ Gunijdxni lo Pabl. Biu'nu neñ barcw, sonnu guedx Asón, te ro'c guidx-aagñu Pabl, sa'csi abejñ Pabl xhigab ni'ni jiini guejdxga, ro'cli jiu'ni neñ barcw. ¹⁴ Che bidxaag Pabl nuunu guedx Asón, biu'ni neñ barcw, sonnu lo nisdoo te bidzunnu guedx Mitilene. ¹⁵ Neñ barcw biririnu ro'c. Che bara yääl, gudejdxni yuj ni re' lo nisdoo ni laa Quío. Che bara stee yääl, bidzunnu guedx Samos. Guedx Trogilio basilaaznu. Che bara stee yääl, bidzunnu guedx Mileto. ¹⁶ Di rlajz Pabl jiu'nu guedx Éfeso, diza rlajzñi chunu Asia xchej, sa'csi riojb lajzñi guidzunnu guedx Jerusalén te ro'c tedni redxe lanij ni laa Pentecostés.

Guedx Mileto guninäj Pabl reni rnibee xpejn Jesucrist ni yu' guedx Éfeso

¹⁷ Che guyu'nu guedx Mileto, baxhañ Pabl diidx lo rexpejn Jesucrist ni yu' guedx Éfeso, gurejdxni reni rnibee. ¹⁸ Che bidzujñreni lo guejdxga, räjp Pabl lojreni:

—Lagajc la'tu najntu xho nabañä nez lojtu, dxejli ni bidzunä, nabañnää Dios. ¹⁹ La'tu najntu xho runä xtzuun Jesucrist guixe-guixee, guideb xcälñadipä. Dina niliä'p ä xpala'nä. Najntu xho ronä che di bejn chalilajz xtidx Jesucrist. Che rlajz rexpejn Israel nugu't narä, gudedä trabajwduxh.

²⁰ La'tu najntu xho baluiä lojtu guiralii rextidx Dios ni najc huen par la'tu. Che nadxagsa'tu baluiä xtidx Dios lojtu, näjza rolizj cade tejtü huiluiä xtidx Dios lojtu. ²¹ Basule'ä xtidx Dios lo rexpejn Israel näjza lo rebenzijt ni di gac xpejn Israel. Röpä lojreni nanab gusiechlajzreni, gusa'nreni xtojlneni, nanab chalilajzreni xtidx Jesucrist te gudzucaj Dios xtojlneni. ²² Naj cadedä te laad guejdx xtentu, sia'ä guedx Jerusalén, sa'csi caguxhal Sprit Dxan xten Dios narä cha'ä guedx Jerusalén. Dina ganä xhi sacä ro'c. ²³ Niluxh nanä cade tej reguejdx cadro rdedä rnii Sprit Dxan xten Dios loä sidedä trabajwduxh, siäüä nen latzguib guedx Jerusalén. ²⁴ Niluxh dina guidxebä, dizana chanälazduxhä xcäl'nabanätis, te guluxä dzuun nani baniidx Jesucrist gunä. Lo dzuun ni baniidx Jesucrist nanab chaye'tzä lo guiraa rebejn sibicaj xtojlneni palga chalilajzreni xtidx Dios xcuent Jesucrist —räjp Pabl.

²⁵ Räjpzani:

—Naj agucebä dirutu fisac loä, la'tu nani basule'ä xcäl'mibee Dios lojtu.

²⁶ Rniliäpac lojtu, xhet dojldi rapä palga yu' te bejn ni di chalilajz xtidx Dios, ni di Dios gudzucaj xtojlni. ²⁷ Xhetliidi biäädxdidi loj rextidx Dios ni basule'ä lojtu. Dina nucua'tzä nicla tej xtiidxni xcuent xho rlajz Dios guibañnu.

²⁸ Colga'p lagajc la'tu si'c ra'p baxhtoor xiil, si'c colga'p guiraa rebejn nani rililajz xtidx Dios sa'csi Sprit Dxan xten Dios abaniidx dzuunga guntu, ni'cni abixe' xtiejn Jesucrist lo cruzj te gac gudzucaj Dios xtojlneni. ²⁹ Anancheä che rutdiru narä, siääd bejn nani rlajz chalilajztu ste'ca diidx, na'c chalilajztu niclaza jjuutu rebejnga. Rusgueetisreni la'tu. Sutie'chreni la'tu lo sa'tu si'c rutie'ch cuyo't rexiil. ³⁰ Su'za lagajc sa'tu ni guinii didx-xhii lojtu te gunreni gusaan rexpejn Jesucrist xtidx Dios, te chanajlreni redee ni rusguee.

³¹ Colhuii te di gusgueereni la'tu. Di jial'-lajztu chon ijz, dxej yääl basule'ä xtidx Dios, ronäli balidxätu, sa'csi sanälazätu.

³² Räjpa Pabl:

—Asia'are, rusa'nätu ladznaa Dios, gacnäj Dios la'tu. Sutijp xtidx Dios lastootu, te xca'tu guiraa ni bia'n diidx guniidx Dios lojtu, näjza loj guiraa ni abejn Dios bensa'c, nani najc xpejn. ³³ Dina niniabä meel, niclaza xhabä che baluiä xtidx Jesucrist lojtu. ³⁴ Anajntu lagajc narä benä dzuun con nää te bio' xhi gudaunää reexamigwä. ³⁵ Si'c benä te filojtu xho guntu dzuun te gacnäjt sa'tu ni xhet rajpdi, te guinaj lajztu xtidx Jesucrist che najni: “Huenru guideednu lo bejn quela xcaxlia'nu xhi cos” —räjpn.

³⁶ Che gulujx gunii Pabl rediidxga, bazuxhibnäjni rebejnga, guredx-gunabni lo Dios. ³⁷ Dxejcti ronduxh guiraareni gudääzreni guejn Pabl, bachagro'renini. ³⁸ Guc-huinduxh lajzreni dxejc sa'csi räjp Pabl dirurenii fisac lojni. Dxejcti huisa'nrenini lo barcw.

21

Huij Pabl guedx Jerusalén

¹ Che basa'tinu rexpejn Jesucrist ro'c, biu'nu nen barcw, sionnu te lii nejz lo yuj ni laa Cos, ni tre' lo nisdoo. Che bara yääl, bidzunnü lo xyuj Rodas ni tre'za lo nisdoo. Ro'c biriinu sionnu nen barcw nez guedx Pátara.

² Che bidzunnü ro' guejdxga, bidxälnu te barcw ni sää nez reguedx Fenicia. Dxejc biu'nu nen barcwga te chonnu ro'c. ³ Bahuiinu lo yuj Chipre ni tre' lo nisdoo, xladbäjcwnu tre' yujga, bideednu te laad. Siontinu nez Siria, ro'c bidzunnü guedx Tiro cadro gule'creni cargw ni nuu barcwga. ⁴ Ro'c bidxälnu rexpejn Jesucrist. Biannänurenii gajdz dxej. Baluii Sprit Dxan xten Diosrenii lo Pabl, räjprenii:

—Na'c chäälu guedx Jerusalén.

⁵ Che baza' gajdz dxej, biunejznu guejdxga. Dxejc guzaj reniguii, regu-naa, nájza rexi'nreni biriinu guejdxga. Ro' nisdoo bazuxhjbnu te guredx-gunabnu lo Dios.

⁶ Che abazadiidxnu sa'nu, nuure biu'nu neñ barcw, biädla laareni gubisacreni rolizreni.

⁷ Biriitinu guedx Tiro. Che bidzunnu ro' guedx Tolemaida, guluix xpiajnu biäjtnu neñ barcw. Dxejc biohuiinu rexpejn Jesucrist ni yu' guejdxga, biannänureni tejtis yääl. ⁸ Che bara yääl, biriinu guejdxga, sonnu guedx Cesarea. Che bidzunnu guejdxga, bionnu roliz Felipe, te dade' ni rusule' xtidx Dios lo bejn. Felipe gujc tej lo gajdz niguii nani gudis xhi gudajw rexpen Jesucrist nani xhet rajpdi guedx Jerusalén. Rolizjni huijia'nnu. ⁹ Yu' tajp xindxapxteb Felipe. Dios badeed diidx guiniireni lo bejn. ¹⁰ Xhidajl dxej guläjnzu roliz Felipe. Lañ ni dxunnu ro'c, bidzujñ te niguii ni laa Agabo, biriini nez Judea. Ruzanj Dios xcäriejnñi te guiniini xtidx Dios.

¹¹ Che bidzujñni loonu, cua' Agabo xsindoor Pabl, baliibni lagajc reni'ni nájza reñaani, najni loonu:

—Anaj Sprit Dxan xten Dios: “Scree suliib rexpejn Israel ni yu' guedx Jerusalén niguii ni najc xtenni sindoorre te guteedrenini ladzñaa rebenzajt.”

¹² Che biejn diaagnu rediidxga, nuure nájza reben ro'c, gunabduxhnu lo Pabl na'c chääni guedx Jerusalén. ¹³ Dxejc naj Pabl loonu:

—¿Xhicient roontu? ¿Xhicient runhuiintu lazä? Xhet najcdi jiäüä neñ latzguuib, xhet najcdi palga nungälä guetä guedx Jerusalén xluent Jesucrist —rajp Pabl.

¹⁴ Che naaddi Pabl gusiechlajzni, xhetru guniidinu lojni. Räjptisnu lojni:

—Sugac nani rlanjtis Dios.

¹⁵ Che gudejd redxejga, bilucheenu rehxixtenu, biriinu guejdxga, son-tinu guedx Jerusalén. ¹⁶ Gaii rexpejn Jesucrist ni najc ben Cesarea huisa'n nuure guedx Jerusalén. Ro'c huinäreni nuure roliz te dade' ni laa Mnasón, ben Chipre, yuj ni tre' lo nisdoo. Laani galooli huililajzni xtidx Dios. Huijia'nnu rolizjni, ro'c gulääznu.

Huihui Pabl Jacoob

¹⁷ Che bidzunnu guedx Jerusalén, bibalazduxh rexpejn Jesucrist sa'csi siopnu ro'c. ¹⁸ Che bara yääl huinänu Pabl lo Jacoob nájza lo renani rnibee guidoo xten rexpejn Jesucrist. ¹⁹ Dxejc gudääz Pablreni, bijni diidx xluent tebgaj redzuun nani badeed Dios bejnñi che guyunäjni rebenzajt nani di gac xpejn Israel, te biejn diajgreni xtidx Dios. ²⁰ Che biejn diajgreni xtidx Pabl, gulä'preni xpala'n Dios, räjpzareni lo Pabl:

—Guejblu, sa'nu, anajnlu lacti xhidalduxh xpejn Israel yu' nani rililajz xtidx Jesucrist luxh rapdaduxhrenei leii xten toMoisés. ²¹ Abiejn diajg re-bejnre xluentlu. Abiejn diajgreni garenca ruluiilu guiraa rexpejn Israel nani rbäjz neñ reguejdx xten rebenzajt, ruliidxlureni na'c gusalreni bee rexi'nreni, na'cza chazanäjrrureni rexcostumbrnu. ²² ¿Xhini'c jiennu? Siejn diajgreni abidzujñlu ree, dxejc suchagsa'reni te jiäädreni lojlu. ²³ Naj gunlu nani guiniinu lojlu. Yu' tajp resa'nu ree nani basa'nreni diidx lo Dios. ²⁴ Huinäreni, nájza luj bejn si'ctis gunreni si'c ni caj lo leii xten toMoisés, te gaclu naya nez lo Dios. Luj quiixlu guiraa ni banijtreni, te che abasa'tu guiraa ni nanab gac sajç guigaj yejctu si'c te seen te gacbee guiraa rebejn abasobtu leii. Dxejcti gan guiraa rebejn didx-xhii najc rediidx ni biejn diajgreni xluentlu. Te gacbeerenei laaca rusooblu xleii toMoisés. ²⁵ Biädla rebenzajt nani huililajz

xtidx Jesucrist, xhet najcdi, sa'csi abacuaanu lojreni, rie'tznu lojreni: na'c gautu recos nani gule'c bejn si'c gojn loj banäjb, na'c gautu rejn, niclaza bääl nani gurerejn, na'c guesnäjtu nani di gac chäältu.

Gunaaz rexpejn Israel Pabl

²⁶ Che bara yääl, huinä Pabl guidap niguiiga, bejnreni si'c caj lo xleii toMoisés, biu'reni nen xquidoo rexpejn Israel te huiye'tzreni lo bixhojz nen guidoo xhi dxej jiadnä tejegareni te man te ju't rebixhojz remanga lo Dios.

²⁷ Si'c nanab gunreni gajdz dxej. Che ameer guiza' redxejga, bahuii rexpejn Israel ni siääd Asia lo Pabl nen guidoroga. Gunaazreni Pabl, dxejcti gusloj cayujnreni biey, ²⁸ guredxa'reni räjpreni:

—¡Coltaa xpejn Israel! ¡Coltaa te gacnäjtu nuure! ¡Bahuilaaire! Niguiire najc nani rniyaj rexpejn Israel cadrotis rijni. Rulijdxni bejn te di chazanäjrureni xleii toMoisés, riye'tzni lo bejn xhet sajcdi xquidoronure. Colhuilaa xho siädnäni ree ben griegw, benzijt ni di gac xpejn Israel, te gundxuudxni xquidoronu —räjpreni.

²⁹ Si'c caniireni sa'csi te huält bahuiireni sanä Pabl Trótimos lo nezyuj. Trótimos najc te benzijt ni siääd guedx Éfeso. Naj cayujnreni xhigab laa niguiiga ni siädnä Pabl nen xquidoro rexpejn Israel.

³⁰ Guideb guejdxga guyu' yärsia', bire' benguixhuj, bixa'treni yejc Pabl, gunaazrenini, gudobxhaxhrenei Pabl, gulägajcneni nen guidoroga. Biägajc repuertro xten guidoro. ³¹ La! ni cayujnreni xhigab ju'trenini, yu' chu huiye'tz lo nani rnibee resoldaad ni caya'p guejdxga, räjpreni:

—Cayajc te bieiduxh nen guejdxre.

³² Guredxgajc comandant resoldaad näjza gaii capitán, ruxunreni bidzujnreni cadro tre' rebejn. Che bahuii rebejn lo comandant näjza resoldaad, guläjz cagujnreni Pabl. ³³ Dxejcti gubig comandant lo Pabl, gunibeeni baliib resoldaad naa Pabl con tiop cadenguiib. Dxejcti gunabdiidxni lo Pabl, räjpni:

—¿Chu luj? ¿Xhini'c bejnlu?

³⁴ Lo reben xhidaalga yu' rexpejn Israel ni guredxa' tej diidx, yu'za reni guredxa' ste'ca diidx. Di comandant niujn gan niacheeni xhicuent cayajc biey sa'csi cabedxa' guiraa rebejn. Dxejc gunibeeni chanä resoldaad Pabl cadro rbäjzreni. ³⁵ Che bidzunäj resoldaad Pabl ro' scaleer ni caj ro'c, biireni Pabl te bejnreni gan biunäjreni Pabl, sa'csi nialazduxh rebejn rlaizreni nugu'treni Pabl.

³⁶ Siädnajl guiraa rebejn Pabl, rbedxa'reni:

—Colgugu'tni.

³⁷ Che agojl jiu' Pabl nen yuro xten resoldaad, räjpni lo comandant con diidx griegw:

—Rlazä guiniä tiop diidx lo guejblu.

Räjp comandant lo Pabl:

—¡An rniilu xtidxsa! ³⁸ An dilu gac niguii ni siääd nación Egipto, nani gudilnäj gubier, nani huinä lo reyubijdz tajp mil niguii nani rugu't bejn.

³⁹ Dxejc räjp Pabl lojni:

—Narä nacä te bejn Israel, te bejn Tarso xten Cilicia. Sacduxh guejdxga lo reguedx Cilicia. Canabä gun guejblu te hueen, gusaan guejblu guiniä lo rebejnre.

⁴⁰ Dxejc cuäjb comandant guinii Pabl lo rebejn. Lal ni suga'ni lo scaleer basääb Pabl naani lo rebejn te gucdxireni. Che aguredxi rebejn, gusloj Pabl canii lojreni didxsaj hebreo, räjpni:

22

¹ —Guejbtu bengool, guejbtu resa'ä, näjza la'tu dade'. Gucuadiajgtu rextidä —räjpni.

² Che biejn diajgreni caniini didx hebreo, dxidujru guzuj rebejn. Räjp Pabl lojreni:

³ —Narä nacä te xpejn Israel. Guedx Tarso xten Cilicia golä. Reepac gulaä. Lo Gamaliel bisiedä guijt. Baluisa'cni narä guiragajc releii xten retoxtad-goldoonu. Guideb xtipä basobä ni gunibee Dios. Gucä si'cpac ni najctu naj. ⁴ Dxejcti bidxechduxhä loj renani huililajz xtidx Jesucrist, bagu'täzaren. Balibä xhidajl bejn, niguii näjza gunaa, con cadenguuib. Basäuäreni neñ latzguuib. ⁵ Bixhojz ni sajcrü näjza guiraa rebengool ni sajcrü neñ xquidootu, sajç guinii xhini'c benä. Laareni baniidxreni guijt loä. Ni'c huinäa lo rexpejn Israel ni yu' guedx Damasco, cadre hua'a te niniazä rebejn nani huililajz xtidx Jesucrist. Benä xhigab jiädnääreni guedx Jerusalén te jiäreni neñ latzguuib, te gusacsireni rebejnğa.

Gunii Pabl xho huililajzni xtidx Jesucrist (Hch. 9:1-19; 26:12-18)

⁶ Räjzani:

—Dxejc hua'a guedx Damasco. Laidxejti ameer guidzunä guejdxga, chela bazanij te balro guideb gabi narä. Xhaguibaali siääd bajlga. ⁷ Biabrloä lo yuj, dxejc biejn diagä te se' ni canii loä, najni: “Saulo, Saulo, çxhicuent rusacsílu narä näjza rexpänä?” najni. ⁸ Dxejcti räpä lojni: “çChuluj, Dad?” Najni loä: “Narä nacä Jesucrist ni siääd Nasare't, nani cagusacsíduxhlu.” ⁹ Rebejn ni sanää bahuiloj bajlga, bidxebreni, niluxh di diajgreni niejn xse' nani gunii loä. ¹⁰ Räpä lojni: “Dad, çxhini'c gunä?” Dxejcti najni loä: “Huistie, huij guedx Damasco. Ro'c sinii te dade' lojlu guiraa ni guinibea gunlu.” ¹¹ Bastujxh bajlga loä, diru loä nien, ni'cni gunaaz resa'ä naä, sontinu guedx Damasco.

¹² Räjp Pabl:

—Guejdxga guläjz te niguii ni laa Ananías. Rusoobni guiraa releii xten to Moisés. Guiraa rexpejn Israel rnii nadalajz lo dade'ga. Biääd Ananías loä. ¹³ Cuä'ä guzujni najni loä: “çSaulo, betzä, bahuisac'!” Lagajc dxejc biajç loä, bahuiä lojni. ¹⁴ Naj Ananías loä: “Xtios retoxtadgoldoonu agulelu. Gule Dios luj te jiejn diajglu rediidx ni rlanjzi gunlu, te filojlu Jesucrist, Xindxan Dios, te jiejnza diajglu rextiidxpac Jesucrist. ¹⁵ Loj guiraa bejn susule'lu guiraa ni bahuilu näjza nani biejn diajglu. ¹⁶ çXhicuent sojbtislu ro'c? Basquejn, huistie te tiobnislu. Huililajz xtidx Jesucrist, gurejdx lo Dios te gudzucajni rextojllu.”

Gunii Pabl xhicuent baluiini xtidx Dios lo rebenzijt

¹⁷ Che gubi'ä guedx Jerusalén, biu'ä neñ guidoro xten rexpejn Israel te guredx-gunabä lo Dios. Lal ni cabedx-canabä lo Dios, astoo gunixcalä, ¹⁸ dxejc bahuiä lo Jesucrist. Najni loä: “Basquejn, birii guedx Jerusalén sa'csi di rebejn chalilajz xtidä ni gusule'lu lojreni.” ¹⁹ Narä räpäza lojni: “Dad, anajnreni xho biu'ä guiraa reguidoo, gunazä guiraa rebejn nani huililajz xtiidxlu, gudinduxhäreni, basäuäreni neñ latzguuib. ²⁰ Che bacuaareni guij yejc Esteban nani gunii xtiidxlu, ro'c guzuä, cuabä bejnreni si'c. Go'pä xhajn

xten renani bagu't Esteban laḷ ni bacuaareni guij.” ²¹ Dxejcti naj Jesucrist loä: “Huij. Suxhaḷä luj zitduxh. Chäälü lo guiraa rebenzijt ni di gac xpejn Israel.”

Bia'n Pabl neḷ rolijzro xten resoldaad

²² Bacuadiajg guiraa rebejn laḷ ni gunii Pabl rediidxga, dxejcti guredxa'reni, räjpreni:

—Colgu't niguiiga. Di nunyäjḷ guibajḷruni.

²³ Sanuutis cabedxa'reni. Gulääreni xcamangwreni, cacuaazareni yuyol jiaa. ²⁴ Dxejcti gunibee comandant lo resoldaad, räjpni:

—Colchanä Pabl neḷ yuro xtenu. Ro'c colquini Pabl te guiniini didxguli, te gacheenu xhicient rbedxaduxh rebejn lojni.

²⁵ Sanätireni Pabl. Entis ballibreni ni', ḡaa Pabl con duguijd te niguijnrenini che gunabdiidx Pabl lo capitán, räjpni:

—¿La rajc rguijntu te beḷ roman che gajdtu gachee xhi dojl bejnni, ä? Et si'cti caj lo xleiilu.

²⁶ Che biejn diajg capitán xtiidxni, bidxebni, huijni lo comandant, räjpni lojni:

—Colnati xhi gunnäjlu dade're, sa'csi najcni beḷ roman.

²⁷ Biädguxuḷ comandant lo Pabl, räjpni:

—¿La guli najclu beḷ roman, ä?

Räjp Pabl lojni:

—Guliini.

²⁸ Dxejcti räjp comandant:

—Narä badedä xhiroob meel te nacä beḷ roman.

Dxejcti räjp Pabl lojni:

—Narä che goḷäli nacä beḷ roman.

²⁹ Che biejn diajg resoldaad nani niguijn Pabl si'c, basḷagajcreni reduguijd ni naliib ni', ḡaani. Che biejnza diajg comandant najc Pabl beḷ roman, bidxebni sa'csi gunibeeni biliib Pabl.

Basule' Pabl diidx xcuentni lo rebixhojz nani rnibee rexpejn Israel

³⁰ Che bara yääl, rḷajz comandant gacheeni xhicient rḷajz rexpejn Israel ju't Pabl. Ni'c gunibeeni jääd rebixhojz ni sajcro nājza reguxhtis xten guidoro. Dxejcti biädñäni Pabl, bazujnini nez loj guiraa rebejn ni bire' ro'c.

23

¹ Rdxelodzu'tz Pabl lo rebejn ni tre' ro'c laḷ ni räjpni lojreni:

—Narä gusule'ä tiop diidx lo guejbtu, beḷ Israel, sa'ä. Guideb ni nabaḡä ruzobä xtidx Dios. Di lastoä guidxeb nez lo Dios —räjp Pabl.

² Che biejn diajg Ananías, bixhojz ni sajcro, xtidx Pabl, bidxechduxhni, gunibeeni lo renani suga' gajxh lo Pabl ca'preni ro' Pabl.

³ Räjp Pabl lo Ananías:

—Sigajcza ca'p Dios ro'lu, benguijdx. Ro'c sobga'lu te gunlu yälḡuxhtis si'cni caj lo lei. ¿Xhicient rujnlu nani rnii leiiga di nungäjḷ gun bejn? ¿Xhicient gunibeelu guda'preni ro'ä? —räjp Pabl.

⁴ Reni suga' cuä' Pabl räjp lo Pabl:

—¿La dilu gachee laa bixhojz ni sajcro xten Dios? Na'c guiniyajluni.

⁵ Dxejcti räjp Pabl lojreni:

—Rexamigwä, dina niacbeä canä lo bixhojz ni sajcro, sa'csi nanä agunii Dios: “Na'c guiniyajlu reni rnibee xpejnlu.” Si'c caj lo guijt ni bacuaa reni gunii xtidx Dios.

⁶ Gucbee Pabl tiop cuaa najc reni tre' ro'c. Yu' reni najc beṇ saducee, yu'za reni najc beṇ farisee. Dxejc guredxa' Pabl räjpni lojreni:

—Sa'ä, narä nacä te beṇ farisee, xi'nza te beṇ farisee narä. Rililazä sibansac beṇ lo rebengut, ni'c cabe'creni xquejä ree.

⁷ Entis guniini si'c lojreni, chela gosloj caniireni lo sa'reni. Tiop cuaa gujcreni, gala' refarisee, sgala' resaducee. ⁸ Di lajz resaducee chalii sibansac rebengut, dizareni chalilajz yu' rexangl Dios, dizareni chalilajz yu' aim xten beṇ. Niluxh refarisee rililajz guiraa rediidxga. ⁹ Guyu' te bieiro. Dxejcti huisulii gaii farisee nani najn leii, gosloj caniduxhrenei, räjpreni:

—Di niguiire gac benguijdx. Palga gunii te angl xten Dios o te togool lojni, alga Dios tilnäjnu, dxejc sidxechnäj Diosnu.

¹⁰ Che gosloj cabedxaduxhrenei lo sa'reni, bidxejb comandant, andi ju'treni Pabl, caxha'treni yejcn. Dxejcti gunibeeni biäjt resoldaad cadro suga' Pabl. Guideb xtijpreni gulääreni Pabl galäii rebejnnga huinäsaacrenini neṇ yuro xtenreni.

¹¹ Che biu' guxhijṇ, baluiloj Jesucrist lo Pabl, guzujni cuä'ni, räjpni lojni:

—Batijp lajzlu, na'c guidxejblu, Pabl. Si'cni basule'lu xtidxä guedx Jerusalén, sigajcza nanab gusule'lu xtidxä guedx Roma.

Rexpejn Israel bejn xhigab nugu'treni Pabl

¹² Che bara yääl, bachagsa' gaii xpejn Israel, bejnreni xhigab nugu'treni Pabl. Räjpreni lo sa'reni:

—Na'c guidaunu, na'cza guidunnu nis che guigu'tlinu Pabl —räjpreni.

¹³ Si'cti tiuu niguii bia'n diidxga. ¹⁴ Bidzujṇreni lo rebixhojz näjza rebengool, räjpreni lojreni:

—Abia'nnu diidx, xhet guidaudinu, xhetza guidunḍinu palga dinu guigutx-gaa Pabl —räjpreni—. ¹⁵ Naj la'tu näjza guiraa rebengool ni rnibee rexpejn Israel, colguxhaḷ diidx lo comandant te guixee jäädnäni Pabl lojtu. Coleyejn si'c ni rlaiztu jiejnru diajgtu diidx xcuent Pabl. Che jäädnä comandant Pabl ree, nuure sugu'tnuni lo nezuy che gajdni guidzujṇ ree —räjp reniguiiga.

¹⁶ Niluxh biejn diajg xi'n bisiajn Pabl cabäzxhiga'tz reniguiiga te ju'treni Pabl, huijni royro xten resoldaad. Che bidzujṇni, biu'ni räjpni lo Pabl rediidx ni biejn diajgni. ¹⁷ Dxejcti gurejdx Pabl te capitán, räjpni lojni:

—Huinälaa bi'nre lo comandant te gäbni te diidx lojni.

¹⁸ Huinäti capitán bi'nga lo comandant, räjpni lo comandant:

—Pabl, nani niäu neṇ yuro xten resoldaad, gunab loä jäädnälaä bi'nre lo guejblu te guiniini te diidx lo guejblu —räjpni.

¹⁹ Dxejc gunaaz comandant naa bi'nre, huinäni te laad cadro rut jiejnḍi diajgni xtiidxreni, dxejc räjpni lojni:

—¿Xhini'c rlaizlu guiniilu loä?

²⁰ Dxejc bazejcn diidx, räjpni loj comandant:

—Abia'n te cuaa xpejn Israel diidx siniabreni lo guejblu jäädnä guejblu Pabl ro jusgaad guixee. Sujnsireni si'c ni rlaiz jiejnru diajgreni diidx xcuent Pabl. ²¹ Na'c chalilajz guejblu xtiidxreni. Tiu niguii sibäzxhiga'tz cuä' nezuy te ju'treni Pabl. Abia'nreni diidx direni gau, dizareni yä palga direni jutxgaa Pabl. Naj cabäjztsireni guxhaḷ guejblu diidx sinä guejblu Pabl ro jusgaad.

²² Che biejn diajg comandant diidxga, basaanni sii bi'nga rolizni, räpxgaani lojni:

—Rut lojdipac gäblu guniilu diidxre loä.

Huij Pabl lo Pels ni najc gubernadoor

²³ Dxejcti gurejdx comandant tiop capitán, räjpnj lojreni:

—Colgutojpn tiop gayuu soldaad, chää guedx Cesarea nájza gayonbitzuu soldaad ni bijb cabaii, nájza tiop gayuu soldaad ni ca' spaad. Rcgaa guxhijn guiriireni ree. ²⁴ Colquiiil tiop cabaii cuib Pabl te xhet gacdi Pabl cheni chanätuni lo gubernador Pels —räjpnj.

²⁵ Dxejcti bejn comandant te guijt chanäreni lo gubernadoor.

²⁶ Loj guijtza rnii scree: “Gubernador Pels, nani sacduxh. Narä, Claudio Lisias, ruxhalä xtixtios lo guejblu. ²⁷ Rediidxre rucuaä lo guejblu. Gu-naaz rexpejn Israel niguiire, luxh paru dina nidzunga'cä con resoldaad, nugu'trenini. Che gucbeä najcni bejn roman, guläänuni ro'c. ²⁸ Rlazä niacbeä xhi quej rbe'creni, ni'c huanääni lo junt xten rexpejn Israel ni rnibee guidoro. ²⁹ Dxejc gucbeä requej ni rbe'creni najc ganax xcuent leii xtenreni, niluxh xhet bejdini te nungäjł guetni, niclazä nanab jiäuni neñ latzguiib. ³⁰ Che baxhal'reni diidx loä cabäzxhiga'tz rexpejn Israelni te ju'treni dade're, baxhalga'cäni lo guejblu. Agunibeäza jiädle'c rexpejn Israelre xquejreni lo guejblu. Ni'ctis rniiä lo guejblu”, si'c caj lo guijt ni bejn comandant.

³¹ Che biu' guxhijn, huixii resoldaad Pabl sanärenini guedx Antipatris si'cni gunibee comandant gunreni. ³² Che bara yääl, gubi' resoldaad nani guzaj ni'reni. Resoldaad ni bijb cabaii guzanäj Pabl guedx Cesarea. ³³ Che bidzujñ redee Cesarea, badeedreni xquijt comandant lo gubernadoor, huinäzarenj Pabl lojni te biembeneni. ³⁴ Che gulujx bilni guijtza, gunabdiidxni lo Pabl: —¿Caro siädülu?

Che gucbeeni siäd Pabl Cilicia, ³⁵ räjpnj lo Pabl:

—Guidzujñsi rexpejn Israel ni cadxechnäj luj, sucuadiaggacä xtiidxlu —räjpnj gubernadoor.

Gunibeeni ga'p resoldaadni neñ yuro xten Herodes.

24

Gunii Pabl xtiidxni lo Pels

¹ Gudejdti gaii dxej, dxejc bidzujñ Ananías, bixhojz ni sajcro, nájza gaii rebengool xten guidoro, nájza te dade' ni laa Tértulo ni gunii xcuentreni. Gusloj cabe'cni xquej Pabl lo gubernadoor. ² Che biädnäreni Pabl, gusloj Tértulo cabe'c xquej Pabl lo gubernadoor. Räjpnj lo gubernadoor:

—Xquixtioste guejblu dxiduxh nabanñu. Cayacnäduxh guejblu laadxnu con redzunsacduxh ni cayujñ guejblu. ³ Xquixtiosduxh guejblu, gubernadoor Pels, xcuent guiraa redzunsac ni rujñ guejblu guira nejz. ⁴ Luxh na'cru gusieednu guejblu, gucuadiaglaa guejblu tiop diidx. ⁵ Agucbeenu xho najc niguiire. Benguidxduxhni. Cadrotis rijni rujñni bieju lo rexpejn Israel. Laani rnibee te cuaa ni laa nasaren, nalajznu rebejn nani rililajz xtidx Jesucrist ni biädä guedx Nasare't. ⁶ Rlajzlini nuxhinni xquidoronu, ni'c gunaaznuni. Niennu te junt te lagajc nuure niennu yälguxhtisni si'cni caj lo xquijtznü. ⁷ Niluxh bidzujñ comandant Lisias nájza resoldaad. Diptis badzucajreni niguiiga ladznaanu. ⁸ Laani gunibeeni lo guejblu jiäd reni rbe'c xquejni. Naj lagajc guejblu sajc guiniabdiidx lojni te gacbee guejblu guliü guiraa requej nani rbe'cnu xcuentni —räjpnj Tértulo.

⁹ Dxejcti guiraa rexpejn Israel ni suga' ro'c räjpnj guliica xtidx Tértulo.

¹⁰ Dxejcti bejn gubernadoor seen lo Pabl te guiniini. Baze'c Pabl diidx, räjpnj lojni:

—Rbaaliza lazá guze'c'a diidx lo guejblu, sa'csi anana agujc xchero lacti huen rujn guejblu yálguxhtis nación Israelre —räjp Pabl—. ¹¹ Gutzbito'p dxejtis bidzunä guedx Jerusalén te saganä Dios. Najn rebejn xhi dxej biu'ä Jerusalén, guyasi guniidxreni diidx. ¹² Nicla tej dina nichagdila bejn nen guidoro. Nicla tej dina niunä bieju nen reguidobäz, nicla ro nezyuj. ¹³ Agule'creni quej xtenä lo guejblu, niluxh nicla tej redzuunga dina niunä. Di gacdi guluipacreni lo guejblu guli najc xtiidxreni. ¹⁴ Rniliäpac lo guejblu: Rañä Xtios refoxtadgoldoonu. Jesucrist baluii xho gansa'cnu Dios. Rililazä rextiidxni. Xhidalduxh rexpejn Israel rniyaj xho basule' Jesucrist gan bejn Dios. Ruzobä guiraali releii xten toMoisés. Rililazä guiraa rextidx Dios ni bacuaa reni gunii xtidx Dios. ¹⁵ Rililazä xtidx Dios si'c rililajza rebejnre xtidx Dios. Si'c ni najnreni, si'cza nanä sidzujñ te dxej che guibañsac rebengut, rebenguijdx sigajc rebeñsa'c. ¹⁶ Ni'cni racheä laaca nabañä guiraa dxej, di lastoä guidxiejb, nicla nez loj bejn niclaza nez loj Dios, sa'csi rut rajcdi guiliäs dixhii xcentä.

¹⁷ Räjp Pabl:

—Agujc xchej yu'ä zijt, lajdx garenca bejn, naj gubinää meel ni baxhal reben nejzga te gudedäni lo rebejn ni xhet rajpdi. Biädnääza gojn xtenä gudedäni lo Dios. ¹⁸ Ni'c sanää guidoro. Ro'c bidxäjl rexpejn Israel ni siääd Asia narä. Agucnayaä si'c ni rnibee xleiinu. Xhet benxhidajldi suganää, xhetza bieydi cayunä. ¹⁹ ¿Con rebejn ga naj? Te cue'creni quej lo guejblu palga yu' xhini'c rdxechnäjreni narä. ²⁰ O guiniiza redee palga yu' xhini'c et laadi benä che suga'ä nez loj junt xten guiraa rebixhojz ni rnibee näjza rebengool lo guedx Jerusalén —räjp Pabl—. ²¹ Tejtis diidx guniä che suga'ä galäiireni, guredxa'a räpä lojreni: sa'csi rililazä sibañsac guiraa rebejn lo rebengut, ni'c biädnätu narä lo rebejnre —si'c guniä lojreni.

²² Che biejn diajg Pels xtidx Pabl näjza sa'csi najne'ni xcent diidx nani baluii Jesucrist, basoobni stee dxej guidxagsac sa'reni räjpni lojreni:

—Che jiäädli comandant Lisias dxejc gunä yálguxhtis —räjp Pels.

²³ Dxejcti gule Pels te capitán ni rnibee te gayuu resoldaad ga'p Pabl. Niluxh räjpni lojni gusaanni gun Pabl nani rlanjtisni gunni. Na'cza gudxojnñi jiääd rexamigwni te fiireni lojni.

²⁴ Che gudejd balti dxej, gubi' Pels, biädnäni chäälni Drusila. Drusila najc beñ Israel. Dxejc gurejdx Pels Pabl te gusule'ru Pabl xtidx Jesucrist. ²⁵ Gunii Pabl xho nanab guibañsa'c bejn nez loj Dios si'c ni gunibee Dios guibajn bejn. Nanabza gacbee bejn na'c gun bejn cos guijdx, sa'csi sidzujñ dxej gac Dios juejz loj guiraa rebejn te fiini xhi bejnreni. Racslesli Pels tant bidxiejbni biejn diajgni diidxga. Räjpni lo Pabl:

—Huij naj. Sibedxsacälu che latä stee —räjp Pels.

²⁶ Naa Pels sudeed Pabl meel lojni te guslaanini, ni'c masru guet-guejt gurejdxnini te guninäjnini. ²⁷ Si'c gudejd tiop ijz. Dxejc birii Pels gubernadoor. Dxejcti biu' Porcio Festo, gujcn gubernadorcoob. Niluxh Pels rlanj chanälajz rexpejn Israelni, ni'c basa'nni niäusijc Pabl.

25

Gunii Pabl xtiidxni lo Festo

¹ Che biu' Festo gujcn gubernadorcoob xten reguejdxga, bia'nni guedx Cesarea choñ dxej. Dxejc biriini ro'c sääni guedx Jerusalén. ² Che bidzujñni guejdxga, rebixhojz nani rnibee näjza reniguii ni sajcru lo rexpejn Israel biääd lo Festo. Gusloj cabe'creni xquej Pabl lojni. Gunabduxhrene lo Festo

³ sa'csi rĵajzreni gunni te huen laareni, guinibeeni jĵadnäreni Pabl guedx Jerusalén. Si'c gunabreni, sa'csi abenxgaareni xhigab cuäzkhiga'tzreni te ju'treni Pabl lo nezuyj.

⁴ Dxejcti räjp Festo lojreni:

—Suniäu Pabl guedx Cesarea. Di gaclaa guibi'ä guedx Cesarea. ⁵ Suchää reniguii ni sajcru lo sa'tu guedx Cesarea, te ro'c cue'creni xquej Pabl loä, don la yu' xhi dzunguijdx bejnii —räjpnii.

⁶ Che gudejd si'cti tzuu dxej, gubi' Festo guedx Cesarea. Che bara yääl, gurejni lo yagxhil xten gubernadoor, gunibeeni biääd Pabl lojni. ⁷ Che bidzujñ Pabl lojni, biääd rexpejn Israel nani biääd guedx Jerusalén ro'c. Guzujreni guideb gabi Pabl. Gule'creni xhidalduxh xquej Pabl, luxh di niajcdi nulüireni guliipac xtiidzreni.

⁸ Dxejcti räjp Pabl lojreni:

—Nicla tej latsiaj dina niunä, dina niunä latsiaj loj leii xtenu, dizana niunä latsiaj lo guidoro ni sojb guedx Jerusalén, dizana niunä latsiaj loj xgubier César.

⁹ Dxejcti Festo, sa'csi rĵajzni guiliäsni xpala'nii loj rexpejn Israel, räjpni lo Pabl:

—¿La sisiajlu guedx Jerusalén te cue'c rexpejn Israel xquejlu ro'c nezloä, ä?

¹⁰ Dxejcti räjp Pabl lojni:

—Naj suga'a loj guejblu, ni gule reii César. Guejblu rnibee guiraa reguejdxre. Ree nungäjĵ cue'creni xquejä lo guejblu, xhet guedx Jerusaléndi. Ananchee guejblu xhet latsiajdi benä lo rexpejn Israel. ¹¹ Palga nacä te beniguijdx, o palga yu' xhi latsiaj benä te nungäjĵ guetä, xho dina xcäbä guetä. Palga xhet latsiajdi benä nani canii rexpejn Israel benä, dxejc rutliidi sajc guted narä ladzñaareni. Suchale'creni xquejä lo César nani najc reii xten reben roman —räjp Pabl.

¹² Che guninäj Festo reguxhtis xten xquidoro rexpejn Israel, räjpni lo Pabl:

—Luj gunablu chäälü loj reii César. Mbaj. Sijlu lo reii César —räjp Festo.

Huixiireni Pabl huinärenini lo reii Agripa

¹³ Che gudejd balti dxej, bidzujñ reii Agripa näjza chäälni Berenice guedx Cesarea. Biädhuiireni gubernadoor Festo. ¹⁴ Che guyu'reni ro'c xchej, bij Festo diidx lo Agripa xcuent Pabl. Räjp Festo lojni:

—Ree niäusijc te niguii ni laa Pabl ni basa'n Pels. ¹⁵ Che guyu'ä guedx Jerusalén, rebixhojz ni rnibee näjza rebengool xten rexpejn Israel gule'c xquejni loä. Rĵajzreni guinibeä guetni. ¹⁶ Röpä lojreni: “Di leii xten naciön roman gusaan guet te bejn palga di bejn jĵadxga te guiniireni nez lojpacni xhi bejn niguiiga, te guzejcza niguiiga diidx xcuent requej, te guiniini la guliireni.” ¹⁷ Ni'cni che biääd rexpejn Israelga lo guejdxre, che bara yääl guregacä lo yagxhil xten gubernadoor. Dxejc gunibeä huixiireni Pabl guzuj nez loä. ¹⁸ Benä xhigab pet yu' xhi cosro bejnii. Luxh che gusloj cabe'creni xquejni, gucbegacä xhet latsiarodi bejn Pabl. ¹⁹ Alga cadiñäjenini xcuent xleiireni, xcostumbreni. Guniizareni xcuent te niguii ni laa Jesucrist. Agujtni, niluxh canii Pabl gubañsacni lo rebengut. ²⁰ Guxii nanä xcuent sa' diidxre, ni'cni gunabdidxä lo Pabl top sicäjbni chanääni guedx Jerusalén te ro'c cue'c rexpejn Israel xquejni. ²¹ Dxejc che gunii Pabl lojpac reii César chale'c rexpejn Israel xquejni, ni'c gunibeä jĵäusijcni laĵ ni gac guxhaläni lo César —räjp Festo.

²² Dxejcti räjp Agripa lo Festo:

—Narä rlazäza jiejn diagä xtidx niguiiga —räjp Agripa.

Dxejcti räjp Festo lojni:

—Guixee gucuadiajglu xtiidxni —räjpmi.

²³ Che bara yääl, biääd Agripa näjza Berenice, luxh sucheduxhrene. Näjza recapitán ni sajcrú näjza rebejn ni sajcrú lo guejdxga biu'reni neñ yuro xten Festo. Dxej gunibee Festo biääd Pabl. ²⁴ Dxejcti räjp Festo lo guiraa reni re' neñ yuro:

—Reii Agripa näjza guiraa rebejn ni tre' ree, colcuadiajg. Colhúii lo niguiire. Reni rnibee xpejn Israel guedx Jerusalén näjza guejdxre agule'c xquejni loä, canabduxhrene guetni. ²⁵ Niluxh narä rchaloä xhet bejndini te nungäj] guinibea guetni. Luxh lagajc laani gunabni cháäni te gac César juejz lojni, ni'c runä xhigab guxhaläni lojni. ²⁶ Naj dina ganä xhini'c gucuaä lo guijt z te guxhaläni lo César ni rnibee narä. Ni'c biädnaä niguiire nez lo guiraatu, ganid nez loj guejblu, reii Agripa, filaa guejblu te gaxäjsi che aguiniini xtiidxni lo guiraanu, sidxälä xhi diidx gucuaä lo guijt z ni cháä lo César. ²⁷ Narä runä xhigab di nungäj] guxhalä niguiire ni niäu latzguuib lo César palga di gacdi gusule'ä xhi quej xcuentni cabe'c rexpejn Israel loä.

26

Gunii Pabl rextiidxni lo reii Agripa

¹ Dxejcti räjp Agripa lo Pabl:

—Gunilaa xtiidxlu loonu.

Dxejcti guläs Pabl naani, gusloj cagusule'ni diidx lojreni. Räjpmi:

²—Reii Agripa, rbalazduxhä sa'csi sajz gusule'ä diidx lo guejblu, sa'csi naj suze'cä diidx xcuent guiraa requej ni gule'z rexpejn Israel. ³ Sa'csi guejblu nanduxh xcuent guiraa releii xten rexpejn Israel. Najnza guejblu xhicuent rdxagdij] sa'reni. Ni'c rniabduxhä na'c jéed guejblu gucuadiaglaa guejblu guiraa rextidxä.

⁴ Räjpza Pabl:

—Guiraa rexpejn Israel nanchee xho nacä che gucäli biuux guedx Jerusalén. Galooli najz guedx Jerusalén ladxä. ⁵ Galooliza numbeereni narä, malaii guicäjpreni gucä te farisee nani bazobduxhru xleiiu si'cni rililajznu. ⁶ Naj suga'a ree, rlajzreni jiäuä sa'csi rililazä diidx nani bia'n Dios con retoxtadgoldoonu. ⁷ Guitzubitiop cuaa rexpejn Israel huililajz siliäs Dios guiraa rebengut te guibañsacreni. Ni'cni bazuxhijbreni lo Dios dxej-yääl. Naj rniliä lo guejblu reii Agripa, sa'csi rililazä siliäs Dios guiraa rebengut te guibañsacreni, ni'cni rlajzreni gusaureni narä. ⁸ Palga abejn Dios xhigab guiliäsni guiraa rebengut te guibañsacreni, z xhicuent di lajztu chalii xtidx Dios?

⁹ Räjpza Pabl:

—Narä benäza xhigab galoo nanabpac guidxe'chá loj rexpejn Jesucrist ni siääd Nazare't, ni'c batedäreni trabajwduxh basäüäreni neñ latzguuib. ¹⁰ Guiraa recosre benäza guedx Jerusalén. Baniidx rebixhojz ni rnibee guijt loä te basäüä rexpejn Jesucrist neñ latzguuib. Che biäüreni neñ latzguuib, narä gule'cä xquejreni te gujtreni. ¹¹ Balti huält basacsiduxhäreni lagajc neñ reguidobäz te niniyajreni Jesucrist. Luxh basacsiduxhäreni, hua'a guideb nez reguedxzi]t te ro'c huisacsia rexpejn Jesucrist.

(Hch. 9:1-19; 22:6-16)

¹² Räjpza Pabl:

—Ni'c sa'a nez guedx Damasco, ca'a guijtjz ni baniidx rebixhojz ni rnibee. ¹³ Rniliä lo guejblu, reii, si'cti läidxej, bahuiä te bajl ni siäd xhaguibaali. Rsanijruni loj gubijdx. Basanijni guideb gabi cadro suga'a näjza reni sanää. ¹⁴ Che biabrloonu lo yuj, biejn diagä xse' te ni canii loä con didx hebreo: “Saulo, Saulo, ¿xhicient rusacsílu narä näjza rexpenä? Che rusacsílu narä, lagajc luj rdejdlu trabajw, si'c te gon ni rucuaní' yejc garu'ch.” ¹⁵ Dxejcti räpä lojni: “¿Chu luj Dad?” Dxejc najni loä: “Narä nacä Jesucrist nani cagusacsíduxhlu. ¹⁶ Huistie, gusulii. Narä baluiloä lojlu sa'csi rlazä gaclu te xpenä. Aguleälu te gusule'lu lo rebejn guiraa ni bahuiilu nadxej, näjza guiraa rezos ni churu guluiä lojlu. ¹⁷ Naj suxhalälu loj rexpejn Israel näjza lo rebenzijt nani di gac xpejn Israel. Che gusacsí rexpejn Israel näjza rebenzijt luj, sacnäduxhlu, te di ju'treni luj. ¹⁸ Gacnää lastooreni te che jiejn diajgreni xtidxä, chalilajzrenini, diru xcäriejnreni gac nayääl, sianij xcäriejnreni. Dxejc dirureni gusoob xtidx Bendxab ni rnibee rebenxab, sa'csi susoobreni xtidx Dios. Che chalilajzreni rextidxä, sudzucaj Dios xtojlneni. Dxejcti suchaag Diosreni loj renani anajc beñnaya sa'csi basoobreni xtidx Dios, huililajzreni xtidxä.”

¹⁹ Räjpa Pabl:

—Ni'cni rniliä lo guejblu, reii Agripa, cayunä si'cni naj Jesucrist loä gunä che baluilojni loä. ²⁰ Gunixgää xtiidxni lo reben Damasco. Räpä lojreni: “Colgusiechlazj, colgusoob xtidx Dios. Colyujn dzunsa'c te gacbee rebejn abasiechlazjtu, arusoobtu xtidx Dios.” Si'cza guniä lo reben Jerusalén, näjza lo rebejn ni yu' reguedx Judea, näjza lo rebenzijt ni di gac xpejn Israel. ²¹ Sa'csi benä si'c, gunaaz rexpejn Israel narä nen guidoro, rlazjzreni nugu'treni narä. ²² Naj racnäj Dios narä, naj sanuutis cagusule'ä rediidxga lo guiraatis bejn. Loj rebejn ni xhet rajpdi sigajc loj rebejn ni rapduxh. Rusule'ätis nani caj lo guijtjz nani bacuaa toMoisés näjza guiraa reniguii nani gunii xtidx Dios. Laareni galooli guniireni xcuent xhini'c gac naj. ²³ Najreni sidej Crist trabajwduxh, sugu'trenini. Niluxh sa'csi ganidoo laani guibañsacni lo rebengut, ganidooza laani suluiini loj rexpejn Israel näjza loj guiraa rebenzijt guliipac xtidx Dios, sibañsac bejn lo rebengut, si'c ni guniini galooli.

Di Agripa nililajz xtidx Jesucrist

²⁴ La! ni canii Pabl rediidxga lojreni, dip gunii Festo, räjpni lo Pabl:

—Pabl, yejclu cayajc. Pet sa'csi nanduxhlu guijtjz ni'c cayajc yejclu.

²⁵ Dxejcti räjp Pabl lojni:

—Rniliä lo guejblu dad gubernador Festo, xhet rajcdi yecä. Ganax didxlii caniä. ²⁶ Ree suga' reii Agripa. Laani nancheeni guiraa rediidxre, ni'c guyasi caniä rediidxre lojni, dizana guidxebä sa'csi anajnni gulii guiraa ni gujc, sa'csi xhet xhiga'tzdi gujcreni. ²⁷ Guejblu reii Agripa, ¿la rililajz guejblu xtidx reniguii nani bacuaa xtidx Dios, ä? Nancheä rililajz guejblu diidxga —räjp Pabl.

²⁸ Dxejcti räjp Agripa lo Pabl:

—Tuche'nsi riäädx gunlu gan chalilazä xtidx Jesucrist te gacä xpen Dios.

²⁹ Räjpa Pabl lojni:

—Xhet najcdi palga guxii o xhidajl cayäädx, narä canabä guniidx Dios chalilajz guejblu xtiidxni si'c rililazä xtiidxni, nägajcza guiraa reni cacuadiajg xtidxä te gactu si'c nacä, niluxh xhet näjdi resa' cadenre —räjp Pabl.

³⁰ Dxejcti huisu Agripa, Festo, Berenice, näjza rebejn ni sobganäjreni. ³¹ Che gubigreni stelaad, räjpreni lo sa'reni:

—Niguiire xhet bejndini te guetni, xhetza bejndini te jiäuni.

³² Dxejcti räjp Agripa lo Festo:

—Paru dini niniab chääni lo César, sajc nuslaanuni.

27

Birii Pabl säa nez guedx Roma

¹ Basoobtireni dxej ni niu'nu neñ barcw te chonnu Italia. Dxejc bateedreni Pabl näjza sgaii bejn nani niäuzä lo capitán ni laa Julio. Rnibee Julio te gayuu soldaad, najcreni te cuaa ni laa Augusto. ² Näjza te dade' ni laa Aristarco guzaj, siäädni guedx Tesalónica xten Macedonia. Biu'nu neñ barcw ro' guedx Cesarea. Barcwga siääd guedx Adramitio. Biriitinu, najc xhigab teednu nez reguejdx nani yu' ro' nisdoo lo reyuj xten Asia. ³ Che bara yääl guläjz barcw ro' guedx Sidón. Huenduxh gujc Julio con Pabl, basaanni bihuii Pabl rexamigwni ni yu' guejdxga te bahuiireni Pabl, bateedreni xhi rquiinni. ⁴ Che säasac barcw lo nisdoo, bideednu stelaad Chipre, yuj ni tre' lo nisdoo, sa'csi sääb te beduxh, ni'c naga' Chipre xladbäjägwnu, te guxiiru rda' bej loonu. ⁵ Che sonnu neñ barcw, bideednu xnisdoo reguedx Cilicia näjza xnisdoo reguedx Panflia, te bidzunnu ro' guedx Mira xten Licia. ⁶ Ro'c bidxäjl capitán xten resoldaad stee barcw ni siääd guedx Alejandría. Agojl chää barcwga Italia. Bateedtni guiraanu lo barcwga. ⁷ Balti dxej chäigaj sonnu lo nisdoo. Trabajwduxh bidzunnu lo nisdoo ro' guedx Gnido, sa'csi entis cabi' beduxh nez cadro sonnu. Ni'c trabajwduxh bideednu xladbäjägw yuj Creta ni tre' lo nisdoo xladbeenu. Gudejdnu guedx Salmón. ⁸ Dxejcti chäiduxh sonnu neñ barcw lo nisdoo nez cuä' yu Creta; si'ctis gujc bidzunnu te lajt ro' nisdoo ni laa Buenos Puertos cadro guxii sääb bej. Gajxh ro'c tre' guedx Lasea. ⁹ Agujc balti dxej cayaclaanu, luxh agudejdza dxej ni rucua'n rexpejn Israel, guxii riäädx chaa ijz. Rebäire di bejn chää neñ barcw sa'csi yuduxh riesgw lo nisdoo, ni'c balijdx Pabl rebejn, ¹⁰ räjpni lojreni:

—Rexamigwä, runxgää bis guejbtu, palga chonnu neñ barcw chanuunu xnejznu, sajc te läidxduxh. Sinitloj cargw, sibijxh barcw, luxh silo' xhidajl bejn, —räjpni.

¹¹ Niluxh di capitán xten resoldaad niu xtidx Pabl. Biuruni xtidx nani rusaj barcw näjza xtidx baxhuaan xten barcw. ¹² Luxh sa'csi lajtga dini gajc huen tedreni rebäii nalduxh, bejnreni xhigab hueenru guiriinu ro'c te chonnu guedx Fenice ni tre'za lo yu Creta, sa'csi di bej guibiduxh ro'c. Hueenru ro'c guilääznu ted rebäinajl, räjpreni.

¹³ Ni'c che gusloj cabi' te bebäz nez lad sur, naareni pet xhet najcdi guiriinu lo nisdoo con barcw. Dxejc baslaareni barcw, sontinu ro' nisdoo gajxh cuä' Creta. ¹⁴ Niluxh di niacaa gusloj te niskuipeduxh birii nez redajn xten Creta. ¹⁵ Gunaaz bejga barcw, diru gacdi gusajrenini. Basa'ntireni sanä bejga barcw cadrotis rlanjni. ¹⁶ Siädgobuij barcw te canuu. Che bidzunnu stelaad te yuje' ni tre' lo nisdoo ni laa Claudia, guxiiru cabi' beduxhga. Dxejcli bejnreni gaan guläsreni canuu neñ barcw. ¹⁷ Che basälnu canuu neñ barcw, cua'reni gaii duro te baliibreni barcwro, bateedreni gaii duu xque' barcw te na'c guibilni. Cadxejbreni te di chachu' barcw lo yujxh ni laa Sirte ni yu' neñ nisdoo. Ni'c guläjtreni ladro ni rniaaz bej te rusajni barcw, gudixhreni lajdga neñ barcw. Sanäti beduxhga barcw cadrotis rlanjni. ¹⁸ Che bara yääl caguscua' beduxh barcw lo nisdoo. Sas basäl'reni che'n cargw lo nisdoo te bicharu barcw. ¹⁹ Ni riojn dxej, lagajc laareni basäl'reni lo nisdoo guiraa xtrast barcw. ²⁰ Che agujc balti dxej niäu lo gubijdx, diza rebale'

nien xhaguibaa sa'csi lajtis cayajb nisguipeduxhga, biennu xhigab guiraanu sejtnu. ²¹ Xchero rut rlaizdi gau. Dxejc gusuj Pabl galäi rebejn räjpni lojreni:

—Rexamigwä, paru nucuadiajg guejbtu xtidxä, na'c niriitu xyuj Creta, di läädxre niajc, dizanu nidejd trabajwduxhre. ²² Niluxh colcuedxdi lastootu. Niclatej bejn ni siääd lo barcw di guet. Barcw tis sinitloj. ²³ Nacä te xpejn Dios, runä xhitis ni nribeeni gunä. Nayääl biädsuj te xangl Dios cuä'ä, ²⁴ najni loä: “Na'c guidxejblu Pabl. Nanabpac chäälü lo reii César. ¡Bahuilaa! Abasalajz Dioslu reni siädnälu; nicla tej reni yu' neñ barcwre di guet”, najni loä. ²⁵ Ni'cni caniä lo guejbtu, na'c guidxejbtu. Narä rililazä xtidx Dios. Rililazä sisiojb xtidx Dios si'c ni naj xangl Dios loä. ²⁶ Niluxh yu' cadro chalaj barcw lo yujxh nen nisdoo gajxh lo te yuje' ni tre' neñ nisdoo —räjp Pabl.

²⁷ Si'cti tiop xman balaäa beduxhga barcw nezre, nezrec lo nisdoo ni laa Adria. Pet garol yääl ni bejn reniguii ni ruzaj barcw xhigab abidzujñ barcw gajxh lo yuj, ²⁸ ni'c bastejbreni te guiib lo duu xhajñ nisdoo, te barexhreni ro'c, dxejc gucbeereni najc nisdoo jäät si'cti galbitzubixho'p metr. Che guzaj barcw stelabäze', bastebsacreni guiib con duu xajñ nisdoo, dxejc gucbeereni ro'c najc nisdoo jäät si'cti galbigajdz metr. ²⁹ Dxejc bidxejbreni te di chalaj barcw yejc reguij. Bacuaatireni tajp guibro si'c guench ni naliib te caden te ru'reni neñ yujxh te ruscuääzreni barcw, te jia'nni tejsi lajt. Dxejc rlaizreni malaij jianiija lo guedxliuj. ³⁰ Dxejcti gulät remos canuu lo nisdoo cayujnsireni si'cni chastejbreni stee guench guiib lo nisdoo, niluxh rlaizreni guxunreni guidon la sajc guidzujñreni ro' nisdoo. ³¹ Dxejcti räjp Pabl lo capitán näjza lo resoldaad:

—Palga di redee jia'n neñ barcw, di gacdi guslaatu xcäl nabajñtu —räjpni.

³² Dxejcti batiugya' resoldaad duu ni naaz canuu te bitejbni lo nisdoo, sanäti nisdoo canuuga. ³³ Che gusloj cayanij, gunibee Pabl, räjpni lojreni:

—Nadxej rajc tiop xman gajdtu gues, gajdzatu gau. ³⁴ Naj coltajw te gac guixoobtu lo nisdoo. Na'c guntu xhigab guettu, nicla tej xquidxectio di nitloj.

³⁵ Che gulujx gunii Pabl si'c, cua'ni yätxtiil, badeedni xquixctio lo Dios nez loj guiraareni. Dxejc gula'nini, gusloj cayajwnini. ³⁶ Dxejc bibaalajzreni, näjza laareni gusloj cayajwreni. ³⁷ Nuunu najcnu tiop gayuu gayonbitzubixho'p bejn ni yu' neñ barcwga. ³⁸ Che agujc gudajwreni, basälreni triuu lo nisdoo te bicharu barcw.

³⁹ Che bianisac, direni niembee yujga, niluxh bahuiireni cadro rdzujñ te guebäz ro' nisdoo cadro yu' xhiroob yujxh ro' nisdoo. Rlaizreni nusiureni barcw ro'c. ⁴⁰ Dxejcti baslaareni guidap guench guiib ni naaz barcw, bia'nreni guideb caden neñ nisdoo, baxheczareni yajg ni ruzaj barcw, guläszareni ladro nez delant barcw te balaäa bej barcw. Badzuréreni barcw sääreni nez ro' nisdoo. ⁴¹ Sas biu'reni te lajt cadro rdxagsa' tiop cuaa nis. Ro'c huilaj yejc barcw neñ yujxh nen nisdoo, digacdiru guiniibni. Dxejcti gusloj cabijl dejtz barcw sa'csi sanuutis caguijn nisdoo detz barcw. ⁴² Dxejcti rlaiz resoldaad nugu't repres te di guixoobreni lo nis guxunreni. ⁴³ Niluxh di rlaiz capitán xten resoldaad guet Pabl, ni'c dini nusaan nugu't resoldaad repres. Gunibee capitán ganiddoo renani rajc rxoob lo nis guitiäjs lo nisdoo te guidzujñreni lo yujxh. ⁴⁴ Dxejcti birinajl rebejn ni digacdi guixoob lo nis, naazreni barajd o te la' yajg ni gula' detz barcw. Si'c gujc bidzujñ guiragajc rebejn lo yujxh ro' nisdoo. Nadaanreni bidzujñreni lo yujxhga.

¹ Che bidzujñnu lo yuj ni tre' lo nisdoo, biembeenu yujga najc ni laa Malta. ² Gucnäj rebejn ro'c nuure, gule'creni guiboo bahuiireni nuure sa'csi cayacnalduh, cayajbza nisgij. ³ Ca' Pabl te däöz yajg, sale'cnini lo guiboo, chela biriyäl te bäl nialajz neñ yajgga. Saa gudauya'ni ñaa Pabl. ⁴ Che bahuii reben Malta li najl bäl nialajzga cayauya' ñaa Pabl, gusloj cayäjbreni lo sa'reni:

—Pet rugu'tni bejn ni'c mase bejnni gaan lo nisdoo siguijxni xtojñni, sejtñi naj.

⁵ Gubijb Pabl ñaani dxejcti bitejb bälga lo guiboo. Xhet gujcdi ñaa Pabl.

⁶ Dxejc reben ro'c cabäjz fiireni la sisiägüij ñaa Pabl o laa sejtñi. Xchero bidxelojreni. Che bahuiireni xhet gujcdini, gusloj bejnreni ste'ca xhigab, räjpreni lo sa'reni:

—Pet dios najcni.

⁷ Gajxh ro'c naga' xyuj te dade' ni laa Publio ni najc xcubernadoor Malta. Biojia'nnu rolijzñi choñ dxej. Huenduxh gujc dade'ga, baniidxni guiraa ni biquiinnu. ⁸ Naga' xtad Publio cayacxhuuni, yu'ni xliaa, cayajczani yobrejn. Huihuii Pablñi. Guredx-gunab Pabl lo Dios, dxejc batzuub Pabl ñaani yejñi, basiacgajcñini. ⁹ Che gucbee rebenguejdxga abasiajñi ben racxhuuga, bidzunñajreni beñ racxhuu lo Pabl, basiajç Pabl guiraareni. ¹⁰ Ni'c banidx-xliareni xhidalduxh xhicos, luxh che biriinu ro'c, baniidxreni guiralii recos ni biquiinnu neñ barcw.

Bidzujñ Pabl guedx Roma

¹¹ Agujc choñ bäii yu'nu ro'c che biu'nu neñ te barcw ni siäd Alejandría. Lagajc ro'c bateed barcwga rebäinajl che rsiäb beduxh. Yejc barcwga caj tiop figuur xten tiop biuux ni laa Cástor näjza Pólux, rexingancua'ch dios ni laa Zeus. ¹² Biriinu Malta sonnu neñ barcw nez guedx Siracusa. Ro'c bia'nnu choñ dxej. ¹³ Dxejcti biusacnu neñ barcw, sonnu lo nisdoo cheni bidzunñinu guejdx ni laa Regio. Che bara yääl, gubi' te bej birii lad sur. Biusacnu neñ barcw. Bara yääl bidzunñu guedx Puteoli. ¹⁴ Ro'c bidxaagnu gaii xpejn Jesucrist. Najreni loonu:

—Coljiannäj nuunu —najreni.

Bia'nnu ro'c gajdz dxej. Dxejc biriinu guejdxga, ni'nu sonnu nez guedx Roma. ¹⁵ Che gucbee rexpejn Jesucrist ni yu' guedx Roma siopsaanu nez Roma, biädreni guedx Foro de Apio näjza stee guejdx ni laa Tres Tabernas, ro'c bidxaagreni nuure. Che bahuii Pabl lojreni, guzutijp lastooni, badeedni xquixtios lo Dios. ¹⁶ Che biu'nu guedx Roma, bateed capitán repres ladzña comandant, niluxh basaanni cualaa Pabl te yu' cadre cuääzñi. Tejtis soldaad biannäj Pabl.

Baluu Pabl xtidx Dios lo reben Roma

¹⁷ Che gudejd choñ dxej, gurejdx Pabl reni rnibee lo rexpejn Israel. Che bidxaag sa'reni cadre yu' Pabl, räjpni lojreni:

—Guejtba rexamigwä, resa'ä, xhetliidi nani xhet laadi benä lo rexpejn Israel, dizana nibälazä xleii toMoisés. Niluxh basäureni narä neñ latzgüiib guedx Jerusalén, dxejcti bateedreni narä ladzña reroman. ¹⁸ Che biejn diajgreni xtidxä, rlanj reguxhtis roman nuslaa narä sa'csi xhet benädi te nugu'treni narä. ¹⁹ Niluxh naaddi rexpejn Israel guslaareni narä, gunabätis lojpac reii César jiadle'creni quej ni cabe'creni xcuentä. Niluxh narä xhet xquejdi rexpejn Israel cue'cä. ²⁰ Ni'cni guredxä la'tu te fiä lojtu, te guininäa la'tu, sa'csi rililazä lagajc si'c rililajz xpejn Israel sibansac rebengut, ni'c nalibä cadenre.

²¹ Dxejcti räjpreni lojñi:

—Nicla tej guijtz gajd reguxhtis xten reguedx Judea guxhal loonu xcuentlu, gajdza rexejñnu ni bidzujñ ree jiädsa'n diidx xhet laadi bejnlu. ²² Rlajznu jiejn diajgnu xtiidxlu, don xhi naalu, sa'csi racbeenu xhidajl lajt rniyajreni redidxcoob xten Jesucrist —räjpreni.

²³ Guletireni te dxej guidxagsa'reni. Che bidzujñ dxejga, bidxagsa' xhidalduxh bejn neñ yu' cadre rbäjz Pabl. Guideb dxej basule' Pabl xtidx Dios lojreni. Basule'ni xho rnibee Dios lojreni. Con rediidx ni caj lo xleii toMoisés näza diidx ni bacuaa reniguii nani gunii xtidx Dios basule'ni Jesús najc Crist nani galooli cabäjz reben Israel jiääd. ²⁴ Yu' reni huililajz xtidx Pabl, yu'za reni di nililajz xtiidxni. ²⁵ Sa'csi di niajcdi niujnreni tejsi xhigab gusloj siireni. Ganiddoo räjp Pabl lojreni:

—Guliica naj toIsaías che badeed Sprit Dxañ xten Dios rediidxre guniini, räjpni lo rextadgoldoonu:

²⁶ Huij, gunii lo rebejnre, scree gojz lojreni:

Siejn diajgtu xtidxä, niluxh ditu gacbeeni.

Suhuiitu nani runä luxh ditu gumbee xhini'c ruhuiitu.

²⁷ Agucnajd lastoo rebejnre sa'csi di rlajzreni chaliilajzreni xtidxä.

Direni cuadiajg xtidxä sa'csi di rlajzreni jiejn diajgreni diidx ni guliipac.

Rusäuzareni balojreni te di fiireni, te di lajzreni chalii.

Ni'cni direni gusiechlajzreni te gusaan gunreni dojl te gudzucaj Dios xtojlneni.

²⁸ Räjp Pabl lojreni:

—Colgacbee. Najli sisiule' xtidx Dios lo rebenzijt ni di gac xpejn Israel te gusiech lajzreni, te gudzucaj Dios xtojlneni. Rniliäpac lojtu, sililajzreni rextidx Dios.

²⁹ Che gulujx gunii Pabl rediidxga lojreni, ensilaareni gusloj cadxagdijl sa'reni lañ ni sääreni.

³⁰ Tiop ijz guläjz Pabl guejdxga neñ yu' ni cualaani. Biuni guirali rebejn ni biääd rolijzni. ³¹ Lo guiraa rebejnnga basule'ni xho rnibee Dios lojreni. Bijzani diidx xcuent redzuun nani bejn Jesucrist. Di lastooni nidxejb, rutza badxojndi guniini.

Guijtz Nani Bacuaa Pabl Lo Rebeñ Roman

Rucuaa Pabl lo rebeñ guidoo neñ guedx Roma

¹ Narä, Pabl, nacä te xmos Jesucrist, laani gule narä te gusule'ä xtidx Dios loj rebeñ.

² Agujc xchero bia'n Dios diidx loj renani basule' xtiidxni, suniidxni diidxre loonu, luxh diidx ni bia'n Dios caj lo guiijtz xten reprof'e'tga. ³ Rediidx ni rusule'ä najc xcuent Jesucrist, Xi'n Dios, ni najc xagdoorei David xcuent tiejxhni. ⁴ Xcuent Xsprit Dxaan Dad Jesucrist, najcni Xi'npac Dios. Badeed Dios yälrnibee lojni, ni'cni gubañsacni lo rebengut. ⁵ Laani gucnäjni narä, guleni narä te gusule'ä xtiidxni te guzobdiajgtu, te chalilajz rebeñ ni rej guideb guedxliuj xtiidxni. ⁶ Luxh nadxaagtu loj rebeñ ni guleni te chalilajzreni xtiidxni.

⁷ Ruxhalä guiijtzre lojtu ni yu' guedx Roma, guiraatu ni sanälajz Dios ni bibeetu gactu beñdxan. Gacnäj Dios ni najc Xtadnu näjza Dad Jesucrist la'tu, guscuecdxireni lajztu.

Rlajz Pabl chää guedx Roma

⁸ Ganidtoo rudedä xquixtios loj Dios con laj Jesucrist xcuent guiraatu, sa'csi guideb guedxliuj ruju beñ diidx xcuent xcäl'rililajztu. ⁹ Lagajc Dios anajn xho rniabä guet-guejt xcuent la'tu lojni. Narä runä xtzuun Dios guideb lastoä, rusule'ä diidx xcuent Xi'nni Jesucrist. ¹⁰ Sanuutis canabä lojni, top sajc jiädhuiä lojtu si'cni rlazä gunä agujc xchejli. ¹¹ Sa'csi rlazduxhä fiä lojtu, te gacnäätu, te gulidixä la'tu xhi te xtidx Dios te sudzu'tzrutu lo xtiidxni. ¹² Nalajznu, te gustioobnu lajz sa'nu xcäl'rililajz xtidx Dios xten sa'nu.

¹³ Rebetzä rlazä gacbeetu balti huält benä xhigab jiädhuiä lojtu, luxh gajd gacdi jiälä. Rlazä jiädhuiä lojtu te chalilajz xhidajlrü beñ xtidx Dios sigajcni salilajzreni guiralajt cadro hua'a loj rebeñ ni di gac xpen Israel. ¹⁴ Nungäjlpac gusule'ä xtidx Dios loj rebeñ nani rniü garen-garen didxsaj, sigajc loj rebeñ griegw, loj renani nayääl, sigajc loj rebeñ najn. ¹⁵ Rbaali laza suga'a naj, te gusule' xtidx Dios näjza lojtu ni yu' guedx Roma.

Xcälrnibee xtidx Dios

¹⁶ Sa'csi dina guituiä xcuent xtidx Dios, sa'csi najcni yälrnibee xten Dios te guslaani lo dojl chutis beñ nani rlazä chalilajz xtiidxni, ganidtoo reni najc rexepeñ Israel, dxejcti näjza rebeñ ni di gac xpen Israel. ¹⁷ Sa'csi xtidx Dios rusule' xho nanab chalilajz te beñ te gacni te bensa'c nez lo Dios sa'csi huililajzni xtiidxni. Lo xtidx Dios caj scree: "Palga rililajz te beñ xtidx Dios, najcni te beñnaya nez lo Dios, nabaññajni Dios xcuent xcäl'rililajzni."

Rextojl beñ

¹⁸ Xcälrdx'e'ch Dios nani yu' xhaguibaa siajbnü yej rebeñ nani gun dojl, nani rlazä gun cosguijdx, nani di gusaan guiseed sabeñreni didxguli. ¹⁹ Sa'csi anancheereni nani saj gan beñ xcuent Dios, ni'cni najnreni rajpreni dojl, sa'csi ruluipac Dios na'c gunreni dojl. ²⁰ Cheni birixtiejli guedxliuj, recos nani di gacdi fi beñ xcuent Dios, si'c xcälrnibeeni ni najc par tejpas, si'c xtujxh xtenni, huenliisi ruzenreni sa'csi ruluilajzreni recos ni ruzen nani benchee Dios. Guiraa reni'c ruluilajz najcni Gueb Dios ni rajp yälrnibee par tejpas, ni'c di gacdi guiniireni loj Dios direni niembee xhini'c rlazä Dios gunreni. ²¹ Ni'cni, mase biembeereni Dios, direni niliä'p xpala'nni te ganreni

Gueb Dios, dizareni nudeed xquixtios lojni. Alga gualajz gujcreni, bicäy xcariejnreni, naareni hueen najc gunreni si'ctis ni jiajb yejcreni, si'cni rsia' lajzreni nen lastooreni. ²² Caniireni nanduxhreni, per direni gan, nayäälreni. ²³ Gulälazreni xcälrdimbicha' Dios ni najc tejsi par tejpas, te bazuxhijbreni nez loj rebanäjb ni benchee naareni, ni najc guiraa ni rujn lojni si'c rujn lo te niguii ni rnitloj, näjza guiraa ni najc si'c reman ni rutajt, näjza guiraa ni najc si'c reman ni yu' tajp ni'ni, näjza ni najc si'c rebäj.

²⁴ Ni'cni gulälaz Diosreni, basaanni gunreni si'ctis ni rrajzreni. Bejnreni dojl con resa'reni. ²⁵ Sa'csi ahuililajzreni didx-xhii lacuaa nililajzreni xtidxlii Dios, ruzuxhijbzaareni nez loj recos ni benchee Dios, lacuaa guzuxhijbreni loj Dios nani benchee guiraa rexhicos, Dios nacle' par tejpas. Sugacni si'c.

²⁶ Ni'cni gulälaz Diosreni, subia'nreni lo xcällatsiajreni, lo yälxtujy xtenreni. Diru regunaa guesnä j niguii, lagajc sagunaareni resnäjreni. ²⁷ Sigajcza reniguii gulälaz regunaa, rujnreni dojl con lagajc saniguiireni. Luxh lagajc laareni siguijxreni latsiaj ni rujnreni.

²⁸ Luxh sa'csi di rrajzreni jiureni Dios, basaanti Dios suyu' cosguijdx tis xcäriejnreni, te chanuutisreni lo xcällatsiajreni, rujnreni recos ni xhet laadi. ²⁹ Guidxareni dojl, näjza cosguijdx, näj yälruguilajz xhixten sa'reni; rugu'treni bejn, rujnreni yälrsiäblajz, rucuanäjreni resa'reni, rusgueereni sa'reni, rdx-echnäjreni sa'reni, rniizareni didxxhii. ³⁰ Rnijaj sa'reni, rdxe'chreni lo Dios, gualajzreni, dipacreni guitujy, rliä'preni lagajc xpala'nreni, entis latsiacoo b rbäxtiejreni, gualajzreni lo xuczajzreni, ³¹ nadduxhreni, xheti xcäriejnreni, xhet sajcdi xtiidxreni ni ria'nreni lo sabejnreni, direni chanälajz sa'reni si'cni nungäj'l gacni, dizareni gulaslajz sa'reni. ³² Luxh mase agucbeereni gun Dios yälguختis lojreni, najnzareni nungäj'l guetpac renani rujn recosre, nicla jiureni, rujnreni guiraa recosguijdxre, luxh rbaali lajzreni richunäjreni rebejn ni rujnza recosguijdxga.

2

Dios rujn yälguختis con didxguliipac

¹ Ni'cni, çcanejz chäätu, la'tu beñguedxliuj? Chutis luj ni rgubeelu sabejnlu, lagajc si'c cubeezareni luj, lagajc xcuent ni'c sajclu yälguختis, sa'csi luj rgubeelu sabejnlu, lagajcza luj rujnlu lagajc dojlga. ² Nancheenu sujn Dios yälguختissa'c loj renani rujn sa' dojlga. ³ Beñ guedxliuj ni rgube loj renani rujn dojl, luxh sigajcza rujnlu, çla rujnlu xhigab sidedcaj gun Dios yälguختis lojlu xcuent xtojllu, ä? ⁴ O çla rbälazlu ni rujn Dios, najcni huenduxh, lacti guroob najc xcäl'rulaslajzni, rapduxhzani pasens? çLa dilu gan dee najc ni gacnäjlgu gusiechlazlu te guibicajlu lo dojl, ä? ⁵ Luxh sa'csi nadduxhlu, di lastoolu guigoodz te gusiechlazlu, cagutajllu yälguختis ni gaclu che guidzujn dxej ni gun Dios yälguختis loj reben guedxliuj, ⁶ siguijx Dios loj tejgatu xcuent dzuun nani bejn tejgatu. ⁷ Loj rebejn nani rrajztisreni guiba'nsa'c, ni gusoob xtiidxni, sudeed Dios yäl'nabajn par tejpas sa'csi gudiilreni xhaniduj näjza go'preni xpala'nreni loj Dios, rrajzreni guibajnreni loj Dios par tejpas. ⁸ Luxh sidxe'ch Dios, sidxe'chduxhni loj renani sanälajz lagajc laareni, nani di jiu xtidxguliini, alga rusoobreni reyällatsiaj, redidxguijdx. ⁹ Guiraa reben guedxliuj ni rujn dojl sidejd trabajwduxh näjza sac-huin lastooreni; ganid rexpen Israel, dxejcti näjza reben griegw. ¹⁰ Loj guiraa rebejn nani rujn cos-hueen, sudeed Dios xhaniduj, näjza bala'n, näjza yäl'rbecdxi lastooreni, ganid rexpen Israel, dxejcti näjza reben griegw.

11 Sa'csi tebloj najc guiraasi rebejn nez loj Dios. 12 Guiraa rebejn nani bejn dojl, luxh direni niembee xleii Dios, sinitlojreni sin leiiga; guiraa reni biembee xleii Dios, lagajc con leiiga sujñ Dios yälguxhtisreni xcuent xtojreni. 13 Xhet ganaxdi renani rucua diajgtis xleii Moisés najc beñnaya nez loj Dios; rebejn ni rusoobpac rexleii toMoisés, reni'c najc beñnaya loj Dios. 14 Yu' xhidal bejn ni di gumbee xleii toMoisés, dizareni gac rexpən Israel, rujnreni recos ni caj lo lei. Najnreni xhini'c najc cos sa'c. Ni'cni lagajc xcäriejnreni najc si'c leiñ par laareni. 15 Recossa'c ni rujnreni ruluiloj nezyusa'c ni yu' lastooreni. Xcäriejnreni ruluiloj xhini'c loj guiraa nani rujnreni najc cos sa'c, xhini'c najc dojl. 16 Guiraa recose sajc che guidzujñ dxej ni gun Dios yälguxhtis guiraa rexhigabxhiga'tz ni yu' lastoo rebejn. Jesucrist gac juejz lojreni, dxejc sisiojb guiraa rediidx ni cagusule'ä lojtu.

Rexpən Israel näj xleii toMoisés

17 Luj ni laalu xpen Israel, ni rniilu sanäpaclu xleii toMoisés, rniiduxhlu najclu xpen Dios, 18 rniilu nancheezalu xhini'c rlajz Dios gunlu, anajnzalu xhini'c najc hueenru sa'csi bisiedsa'cpaclu lei. 19 Rchalolu sajc guluiilu nezyusa'c lo rebejn nani najc si'c lotiä'p, sajc guzaniylu xcäriejn reni nacäy xcäriejnreni. 20 Rchalolu najclu mastr lo renani nayääl, najczalu mastr lo rebiiuux, sa'csi nansa'clu lei, luxh lojni caj guiraa yälñajn näjza guiraa didxguliipac. 21 Ni'cni rniä lojlu, luj ni caguseed xtee bejn, xhiciuent dilu guseed lagajc luj? Luj ni rusule'lu diidx na'c cuan bejn, xhiciuent rbajñlu? 22 Luj nani rniilu na'c guesnäjni te ni di gac chäälñi, çla resnäylu nani di gac chäällu, ä? Rdx'chlu xcuent rebanäjb, xhiciuent rbäällu xhicos neñ xquidoo rebanäjb, ä? 23 Luj rlajzlu chä'p xpala'ñlu sa'csi najñlu lei, çla rusanxtujyly Dios sa'csi dilu gusoob xtidx leiiga, ä? 24 Bahuii xho rebejn nani di gac xpen Israel rniyajreni Dios sa'csi la'tu ditu gusoob xtiidxni, rujntu dojl, sigajc ni caj lo xtidx Dios.

25 Palga la'tu chutu bee si'cni caj lo leiiga, palga gusoobtu guiraa diidx ni caj lo lei, laaca. Luxh palga ditu gusoob guiraliipac xtidx leiiga, xlia'si guyu'tu bee, sa'csi rujntu dojl. 26 Ni'cni palga te bejn ni di chu beega, luxh rusoobni guiraliipac xtidx leiiga, çla di gacdi guchaagni cuent najcni si'c te nani yu' beega, ä? 27 Bejn nani di chu beega, luxh rililajzni guiraliipac xtidx leiiga, sujñni yälguxhtis la'tu sa'csi mase yu'tu beega, luxh nanduxhtu leiiga, ditu gusoob xtidx leiiga, alga rujntu dojl. 28 Sa'csi xhet guiraadi rebejn ni yu' beega najc rexpən Israel, luxh di beega ni ru' bejn gun gusoobpac bejn xtidx leiiga. 29 Najcpac te xpen Israel nani najcni neñ lastooni, nani yu' bee lastooni, rusoobpacni xtidx Dios xcuent Sprit xtenni, dini gunni sa'csi najctisni costumbr. Dios ni siliä'p xpala'ñni, xhet bejñdi.

3

1 Xhini'c sacnäj te bejn najcni te rexpən Israel, ä? O çxhi sajc chuni beega? 2 iEmpac sacduxhni! Ganidtoo, sa'csi loj rexpən Israel badeed Dios xtiidxni. 3 Mase yu' renani di nililajz diidxga, çla ni'cni xhet sajcdi diidx ni bia'n Dios loj rexpənñi, ä? 4 iXho gacni si'c! Diostis najc guliipac, guirali bejn rusguee. Scree caj lo xtidx Dios:

Lagajc xtiidxlu suluii laaca rujñlu,
te che gaclu yälguxhtis,
nicla tej xtojllu di guidxäjñ.

5 Palga xcällatsiajnu ruluiiru najc Dios huenduxh, xhini'c guiniinu dxejc? Palga gun Dios yälguxhtis nurnu, dxejc tednu trabajwduxh, çla rujñni latsiaj

loonu, ä? (Caniä si'c te be_n guedxliuj naj.) ⁶ ;Xho gacni si'c! Paru najcni si'c, çxho mood gun Dios yälguxhtis loj rebejn guedxliuj?

⁷ Paru redidx-xhii ni rniä riliä'pru xpala'n Dios näjza xtidxliini, çxhicient gunni yälguxhtis narä si'c te bendojl? ⁸ Yu'za bejn ni canii didx-xhii, najreni cayäjpnu lo rebejn: "Co_lyejn cosguijdx te guiluilojni recoshuen." Per rebejn ni canii si'c sidzujñ dxej gacreni yälguxhtis.

Guiraanu najcnu bendojl

⁹ ¿Dxejca'? ¿La najcnu be_nhuenduxhru lojreni, ä? Dini gac; tebloj abile'cnu yälquij xten rexp_n Israel con rebejn ni di gac xpe_n Israel, sa'csi guiraareni yu'reni lo dojl. ¹⁰ Si'cni caj lo guijtz:

Ruti te be_nsa'c, nicla tejni.

¹¹ Ruti te bejn ni racbee, ruti chu tej nani rguuil Dios.

¹² Guiragajcreni abirii lo xnejz Dios, teblojsi xhet sajcdireni.

Ruti chu tej ni rujn cossa'c, nicla tejni.

¹³ Ro'reni rii ganax didxguijdx, najcni si'c te baa ni naxal, rusgueereni con lujdxreni,

didxlatsiaj rii ro'reni najcni si'c bene_n ni yu' ro' te bälñialajz.

¹⁴ Ro'reni entis cague, entis canii didxrdxe'ch lo sa'reni.

¹⁵ Ni'reni ruxunli saxhe' xtiejn sa'reni.

¹⁶ Cadrotis rijreni rujnreni latsiaj, ruteedreni sa'reni trabajw.

¹⁷ Direni gumbee nezyuj ni ruscuecdxilajz.

¹⁸ Niclaza guidxelojreni Dios.

¹⁹ Racbeenu najc rediidx nani caj lo xleii Dios par rebejn ni rnibee leii lojreni, te jäuu ro' guralii rebejn, te guiraa rebe_n guedxliuj gacheereni yu' xtoj_lreni nez loj Dios. ²⁰ Sa'csi mase gusoob bejn guira'ti diidx ni caj lo leii, di leiiga gudzucaj xtoj_l bejn_{ga}, sa'csi leiiga najc nani guluii dojl ni yu' ne_n lastooni.

Rus_laa Dios lo dojl xcuent yälñililajz xtiidxni

²¹ Naj ruluii Dios stee mood guibicaj xtoj_lnu, nani di gac mood ni caj lo xleii toMoisés. Luxh galooli gusloj canii Dios xcuent nezyujre, cajni lo reguijtz xten leii näjza lo reguijtz ni bejn rebejn nani gunii xtidx Dios galoo. ²² Stee mood najc scree: Chutis ni chalilajz xtidx Jesucrist, sajc naya lastooni nez loj Dios; si'c sajc garaliiza nani salilajz, sa'csi tebloj najcnu nez lojni. ²³ Sa'csi guiralii rebejn guedxliuj abanijt lo Dios, direni guiga' guidzujñreni lo xnezyuj Dios. ²⁴ Niluxh balaslajz Dios nuunu, banidxxlia'ni loonu yälñabannaya nez loj Dios sa'csi Jesucristis gudijx yälguxhtis xten dojl che baxhe'ni xtiejnni lo cruzj te badzucajni xtoj_lnu. ²⁵ Baxhal Dios xi'nni, Jesucrist, te cuajni lo cruzj nez loj rebejn te si'c gudijxni guiraa rextoj_l chutis bejn ni rililajz xtidx Dios xcuent xtiejn Jesucrist. Si'c bejn Dios te guluiini xho guibannaya bejn lojni. Galoo gojptis Dios pasens rebejn, dini niujn yälguxhtis rextoj_lreni, ²⁶ sa'csi acanajj Dios guc gunni yälguxhtis redojlga, te si'c guiluuii xcälñayani nez loj guiraa rebejn, te Diospac gunnaya nez lojni chutis ni rililajz xtidx Jesucrist.

²⁷ Ni'cni çcon yälñaro? ¿Con yälñindaan? ;Xhet sajcdini! ¿Xhi leii rudzucaj xtoj_lnu? ¿La leii najc ni rni_i jiennu dzunsa'c, ä? ;Dini gac si'c! Yu' tejtis leii ni

rudzucaj dojl, nani rnii chalilajztis bejn xtidx Jesucrist. ²⁸ Dxejc sajc guiniä lojtu chutis bejn sajc gac naya nez loj Dios sa'csi rililajzni xtidx Jesucrist, xhet sa'csi rujnni redzunsac ni caj lo leii.

²⁹ ¿La najc Dios Xtiooztis rexpex Israel, ä? ¿La dini gac näjza Dios xten rebejn ni di gac xpen Israel? ¿Xho dini gac! Najcni Dios xten guurop cuaa bejn. ³⁰ Ruti chu stee Dios, tejtis Dios yu'. Ruslaani lo dojl rebejn ni guyu' bee sa'csi huililajzreni xtiidxni, sigajcza ruslaani lo dojl rebejn ni xhet beedi guyu' sa'csi huililajzaren i xtiidxni. ³¹ ¿La rudzucajnu leii sa'csi rililajznu, ä? Ajndi. ¿Xho gacni si'c! Alga basoobnu xtidx leiiga che huililajznu xtidx Jesucrist.

4

Xcärrililajz to Abram

¹ ¿Xhini'c sajc guiniinu xcuent toxtadgoldoonu, Abram? ² Paru niajc to Abram beñnaya nez loj Dios por redzuun ni bejnni, pet sajc guibalazduxhni, per xhet nez lojdi Dios. ³ ¿Xhini'c caj lo xtidx Dios? Caj rediidxre: Huililajz to Abram xtidx Dios, ni'c bachaag Dios cuent najcni te beñnaya nez lojni.

⁴ Meel nani rca' te bejn ni rujn te dzuun, meelga najc ni riälj xca'ni, xhet rcaxlia'dinini. ⁵ Luxh nani rililajztis xtidx Dios ni ruslaa bejn lo dojl, lacuaa naani yu' xhi dzuun sajc gunni te guibicaj xtojlni, bejnga najc te beñnaya nez loj Dios, sa'csi huililajzni xtiidxni. ⁶ Sigajcza naj to David, chicbaa bejn nani ruchaag Dios cuent najcni te beñnaya luxh di niqiuin niujnni redzuun ni caj lo leii. Räjpmi:

⁷ Chicbaa renani abaslaa Dios lo xtojlni, renani abiäuu loj xtojlni.

⁸ Chicbaa bejn nani diru Dios gun cuent xtojlni.

⁹ ¿La sajc guiniini chicbaa rebejntis nani guyu' bee, ä? ¿La et näjdiza renani di niu' bee, ä? Sa'csi rniinu: "To Abram gujc te beñnaya nez loj Dios sa'csi huililajzni xtidx Dios." ¹⁰ Guc bidxaag cuent najcni te beñnaya nez loj Dios ¿che gajdni chu bee, ä? O ¿Laa che guyu'ni bee? Bidxaagpac xcuentni che gajdni chu bee. ¹¹ Dxejcti guyu'ni bee si'c te seen xten yäl'naya sa'csi huililajzni xtidx Dios che gajdlini chu bee te gacni xtdad guiraa renani rililajz lañ ni xhet beedi yu'reni, te näjza laareni guidxaag cuent najceni beñnaya nez loj Dios, ¹² te gaczani xtdad guiraa renani yu' bee ni huililajza xtidx Dios si'c huililajz to Abram cheni gajdni chu bee.

Diidx ni bia'n Dios rsiojb xcuent yälrrililajz

¹³ Bia'n Dios diidx loj to Abram näjza loj rexagdooni, xca'ni guedxliujre si'c yäl'nasa'c xteni. Xhet sa'csi gusoobni xtidx leii xca'nini, sica'nini sa'csi najc to Abram te beñnaya nez loj Dios sa'csi huililajzni xtidx Dios. ¹⁴ Sa'csi paru renani rusoob xtidx leiiga najc nani xca' yäl'nasa'cga, xlia'si chalilajz bejn xtidx Jesucrist, luxh xhetza sajcdi diidx nani bia'n Dios loj to Abram. ¹⁵ Che yu' te leii, luxh yu' chu di gusoobni, dxejc rdxe'ch Dios loj bejn. Cadro xheti leii, xhetiza xtojlni.

¹⁶ Ni'cni balaslajz Dios nuunu, te sudzu'tz diidx ni bia'nni loj to Abram, te guiraa rexagdooni ni rililajz sica' yäl'nasa'c, xhet xtebtis renani sasanäj xleii to Moisés, nägajcza renani rililajz xtidx Dios si'c huililajz to Abram, nani najc xtdad guiraanu nani chalilajz xtidx Dios. ¹⁷ Si'cza caj lo xtidx Dios, caj rediidxre: "Abenä gaclu xtdad xhidal renación." Si'c bia'n Dios diidx loj to Abram, Gueb Dios nani gudeed yäl'nabajn loj rebengut, nani rnii xcuent recos nani gajd gac ascanu ala najcni.

18 Anajn to Abram naganduxh soob diidx ni bia'n Dios con laani, luxh laani empac huililajzni, ni'c gujčni xtdad xhidajl nación, te gusojb xtidx Dios ni guniini che räjpnj: "Scree gac xhidajl rexagdoolu." 19 Di to Abram nunijt xcälirililajzni, mase ayu'ni tegayuu ijz, najnni anajčni bengool, luxh sigajcza Sara abengool diru xi'nreni chu. 20 Dini niun-tio'p lajzni xcuent rediidx nani bia'n Dios con laani, alga gusutijpruni huililajzni xtiidxni, gulä'pni xpala'n Dios, badeedni xquixtios lojni. 21 Anajnni rajp Dios yäl'nibee te gunni guiralii nani bia'n diidx gunni. 22 Ni'c bachaag Dios cuent najčni te beñnaya nez lojni sa'csi huililajzni xtidx Dios.

23 Xhet xtebtisdi xcuent to Abram cuaj rediidxre: "Bidxaag cuent najčni te beñnaya nez loj Dios sa'csi huililajzni xtidx Dios", 24 näjza xcuentnu cuajni, sa'csi che chalilaznu xtiidx nani baspañsac Xtdad Jesucrist loj rebengut, sidxaag cuent najcznu beñnaya nez loj Dios. 25 Bacuaareni Jesucrist lo cruzj te gudijxni rextojlnu nez loj Dios, luxh gubañsacni lo rebengut, te gac gacnu beñnaya nez loj Dios.

5

Xhi rsiajc bejn che najcreni beñnaya nez loj Dios

1 Ni'cni che rililajznu xtidx Dios rudzucaj Jesucrist xtojlnu rajcznu beñnaya nez loj Dios, ni'cni ruscuedxini lajznu. 2 Sa'csi gujt Jesucrist, sa'csi gubañsacni lo rebengut cuent nuurnu, che rililajznu xtidx Dios xcuent Jesucrist, rulasajz Dios nuurnu, ni'cni rbalajznu, rajcznu yäl'nabajn, su'pacnu lo xcälrdimbicha' Dios. 3 Luxh xhet ni'ctis, sajcza guibalaaznu che tednu trabajw, sa'csi najcznu trabajwga sujñ jia'pnu pasens. 4 Luxh che rajcznu pasens rajcznu te benguyajlru; che anajczanu benguyajl, rililazsa'crunu. 5 Luxh yäl'rililazsa'cnu dini gusanxtujy, sa'csi yäl'sanälajz ni rajp Dios ruchaj lastoonu sa'csi neñ lastoonu rbäjz Xsprit Dxañ xten Dios ni baniidxni loonu.

6 Lañ ni xhetliidi sajcdi jiennu lagajc xcuentnu te guibicaj xtojlnu, che basa' dxej biäd Jesucrist te gujtni lo cruzj xcuent rebendojl. 7 Guliipacni, naganduxh guidxälni te bejn ni xcäjb guet lacuaa te bejn ni laaca rujnni. Per sidxäjł te bejn ni xcäjb guet lacuaa te beñsa'c. 8 Luxh Dios baluiloj xcäl'rinälajzni xcuent nuurnu sa'csi lañ ni yugajcznu lo dojl, gujt Jesucrist lo cruzj xcuentnu. 9 Aticaxh naj ni najcznu beñnaya nez loj Dios sa'csi baxhe'ni xtiejnni te gubicaj xtojlnu, naj sidedcaj gacnu xcäl'guxhtis Dios. 10 Palga lañ ni rdxe'chnu lo Dios, basiäjłni lajzni xcuentnu sa'csi gujt Xi'nni lo cruzj, naj ni abäjł lajzni, suslaani nuure lo dojl sa'csi gubañsac Xi'nni loj rebengut. 11 Luxh xhet ni'ctis, sibalaznajznu Dios xcuent Dad Jesucrist, sa'csi xcuentni ara'pnu yäl'rbexdi lajzni nez loj Dios.

Adán con Dad Jesucrist

12 Ni'cni, xcuent tejtis niguii biu' dojl lo guedxliuj, luxh xcuent dojl biädza yäl'gujt, gudejdti yäl'gujt loj guiraa rebejn, sa'csi guiraa rebejn bejnreni dojl. 13 Cheni gajd xleii to Moisés chu lo guedxliujre, alabejn rebejn dojl, per di niajcdi nucuaquijni rebejn sa'csi xheti leii. 14 Luxh empac gujt rebejn neñ redxej ni gubajñ to Adán hasta redxej ni gubajñ to Moisés, mase direni niujñ lagajc dojl nani bejn to Adán; luxh ruluiloj yu' chu stee bejn nungäjł jiaäd.

15 Luxh nani runidx-xlia' Dios dini gac si'c najc xtojł to Adán. Dini gac si'c sa'csi palga xcuent dojl ni bejn to Adán, gujt xhidalduxh bejn, cuantimaaz naj sunidx-xlia' Dios yäl'nabajñ par tejpas loonu por xcäl'rulasajz Dios, nägajc por

xcäl'ruleslajz Dad nani laa Jesucrist. ¹⁶ Luxh nani runidx-xlia' Dios loonu dini gac si'c yälrunij ni biääd loonu xcuent dojl ni bejn toAdán; sa'csi xcuent tejtis dojlga biääd yälguhxtis xten Dios, sa'csi guiraliiza rebejn guedxliujre yu' lo dojl, per xcuent nani banidx-xlia' Dios, nalajznu, gujt Xi'nni Jesucrist lo cruzj, ni'c gujc sa'csi yuduxhtej dojl, te xcuent ni bejn Jesucrist sajz gac bejn bennaya nez loj Dios. ¹⁷ Palga xcuent dojl ni bejn tejsi bejnga gunibee yälgujt lo guiraa bejn, cuantimaaz lo yäl'nabajn par tejpas sinibee guiraa reni rca' xcäl'ruleslajz Jesucrist näjza renani rcaxlia' lojni yälracnaya nez loj Dios.

¹⁸ Ni'cni sigajc ni biääd yälguhxtis lo guiraa reben guedxliuj xcuent dojl ni bejn tejsi niguii, sigajcza sa'csi basoob stee niguii xtidx Dios, xhidaj bejn gujc bennaya nez loj Dios, cua'reni yäl'nabajn par tejpas. ¹⁹ Nalajznu sigajc ni banijt xhidalduxh bejn nez loj Dios xcuent tej niguii ni di nusoob xtidx Dios, sigajcza xhidalduxh bejn sajz bennaya nez loj Dios xcuent tej niguii ni basoob xtiidx Dios. ²⁰ Ni'cni badeed Dios xleii toMoisés, te guzenru dojl. Niluxh cadro guyuduxh dojl, ro'c nanabza chuduxhru xcäl'ruleslazduxh Dios, ²¹ te sigajc ni gunibee dojl guyu' yälgujt, sigajcza guinibeeru xcäl'ruleslajz Dios te jia'cnu bennaya nez loj Dios, te xca'nu yäl'nabajn par tejpas xcuent Xi'nni, Dad Jesucrist.

6

Agujtnu lo dojl per nabannäjnu Jesucrist

¹ ¿Xhini'c guiniinu, naj? ¿La sajz guidxunrunu lo dojl te tioobru xcäl'ruleslajz Dios, ä? ² ¿Gurniälojtu gacni si'c! Nuurnu najcnu si'c te bengut lo dojl sa'csi rililajznu xtidx Dios; ¿xhoxh gac guibajnrunu lo dojl? ³ ¿La ditu gan, che gurobnisnu con laj Jesucrist, najcni si'c ni näjza nuurnu gujtnu si'c ni gujt Jesucrist? ⁴ Sa'csi che gurobnisnu bigatznäjnu si'c lo yälgujt, te sigajcni huäjs Jesucrist lo yälgujt xcuent xcäl'rnibee Dios, sigajcza näj nuurnu sajz guidxunnu lo te yäl'nabañcoob.

⁵ Sa'csi palga gujcnu tejsi con laani lo xcäl'gujtni che birobnisnu, sigajcza sajznu tejsi con laani lo yäl'nabansac lo rebengut. ⁶ Ni'cni xcärienbiejwnu cuaj lo cruzj con laani, te badzucajni rextojlnu, te di gacdiru guinibee dojl loonu. ⁷ Sa'csi nani agujt, di gacdiru guinibee dojl lojni. ⁸ Palga nuurnu agujtnu con Jesucrist, rililaaaznu sibansaczanu con laani. ⁹ Sa'csi nadonpacnu gubansac Jesucrist loj rebengut, ni'c diruni guet, diru yälgujt ga'p yäl'rnibee lojni. ¹⁰ Che gujt Jesucrist, gujtni xcuent dojl, luxh diru gacdi guinibee dojl laani par tejpas; naj ni gubansacni, nabajnni nez loj Dios. ¹¹ Ni'cni la'tu colguchaag cuent najctu si'c te bengut lo dojl, luxh nez loj Dios, colguchaag cuent nabannäjtu Jesucrist.

¹² Ni'cni na'c gusaantu guinibee dojl tiejxhtu te guntu si'ctis ni rlajz tiejxhtu. ¹³ Na'cruza gusaantu jiajb guideb lagaa tiejxhtu lo dojl te guntu cosguijdx. Maazru hueen colgudeed tiejxhtu lo Dios si'c te bejn nani gubansac lo rebengut, näjza colgudeed guideb lagaa tiejxhtu te guntu recoshueen si'c ni rlajz Dios guntu. ¹⁴ Sa'csi diru dojl guinibee lojtu, sa'csi dirutu chu loj xleii toMoisés, sa'csi yu'tu lo xcäl'ruleslajz Dios.

La'tu najc si'c remos

¹⁵ ¿Xho gacni naj? ¿La sajz jienrunu dojl naj ni dirunu chu lo leii sa'csi yu'nu lo xcäl'ruleslajz Dios, ä? ¿Xho gacni si'c! ¹⁶ La'tu nansa'ctu palga yu'tu si'c te mos loj te lam te gusobdiajgtu xtiidxni, najcpectu xmos bejn nani rusobtu xtiidxni. Ni'cni, palga gusobtu xtidx dojl, ni'c najc xlamtu, ni'c siändä yälgujt

lojtu. Palga gusoobtu xtidx Dios, ni'c najc xlamtu. Dxejc sajctu beɲnaya nez loj Dios. ¹⁷ Xquixtios lo Dios, galoo gujctu xmos dojl, per naj guideb lastootu basobdiajgtu xtidxcoob Dios, huililajztu xtiidxni ni basule'nu lojtu. ¹⁸ Luxh agulaatu lo dojl, biädjiajctu xmos Dios lo dzunsa'c. ¹⁹ Narä cagusule'ä diidx con sa' didx guyasire sa'csi gajdtu gacbesa'c xho najc xnezyuj Dios. Che gujctu xmos dojl, guideb lagaatu bejntu dojl, bejntu latsiaj, luxh ni'c satajltis latsiaj ni bejntu. Naj ni najctu xmos Dios lo dzunsa'c, guideb lagaatu colyejnru dzunsa'c, te si'c sidajlru dzunsa'c ni guntu sa'csi najctu beɲnaya nez loj Dios.

²⁰ Sa'csi che gujctu xmos dojl, di rextidx Dios guinibee la'tu. ²¹ Naja', çxhini'c bejntu gaan che gujctu xmos dojl, bejntu recos ni rtuinäjtu naj? Ni xnezyuj recosga rdzujñ loj yälgujttis. ²² Per naj, sa'csi agulaatu lo dojl, abiu'tu najctu xmos Dios, sujntu sajctu beɲnaya nez loj Dios, luxh xnezyuj recoscoobre rdzujñ lo yälñabannäj Dios par tejpas. ²³ Xcälrajx xten dojl najc yälgujt, per nani runidx-xlia' Dios najc xcälñabannäj Dios par tejpas xcuent ni bejn Jesucrist xtdanu.

7

Yälrluui ni rudeed yälguchnaa

¹ Caniä lojtu ni najn xleii toMoisés. çLa ditu gan, resa'ä, xleii toMoisés rnibee loj te bejn guideb nabajñni lo guedxlijre? ² Najcni si'c te gunaa nani bachnaa te niguii. Nanabpac cuäznäjni chäälni guideb nabajñni. Si'c rnibee leiiga. Palga guet chäälni, diru gacdi guinibee leiiga lojni xcuent chäälni. ³ Ni'cni, laj ni nabajñ chäälni gunaaga, palga cuäznäj gunaaga ste'ca niguii, cayujñni dojl sirilajni gunaguujdx. Palga agujt chäälni gunaaga, agulaani lo leiiga, sajç guchnaani stee niguii, xhet dojl di cayujñni, dizani guirilaj gunaguujdx.

⁴ Ni'cni la'tu, rebetzä, sigajcza agulaatu lo leiiga, sa'csi najcni si'cni gujctu si'c bengut lo leii che gujt Jesucrist lo cruzj, te naj sajç jiu'tu lo ste'ca bejn, loj lagajç Jesucrist nani gubansac loj rebengut te sajç jiennu redzunsa'c ni rajz Dios jiennu. ⁵ Sa'csi laj ni gubajñnu lo yälñabanbiejwga, lagajç rediidx nani rñii leiiga di gacdi gun bejn, lagajç recosga rrajz gun tiejxhnu, luxh si'c sozaatisnu lo xnezyuj yälgujt. ⁶ Naj abiriinu lo leiiga, sa'csi agujtñu lo leiiga nani guinibee loonu galoo. Naj con xpitcoob ni yu' neñ lastoonu yu'nu lo Dios, xhet con xcärienbiejwdi ni gojpnu che nanab gusoobpacnu leii.

Redojl nani yu' tiexhä

⁷ çXhixhni'c guiniinu naj? çLa dojl najc leii, ä? ;Xho gacni si'c! Palga dina niembeä xhi caj lo leiiga, dizana niacheä cayunä dojl. Dina niacheä cayunä dojl che rlazä xca'a xhixten ste'ca bejn palga dina niolä lo leii rediidxre: "Na'c chuguij lajzlu rexhixten bejn." ⁸ Ni'cni lagajç diidx ni caj lo leiiga bejn guyuguij lajz rexhixten bejn sa'csi nancheä najcni dojl. Paru xheti leii, xhetiza dojl, agujtñi. ⁹ Galoo gubanä xhet leiidi nanä, luxh che biääd diidx ni rnibee leii, gucheä xhini'c najc dojl, dxejc banitä lo Dios, si'c ni gutä. ¹⁰ Luxh baxha! Dios leiiga loonu te jiuäni, te xca'ä yälñabajñ, luxh alga bazenñi benä dojl, banitä nez loj Dios, gutäti dxejc. ¹¹ Con leiiga, basguee dojl narä, bejñni narä si'c te bengut nez loj Dios.

¹² Ni'cni, leii najc dxan, näjza rediidx ni caj lo leiiga najc dxan; hueen najcni, didxgulii najcni. ¹³ çDxejca'? çLa nani najc te coshueen huinä narä lo yälgujt, ä? ;Xho gacni si'c! Dojl najc ni huinä narä lo yälgujt. Te si'c xcuent

leiiga ni nasa'c, jienlojni dojl pac najc dojl sa'csi bagu'tni narä con te coshueen, te lagajc rediidx ni caj lo leiiga jienloj lacti latsiaj najc dojl.

14 Sa'csi nadonnu leiiga najc xtidx Dios, luxh narä nacä te beñ guedxliujre, nacä xmospac dojl. 15 Sa'csi dina gacbeä xhini'c runä. Dina gunä recos nani rlazä gunä, alga cayuna latsiaj nani dipacna rlazä gunä. 16 Naj palga narä runä latsiaj nani dipacna rlazä gunä, lagajcza ni'c ruluii hueenca najc leii. 17 Naj, diruni gac narä ni cayujn latsiaj, sa'csi yu' dojl neñ lastoä, ni'c ni cayujn runä latsiaj. 18 Sa'csi narä nanä neñ lastoä, nalajznu lo tiexhä, xhetliidi cossa'c di yu'; sa'csi rlazä gunä cossa'c, per dina gac dipä te gunä pac recossa'cga. 19 Sa'csi dina gunä redzunsac nani rlazä gunä, alga latsiaj nani diru rlazä gunä, ni'c runä. 20 Ni'cni palga runä latsiaj nani diru rlazä gunä, xhet narä di runäni, dojl ni yu' tiexhä, ni'c ni cayujn runä latsiaj.

21 Ni'cni narä, nani rlazä gunä redzunsac, rdxälä leiire: yu'pa dojl tiexhä. 22 Sa'csi neñ lastoä, rlazä pac gusobä diidx xten xleii Dios. 23 Luxh ruhuiä garenca leii yu' guideb lagaa tiexhä, ruchagdijni leii ni yu' xcärienä, ru-teedzani narä ladzñaa xleii dojl nani yu' guideb lagaa tiexhä.

24 ¡Proobza narä! ¿Chuni'c guslaa tiexhä ni nungäj! guet xcuent dojl? 25 ¡Xquixtiaz loj Dios sa'csi Dad Jesucrist sajc guslaa nuurnu lo dojl! Ni'cni con xcärienä rusobä xtiidx Dios, yu'ä lo xleii Dios, niluxh tiexhä rlazj gusoob xtiidx dojl, chuni lo xleii dojl.

8

Yäl nabajñ ni najc xcuent Sprit Dxan xten Dios

1 Ni'cni naj rut rajcdi rbe'c xcälqij renani ahuililajz xtidx Jesucrist, renani diru jiu gunreni latsiaj ni rlazj gun tiejxhrene, alga riurureni rujnreni ni rnibee Sprit Dxan xten Dios ni rbäjz neñ lastooreni. 2 Sa'csi leii xten Sprit Dxan xten Dios ni rudeed yäl nabajñ xcuent Jesucrist, abaslaani narä lo yäl rnibee xten xleii dojl näjza yälgujt. 3 Sa'csi nani di niajcdi niujn leibiejw, sa'csi dini niaj nadip lo rebenguedxliuj te gacreni bennaya nez loj Dios, ni'c bejn Dios che baxhalni Xi'nni Jesucrist, si'c te beñ guedxliujre xcuent dojl, te bejni yälguxhtis lo dojl ni rnibee tiejxh bejn. 4 Te si'c gac xcälguxhtis xten leibiejw lo tiejxh nuurnu, renani dirunu gusoob nani rlazj gun tiejxhnu, sa'csi naj rbajñnu si'c ni rnibee Sprit Dxan xten Dios ni yu' neñ lastoonu.

5 Sa'csi renani rusoobtis nani rlazj gun tiejxhrene, rujntisreni xhigab xcuent redojlga, luxh renani rusoob xtidx Sprit Dxan xten Dios rujntisreni xhigab xcuent nani rlazj Dios gunreni. 6 Sa'csi renani yu'tis yejcreni nani rlazj gun tiejxhrene, sejtreni, sinijtreni; luxh renani yu'tis yejcreni nani rnii Sprit Dxan Dios, reni'c sibecdxi lajzreni, sica'reni yäl nabajñ lo Dios par tejpas. 7 Te xcäriejn nani riutis ni rlazj gun tiejxh bejn rdxe'ch Dios lojni sa'csi dini gusoob xleii Dios, luxh nicla gac gunnini. 8 Renani nabajñtis te gunreni latsiaj ni rlazj gun tiejxhrene di Dios guibalaznäjreni.

9 Luxh la'tu dirutu gun si'ctis ni rlazj gun tiejxhtu, ni'cni rujntu si'c ni rlazj Sprit Dxan xten Dios guntu, palga rbäjzni neñ lastootu. Palga yu' chu tejtü ni di Sprit Dxan cuääz neñ lastooni, di ni'c gac xpejñni. 10 Palga rbäjz Jesucrist neñ lastootu, agujt tiejxhtu xcuent dojl, xprittu nabajñ sa'csi anajctu bennaya nez loj Dios. 11 Luxh palga neñ lastootu rbäjz Sprit xten nani baspansac Jesucrist loj rebengut, lagajc nani baspansac Jesucrist lo rebengut suspansac tiejxhnu ni nabajñ lo guedxliujre xcuent Xpirtüni nani yu' neñ lastoonu.

12 Ni'cni rebetzä, najcnu bejn ni cuaj di'n, xhet lojdi tiejxhnu te jiennu si'c ni rlazj gun tiejxhnu. 13 Sa'csi palga cayujntu si'c ni rlazjztis gun tiejxhtu,

sejtpactu. Palga nabajntu xcuent Sprit Dxan xten Dios ni rbäjz nen lastootu, sibälaztu latsiaj ni rlaiz gun tiejxhtu, sibannäjtu Dios par tejpas.

¹⁴ Sa'csi guiraa renani ruluui Sprit Dxan xten Dios guiraa reni'c najc rexi'n Dios. ¹⁵ Naj ditu nica' te sprit xten te mos te chusactu lo yälrdxiejb, alga cua'tu sprit xten ni najc si'c te bisiäjb ni cua' bejn si'c xi'npacni, naj najcnu xi'nni, ni'cni sajc gäbnu lojni: "Guejblu, Xtadä." ¹⁶ Sa'csi lagajc Sprit Dxan xten Dios ruluui loj xpritnu, najpacnu xi'n Dios. ¹⁷ Luxh palga najcnu rexi'nni, sica'zanu yäl'nasa'c lo Dios, tejsi yäl'nasa'c con Dad Jesucrist, palga guliini tednu lagajc trabajw ni gudejdni xcuent xtiidxni, te tejsiza siliä'p xpala'nnu con laani.

¹⁸ Sa'csi narä runä xhigab retrabajw ni cadejdnu nen redxejre, digacdi gun teblonureni con yälrdimbicha' nani churu guihuiinu. ¹⁹ Sa'csi guiraa recos nani benchee Dios lo guedxliujre, cabäjzreni, yuduxhreni gaan fiireni dxej che guluiloj Dios chuni'c najc rexi'nni. ²⁰ Guiraa recos ni gulecxtiej Dios lo guedxliujre, xlia'si gujcreni, xhet sa'csi si'c rlaizdi recosga, per sa'csi si'c bejn Dios, ni cabäjzti ²¹ guslaapacni guiraa recos ni bencheeni lo guedxliujre lo xcäl'rnibee yälgujt, yäl'rnitloj, te dxejc sajc jiu'ni lo yäl'rbedxi xten xcäl'rdimbicha' xten rexi'n Dios. ²² Guiraa recos ni gulecxtiej Dios lo guedxliujre entis roonreni, guira dxej rdejdrni trabajw, si'c rdejdr te gunaa trabajw che rajl xi'nni. ²³ Luxh xhet nani tre'tis lo guedxliujdi, näjza nuunu ni yu' Sprit Dxan xten Dios nen lastoonu, roonzanu cabääznu dxej cheni xca' Dios nuure si'c rexi'nni, cheni guscoobzani tiexhnu. ²⁴ Sa'csi xcäl'rililaaznu ni rbääznu, ni'c bejn gulaanu luxh yäl'rbäjz ni guyasi rien, di ni'c gac yäl'rbäjz, sa'csi çchu laa ni cuääz xcuent te cos ni ala bahuiini? ²⁵ Palga cabääznu xcuent te cos ni gajdnu guihuii, rbaali laaznu, rsidzdu'tznu rbäjznu guihuiinu gacni.

²⁶ Sigajcza racnäj Sprit Dxan xten Dios nuure cadro xheti yäl'rutijp laaznu sa'csi nicla guidonnu xho mood riäjł guiniab bejn lo Dios. Luxh lagajc Sprit Dxan ni yu' lastoonu rniabni lo Dios xcuent nuure con yäl'rbedxnen nani nicla gajd bejn gäb con diidx xho najcni. ²⁷ Dios, nani rula'tz lastoonu, nanchee xhini'c rniab Sprit Dxan xtenni xcuent nuurnu, sa'csi rniabni si'cpac ni rlaiz Dios guiniabnu xcuent rexejnpac Dios.

Siennu gaanpac loj guira'ti

²⁸ Nadoncheenu guira'ti ni rsiajc rebejn ni sanälajz Dios, reni agule Dios te gunreni xtzunni rsiajcrenini te gun Dios gac recosga par xcäl'nasa'creni. ²⁹ Sa'csi renani biembee Dios galooli, reni'c gule Dios cheni gajdli guirixtiej guedxliujre, te gacreni si'c ni najc Xi'nni; te gacza Xi'nni ganid loj guiraa ni najc famil xten Dios. ³⁰ Renani guleni galooli, reni'c gurejdxni; renani gurejdxni, bejnzani najcreni ben'naya nez loj Dios; renani bejnni najcreni ben'naya nez loj Dios, gulä'pzani xpala'nreni.

³¹ Çxhixhni'c guiniinu xcuent dee? Palga yu' Dios xlaadnu, çchuxh ni'c najc ni gun gaan loonu? ³² Dios nani di nudxojn Xi'nni, nani cuäjb cuaj Xi'nni lo cruzj te gujtni, te gudijxni xcuent xtojłnu, çxho dini guniidx loonu xcuent Xi'nni guira'ti nani rquiinnu, ä? ³³ ÇChuni'c sajc cue'c xhi xcäl'quij reni agule Dios nez lo Dios, ä? Ni lagajc Dios najc nani rniij najcnu ben'naya nez lojni. ³⁴ ÇChuni'c najc nani cue'c xhi xcäl'quijnu nez lo Dios? Jesucrist najc nani gujt por nuure, luxh et ni'ctis. Laani gubansaczani loj rebengujt, luxh naj sobga'ni xladbee Dios cadro rnibeeni; laazani cabejdx canabni lo Dios xcuentnu. ³⁵ ÇChuni'c sajc gudzucaj nuurnu lo yäl'sanälajz xten Jesucrist: trabajw, o

yälxliajs, o yälrusacsí, o yälrliaan, o yälxhabääl, o yälrdxejb, o te spaad, ä? Nicla tejni. ³⁶ Si'c ni caj lo guijtz ni caj xtidx Dios:

Xcuentlu, sa'csi najcnu xpejnlu caye'tnu guixe-guixee.

Ruchaagreni cuent najcnu si'c xiil ni aguro' te ju't bejnni.

³⁷ Luxh loj guiraa recosre, sujnpacnu gaan xcuent nani sanälajz nuure, sa'csi sacnäjpacni nuure. ³⁸ Sa'csi anancheä nicla yälgujt, nicla yäl'nabajn, nicla rexangl Dios, niclaza renani rnibee, nicla recos ni yu' naj, niclaza recos nani churu gac, niclaza yäl'milaagwr, ³⁹ nicla jiaroduxh, niclaza jäjt'pac, niclaza xhitis cos ni guc-chee, nicla tej redee di gacdi gudzucaj nuurnu lo xcäl'sanälajz Dios, yäl'sanälajz ni rajpza Dad, Jesucrist.

9

Dios agule reben Israel

¹ Caniä didxguliipac lojtu sa'csi rililazä xtidx Jesucrist. Dina guiniä didx-xhii. Sprit Dxaan xten Dios caguluüi xcärienä laaca rniä; ² cayac-huinduxh lastoä, sanuutis yälxliajsge. ³ Sa'csi narä rlazä malaii sajç lagajc narä nitloä lo Dios te sajç gacnää resa'ä lo guedxliujre, rexpejn Israel. ⁴ Sa'csi laareni najc xagdoo toIsrael, luxh laareni nungäjl gacreni si'c xi'npac Dios. Gubannäj Diosreni. Bia'n Dios didx con laareni. Basa'n Dios xleii Moisés lojreni. Bazuxhijbreni nez lo Dios neñ guidoo. Sica'reni reyäl'nasa'c xten Dios palga jiureni xtiidxni. ⁵ Laareni najc rexagdoo xten toxtadgoldoonu ni gubajn agujc xhero. Jesucrist gujca xagdoo xten toIsrael che gojlni si'c te beñ guedxliuj. Laani najczani Dios loj guiraanu. Suchä'p xpala'nni par tejpas. Sugacni si'c.

⁶ Luxh dini gac si'cni abanijt xtidx Dios nani bia'nni loj toIsrael. Sa'csi xhet guiraadi rebejn ni najc xagdoo toIsrael najc xpejn'pac Israel. ⁷ Diza guiraa reni najc rexagdoo toAbram gac xi'nguliipacni sa'csi räjp Dios lo toAbram: "Rexagdoolu nani guigab najc reni gac xagdoo Isaac." ⁸ Ni'cni xhet guiraadi rexagdoo toAbram najc rexi'n Dios, xtebtis renani chalilajz xtiidxni, reni'c najc xi'nni. ⁹ Sa'csi bia'n Dios diidx loj toAbram: "Stebijz, lagajc bäiire guibisacä, te dxejc chu te xi'n Sara."

¹⁰ Xhet diidxtisga gunii Dios. Guniizani lo toRebeca, che nuxi'nni cua'ch, xi'n chäälni, toxtadgoolnu Isaac. ¹¹ Ni'cni anse gaal rexi'nni, anse niujnreni te dzunsa'c o te dzunguijdx, te soobpac xtidx Dios xcuent chuni'c cueni lo guiro'p rebäzre, xhet sa'csi bejndireni dzunsa'c, per sa'csi agule Diosni, ¹² ni'c räjp Dios lo toRebeca: "Xingangaloolu gac xmos xinhuinlu." ¹³ Si'cza caj lo guijtz rediidxre: "Sanälazä Jacob, niluxh bidxechnää Esaü."

¹⁴ ¿Xhini'c guiniinu naj? ¿Xhet laadi rujn Dios, ä? ¡Xho gacni si'c! ¹⁵ Sa'csi räjp Dios loj toMoisés: "Sulaslazä chutis bejn nani rlazä gulaslazä, sacnää chutis bejn nani rlazä gacnää." ¹⁶ Ni'cni dini gac xcuent ni rlazj rebejn gac, dizani gac xcuent nani rujn rebejn. Rajctisni si'c rlazj Dios nani rulaslazj bejn. ¹⁷ Ni'cni caj lo guijtz xten Dios che gunii Dios xcuent Faraón: "Narä benä gujclu reii xten Égipto te guluuloj xcäl'rnibeä, te guiliä'p bejn xpala'nä guideb guedxliujre." ¹⁸ Rulaslazjni rebejn nani rlazjctisni, runnadipzani lastoo bejn nani rlazjctisni.

¹⁹ Naj la'tu siniitu loä: "¿Xhicuent rucuaquijni bejn? ¿Chuni'c sajç sudzu'tz nez loj nani rlazjni gac, ä?" ²⁰ ¿Chuxh luj, beñ guedxliuj, te jieinäjlu Dios? Xhixh säjb te gues loj nani bencheeni: "¿Xhicuent bejnlu narä scree?"

²¹ Gurniäloju. Bejn nani runchee guejs, ¿la di gacdi gunni si'ctisni rlazjni con

bajnga, ä? ¿La di gacdi guncheeni te guessa'c nägajcza te guesyuj ni xhet sirbdi con lagajc bajnga?

²² ¿Xhiru najc, palga Dios rlanjzi gululojoi ni xho rujnzi yälguxhtis, näjza rlanjzi gululojoi xcälrbibeeni, gopnäjzi pasens renani nungäjlgac yälguxhtis, te nitlojzareni, ä? ²³ Bejnzi si'c te gululojoi lacti sajczcärlrdimbicha'ni loj renani galooli guleni chü lojoi lo xcälrdimbicha'ni. ²⁴ Lagajc nuurnu najcnu reni aguleni; xhet xtebtis loj rexpen Israel guleni nuurnu, näjza loj rebejn ni di gac rexpen Israel guleni nuurnu. ²⁵ Cajza lo guijtz ni bacuaa Oseas: Renani di gac xpenä, reni'c cuälää "xpenä".

Luxh nani dina ninälazä, sinälazäni.

²⁶ Dxejcti lagajc cadro räjpreni lojreni:

"Ditu gac rexpenä",

lagajc ro'c säjpreni lojreni:

"La'tu najctu xi'n Dios ni nabajz par tejjpas."

²⁷ Cajza lo guijtz ni bacuaa Isaías: "Mase najc xhidajlg rexpen Israel si'c najc yujxh ni tre' ro' nisdoos, guxii gac reni laa lo dojl. ²⁸ Sa'csi susoobpac Dad, Dios xtiidxni xcuent xcälrguxhtis reben guedxliuj, luxh siojzba gunnini."

²⁹ Guniiza Isaías, xcuent nani churu gac, bacuaani:

Palga di Dios ni yu' xhaguibaa nusa'n gaii xagdoos reben tiemp, ni ajcnu si'c gujcz Sodoma näjza Gomorra, reguejdx ni gunitloj.

Xtidx Dios näj rexpen Israel

³⁰ ¿Xhini'c sajcz guiniinu naj? Rebejn nani di gac xpen Israel, direni niguiil xho gacreni bejnaya nez loj Dios, niluxh agujczreni bejnaya nez loj Dios sa'csi huililajzreni xtidx Jesucrist. ³¹ Luxh rexpen Israel, mase sanuutisreni lo xleii Moisés ni ruluii xho gac bejn bejnaya nez loj Dios, banijtreni, direni niujn gaan nusoobreni guideb leiiga. ³² ¿Xhicuent gujczni si'c? Sa'csi direni nililajz xtidx Dios, alga rlanjzreni guntisreni dzuun xten leii, naareni si'c gacreni bejnaya nez lo Dios. Ni'cni gulaj ni'reni lo guij ni rutienta' bejn, nalajznu direni nililajz xtidx Dios xcuent Jesucrist. ³³ Si'cza bacuaa Isaías, räjpni: Aguleä te bejn lo guedx Siön ni gac si'c te guij cadro rtiäjlg ni' bejn, te guij ni rusälta' bejn.

Chutis tej nani chalilajz xtiidxni, dini jianxtujy.

10

¹ Rebetzä, rlazduxhä chalilajz rexpenä xtidx Dios. Rniabduxhä lo Dios te guslaanireni lo xtojlgreni. ² Narä rniäpac nancheä ruzuxhijb rexpen Israel lo Dios, niluxh direni gumbesa'c xhini'c rlanjz Dios gunreni. ³ Sa'csi direni niachee xcuent xho rajcz te bejn te bejnaya nez loj Dios, ni'c rlanjzreni gunreni dzuun si'c ni caj lo leii te gacreni bejnaya nez loj Dios, ni'cza direni nusoob xtidx Dios te gacreni bejnaya nez lojoi. ⁴ Abasoob Jesucrist xtidx Leii, ni'cni che chalilajz bejn xtidx Jesucrist, anajczreni bejnaya nez loj Dios.

⁵ To Moisés bacuaa rediidxre: "Chutis ni rlanjz gac bejnaya nez loj Dios sa'csi rusoobni xtidx leii, nanab gusobsa'cpacni diidxga guideb nabajzni lo guedxliujre." ⁶ Xcälnayareni nez loj Dios sa'csi rililajzreni xtidx Jesucrist, rni scree: "Na'c guiniitu nen lastootu, ¿chuni'c chä'p xhaguibaa?" nalajznu, te jädnäsacni Jesucrist loj guedxliuj. ⁷ Na'cza gäbni: "¿Chuni'c jäät gabijlg?" (nalajznu te chaxiini Jesucrist loj rebengut). ⁸ ¿Xhini'c rniini naj? Rniini: "Diidxga suga' gajxh ro'tu, nen lastootu." Nalajznu, diidx xcuent yärlililaaaz nani cagusule'nu lojtu. ⁹ Rniinu lojtu, palga guiniitu con ro'tu, Jesucrist najc Dad loonu, palga chalilajztu baspañsac Dios Jesucrist loj rebengut, suslaani

la'tu lo dojl. ¹⁰ Sa'csi con lastooni rililajz biniet xtiidxni, ni'c rajcni beⁿnaya nez loj Dios; luxh che rcäjpza biniet con ro'ni, Jesucrist rnibee loonu, rus^laa Diosni lo dojl.

¹¹ Sa'csi rnii xtidx Dios scree: "Chutis ni rililajz xtidx Dad Jesucrist, dini jianxtujy." ¹² Sa'csi guiraa rebejn najc tebloj nez lojni, rexpejn Israel sigajc rebenzjt, sa'csi lagajc laani najcni Dad lo guiraareni, rulaslazduxhni guiraa renani rbedx-rniab lojni. ¹³ Lo xtidx Dios caj rediidxre: "Chutis ni rbedx-rniab lo Dad, siliaani lo xtojlni palga rililajzni xtidx Dios." ¹⁴ ¿Xho gac guiniabreni lo Dad, palga direni chalilajz xtiidxni? ¿Xho gacza chalilajzreni xtiidxni, palga gajd diajgreni jiejn xtiidxni? ¿Luxh xho jiejn diajgreni xtiidxni palga rut rusule'di diidxga lojreni, ä? ¹⁵ Luxh ¿xhoza gusule'reni diidxga palga rut guxhaldireni? Si'cni caj lo guijt: "Chipza saru najc ni' renani riädna diidx xcuent cossa'c, yälrbedcxi lajz rebejn."

¹⁶ Xhet guiraadireni rusooob xtiidxni, sa'csi guniiza toIsaías: "Dad, ¿chuni'c chalilajz xtiidxnu?" ¹⁷ Rililajz bejn xtidx Dios che rucudiajgreni diidxga; rucudiajzareneni che yu' chu rusule' xtidx Jesucrist.

¹⁸ Naj arniä: Gajdpac diajgreni jiejn xtiidxni, o ¿la babiejn diajgreni, ä? Pues abiejn diajgreni, sa'csi lo xtidx Dios caj scree: Abire'ch xse'reni guideb guedxliuj, abidzujnza rextiidxreni lo guiraa reguejdx ni tre' lo guedxliujre.

¹⁹ Rniäza: Dipac rexpejn Israel niacbee, o ¿la gucbeereni, ä? Galooli gunii toMoisés rediidxre:

Sunä gudxojntu xcuent rebejn ni di gac te guejdx, con te guejdx nani di gacbee suche'chä la'tu.

²⁰ Diza toIsaías nidxejb guniini rediidxre:

Renani di niguiil narä, bidxäl narä, baluiloäza loj renani di niniabdiidx narä.

²¹ Guniiza toIsaías xcuent rexpejn Israel:

Desde galooli, dxej-yääl basgää naä lo rebejn^{ga} te niurenⁱ xtidxä, luxh najczeni bejn ni di gusoob diidx, rutzu'reni didxnaj.

11

Rexpejn Israel nani gulaa lo dojl

¹ Arniä: ¿La agulälaz Dios rexpejn Israel, ä? ¿Xho gacni si'c! Ni lagajc narä nacä te xpejn Israel, te xagdo toAbram, nadxagä lo resa' toBenjamín. ² Di Dios nibälaz rexpejnⁿⁱ, xpejn Israel nani guleni galooli che gajdlⁱ guirixtiej guedxliuj. O ¿la dilu gacbee xhi caj lo xtidx Dios cadro rnii xcuent Elías, xho gunabduxh Elías didxnaj lo Dios xcuent rexpejn Israel, ä? Räjⁿⁱ scree: ³ "Dad, abagu'treni guiraa reniguii nani gunii xtiidxlu, abatzujl'reni rexquidoolu, xtebtis narä bia'nä, luxh naj r^lajzreni ju'treni narä." ⁴ Luxh, ¿xhini'c räj^p Dios lojni? Räjⁿⁱ: "Abalucheä gajdz mi^l bejn nani gajd guzuxhijb nez loj Baal." ⁵ Si'cza naj, abia'n te chinae' rexpejn Israel nani agule Dios xcuent xcäl'rulaslajzⁿⁱ. ⁶ Dxejc palga ruslaani nuure lo dojl xcuent xcäl'rulaslajzⁿⁱ diruni gac sa'csi yu' xhi dzuun bienu te nuslaani nuure lo dojl. Paru si'c najcni diru xcäl'rulaslajz Dios gac yälrulaslajz.

⁷ ¿Dxejca'? Di rexpejn Israel nidxäl nani caguuilreni, luxh rebejn nani agule Dios, ni'c bidxälⁿⁱ, luxh ste cuaareni, aguyalajzreni. ⁸ Gujⁿⁱ si'c caj lo xtidx Dios:

Bascäy Dios xcäriejnreni, näjza balojni di jien, lo dxe najli di diajgreni jiejn.

⁹ Guniiza to David, scree caj lo xtidx Dios:
Sugun xmex lanijreni jiajbreni,
te gac guiga' reni,
sugacni si'c guij ni rulani' bejn, te gacreni yälguختis.

¹⁰ Suguscäy Dios balojreni te na'c fisa'creni,
sujie't dejtzreni, sutedreni trabajwduxh par tejpas.

Yärluslaa lo dojl xten bejn ni di gac xpen Israel

¹¹ Naj rniabdixä: ¿La biajb rexpén Israel te gunijtreni par tejpas, ä? ¿Xho gacni si'c! Sa'csi biajb rexpejn Israel, ni'cni gojl biääd yärluslaa lo dojl lo bejn ni di gac xpen Israel, te si'c guisiäblajz lajz rexpén Israel laareni lo dojl. ¹² Palga xcuent dojl ni bejn xpen Israel gojp reben guedxliuj xcäl'nasa'c Dios, palga xcuent yälrunijt xten rexpén Israel guyu' xcäl'nasa'c Dios par rebejn ni di gac xpen Israel, aticaxh chu xcäl'nasa'creni che gusoob xpen Israel xtidx Dios.

¹³ Naj caniä lojtu ni najc bejn ni di gac xpejn Israel. Gule Dios narä te gusule'ä xtiidxnij lojtu, ni'cni caläpä xpala'n xtzunä, ¹⁴ te don xho gunä te guisiäblajz reben ladxä ni najc xpen Israel, te si'c chalilajzreni xtidx Jesucrist. ¹⁵ Palga gulecdxireni lajz reben guedxliuj con Dios sa'csi gulälaz rexpén Israel xtidx Jesucrist, aticaxh che chalilajz rexpén Israel rextidx Jesucrist, sibansac renani najc si'c bengut. ¹⁶ Palga tla' cojb najc hueen, guideb cojbga najc hueen. Sigajcza najc te yajg; palga xlobaani najc hueen, guidebni najc hueen.

¹⁷ Rexpén Israel najcreni si'c te yajg oliib; palga gutiuugreni te naa yajgga, dxejc ro'c goquidreni naa ste'ca yajg te guibajjni con xtiejn yajg oliibga. ¹⁸ Ni'cni, na'c gactu gualajz lo renaapac yajgga. Colgusnaj lajztu, xhet la'ditu ni rudeed yäl'nabajn lo xlobaa yajgga, lobaaga ni runiidx yäl'nabajn lojtu.

¹⁹ Dxejc colguinii: “Batiuugreni naapac yajgre, te gujc biguidä cuä' yajgga.” ²⁰ Guliipacni, biru' naapac yajgga sa'csi direni nililajz xtidx Dios luxh la'tu biguiidtu cuä' yajgga sa'csi huililajztu xtiidxnij. Na'c gactu gualajz, colguidxejb, ²¹ sa'csi palga di Dios nutedbia renaa yajgga, diza Dios gutedbia la'tu. ²² Bahuii ¡lacti hueen najc Dios! Luxh lacti niälajzzeni; con renani banijt najcni niälajz, luxh lacti rulaslajz Dios la'tu palga chanuu jiutu xtiidxnij. Palga ditu jiu xtiidxnij, näjza la'tu sudzucaj Dios. ²³ Luxh sigajcza reni bidin, palga di chanuu cuälazreni xtiidxnij sajz suquidsac Diosreni lo yajgga. ²⁴ Luxh la'tu najctu benzijt, najctu si'c naa te yagoliib ni xtebca gulejn nen dajn. Luxh batiuugni la'tu te baquidni la'tu lo te yagoliib ni najc yagsa'c ni rcaduxh oliib lojni, mase xhet si'cti najc olibguijxhga, jaticaxh rexpén Israel ni banijt najc si'c naapac xten yagolibsa'cga ni bidin, palga chalilajzpacreni xtidx Dios, suquidsac Diosreni loj yajg ni najc xtenpacreni!

Che laapac rexpén Israel lo dojl

²⁵ Rebetzä, rlazä gacheetu xcuent te diidx nagajn, te di naatu nanduxhtu. Dee najc didx nagajnga: yu' rexpejn Israel ni guc najd lastooreni te direni nililajz xtidx Dios, hasta guisa' redxej ni chalilajz rebenzijt xtidx Dios. ²⁶ Dxejcti siliaapac guiraa rexpén Israel lo dojl che chalilajzreni xtidx Dios, sa'csi si'c caj lo xtidx Dios, cadro caj rediidxre:

Nani ruslaa sajz bejn guedx Siön,
luxh sudzucajni xtoj renani najc xagdoo toJacoob.

²⁷ Dee najc diidx ni bia'nä con laareni,
che gudzucaä xtojreni.

²⁸ Naj, najcreni xcontraar Dios sa'csi rdxe'chreni xcuent xtidx Jesucrist, te chälilajztu; niluxh Dios sanälajzreni sa'csi si'c abia'nni diidx con retoxtrad-goldooreni. ²⁹ Sa'csi rut rajcdi rudzucaj nicla yäl'nasa'c ni ruded Dios, niclaza yäl'rbejdx xten Dios. ³⁰ La'tu galoo ditu nusoob xitdx Dios. Naj rulaslajz Dios la'tu sa'csi gulälaz rexpen Israel xtiidxni. ³¹ Sigajcza naj direni gusoob xtidx Dios, niluxh si'c najcni te gulaslajz Diosreni sa'csi balaslajzzani la'tu. ³² Dios basaan biajb guiraanu lo dojl, te si'c sajc gulaslajz Dios guiraanu.

³³ ¡Lacti guroob najc yäl'nasa'c xten xcäl'najn, xcäl'rabee xten Dios! Nicla tej bejn guedxliuj di gabee guiraa rexcäl'guxhtisni, rudliidiza najn rexnezyujni. ³⁴ Si'c caj lo guitz: "¿Chuni'c gucbee xcäriejn Dios? ¿Chuni'cza abaluiini? Rutliidi. ³⁵ O ¿chuni'c badedxga te xhi cos lojni, te quixsacnini lojni, ä? Rutliidi." ³⁶ Sa'csi loj Dios siäd guira'ti, luxh laani bencheeni guira'ti par lagajcza laani. Suguliä'pnu xpala'nni par tejpas. Sugacni si'c.

12

Yäl'nabajn rliä'p xpala'n Dios

¹ Ni'cni rulidxä la'tu rebetzä, sa'csi rulaslajz Dios nuure, colgudeed xcäl'nabajntu lo Dios te gac guiba'nsa'ctu si'cni rrajz Dios. Dee najc yäl'rajn'pac Dios si'c ni nungäl' ga'ntu Dios. ² Na'c rujntu lagajc xhigab ni rujn reben guedxliuj, colguscoob rexhigabtu te guidxaapac xmoodtu te si'c guluii Dios xhini'c rrajzni guntu, nalajznu xhini'c najc hueen, xhini'c rdxag'rajz Dios, xhini'cza najc laapac.

³ Sa'csi balaslajz Dios narä, ni'c rusule'ä xtiidxni loj tejgatu, rniä lojtu, na'c guiliä'ptu lagajc xpala'ntu, naatu sajcrutu loj sa'tu. Col'yejn xhigabsa'c, te laaca gac xhigabtu, si'cni baniidx Dios lo tejgatu xho chälilajztu xtiidxni.

⁴ Sa'csi sigajc najc tiejxnu, yu' xhidal la'ni, luxh tejgareni rujn xtzun-xtzunreni, ⁵ sigajcza nuure nani rililajz xtidx Jesucrist, najcnu xhidajl, najcnu si'c tejsi tiejxh lo Jesucrist, mase tejganu rujn xtzun-xtzunnu, tejsi najcnu.

⁶ Luxh sa'csi tejganu rajpnu garen-garen dzuun xcuent yäl'rulaslajz ni baniidx Dios loonu, sujiennu rextzuunnu screeza: nani rajc rniä xtidx Jesucrist, suguiinini, si'c ni najc xcäl'rililajzni; ⁷ nani rajc racnäy sa'ni, sugacnäjni; nani rajc ruluii xtidx Dios, suguluini; ⁸ nani rajc gulijdx resa'ni, sugulijdxnireni, nani rajc rudedxlia' xhixtenni lo sa'ni, saru sugudeedni xhixtenni; nani rajc rniabee lo sa'ni, suguinibeeni con yäl'nadolajz; nani rajc rulaslajz resa'ni, sugulaslajzni con yäl'rbalajz.

Xho nanab guiba'nu lo xnezyuj Dios

⁹ Colchanälajzpac resa'tu, na'c gunsitu si'cni rinälajztureni. Colcuälaz redzun-guijdx, col'yejntis redzunsac'. ¹⁰ Colchanälajz resa'tu si'c rinälajz bejn rebejztni. Colguiliä'p xpala'nreni.

¹¹ Col'yejn dzunsac', na'c cuedxitu. Col'yejn xtzun Jesucrist con guideb xtiijtu, guideb xcäriejntu.

¹² Colguibalajz sa'csi ahuililajztu xtiidxni. Colcuedx'i lajztu che tedtu trabajw. Colcuedx-col'nabtis lo Dios guideb nabajntu.

¹³ Colgacnäy rebejn nani rililajz xtidx Dios; sacru col'ni loj ni riädhuiitu.

¹⁴ Colguini didxsa'c xcuent renani rusacsi la'tu, na'c gudzubdetureni.

¹⁵ Colguibalaznäy renani rbalajz, colyonnäy renani roon.

¹⁶ Col'yejn tejtis xhigab con resa'tu, na'c gactu guyalajz, colguchaag loj reben nadolajz. Na'c guchalotu najctu be'nnanduxh.

¹⁷ Na'c gudzu'tu dzunguijdx loj renani rujn dzunguijdx lojtu. Colyejn recossa'c nez loj guirasi bejn. ¹⁸ Cadrotis sajcn, dxitis colguibannäj guiraa rebejn. ¹⁹ Rebetzä, na'c guntu xhigab lagajc la'tu gudeedu xten renani rujn dojl lojtu, sa'csi lagajc Dios gun yälguxhtis lojreni, ni'cni caj lo xquijtzni scree: "Narä gunä yälguxhtis, narä quixä lojreni si'c naj Dad, Dios." ²⁰ Näjza: "Palga calaan nani rdxe'ch lojtu, colgudeed xhi gauni, palga cayojlmi, colgudeedza xhi yäni, te si'c jianxtiujni." ²¹ Na'c gusaantu gun redzunguijdx gaan lojtu, colyejn gaan lo dzunguijdx con recossa'c ni rujntu.

13

¹ Guiraatu nanab jiutu xtidx renani rnibee lojtu. Sa'csi xheti te yälrnibee nani di Dios nudeed, luxh guiraa reyälrnibee ni yu' lo guedxliujre, lagajc Dios gule'creni. ² Ni'cni renani di gusoob xtidx renani rnibee, xtidx Dios cabälazni. Luxh renani rujn si'c, lagajc laareni xcaquijreni dojl, sujn Dios yälguxhtis lojreni. ³ Renani rnibee di guchejb renani riu xtiidxreni, ruchejbreni renani najc bejn guijdx ni di jiu xtiidxreni. Palga di rlanjtu guidxeyjtu reguxhtis, bejntis dzunsa'c, dxejcti guiliä'preni xpala'ntu sa'csi rujntu dzunsa'c. ⁴ Reguxhtis rujnreni lojtu xtzuum Dios te guibansa'ctu. Palga guntu dzunguijdx, colguidxeyjb, xhet xlia'di ca'ni spaad, sa'csi najceni nani rujn xtzuum Dios te gunreni yälguxhtis, te quixpac renani rujn dojl. ⁵ Ni'cni nanab jiutu rextiidxreni, xhet ganaxtis sa'csi rujnreni yälguxhtis lojtu, näjza te ga'ptu te xcäriejnsa'c, te xcäriennaya. ⁶ Ni'cni colquijx lojreni nani riäjł xca'reni sa'csi renani rnibee najc xmos Dios, luxh ni'cpac najc xtzuumreni.

⁷ Colgudeed lo guiraa bejn nani riäjł xca'reni. Colquix loj renani nazääbtu; colquijx impuest loj ni riäjł xca'ni; colchanälajz renani riäjł chanälajz; colguiliä'p xpala'n renani riäjł chä'p xpala'reni. ⁸ Na'c xcajlu di'n loj nicla tej bejn, di'ntis xten yälrinälajz sa'ni, sa'csi nani rinälajz xpisiñni, bejnğa abasoob xleii Dios. ⁹ Sa'csi lo xleii Dios caj scree: "Na'c guesnäjlu bejn ni di gac chäällu, na'c ju'tlu, na'c cuanlu, na'c gusgueelu, na'c chuguij lajzlu xhixten resa'lu." Luxh palga yu' xhi stee leii rsa'ni con leii ni rni: "Chanälajzlu resa'lu si'c sanälajzlu lagajc luj." ¹⁰ Nani rajp yälsanälajz, dini gun latsiaj lo resa'ni. Ni'cni yälsanälajz rusooob releii ni caj lo xtidx Dios.

¹¹ Colyejn guiraa redee, sa'csi anajntu xho najc redxey ni nabajñnu naj, anajntu alagojl or guibajñnu lo bacad sa'csi abidzungajxhru dxej che laanu neñ dojl lo dxej che huililajznu. ¹² Aguxhinduxh, asiädgajxh bianij. Ni'cni cuääz jiennu redzuun guijdx ni rajc lo xcäy, te jientisnu redzunsa'c ni rajc rdxee, lo bianij. ¹³ Guibansa'cnu si'c riäjł guibajñ rebejn rdxee, na'c guibanu lo yälrä', niclaza lo yälbiejy, na'c guidiesnäjnu bejn ni di gac chäälnu, na'c ga'pnu rebis, na'c guidxagdilnu resa'nu, na'c chuguij lajznu xhixten resa'nu. ¹⁴ Ni'cni colca' xcalrnibee Jesucrist te na'c guntu redojl ni rlanj gun tiejxhtu.

14

Na'c guiniyajtu rebejtztu

¹ Colñii didxdoo lo rebejn nani di gumbesa'c xtidx Dios, na'c tilnäjtireni. ² Sa'csi yu' reni riililajz nani sajc gaureni guira'ti xhi cos, niluxh nani gajd sutijp lo yälrililajz, ganaxtis berduur rajwni. ³ Nani rajw guira'ti, na'c guidxechnäjni nani di gau guira'ti; luxh nani di gau guira'ti, na'cza guiniyajni nani rajw sa'csi Dios aguleza bejnğa. ⁴ Chuxh luj te guiniyajlu lo xmos te bejn,

ä? Sugäb lagajc xlamni lojni la laaca rujnni o la xhet laadi rujnni. Luxh sujnni laaca sa'csi Dad Jesucrist sujñ sutijp lastooni.

⁵ Tej bejn naa sajcrú tej dxej lo stee dxej, dxejc ste'ca bejn rchalo guiraa redxej najc tebloj. Xhet najcdi, teja bejn sugunpac lagajc xhigabni. ⁶ Nani rapda te dxej, rujnnini te guiliä'pni xpala'n Dios, luxh nani di gunni, rliä'pzani xpala'n Dios sa'csi dini gapda te dxej. Luxh nani rajw guira'ti, rajwni te rliä'pni xpala'n Dios, sa'csi rudeedzani xquixtios lo Dios; nani di gau guira'ti, nez lo Dios dini gau, rliä'pzani xpala'n Dios, rudeedzani xquixtios lo Dios.

⁷ Sa'csi nicla tejnu dinu guibajn xcuentcanu, nicla tejzanu dinu guet xcuentcanu. ⁸ Palga nabaannu, nabaannu xcuent Dad Jesucrist; palga guetnu, rejtzanu xcuent Dad, Jesucrist. Ni'cni palga nabaannu, o palga guetnu, lahtis najcnu rexpén Dad, Jesucrist. ⁹ Ni'cni gujt Jesucrist, ni'cni gubanšaczani, te sajç gacni Dad xten rebengut, näjza Dad xten rebejn nani nabajn.

¹⁰ Dxejc luj, çxhicuent cubeelu bejtzlu, ä? O çxhicuent rdxe'chlu rhuuilu lojni, ä? Ni guiragajcnu tednu nez loj Jesucrist cadro cueni te gunni yälguxhtis loonu. ¹¹ Sa'csi scree caj lo xtidx Dios:

Si'ttis ni nabanä, rniliäpac lojtu, räjp Dad Dios, guiraa rebeñ guedxliuj suzuxhijbreni loä, luxh guiragajc ro'reni sicäjp narä nacä Dad Dios.

¹² Ni'cni guiraanu, tejganu sudeednu cuent loj Dios xcuent nani biennu.

Na'c guzállu bejtzlu

¹³ Ni'cni na'cru cubeenu sa'nu. Maazru hueen jiennu xhigab neñ lastoonu xhetliidi jiennu ni gun jiajb resa'nu lo dojl. ¹⁴ Narä nanä, racbeäpac guira'ti najc hueen. Jesucrist Xtadnu baluüi narä si'c. Luxh palga yu' chu tej ni rchalo dini gac hueen, par laatisini dini gac hueen. ¹⁵ Palga la'tu guntu gac-huin lajz te sa'tu sa'csi yu' xhi rajwtu, dirutu chasanäj xnezuy yälsanälajz. Na'c gunlu gunijt te sa'lu xcuent nani rajwlu, sa'csi agujt Jesucrist xcuentni. ¹⁶ Ni'cni na'c gusaanlu guiniyajreni nani najc te cos hueen par luj. ¹⁷ Sa'csi xcälrnibee Dios dini gac xcuent yälrajw, niclaza xcuent yälrä'; xcälrnibee Dios najc xcuent te yäl'nabannya nez loj Dios, näjza yälrbexilajz con yälrbalajz xcuent Sprit Dxan xten Dios. ¹⁸ Sa'csi nani rujñ si'c lo xtzuun Jesucrist, bejnğa rchaglaajz Dios, luxh rebeñ guedxliuj rniiza didxsa'c xcuent sa' bejnğa.

¹⁹ Ni'cni chanuutis guidiilnu recos nani rujñ chu yälrbexilajz, näjza nani rujñ racnäjnu resa'nu te tioobrurení loj xnezuy Dios. ²⁰ Na'c guntu nit xtzuun Dios xcuent ni rajwtu. Guliicani guira'ti ni rajw bejn najc naya, niluxh palga gautu te cos nani gun jiajb bejtzlu neñ dojl, ni'c najc xhet laadi. ²¹ Hueen najc na'c gautu bääl, na'cza yätu bin, na'cza guntu jiajb sa'lu neñ dojl. ²² Nani rililajztu, ni'c colyajp xcuentcatu nez loj Dios. Chicbaa nani di cubee lagajc laani xcuent recos nani rniini laaca najcni. ²³ Luxh palga guntio'p lajz te bejn xcuent nani rajwni, sigubeeni lagajc laani, sa'csi dini gau xcuent yälrililajz, sa'csi xhitis ni di gac xcuent yälrililajz, lagajc ni'c najc dojl.

15

Huinälajz sa'lu

¹ Nuurnu ni agusutijpnu lo yälrililajz nanab gacnäjnu resa'nu nani gajd chalilazsa'c. Di gacdi guibanšatnu xcuentcanu. ² Tejganu nanab chonälaznu resa'nu lo xcäl'nabansa'cni te gacnäjnu chalilajzrurení. ³ Sa'csi nicla Jesucrist

dini nibajñ xcuentcani, luxh si'cni caj loj xtidx Dios: “Redidxyaj ni guniya-jreni lojlu biajbreni yecä.” ⁴ Guiraa rediidx ni cuaj lo guijtj galooli, cuajreni te guluiireni nuurnu te ga'pnu yälsutijp näjza yälrustioblajz te gacza guibääznu lo xtidx Dios. ⁵ Dios rusutijp lajznu, Dios rutioob lastoonu. Rniabä loj Diosga gacnäjni guntu tejtis xhigab xten Jesucrist con resa'tu. ⁶ Te dxejcti tejtis gac xse'tu guiliä'ptu xpala'n Dios, Xtað Jesucrist.

Gusule' xtidx Dios loj rebenzijt

⁷ Ni'cni col'ca' resa'tu, renani ahuililajz xtidx Dios sigajc cua' Jesucrist nuure te guiliä'pnu xpala'n Dios. ⁸ Sa'csi narä rniä lojtu, biääd Jesucrist te gujcti si'c te mos loj rexpen Israel te baluiini xcuent didxgulii xten Dios te gusojb rediidx nani bia'n Dios loj retoxtadgoldoonu, ⁹ näjza par rebenzijt, te guiliä'preni xpala'n Dios sa'csi baluilojni xcäl'rulaslajz Dios lojreni, si'c ni caj lo xtidx Dios:

Ni'cni siliä'pä xpala'nlu nez loj rebenzijt,
soläza dij lojlu.

¹⁰ Dxejcti stee lajt rniini:

La'tu benzijt, colguibalaznäj rexpenä rexpejn Israel.

¹¹ Stee lajt cajza:

Guiraatu, rebenzijt, colguiliä'p xpala'n Dad,
suguliä'pza guiralii rebejn xpala'nni.

¹² Stee huält guniiza Isaias scree:

Siricaj te xagdoo toIsai,
näjza te ni chäs te guinibeeni loj rebenzijt,
laani cabäjz rebenzijt.

¹³ Naj rniabä lo Dios ni rudeed yälrbäzljajz, te laani gacnäj guibalajztu, cuedxilajztu, sa'csi salilajztu, te tioobru yälrbäzljajz ni rajptu sa'csi Sprit Dyan xten Dios yu' neñ lastootu, luxh laani rajpni yälrmibee.

¹⁴ Luxh xcuent la'tu rebetzä, anancheä nabañsa'ctu nasinduxhtu, arajcza rulijdxtu sa'tu, ¹⁵ luxh loj guijtjzre bacuaä gaii didxnaj xcuent tiop-chon cos, te gusnaä lajztu. Runä si'c xcuent yäl'rulaslajz ni baniidx Dios loä ¹⁶ te gacä xpen Jesucrist ni rusule' diidx loj rebenzijt. Ni'cni cagusulesa'cä xtidx Dios lojreni, te xca' Dios rebenzijt si'c te gojn ni rudedä, sa'csi agujcteni bennaya sa'csi rbäjz Sprit Dyan neñ lastooreni.

¹⁷ Ni'cni xcuent Jesucrist abidxälä xhicuent guiniduxhä didxro xcuent recos ni najc xten Dios. ¹⁸ Sa'csi dina guiniä diidx xcuent xhi stee cos, ganaxtis xcuent xho gucnäj Jesucrist narä, luxh xcuent ni'c basoob rebenzijt diidx, huililajzreni xtiidxni sa'csi biejn diajgreni xtiidxni, bahuiizareni rextzuunni, ¹⁹ con yäl'milaagwr xten redzunro, resenro, ni gujc con xcäl'rmibee Sprit Dyan xten Dios. Ni'cni lo guedx Jerusaléni, näjza guideb gabi ro'c, lo guedx Ilírico, guiraa nejzga abasule'ä xtidx Jesucrist. ²⁰ Si'cza guyu'ä ganduxh gusule'ä xtidx Dios xhet cadro ahuisule'direni xtidx Jesucrist, alga ganax cadro gajdreni gumbee Jesucrist, te na'c gunä dzuun cadro gusloj cayujn ste'ca bejn dzuun. ²¹ Te gacni si'cni caj lo guijtj: Renani rutliidi bij diidx xcuentni, suhuiipacreni lojni, luxh renani gajdpac diajgreni jiejn xtiidxni, sachecheereni xtiidxni.

Rujñ Pabl xhigab chääni guedx Roma

²² Ni'cni balti huält badxojn Dios narä jädhuiä lojtu. ²³ Luxh naj sa'csi abaluxä xtzunä guideb nezree, näjza sa'csi agujc balti ijj rlazduxhä jädhuiä lojtu, ²⁴ naj che cha'a España siädhuiäpac lojtu. Che tedä, jädhuiäpac contu

te ganid guibalaznää la'tu, dxejcti gacnäjtü narä te cha'a España. ²⁵ Naj sia'a guedx Jerusalén te chanää xcoobr rexpejn Dios ni yu' ree loj rebejn ro'c. ²⁶ Sa'csi rebejn Macedonia näjza reben Acaya rlaizpacreni guxhałreni te coobr loj rebenproob ni yu' lo reni huililajz xtidx Dios neñ guedx Jerusalén. ²⁷ Bejnreni xhigab hueen gunreni si'c, luxh guli'careni, sa'csi yu' xhi nazääbreni lojreni sa'csi rebejn Jerusalén najc reni baxhał xtidx Jesucrist lojreni, naj laaca rujnreni cayacnäjreni reben Jerusalén con xhixtenreni. ²⁸ Ni'cni che chasa'nä meel lojreni dxejc tedä lajdxtu, jädhuiä contu, dxejc cha'ä España. ²⁹ Luxh ananä che jialä lojtu, li guidxa lastoä xcäl'nasa'c xtidx Jesucrist guidzunä lojtu.

³⁰ Rebetzä, rniabduxhä lojtu xcuent xtidx Dad Jesucrist näjza xcuent xcäl'rinälajz Sprit Dxan xten Dios, colguidxagsa'tu, te colgacnäj colcuedx-guiniabtu lo Dios xcuentä. ³¹ Colnab lo Dios te gušlaani narä loj reben Judea nani di gusoob xtiidxni te saru gun reben dxan ni yu' Jerusalén te xca'reni ni chanää lojreni. ³² Te cabaa lazä guidzunä lojtu, sa'csi rlaizpac Dios jialä lojtu, te lałni yu'ä lojtu siäljyuä, susilazäza con la'tu. ³³ Dios ni rbedcxilajz bejn gacnäj guiraatu. Sugacni si'c.

16

Ruxhałni xtixtios lojreni

¹ Colgacnäj bisiajnnu Febe. Nane're bejn dzunduxh neñ guidoo ni tre' Cencrea. ² Colca'ni xcuent Dad, Jesucrist, si'cni riäjł gun bejn gacnäj renani rililajzpac xtidx Dios. Colyacnäjni lo xhitis nani guiquinni, sa'csi laani guncnäduxhni xhidal rebejn, nägajcza narä gucnäjni.

³ Ruxhałä xtixtios lo Priscila näjza lo Aquila, ni racnäj narä lo xtzuum Jesucrist. ⁴ Laareni nicäjpreni niejtreni xcuentä, ni'c rudedä xquixtios lojreni, luxh xhet narätis, näjza guiraa rebejn ni yu' lo rexquidoo rebenzijt. ⁵ Ruxhałä xtixtios loj resa'ä ni rdxagsa'reni rolijz Priscila näjza Aquila. Ruxhałä xtixtios loj Epeneto, ni sanälazduxhä, ni gujc benganiđ ni huililajz xtidx Jesucrist neñ guedx Acaya. ⁶ Ruxhałä xtixtios lo Marii nani benduxh dzuun lojtu. ⁷ Ruxhałä xtixtios loj reben ladxä ni laa Andrónico näjza Junias; laareni guyunäj narä neñ latzguiib, najceni benro loj reapost. Ganid laareni huililajz xtidx Jesucrist, dxejcti huililazä.

⁸ Ruxhałä xtixtios loj Amplias, ni sanälazä xcuent Jesucrist. ⁹ Ruxhałä xtixtios loj Urbano, ni runnäj nuurnu xtzuum Jesucrist. Ruxhałäza xtixtios loj Estaquis, ni sanälazä. ¹⁰ Ruxhałäza xtixtios loj Apeles, ni abadeed balti seen rililajzpacni xtidx Jesucrist. Ruxhałäza xtixtios loj guiraa ni tre' rolijz Aristóbulo. ¹¹ Ruxhałäza xtixtios lo Herodiön beñ ladxä, näjza loj resa' Narciso nani ahuililajz xtidx Jesucrist. ¹² Ruxhałäza xtixtios loj nan Trifena näjza nan Trifosa, guiro'preni cayujn xtzuum Jesucrist. Ruxhałäza xtixtios loj nan Përsida, sanälazäni, abenduxhni xtzun Jesucrist. ¹³ Ruxhałäza xtixtios lo Rufo nani agule Dios, näjza lo xnanni, sa'csi gujcnı si'c xnanäza. ¹⁴ Ruxhałäza xtixtios loj Asíncrito, näjza lo Flegonte, näjza lo Hermas, näjza lo Patrobas, näjza lo Hermes, näjza lo rebetzä ni yunäjreni. ¹⁵ Ruxhałäza xtixtios loj Filólogo, näjza lo Julia, näjza lo Nereo con bisiajnni, näjza lo Olimpaz näjza guiraa rexpen Dios nani yunäjreni ro'c.

¹⁶ Colje'tz xchan loj resa'tu. Guiraa rexquidoo Jesucrist ruxhał xtixtios lojtu.

¹⁷ Rebetzä, rniabduxhä lojtu ga'ptu cuidaad xcuent renani rujn bieje te guilia' sa' bejn, nani rlajz guntu guiraloj nani najc garenca loj yälrluluii ni bisieedtu, colguibicaj lojreni, ¹⁸ sa'csi sa' rebejn ga direni gun xtzuum Jesucrist. Laareni rlajztisreni gunreni si'c rlajz tiejxhrene; rniireni didxdoo, diidx ni rgudxguel diajg bejn te rusgueereni lastoo rebejn nani di susin. ¹⁹ Guiranejz abire'ch diidx xcuent xho rusobsacpactu xtidx Jesucrist, ni'cni rbaa laza, ni'cni rlazä gactu nasinduxh xcuent recoshueen, luxh si'c bäs xhet ganditu xcuent recosguijdx. ²⁰ Luxh Dios nani ruscuecdxilajz bejn siojb guta'cwni bendxab xhan ni'tu. Gacnä; Dad Jesucrist la'tu.

²¹ Timoteu nani racnä; narä lo dzuun, ruxhal xtixtios lojtu. Lucio, Jasón, näjza Sosípater, bejn ladxä, ruxhalza xtixtios lojtu.

²² Najrä Tercio, ni cagucuaä guijtzre xcuent Pabl, ruxhaläza xtixtios lojtu xcuent Jesucrist.

²³ Ruxhalza Gayo xtixtios lojtu. Rbääznu rolijzni, luxh rudeedzani rolijzni guidxagsa' rebejn guidoo. Ruxhalza Erasto, ni najc tesoreer xten guejdxre, xtixtios lojtu, sigajcza bejtznu ni laa Cuarto.

²⁴ Gacnä; Dad Jesucrist la'tu. Sugacni si'c.

Rediidx lult xten Pabl

²⁵ Colguiliä'p xpala'n nani sajz gusudzu'tz la'tu loj xtiidxni nani basule'ä, näjza loj xtidx Jesucrist xcuent rehxigab ni naga'tz galooli, ²⁶ naj abaluiloj rediidxga lojtu; näjza xcuent ni bacuaa reprof'e't galooli; si'c najc diidx ni bia'n Gueb Dios ni nabajn par tejpas loj rexpejn ni, agusule'ni loj guiraa rebejn guedxliuj, te gusoobreni diidx sa'csi rililajzreni xtiidxni, ²⁷ colguiliä'p xpala'n ni najc tejtis Dios ni nanduxh. Suguiliä'pnu xpala'n Dios xcuent Jesucrist. Guiliä'pnu xpala'n Dios par tejpas. Sugacni si'c.

Guijtz Ganid Ni Bacuaa Pabl Lo Guidoo Xten Guedx Corinto

Bacuaa Pabl te guijtz lo guidoo xten guedx Corinto

¹ Narä Pabl nacä apost xten Jesucrist sa'csi agule Dios narä te gusule'ä xtiidxni. Narä näjza Sóstenes ni najc bejtznu lo xtidx Dios rucuaanu guijszre lojtu ² ni ahuililajz xtidx Dios, ni yu' neñ guidoo xten guedx Corinto. La'tu agule Jesucrist, abasiani lastootu sa'csi ahuililajztu xtiidxni. La'tu näjza guiraa rebejn ni ahuililajz rextidx Jesucrist loj guideb guedxliuj, najctu xpejn Dios, ni najc Dad xten guiraaanu. ³ Rniabnu lo Dios ni najc xtdadnu näjza lo Dad Jesucrist, gacnäjreni la'tu, guscuecdxireni lajztu.

Abaniidx Dios xhidajl dzunsa'c xcuent Jesucrist

⁴ Rudedätis xquixtios lo Dios xcuentu, xcuent yäl'rulaslajz xten Dios ni cua'tu xcuent Jesucrist, ⁵ te xcuentni acua'zatu guiraa dzunsa'c, te gusule'tu xtiidxni, näjza te gacbesa'ctu xtiidxni; ⁶ sigajcza con xcäl'nabansa'ctu baluütu huililajzactu xtidx Dios xcuent Crist. ⁷ Ni'cni xhetliidi cayäädxditu loj redzunsa'c ni runiidx Dios, la' ni ganduxh yu'tu cabäjztu guibisac Jesucrist lo guedxliuj. ⁸ Laani susutijpni lajztu dxejli ni guibisac Dad Jesucrist loj guedxliuj, te rutliidi gac cue'c xhi te quej xcuenttu. ⁹ Rusoobpac Dios xtiidxni. Laani gurejdxni la'tu te jiu'tu lo xnejz Xi'nni Jesucrist ni najc Dad xtenu, te sanäjtuni.

Rlia' sa'reni neñ guidoo

¹⁰ Rulidxä la'tu, rebetzä, xcuent Xtdad Jesucristnu, colyejn tejsi xhigab te na'c la' sa'tu, saru guibannäjtu sa'tu, colyejn tejsi xhigab, colga'p tejsi xcäriejn. ¹¹ Sa'csi agucbeä xcuenttu, betzä ni huililajz xtidx Dios. Tej resa' Cloé biädsä'n diidx loä xcuenttu, yu' yäl'rdijl lojtu. ¹² Rlazä guiniä scree lojtu sa'csi yu'reni rni: "Narä nacä te rexpejn Pabl", näjza: "Narä nacä te rexpejn Apolos"; näjza: "Narä nacä te rexpejn Pedr", yu'zareni rni: "Narä nacä xpejn Crist." ¹³ ¿La rujntu xhigab nala' sa' Crist, ä? ¿La cuaj Pabl lo cruz xcuent xtojltu, ä? o ¿La gurobnistu con laj Pabl, ä? ¹⁴ Rudedä xquixtios lo Dios dina nutiobnisä nicla tejtü, xtebtis Crispo näjza Gayo, ¹⁵ te rut naadi con laä batiobnisäreni. ¹⁶ Abanaj lazä batiobnisä resa' Estéfanas. Di lazä guinaj la yu' chu stee bationnisä. ¹⁷ Di Crist nuxha' narä te gutiobnisä. Baxha'ni narä te gusule'ä rextiidxni xcuent xho gun bejn te laareni lo dojl, xhet con didxnanduxhdi, te di gudzucaä loj dzunroduxh ni bejn Jesucrist che gujtüni lo cruz.

Crist najc xcäl'milaagwr näjza xcäl'najn Dios

¹⁸ Rediidx ni rniinu xcuent Jesucrist xcuent xho gujtüni lo cruz te guslaani rebejn lo dojl najcni te diidx ni xhet sajcdi lo rebejn ni canijt sa'csi direni chalilajz xtiidxni. Luxh loj rebejn ni ruslaa Dios lo dojl najc rediidxga xcäl'milaagwr Dios. ¹⁹ Scree caj loj rexquijtz Dios:

Narä sutzulä yäl'nasiñ xten rebennajn,

sudzucaäza xcäl'nadxällajz, xhigab rebejn ni nadxällazduxh.

²⁰ ¿Con bejn ni nanduxh? ¿Con bejn ni rucuaa, ni najc mastr? ¿Con bejn ni ruchagduxh diidx xcuent recos guedxliujre, ä? ¿La te abejndi Dios najc guiraa yäl'nasiñ xten guedxliuj si'c nayällajz nez loj Dios, ä? ²¹ Ni'cni loj xcäl'nasiñ Dios, di rebejn guedxliuj niembee Dios con xcäl'nasiñ guedxliujre,

ni'c bichaglazj Dios con yälrusule' diidx ni rniireni nayällajz, con ni'c baslaani lo dojl rebejn ni huililajz xtiidxni xcuent Crist.

²² Rexpejn Israel rlazjpacreni fireni remilaagwr; rebejn griegw rguuil yälñanduxh. ²³ Niluxh nuurnu rusule'nu diidx xcuent xho cuaj Jesucrist lo cruzj, niluxh loj rexpejn Israel najc diidxre si'c te guiro ni chalani' bejn, luxh loj rebenzajt xhet sajcdi rediidxre. ²⁴ Niluxh loj rebejn ni gule Dios chalilajz rediidxre, rexpejn Israel sigajc loj rebenzajt, rediidxre najczani yälmlaagwr najczani yälñasiñ xten Dios. ²⁵ Sa'csi xcälñayääl xten Dios si'c rchalo rebejn ni'c najc nasinñduxhru loj xcälñasiñ xten reben guedxliuj; luxh xcälñiaj xten Dios sacduxhruni loj guiraa xcälñadaan reben guedxliuj. ²⁶ Colhuii la'tu, betzä ni ahuililajz xtidx Dios, xho gule Dios la'tu, colyejn xhigab guxiitu najctu benñasiñ loj reben guedxliuj, guxiiza rajptu yälñabee, guxiizatu najctu bejn ni agojl guiga'tu bens'a'c. ²⁷ Niluxh agule Dios rebejn ni xhet nanduxhdi te gusanxtujyni rebejn ni nanduxh, aguleza Dios rebejn ni guxii rñabee te gusanxtujyni rebejn ni rñibeduxh. ²⁸ Agule Dios rebejn ni di guiga' benro, näjza rebejn ni rut riudi, reni rut najcdi, te gusanxtujyni rebejn nani najc guiraa reni'c. ²⁹ Te nicla tej bejn digacdi guiliä'p lagajc xpala'nñi nez loj Dios. ³⁰ Lagajc Dios abachaag la'tu loj Dad Jesucrist; baxhalzani Jesucrist loonu te basanijni xcäriejñnu te ga'pnu yälñasiñ xten Dios, te guibañsa'cnu nez loj Dios, te gacnaya lastoonu, näjza te quixni rextojlñu. ³¹ Si'c bejn Dios te soob xtiidxni cadro caj scree:
Ni rlazj guinii didxro, suguiliä'pni xpala'n dzuun ni bejn Jesucrist.

2

Rediidx xcuent Crist ni cuaj lo cruzj

¹ Ni'cni cheni biädsule'ä xtidxlii Dios lojtu, rebetzä, dina niädniä didxnajn lojtu, niclaza didxnagajn, xhet si'cti basule'ä xtidx Dios xcuent Crist. ² Cheni guyu'ä lojtu, benä xhigab dina niädniä xhi stee diidx lojtu, biädsule'ätis diidx xcuent Dad Jesucrist, ni cuaj lo cruzj. ³ Bidzunä lojtu guideb rdxagä, guideb racditä sa'csi cadxebduxhä. ⁴ Cheni basule'ä diidx lojtu, dina niniä didxro xten yälñasiñ xten guedxliuj, alga guniä xtiidx yälñasiñ xten Sprit Dxan xten Dios näjza xcälñabee Dios, ⁵ te di gac xcälñirilajztu xcuent yälñasiñ xten guedxliujre, te gac xcälñirilajztu xcuent yälñabee xten Dios.

Rumbee bejn Dios xcuent ni ruluü Sprit Dxan xten Dios

⁶ Rniizanu lo sa'nu ni aguyajl lo xtidx Dios rediidx xten yälñasiñ xten Dios, per te yälñasiñ ni di gac xcälñasiñdi guedxliuj, niclaza xten reni rñabee lo guedxliujre, sa'csi sidzujñ dxej sinitlojreni. ⁷ Niluxh che rñiinu yälñasiñ xten Dios, rñiinu diidx ni rut racbextebdi, xcuent xho gac guidzujñ cadro yu' Dios xhaguibaa. Cheni gajdli gac guedxliuj, rapcheeni yälñasiñxhiga'tz xtenni. Baluiinini loonu te guibaññäänuni lo xcälñrdimbicha' xtenni. ⁸ Nicla tej reni rñabee lo guedxliujre gajd gacbee recosre niluxh paru niacbeerenini, direni nucuaa lo cruzj Dad Jesucrist nani rajp xcälñrdimbichaduxh. ⁹ Najcni si'cni caj lo rextidx Dios cadro rñii:

Recos ni gajdpac baloj bejn fii,
nani gajdpacza diajg bejn jiejn;
nani gajdpacza jiu' lo xhigab bejn, guiraa recosga abaluchee Dios par rebejn ni chanälajzni.

¹⁰ Niluxh abaluü Diosreni loonu con Sprit Dxan xten Dios, sa'csi laani basule'nireni loonu. Sprit Dxan xten Dios racbesa'c guiraa rexhigab, näjza recos xhiga'tz xten Dios.

¹¹ Loj reben guedxliuj ¿chuni'c racbee rexhigab ni rujn bejn? Lagajc sprit xten bejn ni yu' nenñi racbee xhi xhigab cayujnni. Sigajcza rut racbeedi rexhigab xten Dios; Sprit Dxantis xten Dios racbeeni. ¹² Luxh nuurnu dinu nica' yälñajn xten guedxliuj, alga cua'nu Sprit Dxan ni siääd lo Dios te gacbeenu rexhicos ni abasalajz Dios loonu. ¹³ Nuurnu rniizanu xcuent recosga, xhet diidxdi ni ruluui xcälñajn guedxliujre, diidxtis ni baluui Sprit Dxan xten Dios loonu. Si'c ruluuiinu rediidxga loj rebejn ni rbäjz Sprit Dxan xten Dios nen lastooreni.

¹⁴ Niluxh reni di chalilajz xtidx Dios, direni gacbee rexhigab xten Sprit Dxan xten Dios, sa'csi laareni xhigabyäältis rchaloreni xcälñasin Dios. Di gacdiza gabeereni rexhigabga, sa'csi Sprit Dxan xten Diostis rajc ruluui lo bejn rexhigab xtenni. ¹⁵ Rebejn ni ahuililajz xtidx Dios, rula'tzreni guira'ti ni ruluui Sprit Dxan xten Dios lojreni. Luxh rebejn ni ahuililajz rutliidi rula'tzdireni. ¹⁶ Sa'csi scree caj lo xtidx Dios: “¿Chuni'c agucbee xho najc xhigab xten Dios te gac guluuiñi Gueb Dios, ä?” Nicla tej bejn. Niluxh nuurnu rajpnu lo xcäriejnnu xhigab xten Crist, nalajznu racbeenu rextiidxni.

3

Reni rujn dzuun lo Dios

¹ Rebetzä, di niajcdi niniä redidxnagajn lojtu si'c ni rniä loj rebejn ni rajp yälñasin xten Sprit Dxan xten Dios, basule'ä ganaxtis didx guyasi lojtu, sa'csi najctu ben guedxliuj o biuxbäz ni guxii racbeeni xcuent Crist. ² Basule'ä ganax didxguyasi lojtu si'c rudeed bejn le'ch lo te biuxbäz lacuaa gauni bääl. Dina niniä lojtu guiraa rextidx Dios ni nanab gacbeetu, sa'csi gajd gacdi gacbeetuni, niclaza naj gajd gacdi gacbeetuni, ³ sa'csi nabansijctu si'c nabajn reben guedxliuj lahtis runembiidtu, rdxechlajzto lo sa'tu, ¿la ditu gacbee nacsijctu si'c ben guedxliuj, ä? ¿La lahtis nabajntu si'c nabajn reben guedxliuj ni di gumbee xtidx Dios, ä? ⁴ Sa'csi cheni rniñi tejni: “Narä nacä te xpejn Pabl”, dxejcti steeni rniñi: “Narä nacä te xpejn Apolos”, ¿la xhet cayujnditu sigajctis ni rujn rebejn guedxliuj, ä?

⁵ ¿Chuni'c najc Pabl? ¿Chuni'c najc Apolos? Nuurnu najctisnu xmos Dios ni basule' xtidx Dios lojtu te huililajzto, luxh cade tejnu riennu dzuun ni runiidx Dios jiennu. ⁶ Ganid basule'ä xtidx Dios lojtu, dxejc biääd Apolos te gucnäjzani gucbeerutu xtidx Dios, niluxh lagajc Dios najc ni cagusanij xcäriejntu te gacbesa'ctu xtiidxni. ⁷ Ni'cni nicla ni rusulexgaa diidx, niclaza nani racnäj racbeeru bejn rediidxga xhet sajcdireni; Diostis sajc nani rusanij xcäriejn rebejn. ⁸ Nuurnu najcnu si'c rexmos ni rujn dzuun lo yuj. Tejsi najc nani rbe'c binij näjza nani rga' nis, niluxh Dios rguijx tejganu dzuun nani riennu. ⁹ Nuurnu najcnu si'c remos ni runnäj Dios dzuun. La'tu najctu si'c yuj cadro cayajc xtzun Dios, si'c te yu' ni cayunchee Dios. ¹⁰ Narä nacä si'c te mastr albañil. Baniidx Dios dzuun loä, gucnäjni narä te casuä reguij lo yujre, te naj ste'ca bejn quixh basuu yejcn. Niluxh teja ni chanuu gun dzuun lojga, suga'pni cuidaad xho guiliäsni padeerga. ¹¹ Sa'csi di gacdi gusujreni garenca cimient loj nani najc-xgaa, ni najc Jesucrist. ¹² Naj palga guiliäs bejn te padeer yejc cimientga con oor, con pla't, con guij ni sacduxh, o con baräjd, guixhtriuu, o balag biquii, ¹³ sidzujñ dxej sien xho najc dzuun ni bejn teja bejn. Sa'csi siääd fis guiboo ni guluiloj dzuunga, sa'csi lagajc guibooga guluiloj dzuunga, xho najcni. ¹⁴ Palga yu' reni bejn te yusa'c yejc cimientga, luxh dini chec lo guibooga, sudeed Dios lo bejnga ni riäjñ xca'ni sa'csi bejnñi yusa'c. ¹⁵ Niluxh palga chec ni bejnñi yejc cimientga xhet xca'ni dini, xcälñabajntisni di nit, luxh xtzuumni sejc.

¹⁶ ¿La ditu gan la'tu najctu xquidoo Dios, luxh nen lastootu rbäjz Sprit Dxaan xten Dios, ä? ¹⁷ Palga yu' chu gutiexhät xquidoo Dios, sunitloj Diosni par tejpas, sa'csi xquidoo Dios najc dxan, luxh la'tu najctu guidooga.

¹⁸ Nicla tejtu na'c gusgueetu lagajc la'tu. Palga yu' chu rujn xhigab nanduxhni xcuent yälnasin xten guedxliujre, nanabpac gacni si'c te bejn ni xhet najndi te xca'ni yälnasin xten Dios te guliipac gacni te bennajn, te bejn nasin. ¹⁹ Sa'csi yälnasin xten guedxliuj xhet sajcdi nez loj Dios. Lo rexquijtz Dios caj scree: "Dios rujn rga' reni rajp yälnasin xten guedxliuj lagajc xcuent xcälrusgueereni ni rujn lagajc xcäl'nadxällajzreni." ²⁰ Ste'ca lajt caj scree: "Nanchee Dios xho najc xhigab ni rujn rebejn ni rajp xcäl'nasin guedxliujre, luxh xhetliidi sajcdi nez loj Dios." ²¹ Ni'cni na'c guiliä'p bejn xpala'n te bejn guedxliuj. Sa'csi loj tejgatu abaniidx Dios guira'ti rexhicos najc xtengatu, ²² palga najcni Pabl, o Apolos, o Pedr, o guedxliuj, o yäl'nabajn, o yälgujt, o recos ni yu' naj, o recos ni churu gac, guiraareni najc xtentu. ²³ La'tu najctu xten Crist, luxh Crist najc Xi'n Dios.

4

Xtzuun reapost

¹ Ni'cni la'tu nanab fiitu loonu si'c rexmos Dad Jesucrist ni rajp rexhigabxhiga'tz xten Dios te gusule'nureni lojtu. ² Mbaj pues, te bejn ni cahuii te dzuun nanab gusoobreni diidx, gunreni te dzunsa'c. ³ Niluxh guxii runä xhigab gula'tzfu narä, o gula'tz chutis guxhtis lo guedxliujre narä; nicla lagajc narä dina gunduxhä xhigab xho nacä nez loj Dios. ⁴ Entis rbedxi xcärienä, per xhet xcuent ni'cni sajcdi guiniä xheti xtolä, Dad Jesucrist najc nani rula'tz narä, rhuiloini xho nacä. ⁵ Ni'cni la'tu na'c gucuaquijtu bejn che gajd guidzujn dxej; colcuäjz jiaäd Jesucrist dxejc laani sibääni lo bianij guiralii ni naga'tz lo nacäjz, luxh suluilojzani xhi xhigab yu' nen lastoo tejga rebejn, dxejc lo tejganu sudeed Dios ni nungäj l xca'nu.

⁶ Rebetzä, xcäl'nasa'ctu caniaä rediidxre lojtu. Caniaä xcuent Apolos näjza narä, si'c te yäl'ruluii te fiitu xho riennu te na'cza guntu recos ni xhet caj di lo rexquijtz Dios, te na'cza guiliä'p'tu xpala'n tejtlu lo resa'tu, la l ni cabälzatu steeni. ⁷ Sa'csi ¿chuni'c rniij najclu bensa'cru lo ste'ca bejn?, o ¿xhini'c rajplu ni di Dios nuniidx lojlu? Luxh palga cuaxlia'luni, ¿xhicuent lagajc luj rliä'plu xpala'ntu, lascanu rut baniidxdi lojlu recos ni rajplu?

⁸ Rujntu xhigab rajptu xhidaj l cos, naatu najctu ricwduxh, rchalotu najctu rei, dirutu guiquiin nuurnu. Malaii gulii najcpactu rei te näjzanu guinibenäjnu la'tu. ⁹ Niluxh runä xhigab gule Dios reapost si'c rebejn ni xhet sajcdi. Najcnu si'c rebejn ni gunibeereni guet. Nez loj reben guedxliuj näjza nez loj rexangl Dios najcnu si'c reben ni rdedlojtis bejn lojreni. ¹⁰ Nuurnu najcnu bennayääl xcuent Crist, niluxh la'tu rchalotu racheduxhtu rextidx Crist. Nuurnu najcnu bejn ni xhet nadipdi, niluxh la'tu najc bendanduxh. Rliä'p rebejn xpala'ntu, ni'c rbälazreni nuurnu. ¹¹ Cadeednu trabajwduxh naj, rliaannu, riojlnu, xho rniaj xhajbnu, rdiñäj rebejn nuurnu, luxh xheti roliznu. ¹² Rdxaaгну riennu dzuun lagajc naanu te guidxälnu xhi guidaunu. Che rguereni loonu, rniabnu lo Dios xcuentreni. Che rusacsi rebejn nuurnu, rientisnu huant. ¹³ Che rniyajreni nuurnu, rulidxnäänureni didxdoo. Rujnreni xhigab najcnu si'c guijxh xten guedxliujre, ruhuiireni loonu si'cni xhet sajcdinu.

¹⁴ Dina gucuaä rediidxre te gusanxtuiyätu. Rucuaä rediidxre te gulidxätu si'c rexi'nä ni sanälazä. ¹⁵ Palga ga'ptu tzuu mi l bejn ni guluiitu rediidx xten

Crist, ruti stee xtadtu; narä gucä xtadtu, ganid narä basule'ä rextidx Dios lojtu. ¹⁶ Ni'cni rulidxä la'tu, colyejn si'cni ruhuiitu runä.

¹⁷ Ni'cni baxhalä Timoteu lojtu, najcni si'c xi'nä ni sanälazä, ni rusooob diidx xcuent Crist. Laani susnajni lajztu xho mood nabanä lo yäl'nabajn xten Jesucrist, sigajcni ruluiä neñ reguidoo guiraasi lajt. ¹⁸ Yu'tu ni acayajc guyalajz, naatu pet dina guibisacä lojtu. ¹⁹ Cabäzä jiädhuiätu, palga si'c rrajz Dios, dxejc sacbeä chuni'c najc rebejn ni cayajc guyalajz, fiä xhipacni rujnreni, xhet xtiidxtisreni gacbeä. ²⁰ Sa'csi xcäl'rnibee Dios xhet ganaxtis xcuent diidx najcni, näjza dzuun ni rujnreni rululioj xcäl'rnibee Sprit Dxan xten Dios ni rajpreni. ²¹ ¿Xho rrajzzatu guidzunä lojtu, ä? ¿La sidzunä si'c te dad ni ca' te baar te quinätu o la guidzunä yäl'rinalajz näjza yäl'nadolajz te guidxätu, ä?

5

Xho nanab gunnäjtu te bejn ni rujn falt lo sa'ni

¹ Aguceä yu' tejtü ni ahuililajz xtidx Dios, cua'ni si'c chäälni te gunaa ni gujc chääl xtadni. Dee najc te dojduxh nani nicla reni di chalilajz xtidx Dios direni gun. ² Luxh la'tu gujctur guyalajz lacuaa niac-huin lastootu; te bejn nani bejn dojlga, riälj nibäätuni nez lojtu. ³ Mase ruti narä ro'c, lastoä suganäj la'tu. Alabenä xhigab xhini'c jiennäjnu bejnğa ni bejn dojduxhğa, sigajc ni niunä paru suga'ä ro'c. ⁴ Con laj Dad Jesucrist, che abidxagsa'tu, luxh alastoä suganäj la'tu, con xcäl'rnibee Dad Jesucrist, ⁵ abenä xhigab gutednu bejnğa ladznaa bendxab te ted tiejxhni trabajw, niluxh sprit xtenni laani neñ dxej ni jiädsac Dad Jesucrist lo guedxliujre.

⁶ Di guchaag guiliä'ptu xpala'ntu xcuent dzuun ni rujntu. ¿La ditu gan te dojl najc si'c tudxe'n cojb ni ruslaj, rusaguijni cojb cadre ru'chni, ä? ⁷ Colgudzucaj cobyujxhğa, te guibajntu te yäl'nabannayacoob si'c te cobyä, sa'ni racchee yätxtiil ni xheti levaduur yejcnj par lanij xten pascw. Arajptu yäl'nabannaya sa'csi agujt Jesucrist sigajc gujt te xile' lo lanij pascw te badzucajni rextojlnu. ⁸ Si'c nanab jiennu lanij xten pascw con yätxtiil ni xheti levaduur yejcnj, nalajznu con yäl'guliipac neñ lastoonu, xhet yätxtiildi ni yu' cobyujxhğa yejcnj, nalajznu na'c gunlu latsiaj.

⁹ Lo stee guijtz abacuaä lojtu, na'c guchaagtu rebeñ ni runnäj cosguijdx bejn ni di gac chäälreni. ¹⁰ Niluxh xhet caniädi xcuent rebeñ guedxliuj ni rujn cosguijdx con bejn ni di gac chäälreni, niclaza xcuentdi rebejn ni rchaglaztej meel, niclaza rebejn ni najc gubaan, niclaza rebejn ni riu rebanäjb. Paru si'c gacni, nanab jiunejztu guedxliujre. ¹¹ Niluxh narä bacuaä guijtzga lojtu te na'c guchagsa'tu te bejn nani rni ahuililajzni xtidx Dios, luxh rujnruni cosguijdx con bejn ni di gac chäälni, o rchaglaztejni meel, o riuni rebanäjb, o rniyaj sa'ni, o rsiojzni, o rusgueni bejn te rca'ni xhi xtenni. Rniäza lojtu, nicla gaunäjtu sa' bejnğa. ¹²⁻¹³ Sa'csi narä di gacdi gunä yäl'guxhtis loj rebejn ni gajd chalilajz xtidx Dios. Gunti Dios yäl'guxhtis lojreni. La'tu nungäj guntu yäl'guxhtis loj rebejn ni ahuililajz xtidx Dios. Ni'cni colgudzucaj bendojlga lojtu.

6

Na'c chäätu loj rebendojl te gunreni yäl'guxhtis lojtu

¹ Palga tejtü ni ahuililajz xtidx Dios rrajz cue'c xquej stee sa'tu, ¿xhicuent chale'ctu xquejni loj rebendojl te gunreni yäl'guxhtis lojtu? ¿Xhicuent ditu guiniab yäl'guxhtis loj rebejn ni ahuililajz xtidx Dios, ä? ² ¿La ditu gan, rebejn ni ahuililajz xtidx Dios sujn yäl'guxhtis lo rebeñ guedxliuj, ä? Palga la'tu

sujntu yälguxhtis lo reben guedxliuj, çla di gacdi guntu yälguxhtis lo sa'tu lo recosbáz lacuaa cháätu loj rebendojl te gunreni xcälguxhtisreni lojtu, ä? ³ ÇLa ditu gan sienzanu yälguxhtis lo rexangl Dios, ä? iAticaxh jiennu yälguxhtis loj recos baze' xten sa'nu lo yäl'nabajnre! ⁴ Palga la'tu cadil'näj sa'tu xcuent recos xten guedxliujre, çxho mood cháälu loj rebendojl ni rut najcdi loj xquidootu, te naareni lojtu xhini'c guntu, ä? ⁵ Rniä rediidxga lojtu te guitujytu. ÇLa ruti nicla tej ben'nasiñ loj guiraatu ni sajc gun yälguxhtis lo resa'tu, ä? ⁶ ÇXhicuent rile'c te bejn ni rililajz xtidx Dios xquej bejtzni ni rililajzza, luxh rijreni nez loj reguxhtis ni di chalilajz xtidx Dios?

⁷ Mbay naj, guliipacni alabanijtta sa'csi yu' yälrdil'näj sa'tu; colgutijp lajztu rebejn ni rujn dojl lojtu. Maazru huen colgusaan sucua'reni xhixtentu. ⁸ Per dee, alga lagajc la'tu runnijttu loj lagajc resa'tu, luxh rca'tu xhixten lagajc resa'tu.

⁹ O çla ditu gan reben dojl dipacreni jiu' lo xcäl'rnibee Dios, ä? Na'c gusaantu gusgueereni la'tu; nicla te resa' dee di jiu' lo xcäl'rnibee Dios: guiraa reni richagtoo regunaa; guiraa reni rajñ rebanäjb; reni resnäj bejn ni di gac cháäl'ni; reniguii ni rungunaa; reni najc biräax; ¹⁰ reni najc gubaan; reni rsiäblajz xhixten bejn; reni rsiojz; reni rniyaj; reni rusguee bejn te rca'reni xmeel bejn. Nicla tej sa' redee di jiu' lo xcäl'rnibee Dios. ¹¹ Yu'zatu ni gujc si'c galoo, niluxh naj abasia Dios lastootu, naj anajctu ben'naya nez loj Dios sa'csi abiäl'lajz Dios xtojltu xcuent Jesucrist, näjza xcuent Sprit Dxan xtenni. La'tu anajctu rexpejni.

Tiejxhnu najc xquidoo Dios

¹² Guliini sajc gunä xhitis ni rlazä gunä, niluxh xhet guiraadini najc hueen par narä. Narä sajc gunä si'ctis ni rlazä, niluxh dina gusanä guinibee nicla tej xhi cos narä. ¹³ Guliini najc yäl'rajw par xque'ni, luxh xque'ni najc par yäl'rajw, niluxh sidzujñ dxex sunitloj Dios guiro'preni. Per tiejxhnu di gac par jiennu cosguijdx con bejn ni di gac cháäl'nu. Tiejxhnu najc par Dios, luxh Dios najcza par tiejxhnu. ¹⁴ Luxh naj lagajc Dios guläs Dad Jesucrist lo rebengut, siliäszeni nuurnu con xcäl'rnibeduxhni.

¹⁵ ÇLa ditu gan tejgatu najc si'c te la' tiejxh Crist sa'csi ahuililajztu rextiidxni, ä? Palga tiejxhnu najc xten Crist, çla sajc gudeednuni loj te gunadxab, ä? iGurniälojlu jiennu si'c! ¹⁶ ÇLa ditu gan cheni guchaagni te gunadxab rajcni tejtis tiejxh con laani, ä? Loj rexquijtz Dios caj: "Guro'preni sajc si'c tejtis bejn." ¹⁷ Niluxh nani ruedeed lastooni lo Dios anajczani tejtis con laani sa'csi rbäjz Sprit Dxan xten Dios nen lastooni.

¹⁸ Colguibicaj lo dojl ni rujn bejn con nani di gac cháäl'ni. Xhitis stee dojl ni rujn bejn najcni lo jiaa tiejxhni, niluxh dojl ni runnäjni bejn ni di gac cháäl'ni najc dojl lagajc nen tiejxhni. ¹⁹ O çla ditu gachee tiejxhtu najc xquidoo Sprit Dxan ni abaniidx Dios te cuääzni nen lastoonu, ä? Ni'cni di gacdi guinibeutu lagajc la'tu. ²⁰ Agudijx Jesucrist xtojltu con xtiejnni lo cruzj, ni'cni nanab jiennu dzunsa'c nani guliä'p xpala'n Dios con tiejxhnu näjza Xpritnu.

7

Yäl'rulijdx xcuent yäl'ruchnaa

¹ Naj gudzu'ä diidx lojtu xcuent ni gunabdiidxtu cheni bacuaatu guijtz loä. Guliini hueen najcni na'c guchnaa te niguii. ² Niluxh sa'csi yu' xhidajl reni richunäj chutis gunaa, suga'p tejga reniguii cháäl'pacni; sigajcza suga'p tejga regunaa cháäl'pacni. ³ Nanab niguii guchaagni cháäl'ni che rlanj cháäl'ni, sigajcza gunaa nanab guchaagni cháäl'ni che ni si'c rlanj cháäl'ni. ⁴ Di gunaa

guinibee lagajc tiejxhni, sa'csi chäälni rnibee tiejxhni. Sigajcza di niguii guinibee lagajc tiejxhni, sa'csi chäälni rnibee tiejxhni. ⁵ Na'c gusuni' tejtü lo chäälni. Maazru hueen coljia'n diidx na'c guchagsa'tu te xcheje' te cuedx-guiniabtu lo Dios. Che luxh cuedx-guiniabtu lo Dios, guchagsacsä'tu te na'c guquill bendxabtu chunäjtü ste'ca bejn.

⁶ Rniä rediidxre lojtu te ni rlanj guchnaa sajc guchnaani, niluxh dina guiniä lojtu, nanabpac guchnaatu. ⁷ Narä rlazä maläii sajc gac guiraa bejn si'c ni nacä. Dios abadeed loj tejga bejn xho mood guibajnni. Yu'reni sajc guibajñ tej mood, yu'zareni sajc guibajñ garenca mood.

⁸ Loj reben xteb näjza loj regunabiuud rniä, hueen najc na'c guchnaareni, gacreni si'c narä. ⁹ Niluxh palga di gacdi cue'cdxi lajzreni, suguchnaareni. Maazru huen guchnaareni te na'c guntisreni xhigab rlanjzreni guchaagreni te niguii o te gunaa.

¹⁰ Loj rebejn ni abachnaa, rniä rediidx ni basa'n Dad Jesucrist loonu: "Na'c guro'n gunaa chäälni." ¹¹ Niluxh palga guro'n te gunaa chäälni, na'c guchnasacni, o maazru hueen gusiäjlni diidx guibisacni lo chäälni. Sigajcza te niguii na'c guro'nni chäälni.

¹² Naj rediidx ni guiniä najc xhigab xtenä, xhet diidxdi ni basa'n Jesucrist loonu. Scree rulidxä la'tu. Palga yu' te niguii ni rililajz xtidx Dios, luxh chäälni di chalilajz xtidx Dios, luxh rlanj gunaaga cuäznäjni niguiiga, na'c guro'n niguiigani. ¹³ Palga yu' te gunaa ni rililajz xtidx Dios, luxh di chäälni chalilajz xtidx Dios, niluxh rlanjzni cuäznäjni gunaaga, na'c guro'n gunaaga chäälni. ¹⁴ Palga yu' te niguii ni di chalilajz xtidx Dios, luxh chäälni rililajz xtiidxni, palga hueen nabannäj sa'reni, hueen najc yäl'ruchnaaga nez loj Dios. Sigajcza palga yu' te gunaa ni di chalilajz xtidx Dios luxh chäälni rililajz xtiidxni, palga hueen nabannäjsa'reni, hueen najc yäl'ruchnaaga nez loj Dios. Palga dini gac si'c, di Dios gunle' rexi'nreni, per naj abenle' Dios rexi'nreni. ¹⁵ Palga chääl te gunaa o chääl te niguii ni di chalilajz xtidx Dios luxh rlanjzni guilia' sa'ni con chäälni ni ahuililajz xtidx Dios, sujüzani. Nani rililajz xtidx Dios diruni ga'p por cuäznäjni chäälni ni di chalilajz xtidx Dios, niluxh gurejdx Dios nuurnu te cuedxini lajznu. ¹⁶ Sa'csi çxho najnlu, gunaa, la suslaa Dios chäällu lo dojl xcuentlu, ä? O çxho najnlu, niguii, la suslaa Dios chäällu lo dojl xcuentlu, ä?

¹⁷ Si'ctis ni baniidx Jesucrist lo tejganu, si'ctis ni gule Dios tejganu, si'c suguibajnnu. Si'cza rulidxä gunrenini neñ guiraa reguidoo. ¹⁸ Palga tej niguii rililajz xtidx Dios, luxh yu' ni bee tiejxhni, xhet najcdini. Palga stee niguii chalilajz xtidx Dios, luxh xheti bee tiejxhni, xhet najcdizani. Sujia'nni si'cni najcni. ¹⁹ Xhet najcdi la yu'ni bee o xhet beedi yu'ni. Tejtis ni nanab gunni, gusoobni rediidx ni gunibee Dios. ²⁰ Tejgani jia'n si'cni najcni cheni gurejdx Diosni. ²¹ Palga najclu te mos ni guziireni te gunlu dzuun, dxejc huililajzlu xtidx Dios, na'c chulu yärsia' xcuent ni'c. Palga sajc gudzu'lu meel lo xlamlu, badzu'zani te gaclu te bejn ni rut rnibeedi. ²² Sa'csi nani najc te mos ni guziireni te gunni dzuun che huililajzni xtidx Dios, diruni gac te mos ni bio' nez loj Jesucrist, niluxh te bejn ni rut rnibeedi che rililajzni xtidx Dios, anajcni mos ni guzii Dios, najcni xmos Dios. ²³ Guzii Cristtu con xtiejnni, ni'c na'c gusaantu guinibee bejn la'tu te gac guntu xtzun Dios. ²⁴ Rebetzä, colchanuu gactu si'ctis ni najctu che gurejdx Dios la'tu, palga najctu mos ni guziireni, o te bejn ni rut rnibeedi.

²⁵ Redxa'p ni gajd guchnaa, di Jesucrist ninibee xhini'c nanab gunreni. Gule Dios narä te gusule'ä xtiidxni. Naj gulidxäreni sa'csi nanä xtidx Dios, luxh racnäjzani narä. ²⁶ Runä xhigab hueen najc palga di reniguii guchnaa

sa'csi siääd yäl'naganduxh lo guedxliujre. ²⁷ ¿La alabachñaalu, ä? Na'c guro'nlu chäällu. ¿La alabaro'nlu chäällu, ä? Na'c chaxiilu chäällu. ²⁸ Palga guchñaalu, xhet dojldi rujnlu. Palga guchñaau te dxa'p, dizani gun dojl. Niluxh reni ruchñaau sidejdreni trabajw lo yäl'nabajnre. Ni'cni rniä na'c guchñaatu sa'csi di rlazä tedtu trabajw.

²⁹ Rebetzä, rlazä guiniä lojtu rediidxre: Guxiiru dxej guibajnnu lo guedxliujre, ni'cni reni abachñaau na'c gunreni xhigab xtentis yäl'ruchñaau, te gac gunreni xtzuum Dios. ³⁰ Luxh reni cayoon, nanab gunreni si'cni xhet cayoondireni; reni rbalajzreni, nanab gunreni si'cni xhet cabaadi lajzreni; reni rzii xhicos, nanab gunreni si'cni xhet rajpdireni; ³¹ näjza reni rujn recos lo guedxliujre, nanab gunreni si'cni dini gunni, sa'csi recos ni rhuuinu lo guedxliujre, alacanitlojreni.

³² Narä rlazä na'c chutu yärsia'. Rebejn ni gajd guchñaau, riureni rextzuun Dios, näjza xho guspaareni lajz Dios. ³³ Renani abachñaau riureni recos guedxliujre te guspaani lajz chäälni, ³⁴ tiop najc xhigabni xcuent recos nani gunni. Sigajcza najc te gunaa ni abachñaau con tejni gajd guchñaau. Sa'csi te gunaa ni gajd guchñaau riuni rextzuun Dios te gacreni gunadxan nez loj Dios con tiejxhreni näjza con lastooreni. Niluxh regunaa ni abachñaau riureni recos guedxliujre, näjza xho guspaani lajz chäälni.

³⁵ Rniä rediidxre par xcäl'nasa'ctu, xhet gudxonädi la'tu, te gunrtutu redzusa'c, te chanälazsa'ctu Dios.

³⁶ Palga yu' chu te niguii lojtu ni rujn xhigab, maazru hueen guchñaau xindxa'pni sa'csi acayajcni gunagool, dini gun dojl, sajc gudeednini guchñaani. ³⁷ Palga steeni dini gun xhigab si'c nanab gunni, sajc gunni si'ctis ni rlanjni palga abejnpacni xhigab neñ lastooni di xindxa'pni guchñaau, hueenza najc si'c. ³⁸ Ni'cni nani ruedeed xindxa'pni guchñaau, hueen rujnni, sigajcza nani dini gudeed xindxa'pni guchñaau, laacaza rujnni.

³⁹ Te gunaa ni abachñaau, rajpni por guibanäjni chäälni guideb nabajn chäälni. Palga guet chäälni, jianxtebni stehuält, dxejc sajc guchñaani chutis niguii ni rlanjni, palga najcni tej ni ahuililajz xtidx Dios. ⁴⁰ Narä rchaloä maazru guibaa lajzni palga dini guchñaau. Si'c najc xhigab ni runä, luxh riliipac lazä cayacnäj Sprit Dxan xten Dios narä.

8

Yäl'rajw ni ruzujreni lo rebanäjb

¹ Rniä lojtu xcuent reyäl'rajw ni ruzujreni lo rebanäjb. Guliini guiraanu rajpnu yäl'najn xcuent recosga. Niluxh yäl'najn rujn rajc bejn guyalajz. Luxh yäl'rinälajz sa'ni, ni'c rujn racnäjnu resa'nu. ² Palga yu' chuni'c rujn xhigab nanduxhni, rusgueeni lastooni sa'csi cayäädxru gacbeeni si'c ni nanab gacbeeni. ³ Palga yu' chu sanälajz Dios, Dios anumbee bejnğa.

⁴ Ni'cni, xcuent reyäl'rajw ni risujreni loj rebanäjb, anancheenu xhet sajcdi rebanäjb ni yu' lo guedxliuj, ruti stee Dios; tejtis ni najc Gueb Dios. ⁵ Masque yu' reni rniireni najc “dios” xhaguibaa o loj guedxliuj, luxh yu'za xhidajl “dios” näjza xhidajl lam ni rnibee, ⁶ per nuurnu nadonnu yu' tejtis Gueb Dios, Dad nani benchee guiraa recos, luxh lojtisni nabajnnu. Rajpnu tejtis Dad ni rnibee loonu, ni'c najc Jesucrist. Xcuent xcäl'rnibeeni guc-chee guiraa recos loj guedxliuj, luxh nuurnu nabajnnu xcuent Jesucrist.

⁷ Niluxh xhet guira'ti bejn najn yu' tejtis Dios. Yu' rebejn ni ahuililajz xtidx Dios abia'reni rajnreni rebanäjb, luxh rajwzarenı reyäl'rajw lascanu guzujni loj banäjb sa'csi nacäjyru xcäriejnreni, ni'cni et laadi ria'n lastooreni, rxhınza

xcäriejnreni. ⁸ Xhet xcuent xhi rdaudinu sajç guiba_{nsa}'crunu lo xnejz Dios. Xhet najçdi palga guidaunu o palga dinu guidau. ⁹ Colnatiro xhi rujntu te na'c guntu jiajb te bejn lo dojl nani gajd chalilazsa'c xtidx Dios. ¹⁰ Palga te bejn ni gajd chalilazsa'c xtidx Dios fiini cayajwlu reyälrajw ni guzuj lo rebanäjb, luxh luj najclu te bejn najn, sa'csi dee gajd gacbesa'c rextidx Dios, çla di lajzni gac nadip te näjza laani chatajwni yälrajw ni guzuj lo rebanäjb? ¹¹ Niluxh luj, xhet dojldi cayujnlu, per bejtzlu ni gajd chalilazsa'c xtidx Dios, sixijnni, luxh najçni bejtzlu sa'csi näjza par laani gujt Dad Jesucrist lo cruzj. ¹² Si'cza che rujnlu dojl lo bejtzlu, runnajlu lajzreni sa'csi gajd xcäriejnreni jiansa'c, luxh si'c cayujnzalu dojl lagajc lo Crist. ¹³ Ni'cni, palga narä runä riabsac betzä lo dojl xcuent ni rauä, hueenru dirunä gauä yälrajw ni gun jiajb betzä lo dojl stehuält.

9

Xhi sajç gun te apost

¹ ÇLa dina gacä te bejn ni rut lojdi yu'ä? ÇLa xhet apostdi narä? Ni abahuiä lo Dad Jesucrist, abasule'ä rextidxni lojtu, ni'c huililajztu xtiidxni. La'tu najçtu xtzunä ni runä lo Dios. ² Yu' reni di gumbeeni narä si'c te apost, niluxh la'tu abiembesa'ctu narä sa'csi ahuililajztu rextidx Jesucrist ni abasule'ä lojtu. Ni'c ruluiloj guliipac nacä te apost.

³ Diidx ni rniä scree loj reni di chalilajz nacä apost najc scree: ⁴ ÇLa di riälj xca'ä guiraa ni runiidxtu gauä näjza ni runiidxtu yä'ä? ⁵ ÇLa digacdziza gapä te chälä ni ahuililajz xtidx Dios dxejç chanääzani sigajc rujn guiraa reapost, näjza rebetzhuin xten Dad Jesucrist näjza Pedr? ⁶ O çla xtebtis Bernabé näjza narä di gacdi cuääz jiennu dzuun te guidaunu laç rusule'nu xtidx Dios? ⁷ ÇChuni'c rajc soldaad luxh lagajc laani siini xhi gauni? O çchuni'c rusuj yaguub luxh dini gau ninejxh ni rcaj lojga, ä? O çchuni'c rajp gaii dxib, luxh dini yä le'ch ni rudeedreni, ä? ⁸ Na'c guntu xhigab lagajc xcuentä cania rediidxre lojtu, sa'csi näj loj xleii toMoisés caj diidx xcuent recosre. ⁹ Loj reguijtz xten xleii toMoisés caj rediidxre: "Na'c gusa'llu guijxh ro' gon che cayotni yejç triuu." ÇLa guniitis Dios rediidxre sa'csi riuni regon, ä? ¹⁰ Dini gac! Xcäl_{nasa}'cnu guniini rediidxga, sa'csi bejn ni rujn dzuun lo niaa näjza nani rusia triuu riälj gunlojni xca'ni te yäl_{nasa}'c ni rajc lo xniani. ¹¹ La'tu najçtu si'c te yuj çadro gule'cnu binij sa'csi basule'nu rextidx Dios lojtu, çla rujntu xhigab dzuunro najc gacnäjtu nuurnu tudxene', ä? ¹² Palga racnäjtu ste'ca bejn ni ruluiitu, nungäjlru gacnäjtu nuurnu.

Niluxh gajdnu guinii si'c lojtu sa'csi di rlaçzdinu guidxoönnu chalilazsa'ctu rextidx Dios, ni'c çhotipnu lajznu guiraa retrabajw ni çadeednu. ¹³ La'tu najntu reni rujn dzuun neñ guidoro rajwreni rebääl ni risa'nreni lo Dios, sigajcza reni rujn dzuun lo dxan çadro risa'nreni xpääl reguidxaa lo Dios, näjza laareni rajwreni rebäälga. ¹⁴ Si'cza gunibee Dad Jesucrist loj reni gusule' xtidx Dios, xca'reni xhi gaureni lagajc loj reni rililajz xtiidxni. ¹⁵ Niluxh gajdpcna gunä si'c, xhetza caca'ädi. Dizana gucuaä rediidxre lojtu naj te guniidxtu xhi xca'a. Hueenru guetä te na'c gudzucaj te bejn yäl_rbalajz ni rapä xcuent dzuun ni runä lo Dios.

¹⁶ Narä dina gapä xhicuent guiliä'pä xpala'nä che rusule'ä xtidx Dios. Sa'csi si'c nanabpac gunä, sa'csi probe'za narä palga dina gusule'ä xtidx Dios. ¹⁷ Palga gunä dzuunre sa'csi rdaxglazäpac gunäni yu' xhi guniidx Dios loä. Mase runäni con yäl_rrigaan, empac Dios ägule narä te gusule'ä xtiidxni. ¹⁸ ÇXhini'c najc xcuent ni xca'ä, ä? Che gusule'ä xtidx Dios lo çutis bejn, ligaj

gusule'äni, te di gusule'a xtiidxni te guniidx rebejn xhi guniidxreni xcuent xtzunä, mase si'c riäjł gunreni.

¹⁹ Rut xmosdi nacä, luxh lagajc narä benä xhigab gacä si'c te mos te gunä gaan chalilajz xhidajł bejn xtidx Dios. ²⁰ Cheni yu'ä loj rexpejn Israel, runä si'cni rujnreni te gunä gaan chalilajzreni rextidx Dios. Che rlazäza guniä loj reni nabajł loj xleii toMoisés, dxejc runä si'c rujnreni te gunä gaan chalilajzreni rextidx Dios, niluxh diruna guibanä lo leiiga. ²¹ Stee lajt cadro rlazä gunä gaan reni di guibajł lo xleii toMoisés, runä si'c rujnzareni, mase empac nabanä lo xleii Dios sa'csi rusobä diidxni basa'n Crist. ²² Cheni yu'ä loj reni guxii rililajz xtidx Dios, racäza si'c ni najczeni te gunä gaan chalilazsa'creni. Narä runä sigajc rujnreni, te si'c gunä gaan chalilajz xhidajłreni xtidx Dios. ²³ Runä guira'ti xcuent xtidx Dios ni rusłaa bejn lo dojl, te xca'zanu, narä näjza rebejn ni ahuililajz xtidxä, yälñabajł par tejpas.

²⁴ Anajntu che ru' te lanij, che ruxun reniguii, guiraareni ruxun, niluxh tejtis ni rca' ni ruzalajzreni. Colguxunza nez lo Dios te gunzatu gaan. ²⁵ Guiraa reni rłajz guxun rapdareni tiejxhreni te ga'p tiejxhreni yälñadip, yälñadaan. Luxh laareni ruxunreni si'c te gunreni gaan te cos ni di gacłaa agunitoljoni. Niluxh nuurnu ruxunnu te guniidx Dios loonu nani dipac nitloj. ²⁶ Narä dina guxunä si'cni dina ganä caro cha'ä, dizana gucuaä si'c te bejn ni rucuanäj te balaa, o cayäästisni lo bej. ²⁷ Niluxh narä runä rajc tiexhä si'c xmosä te na'c gunni si'ctis ni rłajzni, te gunni nani rłajz Dios te di cheni abasule'ä xtidx Dios loj xhidajł bejn, gusanxtujy tiexhä narä.

10

Yälřulijdx lo xcuent rebanäjł

¹ Rebetzä, di rlazä jiälłajztu ni gusajc retoxtadgoldoonu. Gusajreni xpalaa te za gudejdzareni galäii nisdoo ni laa Nisdo Xniaa. ² Gudejdreni xpalaa te za näjza gudejdreni galäii nisdoo; ni'c najc si'c te yälřobnis sa'csi sanajłreni toMoisés. ³ Sigajcza guiraareni gudajw tejtis yälřajw ni baxhal Dios xhaguibaali. ⁴ Guiraaazareni gu' nis ni badeed Dios, Dios bejn birii nisga cuä' te guilaj. Luxh Xpřit Crist gusanäjreni cadrotis sääreni nez lo reyubidzroga. Luxh con xcälřnibeeni birii nis loj guilajga, Crist najc si'c guilaj ni huinäreni. ⁵ Dios bidxechnäj xhidajłreni, ni'c xhidajłreni gujt nez lo reyubijdzga.

⁶ Guiraa rediidxga najc te yälřulijdx loonu, te na'c guichagłajznu jiennu lagajc redojl ni bejn retoxtadgoldoonu. ⁷ Na'cza gantu rebanäjł si'c ni bejn baltireni; acaj lo rexquijtz Dios xcuentreni: "Rebejn ni guyaa lajz gurejreni te gu'reni, gudajwreni, dxejctiru huisurenı te gusloj caguijtreni." ⁸ Na'c chunäjnu stee bejn di gac chäälto si'c bejnreni, ni'cni gujt galřbichon milřeni tejtis dxej. ⁹ Na'cza guche'chnu Dios con rextolřnu si'c bejn balti rebejnğa, ni'cni gujtreni sa'csi gudauya' bälřeni. ¹⁰ Na'cza chamojmtu xcuent ni rujn Dios si'c ni bejn rebejnğa xcuent ni bejn Dios, ni'cni baxhal Dios angl xten yälřujt bagu't xhidajłreni.

¹¹ Guiraa redee gusajc retoxtadgoldoonu te rulijdxni nuurnu, cuajzareni lo guijt te guluii rediidxga nuurnu xho riäjł jiennu, nuurnu ni nabajłnu nen redxej naj. ¹² Ni'cni chutis ni rujn xhigab nabařsa'cni nez loj Dios, sudzu'tzni te di jiabsacni. ¹³ Xheti te trabajw ni cadejdtu nani gajd ted chutis bejn. Niluxh di Dios cuälaztu, dini gusaan tedrutu dzunduxh nani digacđ guntu huant, suniidx Dios yälñadip yälñadaan lojtu te che tedtu trabajw sidxälto xho guibicajtu lo dzunduxhğa, te gutiplajztu.

14 Ni'cni rniä lojtu, rebetzä nani sanälazä, colbicaĵ lo yälrajn xten rebanäjb. 15 Rniä lojtu si'c lo te beñ nasin, te beñnajn: colgulatzsa'c rextidxä don la laaca najcreni. 16 Che rdaunu xcheĵ xten Dad Jesucrist najcni te seen nabannäanu Jesucrist. Che rdunnu neñ co'p, rnaalajznu gudijx Dad Jesucrist xtiejnni xcuent xtojlnu lo cruzj. Che rdaunu yätxtiil, sälojni anajcnu tejtis xcuent tiejxhni ni badeedni cuaj lo cruzj xcuentnu. 17 Sa'csi yu' tejtis yätxtiil, mase najcnu xhidajl, najcnu si'c tejsi tiejxh sa'csi tejsi yätxtiil rdaunu che rauxcheĵnu xcheĵ xten Dad Jesucrist.

18 ;Bahuii xho rujn rexpeĵn Israel! Rajwreni xpääl reguidxaa ni rile'creni lo Dios lo dxan neñ guidoo, ni'c najcreni tejsi con guiraa rebeĵn nani rujn sigajc rujnreni. 19 ;Xhixhni'c rlazä guiniä, ñaj? ;La caniä yu' xhi sajç gojn nani gule'c beĵn lo banäjb, ä? O ;la yu' xhi sajç banäjbga, ä? 20 Xhet sajçdireni. Narä caniä lojtu dee: Recos nani rbe'c rebenzijt lo rebanäjb, lo rebençxab cabe'crenini, et lojdi Dios. Luxh narä dina rlazä gactu tejsi con rebeĵn nani rbe'c lo rebençxab, te di chachunäjzatu rebençxab. 21 Sa'csi digacdi yätu co'p ni rusnaj laaznu ni beĵn Dad Jesucrist lo cruzj nägajcza co'p nani ruedeđreni lo rebençxab. Digacdiĵa guidaunu xcheĵ xten Dad Jesucrist nägajcza xcheĵ ni ruedeđreni lo rebençxab. 22 O ;la rlazjnu guche'chnu Dad Jesucrist, ä? ;Xhixh maazru nadipnu lojni, ä? ;Gurniä lojtu!

Colyeĵn guira'ti te chä'p xpala'n Dios

23 Guliicani, sajç jiennu xhitis ni rlazjnu jiennu, niluxh xhet guira'ti ni rlazjnu jiennu najç hueen par nuurnu. Guira'ti najç laaca, niluxh yu' reni di gacnäĵ gustioobnu lo xcälirililajz Dios. 24 Na'c guntu xhigab quiiiltistu lagajç xcäl'nasa'ctu; maazru hueen quiiilzatu xcäl'nasa'c xpisintu. 25 Coltajw xhitis bääl ni rdo' lo guii, na'c guiniäbdiidxtu caro siäädni te di gacnaj xcärieĵntu. 26 Lo xtidx Dios çaj rediidxre: "Sa'csi guideb guedxliuj näjza guiraa ni tre' lo guedxliuj najç xten Dios."

27 Palga jädgajñ te beĵn ni di chalilajz xtidx Dios luj jädtaunäjlni luxh acuäjblu chääl, huijza, gudajw xhitis ni cue'cni nez lojlu, na'c guiniäbdiidxlu te di gacnaj xcärieĵnlu. 28 Palga yu' chu naa lojlu: "Dee najç bääl ni bile'cnu lo rebanäjb", na'c gauluni, didi gunni gunijt dade'ga ni gunii si'c lojlu te di gacnajza xcärieĵn chutis. 29 Dina guiniä xcärieĵnlu, didi gunnajni xcärieĵn stee dade'ga; mbaj ñaj, ;xhicuent riäjł gula'tzreni narä sa'csi rajç runä guira'ti porsu racnaj xcärieĵn ste'ca beĵn, ä? 30 Palga rudedä xquixtios lo Dios nani runiidx xhi rauä, ;xhicuent rniyajreni narä ni rauä, luxh abadedä xquixtios lo Dios? 31 Ni'cni palga gautu, o palga yätu o xhitis ni rujntu, colyujñ guira'ti te chä'p xpala'n Dios. 32 Na'c guche'chtu nicla rexpeĵn Israel niclaza rebenzijt, niclaza rexpeĵn xquidoo Dios. 33 Sigajcza runä narä, runä guira'ti ni ruspaalajz rebeĵn, dina quilä xcäl'nasa'cätis, alga rguilä xcäl'nasa'c xhidalduxh beĵn, te laareni lo dojl sa'csi ahuililajzreni xtidx Dios.

11

1 Colyeĵn si'cni runä narä, sigajcza narä runä si'cni rujn Jesucrist.

Xho riäjł gun regunaa neñ xquidoo Dios

2 Rliä'pä xpala'ntu sa'csi lo guira'ti rñaj lajztu narä, rñajza lajztu rediidx nani baluiä lojtu, sudzu'tztu rusoobtu rediidx sigajcni baluiäreni lojtu. 3 Narä rlazä gacbeepactü Jesucrist najç nani rñabee lo niguii, dxejctiru niguii rñabee gunaa si'c rñabee Dios Jesucrist. 4 Chutis te niguii ni yu' xhumbreel yeĵcni lałni cabedx-canabni lo Dios o lałni çaguluiini xtidx Dios, laani rusanxtuĵyni

yejcní. ⁵ Palga yu' te gunaa ni dini gusaü xpäiini yejcní che cabedx-canabni loj Dios o che caniini xtidx Dios, rusanxtujyni yejcní sa'csi najcní sigajc najc te gunaa ni abigaj yejcní. ⁶ Palga di te gunaa gusaü xpäiini yejcní suguigaj yejcní. Palga najcní te xtujy guigaj yejcní, sugusaüni xpäiini yejcní. ⁷ Di guchaag gusaü te niguii yejcní sa'csi najcreni si'c xtuxh Dios, najza xcälrdimbicha' Dios. Niluxh regunaa najc si'c xcälrdimbicha' niguii. ⁸ Sa'csi di niguii nixixtiej cuä' gunaa; gunaa najc ni birixtiej cuä' niguii. ⁹ Xhetza xcuent gunaadi guc-chee niguii; gunaa najc ni guc-chee xcuent niguii. ¹⁰ Ni'cni nanab jäü yejc gunaa nen guidoo si'c te seen lo rexangl Dios yu' chu rnibeereni. ¹¹ Niluxh nez lo Dios niela niguii nielaza gunaa digacdi guibañ xtebreñi. ¹² Sigajc galoo birixtiej gunaa cuä' niguii, sigajcza naj gunaa najc nani ruu bäz; luxh Diostis najc nani runchee guira'ti rebejn.

¹³ Colyejn lagajc xhigabtu naj, ¿la laaca najcní cuedx-guiniab te gunaa lo Dios lañ ni xhet niäudi yejcní, ä? ¹⁴ Loj rebeñ guedxliuj guiraa reniguii rgaj yejcreni, sa'csi najcní te xtujy guigaduxh xquidxejcreni. ¹⁵ Niluxh regunaa hueen najc rga' xquidxejcreni te rusäuni yejcní. ¹⁶ Palga yu' chu tildiidx xcuent rediidx nani cania lojtu, nanab gacheeni si'ctis riennu, si'ctisza rujnreni nen guiraa rexquidoo Dios.

Xho ruxhinreni xchej Dad Jesucrist

¹⁷ Rediidxre ni cagucuaä lojtu, direni guiliä'p xpala'ntu, sa'csi che rdxagsa'tu nen xquidoo Dios, lacuaa laaca cuetu, xhet laadi rujntu. ¹⁸ Rnixgaä dee: Abiejn diagä che re'tu lo xquidoo Dios, rlia'tu lo sa'tu rajctu tiop cuaa; luxh riliica lazä rediidxre. ¹⁹ Pet naatu nanab guntu si'c te gacheetu churení'c sanälajzpac Dios, churení'c sajrcu lo xtzuun Dios. ²⁰ Ni'cni che rdxagsa'tu, dini gac te cuetu lo xmex xchej Dad Jesucrist, ²¹ sa'csi che agule'creni xchej lo mex, teja bejn rlajz xcaxgaa xhi gauni, dxejc yu' reni agudxadoo xque'reni, agusojzarení, lañni yu' stee cuaa bejn calaan, gajdreni gau. ²² ¿Xho mood? ¿La xheti roliztu cadre gac gautu, yätu, ä? O ¿la rbälazlu xquidoo Dios, ni'c rusanxtujylu rebejn ni xhet räjpdi, ä? ¿Xhini'c guiniä lojtu naj? ¿La naatu guiliä'pä xpala'ntu xcuent nani rujntu, ä? ¿Gurniälojtu guiliä'pä xpala'ntu!

Xchej Dad Jesucrist

(Mt. 26:26-29; Mr. 14:22-25; Lc. 22:14-20)

²³ Baluiloj Dad Jesucrist loä lagajc nani baluiä lojtu xcuent xho bejnñi guxhijn che gudaunäjñi rexpejnñi te xchej xten pascw, guxhijn ni gudo'ni. Cua'ni yäxttiil, ²⁴ dxejc che abadeedni xquixtios lo Dios, gula'ni yäxttiilga, räjpni lojreni: “Colgajw, dee najc tiexhä ni gudedä guet xcuenttu. Scree guntu te guinalajztu narä.” ²⁵ Si'cza bennäjñi co'p che gulujx gudajwreni, räjpni lojreni: “Ni yu' nen co'pre najc si'c xtienä; che ju'treni narä, sixe' xtienä xcuenttu, si'c te seen xten didxcoob ni gusa'n Dios loj rebejn ni aguleni. Scree guntu te guinalajztu narä.” ²⁶ Che gautu yäxttiilga, che yätu nen co'pga, ruluilosactu xhi bejn Jesucrist che gudijxni xcuent rextojñu lo crujz; si'cza colujyn dxejli ni guibisacni lo guedxliujre.

Xho riäjlgac xchej Dad Jesucrist

²⁷ Ni'cni rniä lojtu, chutis tejtü ni rajw yäxttiil, ni rä'za co'p xten xchej Dad Jesucrist, palga dini gusoob xtidx Dios, rujñni dojl, najcní si'cni lagajc laani bagu't Jesucrist, baxhe'zani xtiejnñi. ²⁸ Niluxh sugula'tz tejtatu lagajc lastooni don la yu' xhi dojl bejnñi, dxejcti sajz gauni yäxttiil, yäni co'p xten xchej Dad Jesucrist, sa'csi abaxhobdojlñi. ²⁹ Chutis bejn ni gau, ni yä xchej

Dad Jesucrist, luxh dini gula'tz lagajc lastooni xhicuent gauni, yäni xchej Dad Jesucrist, lagajc laani rujnni jiajb xcälñaj Dios yejcnì. ³⁰ Ni'cni lacti resa'tu racxhuu, xhet nadaanreni, luxh yu'zareni agujt. ³¹ Ni'cni nanab fiinu xho najcnu, guiniabnu lo Dios gudzucajni rextoljnu te didi tednu trabajw. ³² Niluxh che rdejndu trabajw, rdejdnuni te na'c tednu trabajwduxh si'c ted reben guedxliuj che gacreni yälguxhtis xten Dios.

³³ Ni'cni rniä lojtu, rebetzä, che guire'tu te gautu xchej, colcuäjz resa'tu.

³⁴ Palga yu' chu tejtu ni calaan, sugauni lagajc rolizjni, te di gun Dios yälguxhtis lojtu. Guiraa rexhistee cos, che jiälä ro'c fiä don xho gacsac'ni.

12

Dzuun ni rudeed Sprit Dxan xten Dios lo tejga ni rililajz

¹ Rebetzä, rlazä gacheetu xcuent dzuun ni rudeed Sprit Dxan xten Dios lo tejganu.

² La'tu najntu che gajdtu chalilajz xtidx Dios, rajntu chutis banäjb ni di gachee, ni naatis bejn gantu. ³ Ni'cni rlazä gacheetu naj, nicla tejtu ni yu' Xsprit Dxan Dios neñ lastooni sajç guinii: "Xhet sajcdi Jesucrist." Luxh rut rajcdi rni: "Jesucrist najc Dadbid baxhuaannu", palga di Xsprit Dxan Dios cuääz neñ lastooni.

⁴ Mbaj naj. Yu' xhidajl dzuun ni rudeed Dios loj rebejn ni huililajz xtiidxni, niluxh tejsi najc Xsprit Dxan Dios ni rujn dzuunga neñ lastoo guiragajcnu. ⁵ Yu'za balti cuaa dzuun nani riennu, niluxh tejsi najc Xtabdid baxhuaannu. ⁶ Yu' xhidajl mood rajc dzuun, niluxh tejsi Dios rujn dzuunga lastoo guiralii bejn. ⁷ Tejga bejn ruluiloj garen-garen xtzuum Sprit Dxan xten Dios, niluxh guira'ti redzuunga najc te gacnäjreni guiraanu. ⁸ Lo tej bejn rudeed Sprit Dxan yälñasiñ, lo steeni rudeed lagajc Sprit Dxanga yälñajn. ⁹ Lagajcza Sprit Dxanga rudeedzani yälrililajzro lo tejni, dxejç lo steeni rudeedza lagajc Sprit Dxanga yälñabee te rusajcni yälracxhuu. ¹⁰ Loj stee bejn rudeedzani yälñabee te gunni milaagw; loj stee bejn rudeedni yälriembee te sajç guinixgaani xcuent recos ni churu gac; lo steeni rudeedni yälñasiñ te gumbeeni chu najc Sprit guliipac, näjza chu najc sprit ni rusguee. Lo stee bejn rudeedzani guiniini garen-garen redidxsaj; loj stee bejn rudeedzani yälracbee te rajc rniini loonu xhini'c gunii bejn ni rni garen-garen redidxsaj. ¹¹ Niluxh tejsi najc Sprit nani rujn guiraa redzuunre, racnäjni rujn tejganu xtzuumni si'ctis ni rlazjni.

Guiraanu najcnu te la' tejsi tiejxh

¹² Sigajc ni najc tiejxhnu tejsi, mase yu' xhidajl la' xtenni, tejegareni te la' tejsi tiejxh, sigajcza najc rebejn nani huililajz xtidx Jesucrist. ¹³ Guiraanu, mase najcnu rexepejn Israel o ben griegw, mase najcnu mos o mestr, gurobnisnu con laj Sprit Dxan che huililajznu xtidx Dios, te gujçnu si'c tejsi tiejxh, luxh tejsi Sprit Dxan xten Dios biädälajz neñ lastoonu.

¹⁴ Sa'csi tiejxhnu dini gac tejsi la', najcni balti la'. ¹⁵ Paru naa ni'nu: "Sa'csi dina gacä te naa, ni'cni dina gacä te la' tiejxhre." ¿Xhixh porsì ni'c dini gac tla' tiejxhga, ä? ¡Gurniälolju! ¹⁶ Palga diajgnu naa: "Dina gacä te baloj, ni'cni dina gacä te la' tiejxhre." ¿Xhixh porsì ni'c dini gac tla' tiejxhga, ä? ¡Gurniälolju! ¹⁷ Palga guideb tiejxhni niajç te baloj, ¿xhi cojn niejn diajgni? Palga guideb tiejxhni niajç te diajgni, ¿xhi cojn chuxhi'ni? ¹⁸ Mbaj naj, ni'c basoob Dios guiraa rela' te guc-chee tiejxhnu si'ctis ni rlazjni gacni. ¹⁹ Paru niajç guidebni

si'c tejtis la'ni, ¿xho niajcpacni te tiejxhni dxejc? ²⁰ Niluxh naj ensilaani yu' xhidajl la' te najcni tejsi tiejxhni.

²¹ Te balojnu di gac gäbni lo ñaanu: “Dina guiquinälu”, ni claza bitiuvejcní di gac gäbni lo ni'ni: “Dina guiquinälu.” ²² Chucala lapacreni rquiuinru nani ružen lascanu xhet sajcdireni. ²³ Luxh retla'ga nani rchalonu guxii sajcreni, reni'c maazru saj. Luxh reni rtuinänu, niguii sigajc gunaa, reni'c riapdarunu. ²⁴ Biätla sgaüi la' tiejxhnu nani rlui saruru, reni'c di guiquin gapdanuni. Niluxh abenchee Dios tiejxhnu si'c, te gapdaru bejn retla' nani lascanu guxiiru saj. ²⁵ Bejnni si'c te di chu yälrđijl lo retla' tiejxhnu, te guiraa retla'ga gacnäy sa'reni. ²⁶ Ni'cni che et laadi yu' te la' tiejxhnu guidebni ru' et laadi. Sigajca che guiliä'pnu xpala'n te la' tiejxhnu, guideb tiejxhnu rbalajz.

²⁷ Ni'cni guiraanu najcnu si'c tiejxh Jesucrist. Tejanu najc te la' tiejxhni. ²⁸ Luxh abadeed Dios yälrñibee lo tejanu lo xquidooni te gunnu xtuun-xtuunni. Ganidtoo guleni reapost; ni rojgga guleni rebejn ni rnii xtidx Dios; ni riojnga, guleni rebejn ni ruseed; dxejcti guleni reni rujn remilagwr, reni rusajc benracxhuu, reni racnäy, reni rnii garen-garen redidxsaj. ²⁹ Et guiraadi rexpejn Jesucrist najc apost. Et guiraadizareni rniireni xtidx Dios. Et guiraadireni rajc ruseed. Et guiraadizareni rajc rujn remilagwr. ³⁰ Et guiraadireni rajc rusajc rebenracxhuu. Etza guiraadireni rajc rnii garen-garen didxsaj, et guiraadireni rajc rnii xhi säloj redidxsajga. ³¹ Nanab guideb lastootu rlajztu guniidx Dios reyälrñibee ni najc maazru hueen lojtu. Niluxh narä guluiä lojtu te nezuj ni najc hueenru loj guiraareni.

13

Yälsanälajz

¹ Palga guiniä guiraloj xtidxsaj rebejn, o xtidx rexangl Dios, luxh dina chanälazä rebejn, rubejtis xtidxä si'c te tamboor o te platii. ² Palga saj guiniä xtidx Dios xcuent recos ni churu gac, luxh racbesa'cä guiraa recos xhiga'tz xten Dios, näjza guiralii yälnasin xten guedxliujre, palga rapä yälrñililazduxh te gac gäpä lo redajnre, “colguibicaj”, luxh rbicajreni, niluxh xhet sanälazädi rebejn, rut nacädi. ³ Palga gudedä guiraa rexhixtenä nani rapä te gau rebejn ni xhet rajpdi; palga gudedä tiexhä te checni, luxh xhet sanälazädi rebejn, xlia'si gunä guiraa redzuunga.

⁴ Rebejn ni rajp yälsanälajz cabäjrzeni, najczareni beñsa'c, direni säblajz xhi xten sa'reni, direni guschä'p lagajc xpala'nreni, direni gac guyalajz. ⁵ Direni gun recos ni di guchaag, dini quüil xcälñasa'ctisni, dini guidxe'ch, dini jiu redojl ni rujn bejn lojni. ⁶ Nani rajp yälsanälajz dini guibalajz che rujn stee bejn dojl, alga rbaa lajzni che laaca rujn bejn. ⁷ Nani rajp yälsanälajz rujn huant xhitis cos, rililajzni hueen xcuent xhitis cos, sanuutis cabäjzni, rajc rdejdn xhitis trabajw.

⁸ Yälsanälajz dipacni nitloj. ¿La rniireni xtidx Dios xcuent recos ni churu gac, ä? Sidzujn dxej sibäjz rediidxga. ¿La rajc rnii bejn garen-garen redidxsaj, ä? Sidzujn dxej siacđxi redidxsajga. ¿La yu' yälnajn? Sidzujn dxej sinitloj-pacni. ⁹ Sa'csi naj guxilii racbeenu, guxilii xtidx Dios xcuent recos ni churu gac rajc rniinu, ¹⁰ niluxh che jädsac Jesucrist ni rajp guiralii yälnajn, sinitloj xcälñandxucnu.

¹¹ Che gucä biuux, guniä si'c biuux, benäza xhigab si'c biuux, niluxh che bidzunä lo yälbengol, gunitloj rexhigab biuux ni benä galoo. ¹² Sa'csi naj rhuiinu si'c loj te guihujn ni nacäy, luxh che guibanñänu Dios xhaguibaa,

suhuisa'cnu si'cni ruhuii bejn che suga'ni loj sa'ni cahuiinini. Naj racbeenu re'cti rec, niluxh dxejc sachbesa'cnu si'cpacni numbee Dios nuure. ¹³ Niluxh naj ria'n yälirililajz näjza yälrbäzljajz, näjza yäl'sanälajz. Lo guidxon redde, sajcrü yäl'rinälajz.

14

Renani rnii rediidx

¹ Ganiddoo colquuil yäl'rinälajz, colnabza lo Dios te guniidxruni xhi stee dzuun, niluxh colyejnru te xca'tu yäl'rnibesa'c te gusule'tu xtidx Dios. ² Che rnii te bejn garenca diidx ni di rebejn gacbee, rniini lo Diostis, et lojdi rebejn, sa'csi rut racbeedi xtiidxni, mase caniiini cosro, cosxhiga'tz nani ruluii Sprit Dxaan xten Dios guiniini. ³ Niluxh bejn ni rusule' xtidx Dios, rustioobni xcäl'rililajz bejn ni ruliidxni, ruspaani lajz nani rac-huin lajzni. ⁴ Che rnii te bejn garenca didxsaj ni rut racbeedi, lastootisni rustioobni, niluxh bejn nani rusule' xtidx Dios xcuent recos ni churu gac, laani rustioobruni lastoo guiraa rebenguidoo.

⁵ Narä rläzä maläii rajc rnii guiraatu garen-garen diidx, niluxh hueenru gac gusule'tu xtidx Dios. Maazru sajc nani rajc rusule' xtidx Dios loj nani rnii garenca diidx palga di gacdi gusule'ni lo rebejn xhini'c caniiini. ⁶ Mbaj naj betzä, che jlääl lojtu, palga guiniä garenca diidx lojtu, xhi gacnäjni la'tu? Hueenru guiniliä xcuent te cos ni abaluiloj Dios loä, o xcuent te yäl'najn, o xcuent te xtidx Dios, o xcuent te yäl'ruluii.

⁷ Ni ruhuiinu xho najcza reinstrument ni rol bejn si'c te bizej, o te harp; palga di bejn golsa'creni, xho jiennu gacheenu xhi dij cayol'reni, ä? ⁸ Sigajcza lo guerr, palga direni gol cornet dippac, xho gacheereni agojl chatijl'reni, ä? ⁹ Sigajcza la'tu, palga ditu guinisa'c didxsaj nani racbee bejn, xho gunreni gacheereni xhini'c caniiilu, ä? Xlia'si guiniilu, lo bejtis sää xtiidxlu.

¹⁰ Yu' xhidalduxh didxsaj lo guedxliuj, luxh xheti tejni nani xheti xnejzni. ¹¹ Niluxh palga dina gacbeä didxsaj ni rniireni loä, nacä si'c te benzijt loj nani canii loä, sigajcza sajc nani caninäj narä. ¹² Ni'cni la'tu ni rläjzta xca'tu yäl'rnibee xten Sprit Dxaan te guntu xhi redzuun, colgüejs, colnab lojni xhidajl dzuun te gacnäjtu tioobru xcäl'rililajz rexpén guidoo.

¹³ Ni'cni palga yu' te bejn ni rnii garenca didxsaj, suguiniabni loj Dios yäl'rnibee te gac gusule'ni diidx ni rniini lo rebejn. ¹⁴ Palga cuedx-guiniabä lo Dios con te didxsaj ni dina gacbeä, lastoätis ni calä'p xpala'n Dios, niluxh xcärienä xhet cayacheedini. ¹⁵ Xho ricajni dxejc? Siniab xspritä näjza xcärienä lo Dios; sol xspritä näjza xcärienä dij. ¹⁶ Palga dini gac si'c, xsprittislu calä'p xpala'n Dios con ste'ca didxsaj, niluxh bejn nani cacuadiajg di gacdi gacnäjnilu guiliä'pni xpala'n Dios, sa'csi dini gacbee xhini'c rniilu.

¹⁷ Hueenza calä'plu xpala'n Dios, per stee bejnğa dini tioob loj yäl'rililajz. ¹⁸ Rudedä xquixtios lo Dios maazru rajc rniiä garen-garen diidx loj guiraga-jctü. ¹⁹ Niluxh nejn guidoo maazru rläzä guiniä con xcärienä gaittis diidx nani gacbeetu, nani guluii la'tu, loj tzuu mił diidx nani guiniä con xspritä ni ditu gacbee.

²⁰ Rebetzä, na'c rujntu xhigab si'cni rujn rebiiux, xcuenttis cosguijdx nanab gacnaytu si'c biuxbäz, per colyejn xhigab si'c te bengool. ²¹ Scree caj lo xleii toMoisés: "Mase guiniä lo rebejn con garenca diidx näjza xtidx benzijt, nicla si'c direni gucuadiajg xtidxä", naj Dad baxhuaannu. ²² Ni'cni regaren-garen didxsaj najc si'c te seen lo renani gajd chalilajz xtidx Dios, et lojdi rebejn ni arililajz xtidx Dios. Niluxh yäl'rusule' xtidx Dios xcuent recos ni

churu gac, ni'c najc te seen loj renani ahuililajz xtidx Dios, xhet lojdi renani gajd chalilajz xtidx Dios. ²³ Palga re'tu neñ guidoo dxejcti caniitu garen-garen diidx ni rut racbeedi, dxejc guidzujñ tej ni di gan xtidx Dios, siniini guiraatu rajc yejctu. ²⁴ Palga re'tu neñ guidoo, dxejcti guiraatu cagusule'tu xtidx ni baniidx Dios lojtu, che jiu' tej ni di gan xtidx Dios, sacbeeni xhini'c caniitu, sacbeeni yu' xtojñi, ²⁵ sienloj rehxigab xhiga'tz ni yu' neñ lastooni, dxejcti siabrlojni suzuxhijbni lo Dios, siniabni lo Dios, siniizani guliipacni suga' Dios galäitu.

Colyejn guira'ti xnez-xnejzni

²⁶ ¿Xho ricajni naj, betzä? Che guire'tu neñ guidoo suxca' tejpgatu tebgaj te salm, te xtidx Dios ni guluiini, te diidx ni baluiloj Dios lojni, te diidx con garenca diidx, nägajcza te ni gusule' xhi säloj diidxga. Colyejn guiraa ni rujntu te tiob xcälirililajz renani ahuililajz xtidx Dios. ²⁷ Palga yu' renani rñi con garenca diidx, suguinii tio'p-chon bejn, niluxh tebgajreni, dxejcti sugusule' steeni xhi säloj ni rñi tejpgareni. ²⁸ Palga rut rajcđi gusule' rediidxga, na'c guiniireni con garenca diidx neñ guidoo, suguinixtebreni lo Dios. ²⁹ Si'cza renani rusule' diidx ni ruedeđ Dios lojreni, suguinii tio'p-chon bejn, niluxh tebgajreni, te cuadiajg stiop xchonreni donnu la laaca caniireni. ³⁰ Palga guluiloj Dios te cos loj te bejn ni sobga' cacuadiajg, succuedxisijcni, dxejcru suguiniiini. ³¹ Sa'csi guiraatu sajč gusule'tu tebgajtu didx ni baniidx Dios lojtu te gac guiseedtu, te tiob lastoo guiraatu lo yälirililajz. ³² Ruedeđ Sprit Dxan xten Dios yälñajn loj reni rusule' diidx ni ruedeđ Dios lojreni te acanajnreni che riäjł guiniireni o che riäjł cuedxireni, ³³ sa'csi Dios najc te Dios ni rujñ guira'ti xnejz-xnejzni, dini gun biey, niluxh rbedcxini lastoo bejn neñ guiraa reguidoo xten rebejn ni ahuililajzpac xtiidxni. ³⁴ Sucuedxi regunaa neñ reguidoo, sa'csi di gacđi gusule' te gunaa xtidx Dios. Nanab gunreni si'c caj lo leił gunreni, gucuadiajgreni xtidx Dios ni rusule' reniguił lojreni. ³⁵ Palga rłajzreni gacbeerureni, suguniabdiidxreni loj chäälñi che guibi'reni rolizjreni, sa'csi sianxtujy gunaaga palga guiniini neñ guidoo.

³⁶ Colgacbee et la'ditu guläxtiejditu rextidx Dios, luxh etza xtebtis lojtu biäädni. ³⁷ Palga yu' tejtu ni rchalo rajc rñiini diidx ni ruedeđ Dios lojni, o palga rchalonı abadeed Xpřit Dxan xten Dios te dzunro lojni, sugacbeepacni dee: guiraa rediidx ni cagucuaä lojtu, rucuaäni sa'csi si'c gunıbee Jesucrist gucuaäni. ³⁸ Palga yu' chu tejtu ni di chalilajz rapä xcälřmıbee Jesucrist, rutza judı ttiidxni.

³⁹ Ni'cni, rebetzä, colyejnru te gusule'tu diidx ni runiidx Dios lojtu, na'c gudxoįntu renani rñiiza garenca didxsaj. ⁴⁰ Luxh guira'ti nani rujntu, colyensa'cni, xnejz-xnejzni.

15

Gubansac Jesucrist lo rebengut

¹ Naj rñiä lojtu betzä, colgusnaj lajztu xtidx Dios ni basule'ä lojtu, nani huililajztu, loj nani sutijptu, ² näjza colgusnaj lajztu diidx xcuent ni badzucaj Dios xtojłtu che huililajztu, palga sanuu sutijptu lojni, te di xlia'si huililajztu diidxga.

³ Lojtu ganıdoo basule'ä rediidx ni sajcrı ni bisiedä, basule'ä xho gujt Jesucrist lo crujz, bixe' xtiejñni te badzucajni rextojłnu, sigajc ni caj lo xtidx Dios gac. ⁴ Basule'äza xho biga'tzni, dxejc ni rion dxej guläs Diosni, gubansacni si'cni caj lo xtidx Dios gacni. ⁵ Chenı gubansacni, baluilojni lo Pedr, dxejctıru loj guıtzubıto'p rexpejñpacni, ⁶ dxejcti baluilojni lo gabıxh gaiı

gayuu bejn ni tre' tejsi lajt. Xhidajlreni nabansijc, niluxh yu'za reni agujt. ⁷Dxejcti baluilojni lo Jacoob, dxejctiru loj guiraa reapost.

⁸Dxejcti lultpac baluilojzani loä, luxh alagudejd ruluilojni lo rexpejnni dxejc. ⁹Narä guxiiru sacä loj guiraa reapost, niclaza nungäjil cuälajreni narä apost sa'csi basacsää rexpejn xquidoo Dios. ¹⁰Balaslazduxh Dios narä, ni'c narä nacä si'c ni nacä naj. Luxh et xlia'di balaslajzni narä. Narä benäru dzuun loj guiraareni, niluxh xhet narädi ni benä dzuun, sa'csi xcäl_rulaslajz Dios cayacnäjä narä. ¹¹¿Xhiru najcni palga naräni o palga laareni? Empac gagusule'nu xtidx Dios, luxh la'tu salilajztu xtiidxni.

Xho guibansac rebengut

¹²Mbaj naj, palga nuurnu cagusule'nu diidx xcuent ni gubansac Crist loj rebengut, ¿xhicuent yu'tu ni rni, xheti yälrbansac loj rebengut? ¹³Palga xheti yälrbansac lo rebengut, dxejc nicla Crist di nibansac lo rebengut. ¹⁴Luxh palga di Crist nibansac loj rebengut, ¡xlia'si najc diidx nani basule'nu! ¡Xlia'siza najc xcäl_rililajztu! ¹⁵Luxh et ni'ctis. Abiga'nu sa'csi rusgueenu rniinu baspansac Dios Jesucrist loj rebengut, luxh dini nuspansacni loj rebengut, palga guliini di bejn guibansac loj rebengut. ¹⁶Niluxh palga di rebengut chäs, niclaza Crist di nibansac lo rebengut. ¹⁷Luxh palga di Jesucrist nibansac loj rebengut, xhet sajcdi xcäl_rililajztu, sanuutistu loj xtojltu. ¹⁸Sigajcza agunijt rebengut nani huililajz xtidx Jesucrist. ¹⁹Palga naj ni nabajntisnu loj guedxliujre cabääznu Jesucrist, lo guiraa reben guedxliuj nuurnu najcnu rebejn ni riäjil jiaduxhtej guiraa reni ruhuil loonu.

²⁰¡Per dini gac si'c! Guliipacni gubansac Jesucrist loj rebengut. Laani guc ganiddoo loj guiraa rebengut ni gubansac, luxh laani dini niejt par tejpas. ²¹Sigajcni biääd yälgujt loonu xcuent tejtis niguii, sigajcza biääd yälrbansac lo rebengut loonu xcuent tejtis niguii. ²²Sigajc xcuent te niguii ni laa Adán biääd yälgujt, sigajcza xcuent Jesucrist biääd yälrbansac loj rebengut. ²³Tejganu xcuent-xcuentnu; Jesucrist gujc ganiddoo, dxejcti guiraa reni najc rexpejnni che jιάdsacni lo guedxliujre, guiraareni suspansacni. ²⁴Che agujc ni'c, dxejcti siääd dxe lult che gudedsacni yäl_rnibee lo Dios Xtadni, che abadzujl_i guiraa reyäl_rnibee, guiraa reyäl_guxhtis, guiraa reyäl_milagwr. ²⁵Nungäjilpac guinibee Jesucrist cheni gunli Dios gaan loj guiraa reni rdxe'ch lojni, quixhnireni detz ni'ni. ²⁶Lult ni rdxe'ch lojni ni gunitlojni najc yälgujt. ²⁷Lo xquijtz Dios caj: “Agudixhni guira'ti detz ni'ni te guinibeenireni.” Che rniini si'c huenliisi gachee bejn di gacdi guinibee Jesucrist Dios, sa'csi Dios badeed lojni xhini'c guinibeeni. ²⁸Che acanibee Jesucrist guiraali recos, dxejcti sudeedni guideb yäl_rnibee loj Xtadni Dios, te xtebtis Dios guinibee guira'tipac.

²⁹Palga rujntu xhigab di bejn guibansac loj rebengut, ¿xhi gun rebejn nani robnis xcuent rebengut? Palga di bejn guibansac lo rebengut, ¿xhicuent rutiobnisreni la'tu xcuent rebengut?

³⁰¿Xhicuentza rdxunnu lo casionduxh guira'ti or? ³¹Rniliäpac lojtu, rebetzä, caläpä xpala'ntu xcuent Jesucrist Xtadnu ni cayun xtzuunni lojtu. Ni'cni guniä lojtu, guira dxej rguuilreni narä te ju'treni narä. ³²Palga benä xhigab si'c te niguii guedxliuj che bacuanää reniguii ni najc si'c man nialajz lo guedx Éfeso, ¿xhi gaan benä? Palga di bejn guibansac loj rebengut, do'o jien si'c ni caj lo guijtz: “Do'o guidau, do'o guidun, sa'csi guixee empac sejtnu.”

³³Na'c gusaantu gusgueereni la'tu, palga sachaaglu lo benguijdx näjza luj sajclu benguijdx. ³⁴Basaniy xcäriejnlu si'cni nanab gunlu. Bascuääz dojl ni

rujnlu sa'csi yu' balti bejn ni dipac gumbee Dios. Te guituyjtu ni'c rniä diidxre lojtu.

Xho guibansac rebengut

³⁵ Naj yu' reni rniabdiidx: “¿Xho rbansac bejn loj rebengut? ¿Xhoza gac tiejxhrenei?” ³⁶ ¡Chip nayäällu! Che rbe'clu te binij, di gäjil guiliejn palga di xhobga guet, nalajznu, palga dini guechduu. ³⁷ Luxh che rbe'clu, dilu cue'c gäjilga si'cni rlanjzlu gacni, alga rbe'clu xhob o triuu o ste'ca binij, ³⁸ niluxh Dios rujn rliejni, rustioobni gäjilga, lo tejga gäjil ruedeeni xpalajni o tiejxhni, si'ctis ni rlanjzni. ³⁹ Xhet guiraadi retiejxhrenei najc tebloj. Yu' bääł xten bejn, yu'za bääł xten reguidxaa, yu'za bääł xten reman xhaguibaa, yu'za bääł xten rebäjł. ⁴⁰ Sigajcza yu' tiejxh rebajł xhaguibaa, tiejxh rexten guedxliujre. Niluxh yälrdimbicha' xten rebajł xhaguibaa najc tej, dxejc yälrdimbicha' guedxliuj najc ste'ca. ⁴¹ Bicha' xte gubijdx najc garen lo xten bäii, sigajcza xpicha' rebal xhaguibaa najc garen-garenza lo sa'reni. ⁴² Sigajcza yälrbansac loj rebengut; che guet bejn rga'tz tiejxhni luxh rujdzni, rnitlojni. Luxh che guibansacni loj rebengut, garenca gac tiejxhni, diruni gudx, anabajni par tejjpas. ⁴³ Che rga'tzni, rujn bejn xhigab xhetru gacnäjd tiejxhga, niluxh che guibansacni, lacti sacru, lacti sajz tiejxhga. Che rga'tzni, xhetru sajcdi gunni, luxh che guibansacni, anadipduxhni. ⁴⁴ Che rga'tz tiejxhnu, najcni xten guedxliujre, luxh che chäsni najcni te tiexhcoob ni runiidx Dios. Ni'cni yu' te tiejxhni ni siääd lo guedxliuj, yu'za te tiejxhni ni siääd xhaguibaa.

⁴⁵ Si'cza caj lo xtidx Dios: “Nigui galooga ni laa Adán, bejn Dios gujcnj te bejn nabajñ.” Niluxh Adán ni biääd lult, Jesucrist najc Sprit ni runiidx yäl'nabancob loonu. ⁴⁶ Ganid najc yäl'nabajñ xten guedxliujre, dxejctiru yu' te yäl'nabancob xhaguibaali. ⁴⁷ Sigajcza niguii galooga najc ben guedxliujre, niluxh ni rojp niguii ni biääd najc bejn xhaguibaali. ⁴⁸ Benchee Dios Adán con yuj, najcni bejn guedxliuj. Xhaguibaali biääd Jesucrist, najcni bejn xhaguibaa. ⁴⁹ Sigajcni najcnu si'c bejn guedxliujre, sigajcza sajcnu sigajc najc bejn ni yu' xhaguibaa.

⁵⁰ Naj guiniä rediidxre lojtu betzä, di gac ted tiejxhnu ni najc bääł näjza rejn xhaguibaa cadro yu' Dios. Tiejxhnure nani sinitloj di gacdiza xca'ni stee tiejxh ni najc par tejjpas. ⁵¹ ¡Colhuui! Rlazäza gacheetu te didx-xhiga'tz; xhet guiraadinu guet, niluxh sidxaa guiraa retiejxhnu ⁵² tera't bäzlule', si'c cheni rdinya' guuzi, che jieł lult trompe't, dxejc sibansac rebengut, säjstreni guideb tiexhcoobreni ni najc par tejjpas. Luxh näjza tiejxhnu sidxaa. ⁵³ Sa'csi tiejxhnu ni najc xten guedxliuj nanab guidaani te ga'pnu tiejxhnu ni najc xten xhaguibaa, sa'csi tiejxhnu ni najc xten guedxliuj rejtni, niluxh tiejxhnu ni najc xten xhaguibaa di gacdi guetni, najcni par tejjpas. ⁵⁴ Niluxh che tiejxhnu ni najc xten guedxliuj abidxaa te ga'pnu tiejxhnu ni najc xten xhaguibaa, näjza che tiejxhnu ni sajz guet abidxaa te ga'pnu tiejxhnu ni di gacdi guet, ni najc par tejjpas, dxejc sisiojb xtidx Dios ni caj scree: “Yälgujt agunitloj sa'csi bejn Jesucrist gaan lojni. ⁵⁵ Yälgujt, ¿xho gac gunlu gaan naj, ä? Yälgujt, ¿Con xcäl'nayanlu naj, ä?” ⁵⁶ Xcäl'nayan xten yälgujt najc dojl. Xcäl'rniee dojl najc leii. ⁵⁷ Niluxh rdeednu xquixtios lo Dios, nani runiidx te yäl'rniee loonu te jiennu gaan lo yälgujt xcuent Dad Jesucrist.

⁵⁸ Ni'cni rebetzä ni sanälazduxhä, colchanuutis, colsudzu'tz lo xtidx Dios, na'c guidaajgtu guntu xtzuunni, sa'csi anancheetu xhet xlia'di najc dzuun ni runiidx Dios riennu.

16

Meel ni guire' par rexpejn Dios

¹ Xcuent meel nani guire' par rebejtznu, coljejnni sigajcni räpä gun reben rexquidoo Galacia. ² Casob dumingw, nalajznu ganid dxej xmaan, tejpgatu colcuää te meel yejc nani rujntu gaan nen te xmaan, colcucheeni, te na'c gutie'tu meel che jialä. ³ Te che guidzunä, guxhalä meelga, näjza tiop-chon guijtz chanä chutis bejn ni cуетu chasa'nni guedx Jerusalén. ⁴ Palga laaca cha'aza, sajca chänäreni narä.

Xhigab ni bejn Pabl chääni biaj

⁵ Guidzunä lojtu che agudedä reguedx Macedonia, sa'csi sidedä nejzga galoo ni jialä ro'c. ⁶ Dxejcti pet siannää la'tu, pet saclaä, sidedä guiraa rebäi najl ro'c, te gacnäjtu narä che cha'a cadrotis cha'a. ⁷ Sa'csi di rlazä jiadhuiätu te ladejtzi, rlazä jiannää la'tu xchejpac, palga gusaan Dad Jesucrist gunä si'c. ⁸ Niluxh sia'nä guedx Éfeso, te ro'c tedä lanij ni rusnaj lajz bejn che biääd Sprit Dxaan xten Dios. ⁹ Sa'csi ro'c yu' xhidajl bejn nani rlazj guisieed xtidx Dios, niluxh ro'c yu'za xhidajl reni rdxe'ch loä.

¹⁰ Palga guidzujn Timoteu lojtu, saru colhuiini, te na'c chuni yärsia' la'l ni yunäjni la'tu, sa'csi cayujnni xtzuum Dios sigajc runä narä. ¹¹ Na'c gusaantu chu tej ni cuälazni, colcuedxii lajzni, dxejc colgusunejzni, te jiadhuiini narä ree, sa'csi ree cabääznu laani con rebejtznu.

¹² Niluxh xcuent bejtznu Apolos, räpäza lojni niäädpacni lojtu con rebejtznu, niluxh di rlazjpacni niäädni naj. Per siäädcani dxejtis ni gac jiaädni.

Rextixtios lult ni ruxhalni

¹³ Colsusin, colsudzu'tz lo yärlirilajz xten Dios, coljejn dzuun si'c niguii, colyajc beñdaan. ¹⁴ Xhitis ni rujntu coljejnni con yärlinälajz.

¹⁵ La'tu rebetzä, anajntu xcuent rexfamil Estéfanas, nani ganid huililajz xtidx Dios nez reguedx Acaya, najntu xho racnäduxhreni rebejtznu nani huililajz xtidx Dios ro'c. Naj rniabduxhä lojtu, ¹⁶ colgusoob xtidx rebejnnga, näjza xtidx guiraa rebejn ni racnäj rexpejn Dios, ni rujnza xtzuum Dios. ¹⁷ Rbalazä bidzujn Estéfanas, näjza Fortunato, näjza Acaico, sa'csi laareni bejnreni par narä nani di niajcdi niujntu sa'csi rutitu. ¹⁸ Gulecdxireni lazä näjza lajzfu, ni'cni, jcoljiu sa' rebejnnga!

¹⁹ Reben xquidoo Dios nez reguedx Asia ruxhal xtxitios lojtu. Aquila näjza chäälni Priscila näjza rebejn ni re' rolizreni ruxhalzareni xtxitios lojtu. ²⁰ Guiraa rebejtznu ruxhal xtxitios lojtu. Colguinii tejpgatu lo sa'tu: "Xchan, gacnäj Dios la'tu."

²¹ Narä Pabl, ruxhalä xtxitios lojtu, lagajc narä benä reletrrre.

²² Palga yu' chu tejtü ni di chanälajz Dad Jesucrist, sunitlojni. ¡Dad Jesucrist, gudaa!

²³ Gacnäj xcäl'rulasajz Jesucrist guiraatu. ²⁴ Yärlinälajz ni rapä xcuent Jesucrist suchunäjni la'tu. Sugacni si'c.

Stee Guijtz Ni Bacuaa Pabl Lo Guidoo Xten Guedx Corinto

Ni rojp guijtz ni bacuaa Pabl lo guidoo xten guedx Corinto

¹ Narä Pabl nacä apost xten Jesucrist sa'csi si'c rlanj Dios te gusule'ä xtiidxni. Narä näjza Timoteu, ni najc bejtznu lo xtidx Dios, rucuaanu guijtzre lojtu rexpejn xquidoo Dios ni yu' guedx Corinto, näjza loj guiraa rexpejn Dios ni rbäjz nez guiraa reguedx Acaya. ² Rniabnu lo Dios ni najc Xtradnu näjza lo Dad Jesucrist, gacnäjreni la'tu, guscuecdxireni lajztu.

Trabajw ni gudejd Pabl

³ Guiliä'pnu xpala'n Dios Xtrad Jesucrist, nani rulaslajz nuurnu, nani rus-toolajz nuunu. ⁴ Che rdejdnu trabajw, rbecdxini laaznu te rajcza rbecdxinu lajz renani cadejd trabajw con lagajc yälrbecdxilajz ni baniidx Dios loonu. ⁵ Sigajc ni rdedduxhnu trabajwduxh ni gudejd Jesucrist sa'csi rusule'nu xtiidxni, sigajcza rbecdxiduxh Jesucrist laaznu. ⁶ Palga rdeednu trabajw, najcni te gustolajz la'tu, te laatu lo dojl. Palga ruscuecdxi Dios lajznu, si'c rujnni te cuedxilajztu te guntu huant che tedtu lagajc trabajw ni cadejznu. ⁷ Rinudzu'tz yälrunloj ni rajpnu xcuent la'tu, sa'csi nadonnu palga rdejdtu lagajc trabajw ni cadejdnü, suscuedcxü Dios lajztu sigajcni ruscuedxini laaznu.

⁸ Rebetzä, rlazä gacheepactu lacti trabajwduxh bideednu nez reguedx Asia, tudxe'nsi dinu nien huant, sa'csi gudedcaj trabajwga, acasislinu. Trabawduxhtejni, benä xhigab sujnni gaan, sugu'tni nuurnu. ⁹ Gulicanu, labiennu xhigab sejtpacnu. Niluxh dee gusajcnu te bisieednu na'c chali-ilajznu lagajc nuurnu, alga chaliilajznu Dios nani ruspansac rebengut. ¹⁰ Sa'csi Dios basläa nuure lo yälgujtgä, luxh sinuutis gusläani nuurnu lo yälgujt. Salilazduxhnu Diosre susläaruni nuurnu, ¹¹ sa'csi cayacnäjtu nuurnu, cabedx-canabtu lo Dios xcuentnu. Dxejcti palga xhidajl bejn cabedx-canab lo Dios xcuentnu, xhidajlzareni sudeed xquixtios lo Dios xcuentnu xcuent xcälrulaslajz Dios ni baniidxni loonu.

Xhicuent di Pabl nij guedx Corinto

¹² Dee najc nani ruspaa laaznu: rbedxi xcäriejnü, ni'c ruluii loonu laaca nabajjnu, con yälnadolajz riennu si'cni nrabee Dios; xhet sa'csi rajpnu xcälnajn reben guedxliujdi, alga sa'csi racnäj Dios nuure. Si'cpac nabajjnu lo guedxliujre, luxh maazru che yu'nu lojtu. ¹³ Cacuaanu lojtu rediidx ni sajc gojtu, ni sajc gacheetu, luxh cabazä sachesa'ctu guiragajc rediidx ni gucuaä, ¹⁴ lagajc si'cni agucbeetu mase gaii xtiidxnu, cabazä guibaa lajztu xcuent nuurnu, sigajcni guibaa lajznu xcuent la'tu nen dxej ni jääd Dad Jesucrist.

¹⁵ Ni'cni ganiddoo benä xhigab niädhuüä la'tu te nibalajztu tio'p huält. ¹⁶ Nalajznu, benä xhigab nidedä ro'c che sa'a reguedx Macedonia, dxejcti stehuält cheni guibi'ä Macedonia, niädhuisacä la'tu ro'c te niacnäjtu narä te nia'a Judea. ¹⁷ ¿Xhaa dina niunsa'cä xhigab che benä xhigabre? ¿La rchalotu runä xhigabä si'c te bejn guedxliuj nani ruintio lajzni, nani tejsi diidx rniini "sia'ä" nägajcza "dina cha'a", ä? ¹⁸ Dios guluii lojtu gullica rniä lojtu, dinu guinii tejsi diidx "sia'ä" nägajc "dina cha'a". ¹⁹ Xi'n Dios, Jesucrist nani bisule'nu lojtu narä näjza Silvan, näjza Timoteu dini guntio'p lajzni, dini guinii tejsi diidx "sunäni" näj "dina gunäni", niluxh laani guiraa xtiidxni

najc "sunäpacni". ²⁰ Si'cza guiraa rediidx ni bia'n Dios loonu xcuent Jesucrist najcreni "sunäpacni"; näjza xcuent laani najcreni "sugacni si'c" par nuurnu, te chä'p xpala'n Dios xcuent nuurnu. ²¹ Dios cagusudzu'tzza nuure näjza la'tu lo xtidx Jesucrist, agulezani nuurnu te jiennu xtzuumni. ²² Abacuaazani seenni loonu, ni'cni baniidxni Sprit Dxan xtenni te cuääzni neñ lastoonu.

²³ Rbedxä loj Dios gacheeni xhi yu' lastoä, guliipacni te diruna gotalä xcälñajtu, ni'c dina niälsacä guedx Corinto. ²⁴ Di rñajznu guinibeenu xho chalilajztu, alga rñajznu gacnäanutu lo dzuun te guibaa lajztu; guliipac agusudzu'tztu lo xcälñililajztu.

2

¹ Niluxh lagajc xcuent xcälñasa'cä benä xhigab dina jiädhuisacä la'tu che cayac-huin lazä. ² Sa'csi palga narä siädyenä gac-huin lajztu, ¿chuni'c gun guibaa lazä? La'tistu, nani benä gac-huin lajzni. ³ Ni'cni lagajc xcuent ni'c bacuaä lojtu, te che jiälä lojtu, di rebejn gunhuin lazä nani riäjñ guspaa lazä. Luxh nancheä palga narä guibaa lazä, nägajc la'tu sibaaza lajztu. ⁴ Che bacuaä guijtza lojtu, lacti xhigabduxh benä, binduxhä; xhet te gac-huindi lajztu, alga te gacheetu yälñanalazduxh ni sanälazä la'tu.

Yälñusiäjñ lajz ni yu' par nani bejn falt

⁵ Palga yu' chu tej ni cayujñ cayac-huin lazä, xhet xtebtis lazä cayunhuinni näjza lajztu cayunhuinni guxii diidx guiniä sa'csi di rñazä guntu xhigabduxh. ⁶ Alabasacsiduxh xhidajñ bejn dade'ga, na'cru gusacsítuni naj. ⁷ Naj colsiäjñ lajztu xcuent xtojñni, colcuedxni lajzni didi gac-huinuxhtej lajzni. ⁸ Ni'cni rniabä lojtu, colchanälajz bejnre si'c ni huinälajztuni galoo. ⁹ Bacuaxgaäza lojtu te gacheä laa susoobtu xtidxä. ¹⁰ Naj renani jiäjñ lajztu xtojñni, näj narä siäjñ lazäni. Sigajcza narä, nani basiäjñ lazä, palga yu' xhi basiäjñ lazä, benäni xcuent xcälñasa'ctu, nez loj Jesucrist, ¹¹ te di gun beñdxab gaan nuure, sa'csi anajnnu xho najc latsiaj ni rujñ beñdxab.

Guyu' Pablyärsia' che bidzujñni guedx Troas

¹² Che bidzunä guedx Troas, te gusule'ä xtidx Jesucrist, bejn Dad Jesucrist rutliidi badxojnä narä, ¹³ niluxh guyuduxhä yärsia' sa'csi dina nidxälä Tito, bejtznu. Ni'cni basadidxgacäreni, sa'äti nez reguedx Macedonia.

Jesucrist rujñ riennu gaan

¹⁴ Xquixtios lo Dios nani con Jesucrist racnäj nuurnu te dipacnu gunijñ, empac rujntisnu gaan, luxh con nuurnu guiraa nejz ruluilojñi xhi saru najc gumbeepac bejn xtidx Dios. ¹⁵ Sa'csi najczanu si'c te guxh xten yalnejxh xten Jesucrist lo Dios nez loj renani chalilajz xtidx Dios te guxh nez loj rebejn nani canijñ sa'csi naadireni chalilajzreni xtiidxni. ¹⁶ Loj reni di chalilajz xtiidxni, najcnu si'c te guxh ni rugu't, loj renani rililajz xtiidxni, najcnu si'c guxh xten yalnejxh ni ruedeed yälñabancocob. ¿Chu laa ni racbee sa' recosga? ¹⁷ Sa'csi dinu gac si'c najc xhidajñ bejn nani rusule' xtidx Dios te gunreni gaan meel. Nuure rusulesa'cnu xtidx Dios sa'csi rinälazpacnu Jesucrist luxh si'c ni gunibee Dios, si'c rusule'nu, rusule'nu diidx con xcälñracnäj Jesucrist nez loj Dios ni cahuii xhini'c riennu.

3

Diidx nacoob ni basa'n Dios loonu

¹ Che rniinu rediidxga, ¿la rchalotu canisacnu didxsa'c lagajc xcuentnu, ä? Yu'reni ca' guijtñ ni rñii najcreni beñsa'c. ¿La rñajzzatu guiluuiinu lojtu sa'

guijtzga, o guiniabnu guntu sa' guijszga xca'nu, ä? ² La'tu najc si'c xquijtznu ni rñii xho najcnu. Lastoopacnu acuajtu. Guiraa rebejn rajc rhuii xho huililajztu xtidx Dios sa'csi basule'nu xtiidxni lojtu. ³ Huenliisi rluiloj najctu si'c xquijtz Jesucrist, luxh nuurnu bizule'nu xtiidxni lojtu. Xhet con tintdi cuaj rediidxga, xhet lojdiza guj cuaj didxga, Sprit Dxan xten Dios ni nabajn bacuaa rextidx Diosga, bacuaanireni lastootu.

⁴ Nadoncheenu redee, ni'cni xcuent Crist dinu guidxejb nez loj Dios. ⁵ Di gacdi jien xtebnu xhitis dzuun ni riennu, riennuni sa'csi laa Dios ni racnäj nuurnu. ⁶ Laani runiidx yälñadaan loonu. Nuurnu najcnu mos xten xtidxcoobni ni bia'nni con nuurnu. Luxh didxcoobga dini gac si'c xleii toMoisés ni bacuaareni lo guij, sa'csi xleiini biädnä dojl, dxejc gujtnu. Niluxh didxcoobga ni rusule'nu biädnä Sprit Dxan xten Diosni, luxh runiidxni yälñabancob loonu. ⁷ Leii baluui yu' xtoj bejn, riäj guetreni. Xhidajl seen guyu' che bacuaa Dios rediidxga lo guij. Luxh di niajcdi nuhuui rexpejn Israel loj Moisés, bidxejbreni sa'csi rdimbicha' lojni, luxh sanuu cayuui yälrdimbicha'ga. ⁸ Palga si'c gujc che biääd leii, aticaxh naj su'ru xcälrdimbicha' xleii Sprit Dxan xten Dios, ni najc redidxcoob nani abasule'nu. ⁹ Palga xleii toMoisés ni baluiloj yälgujt xcuent dojl biädnä yälrdimbicha', aticaxh naj yu' xcälrdimbicha' xtidxcoob Dios ni rudzucaj dojl. ¹⁰ Naj dirunu fii xcälrdimbicha' xleii toMoisés sa'csi xtidxcoob Dios rdimbicha'ru par tejpas. ¹¹ Palga yälrdimbicha' nani biuui bianisesduxhni tera't, stee yälrdimbicha're ni najc par tejpas sidimbichasesduxhni.

¹² Luxh ni'c runiidx yälrbecdi lajznu, dipacnu guidxejb che rusule'nu xtidxcoob Dios. ¹³ Dinu gac si'c toMoisés, ni basäu tla' lajd lojni te di fii rexpejn Israel cayuui yälrdimbicha' ni guyu' lojni. ¹⁴ Niluxh bicäjy xcäriejnreni; lo dxej najli che riel xleii toMoisés, najcni si'cni yu' xhi lajd rusäu lastooreni, rudxojn gacbeereni, te di chalilajzreni, xtidx Jesucristis rajc rudzucaj lajdgä. ¹⁵ Lo dxe najli che rojreni xleii toMoisés, najcni si'cni ruscäjy te lajd xcäriejnreni. ¹⁶ Lo xtidx Dios rñii scree: "Niluxh che gusiechlaz te bejn, gudzureräni nez loj Dad, sibicaj lajdgä", nalajznu sacbeeni xtidx Dios. ¹⁷ Dad Jesucrist najc Sprit luxh cadro yu' Sprit xten Dios badzucaj Diosni lo xleii toMoisés. ¹⁸ Niluxh nuure dinu gusäu lajd lojnu, didi guscäjyini xcäriejnnu. Nuure najcnu si'c te guihuaajn cadro rdimbicha' xtuxh Dad Jesucrist, luxh chäi-chäi cadxaanu cayajcnu si'c najcni näjza caca'nu xcälrdimbicha' Jesucrist, sa'csi si'c cayujn Sprit Dxan xtenni.

4

¹ Ni'cni sa'csi agule Dios nuure te gusule'nu xtiidxni, sa'csi balaslazjzani nuure, dipacnu jiäxhan. ² Ni'cni rbälaznu recos ni rajc xhiga'tz, sa'csi rusanzujyreni. Dizanu gusguee, dizanu guchaa xtidx Dios, niluxh rniinuni si'cpacni najcni, te si'c ruhuui guiraa bejn rsiaapacnu lo xnezyuj Dios. ³ Niluxh palga yu' chu dipac gacbee rextidx Dios nani rusule'nu, najctisreni rebejn nani ala canitloj par tejpas, ⁴ sa'csi abascäjy bendxab ni rnibee guedxliujre xcäriejnreni, si'cni rujnni lo rebejn nani di chalilajz xtidx Jesucrist, te na'c fiireni xcälrdimbicha' xtidx Dios ni rñii xcuent xhanij xten Jesucrist, ni najc xtujxh Dios. ⁵ Che rusule'nu xtidx Jesucrist, dinu guiliä'p lagajc xpala'nnu, rliä'pnu ganaxtis xpala'n Dad Jesucrist. Nuure najcnu xmostu xcuent Jesucrist. ⁶ Che benchee Dios guedxliuj, guniini: "Lo xcäjy suguirii te bajl ni gusanij." Lagajc Diosga abasanij lastoonu te baniidxni bajl ni najc yälriembee xcälrdimbicha' Dios nez loj Jesucrist.

Xho guibanu con yälirilajaz

⁷ Nuurnu najcnu si'c te guesyuj, xhet sajcdinu, niluxh guidxanu te yäl'nasacduxh, ni najc xtidx Dios xcuent Jesucrist, te guiluiloj xcäl'nasa'c xten xcäl'rnibee Dios lacuaa xhisi te yäl'nadipbäz xtenu. ⁸ Rdeednu trabajw guira nejz, niluxh dinu gunijt yälrunloj. Mase di jien xho jienu, dinu chu yärsia'. ⁹ Rusacsireni nuure, niluxh di Dios cuälaznu, rguijnreni nuure, dizareni ju't nuure. ¹⁰ Cadrotis rionnu rusacsireni nuure si'c basacsireni Jesucrist, te si'c nen tiejxhnu guluilojzani yäl'nabansac loj rebengut xten Jesucrist. ¹¹ Cadrotis rionnu rlanjreni ju'treni nuure sa'csi rusule'nu xtidx Jesucrist te si'c za nen tiejxhnu guluilojzani xcäl'nabajn Jesucrist loj reben guedxliujre. ¹² Ni'cni rujn yälgujt dzuun loonu, per yäl'nabajn cayujn dzuun lojtu.

¹³ Sa'csi rajpnu lagajc xsprit xten yälirilajjza, sigajc ni caj lo xtidx Dios: "Huulilazä ni'cni basule'a diidx." Sigajcza nuure, huulilaaznu xtidx Dios, ni'cni rusule'nuni. ¹⁴ Sa'csi nadonnu lagajc nani baspañsac Jesucrist loj rebengut, lagajcza laani gun guibañsacnu con Jesucrist te gunni sunäjnu la'tu nez lojni. ¹⁵ Rsiajcnu guiraa ni rsiajcnu te xcuenti la'tu gudeedru bejn xquixtios lo Dios, te guilä'pruzareni xpala'nuni xcuent yäl'rulasajz ni sanuutis care'ch lo xhidajl bejn.

¹⁶ Ni'cni dinu gunijt yälrunloj, per mase tiejxhre acayujxh, guixe-guixee cagustioob Dios spritnu. ¹⁷ Retrabajw ni cadeednu lo yäl'nabajnre rdedgajceni, niluxh rujnreni ga'pnu te yäl'rdimbichaduxh ni gajdnu guidon, ni najc par tejpas. ¹⁸ Dinu fiitis renani ruzen lo guedxliujre sa'csi sinitloj reni'c, alga cayenloonu renani di guzen, sa'csi renani di guzen najceni par tejpas.

5

¹ Aracheenu tiejxhnu najc si'c te yu' xten xaimnu lo guedxliujre, sidzujn dxej sinitlojni, nalajznu sejt tiejxhnu, suniidx Dios te tiejxhnu xten xhaguibaa nani di nitloj, nalajznu dini guet par tejpas. ² Guliicani, lałni dxunnu nen tiejxhre, rbedxnennu rdeednu trabajw, ni'cni rlanjnu maläi agojl guidxaa tiejxh guedxliujre te xca'nu te tiexhcoob ni siääd xhaguibaa. ³ Te si'c che acua'nuni, diruni gac si'cni suxhabääl xaimnu, sa'csi abicoob tiexhnu. ⁴ Lałni dxunnu nen tiejxhre rbedxnennu, rdeednu trabajw, sa'csi di rlaaznu suxhabääl xaimnu, rlanjnu gacwnu tiexhcoobnu, te tiejxhre nani cayejt, sidebnäjni tiexhcoob ni siääd xhaguibaa. ⁵ Nani benchee nuure parpac dee najc Dios, lagajc nani runiidx Sprit Dxan xtenni loonu si'c te seen sujnpacnini.

⁶ Ni'cni dinu guidxeeb, sa'csi nadonnu lałni nabajnnu lo guedxliujre, di gacdi guibajnnu xhaguibaa loj Dadga. ⁷ Sa'csi nabajnnu xcuent nani rililajznu, xhet xcuentdi nani rajc rhuinu. ⁸ Ni'cni rniä nabajnnu dinu guidxeeb, rchaloonu huenru guisa'nnu tiejxhnu lo guedxliujnure, te choläznäänu Jesucrist xhaguibaa. ⁹ Ni'cni tejtis najc xhigabnu, palga lo guedxliujre o xhaguibaa, rlanjztisnu jienu renani gun guibaa lajzni. ¹⁰ Sa'csi guiraanu riäjil suunu nez loj yagxhiil cadro gun Jesucrist yäl'guxhtis, te tejanu guica'nu xcuent nani biennu lo guedxliuj, palga dzunsa'cni, o palga dzunguijdxni.

Diidx xcuent yäl'rbecdxi lajzni

¹¹ Luxh sa'csi rdxejbnu (nalajznu rucuaadiaagnu xtidx) Dad Jesucrist, rluixdnu rebejn te chalilajzreni xtiidxni. Luxh Dios najn xho nabajnnu; maläi näjza lo xcäriejntu guluiloj xho nabajnnu. ¹² Dinu guilä'p lagajc xpala'nnu lojtu stehuält, rniinu rediidxga lojtu te guibalajztu xcuentnu, te ga'ptu xhi diidx gusejctu lo rebejn ni rchaglajztis ruhuu xho rien bejn, direni

gacbee xhi yu' neñ lastooreni. ¹³ Palga najcnu si'c bejn ni rajc yejcreni, si'c najcnu par Dios, palga najcnu si'c bejn ni nasa'c xcäriejnnu, najcnu par la'tu. ¹⁴ Sa'csi sanälazduxh Jesucrist nuure, ni'c rusoobtisnu xtiidxni, sa'csi nancheenu gujt tejtis par guiraanu, ni'c najcni si'cni agujt guiraanu nez loj Dios. ¹⁵ Luxh Jesucrist gujt xcuent guiraa rebejn, te renani rililajz xtiidxni, na'cru guibajjreni xcuenttis laareni, alga guibajjpacreni xcuenttis Jesucrist nani gujt, nani gubansac xcuent laareni. ¹⁶ Ni'cni nuure dinu fii lo bejn si'cni najcni lo guedxliujre. Galoo biembeenu Jesucrist si'cni gujcní che gubajjnni lo guedxliuj, niluxh naj et si'cti riembeenuni. ¹⁷ Ni'cni chutis bejn, palga rililajzni xtidx Jesucrist, sujnnini te beñcoob, diruni guichagljaz gunruni nani rajc lo guedxliuj, alga guichagljazni gunni xtzun Dios.

¹⁸ Guiraa dee siäd lo Dios, nani basiäjł lajzni xcuent Jesucrist, dxejcti baniidxni loonu rediidx xcuent xcälrusiäjł lajzni te gusule'nu rediidxga, ¹⁹ nalajznu, nanab gusule'nu diidxre: Dios guyunäj Jesucrist, cagusiäjłlajzni con rebeñ guedxliuj, te xca'nireni, sa'csi diruni gudzuub xtojł reni ahuililajz xtiidxni lo xcuentreni. Dxejc gule Dios nuure te gusule'nu rediidxpacre lo rebejn. ²⁰ Ni'cni sio'pnu te guiniinu xtidx Jesucrist, najcni ascanu lajajc Dios canabduxh lojtu che rniabduxhnu lojtu, colgusiäjł lajztu, colyajc tejsi con Dios. ²¹ Di Jesucrist niujn nicla tej dojl, niluxh sa'csi sanälajz Dios nuunu, xcuentnu bejn Dios gujc Jesucrist si'c te bendojl che gule'cni guiraa rextojł guedxliuj yejc Jesucrist che cuajni lo cruzj. Si'c gujcní te sajç ga'pnu xcälñaya, xcälñasa'c Dios xcuent Jesucrist.

6

¹ Ni'cni rniabnu lojtu, jia'cnu tejsi lo xtzun Dios, na'c cuälaztu xcälracnäj Dios; palga guntu si'c, xlia'si cua'tuni. ² Sa'csi loj xtidx Dios çaj scree:

Dxej nani riäjł gunäni, bacuadiagä xtiidxtu,

dxej che gubicaj xtojłtu gucnää la'tu.

çoljiejn! Naj najc te tiempsa'c,

coljiejnza, naj najc dxej ni guibicaj xtojłtu.

³ Na'c jiennu nicla tej ni gun guidxe'ch lajz bejn, didi guiniireni xhet laadi najc xcälrusule'nu. ⁴ Niluxh lo guira'ti dzuun ni riennu, guluilojnu lo rebejn najcnu xmos Dios; gacnu nadolajz; jiennu huant che rusacsíreni nuure; che rdejdu trabajw; che di jien xho jiennu; ⁵ che rguijnreni nuure; che rusäureni nuure neñ latzguuib; che rdejdu lo bieiduxh; che rdajł xtzuunu; che re'ch bacal yääl; che rucua'nnu; ⁶ guluilojza najcnu xmos Dios xcuent xcälñabansa'cnu lo Dios; näjza xcälñansa'c xtidx Diosnu; näjza yälrajc nadolajz; sa'csi laaca riennu lo sa'nu; näjza sa'csi rbäjz Sprit Dxan xten Dios neñ lastoonu; näjza xcuent yälrinälajzpac bejn; ⁷ näjza xcuent didxguliipac; näjza lo xcälñmibeduxh Dios; ca'zanu si'c te madxed xcälñaya Dios, ca'nuni guopñaanu, ladbee, näjza ladbäjgw. ⁸ Ruluilojzanu najcnu xmos Dios palga chà'p xpala'nnu, o palgaza jianxtujynu; palga guiniireni didxa'c xcuentnu, o palgaza guiniyajreni nuunu; palga naareni najcnu beñrusguee, mase najcnu bejn ni rni didxlii. ⁹ Palga rut rlajzdi gumbee nuunu, o palga guira'ti bejn numbee nuunu; acayejtnu, niluxh bahuii, anu anabajn; rusaan Dios rguijnreni nuure, niluxh dinu guet; ¹⁰ najcnu si'c bejn ni yu' xliajs, niluxh rbalaznu; najcnu si'c bejn ni xhet rajpdi, luxh riennu gapduxh bejn; najcnu si'c bejn ni xhet rajpdi, niluxh rajpnu guiraloj.

¹¹ Lojtu, beñ Corinto, aguniliinu lojtu guiragajc rediidx ni yu' neñ lastoonu.

¹² Xhetliidi diidxdi bacua'tznu lojtu, niluxh pet cacuatç lajztu diidx ni nanab

guiniitu loonu. ¹³ Naj narä ruldixä la'tu si'c rulijdx te Dad rexi'nni: ¡Colguinii loonu rediidx ni yu' neñ lastootu!

Najcnu si'c xquidoo Dios ni nabajn

¹⁴ Na'c guchaagtu lo rebejn nani di chalilajz xtidx Dios, sa'csi di gacdi gunteblojtu dzuun sa'csi tejni rlanj gun dzunsa'c, steeni rlanj gunni dzunguidx, ¿xho gac sanäj bajl xcäjy, ä? ¹⁵ O ¿xho gac sanäj Jesucrist bendxab ni laa Satanás, ä? O ¿xho gac sanäj te bejn nani rililajz xtidx Dios te bejn ni di chalilajz xtidx Dios, ä? ¹⁶ ¿Xhixh tebloj najc xquidoo Dios con rebanäjb, ä? Ni nuunu najcnu xquidoo Dios ni nabajn, lagajc si'cni gunii Dios galoo: Cuázä neñ lastooreni, sisanääzarení.

Narä sacä Xtiosreni, laareni sajcreni rexpenä.

¹⁷ Ni'cni colrii galäiireni, colguibicaj lojreni, te laad colcuääz, si'c naj Dios:

Te gac xca'ätu, na'c faltu recosdxuudx.

¹⁸ Dxejc la'tu sajctu rexinganä, rexindxa'pä,

luxh narä gacä xtadtu,

si'c naj Gueb Dios ni rajp guiralii yälribeec.

7

¹ Ni'cni, la'tu ni sanälazä, sa'csi abia'n Dios diidxre loonu, do'o guisia xcäriejnnu, lastoonu näjza tiejxhnu, do'o cuäcaj guiraa rexhigabguijdx, guiraa redojl, te gac sanu lo rexnezyudxan Dios con xcälrdxeyb Dios.

Xho basiejch lajz rebejn Corinto

² ¡Colchanälajz nuunu neñ lastootu! Xhet latsiajdi biennu lojtu. Rut baxhindinu. Rutza basguedinu. ³ Dina guiniä rediidxre te cue'cä xquejtu; ni aguniä lojtu galooli, la'tu yu'tu neñ lastoonu palga tejsi guetnu, o palga tejsi guibajnrnu. ⁴ La'tu nadip lazä, rniduxhä didxsa'c xcuenttu lo bejn, rbedxi lastoä, rbalazduxhä loj guiraa retrabajw ni cadeednu.

⁵ Ni'cni che guyu'nu reguedx Macedonia, di niajcdi nusilajznu sa'csi guiralajt cadejdnu trabajw, xcuent yälrdijl ni guyu' guideb gabinu, xcuenta yälrdxeyb ni guyu' lastoonu. ⁶ Niluxh Dios ni racnäj rebejn ni rac-huin lajzreni, gucnäj nuure, sa'csi che bidzujn Tito guredxi lastoä. ⁷ Luxh xhet sa'csi bidzujntis Tito, näjza sa'csi gulecdxitu lastoo Tito, näjza sa'csi biädnäni diidx xho yu'tu, xho rlanjtu fiitu narä, xho yu' xliajs lastootu xcuent xtojltu, xho rlazduxhtu guntu si'cni guniä lojtu, ni'cni bibalasduxhäru.

⁸ Acananä guc-huin lajztu che biłtu guijtuz ni bacuaä lojtu, niluxh di lazä niac-huin mase che baxhaläni guc-huin lazä, sa'csi naj nanä mase bejn guijtuzga guc-huin lajztu, xhet xchejdi guc-huin lajztu. ⁹ Niluxh naj rbalazä, et sa'csi guc-huindi lajztu, alga sa'csi guc-huin lajztu te basiejch lajztu xcuent xtojltu, sa'csi guc-huin lajztu si'cni rlanj Dios, te di yu' xhi gunijttu xcuent nuunu. ¹⁰ Sa'csi yälrac-huin ni ruxhal Dios loonu rujn rusiejch lajznu, te rusläa Dios nuurnu lo dojl ni'cni rbaalazä che bejnii si'c. Niluxh yälrac-huin xten guedxliuj dini gun gusiejch lajz rebejn rextojlreni, alga rujnii nitloj bejn tejpas. ¹¹ La'tu bejntu huant xliajs ni baxhal Dios si'cni rchaglajz Dios gac. Naj ¡colhuii gan! ¡Lacti xhi cossa'c bejnii par la'tu! Bejnii bahuisa'cpactu xhini'c gujc, te gac gusulegajctu xcuentni; dxejc bejnii bidxechtu, näjza bejnii bidxeybtu, ni'cni basaantu dojlga, dxejcti bejnii rlanjpactu nuhuiitu loä, bejnzani guyu'tu yärsia' xcuentä, bejnzani rlanjztu guntu yälguختis bejn nani bejn dojlga. Guiraa redee baluiloj et la'ditu bejn dojl. ¹² Ni'cni, che bacuaä guijtuzga, dina nucuaäni loj bejn ni bejn dojlga, niluxh bacuaä guijtuzga

lojtu te guילוiloj xcälrsia'tu ni rajptu xcuent narä nez loj Dios. ¹³ Ni'cni aguredxi xcäriejnnu.

Naj aguredxi xcärienä, bibalazduxhäru xcuent xcälrbalajz Tito, sa'csi bi-coob, bisilajz xpritrni xcuent guiraatu. ¹⁴ Sa'csi palga yu' xhi didxsa'c ni räpä lojni xcuenttu, ditu nusanxtujy narä nez lojni. Niluxh sigajcni guniinu ganax didxgulii, sigajcza najc guiraa redidxsa'c xcuenttu ni guniä loj Tito, guliipacni. ¹⁵ Ni'cni maazru sanälajzni la'tu, che rnaj lajzni xho basoobtu diidx, xho bejntu cua'tuni che bidzujnnu, racsejslitu cadxejbtu. ¹⁶ Naj rbaalazä sa'csi loj guira'ti la'tu nadip lazä.

8

Saru rudeedreni meel

¹ Naj bejtznu, rrajznu guiniinu lojtu xho badeed Dios xcälrulasajzni lo reben Macedonia ni huililajz xtidx Dios. ² Mase gudedduxhrenei trabajw, bibalajzreni, mase xhetliidi gojpreni, badeedreni meel si'c te bejn ni rajp. ³ Narä caniliä lojtu, badeedreni xmeelreni si'cni gojpreni, luxh badeedruenei loj ni naa bejn sajz gudeedreni. ⁴ Gunabduxhzareni loonu guisaannu gudeedreni xmeelreni te gacnäjreni rexpen Dios. ⁵ Niluxh direni niujn si'cni biennu xhigab gunreni. Ganiddoo badeedreni lagajc laareni loj Dad Jesucrist, näjza loonu si'cni rnibee Dios gac. ⁶ Sa'csi batie' rexpen Macedonia meel, ni'c naj räpä loj Tito chanuupacni gutie'ni meel lojtu si'cni gunii Tito lojtu galoo. ⁷ Rujntu xhidajl dzunsa'c. Rililazsa'ctu xtidx Dios; rnisa'ctu xtidx Dios; rajptu yäl'najn; rchaglaizpactu guntu dzuun; rinälajztu nuunu, ni'cni na'c gusaantu tedcaj gunzatu dzunsa'cre, nalajznu, gudeedtu meel.

⁸ Dina guniä lojtu colyujnpacni; narä rlazätis gacbeetu xho rbaalajz reni rudeed meel te gululoj don la guliä sanälajzpaczatu rexpejn Dios. ⁹ Sa'csi la'tu anumbecheetu rulasajz Dad Jesucrist, te mase najcni ri'cw, rajpni guiraa xhixten Dios, xcuentu gujcnä si'c te bejn ni xhet rajpdi, te xcuentni ga'ptu guiraa rexhixten Dios xhaguibaa.

¹⁰ Narä siniä lojtu xhi xhigab runä, par lagajc xcäl'nasa'ctu. Gudebijzli ganiid la'tu guslojtu bejntu dzunsa'cre, luxh rbaali lajztu rrajzpacu guntuni. ¹¹ Naj colchanuu, colguluux dzuunga si'cni guslojtu cayujntuni. Naj te luux dzuunga colgudeed si'cni rajptu. ¹² Sa'csi palga rrajzduxh te bejn gudeed lo Dios, laaca najc gudeedni si'ctis ni rajppacni. Di Dios guiniab gudeed bejn nani dini ga'p. ¹³ Dina guiniä gudeedtejtü te tedtu trabajw te gapduxh stee bejn, alga te gacteblojdistu. ¹⁴ Nani rajprulu naj ni'c colgudeed te gusalojtu ni cayäädxreni, te stee dxej nani rajpreni laareni sajz suniidxzareni te gusalojreni nani cayäädxtu te si'c gacni tebloj. ¹⁵ Sa'csi lo xtidx Dios caj scree: "Te bejn nani batopduxh yäl'nasa'c, xhet bia'ndiru, dxejcti nani guxii batojp yäl'nasa'c, xhet biäädxdü."

Tito näjza rexcompanieerni

¹⁶ Xquixtios lo Dios nani rudeed lo Tito lagajc yärsia' ni räpä narä par la'tu. ¹⁷ Sa'csi cuäjbni gunni nani gunabä lojni gunni. Luxh sa'csi rlazduxhpacni gunni xtzuum Dios, naj lagajc laani bejnni xhigab jädhuiini lojtu te luux dzuunre.

¹⁸ Caguxhañnu xtee bejtznu chanä Tito. Guiraa rebejn guidoo rnii didxsa'c hueen xcuent bejnre sa'csi laaca rusule'ni xtidx Dios. ¹⁹ Ni'ctis aguleza reben guidooni te chunäjni narä te gacnäjni narä lo xtzuum Dios nani cayennu te guiliä'pni xpala'n Gueb Dad Jesucrist, te gululojza lacti rrajzpacni jiennu

xtzuunni. ²⁰ Ni'cni rlazä jiapdaduxhnu te di chu tej ni guiniyaj nuure xcuent melrore ni chosa'nnu lo rexpejn Dios. ²¹ Sa'csi narä riuduxhä runä nani najc laaca, et ganax nez lojdi Jesucrist, näjza loj rebejn.

²² Con guiro'p redee, caguxhalzanu stee bejtznu, nani agujc balti huält bihuiinu xho rujnni, te bahuiipacnu rlanjpacni gunsa'cni xhidajl dzuun, luxh naj rlanjruni gunsa'cni redzuunga sa'csi nadip lajzni la'tu. ²³ Palga yu' chu guiniabdiidx xcuent Tito, colyejtz lojni laani najc nani cayunnäj narä dzuun lojtu. Dxejcti xcuent stio'p bejtznu, laareni najcreni xquixhajg reguidoo, rliä'pzareni xpala'n Jesucrist. ²⁴ Ni'c na'c guidxejbtu che yu'tu lo rebejn reguidoo guluiipactu loj rebejnga xho sanälajztu, näjza redzuun ni rujntu ni'c rniinu ganax didxsa'c xcuenttu.

9

Meel par rebejtznu

¹ Ni'cni dina gucuaäru lojtu xcuent dzuunre, nalajznu, yälracnäj rexpejn Dios, ² sa'csi anancheä rlanjzactu guntuni, luxh xcuentpac ni'c agulä'pä xpala'ntu loj reben Macedonia, räpä lojreni la'tu, reben Acaya, gudebijzli batie'tu meel, luxh sa'csi bejntu si'c, xhidajlza reben Macedonia biniib te badeedzareni meel. ³ Ni'cni abaxhalä rebejtznu lojtu, te di xlia'si gulä'pä xpala'ntu xcuent dzuunre, te acabäjzlitu gudeedtu xmeeltu, sigajc ni agunix-gaä lojtu. ⁴ Didi che jädnää reben Macedonia jiophuiinu la'tu, xhet rajpditu, dxejc jianxtuyä narä, näjza la'tu. ⁵ Ni'cni benä xhigab, nanabpac jädxgaa rebejtznu, jädhuiireni la'tu, te fiireni don xho gac xcuent meelro ni galooli bia'n diidx gudeedtu, te abatiexgaatu nani gusalajztu sa'csi rlanjzactu gudeedtuni, xhet sa'csi rniinu riäjlpac gudeedtuni.

⁶ Rniliä lojtu, nani guxii rbe'c, guxiiza yälناسа'c guiliäsni, niluxh nani rbe'c xhidajl binij, xhidajlza yälناسа'c guiliäsni. ⁷ Tejgatu colhuii don lacti sajg gudeedni, dxejc si'c sugudeedni si'cti ni rlanjzi, na'c gun tiopdi lajzni, etza sa'csi riäjlpac gudeednini, sa'csi Dios sanälajz bejn ni rbaali lajzni rudeedni meel lojni. ⁸ Luxh Dios sajg guniidxru xcälracnäjni lojlu, te si'c guixe-guixee sajplu xhidajl guiraloj rexhixtenlu, te ga'plu xhitis ni rquuinlu loj guira'ti xtzunsac'lu. ⁹ Sa'csi lo xtidx Dios caj scree: Abadeduxhni loj reben ni xhet rajpdi luxh redzunsac' ni rujnni, najcreni par tejpas.

¹⁰ Dios nani rudeed binij ni rbe'c nani rujn dzuun loniaa, laani suniidxzani yätxtiil te guidaunu, lagajc Diosga suniidx, sutajlza binij cue'ctu, lagajc laani sustiobnini te gacduxh yälناسа'c xten xtzunsac'ctu. ¹¹ Te si'c ga'ptu lacti yälناسа'c te gac gudeedzatu xhiroob. Luxh xcuent xtzuunnu, meel ni ruxhaltu loj rexpejn Dios sujn gudedduxhrene xquixtios lo Dios. ¹² Sa'csi che racnäjtu rebejtznu, dinu guideed ganaxtis ni rquiinreni, rujnzanu rudeedruren xquixtios lo Dios. ¹³ Che racnäjtu sa'tu si'c, ruluilojtu lacti rusoobtu xtidx Dios si'cni ahuiilajztuni, ni'cni siliä'preni xpala'n Dios xcuent xcälracnäjtu, nalajznu xcuent meel ni badeedtu lojreni, näjza loj guiraareni. ¹⁴ Dxejcti laareni sibedx-siniabzareni lo Dios xcuenttu, sinälazduxhrene la'tu sa'csi runidxduxh Dios xcälracnäjni lojtu. ¹⁵ Xquixtiosi Dios sa'csi baniidxni yälناسа'cduxhtej loonu!

10

Yälrnibee ni rajp Pabl sa'csi najcni apost

¹ Lagajc narä, Pabl, rniabduxhä lojtu, con guiraa didxdoo, guiraa didxsa'c xten Crist, (narä ni nac beñnadolajz che biälä lojtu, niluxh che suga'a zijt lojtu, dxejc nacä beñnialajz). ² Narä canabä lojtu, colguibansa'c te che jiädhuiä lojtu, dina gacä nialajz dizana guiniä redidxnaj ni abenä xhigab guiniä loj gaii bejn nani rniü nabanä si'c te benguedxliuj. ³ Guliicani najcnu benguedxliuj, niluxh dinu gucuanäj sa'nu guiib nani rca' beñ guedxliuj che rcauareni. ⁴ Sa'csi reguiib ni rca'nu te guidilsa'nu direni gac sa' guiib ni rca' beñ guedxliuj. Nuunu rucuaanu con xcälrnibee Dios te riennu gaan loj guiraa rexcälrnibee guedxliujre. ⁵ Ni'cni cagutzujlnu guiraa rexhigabguijdxreni, näjza nani rchaloreni najc xhigabro nani rrlajzreni guiniyajreni yälrumbee Dios, luxh cacä'nu guiralii rexhigabnu cagutednureni ladzñaä Jesucrist te gusoobnu rextidx Jesucrist. ⁶ Cabäätisnu te gunnu yälguxhtis loj chutis bejn ni dini gusoob xtidx Dios, che abasoob guiragajctu xtidx Dios.

⁷ La'tu cahuiitu redzuun ni rien. Palga yu' chu tejtu ni rchaloni najcni xpejn Crist, sugunsa'cni xhigab, fiini xho najc lastooni, dxejcti sugacheepacni sigajcni ahuililajzni xtidx Jesucrist, sigajcza nuure ahuililajzzanuni. ⁸ Sa'csi mase guiliä'pärü xpala'nä xcuent yälrnibee ni rapä, ni baniidx Dios te gustiobä xcälrlilajztu, et te guxhiñädi la'tu, nicla si'c dina guituiä. ⁹ Dina rlazä guchalotu rlazä guchebä la'tu con rexquitzä. ¹⁰ Sa'csi rniireni: "Lo rexquijtzni caj didxnagajn, didxnialajz, niluxh che suga'ni laapacni, xheti xcäl'siudzu'tzni, luxh xho rniaj diidx ni rniini." ¹¹ Luxh ni rii si'c, sugacheepacni dee: si'cni najcnu con rextiidxnu che rucuaanu lojtu che yu'nu zijt, sigajcza najcnu che suganäjpacnu la'tu.

¹² Dinu xhigab najcnu tebloj loj rebejn ni runnarö lagajc laareni. Niluxh reni'c rchaloreni si'c sa'csi ruhuiireni xho najcreni cuä' stee lagajc sa'reni. Che rujnreni si'c, nayääl xcäriejnreni. ¹³ Nuure dinu gunnarotej lagajc nuurnu, niluxh riennu si'cni nungäjjiennu, xcuent yälrnibee ni baniidx Dios loonu te jiennu dzuun cadro yu'litu. ¹⁴ Ni'cni dinu nidedcaj xcälrnibeenu che bio'pnu lojtu, sa'csi baniidx Dios yälrnibee loonu ganiddoo nuunu gusule'nu xtidx Jesucrist lojtu. ¹⁵ Dinu niennaro lagajc nuurnu xcuent xtzuun ste'ca bejn, ascanu lagajc nuunu biennuni. Cabääznu tiobru xcälrlilajztu, te gac jienrunu dzuun lojtu, si'ctis galjiennuni. ¹⁶ Te gacza gusule'nu xtidx Jesucrist ste'ca lajt ni ria'n zijtru lo guejdx cadro yu'tu, na'cza gunnarönu lagajc nuunu xcuent dzuun ni bejn ste'ca bejn.

¹⁷ Sa'csi nani rrlajz gacnaro, suguiilä'pni xpala'n Dad Jesucrist. ¹⁸ Sa'csi et nani rliä'p lagajc xpala'ndini ni ria'n hueen nez loj Dios, niluxh bejn ni rliä'p Jesucrist xpala'nni, ni'cni rbalaznäj Dios.

11

Pabl näjza rebejn ni rniisi najcreni apost

¹ Maläii chanunäsijctu narä laj ni guiniä gaii didxnayäle', niluxh asanunäjtu narä. ² Randzu'ä la'tu con yälrandzu' ni baniidx Dios, sa'csi abia'n diidx gutedä la'tu ladzñaä Jesucrist te xca'ni la'tu. Rlazä gactu beñnaya chäätu lojni, si'c te dxa'p che ruchñaani te bi'n, rut bahualdini. ³ Niluxh rdxebä didi gusguee beñdxab la'tu si'c ni basguee bäl Eva con xcäl'nadxällajzni. Didi gunni guichaa xhigabtu, guibicajtu lo xtidx Jesucrist luxh naj laaca rajnpactu Jesucrist, guideb lastootu. ⁴ Sa'csi la'tu cagutipduxh lajztu che riädniü ste'ca bejn lojtu xtidx stee Jesús nani digac nani bisule'nu lojtu; o che naareni xca'tu stee sprit ni digac nani acua'tu; o che naareni chalilajztu ste'ca diidx nani

najc garenca lo xtidx Dios ni ahuililajztu. ⁵ Narä runä xhigab dina gacä bejn ni guxiiru sajc loj guiraa reapost.

⁶ Mase di gacdi guinisa'cä, xhet yälñajndiza cayädxä; niluxh ni'c huenliisi rlui loj guiraa rediidx ni abaluiä lojtu, guiraa redzuun ni abenä ro'c.

⁷ O ¿la benä te dojl guyu'ä lojtu si'c te beñ nadolajz, te gactu beñroru, sa'csi xhetliidi cua'ädi xcuent ni basule'ä xtidx Dios lojtu? ⁸ Cua'ä meel ni baniidx garenca guidoo loä che guyu'ä lojtu, te benä xtzun Dios lojtu. ⁹ Che guyu'ä lojtu guyu' xhi biquinä, niluxh xhet cua'ädi lojtu, dina nutalä xtzuuuntu. Sa'csi che biääd rebejtznu ni siääd Macedonia, baniidxreni guiraa ni biquinä. Loj guiraa redee dina nutalä xtzuuuntu, luxh si'c sinuu gunä. ¹⁰ Guideb didxlii xten Jesucrist ni yu' neñ lastoä, rñiliä rut sajcdi gudzucaj xcuent xho yuä lojtu, ni'cni care'ch didxroga lo guiraa reguedx Acaya. ¹¹ ¿Xhicuent rniä si'c? ¿Laa sa'csi dina chanälazä la'tu, ä? ¿Xho gacni si'c! ¿Dios anajn lacti sanälazä la'tu! ¹² Niluxh nani rungacä, lagajc ni'c sinuu gunä, te gudxonä renani rlajz gacnaro, renani rlajz naa rebejn najcreni si'cpac najcnu, niluxh direni gac. ¹³ Direni gac apost, laareni rusgueereni, rujnsireni si'c ni najcreni apost xten Jesucrist, luxh rut najcdireni. ¹⁴ Luxh xho dini gac si'c, ni lagajc bendxab ni laa Satanás ruluiloj si'c te xangl Dios ni rdimbicha' te rusgueeni bejn. ¹⁵ Ni'cni na'c guidxelojtu palga näjza rexmos bendxab riääd, rujnsireni si'c bejn ni rujn dzunsa'c, niluxh sintlojreni par tejpas xcuent ni rujnreni.

Rdejð Pabl trabajw sa'csi najcni te apost

¹⁶ Rnisacä lojtu, na'c guntu xhigab yecä cayajc, niluxh palga si'c rujntu xhigab, colgusaanza guiniä si'c te ni rajc yejcnì te guniäza didxro lagajc xcuentä. ¹⁷ Diidx ni rniä dina guiniäni xcuent xcälñrñibee Dios, alga rniäni si'c te ni rajc yejcnì, lala redidxro ni rniä xcuent lagajc narä. ¹⁸ Sa'csi lacti bejn yu' ni rniä didxro xcuent redzuun ni rujnreni lo guedxliujre, sigajcza siniä didxro xcuent lagajc narä. ¹⁹ Ni la'tu, sa'csi nasinduxhtu, sanunäjtu rebejn ni rajc yejcreni. ²⁰ La'tu sanunäjtu chutis ni rñibee lojtu si'c te lam, o rusguee la'tu te rbajnreni xhi xtentu, o rujnni runxlia'tu xtzuuuni o rliä'preni lagajc xpala'reni, o rga'preni lojtu. ²¹ Mase rtuiyä guniäni, dipac niajcdi niniä diidx lojtu te niacä si'c najc rebejnga. Niluxh loj xhitis nani runnaroreni, (canisicä si'c te beñnayääl) narä sajrcu gunnaroä.

²² ¿La najcreni xpejn hebreos? Sigajcza narä. ¿La najcreni xpejn Israel? Sigajcza narä. ¿La najcreni xajg to Abram? Sigajcza narä. ²³ ¿La najcreni xmos Jesucrist? Narä nacäruni lojreni. Naj rniä si'c te bejn ni rajc yejcnì. Abenärü dzuun lojreni, agudijnrreni narä loj ni gudijnreni laareni, abasäurureni narä neñ latzguib, nicla gac guigab bal huält gudijnreni narä; baltiza huält ameer nietä. ²⁴ Gaii huält gudijn rexpejn Israel narä, tejga huält batiäjlrreni duguijd detzä galbitzubigaa huält. ²⁵ Chon huält bahuaajcwreni narä garo't; stee huält bacuaareni guij yecä; chon huält biäaz barcw cadre sa'ä loj nisdoo; teb dxej, teb yääl guyu'ä lo nisdoo. ²⁶ Huaduxhä biaj, lacti bixun riesgw xcuentä lo gueuu, xcuent regubaan, xcuent rebenladxä, xcuentza rebenzajt. Bixunza riesgw neñ reguedxro, näjza nez lo reyubijdz, näjza lo nisdoo, näjza xcuent rebejn ni rusguee, rniisireni najcreni bejtznu lo xtidx Jesucrist. ²⁷ Abenduxhä dzuun, agudedduxhä trabajw, balti yääl dina niesä, balti huält gulanä, biolä, balti huält xheti xhi niauä; agudedäza yälñalduxh; guyu' huält xhetiza xhabä.

²⁸ Luxh xhet loj redeetis rdedä trabajw; guixe-guixee di lastoä cuedxi xcuent yärsia' ni ru'ä xcuent reben guidoo ni huililajz xtidx Dios. ²⁹ Che rdxajg tejtü, näjza narä rdxagä. Palga tejtü riajb lo dojl, narä ruduxhä

yärsia' xcuentni. ³⁰ Palga nanab gunnaröä lagajc narä, sunäni xcuent rediidx nani ruluiloj xcälrdxagä. ³¹ Dios ni najc Xtad Jesucrist, nani riäjil guiliä'p xpala'nni par tejpas, ananchee dina gusgueä la'tu. ³² Che guyu'ä guedx Damasco, gubernadoor nani guyu' ro'c, najcni xpejn reii Aretas, gunibee gojp rexucxhtisni guejdxga te niniaazreni narä te nisäuren i narä neñ latzguuib. ³³ Niluxh basiätjreni narä neñ te dximro nez ro' te padeer ni rdej d gabi guejdxga, te si'c gulaä ladzñaareni.

12

Dios baluiloj lo bacal

¹ Mase riäjil guiniäni, xhet gunädi gaan guiniä didxro lagajc xcuentä ni'cni rlazä chanuu diidx, guiniä xcuent rebacal näjza xcuent nani baluiloj Dios loä. ² Numbä te niguii ni ahuililajz xtidx Jesucrist. Gutzudaj ijz huijni guibaa ni riojnga, dina ganä laa guideb tiejxhni huijni, o la ganax xspritni huij, Diostis najn. ³ Diostis najn la guideb tiejxhni, o ganax xpritni, niluxh nanä xho huij niguiiga, ⁴ guläs Diosni cadro yu'pac Dios, luxh ro'c biejn diajgni didx-xhiga'tz, didxroduxhtej, nani di gacdi guinii beñ guedxliuj. ⁵ Xcuent sa' niguiiga sajz guiniä didxro, didxsa'c, niluxh xcuent lagajc narä, di gacdi guiniäni; siniätis diidx ni ruluiloj xcälrdxagä. ⁶ Mase rlazä guiniä didxro, didxsa'c xcuent lagajc narä, dini gac didxnayääl, sa'csi guliicazani. Niluxh dina guiniäni te di guntu xhigab nacä beñroru loj ni rhuiitu runä o nani riejn diajgtu rniä.

⁷ Baluiloj Dios xhidalduxh cosroduxh loä, niluxh te na'c gacä bennaro, basaan Dios gusloj guyuguijdx tiexhä, si'c te guejch huääz tiexhä, ni baxhalä beñdxab xten Satanäs te gusacsini narä te di gacä te bennaro. ⁸ Chon huält agunabä lo Jesucrist xcuent ni'c, te guibicajni. ⁹ Niluxh laani najni loä: “Yälracnäj ni gunidxä salduxh luj, sa'csi ruzensa'cru xcälmilagwä che xheti yälrutiplajz te bejn.” Ni'cni hueenru guiniä didxro sa'csi xhet yälrutiplazädi rapä, te guzen xcälrnibee Jesucrist lastoä. ¹⁰ Ni'cni rbedxilazä xheti xcälrutiplazä, rbedxizalazä rniyajreni narä, näjza che caquinä guiraloj, nani che rdedä trabajw xcuent Jesucrist, sa'csi che xheti xcälrutiplazä, dxejz runiidx Dios yälndap, yälndaan loä.

Yu' Pablyärsia' xcuent guidoo ni yu' Corinto

¹¹ Agucä si'c te bennayääl, lagajc la'tu bejntu nacä si'c. La'tu riäjil niniitu didxro, didxsa'c xcuentä, sa'csi gajdpac biädxädi, nadxagä loj reapost ni sajzru mase rut nacädi. ¹² Redzuun ni benä laj ni guyu'ä lojtu, benäni si'c te ni najcpac apost, huinuutis benäni guideb nadolajz näjza reseer, näjza remilagw. ¹³ ¿Xhi benä lojtu te naatu runä xhigab guxiiru sajzto loj guiraa reguidoo? Nani benätis najc dee: dina nutalä xtzuuuntu, nalajznu dina niniabä niacnäjtu narä si'c gucnäj narä reguidoo ni yu' garenca lajt. ¡Colsiäjil lajzto narä dojlre!

¹⁴ Naj cayunä xhigab jädhuiätu, naj gacni chon huält siälä. Di quilä xhixtentu, alga lagajc la'tu rguilä. Di rlazä gotalä xtzuuuntu. Di riäjil cuchee rebuiux meel par xcuzajnreni. Reguzajn ni riäjil cuchee meel par rexi'nreni. ¹⁵ Xhet najcdi gunitä guiraa nani rapä, näjza lagajc narä sujiuxä, te laa xaimtu lo dojl. Palga chanälazäru la'tu, ¿la guxiiru chanälajzto narä, ä?

¹⁶ Niluxh mase si'c najcni, di narä nutalä xtzuuuntu. Empac yu'reni canii basgueä la'tu sa'csi nadxällazä. ¹⁷ ¿Xhixh naatu cua'ä xhi xtentu sa'csi baxhalä rebejznu lojtu, ä? ¹⁸ Che baxhalä Tito, rapä lojni chanäni stee bejznu te

jiädhuiireni la'tu. ¿Xhixh cua'ni xhi xtentu, ä? Xhixh et tejsi xhigab biennu, tebloj biennu dzuun guiro'pnu che guyu'nu lojtu.

¹⁹ La'ni cayoltu guiraa rediidxre, cayujntu xhigab canabnu jiäjł lajztu, niluxh xhet si'cdini. Caniinu rediidxre nez loj Dios, caniizanu con xcälracnäjä Jesucrist te si'c tioobrutu lo xtidx Dios, rebetzä nani rinälazä. ²⁰ Sa'csi rdxebä andi che jiädhuiätu fiä ditu gac si'cni rlazä gactu, dxejctiru la'tu suhuiizatu dizana gacä si'cni rlajztu gacä. Rdxebä andi yu'tu ni cadijł, ni ruguij lajzni xhixten sa'ni, ni cadxe'ch lo sa'ni, ni cala' lo sa'ni, ni caniyaj sa'ni, ni cagutajł diidx lo sa'ni; ni cayunnaro lagajc laani, ni cayujnza biejej. ²¹ Rdxebä andi che jiädhuiätu stehuält, gusanxtujy Dios narä xcuenttu. Rdxebäza sonduxhä xcuent xhidajłtu nani abanijt, bejntu dojl galoo, luxh gajdtu gusiechłajztu xcuent xtojłtu. Yu'tu ni di guibannaya, resnäjt bejn ni di gac chäältu, yu'za balti dojl rujntu.

13

Lult yälrlujdx xten Pabl

¹ Naj gac choj huält siädhuiä la'tu. Guira'ti quej nanab cue'creni con xtidx tio'p o choj bejn ni najnpac xhi dojl bejn tejgani. ² Mase ruti narä ro'c, arnixgaä lojtu lagajc diidx ni guniä che guyu'ä lojtu ni barojp biälä lojtu, luxh rniä loj renani abejn dojl, näjza loj guiraaatu, palga jiälsacä, diruna gulaslazätu nicla tejt, ³ sa'csi rlajztu fiipactu la guli runiidx Jesucrist yälrnibee loä te guiniä xtiidxni. Luxh Jesucrist dini guisinsi xcuenttu, niluxh laani rustioobruni xtiidxni neñ lastootu. ⁴ Guliicani che cuajni lo cruzj, gucni si'c te bejn nani casis, niluxh naj nabajni sa'csi rapduxhni xcälrnibee Dios. Näjza nuure rsia'cnu si'c te bejn nani casisnäjä laani niluxh nabañnäjnu laani xcuent xcälrnibee Dios ni baniidxza Dios xcuenttu.

⁵ Colñinäj lastootu lagajc la'tu, colhuii la guliipac ahuililajztu xtidx Dios; colhuisa'c xho najc lastootu. ¿La ditu gachee rbäjz Jesucrist neñ lastootu, ä? Palga rutini, rusqueetu lastootu, ditu nililajztu xtidx Dios. ⁶ Narä rlazä gacheetu, dinu nusguee lastoonu, ahuililajzpacnu xtidx Dios. ⁷ Rniabä loj Dios na'c guntu cosguijdx, xhet te guiniidi bejn didxsa'c xcuentnu, alga te la'tu guntu recossa'c, mase guiniireni et laadi cayunä narä. ⁸ Sa'csi xhetliidi rajcdi riennu te nitloj didxguli, xcälrnibeenu najc te gusule'nu didxlii. ⁹ Ni'cni rbaa lajznu che casisnu, niluxh la'tu nadip, nadaantu; rbejdx-rniabzanu lo Dios guiza' xcälrlilajztu lo xtidx Dios. ¹⁰ Rucuaä reguijtzre lojtu che gajdna jiälä, te che jiälä na'c tilnäätu si'cpacni nungäjł tilnäätu xcuent yälrnibee ni baniidx Dad Jesucrist loä, te gac tioobrutu lo xtidx Dios, xhet te nitditu.

¹¹ Ni'cni rbejtznu, colguibalajz, colhuii guisa' xcälrlilajztu, colcuedcxi lajztu, colyennäj sa'tu tejsi xhigab, dxitis gubajñ. Dios xten yälrinälajz näjza yälrbecdxı lajz chunäj la'tu. ¹² Colñii: "Xchan" lo resa'tu. ¹³ Guiraa rebejtznu nani ahuililajz ruxhalı xtixtios lojtu.

¹⁴ Yälracnäjä xten Dad Jesucrist, näjza yälrinälajz xten Dios, näjza yälracnäjä xten Sprit Dxan chu neñ lastootu. Sugacni si'c.

Te Guijtz Lo Rebeñ Gálatas

Pabl rucuaa guijtz loj reben guidoo nez región Galacia

¹ Narä, Pabl, nacä apost xten Jesucrist. Xhet rebeñdi baxhaļ narä, xhetza beñdi gule narä. Lagajc Jesucrist näjza Xtradni Dios ni yu' xhaguibaa, nani guläs Jesucrist loj rebengut, laareni agulereni narä. ² Narä, näjza guiraa resa'nu nani yunäj narä, rucuaanu guijtzre lo rebeñ guidoo ni yu' nez reguedx Galacia. ³ Xca' guejbtu xcälracnäj Dios con xcälrbexilajz xten Dios xtradnu näjza xten Dad Jesucrist. ⁴ Lagajc laani cuäjbnı gujtıni te guslaani nuure lo dojl xten guedxliuj guijdxre, si'cni gunibee Xtradnu, Gueb-Dios. ⁵ Chä'p xpala'n Dios par tejpas. Sugacni si'c.

Xhetdi xhi stee didxcoob ni sajç guslaa nuure

⁶ Rdxeloduxhä lacti riojb cabälaztu Dios ni gurejdx la'tu con xcälrinälajz Crist, luxh naj cagusoobtu ste'ca diidx. ⁷ Xhetdi stee diidx ni sajç guslaa nuure lo dojl. Yu'reni rlajz gusiejchreni lajztu con ste'ca diidx, rlajzreni guchaareni xtidx Jesucrist. ⁸ Niluxh palga jääd chu jäädliui lojtu ste'ca diidx ni ruslaa bejn lo dojl, niluxh di diidxga gac si'c najç diidx nani abaluiinu lojtu, bejnğa agubibdeni, chutis najcnu, mase naräni, mase te xangl Dios ni jääd xhaguibaali. ⁹ Si'c ni guniä lojtu, si'c rnisacä lojtu naj: Pal yu' chu jäädliui lojtu ste'ca diidx ni ruslaa bejn lo dojl, luxh di diidxga gac si'c najç diidx nani abaluiinu lojtu, bejnğa agubibdeni.

¹⁰ ¿Xhi naatu? ¿La rlazä guinisa'c bejn xcuentä o la rlazä guinisa'c Dios xcuentä, ä? ¿La rlazä guspaä lajz bejn, ä? Paru rlazä guspaä lajz bejn, digacdi gacä xmos Jesucrist.

Xtzun Pabl

¹¹ Colyabee sa'ä, diidx ni ruslaa bejn lo dojl nani abasule'ä lojtu di diidxga gac xhıgab beñ guedxliuj. ¹² Xhet lojdi beñ guedxliujdi cua'äni, rutza baluiidini loä, niluxh lagajc Jesucrist baniidx xtiidxni loä.

¹³ Anajntu xho gucä, xho gubanä galoo che rusobätis rexleii toMoisés. Dxejç basacsıduxhä reben guidoo ni huililajz xtidx Jesucrist, si'c benä te rlazä nitlojreni. ¹⁴ Loj reni rusoob xleii toMoisés narä cagusobäru xtiidxni, nanduxhäru loj guiraareni. Loj rebeñ nani sadxagä ladxä, maazru sanälazä xcostumbr retoxtadgoldöä. ¹⁵ Dios gule narä, guleni narä cheni nuuli xnanä narä, gurejdxni narä sa'csi sanälajzni narä. ¹⁶ Dxejç bibalajz Dios baluilojni Xi'nni Jesucrist loä te guiniä xtiidxni xcuent xho ruslaani bejn lo dojl loj reni di gac xpejn Israel. Che gujç si'c rut lojdi huiye'tzä. ¹⁷ Niclaza nia'ä guedx Jerusalén loj reni ganid gujç apost loä. Alga hua'a nez reguedx Arabia, dxejçti gubisacä guedx Damasco.

¹⁸ Che agudejd si'cti choñ ijz, dxejçru hua'a guedx Jerusalén te biembeä Pedr, dxejç biannääni tzun-gubijdx. ¹⁹ Niluxh dina nuhuiä loj chu stee apost ro'c. Lojtis Jacoob, betzhuin Jesucrist bahuiä. ²⁰ Rniliä nez lo Dios, dina guiniä didx-xhii, rediidx ni cacuaä najç guliipac.

²¹ Dxejçti hua'a reguejdx xten Siria näjza Cilicia. ²² Resa'nu ni yu' neñ xquidoo Crist guideb nez reguedx Judea, direni gumbee narä. ²³ Riejntis diajgreni: “Bejn nani basacsıduxh nuure agujç xchej, abejnğa caguluiini xcuent lagajç xcälirilajz nani galoo rlajzni nunitlojni.” ²⁴ Dxejç rliä'preni xpala'n Dios sa'csi huililazäza xtiidxni.

2

Bidxaag Pabl loj reapost

¹ Che agudejd tzudaj ijz, dxej cru hua'a guedx Jerusalén con Bernabé, nájza Tito huinānu. ² Gunii Dios loá, gunibeeni cha'a ro'c te gusule'á xho huililajz rebejn ni di gac xpejn Israel xtidx xcuent Jesucrist ni ruslaa lo dojl. Niluxh lojits reni rnibee guidoo basule'á diidx, te di xlia'si bená dzuun, o te di xlia'si gunāru dzuun. ³ Sanāá Tito, te bejn griegw ni di gac xpejn Israel. Nicla lojni direni niáj b chuni bee si'c caj lo leii xten Moisés. ⁴ Niluxh gaii bejn ni rujnsi si'cni najcreni sa'nu, bidxaagreni loonu te gula'tzreni xho rajnnu Dios. Rdxechreni sa'csi nuunu, rexpejn Jesucrist, dinu jienru si'c ni bejn retoxtadgoldoonu. Laareni rlaizreni guxhiidreni nurnu, rlaizreni gusoobnu rextiidxreni. ⁵ Dipacnu nicáj b nucuadiajgnu xtiidxreni, sa'csi rlaaznu chanuu chalilajztu xtidx Jesucrist nani ruslaa bejn lo dojl.

⁶ Niluxh reni sajc, nalajznu reni rnibee reben guidoo ro'c, xhet te didx-coobdi guniireni loá. (Luxh par nará xhet najcdi mase bensajcreni, sa'csi Dios runtebloj guiraa bejn.) ⁷ Luxh bahuiireni abaniidx Dios xtidx Jesucrist loá, luxh rusule'áni loj rebenzijt te guibicaj xtojlni, sigajcni rusule' Pedr xtidx Jesucrist loj rexpen Israel nani rujnpac si'c ni caj lo leii. ⁸ Lagajc Dios nani badeed bejn Pedr dzuun xte apost loj rexpen Israel, lagajcza Diosre baniidx guná dzuun, te gacá apost loj rebenzijt nani di gac xpejn Israel.

⁹ Ni'cni Jacob, Pedr, nájza Juan nani najc bejrroru nejn guidoo xten Jesucrist, gucbeereni laa Dios ni cayacnáj nará. Dxejc baniidxreni naareni loá náj lo Bernabé si'c te seen rbalajzreni, te chonnu guiro'pnu loj rebenzijt. Niluxh laareni chanuureni gusule'reni loj rexpen Israel. ¹⁰ Gunabtisreni loonu gacnájnu rebejn ni xhet rajpdi, luxh ni'cza rlažá guná.

Pabl gudilnáj Pedr lo guedx Antioquia

¹¹ Che biáad Pedr lo guedx Antioquia, gudilnāni, sa'csi abejnni dojl xhet laadi cayujnni. ¹² Galoo gudaunájni rebenzijt, luxh che bidzujn gaii xpejn Israel ni baxhal Jacob, dxejcti gubicajni lo rebenzijt, diruni niaunájreni sa'csi bidxejbni rexpejn Israel ni ru' bee ni bidzujn ro'c. ¹³ Dxejcti sigajcza bejn guiraa rexpejn Israel ni nadxaag Pedr, gujcreni sigajc Pedr, runtio'p lajzreni, naareni gusueereni. Nájli Bernabé bejn si'c. ¹⁴ Luxh che bahuiá direni gun si'cpacni najc xtidx Jesucrist, dxejc rapá loj Pedr nez loj guiraa reben guidoo: "Palga luj najclu te xpejn Israel, luxh nabajnlú si'c rebenzijt ni digac xpejn Israel, xhet si'cdi ni caj loj leii, ¿xhicuent rlaizlu guinibeelu guibajn rebenzijt si'c rexpejn Israel nani rusooob xleii to Moisés?"

Nungāj l chalilajz rexpejn Israel, sigajc guiraa bejn, te guibicaj xtojlni

¹⁵ Nuure najcnu rexpejn Israel cheni gojllinu; dinu gac bendojl si'c najc rebenzijt. ¹⁶ Anadonnu rut chu tejtí bejn sajc guibicaj xtojlni che gunni si'cni caj lo leii, sa'csi nanab chalilajznu xtidx Jesucrist. Ni'cni biolilaaznu xtidx Jesucrist te jia xtojlnu sa'csi rililajznu, xhet sa'csi riennu si'cni caj loj leii. Di gacdi jia xtojlni bejn xcuent yálrusoob xleii to Moisés.

¹⁷ Palga la l ni rlaiznu jia xtojlnu xcuent xcálrililajz xtidx Jesucrist, ruhuiinu cayenrunu dojl, la sajc guiniinu: Jesucrist ruluii rienrunu dojl, ¿á? ¿xho gacni si'c! ¹⁸ Palga rlažá guncacá redzuun nani abarō'ná, lagajc nará rapá dojl nacá bejn dojl. ¹⁹ Niluxh xcuent leii, anacá si'c bengut: digacdiru guinibee leii nará sa'csi naj nabaná lo xnejz Dios. Luxh lagajc leii bejn nacá si'c bengut che gucbeá di gacdi gusobá guiraa ni caj lo leii. ²⁰ Najcni si'cni gutnāá Crist lo cruz. Naj xhet narádi ni nabaná, laa Crist ni nabajn nejn lastoá. Yálnabajn

ni nabañá ñaj lo guedxliujre nabañá sa'csi rililazä xtidx Xi'n Dios nani rinälajz narä luxh gujtni te gudijxni xtolä. ²¹ Dina cuälazä xcäl'rusalajz Dios. Paru sajc gudzucaj leii xtojl bejn te gacreni beñnaya nez loj Dios, dxejc xlia'si gujt Jesucrist.

3

Yäl'rililajz rusia dojl

¹ ¿Chipsa nayäältu beñ Galacia! ¿Chu bascäyitu te di cuadiajgtu xtidx Jesucrist? Ni nez lojpacu bisule'nu diidx xho cuaj Jesucrist lo cruzj. ² Tejtis diidx rlazä guiniitu loä. ¿La cua'tu Sprit Dxi'an xten Dios sa'csi bejntu si'cni caj lo leii, ä? o ¿la sa'csi huililajztu diidx ni biejn diajgtu? ³ Chipsa nayäältu. Acua'tu Sprit Dxi'an xten Dios dxejcti ñaj rrajztu guntu ni riajbts yejctu guntu. ⁴ ¿La xlia'si gudejdtu trabajw? Chugan la gulii xlia'sini. ⁵ Che runiidx Dios Sprit Dxi'an xtenni lojtu, che rujnni milaagwr nez lojtu, ¿xho rujnnini? Dini gunni sa'csi rujntu si'cni caj lo leii, rujnnini sa'csi rililajztu xtiidxni ni riejn diajgtu.

⁶ Huililajz toxtadgoldoonu Abram xtidx Dios, ni'cni cua' Diosni si'c te bejn nani naya lastooni. ⁷ Ni'cni colyabee dee: renani rililajz xtiidx Dios najc xi'n toAbram. ⁸ Galooli najn Dios xcuent yäl'rililajz susia Dios lastoo rebenzajt, ni'c räjpni lo Abram: “Guiralii reben guedxliuj sacle' xcuentlu.” Diidxre cuaj lo guijt ni gujc galooli, cadro caj xtidx Dios. ⁹ Ni'cni reni rililajz ñaj agucnä Diosreni sigajc gucnäjni toAbram nani huililajz.

¹⁰ Guiraa reni rrajz guibajñreni gunreni si'cni caj lo leii, agubibdereni sa'csi scree caj lo leii: “Guiraa reni digunpac si'cni caj lo reguijtz xten leii, sucuibdereni.” ¹¹ Niluxh huenliisi rien rut nayadi nez loj Dios xcuent leii, sa'csi dee najc xtidx Dios: palga rililajz te bejn xtidx Dios, najcni te bennaya nez lo Dios, nabannäjni Dios xcuent xcäl'rililajzni. ¹² Leii dini naa chalilajz bejn te xca'ni yäl'nabajñ. Scree caj lo leii: “Nani gunpac si'cni caj loj reguijtz xten leii, ni'c nanab guibajñ lojpac leiiga.”

¹³ Jesucrist badzucaj nuure loj yäl'rbibde xten leii. Laani gubibdeni xcuentnu sa'csi xtidx Dios naj: “Anabibde te bejn ni najl loj te yajg.” ¹⁴ Scree gusajc Jesucrist te gusojb diidx ni räjp Dios loj toAbram, sacnäjni guiraa rebenzajt; näja te guiraanu ni chalilajznu xtidx Jesucrist xca'nu Sprit Dxi'an xten Dios.

Leii näj diidx ni bia'n Dios loj toAbram

¹⁵ Betzä, ñaj gusä'tä te diidx xcuent beñ guedxliuj. Cheni rujn bejn te guijt te jia'n diidx lo stee bejn, mase bejntis najczeni, che abacuaani lajni lo guijtza, rut sajcdi gudzucaj guijtza. Rutza sajcdi gucuaaru diidx lojni che anajcni. ¹⁶ Luxh anajnnu badeed Dios xtiidxni loj toAbram näja loj xagdooni. Dini ninii “rexagdooni” si'c loj xhidajlreni, guniini lo tejtis xagdooni, luxh laani najc Jesucrist. ¹⁷ Diidx ni rlazä guiniä najc scree: Diidx nani bia'npac Dios loj toAbram gunii Diosni che cayäädx tajp gayuu galbitzuu ijz gudeedni leii lo Moisés te laani gudeednini loj rexpejn Israel. Niluxh di leiiga nuchaa diidx ni bia'n Dios loj toAbram, laltis sajcdi. ¹⁸ Paru naquini leii te xca' bejn erens, dxejc xhet erensdi cua' Abram lo Dios. Niluxh basa'n Dios erens lojpac Abram sa'csi bia'nni diidx lojni galooli.

¹⁹ ¿Xhicuent badeed Dios leii loj Moisés? Badeed Dios leii sa'csi benduxh rexpejn Israel dojl, te gacbeereni xho najc xtojlreni, lañ ni jääd nani najc xagdo toAbram. Sa'csi bia'n Dios diidx con laani sigajc con toAbram.

Rexangl Dios badeed leii loj toMoisés, te laani gujc si'c te bejn ni rusiäjł diidx. ²⁰ Te ni rusiäjł diidx xhet par tejtis bejn di najcni, niluxh Dios tejtis najc.

Xcuent leii

²¹ ¿La garenca najc xleii Moisés lo diidx ni basa'n Dios loj toAbram, ä? ¿Xho gacni si'c! Paru nica'nu te leii ni rajc rudeed yäl'nabajn, dxejc sii xcuent leüiga nica' bejn yäl'nabannaya. ²² Niluxh loj reguijtz xten Dios caj diidx ni rni: Guiraa bejn niäuu nen dojl, te reni chalilajz xtidx Dios si'c huililajz toAbram, reni'c xca' xcäl'rililajz diidx xcuent Jesucrist si'cni bia'n Dios diidx loj toAbram.

²³ Che gajd xcäl'rililajz xcuent Jesucrist jääd, dxejc basäuu leii nuure nen dojl, cabäjtisnu guiricaj xcäl'rililajz xcuent xtidx Dios. ²⁴ Ni'cni anajc leii si'c xmastrnu te guluiini nuure nezyuj nez lo Dad Jesucrist te gusiani xtojłnu con yäl'rililajz xtiidxni. ²⁵ Niluxh naj sa'csi arajpnu yäl'rililajz xcuent xtiidxni, dirunu guiquiin te mast, nalajznu leii.

²⁶ Guiraatu najctu xi'n Dios xcuent yäl'rililajz xtidx Jesucrist, ²⁷ sa'csi guiraatu ni gurobnistu loj xtidx Jesucrist, najctu rexpejn Jesucrist. ²⁸ Naj rutiru rexpejn Israel niclaza rebenzjt, niclaza mos, niclaza bejntis, niclaza niguii, niclaza gunaa, sa'csi guiraanu najcnu tebloj nez lo Jesucrist. ²⁹ Palga najcnu xpejn Jesucrist, dxejc guliipac najcnu xi'n toAbram, dxejc sica'nu yäl'nasa'c ni abia'n diidx gudeed Dios loj Abram.

4

¹ Mbaj naj. Nani xca' yäl'nasa'c, che najcni biuux, najcni sigajc te mos, mase xtenni gac guiraa xhixten xtadni. ² Yu' chu te bejn ruhuiini, yu'za chu rnibee xhixtenni cheni agurooblını, cheni guidzujn dxej xca'ni ni gudeed xtadni. ³ Sigajcza nuure che gucnu si'c biuux guyu'nu gucnu mos loj releii, rnibeeni xhini'c digacdi jiennu lo guedxliuj. ⁴ Niluxh che bisa' dxej ni basoob Dios, baxhal Dios Xi'npacni. Xi'n te gunaa gojłni, loj rexpejn Israelza biädjijłni, basoobni leii xten toMoisés. ⁵ Si'c gujc te xcasacni reni rusoobpac leii, te xca'ni nuure gacnu si'c te xpisiäjłni.

⁶ Luxh sa'csi anajctu xi'nni, ni'c baxhal Dios Sprit xten Xi'nni te cuääzni nen lastoonu. Laani rniini lo Dios xcuentnu: "Guejblu, Xtadnu." ⁷ Ni'c dirunu gac mos, sa'csi anajcnu xi'nni. Luxh palga najcnu xi'nni, suniidxza Dios yäl'nasa'c loonu xcuent Dad Jesucrist.

Rulijdxni na'c gacsac bejn mos

⁸ Che gajdte gumbee Dios najctu mos xten rebanäjł ni rajntu si'c Dios luxh dipacreni gac Dios. ⁹ Luxh naj anumbeetu Dios o naj anumbee Dios la'tu, xho chachusactu loj redzuun ni guyu'tu galoo che gujctu mos xten rebanäjł. ¹⁰ Cayutistu redxej, rebäii, retiemp, reijz. ¹¹ Naj rdxebä andi xlia'si gudedä trabajw baluiätu.

¹² Rniabduxhä lojtu betzä, colyajc si'c narä, sa'csi narä ahuililazä xtidx Jesucrist sigajc la'tu. Xhetza xhi dzunguijdxdi bejntu loä che guyu'ä lojtu. ¹³ La'tu anajntu galoo che basule'ä diidx xcuent Jesucrist lojtu, benäni sa'csi racxhuu tiexhä. ¹⁴ Dizatu nuzé' niclaza nibälajztu narä xcuent yäl'racxhuu ni rajc tiexhä, alga si'c te xangl Dios, si'c lagajc Jesucrist cua'tu narä. ¹⁵ ¿Con yäl'balajz xtentu ni gojptu dxejc? Niluxh rniä lojtu, paru niajc nibäätu balojtu, nuniidxtuni loä dxejc, si'c niujntu. ¹⁶ Naj ¿la rdxe'chtu loä sa'csi caniä dixlii lojtu, ä?

¹⁷ Naj yu' gaii bejn nani rujnsi si'cni sanäreni leii rujnsireni si'cni rinälajzreni la'tu. Niluxh rlajzreni gudzucajreni la'tu te gusaantu xtidxä, te

chanajltu laareni, te jiutu xtiidxreni. ¹⁸ Laaca chanälajz bejn sa'ni, niluxh na'c gusgueeni, na'cza che suganääsi la'tu chanälajztu narä. ¹⁹ Rexi'nä, xcuent la'tu cadedä trabajwduxh si'c te gunaa ni rajl xpäzni, luxh sinuu sidedä trabajw cheni arbäzpacli Jesucrist nen lastootu. ²⁰ Maläii gac jlälä lojtu lagajc naj te gac guiniä xhi stee diidx. Niluxh naj zijt yu'ä, dina gacbeä xhi xhigab gunä xcuenttu.

Diidx xcuent Agar näj Sara

²¹ Colguinii loä, la'tu ni rlaiz gun si'cni caj lo leii, ¿la ditu gacbee, la di diajgtu jiejn xhini'c caj lo leii, ä? ²² ¡Coljiejn! Scree caj loj leii: guyu' tio'p xi'n toAbram. Tejni najc xi'n gunaa ni najc xmos Sara. Steeni najc xi'n chäälpacni. ²³ Niluxh xi'n xmosni gojl sa'csi lagajc laani bejnni xhigab si'c chu xi'nni. Luxh xi'n chäälpacni gojl sa'csi si'c bia'n Dios diidx loj Abram. ²⁴ Diidx xcuent regunaare najc si'c diidx ni ruluii. Regunaare najc si'c tio'p diidx ni bia'n Dios. Agar najc mos, mosga najc si'c diidx ni bia'n Dios con Moisés lo dan Sinaí. Rexi'n mosga guyu' te gacreni mos lo leii. ²⁵ Agar najc si'c dan Sinaí nez lo reguejdx xten Arabia. Luxh guedx Jerusalén najc si'c dan Sinaí, sa'csi naj ro'c najc cadre re' rexpən Israel con rexi'nreni, sanäreni leii. ²⁶ Niluxh di guedx Jerusalén ni yu' guibaa gac si'c mos, luxh nuurnu najcnu xi'nni. ²⁷ Scree caj loj xtidx Dios: Bibalajz, luj gunaa ni gajd xi'nlu chu, guredxa', bibalajz, luj ni gajdlu ted trabajw ni rdejd gunaa che rajl xi'nni. Sa'csi su'ru xi'n gunaa nani gulälajz chäälni quela xi'n gunaa ni gudiesnä j chääl stee gunaaga.

²⁸ Mbaj naj, rebetzä, nuure, sigajc Isaac, najcnu xi'n toAbram nani chu si'cni bia'n Dios diidx loj toAbram. ²⁹ Che gojl xi'n gunaa ni najc mos, ni gojl sa'csi lagajc laani bejn xhigabga, bidxagdijlni xi'n chäälpac Abram nani gojl xcuenti diidx ni bia'n Dios loj Abram. Sigajcza najcni naj. ³⁰ ¿Xhi caj lo reguijtz? “Barilaagw gunamos näj xi'nni, te di xca' xi'n gunamos yäl'nasa'c xtenlu si'c ni xca' xi'n gunaa nani najc chäälpacu.” ³¹ Naj nuure, betzä, dinu gac si'c xi'n gunamos te chunu lo leii. Nuurnu najcnu si'c xi'n gunaa nani najc chäälpac toAbram.

5

Colguzutijp lajztu lo yäl'rililajz xtidx Dios

¹ Colguzutijp lajztu lo xtidx Dios nani baniidx Jesucrist loonu sa'csi guli-pac gulää Jesucrist nuure ladz'naa leii, badzucajni xtojlnu che huililajznu xtiidxni, ni'cni na'cru gusiejch lajztu te gacsactu mos ladz'naa leii.

² Narä Pabl rniä lojtu, palga la'tu chutu bee si'cni caj lo leii, dxejc xlia'si chalilajztu xtidx Jesucrist. ³ Rniäza stehuält, guiraa bejn nani rlaizpac chu bee, nanab gunni si'cpac ni caj lo leii. ⁴ Palga rlaiztu guntu redzuun ni caj lo leii te guibicaj xtojltu, dxejc agubicajtu lo Jesucrist, agubicajzatu lo xcäl'racnä j Dios. ⁵ Niluxh nuure xcuentpac Sprit Dxan xten Dios rililajznu gudijx Jesucrist xtojlnu lo cruzj, cayenloonu jädsacni te guniidxni yäl'ba'nsa'c par tejpas loonu. ⁶ Sa'csi loj reni rililajz xtidx Jesucrist xhet sajcdi chu bejn bee, xhetza sajcdi na'c chu bejn bee, nani sajc najc chalilajz bejn xtidx Dios. Yäl'rililajzga rujn guiba'nsa'cnu te chonälajznu resa'nu.

⁷ La'tu laaca sasajtu. ¿Chu badxojn gusoobtu xtidxlii Dios? ⁸ Xhet Diosdi ni guletu badxojnditu. ⁹ Anajntu tudxe'nsi cobgulaj rusaguijni yätxtiil; si'c te cobgulajga najc te niguii ni caguluiitu xtidx leii. ¹⁰ Rialilazä xtidx Dad

Jesucrist, ni'c nadiplazä la'tu; ananá ditu chalilajz stee diidx. Niluxh bejn ni cagusgueetu susacsí Diosni, chutis najcni.

¹¹ Narä rebetzä, paru narä caguluiä chutu bee, si'c ruluu rexpejn Israel, çxhi xcuent rusacsí rexpejn Israel narä? Paru si'c caguluiä, dirutu chalilajz gudijx Jesucrist xtojñu lo cruzj. Luxh si'cpacza rlanjreni. ¹² Rebejn nani cagusgueetu caniireni chutu bee, imalaiiza gutiuugreni tejpas lagajc tiejxhreni!

¹³ La'tu rebetzä, agurejdx Diostu loj xtiidxni te chalilajztu Jesucrist ni ruslaa bejn lo dojl. Colhuixgaa na'c xca'tistu rediidxga dxejcti guntu si'ctis ni rlanj tiejxhtu, si'ctis ni riabza yejctu. Colgacnäj sa'tu con yälrinälajz, tejni sigajc steeni. ¹⁴ Sa'csi guiraa diidx ni caj lo leii con tejtis diidxre rsiojbni: "Chanälajztu sa'tu sigajc rinälajztu lagajc la'tu." ¹⁵ Palga rdijltu, rauya'tu sa'tu, rajwtu sa'tu, jcolnatiro! Andi lagajc la'tu gunijttu sa'tu.

Nani rchaglazj rebejn näj yälñabajn ni rudeed xtidx Dios

¹⁶ Rniä lojtu, colguibajn si'c ruluu xtidx Dios näjza Sprit Dxan xtenni, te si'c na'c guibajntu si'ctis ni rlanj tiejxhtu, si'c ni najctis xhigabtu. ¹⁷ Sa'csi ni najc xhigab xten bejn rdxe'ch loj xhigab Sprit Dxan xten Dios. Sigajcza xhigab xten Dios dini gac tebloj con xhigab xte bejn. Rudxojntu loj sa'tu, ni'cni digacdi guntu dzuun ni rlanjtu guntu. ¹⁸ Luxh palga cagulijdx Sprit Dxan la'tu, dxejc dirutu quiquiin guntu si'c ni caj lo leii.

¹⁹ Guyasi jiembee bejn xhireni'c najc redzuun ni rujn rebejn nani di gumbee xtidx Dios. Dee najc redzuunga: yälrusguee chääl bejn, yälrusguee chääl sa'reni, yälrusguee sa'ni che ruchaag sa' te dxa'p con te bi'n loj redolguijdx, guiraa redolguijdx ni rujn niguii con gunaa, ²⁰ yälrajñ rebanäjbb, yälbidxaa ni rujn daan bejn, yälrdxechlajz loj sa'ni, yälrchagdijl sa'ni, yälñayedx lo sa'ni, yälrdxecha', yälriu lagajctis laani, yälrlia' lo sa'ni, yälrchaag lo te cuaa bejn. Najza sa' dzunguijdxre rujnreni: ²¹ yälrdxe'ch lajz, yälrugut sa'ni, yälrsiojz, yälrauxha't, näjza guiraa dojl sa' redee. Sigajc ni balidxä la'tu xhi dxejga rulidxä la'tu naj. Nani rujn sa' redojlre direni jiu' loj xcälñibee Dios xhaguibaa.

²² Niluxh xtzuum Sprit Dxan xten Dios najc yälrinälajz sa'ni, yälrbalajz lastooni, yälrbexdi lajzni, yälrbecdx i lajz sa'ni, yälñajc beñsa'c lo chutis bejn, yälñagodzljajz, yälrlililajz, ²³ yälñadolajz, yälñibee lastooni lo ni rlanj gun tiejxhni. Xheti te leii ni rudxojn gun bejn sa' redzuunre. ²⁴ Niluxh renani ahuililajz xtidx Jesucrist, abatioñreni guiraa redolguijdx ni rlanj gun tiejxhreni. ²⁵ Palga rbäjz Sprit Dxan nen lastoonu, do'o guibajn si'c rñibee Sprit Dxan guibajntu.

²⁶ Na'c guiliä'pnu lagajc xpala'nnu, na'c guidxech lajznu lo sa'nu, na'c gunembiidnu sa'nu.

6

Colgacnäj sa'tu

¹ Sa'ä, palga chu tejtu ni abiajb nen dojl, lagajc la'tu nani aracheetu xtidx Dios colgulijdx bejnga, colgacnäjni te guiriini nen dojl. Colñii lojni nadolajz, nasinälajztu lagajc la'tu didi che guidon nägajcza la'tu jiajbtu nen dojl. ² Colhuui xhi rquiin resa'tu, colgacnäjreni te si'c gusoobtu guiraa rediidx ni najc leii xten Jesucrist.

³ Sa'csi nani rujn xhigab sacduxhni, yu'za chu najcni, niluxh rut najcdini, rusgueeni lagajcsi laani. ⁴ Tejgatu colcubee xho najc xtzuumtu te fiitu la laaca najcni, dxejcti sajç guiliä'ptu lagajc xpala'ntu. Dxejc ditu quiquiin chu

stee bejn guiliä'p xpala'ntu. ⁵ Sa'csi tejga bejn susule'ni diidx lo Dios xhini'c bejni.

⁶ Nani casieed xtidx Dios nanab gacnä j bejn nani ruluiini, gudeedni tudxe'n xhixtenni loj nani ruluiini.

⁷ Na'c gusgueelu lagajc luj. Dios digacdi guigueeni, ni'c guira'ti dzuun ni rujn bejn lagajca ni'c xca' bejn. ⁸ Paru te bejn gun dzuun xcuenttis tiejxhni, dxejc che guidzujñ dxej xca'ni yálnasa'c, sinitloj tiejxhni, dizani jiu' loj xcälrmibee Dios. Palga te bejn gun dzuun xcuent Sprit ni badeed Dios lojni, che gal yálnasa'c, sica'ni yálnabajñ par tejpas. ⁹ Ni'cni na'c guidxajgnu jiennu dzunsa'c te che guidzujñ dxej ni xca'ni yálnasa'c, xca'zanu te yálnasa'cro. ¹⁰ Ni'cni nanab la l ni sajci, gacnä jnu chutis bejn, ganiddoo resa'nu ni ahuililajz.

Yälrulijdx näjza xtixtios

¹¹ Colhuilaa lacti reletrduxh cacuaä lojtu con naäpac. ¹² Guiraa reni rdxagajz gun ni rlajztis tiejxhni, laa reni'c ni rlajz chutu bee, tedi tedreni trabajw xcuent ni cuaj Jesucrist lo cruiz. ¹³ Lagajc reni ru' bee direni gun si'cni caj lo leii, niluxh rlajzreni chutu bee te guibaa lajzreni sa'csi bejnreni gaan guyu' beega tiejxhtu. ¹⁴ Luxh narä dilazä guibaa lo sa' recosga; rbaatis lazä sa'csi gujt Jesucrist, cuajni lo cruiz, te gudijxni rextoljnu. Ni'cni par narä xhetru xhi cos-guijdxdi yu' lo guedxliujre, diruna guichaglazä gunä redolguijdx xten guedxliujre. ¹⁵ Che ahuililajz te bejn xtidx Jesucrist, xhetru sajcdi chu bejn bee, xhetza sajcdi na'c chu bejn bee. Nani sajctis najc gacni si'c te beñcoob lo xtidx Jesucrist. ¹⁶ Guiraa renani nabajñ si'cni ruluii xtidx Jesucrist sibedxi lajzreni xcuent xcäl rulaslajz Dios. Näjza rexpən Israel nani ahuililajz xtidx Jesucrist sibedxi lajzreni.

¹⁷ Na'cru guche'chtu narä sa'csi redib ni yu' tiexhä najc si'c te seen narä anacä te xmos Jesucrist.

¹⁸ Rebetzä, gacnä j Dad Jesucrist guiragajctu con Sprit Dxan xtenni. Sugacni si'c.

Te Guijtz Lo Rebeņ Efesios

Bacuaa Pabl lo rebeņ guidoo neņ guedx Ēfeso

¹ Narā, Pabl, nacā apost xten Jesucrist sa'csi si'c rļajz Dios. Cacuaā guijtzre loj rebeņ nani huililajz xtiidxni, loj reni rujn si'cpac rniini neņ guedx Ēfeso. ² Xca'tu yālračnāj, yālredexi ļajz xten Xtadnu Dios, nājza xten Dad Jesucrist.

Rusule' Pabl xtidx Jesucrist

³ Rliā'pnu xpala'n Dios, Dad nāj Xtad Jesucrist. Dios racnāj nuure, xcuent Crist runiidxni guiraa reyālračnāj xca' lastoonu, astoo yu'lanu xhaguibaa. ⁴ Laani gule nuure, che gajdli guirixtiej guedxliujre, te gacnu xpejņni, te guibaņnayanu nez lojni con yālriņāļajz. ⁵ Sigajcza anungājļ xca'ni nuure te gacnu si'c xi'npacni sa'csi abiāād Jesucrist te guslaani nuure neņ doļļ, si'c ni gunibee Dios sa'csi balaslajzni nuure. ⁶ Gucnāj Dios nuure te guiliā'pnu xpala'n Dios, sa'csi lagajc laani acua'ni nuure, abejņni nuure tejsi con xi'ņni ni sanāļajzni. ⁷ Laani baslaani nuure neņ doļļ xcuent xtiejņni, laani badzucajni xtoļļnu xcuent xcālruslasļajzni ⁸ nani banidxduxhni loonu. Guideb yālņajņ, guideb xcāriejņ ⁹ basule'ni loonu xhigab xhiga'tzni xcuent redzuun ni rļajzni gunni, xhigabza ni bejņni galooli. ¹⁰ Luxh sidzujņ dxej sisiojbpac xhigab ni bejņ Dios. Che guidzujņ dxejga sutojļp Dios guiraali, sudeedni guinibee Jesucrist guira'ti ni yu' xhaguibaa, sigajc recos ni yu' lo guedxliuj.

¹¹ Arajpnu te xcālņasa'c Jesucrist, sa'csi galooli bejņ Dios xhigab guniidxni yālņasa'cga. Lagajc Dios benchee guira'ti ni yu', luxh rujņpacni nani abejņni xhigab najc laaca gunni ¹² te guiliā'p bejņ xpala'n xcālriņibeeni xcuentnu, nani ganidoo biolilaaznu xtidx Jesucrist. ¹³ Nājza la'tu, che bejņ diajgtu redidx gulii, rediidx ni ruslaa bejņ lo doļļ, dxejč huililajztu xtidx Jesucrist, dxejč gujczatu tejsi con laani. Dxejč cua'tu Sprit Dxan xten Dios, ni'c najc si'c seen ahuililajztu, si'cni bia'n Dios diidx. ¹⁴ Baniidx Dios Sprit Dxan xtenni te cuāāzni neņ lastoonu, te ni'c najc seen xca'nu yālņasa'c nani guniidx Dios che abaluuxni xtzuunni, nalajznu guslaani guiraa rexpejņni te guiliā'preni xpala'ņni lo xcālriņibeeni.

Rniab Pabl gudeed Dios yālņajņ loj renani ahuililajz

¹⁵ Ni'cni nājza narā, sa'csi abiejņ diaģā xho rililajztu xtidx Dad Jesucrist nājza xho sanāļajztu guiraa rexpejņ Jesucrist, ¹⁶ dina gusaņā gudedā xquixtios lo Dios xcuent la'tu. Rnaduxh lazā la'tu che rniabā lo Dios. ¹⁷ Rniabā lo Xtios Dad Jesucrist, xtadni ni riņabee xhaguibaa, guniidxni lojtu te yālņanduxh, te yālrluiloļj recos xhiga'tz te gacbeduxhrutu xcuent Gueb Dios. ¹⁸ Rniabāza lo Dios jianij xcāriejņtu te gacbeetu xhini'c najc speranz xten yālračredjdxtu lo xtiidxni, te gacbeetu lacti saru, lacti sajc yālņasa'c ni gudeed Dios lo Jesucrist nājza loj rexpejņni, ¹⁹ te gacbeezatu lacti gurobduxh najc yālriņabee nani rajņni nez loonu nani ahuililajz xtiidxni. Guiraa redee ruluii lacti nadip najc yālriņabee xten Dios. ²⁰ Lagajc yālriņabee bejņ dzuun par Jesucrist. Con yālriņabee baspajņ Dios Jesucrist lo rebengut, te gurejņi xladbee Dios cadro riņibeeni xhaguibaa. ²¹ Maazru sajņi lo chutis gubier, lo chutis yālriņabee, lo xhitis yālņadip, lo chutis ni riņabee; maazru sajņi lo chutis nani abibee te guinibee, sigajc naj, sigajc neņ redxej ni churu jāād. ²² Niluxh badeed Dios guira'tini ladzņaa Jesucrist, laazani bejņ bibee

Jesucrist gunibeeni lo guiraa xhixten xquidooni. ²³ Reben guidoore najc si'c tiejxh xten Jesucrist, luxh sigajc ruedeed Dios guiralii loj Jesucrist, sigajcza ruedeed Jesucrist guiralii loj rebejn ni najc xquidooni.

2

Ruslaa Dios nurnu sa'csi rinälajzni nurnu

¹ Laani baniidxni yäl'nabajn lojtu che najctu si'c bengut nez loj Dios sa'csi rujntu dojl. ² Galoo gubajntu lo dojl, entis lo xnez guedxliujre guzajtu, biutu xtidx bendxab nani rnibee guedxliujre. Sprit xteni rujn dzuun nen lastoo rexi'nni nani di gucuadiajg xtidx Dios. ³ Luxh galoo, naj nuure nadxaagnu lojreni, biennu si'c ni rlajz tiejxhnu. Dxejc biennu si'ctisni rlajz tiejxhnu, si'ctisni biajb xhigabnu. Nungäj'l guidxe'ch Dios loonu, sigajc bidxe'chni loj guiraa reben guedxliuj. ⁴ Niluxh balaslajz Dios nuure. Con xcäl'sanälazduxhni huinäälajzni nuure. ⁵ Mase anajcnu bengut lo dojl, laani baniidxni yäl'nabajn loonu. Rajpnu yäl'nabajnre con Jesucrist. Sa'csi balaslajzni nuure baslaani nuure nen dojl. ⁶ Baspañsacni nuure con Jesucrist; sigajcza bejnni cuenäjnu Jesucrist xhaguibaa, ⁷ te nen redxej ni churu jääd, guluulojni lacti sajx xcäl'nasa'c xten yäl'rulasajzni, ni'c sanälajzni nuure, najcni huenduxh loonu por Jesucrist. ⁸ Sa'csi rulasajz Dios nuure, ni'c baslaani nuure nen dojl che huililajznu xtiidxni. Luxh et sa'csi yu' xhi biennu; dee najc nani banidx-xlia' Dios loonu. ⁹ Xhet xcuent xhi dzunsa'c di biennu, te di chu tejtü gac nayedxlajzdi. ¹⁰ Dios najc ni benchee nuure. Sigajcza con Jesucrist bejnni gacnu bejn ni rujn dzunsa'c nani galooli agunibee Dios jienpacnu.

Yäl'rbedxilajz ni rajpnu por Jesucrist

¹¹ Ni'c col'snaj lajztu xho gujctu galoo. Ditu ni ajc rexpejn Israel. Rniireni la'tu 'benzajt' sa'csi ditu chu bee si'c ru' rexpejn Israel. Sa'csi lagajc con naareni rusäl'reni bee. ¹² Dxejc suga'tu ditu gumbee Jesucrist. Zijt yu'tu loj rexpejn Israel, najctu benzajt. Ni'la gumbeetu rediidx ni bia'n Dios loj rexpejn Israel. Ditu niunloj guslaa Dios la'tu lo dojl, dizatu niembee Gueb Dios lo guedxliujre. ¹³ Niluxh naj ayu'tu lo Jesucrist, la'tu ni guyu' zijt lo Dios galoo. Naj agubigtu lo Dios sa'csi abia xtojltu con xtiejn Jesucrist. ¹⁴ Jesucrist najc ni rbedxi lajznu. Laani bejn gujc rexpejn Israel tejsi con rebenzajt. Laani badzucajni redzuun xten leii te gujc rexpejn Israel tejsi con rebenzajt. ¹⁵ Lagajc con tiejxh Jesucrist ni gojl lo cruzj banijtni redzuun xten leii nani bejn bidxe'ch rexpejn Israel lo rebenzajt. Lagajc laani bejnni bidxagsa'reni te gujcreni tejsi che huililajzreni xtiidxni, gujcreni te beñcoob. Dxejc guledcxini lajznireni. ¹⁶ Con yäl'gajt ni gujtni lo cruzj badzu'ni guiro'preni lo Dios te gujcreni tejsi. Si'c guläjz rdxechnäj sa'reni.

¹⁷ Cajza lo guijt rediidxre:

Biäädni te basule'ni xho ga'p rebejn yäl'rbedxi lajz rebejn ni suga' zijt lo Dios näjza reni suga' gajxh lo Dios.

¹⁸ Laani bejn sajx jiu' guiro'p cuaa bejn lo Dios con tejsi xhigab, näjza tejsi Sprit. ¹⁹ Ni'cni dirutu gac benzajt, bejn ni rut numbeedi. Anajctu tejsi con rexpejn, najczatu sa' rexpejn Dios. ²⁰ La'tu najctu si'c te yuro. La'tu najctu si'c padeer xten yu'ga. Reapost näjza reprof'e't najc si'c cheni birixtiej yu'ga. Jesucrist najc si'c guiro ni gusuj squiin yu'ga, guij ni sajcrü, sa'csi Jesucrist rnibee. ²¹ Cayunsa'c Dios yu'ga, cayajc yu'ga con la'tu, caroobni te gacni xquidodxan Jesucrist. ²² Sigajcza la'tu näjza rexpejn Israel ni huililajz najctu

tejsi con Jesucrist. Cagustioobtu guidooga te nen ni cuääz Sprit Dxi xten Dios.

3

Pabl nungäjl chanä xtidx Dios lo rebenzijt

¹ Ni'cni yu'ä nen latzguuib, narä, Pabl sa'csi cagusule'ä Jesucrist, te jiädnaä xtiidxni lojtu, najctu benzijt. ² Pet abiejn diajgtu lacti hueen najc Dios baniidxni dzuunre löä, jiädnaä xtiidxni lojtu. ³ Dios baluiini xhigab-xhiga'tzni löä (si'cni bacuaä lojtu galoo). ⁴ Che gołtu guijtza, sacheetu cati ananä rehxigabxhiga'tz xten Jesucrist. ⁵ Xhigab-xhiga'tzre di bejn niembee galoo, niluxh naj Sprit Dxi xten Dios abaluiinini loj reapost näjza loj reprof'e't. ⁶ Dee najc xhigab-xhiga'tzga: por rediidx xcuent Jesucrist ni ruslaa bejn nen dojl rujn Dios gac reni najc benzijt tejsi con reni najc xpen Israel, guidxaag sa'reni, gacreni tejsi bejn. Guiro'preni xca' yäl'nasa'c si'c bia'n Dios diidx.

⁷ Narä nacä te apost xten dzuun ni baniidxni, por xcäl'rulaslajz Dios ni cuaxlia'ä. Dios baniidx dzuunre löä con xcäl'rnbiduxhni. ⁸ Luxh masä guxiiru sacä lo guiraa rexpejni, löä baniidxni xcäl'racsñajni te lo rebenzijt gusule'ä xtiidxni, nalajznu redidxcoob xcuent xcäl'nasa'c Jesucrist, ⁹ te gusule'ä lo guiraa bejn rehxigabxhiga'tz nani bacua'tz Dios lojnu galooli. Dios benchee guiralii ni yu'. ¹⁰ Si'c gujc te naj jien guiralii yäl'nanduxh xten Dios. Reni najc xpejn pacni nen xquidoo ni guluii yäl'najnre lo rexangl Dios, loj reni rnibee xhaguibaa. ¹¹ Galooli bejn Dios xhigabre par tejpas, ni'cni biääd xtdanu Jesucrist te guzobj xhigab ni bejn Dios. ¹² Con Jesucrist dinu guidxejb guibignu, guiniabnu lo Dios sa'csi ahuililajznu xtiidxni. ¹³ Na'c gac-huin lajztu sa'csi cadedä trabajw xcuenttu. Colguibalajz; dee najc xcäl'nasa'ctu.

Xcäl'sanälajz Jesucrist

¹⁴ Ni'cni ruzuxhibä nez loj Xtad Dad Jesucrist ¹⁵ nani badeed lajni lo guiraa reni yu' xhaguibaa näjza reni yu' lo guedxliuj, ¹⁶ rniabä loj Dad xhaguibaa gutijpni lastootu con yäl'rnibee xcuent Sprit Dxi xteni, sa'csi yuduxh xcäl'nasa'cni lo xcäl'rindimbicha'ni xhaguibaa. ¹⁷ Rniabäza lo Dios te jiädälajz Jesucrist nen lastootu sa'csi ahuililajztu. Te che agusudzu'tztu, agusutijptu lo yäl'rinälajz ¹⁸ dxejc sajg gacheetu sigajc guiraa rexpejn pacni lacti gulajg, lactiza siool, lacti jäät, lactiza jiaa najc yäl'sanälajz xten Jesucrist. ¹⁹ Te gum-beezatu xcäl'sanälajz Jesucrist ni najc gurobduxhtej, digacdi guichalonuni. Te chaza lastootu, näjza xcäriejntu con guiraa rexcäl'nasa'c Dios.

²⁰ Dios rnibeduxh. Sajc gunidxduxhruni loj xhitis ni rniabnu lojni, loj recos ni riennu xhigab. Con Sprit Dxi ni rujn dzuun nen lastoonu suniidxni reyäl'nasa'c. ²¹ Loj Diosre coldeed xquixtios. Colguilä'p xpala'nni nen guidoo xcuent Dad Jesucrist guira dxej, par tejpas. Sugacni si'c.

4

Por Sprit Dxi nadxaag sa'nu

¹ Narä yu'ä lojtis Jesucrist te rsule'ätis xtiidxni. Ni'cni rniabä lojtu, guibajntu si'cni nungäjl, si'cni bejnzatu xhigab cheni gurejdxni la'tu. ² Colguibajn con yäl'nalaslajz, näjza yäl'nadolajz, colcuecdxi lajztu. Colyujn huant resa'tu con yäl'rinälajz sa'ni. ³ Colhuii te guidxaag sa'tu gactu tejsi con Sprit Dxi ni ruscuecdxi lajztu. ⁴ Si'c tejsi tiejxh najcnu loj Jesucrist, tejsiza najc xhigabnu con laani, tejsiza najc yäl'runloj ni rajptu xcuent diidx nani

gurejdxtu. ⁵ Rajptu tejsi Dad, tejsi yälirilajz, tejsi yälrobnis, ⁶ tejsi Dios, tejsi Xtda guiraanu nani rnibee guira'ti lo guiraanu.

⁷ Lo tejganu abaniidxni dzuun si'ctis bejn Jesucrist xhigab guniidxni lo tejganu. ⁸ Ni'cni caj lo reguijtz:

Che huä'pni xhaguibaa, cadro rnibeeni,

abejnni gaan loj guiraa yälrnibee,

dxejcti badeedni dzuun lo rexpejnni lo guedxliuj.

⁹ ¿Xhi säloj cadro caj, "huä'pni"? Dee säloj ganid biäjtni maazru jiät lo guedxliuj. ¹⁰ Lagajc nani biäjtgä, lagajc laani huä'pni jiaaru lo guiraa rexhaguibaa te sajç guinibeeni guibaa näjza guedxliuj. ¹¹ Lagajc laani badeedni xtzuun tejgareni. Yu'reni badeedni gac apost, yu'reni badeedni gac profet, gaireni badeedni gusule' xho ruslaa xtiidxni bejn lo dojl, sgaireni badeedni gac si'c ni ga'p reben guidoo, sgaireni badeedni guluii rexpejnni. ¹² Guiraa redee badeedni te guluiireni rexpejn Jesucrist, te gunreni dzuun te gustajlreni rebejn ni gac xquidoo Jesucrist. ¹³ Nungäj] gac dzuunre che guidzujnli dxej ni nadxaag-sa'nu guiraanu loj yälirilajz, che guidzujnli dxej riembesa'cnu Xi'n Dios, dxejc anajcnu benguyajl lo xtiidxni, si'c te ni aguroob loj xcälrnibee Jesucrist. ¹⁴ Dirunu gac si'c rebixuux ni tera'tsi rusiejch lajzni, rucuaadijgreni xtidx chutis bejn, mase xhitis diidx ruluuini. Dxejc riabreni lo redidx-xhii xten bejn nani rusguee, nani cabäjztsi gusguee bejn. ¹⁵ Maazru hueen chonuunu loj redidxlii xten Jesucrist con yälrinälajz te tioobnu lo guiraa recos xten nani rnibee, lagajc Jesucrist. ¹⁶ Loj Jesucrist nazdzu'tz guiraa rexpejnni, te si'cni nazdzu'tzsa'reni sääreni, najcreni tejsi loj tiejxh Jesucrist, racnäj sa'reni segun xhi dzuun rujn tejgareni, casieedruuni te cayajc xhidajlrü rebejnga con yäl'sanälajz.

Te yäl'nabañcoob con Jesucrist

¹⁷ Laa ni'cni rniä rniabäza con laj Dad Jesucrist na'cru guibajntu si'c nabajñ rebejn nani di gumbee Dios. Laareni rujn si'ctis ni riabj yejcreni. ¹⁸ Nayääl xcäriejnreni, direni ga'p xcäl'nabajñ Dios sa'csi nadduxh lastooreni. ¹⁹ Redee che gucnajd xcäriejnreni gusloj bejnreni guiraloj yälrtujy, guiraa redojl ni di nungäj] gunreni. ²⁰ Niluxh la'tu xhet si'cdi bisieedu loj Jesucrist. ²¹ Palga abiejn diajgtu xtiidxni, niluxh abaluini lojtu didxlii ni siädnä Jesucrist, ²² colgusaan yäl'nabanyujxh ni gojptu: Lo yäl'nabanyujxhga rujn bejn si'ctis ni rlajzni. Dxejcti si'c runijtni la'tu lo Dios. ²³ Colgusiejch lajztu, colgusia xcäriejntu, ²⁴ te gactu beñcoob nani bejn Dios, colchanuu te yäl'nabañsa'c, te yäl'nabañya xten xtidxliini.

²⁵ Colguro'n diidx-xhii, colnii didxlii lo resa'tu sa'csi tejsi najcnu guiraanu.

²⁶ Che guidxe'chtu, na'c guntu dojl. Na'c gusaantu chu xcälrdxe'chtu guideb dxej che chääzli gubijdx. ²⁷ Na'c gusaantu jiu' bendxab neñ lastootu.

²⁸ Nani rilajn, na'cru cuanni. Laaca gunni dzuun con naani te gunni te dzunsa'c nani gudeed meel lojni te gac gacnäjzani rebejn nani xhet rajpdi.

²⁹ Na'c gusaantu guirii nicla tej didxguijdx ro'tu. Colnii ganax didxsa'c te gacnäjni guisieed reni rucuaadijg xtiidxtu. ³⁰ Na'c guntu gac-huin lajz Sprit Dxn xten Dios. Laani najc te seen xten Dios najctu xpejn Dios, ni'c rbäjzni neñ lastootu che guidzujnli dxej ni chäätu lo Dios.

³¹ Colguro'n yäl'nabañdxuudx xtentü, näj yälrdxe'ch, näj yälrdxagdijl sa'ni, näj yälrbedxa', näj yälrgue. Colguibicaj lo guiraa redojlga, na'c gactu benguijdx.

³² Nungäj] gactu huen loj resa'tu, colgulasajz resa'tu, colsiäj] lajztu con resa'tu ni rujn dojl lojtu si'c rsiäj] Dios lajzni rextoj]tu xcuent Dad Jesucrist.

5

Xho nanab guibajn rexi'n Dios

¹ Colguibajn si'c nabajn Dios, sa'csi najctu xi'n'ni nani sanälajzni.

² Colchasanäj yälsanälajz sigajcni huinäälajz Jesucrist nuure cheni badeedni lagajc laani lo Dios, cuajni lo cruzj, gujtni. Laani gujtni si'c gojn, gujczani yälrbibyaal ni bidxaglazj Dios.

³ Nicla gusa'ttu yälruguee chääl bejn, nicla redoļ dxuudx, niclaza yälsanälaztej xhixtentisni. Nicla gusa'ttuni lo sa'tu, sa'csi xhet si'c di nungäļ gun bejn ni naban-naya. ⁴ Sigajcza colcuälaz diidx ni rujn xtujy, näjza didxnajd, näjza didxnaj nani digac laaca. Colgudeedtis xquixtios lo Dios.

⁵ La'tu anajntu nicla tej ni rusguee chälbejn, nicla tej bendxuudx, nicla tej ni sanälaztej xhixtentisni, nicla renani rajn rebanäjb, nicla tej reni'c di xca' yäl'nasa'c loj Jesucrist, dizareni jiu' lo xcäl'rnibee Jesucrist, xcäl'rnibee Dios.

⁶ Na'c gusaantu gusguee bejn la'tu con diidx ni xhet sajcdi sa'csi xcuent redzuunga riääd xcäl'r dx'e'ch Dios loj rebejn ni di gusoob xtidxni. ⁷ Na'c guntu sigajc rujnreni.

⁸ Galoo nacäyjtis xcäriejntu gubajntu, luxh naj abasanij Jesucrist xcäriejntu. Colguibajn si'c nungäļ guibajn nani abianij xcäriejnni. ⁹ Sa'csi nani abianij xcäriejnni rujn dzunsa'c, rniini didxgulii. ¹⁰ Colguiseed xhini'c rchaglazj Dios.

¹¹ Na'c guntu redzundxuudx nani rujn reni nacäy xcäriejnreni, coltilnä j reni rujn sa' dzunguixdxa. ¹² Sa'csi te xtujyli najc jieinu diidx xcuent tzuunreni ni runxhiga'tzreni. ¹³ Niluxh guiraa sa' redzuunre ni rdił'näjnu, huenliisi sien xhi najcreni, suzenni lo xpianij Jesucrist. Sa'csi guira'ti ni ružen najc nianij.

¹⁴ Ni'cni caj loj reguijtz, räjp Dios:

Gubajn, huistie luj ni rejslu.

ĴHuistie lo doļ, luj ni naga'lu lo doļ si'c bengut,

te gusanij Jesucrist xcäriejnlu!

¹⁵ Colĥhui, colsin, na'c guibajntu si'c te bejn nani di gacbee, colguibajn si'c bejn nani yu' xcäriejnni. ¹⁶ Coltedsa'c redxej sa'csi nen redxejre ganax cosguijdx rujn bejn. ¹⁷ Ni'cni na'c guibajntu si'c rebejn nani di gacbee, colyacnasin, te gacbeetu xhini'c najc ni rlajz Dad xhaguibaa guntu. ¹⁸ Lacuaa yätu nejp nani runij bejn, colgapchee Sprit Dxan xten Dios nen lastootu.

¹⁹ Colnii loj resa'tu rediidx nani gunii rebejn tiemp gulä'preni xpala'n Dios, colyelza redij xten Dios, con reyälriel colguiliä'p xpala'n Dios nen lastootu.

²⁰ Di jial lajztu gudeedtu xquixtios lo Dios xtadnu con laj Dad Jesucrist.

Xho guibannäj sa' rexpejn Jesucrist

²¹ Sa'csi rajntu Jesucrist, colgusoob xtidx sa'tu.

²² Lojtu, regunaa ni abachnaa, rniä scree: Colgusoob xtidx chäältu si'c rusoobzatu xtidx Dad Jesucrist. ²³ Sa'csi niguii rnibee gunaa si'cni rnibee Jesucrist xquidooni, niluxh laazani ruslaani rexpejn guidooni lo redoļ, najcreni si'c tiejxhni. ²⁴ Ni'cni, sigajc rusoob reben guidooga nani rnibee Jesucrist gunreni, sigajcza nungäļ gusoob regunaa ni abachnaa nani guinibeetis chäälreni gunreni.

²⁵ Lojtu, reniguii ni abachnaa rniä scree: Colchanälajz chäältu sigajc ni huinäälajz Jesucrist rexpen guidooni, badeedni lagajc tiejxhni loj Dios cheni cuajni lo cruzj por laareni ²⁶ te basiani xtojł rexpejn guidooni, te gujcreni te beñcoob, abidiib lastooreni con xtidxni si'c rdiib te cos con nis ²⁷ te che xca'ni rexpen guidooni, najcreni te guidoo ni sajrcu, te guidoo nani xheti xtojłni, te guidoo nani sugadzu'tz, te guidoo xhet xhi riäädxd, najcni te guidoya, xheti

xhi xtojldini. ²⁸ Sigajcza, te niguii nani abachnaa nungajl chanälajz chäälni sigajc sanälajzni lagajc tiejxhni. Nani sanälajz chäälni sanälajz lagajc laani. ²⁹ Ruti chu te bejn ni rbälaz tiejxhni; alga rajpni tiejxhni ruyaanni tiejxhni sigajc rajp Jesucrist rexpén guidooni. ³⁰ Najczanu tejsi loj tiejxh Jesucrist, loj xpäälni, loj rextzujtni. ³¹ “Ni’cni che guchnaa te niguii rusa’nni xtdad, xnanni, te xca’ni gunaa, te gac guiro’preni si’c tejsi bääł, si’c tejsi bejn.” ³² Dee najc te diidx xhiga’tzduxh; li te “¿chuj?” najcni. Niluxh narä rniä xcuent Jesucrist con rexpénguidooni. ³³ Niluxh nanabpac chanälajz tejgatu chäältu sigajc sanälajztu tiejxhtu. Dxejcti gunaa ga’pzeni xpala’n chäälni.

6

¹ Lojtu biuux, rniä scree: Colgucudiajg xtidx Jesucrist, colgusoob xtidx xtadtu sa’csi ni’c sajz nez loj Dios. ² Colga’p xpala’n xtadtu, xnantu, sa’csi ni’c najc didx galoo xten leii nani runiidx xhi xca’tu palga gusoobtu diidxga; ³ “Te saruduxh guibajntu xchero lo guedxliujre.”

⁴ La’tu, Dad ni najc guzajn, na’c guntu guidxe’ch rexi’ntu lojtu. Colguslaareni con yälñaj, colgulijdxreni con xtidx Jesucrist.

⁵ La’tu ni najc mos, colgusoob xtidx xlamtu lo guedxliujre, colcuadiajg xtiidxn, xhet xhi steedi xhigabdi guntu neñ lastootu. Colyejn xtzuumni si’cni najc xtzuum Jesucrist. ⁶ Colyejn xtzuumni, niluxh xhet che suga’tisreni, cahuiireni, parsj jiansa’ctu lojreni. Maazru hueen guntu dzuun si’c xmos Jesucrist; colyejn guira’ti si’cni rujntu xtzuumnactu; si’cni rlajz Dios. ⁷ Colyujn xtzuumni guideb lastootu si’c xmos Jesucrist, et si’cni dxi xmos beñ guedxliuj. ⁸ Anajntu dzunsa’c ni gun tejgatu, lagajcza xcuent ni’c xca’tu loj Dad Jesucrist, mase najctu mos o mase rutlojdi yu’tu.

⁹ Lojtu, relam, rniä scree: Sigajcza colyujn lojreni. Colgusaan yälrusacsí, sa’csi anajntu yu’ xlamtu xhaguibaa, luxh tebloj najc guiraa rebejn nez lojni.

Nani gacw rexepejn Jesucrist lo guerr

¹⁰ Didx lult ni rniä, sa’ä, najc scree: Colsutijp lo xcälracnäj Jesucrist, colsudzu’tz lo xcälñadip xcälrnibeeni. ¹¹ Colgajcw xhabguuib xten Dios te gac sudzu’tztu lo reyälrusguee xten beñdxab. ¹² Sa’csi xhet beñ guedxliujtis cadilñajnu. Cadilñajzanu reguxhtis xte yälçäy, näjza reyälrnibee, rebejn nani rnibee loj reyälçäyire, näjza rexangl beñdxab nani rnibee bej xten guedxliujre. ¹³ Ni’cni colca’ guideb lad-guuij xten Dios nani runiidxn loonu te gac sudzu’tznu neñ dxej ni guideednu trabajwduxh, te che agudejdni, lałtis sisiudzu’tznu. ¹⁴ Colsudzu’tz pues. Xque’tu colguliib sindoor-guuij ni najc xtidx Jesucrist, colgajcw gamangw-guuij ni najc rextzunsac xten Dios ni rujntu. ¹⁵ Colcuca’ gurach-guuij ni’tu (ni’c najc xtidx Jesucrist ni ruscuedxi lajztu). ¹⁶ Colca’ escud-guuij ni najc yälrililajz te con yälrililajz xtidx Dios di beñdxab gun gaan gusguee la’tu con rextidx-xhiini. ¹⁷ Colca’ yälruslaa xten Dios lo dojl si’c te xhumbrel-guuij chu yejcti; colca’za lans xten Sprit Dxi xten Dios ni najc xtidx Dios. ¹⁸ Colnab lo Dios guiraa dxej; colnab lojni con Sprit Dxi xtenni; colsusintis; na’c jieedtu guiniabtu lo Dios xcuent guiraa xpejn. ¹⁹ Colnabza lo Dios por narä te guniidx Dios diidx cheni gal guiniä, te na’c guidxebä guiniä che guliä didx-xhiga’tz xten yälruslaa bejn lo dojl. ²⁰ Xcuent rediidxga ni yu’ä neñ latzguuij, caduä con caden. Ni’cni colnab lo Dios te na’c guidxebä guiniä rediidxga si’cpacni säbyäj guiniäni.

²¹ Niluxh te gabeetu xho sasaj rextzunä, nägajcza xho yu'ä narä, Tíquico, sa'nu ni sanälajznu, ni runsa'cza xtzun Dad Jesucrist, siäd lojtu te gusule'ni diidx. ²² Laapacni ruxhalä lojtu, te gabeetu xho yu'nu, te si'c guscuecdxini lajztu.

²³ Rniabä yälrbexilajz par resa'nu, näjza yälrililajz con yäl-sanälajz xten Dios Xtadnu näjza xten Dad Jesucrist. ²⁴ Gacnäj Dios guiraa reni di gusguee, reni sanälajzpac Dad Jesucrist. Sugacni si'c.

Te Guijtz Lo Rebeñ Filipos

Latzguiib yu' Pabl bacuaani loj rebeñguidoo xten guedx Filipos

¹ Pabl nájza Timoteu, nani najc rexmos Jesucrist, rucuaanu guijtzre lo guiraa rexpejn Jesucrist nani rbájz guedx Filipos, loj rebejn nani ruluui xtidx Dios neñ reguidoo nájza loj rediaconos. ² Gacnáj Dios la'tu con yälrbedxi-lajz xten Xtadnu nájza xten Dad Jesucrist.

Rniab Pabl lo Dios xcuent rebejn nani rililajz

³ Che rnej lazä la'tu, rudedä xquixtios lo Dios. ⁴ Che rniabä lo Dios, rbaa lazä rniabä lo Dios xcuent la'tu, ⁵ sa'csi abidxaag sa'nu lo xtidx Jesucrist che guslojli huililajztu hasta najli. ⁶ Anancheä Dios nani gusloj cayunsa'c dzuun neñ lastootu, lagajc laani suluxsa'c dzuunga dxejli ni jiaäd Jesucrist. ⁷ ¿Xhiru xhigab nungäj gunä? Ni rapä la'tu neñ lastoä sa'csi cayacnäjtu narä neñ latzguiib luxh rsiudzu'tztu riye'tztu lo bejn, guli najc rediidx nani rusule'ä xcuent Jesucrist nájza la'tu rusule'tu rediidxga. ⁸ Dios nanchee xho rbanäätu, xho sanälazä guiraatu lo xcäl'sanälajz Jesucrist. ⁹ Rniabä lo Dios te tioobru xcäl'rinälajztu naj xcäl'najntu nägajc churu xcäriejn guiraatu, ¹⁰ te cuetu nani najc dzunsa'c te si'c guiban nayatu, te na'c ga'ptu nicla tej dojl cheni jiaäd Jesucrist. ¹¹ Te guidxa lastootu yäl'nasa'c xten te yäl'nabansa'c ni runiidx Jesucrist, te guspaa lajztu Dios, guliä'ptu xpala'nni.

Jesucrist najc xcäl'nabanä

¹² Rlazä gacheetu betzä: guiraa nani gusacä ni'c cayacnäj guire'chru xtidx Jesucrist. ¹³ Ni'c guiraa rebejn, renani yu' jusgaad sigajc renani yu' garenca lajt, anajnreni niäuä latzguiib xcuent Crist. ¹⁴ Xhidajlru resa'nu cheni gubeereni yu'ä latzguiib, gusudzu'tzru lajzreni, direni nidxejb, guniirureni xtidx Dios.

¹⁵ Guliica yu' reni rusule' xtidx Jesucrist sa'csi rdxe'ch lajzreni, rdxe'chzaren loä. Yu'za reni rusule' xtidx Jesucrist sa'csi laaca najc xhigabreni. ¹⁶ Yu'reni rusule' xtidx Jesucrist sa'csi rdxe'chreni, xhet sa'csi laaca najc xhigabreni, alga rujnreni xhigab gustioobrureni trabajw nani tedä neñ latzguiib. ¹⁷ Niluxh yu' reni rusule' rediidxga sa'csi sanälajzreni Jesucrist. Anajnreni yu'ä latzguiibre te gusule'äru guliipac najc xtidx Jesucrist. ¹⁸ Niluxh ¿xhiru najcni? Palga rujnsireni laaca o palga guluiipac laaca najc xhigabreni rusule'reni xtidx Crist; rbaa lazä sa'csi care'ch xtiidxni niluxh sibaaru lazä. ¹⁹ Ananä laaca guiriä loj guiraa recosre sa'csi canabtu lo Dios xcuentä. Luxh xcäl'racnäj Sprit xten Jesucrist ²⁰ rujn runloä, rbäzäzä dina jianxtuiä. Ni'cni dina guidxebä guiniä, si'cni runäpac, sigajcza runä naj te gac guiliä'pä xpala'n Jesucrist con tiexhä palga guibanä o palga guetä. ²¹ Sa'csi palga guibanä, su'ä lo Jesucrist; luxh palga guetä sunäru gaan. ²² Palga guibanäru lo guedxliujre, sajcru gunä xtzuun Dad Jesucrist, ni'cni dina gacheä xhinic cueä xca'ä. ²³ Nagajn najcni par narä cueä lo guiro'preni. Te lajt runä xhigab: malaii guetä te cha'a cadro yu' Jesucrist sa'csi ni'c najc huenru par narä. ²⁴ Niluxh stee lajt nancheä nungäj guibanäru lo guedxliujre xcuent la'tu. ²⁵ Niluxh narä racbeäpac siannäaru la'tu, su'äru lojtu te chanuurutu lo xtidx Jesucrist, te guibalajztu lo yäl'rililajz, ²⁶ te guibalajzrutu xcuentä loj Jesucrist che guibisacä lojtu stehuält.

²⁷ Colhuiitis guibajntu si'cpac ni rnii xtidx Jesucrist, te palga jiadhuiātu o palga ruti narā, jiejn diagā sugadzu'tztu, rujntu tejsi xhigab, nadxaag sa'tu rujntu tejsi dzuun con yālrililajz xten xtidx Jesucrist. ²⁸ Na'c guidxejbditu renani rdxe'ch lojtu. Laareni huenliisi rusen agunijtreni ni'c rdxe'chreni, ni'cni la'tu huenliisi rusen agulaatu nen dojl si'c baniidx Dios, ni'cni ditu guidxe'ch. ²⁹ Sa'csi lojtu abaniidx Jesucrist chalilajztu xtiidxni. Niluxh xhet ni'ttis; nāgajcza tedtu trabajw xcuent laani. ³⁰ Cadejdtu lagajc trabajw ni cahuiitu gudedā luxh naj riejn diajgtu cadedsicā trabajwga.

2

Xcālinalaslajz nājza xcālgurobduxh Jesucrist

¹ ¿La ruspaa Jesucrist lajztu? ¿La racnāj xcālriñalajztu la'tu? ¿La yu' Sprit Dxan xteni con la'tu? ¿La yu' xcālsanāalajzni nāj xcālruulasajzni lastootu? ² Palga yu'ni, colguspaa lazā, colyejn tejsi xhigab con narā, colga'p lagajc yālsanāalajzga, colguidxaag sa'tu, colyejn tejsi xhigab. ³ Na'c guntu nicla tej dzuun sa'csi cayutu lagajc la'tu, na'cza guntu dzuun te chā'p xpala'ntu. Colyejn xtzauuntu con yālnalaslajz, colhuii loj sa'tu si'c beñroru lojtu. ⁴ Na'c jiu chu tejtū lagajctis xhixteni, coljiu tejgatu xhixten sa'ni.

⁵ Colga'p lagajc sa' xhigab nani gojpa Jesucrist ⁶ nani mase najcni sigajc Dios, dini niniadzdu'tz xcālriñabee Dios, ⁷ alga basa'nni te laad yālrñabee nani rajpni con Xtadni Dios te gujčni mos cheni gojlni lo guedxliujre. Gujčni si'ttis te bejn. ⁸ Che gujčni si'ttis beñ guedxliuj, gujčni beñ nadolajz, beñ nasobdiidx. Basoobni xtidx Dios, gujtni lo crujz, luxh yāljrejt lo crujz najc te yālruiduxh. ⁹ Ni'cni baspansac Diosni, gule'cni Crist te lajt ni najc jiaaru, badeedza Dios sajcu lajni lo laj guiraa relaj ni rusā't bejn. ¹⁰ Luxh che jiejn diajgteni laj Jesucrist, suzuxhijb guiraa reni yu' xhaguibaa, guiraa reni yu' lo guedxliuj, nājza guiraa reni yu' nez nen yuj. ¹¹ Te guiraareni gacheepac, guiniizareni: “Jesucrist najc Dad”, te si'c chā'pduxh xpala'n Xtadnu Dios.

Rexpejn Jesucrist najc si'c bajl ni rusanij lo guedxliuj

¹² Ni'cni, resa'ā ni sanālazā, sigajcni rusooobtu xtidxā cheni suganāā la'tu, sigajcza colgusoob xtidxā naj ni yu'ā zijt, colhuii tejgatu xho gac laatu nen dojl, colyajc bejn ni rusooob diidx con yālrdxejb. ¹³ Sa'csi Dios najc ni rujn dzuun nen lastootu te rajc rujntu xhigabsa'c, dxejc racnājazani la'tu te rajc rujntu si'cni rlajzni.

¹⁴ Loj guira'ti ni rujntu, na'c gusmojmtu, na'cza gun tiop lajztu, ¹⁵ te rut gucuaquijditu, te gactu bejn ni ruchaag chutis bejn, gactu xi'n Dios, bejn nani xhet xtojldini yu' la'l ni tre'tu loj rebenguijdx ni rujn redzundxuudx. Nez lojreni gactu si'c te bajl ni rdimbicha' si'c rebalxhaguibaa che nacājy, ¹⁶ sa'csi arapdzu'tztu xtidx yālnabajn ni runiidx Crist nen lastootu te guspaatu lazā dxej cheni jiaād Jesucrist, sa'csi xhet xlia'di gujc xtzunā, xhetza xlia'di cayunā dzuun naj. ¹⁷ Mase lagajc xtiēnā guixe' te guiza' te gojn ni xca' Dios xcuent xcālriñilajztu, rbaa lazā, sibalaznāāza la'tu. ¹⁸ Sigajcza colguibaa lajztu, colguibalaznāj narā.

Timoteu con Epafrodito

¹⁹ Nez loj Dad Jesucrist cayunloā guxhalgacā Timoteu lojtu te nājza narā guibaa lazā che agucebā xho yu'tu nejzga. ²⁰ Sa'csi rutru rapādi nani rujn tejsi xhigab, tej ni guliipac gun dzuun, jiupacni la'tu. ²¹ Guiraa rebejnre rujntis xtzauuncareni, direni jiu gunreni xtzauun Jesucrist. ²² Niluxh la'tu

anajntu xho rujn Timoteu; si'c racnäj te bi'n xtdadni, si'cza racnäjni narä lo xtidx Jesucrist. ²³ Ni'cni rlazä guxhaläni te jädhuiini la'tu, fixgaäsi don xho sasaj xcuentä ree. ²⁴ Cabäzä nez lo Dad Jesucrist don la näjza narä sajł jädhuijacätu.

²⁵ Niluxh rchaloä nanabpac guxhalä bejtznu Epafrodito ni najc sa'ä loj dzuun, loj retrabajw ni cadejdnu. Lagajc la'tu baxhaltuni te jiuni narä, fiini xhini'c rquinä. ²⁶ Laani rlazduxhni fiini lojtu, lacti cayu'ni yärsia' sa'csi gucbeetu gucxhuuni. ²⁷ Guliica gucxhuuni cuentro, ameer niejtni, niluxh Dios balaslajzni laani, luxh xhet laatisni, balaslajzzani narä te di nidedäru loj yälñahuinlajz ni yu'ä ree. ²⁸ Ni'cni rlazä guxhalgacäni te guibalajztu che fisactu lojni, näjza te na'cru gac-huinlazä xcuent la'tu. ²⁹ Colca'ni con yälrbalajz si'c bejtzto lo xtidx Dios, sigajcza coläjejn reni najc sigajc laani. ³⁰ Xcuent xtzuun Jesucrist ameer niejtni, dini niu xcälñabajntisni te bejnni redzuun nani di niajcdi niujntu lagajc la'tu xcuentä.

3

Te yälñabansa'c'pac

¹ Naj rebetzä, colguibalajz nez lo Dad Jesucrist. Xhet najcdi gucusacä lagajc rediidx nani abacuaä lojtu, sa'csi sacnäjni la'tu. ² Colnati renani najc si'c bä'cw. Colnatiza rebejn nani rujn dzun gujdx. Colnatiza reni ru' bee tiejxhtisreni luxh xlia'si rujnreni si'c. ³ Renani gullipac yu' bee najc nuure nani ahuililajz xtidx Dios, rienzianu xtzuunni si'cni rlazjni sa'csi ayu' Sprit Dxan xteni neñ lastoonu. Rbalaaznu sa'csi najcnu xpejn Dad Jesucrist, xhet xcuentdi redzuun ni rujn tiejxhnu. ⁴ Narä sajczä guibalazä xcuent ni rujn tiexhä. Palga yu' chu tej ni rbalajz, narä rbalazäru ⁵ sa'csi guyu'ä bee che guyu'ä xhujn gubijdx; narä nacä te rexepejn Israel; narä nacä tej rexepejn toBenjamín, nacä te hebreo, luxh xtdadä najc te beñ hebreo; xcuent leii nacä te farisee. ⁶ Basobduxhä guiralii rextidx Dios ni caj lo leii ni'cni basacsiduxhä rexepejn Jesucrist; xcuent yälñabansa'c xten leii, xhetliidi xtolä yu'; basobdzu'tzä xtidx leii. ⁷ Niluxh naj rediidx nani galoo benä xhigab sacduxh, naj xhet sajcdini sa'csi sanälazä Jesucrist. ⁸ Niluxh maazru runä: runä xhigab xhet sajcdi guiraa nani rapä, sa'csi maazru sacduxh yälriembeee Jesucrist ni najc Dad xtenä. Xcuent Jesucrist gulälazä guira'ti, guira'ti najc si'c guixbiujy nez loä te gunä gaan Jesucrist, ⁹ te chu'ä lojni, xhet xcuentdi xcälñabansa'cä ni najc xcuent leii, alga xcuent yälñabansa'c ni najc xcuent xcälñirililajz Jesucrist, yälñabansa'c ni najc xten Dios xcuent yälñirililajz. ¹⁰ Ni'cni rlazä gumbeäru Jesucrist loj yälñibebe ni rajpni sa'csi huistie gubansa'cni sacni loj rebengut, te gumbeäru retrabajwduxh ni gudejdn, te ganä xho gunä ni rlazj Dios si'c gucbee Jesucrist, bejnzani ni rlazj Dios che gujtni. ¹¹ Te gac guidzuna lo yälguibansac loj rebengut te xca'ä yälñabajn par tejpas lo Dios.

¹² Dizana guiniä “abenä gaan” o “anacä beñsa'c”, alga sanuätis te gunä gaan yälñabajn nani cua'ä lo Jesucrist. ¹³ La'tu rebetzä, dipacna gunä cuent alabenä gaan, niluxh tejtis nani runä, riallazä nani agudejd, rusgaä naä si'cni guiniazä nani churu gac. ¹⁴ Si'cni sanuutis ruxuñ bejn te gunni gaan xhi guzalajzni, si'cza sanuutis cayunä dzuun nani baniidx Jesucrist loä, te che abenä gaan dzuunga sica'ä ni guzalajzni, nalajznu sibejdx Dios narä cha'a loj Jesucrist.

¹⁵ Guiraanu nani ahuililajznu, nanab jiennu lagajc xhigabga, niluxh palga la'tu guntu ste'ca xhigab, rchaloä lagajc Dios sululojni lojtu xcuent ni et laadi cayujntu.

¹⁶ Naj, cadrotis abidzunnu lo nani abiembeenu, sigajcza nanab guibanajcnu, chanuutis gusoobnu rediidxga; nungajl guibajnnu loj rediidxre, jiennu tejsi xhigab.

¹⁷ Rebetzä, coltanajl narä, colyejn si'c runä narä, colhuiiza rebejn nani nabajl si'c nabanä. ¹⁸ Xhidajl huält aguniä lojtu, naj ronäli rnisacä lojtu, yu' xhidajl reni rdxe'ch lojtu, rniyajreni nani bejn Jesucrist che gudixni xtojlnu lo cruzj. ¹⁹ Redee che luux xnezyujreni sinitojreni, sa'csi xtioozreni najc yälrausa'c; luxh rbaali lajzreni rujnreni dzun xtuuj; luxh riutisreni xcäl'nasa'c guedxliujre. ²⁰ Niluxh nuure, xhaguibaali najc laadxnu, luxh ro'cli cabääznu jiaäd nani ruslaanu nen dojl, nalaaznu lagajc Dad Jesucrist. ²¹ Laani sucaana tiexhnu ni rajpnu lo guedxliujre, te gac tiexhnu sigajc najc teixhni lo xcäl'rnibeeni. Sujnni dee con yäl'rnibeduxh ni rajpni te rnibeeni loj guiral'i'ti, guiraa nejz.

4

Colguibalajztis xcuent Dad Jesucrist

¹ Ni'cni rniä lojtu, rebetzä nani sanälazä, lojtu ni rlazä fisacä, lojtu ni ruspaalazä, lojtu ni najc yäl'nasa'c xtenä, col'sudzu'tz loj xtidx Jesucrist.

² Rniabduxhä lo Evodia näjza lo Síntique, rulidxäreni gunreni tejsi xhigab xcuent Dad Jesucrist. ³ Sigajcza rniabä lojlu betzä, ni runnäj narä dzuun, gucnäj regunaare ni bennäj narä dzuun, bideednu trabajw xcuent xtidx Jesucrist. Gucnäjza Clemente näjza guiraa reni bennäj narä dzuun; alajreni caj nen reguijtz xten yäl'nabajl par tejpas.

⁴ Colguibalaznäjtis Dad Jesucrist; stehuält rniä: colguibalajz. ⁵ Sugacbee guiraa rebejn xho najc xcäl'nabajntu lo xtidx Dios. Asiäddzungajxh dxej xten Dad Jesucrist.

⁶ Na'c guidxejbtu, colnabtis lo Dad guira'ti, colgudeedza xquixtios lojni la'l ni cabedx-canabtu lojni. ⁷ Dios guniidx xcäl'rbedxilazduxhni, nicla guntu xhigab lacti najc yäl'rbedxilajzga. Yäl'rbedxilajzga ga'p lastootu näjza xcäriejntu loj Dad Jesucrist.

Colyejn xhigabsa'c

⁸ Mbjaj naj, deetis guiniä lojtu rebetzä, sa'tis rediidxre gusaantu chu loj rexhigabtu: guiraa ni najc guliipac; guiraa rediidx ni nanab guiliä'pni xpala'nni, guira'ti nani nacsac; guira'ti nani naya; guira'ti nani najc saru; guira'ti nani rapsac xpala'n lajni; näj palga yu' xhi dzuun ni nacsac'pac, o palga yu' xhi te diidx ni sajc guiliä'p xpala'nni, xcuent guiraa reni'c colyejn xhigab. ⁹ Nani bisieedtu, nani cua'tu, nani biejn diajgtu, nani bahuiitu benä, ni'c guntu te Dios ni rbedcxilajz, laani jiannäjni la'tu.

Gojn xten refilipenses ni xca' Pabl

¹⁰ Rbaduxh lazä nez loj Dad Jesucrist sa'csi banasac lajztu gacnäjtu narä. Guliini; galooli rlaajtu niacnäjtu narä, luxh di ni ajcdini. ¹¹ Dinä guiniä si'c sa'csi yu' xhi cayädxä, sa'csi abisiedä guibaali lazä loj xhitis ni rapä. ¹² Sajc guibanä che guxii rapä; sajc guibanä che xhidal rapä; abisiedä guibanä xhotis: sajc gauduxhä, sajczca guilianä; sajc gapä xhidajl xhixtenä, sajczca tedä trabajw. ¹³ Guira'tini sajc gunä sa'csi Jesucrist racnäj narä. ¹⁴ Niluxh xhet najcdi; laaca dzuun bejntu che bejntu xhigab gacnäjtu narä la'l ni cadedä trabajw.

¹⁵ Gacbee guejbtu, dad filipenses, che gusloj caguluiä xtidx Jesucrist lojtu, cheni biriä reguedx Macedonia, nicla tej guidoo di niacnäj narä, la'tistu

gucnäj narä. ¹⁶ Cheni yu'äli guedx Tesalónica, baxhałtu meel loä tej-tio'p huält. ¹⁷ Niluxh narä di rlazä xca'ätis xhixtentu ni guniidxtu, nani rlazä najc tiobru xcäl'nasa'ctu nez lo Dios xcuent dzuun ni rujntu ruxhałtu meel loä. ¹⁸ Naj acua'ä guiraa ni baxhałtu, arapä xhidajl, arapduxhä sa'csi acua'ä nani biädnä Epafradito baxhałtu loä, te gojn ni rlianejxh si'c guxhyaal, te dzunsa'c ni rchaglajz Dios. ¹⁹ Dios xtenä guniidx lojtu guiraa nani riäädx xca'tu, si'ctisni rajpni reyäl'nasa'cduxh xhaguibaa con Dad Jesucrist. ²⁰ Colguiliä'p xpala'n Dios xtadnu guixe-guixee par tejpas. Si'c gacni.

Lult xtixtios

²¹ Coldeed xtixtios lo guiraa rebejn ni abia lastooni nez loj Dad Jesucrist. Rebejtznu ni yu' ree näj narä ruxhałnu xtixtios lojtu. ²² Guiraa rebejree ni abia lastooni nez loj Dad Jesucrist ruxhał xtixtios, niluxh ruxhałru resa' César xtixtios lojtu.

²³ Suga'p xcälracnäj Dad Jesucrist lastootu. Sugacni si'c.

Te Guijtz Lo Rebeñ Colosas

Bacuaa Pabl loj reben guidoo ni yu' guedx Colosas

¹ Narä, Pabl nacä te apost xten Jesucrist. Dios gule narä. Narä näjza bejtznu Timoteu ² gagucuaanu reguijtzre loj rebeñ Colosas nani nabañnaya rujnreni si'cpacni rlanj Dios, näjza reni najc bejtznu lo xtidx Jesucrist. Xca'tu yälracnäjä näjza yälrbexilajz xten Dios xtadnu.

Rniab Pabl gudeed Dios yälñajn xtenni

³ Rdeednu xquixtios lo Dios xtad Dad Jesucrist rniabnu lojni xcuenttu guixe-guixee. ⁴ Abiejn diajgnu xho rililajztu xtidx Dad Jesucrist, näjza xho sanälajztu rebeñ ni ahuililajz xtidx Jesucrist, ⁵ sa'csi cabäjztu xca'tu reyälñasa'c ni yuchee xhaguibaa par la'tu. Laa xcuent reni'c ni biejn diajgtu cheni bacuadaijgtu xtidxlii Jesucrist xcuent yälruslaa lo dojl. ⁶ Laa rediidxga ni abiääd lojtu sigajc ni bire'chni guideb lo guedxliuj, luxh cayac xhidajlru rebeñ ni cayachee diidxre, asalilajzreni diidxga, sigajc guzajctu la'tu. Cheni biejn diajgtu xtidx Jesucrist, dxejc biembeezatu guliipac najc xcälñulaslajz Dios. ⁷ Sigajcza bisieedtuni lo Epafra, ni sanuutis cayacnäjni nuure lo dzuun. Laani najc te beñsa'c, yu'ni lojtu cayujnpacni xtzuuun Jesucrist lacuaa nuure. ⁸ Laani abasule'ni diidx loonu xho sanälajz sa'tu sa'csi nabajñ Sprit Dxañ xten Dios nen lastootu.

⁹ Laa ni'cni dxejli nani biejn diajgnu diidxre xcuenttu, di cuääz cabedxcanabnu lo Dios, canabnu gacbeduxhtu xho rlanj Dios guntu, guniidxni guiraa yälñajn näjza gusanijni xcäriejntu ¹⁰ te guibajntu si'cni nungäjñ guibajñ bejn ni sanajñ Dad Jesucrist, te guspaatu lajzni lo guiraa redzuun. Chanuzatu gunrutu guiraa redzusa'c näjza jianijru xcäriejntu xcuent yälriembe Dios. ¹¹ Tioobrutu loj xcälñadip, xcälñabee Dios te guibaa lajztu gusutipla-jztu, cue'cdxilajztu loj xhitis ni sajctu. ¹² Guibalajznu guideednu xquixtios loj xtadnu Dios nani basudzu'tz nuure te xca'nu yälñabajñ par tejpas sigajc guiraa rebeñ nani ahuililajz xtiidxni yu'reni lo xpianijni. ¹³ Laani abaslaani nuure loj xcälñabee yälñacäjy, abateedni nuure lo xcälñabee xi'nni ni sanälajzni. ¹⁴ Laa xi'nni ni baslaa nuure nen dojl cheni baxhe'ni xtiejñni, gujtni lo cruzj, dxejc gudijxni rextojñnu.

Gubisacnu loj Dios xcuent xcälgujñ Jesucrist

¹⁵ Rut rajcdi ruhuui lo Gueb-Dios, niluxh xi'nni najc si'cpac najc Dios; si'cpac rujñ lojni. Laani guyu'ni galodoo luxh rnibeeni lo guiralii ni yu' lo guedxliuj. ¹⁶ Por laani benchee Dios guiralii ni yu' xhaguibaa ni yu'za lo guedxliuj, renani ruzen sigajc renani di guzen: re'reii, näjza reni rnibee loj rexangl Dios, näjza reni rnibee loj rexangl bendxab, nägajcza reyälñabee xten reguixhajj, sigajczani loj regubier, lo reguxhtis ni rajp yälñabee, guiraani guc-chee por laani, näjza par laani. ¹⁷ Alanabajñ Jesucrist galooli, che gajdli guirixtiej guedxliuj. Por laani yu' guira'ti ni yu'. ¹⁸ Laani najc nani rnibee guidoo, nalajznu rebeñ nani ahuililajz xtiidxni. Laani najc ni guläxtiej guira'ti. Ganiddoo laani huäjs lo rebengut te rnibeeni. Loj guira'ti ni yu' laatisni najc nani sajc guinibee. ¹⁹ Sa'csi bidxaglajz Dad Dios ga'p Jesucrist guiralii yälñabee nani najc xten Dios, ²⁰ por lagajcza Jesucrist badzu' Dios guira'ti ni yu', guibi'reni lojni, reni yu' lo guedxliuj sigajc reni yu' xhaguibaa, sa'csi abiäjñ-lajzni, aguredxi lajzni sa'csi bixe' xtiejñ Jesucrist lo cruzj.

²¹ Luxh la'tu gujctu si'c benzijt lo Dios sa'csi galoo rdxe'chtu lo Dios nen las-tootu xcuent redzunguidx nani bejntu. ²² Niluxh naj abiäj-lajz Dios abadzu' Jesucrist la'tu, agucnayatu gubi'tu lo Dios xcuent xtiejn Jesucrist ni baxhe'ni lo cruzh cheni gujtni. Ni'c bejn ni te che suutu nez lojni, xhetiru xtojltu, xhet xhi guiniidi Dios lojtu sa'csi anayapactu. ²³ Niluxh riäj chanu sudzu'tztu, cuedxitu lo yälirilajz. Na'c gusaantu chu gusiejch-lajztu te cuälaztu xtidx Jesucrist nani abiejn diajgtu. Rediidxga abasule'zanu loj guiraa rebejn ni re' lo guedxliujre. Luxh lagajc narä, Pabl rusule'ä diidxga sa'csi parpac ni'c gule Dios narä.

Dzuun guidoo najc xcuent Pabl

²⁴ Naj rbalazä cadedä trabajw xcuenttu sa'csi retrabajw ni cadedä lagajc narä cagusa' nani cayääd lo retrabajw xten Crist xcuent guidoo, nalajznu rebejn ni ahuililajz xtiidxni, ni najc si'c tiejxh Jesucrist. ²⁵ Ni'c nacä te bejn ni rusule' diidx nen guidoo. Dzuunga baniidx Dios gunä par xcäl'nasa'ctu te gusule'äpac guiragajc xtidx Dios, ²⁶ te gacheenu rehxigabxhiga'tz nani najc xhiga'tz galododuxh niluxh naj abaluuini redidx-xhiga'tzre loj rexejtni. ²⁷ Lojreni bejn Dios xhigab guluuini reyäl'nasa'c xten yälrdimbicha' xten redidx-xhiga'tz ni cagusule'ni loj rebenzijt. Yälxhiga'tze säloj Jesucrist rbäjz nen lastootu ni'c runlojtu chaläjztu lo yälrdimbicha' xten Dios.

²⁸ Rusule'nu diidx xcuent Jesucrist, ruliidxnu guiraa rebejn, guideb yäl'najn ruluuinu te guisa' yäl'najn xten guiraa rebejn xcuent Jesucrist che guidzujnreni nez loj Jesucrist. ²⁹ Xcuent dzuunre guideb xtipä runä dzuun con guiraa yäl'rnibee nani runiidx Jesucrist narä.

2

¹ Rlazä gacheetu lacti cadedä trabajw xcuentu, näjza xcuent reni yu' guedx Laodicea, näjza xcuent guiraa reni gajd gumbee narä. ² Te tioob lastoo guiraatu sa'csi abidxagsa' lastootu lo yäl'sanälajz, näjza te ga'ptu guiraa reyäl'nasa'c ni rajp bejn che rachesa'creni xtidx Dios. Te gumbeezatu guiraa redidx-xhiga'tz xten Dios xtdadnu näjza Dad Jesucrist. ³ Nen lastoo Dios näjza lastoo Jesucrist naga'tz guiraa reyäl'nasa'c xten guiraa reyäl'najn, guiraa yäl'numbee. ⁴ Dee rniä lojtu te di gusguee chu gusgueetu con rediidx-xhii. ⁵ Te palga ruti narä ro'c, canaj lazä la'tu, cabaa lazä cahuiä laaca cayujntu, sugatzu'tztu loj yälirilajz xten Jesucrist.

⁶ Ni'cni sigajc ni huililajztu xtidx Jesucrist, sigajzca colchasanäj Jesucrist. ⁷ Col'sudzu'tz lo Jesucrist si'c rsiobdzu'tz xlobaa te yajg. Col'sudzu'tz lo yälirilajz xten Jesucrist si'c ni abisieedtu. Col'gudedduxhru xquixtios lo Dios.

Yäl'nabancoob ni rudeed Jesucrist

⁸ Col'huii, na'c gusaantu guxhiid bejn xcäl'rililajztu con xtiidxtisreni näjza rediidx nani xhet sajcdi, si'c najc xtidx reben galoo, näjza si'c najc diidx xcuent xhigab xten reben guedxliuj, di rediidxga gac si'cni rlanj Jesucrist.

⁹ Sa'csi giralii ni najc Dios, lagajc ni'c najc Jesucrist, niluxh yu' tiejxh Jesucrist. ¹⁰ Xhet cayäädxd lo yäl'nabajn xten Dios ni rajptu sa'csi najctu tejsi con Jesucrist. Laani rnibee guiraa reyäl'guxhtis, guiraa reyäl'rnibee ni yu' guira lajt. ¹¹ Sa'csi huililajztu Jesucrist aguyu'tu bee, niluxh xhet beedi nani rusäl bejn con naareni, alga xpee Jesucrist, ni najc yäl'rusia xtoj bejn sa'csi rusaan bejn redzunguidx, rujnreni tejsi xhigab con Jesucrist. Si'c najc xpee Jesucrist. ¹² Cheni gurobnistu najcni si'cni agujttu ni'c biga'tztu con Jesucrist, najczani si'cni gubansactu con laani sa'csi huililajztu rajp Dios

yäl̄rnibee nani gulässac Jesucrist lo rebengut. ¹³ Che najctu si'c bengut lo dojl̄, nájza sa'csi di bee niu' tiejxhtu, dxejcli baniidx Dios yäl̄nabaj̄n par tejpas lojtu con Jesucrist, badzucajni guiraa rextojl̄nu. ¹⁴ Dios badzucaj guiraa releii nani basáuu nuure neñ dojl̄, badzucajni lojni, sa'csi bacuaanini lo cruzj, cadro gudijx Jesucrist guiralii rextojl̄nu. ¹⁵ Cheni gujt Jesucrist lo cruzj bejni gaan loj reyäl̄guxhtis nájza guiraa reyäl̄rnibee xten bendxab nájza rexspritni. Basanxtujnireni nez loj guiraa rebejn̄. Laani bejni gaanreni cheni cuajni lo cruzj.

Colquuil recos ni najc xten xhaguibaa

¹⁶ Nicla tejtu na'c cubee sa'ni xcuent reyäl̄rajw nájza reyäl̄rä', niclaza xcuent redxe lanij nájza rexchej rebäicoob, nájza redxej ni rusilajzni. ¹⁷ Guiraa redee najc si'csi te balaa xten nani churu jääd, te guluiireni ni rujn balaaga, nalajznu ni'c najc Jesucrist. ¹⁸ Na'c gusaantu gudzucaj bejn̄ xcäl̄nasa'ctu te gunreni gactu nadolajz, te gan̄tu reangl̄. Sa' bejn̄ga richu' loj nani gajdreni fii; rchaloreni najczeni benro xcuent lagajc xhigabreni. ¹⁹ Laareni direni chanajl̄ Jesucrist nani rnibee, nani rujn roobru tiejxhni, nalajznu rexpejn̄ni, sa'csi lojni rca'reni ni rquim lastooreni, te ruchaagni sa' tejegareni si'c nadx-quiid bääl̄ cuä' dzujt lo tiejxh bejn̄, te gacreni tejsi con Dios.

²⁰ La'tu agujttu con Jesucrist, abiriitu lo rehxigab xten guedxliujre. Naj̄ x̄hcuent guibaj̄ntu sigajctis nabaj̄n rebejn̄ nani di gumbee xtidx Jesucrist, ä? x̄hcuent rusoobtu rediidx ni caj lo releii? Loj releii caj sa' diidxre: ²¹ "Di chahuallu dee, di gaulu ni'c, di canlu dec." ²² Luxh guiraa redee rnitloj che runnäj̄nini dzuun. Luxh guiraa sa' leiiiga najc diidxtis nani ruluii bejn̄. ²³ Guluiicani sa' releiiga rien asdo ruluiireni yäl̄nanduxh, luxh che rusoob bejn̄ releiiga rchaloreni raj̄nreni Dios, rchaloreni rac nadolajzreni, rusacsireni lagajc tiejxhreni. Niluxh xlai'si rujnreni guiraa redzuunga, sa'csi sanuutis rujnreni si'ctisni rlajz tiejxhreni.

3

¹ Palga anabansactu con Jesucrist, colquuil reyäl̄nasa'c ni yu' xhaguibaa cadro sobga' Jesucrist xladbee Dios. ² Colyjejn̄ xhigab xcuenttis reyäl̄nasa'c ni yu' xhaguibaa, na'c guntu xhigabtis xcuent reni yu' lo guedxliuj. ³ La'tu anajctu si'c bengut loj reyäl̄nasa'c ni yu' lo guedxliuj, luxh yäl̄nabaj̄n ni rajptu naj̄, yäl̄nabaj̄nga naga'tz con Dios xcuent Jesucrist. ⁴ Che guluiilosac Jesucrist ni najc xcäl̄nabaj̄ntu, dxejc nájza la'tu suluiilojtu con laani lo xcäl̄rdimbicha'ni.

Yäl̄naban̄biejw con yäl̄naban̄coob

⁵ Colcuäl̄az redzunguijdx xten guedxliuj nani rujntu, yäl̄rusguee gunaxteb, yäl̄rujn recosdxuudx, recos ni rdxaglaz tiejxhtu, rehxigab-guijdx, yäl̄rsiäb-lajz xhi xten bejn̄, guiraa redee rujn runijt bejn̄ lo Dios sigajc rujn bejn̄ che raj̄n bejn̄ rebanäj̄b. ⁶ Guiraa redzuunga rujn riääd xcäl̄rdxe'ch Dios yejc renani rujn sa' redzuunga. ⁷ Nájza la'tu bejntu sa' redzunguijdxga galoo cheni guyu'tu lo sa' yäl̄nabaj̄nga. ⁸ Niluxh naj̄ nájza la'tu colgusaan recosre; nalajznu yäl̄rdxe'ch, yäl̄ruche'ch sa'ni, yäl̄rujn latzsiäj̄ sa'ni, yäl̄rmiyaj sa'ni, nájza rediidx-dxuudx ni rniitu. ⁹ Na'c gusgueetu resa'tu, sa'csi nanab gusaantu nani bejntu cheni guyu'tu loj redzunguijdx. ¹⁰ Colyajc te beñcoob, ni guixeguee cayanijru xcäriejn̄ni, te gumbesa'ctu Dios, te gactu sigajc najc Dios ni benchee benguedxliuj. ¹¹ Lo yäl̄naban̄coobre rutiru benzijt, niclaza xpen̄ Israel, rutiza rebejn̄ ni ru' bee, niclaza bejn̄ ni di chu bee; rutiza benzijt, niclaza bejn̄ ni siääd zitduxh; rutiza mos, niclaza bejn̄ nani di chu lo bejn̄, sa'csi che rililajz

te bejn xtidx Jesucrist najcni tebloj con guiraa reni rililajz xtidx Jesucrist; guiraareni najc xpejn Jesucrist.

¹² Naj agule Dios la'tu te gactu xpejnni nani gac naya, nani sanälajzni, colguibajn con yäl'ruslasajz, na'c guidxe'chtu, colyacnadoo con yäl'nadolajz, colniiza nadolajz. ¹³ Colujyn huant, na'c guidxe'chtu loj sa'tu, palga yu' chu sa'tu rdxe'ch loj sa'ni, colgusiäj'l-lajztu sigajcni basiäj'l-lajz Dad Jesucrist lojnu xcuent rextojlnu. ¹⁴ Che abejntu guiraa recosre, colguilru yäl'sanälajz nani rusa' loj guiraa recosre. ¹⁵ Xcäl'rbedxilajz Dios guinibee neñ lastootu, sa'csi parpac ni'c gurejdxni la'tu, te gaczatu tejsi con rexpejn Jesucrist. Colgudeed xquixtios loj Dios.

¹⁶ Xtidx Jesucrist chuduxh neñ lastootu con guiraa yäl'najn, te guluiitu, te gulijdxtu tejsa resa'tu con redij nani gulä'p toDavid xpala'n Dios, näjza redij nani roltu, näjza redij nani rliä'p xpala'n Dios. Redijga golnu te guideednu xquixtios lo Dios neñ lastoonu. ¹⁷ Guira'ti nani guntu, sigajc rediidx ni rniitu, sigajcza redzuun ni rujntu, colyejn guiraani con laj Dad Jesucrist, coldeed xquixtios lo Dios xtadnu con laj Jesucrist.

Xho nanab guibajn te famiļ ni najc xpejn Jesucrist

¹⁸ Regunaa nani abachnaa, colgusoob xtidx chäältu sa'csi si'c rlajz Dad Jesucrist. ¹⁹ Reniguii nani abachnaa, colchanälajz chäältu, na'c guidxechnäjtureni. ²⁰ Reni najc biuux, colgusoob xtidx xtadtu loj guira'ti, sa'csi si'c rchagljajz Dad Jesucrist. ²¹ Reni najc Dad, na'c guche'chtu rexi'ntu, didi gac-huin lajzreni. ²² Reni najc mos, colgucuadiajg xtidx xlamtu lo guedxliujre loj guira'ti xtzuunni. Na'c gunsa'ctu dzuun che cahuiitisreni si'c rujn renani ruspa lajz bejntis. Con yäl'nadolajz colyejn dzuun sa'csi sanälajztu Dios. ²³ Guira'ti nani guntu, colyejnni guideb lastootu si'c xtzuun Dios, et si'c xtzuundi rebejntis. ²⁴ Anajntu lo Dad Jesucrist sica'tu yäl'nasa'c ni najc yäl'nabajn par tejpas, sa'csi loj Dad Jesucrist rujntu dzuun. ²⁵ Niluxh nani rujn recosguijdx, lagajc xcuent recosguijdxga gudeed Dios lojni, sa'csi tebloj rujn Dios guiraa rebenguijdx.

4

¹ Renani najc lam, coldeed loj rexmostu nani riäjł xca'reni sa'csi anantu näjza la'tu rajptu xlamtu xhaguibaa.

² Colchanuu colnab lo Dios, colsusin che rniabtu lo Dios. Colgudeed xquixtios lo Dios. ³ Colnabza lo Dios con nuure te gacnäj Dios narä gusule'ä xtidx Jesucrist, te gusule'ä redidx-xhiga'tz xten Crist. Xcuent ni'cza yu'ä neñ latzguiib. ⁴ Colnab lo Dios te guyasi gusule'ä rediidxga si'cni riäjł guiniä.

⁵ Colguibanšin loj rebejn nani di gumbee xtidx Jesucrist, colgusule' diidx cheni riäjł guiniitu lojreni. ⁶ Rextiidxtu nanab gacni si'c rchagljajz Dios, saruduxhza gac xtiidxtu te gacheetu xho riäjł gudzu'tu diidx loj tejsareni.

Lult xtixtios

⁷ Tiquico, bejtznu ni sanälajznu, ni runsa'c dzuun, ni najc xmos Dad Jesucrist, laani gusule'ni diidx lojtu xcuent guiraa rextzunä. ⁸ Ruxhaläni lojtu te gacheepactu xho yu'ä, te guspaani lajztu. ⁹ Laani jiädnäzani Onésimo nani najc te betznu ni sanälajznu. Laani najc tej resa'tu. Laareni gusule'zarenı guira'ti nani cadeednu ree.

¹⁰ Aristarco, nani yunäj narä neñ latzguiib, ruxhalni xtixtios lojtu näjza Marcw, betz prim xten Bernabé (abacuaä lojtu xcuentni, xho guntu, palga jiädhuiini la'tu, sacru colhuiini). ¹¹ Näjza Jesús nani laaza Justo, ruxhal xtixtios

lojtu. Laatisreni najc rexpejn Israel nani cayacnäj loj dzuun xten xcälrnibee Dios. Laareni ruspaa lazä. ¹² Epafra, ni najc te sa'tu, ruxhal xtixtios lojtu, luxh rniabduxhni xcuentu lo Dios te sudzu'tztu guntu guiragajc ni rlanj Dios guntu. ¹³ Narä rniliä xho rdzuun Epafra xcuent la'tu, näjza xcuent rebejn ni yu' guedx Laodicea, näjza guedx Hierápolis. ¹⁴ Lucas, doctoor ni sanälajznu, näjza Demas ruxhalzaren i xtixtios lojtu.

¹⁵ Coldeed xtixtios loj rebejtznu nani yu' guedx Laodicea, näjza loj Ninfas, näjza lo rebejn nani re' rolijzni. ¹⁶ Cheni agulujx bil'tu guijtzre, colguxhalni te jiełni nen guidoo xten guedx Laodicea, dxejcti colyelza guijtz nani baxhalä lo reben guedx Laodicea. ¹⁷ Colye'tz loj Arquipo: "Bahuisa'c xtznuun Dad Jesucrist nani cua'lu lojni. Bensa'c dzuunga."

¹⁸ Lagajc narä Pabl rucuaä xtixtiosre con lagajc naä, con lagajc xleträ. Colgusnaj-lajztu narä yu'ä latzguiib. Gacnäj Dios la'tu. Sugacni si'c.

Guijtz Ganid Lo Rebeñ Tesalónica

Bacuaa Pabl con rexamigwni lo guidoo guedx Tesalónica

¹ Narä, Pabl, näjza Silvan, näjza Timoteu cacuaanu guijtzre lojtu, resa'nu ni yu' guidoo lo guedx Tesalónica, reni yu' lo Dios Xtadnu näjza lo Dad Jesucrist. Guspaa Dios näjza Jesucrist lajztu, guscuedxizareni lajztu.

Xho huililajz beñ Tesalónica xtidx Dios

² Guet-guejt rdeednu xquixtios lo Dios xcuent guiraatu, rnaduxhza laaznu la'tu cheni rbejdx rniabnu lo Dios. ³ Ruzä'tnu lo Dios xtadnu xho rujntu dzuun sa'csi rililajztu xtidx Dios; näjza xho runduxhtu dzuun te racnäjtu sa'tu ni xhet rajpdi sa'csi rinälajztu Dios; näjza xho rutip lajztu cabäjztu guibi' Dad Jesucrist lo guedxliuj. ⁴ Bejtznu, racbeenu sanälajz Dios la'tu, laani aguleni la'tu. ⁵ Sa'csi che basule'nu xtidx Dios lojtu, et ganax diidxtis gujcnj, niluxh xcälrnibee Sprit Dxan xten Dios neñ lastootu bejn gucbeepactu diidx ni najc didxlii. Nanchesä'ctu xho gujcnu che guyu'nu lojtu. Si'c baluiinu la'tu te guibañsa'ctu.

⁶ Sigajcni nabannäjnu Dad Jesucrist sigajcza gusloj cua'tu xmoodnu, basoobzatu diidx guideb xcälrbalajz Sprit Dxan xten Dios ni baniidxni lojtu, mase gudejdtu trabajw. ⁷ Si'c gujc te baluiitu loj guiraa reni rililajz nez Macedonia näjza nez Acaya xho nungäjł gac. ⁸ Ni'c abire'ch xtidx Dios, xhet nejzdi Macedonia näjza Acayatis, bire'chza diidx guira nejz. Ro'c najnreni xho sanälajztu Dios, ni'c xhetru nanabti guiniinu lojreni. ⁹ Alga lagajc laareni rujyreni diidx xho guyu'nu lojtu; nägajcza xho basaantu gojntu rebanäjb te rajntu Dios ni nabajnpac ni najc guliipac. ¹⁰ Rujyzareni diidx xho cabäjzatu guibisac Jesucrist lo guedxliuj. Laazani najc Xi'n Dios ni guläs Dios lo rebengut, Jesucrist ni ruslaa nuurnu lo xcälrdx'e'ch Dios ni churu siääd.

2

Xhi bejn Pabl neñ guedx Tesalónica

¹ Naj lagajc la'tu najntu, bejtznu, et xlia'di bio'pnu lojtu. ² Et najntu xho gudéreni loonu, basacsíreni nuurnu guedx Filipos. Niluxh mase gudejdtu trabajw, gusutijpnu lo Dios, xhet bidxejbtinu basule'nu xtidx Dios lojtu, mase gudejdnu trabajwduxh. ³ Sa'csi dinu nulijdx la'tu con didx-xhi, niclaza didx-dxuudx, niclaza diidx ni rusguee. ⁴ Sa'csi rsoobnu xtidx Dios basannäjni nuurnu xtiidxni, ni'c rusule'nu xtidx Dios. Dinu guinii diidx te jiansa'cnu lo bejn, rniinu diidx te jiansa'cnu lo Dios ni ruhuii lastoonu. ⁵ Anajntu xho basule'nu xtidx Dios. Nicla tej dinu ninii xhi stee diidx ni xhet sajcdi lojtu. Dizanu nusule' xtidx Dios te xhiga'tz niennu gaan xhi nica'nu. Dios nanchee xcuent ni riennu. ⁶ Dizanu nidiil guiliä'p bejn xpala'nnu, niclaza la'tu, niclaza chu stee bejn, mase nungäjł niennu niacbeetu rajpnu yälrnibee sa'csi baxhal Jesucrist nuurnu. ⁷ Niluxh guc nadolajznu che guyu'nu lojtu, cuanäjnu la'tu si'c rcanäj te nan rexpäzni. ⁸ Sa'csi huinälazduxhnu la'tu, biennu xhigab xhet ganaxdi xtidx Dios guiniidxnu lojtu, näjza lagajc xaimnu guiniidxnu te guseednu la'tu xtidx Dios sa'csi sanälazduxhnu la'tu. ⁹ Bejtznu, la'tu rnalajztu xho biennu dzuun te biennu gaan xcäl'nabaannu. Biennu dzuun dxej-yääl, te di niednäjtu nuurnu lał ni basule'nu xtidx Dios lojtu.

¹⁰ Lagajc la'tu nancheetu, sigajc nanchee Dios, laaca biennu che guyu'nu lojtu: gujcnu bejn ni randuxh Dios, gujcnu bendxojn, gujcnu bensa'c.

¹¹ Anajntu xho baliidxnu la'tu, xho bascuedxinu lajztu si'c runnäj te dad rexingaanni. ¹² Guiraa dee biennu, te guibansa'ctu si'c nungäj gun reni najc xi'n Dios, lagajc Dios ni gurejdx la'tu te chunäjntuni lo xcäl'rribeeni näjza lo xcäl'rdimbicha'ni.

¹³ Ni'cni rdedduxhnu xquixtios lo Dios sa'csi che biejn diajgtu xtidx Dios ni basule'nu lojtu, cua'tuni si'c xtidx Dios xhet si'c xtiidxi ben guedxliuj. Niluxh gulii xtidx Diosni, sa'csi rusiani lastoo renani rililajz. ¹⁴ Bejznu, dxejcti bejntu lagajc si'c rujn rebejn xquidoo Dios nen reguedx Judea reni najc xpen Jesucrist; luxh gusajctu lagajc ni gusajcreni, basacsi reben lajdxtu la'tu. Sigajcza birinajl rexpen Israelreni. ¹⁵ Rexpen Israel bagu't Dad Jesucrist, si'cza bagu'treni lagajc rexprofe'treni, renani bacuaa xtidx Dios, barilaagwzarenu nuurnu. Direni chanälajz Dios, dizarenu gusaan chanajl rebejn Jesucrist. ¹⁶ Che rlanjnu gulijdxnu reni digac rexpen Israel, te näjza laareni laareni lo dojl, direni gusaan, si'ctis cagutajlreni xtojreni. Niluxh naj abiädapc yälrdxe'ch xten Dios yejcreni.

Rlajz Pabl nihuisacni ro'c

¹⁷ Bejznu, mase biriinu ro'c, naj dirunu guihuii lojtu, rnalazduxhnu la'tu, batijp lajznu jio'pnu ro'c, rlazduxhnu fisacnu lojtu. ¹⁸ Rlajznu nio'pnu, narä, Pabl xhidäl huält rlazä niälä, niluxh bendxab di nusaan. ¹⁹ ¿Xhini'c najc xcäl'rbääznu, xcäl'rbalajznu, xcäl'racnaronu? Lagajc la'tu gactuni che suunu nez loj Jesucrist che jiädsac Dad Jesucrist. ²⁰ La'tu najc ni ruspaa lajznu ni rliä'pza xpala'nnu nez lo Dios.

3

¹ Dxejc, che dirunu nutijp lajznu, biennu xhigab bianxtebä guedx Atenas.

² Dxejc baxhalä Timoteu, bejznu nez loj Jesucrist, te biädhuiini la'tu, sa'csi laani najcni te xpen Dios ni runnäj nuurnu dzuun, rniini xtidx Jesucrist, te guscuedxini lajztu, guzudzu'tzni xcäl'rililajztu. ³ Te nicla tejtü di guidxejb che jiäd reyälhuin sa'csi la'tu anajntu agule Dios nuurnu ni'c sidejdnu trabajw. ⁴ Cheni yusijcnu lojtu, rnixgaanu lojtu sidejdnu trabajw; niluxh si'cni agusojb diidxga naj. ⁵ Ni'cni diruna nutiplazä, baxhalä chu jiädnä diidx xho najc xcäl'rililajztu, sa'csi cadxebä andi abasguee bendxab la'tu, luxh xlia'si biennu dzuun guyu'nu lojtu.

⁶ Naj agubi' Timoteu, biädhuiini la'tu. Biadnäni ganax didxlii xho sanuu rililajztu xtidx Jesucrist, xho rinälajztuni, näjza sanuutis rnalajztu nuurnu, rlanjzatu fiitu loonu, sigajcza nuurnu rlanjznu fiinu lojtu. ⁷ Ni'cni, betznu, masä riädax xhixtenu, masä rdeednu trabajw, rbalajznu sa'csi la'tu sanuutis rililajztu xtidx Dios. ⁸ Naj laaca rdxunnu sa'csi racbeenu sudzu'tztu nez loj xtidx Dad Jesucrist. ⁹ Xhocha gac guideednu xquixtios lo Dios xcuent guiraatu naj xcuent yäl'rbalajz ni yu' lastoonu xcuent la'tu nez lo Dios. ¹⁰ Dxejyäl rniabnu lo Dios gusaanni jiophuiinu la'tu te gusa'nu guiraa rediidx ni cayäädx gacheetu xcuent xcäl'rililajztu.

¹¹ Rniabnu lo Xtadnu Dios, näjza lo Dad Jesucrist, gacnäjreni nuurnu te gac jiophuiinu la'tu. ¹² Rniabzanu lo Dad Jesucrist, gunni gustiobruni lastootu te ga'prutu yäl'rinälajz loj resa'tu näjza loj guiraa rebejn, si'cni rinälajznu la'tu, ¹³ te gunni sudzu'tz lastootu, na'c ga'ptu dojl nez lo Xtadnu Dios, che jiäd Jesucrist näjza guiraa rexpejni xhaguibaali.

4

Guibajñnu si'c rchaglajz Dios

¹ Naj, rebejtznu, rniabduxhnu lojtu, ruliidxnu la'tu con laj Dad Jesucrist, guibajñtu si'cni baluiinu la'tu nungäj] guibajñtu te guspaatu lajz Dios, te si'c chanuutis guibañsa'ctu nez lo Dios.

² La'tu, anajntu rediidx ni baluiinu lojtu con xcäl]rniee Dad Jesucrist.

³ Lagajc Dios rlajz nayatis guibañsa'ctu, na'c gun niguii dojl] guesnä] gunaa ni di gac chäälni, sigajcza na'c guesnä] gunaa niguii ni di gac chäälni. ⁴ Tejgatu gantu xho guibaññajtu chäältu nayatis näjza xpala'nni. ⁵ Xhet si'c ni rujndi regunadxab näjza reniguii, nicla si'c ni rujn rebejñ ni di gumbee Dios. ⁶ Rut chutejditu gusguee bejtzni lo redzunguijdxre, sa'csi Dios susacs] guiraa rebejñ ni rujnza redojl]re, ni'cni abiniinu lojtu, agunixgaanu diidxre lojtu. ⁷ Sa'csi Dios gurejdxni nuurnu te guibajñnu lo yäl]nabañnaya xtenni, xhet lo yäl]nabañdxuudxi. ⁸ Ni'cni bejñ ni di gucuadiajg rediidxre, dini gac xtiidx te bejñ ni dini cuadiajg, xtiidxpac Dios ni dini cuadiajg, Dios nani abaniidx Sprit Dxan xtenni loonu.

⁹ Ditu guiquiin gucuääru diidx xho chanälajztu resa'tu, sa'csi lagajc Dios abaluiitu xho chanälajztu resa'tu. ¹⁰ Luxh rinälajztu guiraa reni rililajz, guiraa reni siääd guideb nez Macedonia. Ni'cni rniabnu lojtu bejtznu, chä'pru xcäl]rinälajztu. ¹¹ Colgutijp lajztu, dxitis colguibajñ, coljiu xtzuuncatu, lagajc naatu colovejñ dzuun si'cni agunibeenu guntu. ¹² Te fii rebejñ ni di chalilajz laaca nabañsa'ctu, nägajcza te xhet jiäädxi xhi rquiintu.

Xho gac che jiädsac Jesucrist lo guedxliuj

¹³ Bejtznu, rlajznu gacbeetu xcuent rebegut te di gac-huin lajztu si'c rujn rebejñ ni di chalilajz xtidx Dios. ¹⁴ Si'c ni rililajznu gujt Jesucrist, dxejg gubañsacni, sigajcza rililajznu suspañsac Dios guiraa reni nagayejs neñ baa, renani huililajz xtidx Jesucrist. Luxh che guibi' Jesucrist, siädñanireni.

¹⁵ Xcuent xcäl]rniee Jesucrist rniä lojtu, nuurnu ni nabajñnu che jiädsac Jesucrist, dinu nid loj reni nagayejs neñ baa. ¹⁶ Sa'csi lagajc Dad Jesucrist siäj] lo guedxliujre, sibedxa'ni, siejnzaxse' guixhajg ni rniee, sibedxa'za trompet xten Dios. Dxejg sibañxgaa reni nagayejs neñ baa, reni huililajz xtidx Crist. ¹⁷ Dxejg nuure ni nabañsijcnu sidxaagnureni neñ rebäj te lo bej chachagloonu Dad. Si'c chonnu cholaznä]nni par tejpas. ¹⁸ Ni'cni rniä lojtu, col]cuedxilajz sa'tu con rediidxre.

5

¹ Niluxh xcuent redxejga, reijzga, xhet riquiinditu gucuääni lojtu, ² sa'csi la'tu anansa'ctu sidzujñ dxej ni jiääd Jesucrist cheni rut cayunlojdiñi, sigajc che riääd te gubaan yääl. ³ Che canii bejñ: "laaca dxunnu, dxunsa'cnu", chela gacbeereni acadejdreni trabajw si'c che rdzujñ yäl]nayan te gunaa che rajl xi'nni, luxh digacdi guxunreni lojni. ⁴ Niluxh bejtznu, di gac nayäältu te di che xhet cayunlojditu dxej xten Jesucrist, guidzunxhiga'tz dxejga si'c gubaan. ⁵ Sa'csi guiraatu najctu beñsa'c nabajñtu lo bianij, lo rdxee, dinu gac benguijdx, dinu guibajñ lo yääl, lo yäl]rcäjy. ⁶ Ni'cni di nungäj] guidiesnu si'c rejs stecuaa bejñ, ni'cni nungäj] sunasiñnu na'cza jiennu redojl] ni rlajz tiejxhnu. ⁷ Reni rejs, rejsreni yääl, reni rsiojz, rsiojzreni yääl. ⁸ Niluxh nuure nabajñnu lo rdxee, ni'cni nanab na'c jiennu si'c, riäj] xca'nu yäl]rililajz näjza yäl]rinälajz si'c rca' soldaad gamangw guuib ni rajcwni, ni rusäuu lastooni. Riäj]lza guiläzdu'tznu sa'csi yäl]rus]laa lo dojl] najc si'c xhumbrel-guib ni ru' yejç

soldaad ni rusäuu yejçni. ⁹ Sa'csi di Dios nibe nuurnu te chonnu gabijl, alga guleni nuurnu te xca'nu yäl'nabajñ ni rudeed xi'nni, Jesucrist. ¹⁰ Sa'csi gujt Jesucrist lacuaa nuurnu, te guibannäjñuni masä nabajñnu lo guedxliujre o nagayejsnu neñ baa che guibi'ni. ¹¹ Ni'cni, colguspaaj lajz sa'tu, tejtü sigajcza steetu, sigajçni cayujntu ñaj.

Rulijdx Pabl resa'ni

¹² Bejtznu, rniabduxhnu lojtu, colhuiduxh reni ruluui xtidx Dios lojtu, sa'csi agule'c Dadreni te guinibeereni, te gulijdxreni la'tu. ¹³ Riäjłza chanälazduxhtureni xcuent dzuun ni rujñreni. Colcuedxi con resa'tu.

¹⁴ Rulijdxnu la'tu, bejtznu, colgulijdx reni najc beñłatsiaj; colsudzu'tz lajz reni guxii rbalajz lo xnez Dios; colgacñäj reni di gumbesa'c xtidx Dios, colcuedxci lajz guiraasi bejñ.

¹⁵ Colhuii di chu tejtü gunza dolguijdx lo rebejñ ni rujñ dolguijdx. Laaca guntu ganax dzunsa'c lo sa'tu, sigajcza lo chutis bejñ.

¹⁶ Colguibalajztis guideb nabajñtu. ¹⁷ Na'c cuääz guiniitu lo Dios. ¹⁸ Mase xhitis rsiajçtu, coldeed xquixtios lo Dios, sa'csi si'c rłajz Dios gun reni rililajz Jesucrist.

¹⁹ Di cuälaztu xtidx Sprit Dxan xten Dios ni rniini neñ lastootu. ²⁰ Na'c cuälaztu xtidx reni rnii xtidx Dios xcuent nani churu gac. ²¹ Colquiił guiraa rediidx, coljiannäjtis rediidx ni najc didxsa'c. ²² Colbicaj lo guiralii dolguijdx.

²³ Lagajc Dios, Dios ni rbecdxi lajztu, gusiapac lastootu, te cucheeni xaimtu, ñäj lastootu, ñajza tiejxhtu, te na'c guntu dojł ni di riäjł guntu te cuääztu dxej ni guibisac Dad Jesucrist. ²⁴ Dad ni gurejdx la'tu rujñza guiraa ni rniini, ni'c sujñzani guiraa redzuunre.

Ruzadiidxnireni

²⁵ Bejtznu, colñab lo Dios xcuent nuurnu.

²⁶ Colgudeed xtixtios lo rebejtznu ni yu' ro'c.

²⁷ Con laj Dad Jesucrist rnibeä, gołtu guijzre loj guiraa rebejtznu.

²⁸ Gacñäj Dad Jesucrist la'tu. Sugacni si'c.

Guijtz Ni Rojp Lo Reben Tesalónica

Rucuaanu guiτζzre lojtu, rexpen Jesucrist ni rbājz guedx Tesalónica

¹ Narā Pabl, nājza Silvan nājza Timoteu, cacuaanu guiτζzre lojtu, rebejtznu ni yu' guidoo lo guedx Tesalónica, reni yu' lo Dios Xtadnu nājza lo Dad Jesucrist. ² Gacnāj Dios Xtadnu nāj Dad Jesucrist la'tu, guscuedxizareni lajztu.

Gun Dios yālguxhtis loj rebeñdojl che guibi' Jesucrist lo guedxliuj

³ Bejtznu, ruedeenu xquixtios lo Dios xcuenttu, si'c riājł jienunni, sa'csi xcālřililajztu siādroobru, nājza yāłřināłajz ni rajp tejgatu nājza sa'tu siādroobruni.

⁴ Ni'cni rliā'pnu xpala'ntu neñ reguidoo xten Dios. Rbaa lajznu sa'csi rsiudzu'tztu sanuutis rililajztu xtidx Dios mase rdejdtu trabajw, rusacsı bejntu. ⁵ Dee ruluiipac xcālguxhtis Dios najc laaca, ni'c rnii Dios riājł jiu'tu lo xcāłřnibeeni sa'csi cadejdtu trabajw xcuent yāłřnibeega.

⁶ Sa'csi rujn Dios xhigab riājłz guix reni bateedtu trabajw xtojłreni, ni'c suteedzani reni'c trabajw. ⁷ Niluxh la'tu ni cadejdtu trabajw, sujñ Dios gusilaznājtu nuure che guluii loj Jesucrist, siriini xhaguibaa siādnājni rexangłni ni sajc, ni rnibeduxh. ⁸ Lo te balduxh siāādni, dxejc guisloj susacsıdixhni reni di gañ Dios, dizareni gusoob xtidx Dad Jesucrist nani rudzucaj dojl. ⁹ Guiraa reni sidejdreni trabajw, par tejpas agunijtreni, zijt chureni lo Dios, lo yāłřimbicha' xten xcāłřnibeeni. ¹⁰ Che jiāād Dad guiriini xhaguibaa, dxejga siliā'p rexpejñni xpala'nni, sidxelojza renani huililajz laani nājza la'tu, sa'csi huililajztu diidx ni basule'nu che guyu'nu lojtu.

¹¹ Ni'c rniabtisnu lo Dios por la'tu, rniabnu lo Dios guinaj lajzni nabajntu si'c riājł guibajñ reni guleni. Rniabzanu guniıd Dios lojtu guntu guiraa redzusa'c ni rchagłajz Dios guntu, gacnājzani la'tu con xcāłřnibeeni te guntu redzunu ni rujntu sa'csi rililajztu. ¹² Te chā'p xpala'n laj Dad Jesucrist si'cni nabajntu, te laani guiliā'pzani xpala'ntu, xcuent yāłřināłajz xten Dios nājza Dad Jesucrist.

2

Benđolduxh

¹ Naj, rniabduxhnu lojtu bejtznu, xcuent dxej ni jiāād Jesucrist, dxej ni guidojpzanu lojni, ² na'c chugajtu yarsia'. Na'cza gusaantu guchejbreni la'tu con diidx ni ruluii te bejñ ni najc profe't, nicla con diidx ni rnii stee bejñ lojtu, niclaza con diidx ni naareni lojtu caj loj te guiτζz ni naareni baxhałnu lojtu, cadro caj “dxej ni guibi' Jesucrist abidzujñ”. ³ Na'c gusaantu gusguee bejñ la'tu xcuent rediıdixre. Che gajd dxejga guidzujñ, su' bejñ ni sibałaz xtidx Dios, dxejc sului loj bełłatsıduxh, xi'n nani sinitloj par tejpas. ⁴ Bejñre siliā'p lagajc xpala'nni, sidxe'chni lo guiraa ni sanā laj Dios, nājza xhitis ni rajñ bejñ, te cueni neñ xquidoo Dios, gului lojni si'c lagajc Gueb Dios.

⁵ ¿La di lajztu guisaj cheni guyusıcā lojtu, rniā rediıdixre lojtu, ā? ⁶ Naj la'tu anajntu xhini'c ruscuāāzni, te na'c guirıcajni ansde guisa' redxej xtenni. ⁷ Te yāłřhıga'tz najc dzunłatsıaj ni alacayajc lo guedxliuj, cayāādxtis guıbicaj nani gacuscuaāzni galāiini. ⁸ Dxejc sului loj bełłatsıduxhre. Niluxh Dad Jesucrist, sugu'tnini con bero'ni, che guibi' Jesucrist lo guedxliuj xpianijni sujñ nitlojni. ⁹ Bełłatsıduxhre najc si'cpac najc bendxab. Che guidzujñni,

guidzujñni si'c te bejn nani rnibee, sujñni seen, sujñzani milagrwn ni rusguee. ¹⁰ Con xcállatsiaj bejnre susgueeni guiraa renani alagunijt lo Dios sa'csi direni nicájb ninälajzreni didxlii ni nuslaareni neñ dojl. ¹¹ Ni'cni susaan Dios jiääd te yälrusgueduxh te chalilajzreni didx-xhii. ¹² Te gabijl jii guiraa renani di nicájb nililajz didxlii, alga bidxagljazreni yällatsiaj.

Reni gule Dios guirii neñ dojl

¹³ Niluxh nuurnu riäjlgudeedtisnu xquixhtios lo Dios por la'tu, bejtznu, ni sanälajz Dad Jesucrist. Rudeednu xquixhtios sa'csi galooli gule Dios la'tu te guslaani la'tu lo dojl, xcuent Xsprit Dxanni ni rusia lastootu, nájza redidxlii ni huililajztu. ¹⁴ Ni'cni che biejn diajgtu diidx ni basule'nu lojtu, gurejdx Dios la'tu, te xca'zatu xcälrdimbicha' Jesucrist.

¹⁵ Naj bejtznu, colchanuu, colsudzu'tz, na'cza jiällajztu rediidx ni baliidxnu la'tu che guyu'nu ro'c, nájza rediidx ni bacuaanu lo guijt ni baxhalnu lojtu.

¹⁶ Lagajc Dad Jesucrist, náj Dios Xtadnu, ni sanälajz nuurnu, ni ruscájñ lajznu par tejpas, ni baniidx xcälrbääznu racnájni nuunu, ¹⁷ guspaani lajztu, gusudzu'tzni la'tu lo guiraa redidxa'c ni guiniitu nájza redzuunsa'c ni guntu.

3

Colñab lo Dios xcuent nuurnu

¹ Bejtznu, colñab lo Dios xcuent nuurnu te chanuu guire'ch xtidx Dad Jesucrist, te che gusoob bejn diidxga chä'p xpala'n diidxga, sigajcni gujçni con la'tu. ² Colñabza lo Dios xcanájni nuurnu te di tednu ladzña rebenlatsiaj, rebengujidx, sa'csi xhet guiraadi bejn rajp yälirilajz. ³ Dios rusoob xtiidxni, susudzu'tzni la'tu, sacnájzani la'tu te di sactu dolgujidx. ⁴ Abascuedxi Dios lastoonu xcuenttu sa'csi anancheenu cayujntu guira'ti nani gunibeenu guntu, luxh si'cza sinuu gusoobtu xtiidxnu. ⁵ Canabä lo Dad Jesucrist guniidxni gacbeerutu xcälsanälajz Dios, canabäza colçuedcxi lajztu si'cni bejn Crist che gudejdni trabajw.

Nanab jiennu dzuun

⁶ Bejtznu, con laj Xtad Jesucristnu, rnibeenu guibicajtu lo chutis te sa'nu ni ricanzajtis, ni di rlanj gunni dzuun. Guibicajzatu loj reni di guibajn si'cni baluiinu riäjlguibajntu. ⁷ La'tu anajntu xho riäjlguibajntu, chanuutu guntu si'cni riennu nuure. Najntu nuurnu dinu nicanzaj che guyu'nu lojtu sa'csi biennu dzuun. ⁸ Dizanu nidauxlia' xcu'n chu tejt; guiraani bidiixnu, biennu dzuun dxej-yääl, te di nutaalnu xtzuum chu tejt. ⁹ Masä nungäjlniniabnu niacnájtu nuurnu, dinu niniabni; alga biennu dzuun te baluiinu xho chanuutu. ¹⁰ Cheni guyu'nu lojtu, gunibeenu scree guntu: Chutis ni di rlanj gun dzuun di riäjlgca'ni xhi gauni. ¹¹ Aguniireni loonu baltitu rcanzajtis, direni gun dzuun, alga rihuiireni xhi cayujñ rebejn. ¹² Rulijdxnu rebejnre, rnibeenureni con laj Xtad Jesucristnu: colçuedcxi, colyejn dzuun te gautu.

¹³ Bejtznu, na'c guidxajgtu guntu dzunsa'c. ¹⁴ Palga yu' chu tejt di gucuadiajg xtiidxnu ni caj lo guijtze, colhuii chuni'cni te na'c guchaagtuni, te guitujyni. ¹⁵ Niluxh na'c ga'ptuni si'c ni rdxe'ch lojtu, colguliidxni si'c bejtztu.

Rusadiidxnireni

¹⁶ Gueb Dios xten yälrbedxi, guscuedcxi lajztu guixe-guixee, masä xhitis sajctu. Jiannáj Dad Jesucrist guiraatu.

¹⁷ Narä, Pabl cacuaä xtixtiosre con naäpac si'c runä lo guiraa rexquitzä, scree rucuaä. ¹⁸ Gacnä j Xtad Jesucrist guiragajctu. Sugacni si'c.

Guijtz Ganid Lo Timoteu

Pabl rucuaa te guijtz lo Timoteu

¹ Narä Pabl, nacä te apost xten Jesucrist, rucuaä guijtzre lojlu. Nacä apost sa'csi si'c gunibee Dios ni ruslaa nuurnu lo dojl näjza Dad Jesucrist nani cholääznu. ² Timoteu, luj najclu si'cpac xinganä lo yälirililajz. Xtdanu Dios näjza Xtda Jesucristnu gacnäjl, gulaslajzreni luj, guscuecdxireni lastoolu.

Pabl rulijdx xcuent reni ruluii diidx-xhii

³ Che sia'ä reguedx Macedonia, gunibeaä jia'nlu guedx Éfeso te gulijdxlu gaii bejn te na'c guluiireni garenca diidx, ⁴ te na'c jiutejreni rexluent rebentiemp, te na'cza jiuduxhreni chu gujc rexpengoldooreni, sa'csi di rediidxre gacnäj guiroobru lastooreni si'c rustioob yälirililajz lastoonu. Naj rnibeä si'c chanuu gulijdxlu rebejn.

⁵ Rulijdxnu bejn te ga'preni yälrinälajz sa'reni. Ganid nanab gacnaya lastooreni, nanab ga'preni xhigabsa'c, nanabza chalilajzpacreni. ⁶ Yu'reni abaro'n rediidxre, riejytis ro'reni saniduxhreni diidx ni xhet sajcdi. ⁷ Rlajzreni gacreni bejn ni najn leii, niluxh niclaza laareni direni gacbee xhi säloj ni rniireni, niclaza xhi säloj rediidx ni ruluiireni, räjpreni, didxliipac dee'.

⁸ Anajnnu leii xten Dios najc sacduxhni, palga jiennu si'cni rniipacni. ⁹ Najnnu di leii gac par bensa'c, najcni par reni najc beñlatsiaj ni di jiu leii xten Dios, näjza reni di gusoob diidx; par reben guiidx, näjza rebendojl; par reni di jiu Dios, näjza reni rusguee; par reni rugu't xtdadni, xnanni, näjza guiraa reni rugu't bejn; ¹⁰ par reni resnäj te gunaa ni digac chäälreni, näjza reni resnäj lagajc saniguiireni; par reni rbajn bejn; reni rnii didx-xhii; reni rnii didx-xhii si'c didxle' parsi rusguee sa'reni; näjza bejn ni rujn xhitis xhi xtee dzuun ni digac dzunsa'c, ¹¹ nalajznu sa' redzunsa'c ni rulijdx xtidx Dios-le', diidx ni ruslaa lo dojl. Narä biannää diidxre.

Rudedni xquixtios lo Dios sa'csi rulaslajznini

¹² Rdedä xquixtios lo Dad Jesucrist ni runiidx yälrnibee narä sa'csi najnni nasobdidxä, ni'cni guleni narä gunä xtzuumni. ¹³ Luxh galoo guniyaäni, birinalä xpejnni, basacsä'reni. Niluxh Dios balaslajz narä, sa'csi dina niacbeä xhini'c cayunä, sa'csi gajdna chalilazä. ¹⁴ Niluxh lacti guroob gujc yälracnäj xte Xtdanu, guideb yälirililajz, näj yälšanälajz ni rajp Jesucrist.

¹⁵ Diidxre najc guliduxh, nanab chalilajzpacnuni: Jesucrist biääd lo guedxliujre te guslaani reben dojl; lo reben dojl narä nacäru bendolduxh. ¹⁶ Ni'cni balaslajz Dios narä, mase nacä bendolduxh lo guiraareni, te ganid con narä guluiini xho rbäjz Jesucrist te chalilajz bejn xtiidxni, te filoj reni churu chalilajz xtiidxni te ga'preni yäl'nabajn par tejpas. ¹⁷ Dios najc reii, reii ni di guet, reii ni di guzen, laatisni najc Gueb Dios ni nanduxh, ni'cni colguliä'p xpala'nni, colgajnni guideb guibajntu näjza par tejpas. Si'c gacni.

¹⁸ Xi'nä, Timoteu, dee najc yäl'rulijdx ni runidxä lojlu te gucuaasa'clu si'c te soldaad ni abisieed, sigajc ni gunii reprof'e' xcuentlu galoo. ¹⁹ Di gunijltu yälirililajz, bejnza xhigabsa'c, sa'csi yu'reni abaro'n xtidx Dios, ni'c abanijtreni yälirililajz. ²⁰ Si'c gusajc Himeneo näj Alejandro, luxh abatedä'reni ladznaa bendxab te guisieedreni na'c guiniya'reni Dios.

2

Ruluini xho guiniabreni lo Dios

¹ Rulidxälu ganiddoo cueedxlu, guiniablu lo Dios, gudeedlu xquixtios lo Dios xcuent guiraa rebejn. ² Guiniabzalu xcuent reerei näj guiraa reni rnibee lo guedxliujre, te gac guibandxinu, te gac chanuunu xnez Dios, te saru guibajnnu. ³ Sa' yälriabiaga najc laaca, luxh si'c rdxagljaz Dios ni rusläa nurnu lo dojl guiniabnu lojni. ⁴ Dios rlanj laa guiraa bejn lo dojl, rlanjzani gacheepacreni xtidxliini. ⁵ Yu' tejtis Dios, näjza tejtisza nani rusiäjl diidx lo Dios näjza loj reben guedxliuj. Laani najc Jesucrist ni gujczya niguii. ⁶ Jesucrist gujt lo cruzj te gudijxni redojl xten guiraanu ni tre' lo guedxliuj. Dee gujche gojl dxej ni gule Dios. ⁷ Dios gule narä te gacä apost te gusule'ä xtiidxni, yälirilajz näjza didxlii lo reni di gac xpejn Israel. Si'c ni rlanj Jesucrist rniä didxlii, dina guiniä diidx ni rusguee.

⁸ Ni'cni rlazä guiraatis lajt guiniab rebejn lo Dios, saru guiliäs naareni, gusaanreni yälrdxe'ch, na'c gunreni biey. ⁹ Si'cza regunaa, saru gacwreni xhajbreni, na'c gacreni gunaroxhi, cuedxireni. Xhet si'cdi regunaa ni entis rsiucheduxh con oor o perl o ladsajc, rajc guichniil yejcnj te guidxeloj bejnreni. ¹⁰ Masru ruchaag gunreni si'cni rchalglajz Dios, si'c riäjł gun guiraa regunaa ni yu' lo Dios. ¹¹ Riäjł dxitis gucuadiajg regunaa xtidx Dios ni rusule' reniguii. ¹² Dina xcäbä gusule' te gunaa diidx lo guiraa rebejn, niclaza guinibeeni lo reniguii, dxitis cueni lo rebejn ni cagucudiajg diidx nani cagusule'ni. ¹³ Sa'csi ganid benchee Dios Adán, dxejctiru bencheeni Eva. ¹⁴ Luxh et Adandi basguee bendxab, bendxab basguee gunaaga, dxejc biajbni nen dojl. ¹⁵ Niluxh siliaa regunaa, palga jjureni xtzunreni si'c nan, palga chanuu chalilajzreni xtidx Dios, palga chanälajzreni sa'reni, palga chutisreni lo Dios, gaczareni gunasa'c cuedxireni.

3

Xho riäjł gac reni rnibee

¹ Dee najc diidx gulii: palga rlanj te niguii ga'p dzuun xten Dios, gusule'ni xtidx Dios, guinibeeni rebejn, te dzunsa'c najc ni rlanjzni gunni. ² Ni'cni, ni rlanj gac nani rnibee, riäjł guibaŋsa'cni te na'c chu xhicuent guiniyaj rebejn. Riäjł gacni chääl tejtis gunaa, riäjł susinni, gacni te beŋsa'c, cuedxini, te guibaŋsa'cni. Riäjłza di gudxojni rolijzni guidzujñ bejn, nägajc riäjł gacni te bejn ni nansa'c te guluiini. ³ Na'c gacni te bengu, nicla te ni rdxagdijł bejn, na'cza gacni te nani rsia' laljzni ga'pni xhidajł meel, riäjł cuedxi lajzni, na'c chanälaljzni meel. ⁴ Riäjł guinibesa'cni rolijzni, saru gunni te gusoob rexi'nni xtiidxni. ⁵ Sa'csi palga di te bejn gan xho guinibeeni lagajc rolijzni, aticaxh gac ga'pni guidoo xten Dios. ⁶ Di riäjł guinibee te beŋcoob nani entis huililajz, te di guschä'pni xpala'nni sas jiajbni lo lagajc xcälñaj Dios ni biajb bendxab. ⁷ Luxh riäjłza guinii reni di chalilajz xtidx Dios laaca najcni, te na'c jianxtujyni, te na'cza jiajbni ladzñaa bendxab.

Xho riäjł gac reni rcanäj nen guidoo

⁸ Si'cza rediaconos riäjł gacreni bejn ni yu' xcäriejnreni, nanab gunreni si'cpac ni rniireni, na'cza soozreni, na'c xca'reni meel ni direni niunsa'c gaan. ⁹ Riäjł gapdzu'tzni rediidx nagajn xten yälirilajz, ni'c nanab gac naya lastooreni. ¹⁰ Riäjł fixgaatu xho nabajñreni. Palga nabaŋsa'creni, rutza gacdi gucuaqujidireni, sajc gacreni diacono. ¹¹ Regunaa ni rlanj gac diaconas

riäjłza chu xcäriejnreni, na'c güireni diidx ni di guchaag, na'c soozreni, gacreni gunasa'c, cuedxireni, gunreni si'cpac ni rniireni lo guira'ti dzuun. ¹² Riäjł gac rediacono cháäl tejtis gunaa. Riäjł guinibesa'cni rexi'nni näj guiraa reni yu' rolijzni. ¹³ Sa'csi rediaconos ni runsa'c xtzuumni, sanälajz bejnreni, dizareni guidxejb rsiudzu'tz lastooreni lo xcälrlililajz xtidx Jesucrist.

Gurobduxh najc yälxhiga'tz xten Jesucrist

¹⁴ Cacaüä diidxre lojlu, niluxh rlazä jädhuigaä la'tu. ¹⁵ Luxh palga gaclaä, anajnlü xho riäjł guibajñ bejn rolijz Dios, nalajznu xquidoo Gueb Dios ni nabajñ par tejpas. Guidoore rniasdzu'tz näjza rulüüiru didxlii xten Dios.

¹⁶ Rdxeloyaduxh guiralii bejn yälxhiga'tz xten xcälñajñ Dios:

Dios biääd lo guedxliuj si'c te beñguedxliuj,

Sprit Dxan xten Dios gunii beñdxanni;

bahuii rexangl Dios lojni;

basule'reni xtiidxni lo rebejn ni di gac xpejn Israel;

guira lajt huililajz bejn xtiidxni;

huäjsni lo xcälrdimbicha' Dios xhaguibaa.

4

Reni rbicaj lo xnezyuj Dios

¹ Aguniipac Sprit Dxan siääd redxej che chu reni guro'n yälrlililajz, sucua-diajgrenti xtidx rebejn ni rusguee näj xtidx rebendxab, ² nicla jiureni rniireni didx-xhii ni rusguee, sa'csi xhetiru xcäriejnreni, anajcni si'c najc cadre rudxujy te guiblaa: xhetru racheedini. ³ Sulüüi rebejnre na'c guchñaa bejn, suluiizareni na'c gau bejn guiraloj, niluxh Dios bejnpac redee te xca' rebejn ni rililajz, ni racheeza didxlii, te gudeedreni xquixtios lo Dios. ⁴ Guiralii reni benchee Dios najc laaca, di riäjł cuälaznu xhi rca'nu che rudeednu xquixtios loj Dios. ⁵ Sa'csi xtidx Dios näj yälrbedx-rniab lo Dios runsa'c guira'ti.

Te ni runsa'c xtzuum Jesucrist

⁶ Palga susnajlu lajz rebejtznu rediidxre, sajclu te mossac xten Jesucrist, luxh si'c sisieedruzalu diidx xten yälrlililajz, näj yälrluisa'c ni sanuulu. ⁷ Na'c jiulu ni rniü regunaroyeii ni xheti xtzuumni. Bisieed sudzu'tz lastoolu lo xtidx Dios. ⁸ Guxii sajç guinibduxh bejn te gusutiijpni tiejxhni. Niluxh sacduxhru cucheeni xtidx Dios neñ lastooni, sa'csi racnäjni bejn lo yälñabajñre näjza lo yälñabajñ ni najc par tejpas. ⁹ Dee najc didxlii, riäjł chalilajz guiraatuni. ¹⁰ Ni'c riennu dzuun, rdeednu trabajw, sa'csi cabäjznu Gueb Dios ni nabajñ, ni rusłaa bejn lo dojl, ganiddoo renani rililajz xtiidxni.

¹¹ Sajplu guinibeelu soob rediidxre, näjza gulüülu rediidxre. ¹² Di gusaanlu cuälazreni luj sa'csi najclu bi'n; riäjł gaclu te ni suu te fi guiraa reni rililazsa'cpac xho rniülu, xho nabajñlu, xho sanälajzlu sa'lu, xho rililajzlu, näjza xho rajplu xhigabsa'c. ¹³ Lał ni guidzuna' ro'c, bil xtidx Dios lo rebejn, balijdxreni, baluiiza xtidx Dios lojreni. ¹⁴ Di gusaanlu reyälñajñ ni baniidx Dios lojlu cheni basuj rebengool ñaareni yejclu por xtidx Dios, guniireni diidx xcuent nani churu gac.

¹⁵ Guet-guejt basnaj lajzlu rediidxre, biusa'c rediidxre, te gac fi guiraareni xho sanuulu lo xtidx Dios. ¹⁶ Gopdzu'tz lagajç luj näjza rediidx ni rulüülu; guzudzu'tz lo guiraa rediidxre, te si'c laalu lo dojl, te laaza reni rucua diajç xtiidxlu.

5

Xho guibanäjnu reni rliłajz

¹ Na'c quidxa'lu loj te bengool; guninäjni si'c xtdalu, balijdx rebi'n si'c bejtzlu, ² balijdx renanbengool si'c xnanlu, balijdx redxap steeb si'c rebisiajnlu con rexhigabsa'c.

³ Gucnäj rebiuud ni guliipac rquiin chu gacnäjni te chu xhi gaureni.

⁴ Niluxh palga yu' chu biuud yu' xi'nni o xajgni, suguisiedxgaareni guibanayareni lo xnez Dios, te quixreni di'n ni nasääbreni lo xtdareni, näj xnanreni ni baslaareni, sa'csi ni'c najc laaca, rdxagłajzza Diosni. ⁵ Gunaa ni najcpac biuud, abia'n xtebni, ni'c rbäjztisni lo Dios, dxej-yääl rbejdx-rniabni lo Dios. ⁶ Niluxh biuud ni nabajñ cadedgustisni najc si'c te ni agujt neñ dojl. ⁷ Basule' rediidxre lojreni te rut gucuaquijdireni. ⁸ Palga yu' chutej ni di gacnäj resa'ni, lagajc reni rbäjz rolizni, ni'c agulälaz xtidx Dios, benguijdxru najcni lo rebejn nani di chalilajz xtidx Dios.

⁹ Di gucuaalu laj rebiuud lo guijt te gacnäjtuni palga gajdni chu gayojñ ijz. Riälzla gac biuudga te gunaa ni gubanäsa'c chäälni. ¹⁰ Riälzla gumbee bejnñi xcuent redzunsac ni rujñni; palga baslaani rexi'nni, palga badedlaani rolizni gues ben zijt, palga gudiibni ni' rexpejn Dios te si'c guzen xcälñadolajzni, palga racnäjni reni rdejđ trabajw, palgaza riuni rujñni guira'ti redzunsac.

¹¹ Niluxh na'c gucuaalu laj biuud ni yu' guxiiru ijz sa'csi che guichagłajzreni te niguii, siälłajzreni diidx ni bia'nreni lo Jesucrist, te rłajzni guchnasacreni. ¹² Dxejc siu'reni neñ dojl sa'csi rbälazreni rediidx ni bia'nreni che galoo bejnreni xhigab ninuureni lo xtuun Dios. ¹³ Dxejc sia' lojreni xhet gundireni, rijreni roliz bejn ricuereni. Luxh malaii ni'ctis gunreni. Niluxh rliászareni didxxhii, richu'reni lo xhitis, rniizareni diidx ni di guchaag guiniireni. ¹⁴ Ni'cni rłazä rebiuud ni najc dxa'pru guchnaareni stehuält, chu xi'nreni, fisa'creni rolizreni te na'c guiniyajreni rebejn ni rdxe'ch lojnu. ¹⁵ Sa'csi yu' gaii biuud ni alagubicaj lo xnez Dios sanajlreni bendxab.

¹⁶ Pal yu' tej resa'nu ni najc sa'ni te biuud, riälj gacnäjnini, na'c gusaanni gutajłni xtuun guidoo, te si'c guidoo sajç gacnäj rebiuud ni rquiinpac chu gacnäjreni.

¹⁷ Rebgool ni rnibesa'c guidoo, riälj chanälajzrutureni näj gudeedrutu guiraa nani rquiinreni, si'c najc reni rusulesa'c xtidx Dios, rulidxxsa'creni la'tu con xtidx Dios. ¹⁸ Sa'csi lo xtidx Dios caj scree: "Na'c gusällu guijxh ro'gon che rusiani triuu"; si'cza caj stee diidx: "Riälj gax bejn ni rujñ dzuun."

¹⁹ Na'c cucuadiajglu xtidx tej ni rucuaquij te bengool palga ruti tio'p, choñ testiigw. ²⁰ Niluxh reni sanuu rujntis dojl, riälj gulijdxłureni nez loj reben guidoo, te näjza laareni guidxejbreni. ²¹ Nez loj Dios, nez loj Dad Jesucrist, nez lojza reangl ni gule Dios, rulidduxhälu chanuulu lo rediidxre, na'c jiuurulu tej bejn lo sa'ni. Bejn tebloj loj guiraa rebejn. ²² Na'c gusiojb lajzlu gusuju lu naalu yejc te bejn, te gacni ben guidoo palga gajdni guisieed guiban'sa'cni lo xnez Dios sa'csi lagajc yejclu jiajb rextojłni. Gubicaj lo guiraa dolguijdx.

²³ Na'cru yälu ganax nis. Gu'za tudxe'n bin sa'csi racxhuu xque'lu, näjza sa'csi yu'ru rexcälracxhuulu.

²⁴ Yu' bejn ruzengajc rextojłni ni'c rajcni castiigw, niluxh yu' bejn ni di xtojłni guzengajc. ²⁵ Sigajcsa redzunsac ni rujñ bejn; yu'reni ruzengajc, niluxh mase dini guzengajc, digacdi jianxhiga'tzni, sidzujñ dxej suzenñi.

6

¹ Reni najc mos riäjł cuadiajgreni xtidx xlamreni, te na'c guiniyaj rebejn laj Dios niclaza xtidx Dios ni rusule'nu. ² Palga yu' remos ni najc xlamni te nani rililajz, na'c cuälazreni rextiidxni sa'csi najcni bejzni lo xcälirililajz Jesucrist. Riäjł gunsa'crurenini xtzuunni, sa'csi najcni sa'ni loj yälirililajz xten Dios, luxh sanälajzarenini. Rediidxre baluii, basule'.

Yäl'nabaŋsa'c näjza te lastoo ni rbedxi

³ Palga yu' chu ruluii garenca diidx, diidx ni digac didxsa'c, si'c najc xtidx Jesucrist, näjza xhet si'c diidxdi ni ruluii xho guibansa'c bejn, ⁴ bejnga rlaiz guiliä'p lagajc xpala'nni, niluxh xhet najndini. Si'c te yälguijdx yu'tis yejcnı yälguiniab diidx, yälrdildiidx. Luxh redee rujn rdxe'ch lajzreni, rujnni rdxe'ch bejn lo sa'ni, rujnni rniyaj bejn, rujnzani di bejn guinisa'c lo sa'ni. ⁵ Rujnzani rdilnäj bejn sa'ni. Guiraa redee gun bejn ni aguxhijn xcäriejnı, bejn ni diru ga'p didxlii. Rchaloreni sujnreni ganduxh xcuent rediidx ni ruluiireni. Gubicaj lo sa' bejnre. ⁶ Niluxh yäl'nabaŋsa'c näjza te lastoo ni rebedxi, redee sa'cduxh. ⁷ Sa'csi xhet biopnädinu lo guedxliujre, luxh sigajcza xhet sajcdi chonänu che guetnu. ⁸ Niluxh palga rajpnu xhi gaunu, xhi gajcwnu, con ni'c riäjł guibalaaznu. ⁹ Niluxh reni rlaiz ga'p xhidalduxh meel, riajbreni lo xhigab guijdx, rujnzarenı xhidajł dzuun ni xhet sajcdi, ni rujn daan, ni rusiääz bejn lo yälruhxih, lo yälrnitloj. ¹⁰ Sa'csi yälrinälajzni meel najc xlobaa guiraa redzunguijdx. Yu'za bejn ni rladuxh ga'pni meel, rusaanreni xcälirililajz Dios, dxejc lagajc laareni rujn rdedduxhreni trabajw.

Dzun-huen xten yälirililajz

¹¹ Niluxh luj, bejn xten Dios, baxu'n lo guiraa dee, te chanuulu lo xcälxhigabsa'clu näjza yäl'nabaŋsa'clu; te chanajllu yälirililajz näjza yäl'sanälajz; te chanuulu lo yälrbecdxı lajz näjza yäl'nadolajz. ¹² Benduxh dzuun xcuent yälirililajz Jesucrist, gunazdu'tz yäl'nabajn ni najc par tejpas. Ni'cni guredjdx Dioslu, luxh aguniulu rililajzlu xtidx Dios nez loj xhidajł bejn, te anancheereni. ¹³ Naj rulidxälu nez loj Dios ni rudeed yäl'nabajn lo guiraa ni yu' lo guedxliujre, näjza nez loj Jesucrist, ni basule' xtiidxni nez lo Poncio Pila't, ¹⁴ rnibeä guzobsa'clu guiraa rediidx ni rniä lojlu, na'c guchaaluni, te na'c guiniyajreni luj naj niclaza cheni jiääd Xtađ Jesucristnu. ¹⁵ Sidzujn dxejga nani agunii Dios guidzujnı. Dios ni najc le' sujn scree sa'csi laatisni najc Dios, najcni reii xten reıeiı, rnibeezani reni rnibee. ¹⁶ Laatisni dini guet, nabajnı lo bianij cadro rut rajcdi rbıg. Nicla te bejn gajđ fıi lojni, niclaza gac fıireni lojni. Xtebtis laani riäjł ga'p rebejn xpala'nni. Laani rajp yäl'rnibee par tejpas. Sugacni si'c.

¹⁷ Balijdx reni rajp xhidajł xhixtenni lo guedxliujre, na'c guschä'preni xpala'nreni, niclaza chanälajzreni xhixtentisreni. Huenru chanälajzreni Dios ni nabajn, ni runiidx loonu guiralii xhixtennu ni rquiinnu te guibalajznu. ¹⁸ Balijdxreni gunreni dzunsa'c, gundajzreni dzunsa'c, gacnäjreni reni xhet rajpdi, cuenäsa'creni sa'reni. ¹⁹ Si'c ga'preni yäl'nasa'c ni guzudzu'tzreni che jiääđ Jesucrist, te guiniasztzu'tzreni yäl'nabajn par tejpas.

Rulijdxni Timoteu

²⁰ Timoteu, cuanäj ni rniä lojlu. Na'c jiulu didxguijdx ni yu' lo guedxliujre, niclaza didx-xhiı, niclaza rediidx ni rusguee, ni rbälajreni 'yäl'najn'. ²¹ Sa'csi yu' reni sanuu yäl'najnre ni'c banijtreni lo Dios xcuent yälirililajz. Gacnäđ Dios luj. Sugacni si'c.

Guijtz Ni Roj Lo Timoteu

Stee guijtz ni baxhal Pabl loj Timoteu

¹ Narä Pabl, nacä apost xten Jesucrist. Dios gule narä, xcuent yäl'nabajn ni gudeed Dios loj reni yunäj Jesucrist, si'c ni bia'n diidx. ² Cacuaä guijtzre lojlu, Timoteu, xi'nä lo yäl'rilitajz. Rinälazä luj. Rniabä lo Xtdadnu Dios näj lo Dad Jesucrist gacnäj luj, gulaslajzreni luj, guscuedxireni lajzlu.

Rusule'ni xcuent Jesucrist

³ Rnaj lazälu che rniabä lo Dios dxej-yääl. Dxejc rdedä xquixtios por luj lo Dios. Naya xcärienä yu'ä lo Dios, runä xtzuumni si'c bejnza rextadgoldoä.

⁴ Rnaj lazä xho biinlu, naj rlazä fiä lojlu te guibalazä. ⁵ Rnaj lazäza yu'pac yäl'rilitajz lastoolu si'cni guyu'ni galoo lastoo xmanlu Loida dxejcu lastoo xnanlu Eunice si'cza yu' yäl'rilitajzga lastoolu naj.

⁶ Ni'cni rniä lojlu naj, si'cni rcanäj bejn rodäj te di juini, si'cza cuanäduh reyäl'najn ni baniidx Dios lojlu cheni basuä nää yejclu. ⁷ Sa'csi di Dios nuniidx te lastoo ni rdxejb loonu, baniidxni te lastoo ni rsiutijp, baniidxni te lastoo ni rinälajz, baniidxzani yuduxh xcäriejnnu. ⁸ Na'c guitujyлу guiniulu rediidx xten Xtdad Jesucristnu, na'cza guituinäjlu narä sa'csi yu'ä neñ latzguiib xcuent Jesucrist. Näj luj gudejd trabajw ni siääd xcuent yäl'rusule' xtidx Dios si'ctis gacnäj Dios luj. ⁹ Dios ni guläa nurnu neñ dojl, gurejdx nurnu te guiba'sa'cnu lojtisni. Gurejdxni nuurnu xhet sa'csi biennu dzu'nsa'c, alga sa'csi si'c rlanjni laani, sa'csi balaslajzni nuurnu xcuent Jesucrist galooli che gajldi guncheeni guedxliuj. ¹⁰ Niluxh cheni biääd Jesucrist ni badzucaj rextojlno lo guedxliujre, baluiloj yäl'rulaslajzga. Jesucrist banitloj yäl'ribee xten yäl'gujt. Xtiidxni, ni rusule' xho rbicaj dojl, baluui yäl'nabajn, näjza yäl'nabajn par tejpas.

¹¹ Dios gule narä te gacä te ni rusule' xtiidxni, te gacäza te apost, näjza te bejn ni ruluii loj reni di gac xpejn Israel. ¹² Ni'cni rdedä trabajw xcuent guiraa rediidxre. Niluxh dina guituiyä, sa'csi narä nanä chu xtiidx huililazä, nancheä laani sajz gapdzu'tzni dzuun ni baniidxni loä dxejli cheni guibi'ni.

¹³ Chanuu guluiulu redidxsac ni banidxä lojlu. Gubajnzä lo yäl'rilitajz näj lo yäl'sanälajz ni rajpnu sa'csi yu'nu lo Jesucrist. ¹⁴ Cuanädu'tz reyäl'najn ni baniidx Dios lojlu näj Sprit Dxan xtenni ni rbäjz neñ lastoonu.

¹⁵ Anajnlu guiraa reni siääd reguedx Asia gulälazä narä; lo redee nadxaag Figelo näj Hermógenes. ¹⁶ Dad Jesucrist gacnäj reni yu' rolizj Onesiforo sa'csi balti huält biädspaani lazä, dini nitujy sa'csi yu'ä neñ latzguiib. ¹⁷ Che bidzujnni guedx Roma, gudiilpacni narä te bidxälni narä. ¹⁸ Dad Jesucrist gulaslajz laani che guidzujn dxej ni guibi' Jesucrist. Luj anajnlu balti dzunsa'c bejnni che guyu'ni guedx Éfeso.

2

Te ni runsa'c xtzuum Jesucrist

¹ Ni'cni xi'nä, guzutijp sa'csi rulaslajz Jesucrist luj, racnäjnlu. ² Rediidx ni abiejn diajglu guniä nez loj xhidal bejn lagajc rediidxga guniini lo rebejn ni rililajzpac, loj rebejn ni sajz guluiiza diidxga lo stecuaa bejn.

³ Batijp lajzlu tednäjlü narä trabajw si'c te soldadsa'c xten Jesucrist. ⁴ Di te soldaad gun dzuun ni bejnni che gajdni gac soldaad. Rujnni xtzuum bejn ni

guleni gacni soldaad, te si'c guspaani lajz bejn̄ga. ⁵ Sigajcza, ni rguijt digacdi xca'ni yäl'nasa'c palga dini quitsa'c si'c riäj̄l quitni. ⁶ Bejn̄ ni rujn̄ dzuun loniaa nanab xca'ni xcäl'nasa'cni ganidoo. ⁷ Bejn̄ xhigab xcuent ni rniä lojlu, dxejc sujn̄ Dios gacbeelu guiraani.

⁸ Basnaj lajzlu Jesucrist, te xagdoo toDavid ni huäjz lo rebeņgut. Dee najc xtidx Dios ni rudzucaj dojl, si'c ni rusule'ä lojlu. ⁹ Ni'cni cagutipä lazä cadedä trabajw, caduä caden̄ si'c te bejn̄ ni bagu't sabejn̄ni. Niluxh digacdi xcaduu xtidx Dios. ¹⁰ Ni'cni cadedä trabajwre te gacnää reni agule Dios te näjza reni'c chalilajz xtiidxni te guibajñreni lo bianij xten Jesucrist par tejpas.

¹¹ Guliiduxh najc diidxre;

palga agujtnu con laani, sibaññajzanu laani.

¹² Palga rdejdn̄u trabajw, sinibenäjzanu laani.

Palga dinu guicä'p numbeenuni, dizani guicäj̄p numbeeni nuurnu loj Xtradni Dios.

¹³ Mase dinu chanuu lo xtiidxni, laani susoobni xtiidxni sa'csi digacdi cuatzlajzni diidx lagajc laani.

Te bejn̄ nani abia xtzuunni

¹⁴ Basnaj lajz rebejn̄ xcuent rediidxre, gunibee lojreni nez lo Dad Jesucrist na'c tildiidxreni sa'csi sa' diidxga xhet sajcdini, ruhxhintisni reni riendiajgni.

¹⁵ Batijp lajzlu te guidzujñlu lo Dios si'c te bejn̄ ni runsa'c dzuun, xheti xhicuent guitujylu, sa'csi ruluisa'cpaclu xtidxliitis Dios. ¹⁶ Gulälaz yäl'rniyaj näjza xhidalduxh diidx ni xhet sajcdi, sa'csi renani rucua diajg rediidxga riajbrureni lo redolguijdx. ¹⁷ Luxh diidx ni ruluiireni suxhingajcni lastoo bejn̄ si'c rxhinlajz tiejxh bejn̄. Ni'c casiajc Himeneo näj Fileto. ¹⁸ Abanijtreni lo didxlii. Caniireni ala huäjz bejn̄ lo rebeņgut. Si'c cagusiejchreni lajz gaii rebejn̄ ni rlilajz. ¹⁹ Niluxh xtidx Dios rsiudzu'tzni si'c te guij nani nadipduxh, luxh rajpnu diidxre si'c te seen: "Dad guibaa anumbee guiraa reni najc xpejn̄ni"; näjza "Nanab guibicajreni lo redolguijdx, guiraa reni ahuililajz xtidx Jesucrist."

²⁰ Neņ te yuro, xhet ganaxdi cos or näjza cos plat yu'. Yu'za cos yajg näj cos bajn̄; yu'reni najc parsi te laniro, yu'za reni rquini guixe-guixee. ²¹ Sigajcza te bejn̄ ni rlajz gun dzuunro xten Dios, riäj̄l guibicajni loj redolguijdx ni xhet sajcdi. Dxejcti Dad Jesucrist sacnäjni te gunni redzunro xtenni.

²² Gubicaj lo redzunguijdx ni rujn̄ rebejn̄, huinuu yäl'nabansa'c, yäl'rililajz, yäl'sanälajz, gulecdxiza lajzlu näj reni rujn̄ xtzuun Dios, naya lastooreni rbedx-rniabreni lo Dios. ²³ Na'c jiulu rediidx ni ruluii rebejn̄ guedxliuj. Anajnl̄u rediidxga rujn̄ rdilñäj rebejn̄ sa'ni. ²⁴ Niluxh te xmos Dad guibaa di riäj̄l guchaagni reni rdijl; riäj̄l gacni bensa'c loj guiraatis bejn̄. Riäj̄lza guluisa'cni; riäj̄lza gutip lajzni che xhet laadi rujn̄ bejn̄ lojni. ²⁵ Guideb yäl'nadolajz guluiulu reni rdxe'ch loj rediidx ni ruluiulu. Cuääzlu gaxäjsi gusiejch lajzreni gun Dios gacbeereni didxgului, ²⁶ te jianij xcäriejn̄reni te guiriireni ladzñaä bendx̄ab, te gunreni ni rlajztis Dios.

3

Xho gac rebejn̄ neņ redxelult

¹ Nanab gacbeelu neņ redxelult sidzujñ dxej tedtu trabajw. ² Sa'csi su' bejn̄ ni chanälajz lagajctis laani, ni rinälajz xmeeltisni, bejn̄ ni rniyaduxhtis, bejn̄ ni rchagljajz chä'p xpala'ntisni, bejn̄ ni rniyaj Dios; su' bejn̄ ni di gusoob xtidx xtradreni, su' bejn̄ ni di gudeed xquixtios lo Dios, su' bejn̄ ni najc

benguijdx. ³ Neñ redxelultga su'za bejn ni di chanälajz sa'ni, bejn ni di lajzni jiajl, bejn ni rusgueduxh; bejn ni digacdi guscuääz dolguijdx ni rujnreni; bejn ni guyalazduxh; bejn nani ruro'n guira'ti dzunsa'c. ⁴ Neñ redxelultga su' bejn ni ruto' sa'reni; bejn ni di guidxejb gunreni ni riajbtis yejcreni, bejn ni rchalosi najcreni beñsacduxh; bejn ni rchagälajzru gun nani rchagälajz tiejxhrene lacuaa chanälajzreni Dios. ⁵ Neñ redxelult su' bejn ni najc si'c benguidoo, ascanu rusoobreni xtidx Dios, niluxh naadireni xca'reni yälñadip näj yälñabee xten Jesucrist ni ruchaa lastoo bejn.

Na'c guchaaglu rebejnga, ⁶ sa'csi loj sa' bejnre yu' reni richu' rolizj bejn, sasgueereni regunanayääl ni rujn dojl. Regunaare rinuu rujreni ni rlaiztis tiejxhrene, rujnreni guiraloj. ⁷ Rebejnre rsiedduxh didxcoob, niluxh di didxlii xten Jesucrist jiu' yejcreni. ⁸ Sigajnci gujc Janes näjza Jambres ni bidxe'ch loj Moisés, sigajzca najc rebejnre, cadxechnäjreni didxlii xten Jesucrist, najcreni bejn ni aguxhijñ xcäriejnreni, luxh direni gacbee xtidx Dios, direni ga'p yälñirilajz. ⁹ Niluxh direni chanuu xchej, sa'csi huenliisi suhuii guiraa rebejn najcreni benguijdx. Si'cza gusajc guiro'p reni bidxe'ch loj Moisés.

Pablñabee sudzu'tz Timoteu

¹⁰ Luj sanuutislu lo nani rusule'ä, näj xho nabañä, näj xhicuent runä dzuunre, lo xcälñirilazä, lo xcälñadolazä, lo xcälñsanälazä, näjza xho batip lazä. ¹¹ Najnlu xho basacsñreni narä gudedäza trabajw ladzñaa rebejn neñ reguejdx xten Antioquia, guedx Iconio, näjza guedx Listra. Gudedä trabajw niluxh Dios baslaa narä loj guiraa retrabajwga. ¹² Guliduxh guiraa reni rlaiz chutis loj Jesucrist sidejdpacreni trabajw. ¹³ Niluxh rebenguijdx näj reni rusguee, sinuutisreni redolguijdx, sinuuru gusgueereni bejn, luxh susgueeza bejn laareni.

¹⁴ Luj huinuu guzudzu'tz loj ni abisieedlu, nani ahuililajzalu, luj anajnlu chuni'c baluiini lojlu. ¹⁵ Cheni biuuxlilu racbeelu xtidx Dios, ni ruluiilu xho guiriilu neñ dojl te xca'lu yälñabajñ par tejpas sa'csi rililajzlu xtidx Jesucrist. ¹⁶ Guiraa rediidx xten Dios ni caj lo guijt, lagajc Dios baniidxn te xcajni lo guijt.

Guiralii xtidx Dios najc laaca te guluii nuurnu xhini'c najc didxlii, te gacbeenu xhi najc didx-xhii, te gacbeezanu xho riäjñ guibañsa'cnu.

¹⁷ Te susiñ niguii ni najc xpejn Dios, te gac gunni guiraa redzunsa'c ni riäjñ gunni.

4

¹ Rulidxälu nez lo Dios näjza nez lo Dad Jesucrist ni jiaäd si'c reii te gunni yälguxhtis loj reni nabajñ näjza loj reni agujt; rniäza dee lojlu: ² basule' xtidx Dios, gususiñ lo Dios mase xhitis or. Baluii rebeñ dojl, gudiñäj reni di rlaiz guzobdiidx xtidx Dios, balidxnäj resa'tu xtidx Dios. ³ Sa'csi sidzujñ dxej di rebejn guidxagälajz gucua diaj yälñruisa'c; alga diidx ni najc lagajc si'c najc xhigabreni rlaizreni jiendiajgreni, ni'cni siguiilreni xhidajñ bejn ni ruluii te guisieedreni ganax ni rlaizreni gucua diajgreni. ⁴ Susäuureni diajgreni te di jiendiajgreni xtidxlii Dios; alga xhitis diidx gucua diajgreni. ⁵ Niluxh luj huinuutis lo xtidx Dios, batiplajz yälñuin, guniitis xho rudzucaj Dios rextojñreni, beñsa'c xtzuunlu.

⁶ Sa'csi narä suga'ä ree te ju'treni narä, asiäddzungajxh dxej ni guetä. ⁷ Agulujx bacuaä si'c te soldaad ni huicuasa'c lo guer, agulujx xnezyuä,

gopdzutzä yälirililajz. ⁸ Naj cabäzä xca'a yäl'nasa'c ni guniidx Dad xhaguibaa, suniidxni yäl'nabansa'c. Dad najc juejz ni runsa'c yälguxhtis. Niluxh xhet loätis guniidxni yäl'nabansa'c. Sudeednini loj guiraa rebejn ni catiplajz cabäjzreni dxej cheni guibisac Jesucrist.

Rediidx ni räjpni lojtis Timoteu

⁹ Basaaga lajzlu jiadhuigajlu narä; ¹⁰ sa'csi abasa'n Demas narä. Sanälajzruni redzuun xten guedxliujre, naj sääni guedx Tesalónica. Baxhalä Crescent sää lo reguejdx ni re' nez Galacia. Baxhalä Tito sää guedx Dalmacia. ¹¹ Xtebtis Lucas suganäj narä. Gudiil Marcw te jiadnäluni sa'csi sajc gacnäjni narä lo xtzun Dios. ¹² Tíquico baxhalä sää guedx Éfeso. ¹³ Cheni jiaädli, jiadnälu ca'p ni basa'nä guedx Troas rolizj Carpo, näj rexlibrä; di jialza lajzlu rexqitzä. ¹⁴ Alejandro, ni najc gubetzguiib, basacsíduxhni narä. Dios quiixni sigajcni bejnini. ¹⁵ Luj bahuii te di gunni xhi gunni luj sa'csi rdxecheduxhni lo xtidx Dios ni rusule'nu.

¹⁶ Galoo che bazecä diidx lo reguxhtis, rut gucnäjdi narä; guiraareni gulälazreni narä. Rniabä lo Dios na'c guchagcuentni nani bejnreni. ¹⁷ Niluxh Dad ni yu' xhaguibaa gucnäj narä, baniidxni yäl'nadip te gujc guniä guiraa xtidx Dios te biejn diajg reni digac xpen Israel xtidx Dios. Luxh gucnäj Dios narä gulääni narä ladznaareni, si'c ro' te beedz. ¹⁸ Suslaani narä loj guiraa redolgujdx, saptzu'tzni narä, sigucheezani narä te chunääni lo xcäl'nibeeni xhaguibaa. Lojni coldeed xquixtios, colganduxhni par tejpas. Sugacni si'c.

Rudeedni xtixtios lo rexamigwni

¹⁹ Badeed xtixtios lo Prisca näjza lo Aquila näjza loj resa' Onesíforo. ²⁰ Erasto bia'n guedx Corinto, niluxh basa'nä Trófimo guedx Mileto sa'csi cayacxhuuni. ²¹ Jiadgajlu ansde guisloj rebäinajl. Eubulo, Pudente, Lino, Claudia, näjza guiraa rebejtznu ni yu' lo Jesucrist ree, ruxhal'reni xtixtios lojlu.

²² Dad Jesucrist chunäj xaimlu. Dios gacnäj guiraatu. Sugacni si'c.

Te Guijtz Lo Tito

Bacuaa Pabl lo Tito

¹ Narä Pabl, nacä xmos Dios, apost xten Jesucrist, te gacnäã guiroobru xcälirililajz reni agule Dios, te gacbeezareni didxlii ni rusia xcälınabajnnu. ² Cayunlojzanu yälınabajñ par tejpas nani Dios, ni digacdi guinii didx-xhii, bia'nni diidx guniidxni cheni gajdli guedxliuj guirixtiej. ³ Niluxh che bidzujñ dxej ni agulexгаа Dios, laani baluini xtiidxni. Si'cza baniidxni xtiidxni loã te gusule'äni si'c gunibee Xtiosnu ni ruslaa nurnu neñ dojl. ⁴ Cacuaã guijtzre lojlu, Tito, xi'nä lo yälirililajz ni ria'pnu xcuent Jesucrist. Rniabä lo Dios Xtadnu näj lo Dad Jesucrist ni rbää nuurnu neñ dojl, gacnäjäreni luj, gulaslajzreni luj, guscuedxzizareni lajzlu.

Dzuun ni rujñ Tito guedx Creta

⁵ Che basa'nälu lo yuj ni tre' lo nisdoo, ni laa Creta, basa'nälu te guluuxlu dzuun ni di niajldi nuluxä ro'c, näjza te cuelu rebengool loj reguidoo neñ tejga reguejdx si'cni gunibeã gunlu. ⁶ Gule bengool ni nabañsa'c, te na'c guiniyaj bejnreni, nanab gacni chääl tejtis gunaa, riäjłza chalilajz rexi'nni, na'c guibajñreni si'ctisni rłajz tiejxhreni, jıureni xtidx xtadreni. ⁷ Niguii ni rnıbee guidoo rcanäj rexhixten Dios, ni'cni riäjł ga'pni te yälınabanya. Na'c gacni te beñnajd, na'c gacni te beñnadxecha', na'c gacni bengı, na'c gacni te bejn ni rdxagdiğ bejn, na'cza xca'ni meel ni dini niunsa'c gaan. ⁸ Nanab gacni te bejn ni rudedlaa rolıjzni jia'n beñ biooz, riäjłza chanälajzni dzunsa'c, gac nasıñni, chu xcäriejnı; guibañsa'cni nez lo Dios, sigajcza nez lo rebejn, guibanñayani nez lo Dios, na'c gunni nani rłajztis tiejxhni. ⁹ Riäjł chanuutisni lo didxlii ni bisieedni te gac gulıdxnäjzani bejn xtidx Dios, te guzejçni diidx lo rebejn ni rnıyaj xtidx Dios.

¹⁰ Yu' xhidajł benguijdx, bejn ni rnıi diidx ni xhet sajçdi, näjza xhidajł bejn ni rnıi didx-xhii ni rusguee. Näjza lo rexpeñ Israel ni riuduxh leiı yu' sa' bejnre. ¹¹ Sa' redee ni nanab jıäu ro'ni, sa'csi rusgueereni xhidalro sa'reni, rulııireni ni di riäjł gulııireni te gunreni gaan meel.

¹² Te niguii ni sıäd lagajç lajdxreni guniini xcuent lagajç reben lajdxni: "Rebejn ni najç cretenses rnıdıxhreni didx-xhii, niälajzzenı. Rłajzreni gausa'çreni niluxh di rłajzreni gunreni dzuun." ¹³ Niluxh guliini, ni'cni gudılñajreni, te chalılazsa'çreni xtidx Jesucrist, ¹⁴ te na'cruza gıcuadiajgreni rediidx ni rdxällajz rexpeñ Israel, niçlaza rediidx ni rnıbee bejn ni gulälaz didxlii.

¹⁵ Loj renani rujñ xhıgabıya, guira'ti najç naya, niluxh loj reni di chalılajz, ni xhet nayadi najç xhıgabreni, guira'ti nacdxuudx, xcäriejnııireni nacdxuudx. ¹⁶ Naj rujñsıreni si'cni numbeereni Dios, niluxh ni rujñreni huenlıisi ruzen direni niılilajz, najçreni benguijdx, direni jıu xtidx Dios, digacdi gunreni niçla teğ dzunsa'c.

2

Rulıjdx Pabl Tito gulıisa'çni rebejn

¹ Niluxh luj guniıtis rediidx ni rulıisa'c. ² Balııı rebengool gac beñya, bejn ni yu' xcäriejnııı, bejn ni rumbee xhıni'ç najç dzunsa'c, xhıni'ç najç dzunguijdx, bejn ni rajpza yälirililajz, yälınälajz, näjza ni rbecdxi lajzni.

³ Sigajcza, regunagool, nanab guibajñreni si'c te ni yusa'c lo Dios, na'c guiniireni diidx ni di riäjł guiniireni, na'cza soozreni. Riäjł guluiireni redidxsa'c ⁴ te guluiireni regunaa dxa'p chu xcäriejnreni, chanälajzreni chääłreni näj rexi'nreni. ⁵ Gacreni nasin, guibanñayareni, xcanäsa'creni rolizjreni, gacreni bensa'c gusoobreni xtidx chääłreni, te rut guiniyaji xtidx Dios.

⁶ Sigajcza gojz lo rebi'n riäjł chu xcäriejnreni. ⁷ Luj guzuj te fireni xho riäjł gun bejn dzunsa'c. Che guluiilureni, saru baluii guiraa reni riäjł guluiilu.

⁸ Didxsa'c gunii te rut gacdi guiniyaj diidxga, te si'c guitujy chutis ni rłajz guidxe'ch lojtu te xhet xhi didxguijdxdı gac guiniireni xcuentlu.

⁹ Baliidx remos te gusoobreni xtidx xlamñreni, te gusa'creni dzuun, na'c guzejceni diidx lo rexlamreni. ¹⁰ Na'c cuanreni alga guibansa'creni te guluii xcälñabajñreni lacti sacduxh xtidx Dios ni basłaa nuurnu neñ dojl.

¹¹ Sa'csi abiääd xcälracñäj Dios, abiädñäni yälrusłaa neñ dojl lo guiraa rebejn. ¹² La xcälracñäj Dios ni ruluii nuurnu gusa'nnu redzunguijdx, näjza dzuun xten guedxliujre te guibansa'cnu, te chonälajznu Dios lo guedxliujre.

¹³ Ruluiizani nuurnu cuääznu guidzujñ dxej ni soob xtiidxni ni basa'nni loonu xcuent dxej che jiääd Gueb Dios näj Xtd Jesucristnu ni rusłaa nuurnu lo dojl. ¹⁴ Laani gujtñi te gusłaa ni nuurnu lo guiraa redolguijdx, te basiani nuurnu te gacnu xpejnñi, gaczanu te bejn ni rdaxglajz rujñ dzunsa'c.

¹⁵ Diidxre gunii, baliidx, basule' si'c te beññajn. Di gusaanlu cuälazreni luj.

3

Ni riäjł gun reni rlılajz

¹ Basnaj lajz rebejn gusoobreni xtiidx rebejn ni rnibee näjza reguxhtis, gusoobreni xtiidxreni, xcäjbzarenı gunreni xhitis dzunsa'c. ² Na'c guiniyajreni bejn, cuedxireni, gaczarenı bensa'c, saru gac nadolajzreni loj chutis bejn.

³ Sa'csi galoo sigajcza xheti xcäriejnñu, dizanu gusoob xtidx Dios; basguee bejn nuurnu, yu'tisnu lo guiraasi dolguijdx näjza lo ni rchagłajzttis rujñ tiejxhnu, nabajñtisnu lo dolguijdx, rudxonłajznu, rdxe'ch bejn loonu, rdxe'chzanu lo sa'nu. ⁴ Niluxh che baluiloj xcälrusłasłajz näjza xcälrinälajz Dios ni rusłaa nuurnu näjza rebeñ guedxliuj lo dojl, ⁵ dxej basłaa Dios nuurnu lo dojl, xhet sa'csi yu'di xhi dzunsa'c biennu, alga sa'csi balasłajzni nuurnu. Basłaa Dios nuurnu lo dojl sa'csi bidiib lastoonu, te biäjł xtojłnu te najcnu beñcoob, sa'csi bascoobza Xsprit Dxan xten Dios xcäriejnñu. ⁶ Baniidx Dios cuääzpac Xsprit Dxanni neñ lastoonu xcuent ni bejn Jesucrist ni basłaa nuurnu, ⁷ te sa'csi rujñ Dios cuent najcnu bensa'c sa'csi abadzucajni xtojłnu, naj sica'nu xcälñasa'cnu ni cabääznu, nalaaznu yälñabajñ par tejpas.

⁸ Dee ni najc guliipac, ni'cni rłazä chanuutislu guiniilu rediidxre loj rebejn, te rebejn ni rlılajz xtidx Dios gunduxhreni ganax dzunsa'c. Rediidxre najc laaca, sacduxhreni loonu. ⁹ Naj basaan rediidx ni najc xlia'si, rediidx ni gunii rebeñ galoo, yälrdıldıidx xcuent xleii toMoisés sa'csi guiraa rebiejyga xhet sajcdini, xhetza huendi rujñreni.

¹⁰ Palga yu' te bejn ni gun la' sa' rebeñ guidoo, gunii lojni tej o tio'p huält. Palga dini jiejn, colcuääni lojtu. ¹¹ Sa'csi anajntu sa' bejñga abarõ'nni, agulälazni didxlii, lagajc xtojłni sujñ nitni.

Diidx ni bacuaani lojtis Tito

¹² Che guxhalä Artemas o Tıquico lojlu, gudahuiipac narä lo guedx Nicópolis. Ro'c abenä xhigab tedä rebäinajł. ¹³ Gucnäduxh licenciaad Zenas näjza Apolos, badeed guiraa ni rquiiñreni te chanuurenı xpiajreni, te xhet

jiäädxdireni. ¹⁴ Suguisieedza resa'nu gunreni dzunsa'c te gacnäjreni che guiquiinnureni, te na'c guibajñreni xlia'si.

Ruxhalni xtixtios

¹⁵ Guiraa reni yunäj narä ruxhal xtixtios lojlu. Badeedza xtixtios loj resa'nu lo yälirililajz. Dios gacnäjä guiraatu. Sugacni si'c.

Te Guijtz Lo Filemón

Rucuaa Pabl guijtz lo Filemón

¹ Narä, Pabl, yu'ä neñ latzgüiib sa'csi rniä xtidx Dad Jesucrist. Narä näjza bejtznu Timoteu cagucuaanu guijtzre lojlu, Filemón, ni sanälazduxhnu sa'csi najclu sa'nu lo xtzun Dios. ² Rucuaazanu guijtzre lo Apia, bisiajnno lo yälirililajz, näj lo Arquipo ni racnäj nuurnu lo dzuunre, näjza loj rebenguidoo ni rchagsa' rolizjlu. ³ Dios Xtdadnu näj Dad Jesucrist gacnäj la'tu, guscuedxireni lajztu.

Xcälsanälajz näj xcälrililajz Filemón

⁴ Rudedä xquixtios lo Dios xcuent luj che rniä lo Dios. ⁵ Abiejn diagä xcuent yälirinälajz näj yälirililajz ni rajplu lo Dad Jesucrist, näjza reni yu' lo Dios. ⁶ Rniabä lo Dios tiobru xcälrililajzlu laj ni rusule'luni, te gachesa'creni xcuent guiraa reyäl'nasa'c ni rajplu, ni runiidx Dad Jesucrist lojlu. ⁷ Lacti rbalazduxhä, rbedxi lazä sa'csi sanälajzlu resa'nu näjza sa'csi luj, betzä, agulecdxilu lastoo reni rililajz.

Pabl rniabni lo Filemón xcasacni Onésimo

⁸ Mase rapä xcälrnibee Jesucrist sajc guiniä gunlu xhitis ni riäj] gunlu, ⁹ rniabä lojlu gunlu te dzunsa'c sa'csi narä nacä Pabl ni rinälajzlu, nacä bengool, yu'ä latzgüiib xcuent Dad Jesucrist. ¹⁰ Canabä xcuent Onésimo ni najc si'c xi'nä, sa'csi huililajzni xtidx Dios ni basule'ä lojni naj ni yu'ä latzgüiib.

¹¹ Galoo, dini niajc beñsa'c lojlu, niluxh naj sacnäduxhni guiro'pnu. ¹² Ruxhal'sacäni lojlu, te xcasacluni stehuält si'c ni najräni xca'lu, sa'csi siädnäni lojlu ascanu lagajc lastoä. ¹³ Narä rlazä niannäjni narä xcuentlu, te niacnäjni narä naj ni yu'ä latzgüiib sa'csi basule'ä xtidx Dios. ¹⁴ Niluxh di rlazä niunä si'c palga luj dilu xcäjb gacni si'c. Dina guinia gacnäjpacnu narä si'c gojn. Narä rlazä gunluni sa'csi rlazjpacnu gacni si'c. ¹⁵ Pet gubicaj Onésimo lojlu tio'p-choñ dxejsi. Niluxh naj xca'luni te chuni lojlu par tejpas. ¹⁶ Naj xhetru si'cdi te mos chuni lojlu. Naj sajcruni loj te mos. Naj najcni si'c te betzbiidlu ni sanälajzlu. Narä sanälazduxhäni, niluxh luj riäj] chanälajzruluni, xhet si'c chutis te bejn, alga si'c te bejtzlu lo Dad Jesucrist.

¹⁷ Näj palga rumbeelu narä si'c te sa'lu, cua'ni sigajc narä. ¹⁸ Palga yu' xhi bejnäni lojlu o palga yu' xhi nazääbni lojlu, basa'nni lo xcuentä. ¹⁹ Lagajc narä, Pabl abacuaä guijtzre con naä con xleträ, narä siguixäni. (Te na'c guiniä nazääbzalu lagajc luj loä.) ²⁰ Betzä, beñlaa hueenre narä si'c te ni sanälajz Dios te guspaa lu lazä nez loj Dad Jesucrist.

²¹ Bacuaä guijtzre lojlu sa'csi nancheä susooblu xtidxä, sujnzalu maazdi loj ni rniabä lojlu. ²² Sigajzca basuchee te lajt cadro jia'nä, sa'csi cabäzä gudzu' Dios ni gunäbtu lojni, gusaan Dios jiädhuüä la'tu.

Ruxhalni xtixtios lojni

²³ Epafra ruxhal xtixtios lojlu. Laani yunäjni narä latzgüiib, sa'csi guni-izani xtidx Jesucrist. ²⁴ Marcw, Aristarco, Demas, näj Lucas, ni racnäj narä lo dzuunre, ruxhalzareni xtixtios lojlu.

²⁵ Dad Jesucrist gacnäj la'tu. Sugacni si'c.

Te Guijtz Nani Biääd Loj Reben Hebree

Agunii Xi'n Dios xtidx Xtadni

¹ Neñ redxe galoo garen-garen mood guninäj Dios retoxtadgoldoonu. Xhidajlza huält guniini por reniguii ni bacuaa xtiidxni. ² Neñ redxejre aguniini loonu por Xi'nni, lojzani badeed Dios yälrbnee guncheeni guedxliujre, badeedzani guira'ti lojni. ³ Laani najc xtuxh xten xcälrdimbicha' Dios, laani najczani sigajc najc Dios, laazani rapchee guira'ti con xtiidxni ni rnibee. Cheni gulujx basiani xtojlnu, gurejni xladbee Gueb Dios xhaguibaa te canibeeni.

Sacduxhru Xi'n Dios loj rexangl Dios

⁴ Ro'c gurej Xi'n Dios sa'csi sajcruni loj reangl xten Dios, sa'csi acua'ni yälrbnee si'c te bejn ni riannäj xhixten Xtadni. Lajzani sajcro lo relaj rexangl Dios. ⁵ Sa'csi Dios di niäjb loj nicla tej rexangl ni:

Luj najclu Xi'nä. Narä guleälu te guinibeelu.

Dizani niäjb xcuent nicla tej rexangl ni:

Narä gacä xtadni, laani gacni xi'nä.

⁶ Niluxh che biädnäni Xi'n xtebni lo guedxliuj, guniini:

Guiraa rexangl xten Dios, ¡Colgan Xi'nä!

⁷ Che gunii Dios xcuent rexangl ni räjpni:

Rujnni ruxhun rexangl ni si'c bej, rujnni rbebajl rexmosni.

⁸ Niluxh xcuent Xi'nni guniini:

Luj najc Dios.

Nabajnlu par tejpas;

xcälrbnee par tejpas najc te yälrbnibesa'c.

⁹ Ahuinälajzlu xhigabsa'c, dipaclu nichaglajz xhigabguijdx, ni'cni Dios ni najc Xtioslu, baniidxru yälrbalajz lojlu quela loj resa'lu.

¹⁰ Rniizani:

Luj, Dad, che guslojli bencheelu guira'ti,

bencheelu cad soob guedxliuj, naazalu bencheelu reguibaa.

¹¹ Laareni sinitlojreni, niluxh luj nabajnlu par tejpas.

Guiraareni siujx si'c riujx te lajd.

¹² Suse'tlureni si'c rie'te la' lajd, sidxaareni si'c rdxaa te lajd.

Niluxh luj dilu guidxaa.

Lalgajctis nabajnlu, di rexijzlu ted.

¹³ ¿Gucxha räjp Dios lo te xangl ni scree, ä? Räjpni:

Gurej xladbeä te guinibeelu dxejli cheni gudzugä guiraa ni rdxe'ch lojlu ladz ni'lu.

¹⁴ Guiraa rexangl Dios najc sprit, ruxhal Diosreni te chayacnäjreni rebejn ni xca' yäl'nabajn par tejpas.

2

Na'c gusaanni diidx ni ruslaani lo dojl

¹ Ni'cni nanab jiunu xtidx Dios ni abiejn diajgnu, te na'c guibicajnu lo xnezyujni. ² Anajntu aguzojb diidx ni gunii rexangl Dios neñ redxe galoo. Luxh reni di nusoob diidxga bejnreni dojl, dxejc bateed Diosreni trabajw. ³ ¿Xho gac guibicaj xcäl'naj Dios yejcnu palga dinu jiu rextidx Dios xcuent yäl'ruslaa lo dojl, ä? Ni Dad, Jesucrist basa'n diidxga lo rexpejn pacni,

dxejc laareni basule'reni rediidxre loonu. ⁴ Niluxh Dios baluui najc diidxga guliipac sa'csi bejnri reseen, nájza yálrđxeloduxh, nájza xhidajl remilagrw. Badeedzani Sprit Dxañ xtenni loj renani ahuililajz xtiidxni te gun tejegareni garen-garen xtzuuñreni si'ctis ni rłajz Dios gunreni.

Nani guláxtej yálruslaa bejn lo dojl

⁵ Di Dios gudeed yálrñibee lo rexanglni te guinibeereni guedxliucoob ni cagusa'tnu naj. ⁶ Guyu' tej ni bacuaa xtidx Dios lo guijt, rájpnri:

¿Chu najc niguii, te guinalajz Dios laani?

¿Chu najc xi'n niguii te jiádhuiizaluni?

⁷ Nagabsi dxej guxiiru sajñni lo reangl xhaguibaa,

dxejcti badesaclu xcálnasa'cni,

badesaclu xpala'nri,

badeedzalu yálrñibee lojni te guinibeeni guira'ti ni bencheelu.

⁸ Badeedlu guinibeeni guiralii ni yu' lo guedxliuj.

Cheni badeed Dios guira'ti te guinibeeni, xhetliidi basa'n Dios ni digacdi guinibeeni, niluxh naj ruhuiinu gajñni guinibee guiralii ni'c. ⁹ Alga rhuiinu Jesucrist, ni bejn Dios guxiiru sajñni lo reangl xten Dios che guyu'ni lo guedxliuj balsi dxej. Che baluux Jesucrist xtzuuñni lo guedxliuj, badeed Dios yálrđimbicha' nájza xpala'nri lojni. Sa'csi sanálajz Dios nuurnu basaanni gudejd Xi'nri trabajwduxh, gujñni lacuaa niejñnu.

¹⁰ Dios benchee guiralii ni yu' lo guedxliujre, najri rñibeeza Dios guira'ti. Luxh Diosre rłajz chanáni xhidajl xi'nri xhaguibaa, ni'cni baxhał Dios xi'npacni Jesucrist te guláxtejni yálruslaa bejn lo dojl che gudejñni trabajwduxh lo cruzj. ¹¹ Sa'csi Jesucrist, ni rujñ chasanáj bejn te yálnabanya, nájza reni risanáj yálnabanya, tejtis najc xtadreni. Ni'cni di Xi'n Dios guitujuj guiniini lojreni: "betzá". ¹² Scree caj lo xtidx Dios:

Chasule'á lo rebetzá xho najclu,

siliá'páza xpala'nlu lojreni.

¹³ Rájpzani:

Sibázá gacñaj Dios nará.

Ste lajt guniini:

Bahuui loá nájza rexi'ná ni baniidx Dios loá.

¹⁴ Te famił najc tejsi baál, tejsiza rejñ; ni'cni che biáad Jesucrist lo guedxliuj guyu' tiejxhni náj xtejnri si'c benguedxliuj, gujñzani te gujc bejnri guniñ nani rñibee yálgujt, nalajznu, bendxab. ¹⁵ Te si'c baslaani guiraa reni rđxejb yálgujt, najcñeni si'c reni yu'tis loj xlamni guideb nabajñreni, lacti rđxejbreni yálgujt.

¹⁶ Guliini dini niáad te gacñajni reangl xten Dios, biáadni te gacñajni guiralii rexajg toAbram. ¹⁷ Ni'cni gujñni si'cpac te bejtznu, te gac gacni te bixhojz xten Dios ni rulasłajz, te bixhozsa'cza xten Dios, si'cni rłajz Dios gacni te guslaani rebejn lo dojl. ¹⁸ Sa'csi lagajc laani gudejdni trabajw, luxh baquuilza bendxabni niujñni dojl, ni'c naj sajç gacñajni renani ruquiił bendxab gun dojl.

3

Jesucrist sajçru loj Moisés

¹ Ni'cni bejtznu, reni anabansa'c, sa'csi najçtu reni gurejdx Dios gac xi'nri, colyembee Jesucrist ni baxhał Dios loonu. Laani najc bixhojz ni sajçru, rusule'zani xtidx Dios xcuent nani ahuililajznu. ² Laani huinuutis guyu'ni lo Dios ni guleni te gunni dzuunre. Sigajc ni bensa'c toMoisés xtzuuñ Dios che guyu'ni loj rexpejn Israel, sigajcza bensa'c Jesucrist dzuun che biáadni lo guedxliuj. ³ Sigajc ni yu'ru xpala'n dad lo xpala'n rexi'nri, sigajcza yu'ru

xpala'n Jesucrist lo xpala'n toMoisés. ⁴ Yu' xtad guiraa refamil lo guedxliuj, niluxh gule'c Dios guiralii bejn, bencheezani guedxliuj. ⁵ Basoob Moisés diidx si'c te mos, cuanäjni rexpem Dios si'cni gunibee Dios gunni, te baluiini xho gac redzuun ni gajd gac dxejc, luxh naj agujc redzuunga. ⁶ Niluxh Jesucrist basoob diidx si'c xi'npac Dios. Cuanäjni xfamil Dios. Nurnu najcnu xfamil Dios palga chanuutis sudzu'tznu lo xtiidxni, palga guibalajztisnu, palga gutiplajznu dxejli ni guibi' Jesucrist.

Yälrusilajz xten rexpejn Dios

⁷ Ni'cni, si'cpac rnii Sprit Dxi xten Dios:

Naj, palga jiendaigtu xse'ni,

⁸ na'c gun-najd tu lastootu si'c bejn rebejn ni bidxehnäj Dios che cuansajreni lo reyubijdz.

⁹ Ro'c bidxehnäj rextotadgoldootu Dios sa'csi direni nililajz Dios siädnäreni, niluxh bahuiireni redzunduxh ni bejn Dios nez lojreni tiuu iijz.

¹⁰ Ni'cni la] ni cadxe'ch Dios loj rebejnğa, bejn Dios xhigab:

Sujiannäjreni xhigabguijdxreni,
dina gusanä jiu'reni xcälrusilazä.

¹¹ Ni'cni bidxe'ch Dios lojreni,
bejn Dios te xhigabduxh,
di rebejnğa jiu' te gusilaznäjni.

¹² Bejtznu, colnatiro andi chu tejt u rujn xhigabguijdx, rla]z guibicaj lo Dios, ni nabaj] par te]pas, sa'csi dini chalilajz xtiidxni. ¹³ Ni'cni colgulijdx resa'tu guixe-guixee, laga najcni nadxej; te di chu tejt u gacnajd lastooni xcuent reyälrusguee xten redo]l. ¹⁴ Sa'csi palga chanuunu sudzu'tznu lo xtidx Dios ni huililajznu che biembeenuni, dxejc yu' xhi rajpnu con Jesucrist. ¹⁵ Si'c caj lo guijtz:

Nadxej, palga jiendaigtu xse' Dios,
na'c gunnajd tu lastootu si'c bejn rebejn ni bidxehnäj Dios lo reyubijdz.

¹⁶ ¿Chu reni'cni bidxehnäj Dios che biendaigreni xtiidxni? ¿La et laadi guiraa rebejn ni gulää Moisés guedx Egipto, ä? ¹⁷ ¿Chuxh loj bidxe'ch Dios tiuu iijz lo reyubijdz, ä? ¿La et laadi reni bia]b lo do]l, dxejc gujtrene, hu]ijajbreni nez loj reyubijdz, ä? ¹⁸ ¿Chu loj rä]pni dipacreni jiu' lo xcälrusilajzni? Loj reni di nusoob xtiidxni. ¹⁹ Ni'c ruhuiinu di nia]cdi niu'reni lo yälrusilajz sa'csi direni nililajz xtidx Dios.

4

¹ Ni'cni palga bia'n diidx siu'pacnu lo yälrusilajz con Dios, nanab jia'pnu lagajc nuure didi yu' chu tejt u di gun gaan jiu' lo yälrusilajzğa. ² Sa'csi nuure abiejn diaagzanu diidx ni rusia do]l, sigajc bie]n dia]g rebejnğa; niluxh xlia'si bie]n dia]greni diidxğa sa'csi bacuadia]grenini niluxh direni nililajzni. ³ Luxh nuure ni ahuililaaznu siu'nu lo yälrusilajzğa; caj lo guijtz gunii Dios rediidxre:

Ni'cni bidxe'chä lojreni, benä te xhigabduxh,
di rebejnğa jiu' te gusilaznä]reni narä.

Mase abaluuxni xtzuunni cheni birixtie]li guedxliuj. ⁴ Sa'csi loj stee guijtz caj diidx ni guniini xcuent dxej ni rusilajz bejn:

Xho'p dxej bejn Dios xtzuunni, dxejcti basilajzni tebdxej.

Xhet bejndini dxejğa.

⁵ Stehuält guniini:

Di rebejnğa jiu' te gusilaznä]reni narä.

⁶ Niluxh yu' reni gajd jiu' loj yälrusilajzga, luxh reni biejn diajgni diidx ni rusia dojl di niu' sa'csi direni nusoob xtiidxni. ⁷ Ni'cni basoob Dios ste dxej gac "nadxej". Gudejd xhidajl ijz che gunisac Dios xcuent yälrusilajz. Badeed Dios gunii toDavid rediidxre:

Nadxej, palga jiendiajgtu xse'ni, na'c gunnajdtu lastootu.

⁸ Paru nudeed Josué yälrusilajzga loj rexpex Israel, diru Dios ninisac xcuent stee dxejre. ⁹ Naj ria'nza te yälrusilajz par rexpex Dios, ¹⁰ sa'csi nani riu' lo xcälrusilaznäj Dios, rusilajzzani lo xtzuumni sigajc basilajz Dios lo xtzuumni.

¹¹ Nanab chanuu gusoobnu xtiidxni te jiu'nu lo yälrusilajzga, te di chu tejnu ni gacnajd lajzni si'c ni gucnajd lajz renani di nililajz.

¹² Sa'csi nasesduhx xtidx Dios, yuduxhza xcälrnibee xtidx Dios. Najcni si'c te guchil ni caduxh ro'ni, räazni nez nen redzujt näj yojb. Sigajcza xtidx Dios räaz nez cadre rlia' sa' xsprit näjza xaim bejn. Ruluiiza xtidx Dios rexhigab ni yu' lastoo bejn, näjza redzuun ni rlaiz lastoo bejn gun. ¹³ Xheti xhi bencheedi Dios ni naga'tz nez lojni. Guiralii guyasi ruhuii Dios. Sajpnu gudeednu cuent lo Dios.

Bixhojz ni sajcru najc Jesucrist

¹⁴ Jesucrist, Xi'n Dios, najc xpixhojzpacnu ni sajcru, nani abiu' loj Dios. Ni'cni nanab chanuu sudzu'tznu chalilaaznu xtidx Dios. ¹⁵ Xpixhojznu ni sajcru sajz gulaslajzni nuure te di jiajbnu lo dojl, sa'csi laani sigajcza gudejdni trabajw, baquuil bendxabni te niujjni dojl, niluxh dini niujn dojl. ¹⁶ Riäjlpac na'c guidxeebnu cuedx-guiniabnu lo Xtiosnu ni sanälajz nuure. Na'cza guitujynu, te gulaslajzni nuure, guideb xcälracnäjni gacnäjzani nuure.

5

¹ Galooli guiraa rebixhojz ni sajcru nabee lo rebejn. Bixhojz ni sajcru rniab lo Dios xcuent rebejn. Luxh lojni rudeed rebejn regon näjza reguidxaa ni gudeedni lo Dios te jäü lo xtojlni nez lo Dios. ² Rdejzda bixhojz trabajw sigajc benguedxliuj, ni'c sajz ga'pni yälndolajz loj rebejn nani nayääl näjza reni abanijt lo Dios. ³ Niluxh sa'csi näjza laani rujjni dojl, nanab gudeedni guidxaa lo Dios te jäü lo rextojlni sigajc rudeedni guidxaa lo Dios te riäu lo xtojlni rebejn.

⁴ Rut sajcdi gac bixhojz xcuentcni. Dios najc ni rbejdxni te gacni bixhojz, dxejc rudeedni xpala'nni lojni si'c badeednini lo Aarón. ⁵ Si'cza di Jesucrist niajc bixhojz ni sajcru xcuentcni. Dios najc nani gulälajni gacni bixhojz ni sajcru, räjpni lojni:

Luj najclu Xi'nä, narä guleälu nadxej te guinibeelu.

⁶ Scree cajza lo xtidx Dios stee lajt:

Luj najclu bixhojz par tejpas sigajc gujc te niguii ni laa Melquisedec.

⁷ Cheni gubajñ Jesucrist lo guedxliujre, gurejdx-gunabzani lo Dios, guredxa'ni biinzani lo Dios nani sajz nudzucajni lo yälgujt; Dios bacuadiajg xtiidxni sa'csi huinälaiz Jesucrist Dios. ⁸ Ni'cni Jesucrist mase najcni Xi'n Dios bisieedni basoobni diidx luxh näj ni'c gudejdni trabajw. ⁹ Che bidzujñ dxej baluuxni guiraa redzuun ni rlaiz Dios gunni, laani gujcnii nani rudeed laa bejn nani rusoob xtiidxni lo dojl par tejpas ¹⁰ sa'csi Dios gulälajni bixhojz ni sajcru, gujcnii bixhojz sigajc gujc Melquisedec.

Rxhunjriezgw gusa'nni xcälirililajzni

¹¹ Rlaiznu guiniinu xhidalduxhru diidx xcuent Melquisedec, niluxh naganduxh gusule'nuni lojtu sa'csi nadyejctu, ditu gacbee. ¹² Agujc xchej

huililajztu rediidx xcuent Jesucrist. Ariäjł gusule'tu rediidxre naj, niluxh alga rquinnrutu chu gusule' rediidxre lojtu stehuält, luxh rediidxre najc rediidx guyasi xten Dios. Agucsactu si'c báz. Rlajztu yásactu le'ch lacuaa gautu yajt, bääł; nalajznu, redidxnagajn xten Dios. ¹³ Reni najc si'c báz, rä' le'chtis, direni gumbesa'c redidxxa'c xten Dios. ¹⁴ Niluxh reben guyajł rajw yajt. Sigajcza redidxnagajn xten Dios najc par rebejn ni aguyajł lo xtidx Dios, renani ayu' xcäriejnni, arumbeereni nani najc dzunsa'c, nani najcza dzunguijdx.

6

¹ Nanab guisieedrunu xtidx Dios te churu xcäriejnnu. Na'c guisieedtisnu didx-guyasi xcuent Jesucrist. Na'c guluiitisnu diidx xcuent yälrusiechłajz, xcuent redzuun ni rujn rejł bejn, näj yälrlilajz xtidx Dios. ² Na'c guluiitisnu xcuent yälrobnis, näj yälrudzubnaa yejł bejn, näj xcuent yälrbajnsac rebengut, näj xcuent yälguxhtis par tejpas. ³ Alga do'o guisieedru xtidx Dios te churu xcäriejnnu, palga si'c guniidx Dios jiennu.

⁴ Yu' bejn ni abianij xcäriejnni, ni acua' reyäl'nasa'c ni rudeed Dios, ni rbäjz Sprit Dzan xten Dios neñ lastooreni, ⁵ luxh bidxagłajzreni xtidx Dios näj yälrmibe xten Dios ni churu jiääđ. ⁶ Palga laareni guibisacreni lo sa' yäl'nabajn ni gojpreni galoo, diru gacđi guidxaa xmodreni stehuält, sa'csi dxejł sajcnı si'c ni lagajł laareni gucasacreni Xi'n Dios lo cruzj, nalajznu susanxtujyreni Jesucrist nez loj rebejn. ⁷ Beñ guedxliuj ni biejn diajgni najc si'c najc yuj ni rä' nis che riajbtis nisguij. Palga yujga gudeed yäl'nasa'c loj reni rujn dzuun lojni, sunle' Dios yujga. ⁸ Niluxh palga gudeed yujga ganax yaguejch näjza cuaan ni xhet sajcdi, xliä'sini, sujn rebejn gac nadeni te checni.

Diidx ni rusudzu'tz lastoonu

⁹ Mase rniinu scree lojtu, anajnnu huililajztu xtidx Jesucrist näjza xtiidxni ni rusłaa lo dojl. ¹⁰ Sa'csi Dios najc ni rujn yälguxhtissa'c, diza lajzni jiäl ni rujntu la'tu näj yäl'sanälajz ni rajptu par laani che racnäjtı rebejznu lo yälrlilajz, luxh guixe-guixee si'c rujntu. ¹¹ Naj rłajznu tejgatu chanuu ga'p lagajł yälrbalajzre dxe lultli, te gac guiraa ni cabäjztu. ¹² Rłajznu na'c gactu bejn ni rbedxitis, alga guntu sigajł bejn reben galoo, gopdzu'tzreni yälrlilajz ni batipduxh lajzreni, guläjzreni te cua'reni reyäl'nasa'c ni bia'n diidx gudeed Dios lojreni.

¹³ Luxh che bia'n Dios diidx loj toxtadgoldoonu Abram, guniini por lagajł laani sa'csi ruti stee ni sajrcu lojni. ¹⁴ Scree gunii Dios: "Guliä sacnää luj, sunidxäza xhidajł xi'nlu." ¹⁵ Cheni aguläjz Abram xchej, gusojb diidx, cua'ni nani gunii Dios lojni. ¹⁶ Sa'csi cheni rniłipac bejn te diidx, rniireni diidxga por laj ste'ca bejn ni sajrcu lojreni, sas che rusä'treni laj bejnğa xhetru yu'di xhi gunreni bieje. ¹⁷ Rłajz Dios gacheepac rexagđoo toAbram sisiojbpac diidx ni bia'nni che guniini loj Abram galooli. Sisiojbpac xtiidxni, sa'csi guniini diidx con lagajł lajni che bia'nni diidxga. ¹⁸ Ni'cni naj yu' tiop diidx ni digacđi guichaa sa'csi digacđi guinii Dios didx-xhii, rusoobpacni xtiidxni, rudeedzani yäl'rbedxilajł loj renani gubig-guxuñ lojni, loj reni sanuu loj yälrlilajz xtiidxni nani abaniidxni loonu por lagajł lajni. ¹⁹ Laa ni'cni cabääznu ni rusudzu'tz lajznu si'c duu-guiłb con ancl ni rniadzdu'tz te barcw. Si'c rusudzu'tzni lastoonu te jionnu cadro yu'ni detz ladró. ²⁰ Lagajł ro'c biu' Jesucrist xcuent nuure, te galooli baxhalni xnez Dios loonu, te gujcnı bixhojzro par tejpas si'c gujcza bixhojz nani laa Melquisedec.

7

Jesucrist najc bixhojzro si'c najc Melquisedec

¹ Galoo che gujc Melquisedec reii xten guedx Salem, gujcní bixhojzro xten Gueb Dios. Che gubi' Abram che gulujx guer cadro bagu'tni rereii ni bidxe'ch lojni, huichagloj Melquisedecni, sas gunabni lo Dios te gacnäjru Dios Abram.

² Dxejcti bejn Abram tzuu cuaa guiraa ni bejnni gaan, te badeedni tej cuaani loj Melquisedec. Laj Melquisedec säloj "reii ni runsa'c yälguxhtis", dxejctiru reii xten guedx Salem sälojzani "reii xten yälrbedxilajz". ³ Baluiilojni lojreni, niluxh dinu gan chu najc xtadni, niclaza chu najc xnanni, niclaza chu najc resa'ni. Dizanu gan guc gojlni niclaza guc gujtni. Gujcní si'c najc Xi'n Dios. Najctiszani bixhojzro par tejpas.

⁴ Naj colhuii, lacti te bensa'c, te benro najc Melquisedec. Lojni badeed toxtadgoldoonu Abram tejsa ni sajru lo tejsa tzuu ni bejnni gaan. Luxh Abram najc bejn ni sajru lo rexpejnni. ⁵ Leii xten Moisés, rnibee xca' rebixhojz ni najc xfamilí Leví te cuaa lo sa'reni si'c ni badeed toAbram loj Melquisedec, mase najcreni rexagdo Abram. ⁶ Niluxh di Melquisedec gac xfamilí Leví. Niluxh badeed Abram te cuaa xhixtanni loj Melquisedec. Dxejcti benle'ni Abram ni biannäj xtidx Dios. ⁷ Naj rut sajcdi guini garenca, sa'csi nani sajru runle' yejc nani guxiiru saj. ⁸ Naj rebixhojz ni rca' tejsa lo tzuu ni rajpreni, najc bejn ni rejt. Niluxh rnii xtidx Dios xcuent Melquisedec ni cua' te cuaani galooli: najcni si'c te bixhojz nani nabajñ par tejpas. ⁹ Ni'cni saj guiniinu xcuent Leví nani rca' te cuaa, lagajc laani agudijx te cuaaga che badeed Abram tejsa yejc tzuuga lo Melquisedec. ¹⁰ Sa'csi mase gajd xi'n toAbram chu che huichagloj Melquisedecni, batijpni lastooni sa'csi abia'n diidx sudeed Dios xajgni. Ni'cni che agudijxni te cuaaga najcni si'cni sугanäjni rexajgni.

¹¹ Rexpejn Israel cua' leii che gujc bixhojz relevitas, reni najc rexi'n toAarón. Paru niajc niujnreni nibansa'c rebejn ni huisanäj leiiga, dirureni niqiuin niääd stee bixhojz ni di gac si'c Aarón, alga si'c najc bixhojz Melquisedec najcni. ¹² Sa'csi cheni rdxaa te cuaa bixhojz nanab näjza leiiga guidxaa. ¹³ Niluxh rnii xtidx Dios, Dad Jesucrist najc bejn xten garenca familí. Luxh nicla tej bixhojz gajd gac bejn xten familga. ¹⁴ Huenliisi najnnu najc Dad Jesucrist te bejn xten xfamilí toJudá, niluxh di Moisés ninii gac te rexpejn Judá bixhojz.

¹⁵ Luxh huenliisi najc ni rniinu, sa'csi abiricaj ste bixhojz ni najc sigajc gujc Melquisedec. ¹⁶ Luxh dini niajc bixhojz si'c rnii releii ni guyu' dxejc. Laani gujcní bixhojz xcuent yälrnibee ni najc par tejpas, ni rut gacdi gutzujl. ¹⁷ Scree najc diidx ni gunii Dios xcuentni:

Luj najclu bixhojz par tejpas si'c gujc te niguii ni laa Melquisedec.

¹⁸ Dxejcti gunijt leii sa'csi xlia'si gujcní, di niajcdi niujn bejn si'cni rniini.

¹⁹ Di xleii toMoisés niujn gaan nibansa'c bejn. Naj lacuaa leiiga rajpnu te xcälirililazsa'c; ni'c rujn rbignu lo Dios.

²⁰ Dios bejn gacni bixhojz con xtidxliini, ni guniini con lagajc lajni.

²¹ Stecuaa rebixhojz gujcreni bixhojz niluxh et con didxliidire, con laj te benro, niluxh bixhojzre guc bixhojz con didxlii, con laj nani räjp:

Agunilii Dios diidx con lagajc lajni, niluxh dini gusiech lajni, räjpni:

"Luj najclu te bixhojzro par tejpas, lagajc si'c gujc Melquisedec."

22 Ni'cni, Jesucrist najc ni rujn rîle' rediidxre, luxh diidxre sajcruni loj xleii Moisés. 23 Guyu' xhidalduxh stecuaa rebixhojz, sa'csi rejtreni, digacdi chanuureni gacreni bixhojz. 24 Niluxh Jesucrist rajpni yäl nabajñ par tejpas, naj najczani bixhojz par tejpas. 25 Ni'c rajcza ruslaani bejn lo dojl par tejpas. Ruslaani guiraa renani rbig lo Dios por laani, sa'csi anabajñni par tejpas te canabni lo Dios xcuent laareni.

26 Jesucrist najc bixhojzro nani rquiinnu. Laani najc dxan, dini niujñ dojl, agubicajni lo reben-dojl, huäjszani jiaaru xhaguibaa. 27 Dini gac si'c stecuaa rebixhojz ni nanab ju't man guixe-guixee te guze'c bixhojzroni lo Dios te ganid jiaa lagajc xtojlni. Dxejcti sajç guibi'ni guze'cnini lo Dios xcuent xtojñ rebejn. Niluxh Jesucrist tejtis huält gudejdni trabajw, bejnnini cheni cuajni lo crujz, baxhe'ni xtiejñni xcuent nuure, gujtni. Si'c gudijxni xtojlnu par tejpas. 28 Leii xten Moisés rusaan gac bixhojzro te bejn nani rejç, niluxh didxlii ni gunii Dios con lagajc lajni guleni tejni gac bixhojzro lagajc Xi'nni nani naya, nani nabañsa'c par tejpas.

8

Jesucrist najc nani rusiäjñ diidx

1 Diidx ni sajçru loj rediidx ni caniinu najc scree: bixhojz ni najc xpixhojzronu agurej xladbee Dios lo xcälrdimbicha'ni xhaguibaa. 2 Neñ yu' ni najc dxan, neñ guidoo ni benchee Dios yu' bixhojzre, xhet neñdi guidoo ni runchee reben lo guedxliuj. 3 Guiraa rebixhojz rajç rudeedreni gojñ lo Dios, rajcza ju'treni guidxaa te gusejçreni lo Dios xcuent xtojñreni, ni'cni nanab ga'p Jesucrist xhi guedeñni lo Dios. 4 Paru suga'ni lo guedxliujre, nicla bixhojz dini niajç, sa'csi yu' bixhojz ni rudeed regojñ si'c ni rnibee xleii Moisés. 5 Niluxh redzuun ni rujn rebixhojzga najc si'c te balaa xten guira'ti ni yu' xhaguibaa. Najñnu najçreni balaa sa'csi baliidx Dios Moisés cheni agojñ gunni xquidoo Dios, räjp Dios lojni: “Bahuii te gunlu guira'ti si'cpac ni baluiä lojlu lo dan Sinaí.” 6 Niluxh xpixhojznu Jesucrist rujn dzuun ni sajçru, sa'csi najcni nani suga' galäii xnezuyuj Dios loj reben guedxliuj, gusule'ni diidx ni gunii Dios cheni bejñni xhigabcoob, basa'nni didxcoob loj reben guedxliuj. Luxh didxcoobre sacduxhruni.

7 Paru niajç nusiejç leii ni badeed Dios galooli lo Moisés lajç rebejn, di niqiiñ niujñ Dios ste xhigabcoob. 8 Niluxh bahuii Dios xhet cayunsa'cdi reben guedxliuj, dxejç räjpni:

Naj rniliä sidzujñ redxej che gunä stee xhigab,
jia'n stee diidx loj rexpejñ Israel näjza loj rexpejñ Judá te xca'reni didxcoob.

9 Xhet si'cdi xhigab ni benä che bia'nä diidx loj retoxtadgoldooreni neñ redxej ni gunazä naareni te gulääreni lajdx reben Egipto.
Laareni direni nusoob xtidxä ni'c basa'näreni, diruna niuäreni.
Si'c gunii Dad, Gueb Dios.

10 Niluxh diidx nani runä xhigab rlazä jia'n diidx loj rexpejñ Israel neñ redxejre gac scree, räjp Dad:

Sunä chu rexleä lo xcäriejñreni, sucuaäza xtidxä neñ lastooreni.
Dxejcti narä gacä Xtiosreni, laareni gac rexpeñä.

11 Rut chu tejdi guluii sa'ni,
nicla bejçtni, nicla chu stee bejn gäbreni, “colyembee Dad”,
sa'csi alanumbee guiraareni narä, rebäz sigajç rebeñgool.

12 Narä sulaslazäreni susiaä redzundxuudx ni bejñreni, diru lazä guizaj rextojñreni, nicla latzsiäj ni bejñreni.

¹³ Che bia'n Dios didxcoob, diidx nani bia'nni galoo agujcni didx-biejw, luxh nani anajc didx-biejw, xhetru sajcdini.

9

Aquidoo guedxliujre nájza guidoo xhaguibaa

¹ Laaca naj. Diidx ni bia'n galoo badeed leii xho gunreni che rajnreni Dios, nájza xho gac guidoo lo guidxliujre. ² Guc-chee guidoo dxejcti gojl te ladro galáini te gujcní tío'p yu'. Yu' ni najc ganid laani yudxan. Ro'c suga' candilíeer, nájza mex cadro naga' yátxtiil ni aguc le' ³ Ni rojp yu'ga najc dejtz ladro, ro'c najc yudxanduxh. ⁴ Ro'c suga' te guiib cadro ru' yaal. Najcni ganax oor. Ro'c yu'za te guiijn ni laa "arco de pacto", najcwni ganax oor, sigajc dejtzni, sigajcza nenñi. Nenga yu' te bo't ganax oor. Nen bo'tga, yu' yátxtiil ni laa mana. Lagajcza nenñi guiingxa yu' bar xten toAarón nani biga', guyu' bid lojni, nájza guiij cadro bacuaa Dios xleii toMoisés. ⁵ Yejc guiingxa caj tío'p figur oor ni najc si'c xangl Dios. Laareni rujn racbee bejn suga' Dios ro'c. Lagajc redee rusáuu con rexhigareni cadro ruxhe' bixhojzro xtiejn guidxaa xcuent xtojł rebejn. Ro'cti di gacdiru guiniirunu xcuentreni naj.

⁶ Che gulujx gusucheereni, riu' rebixhojz si'csi si'c nenñi guidoo, nenñi yudxan te rajnreni Dios si'c guñibee Dios. ⁷ Niluxh nenñi stee yu'ga ni laa yudxanduxh, ro'c rajc riu' bixhojzrotis. Xtebtisni riu'ni, luxh tejtis huált nenñi teb ijj, te chanáni xtiejn reguidxaa ni gudeedni te jia xtojłni nájza te jia xtojł rebejn ni najc xpejn Israel. ⁸ Luxh guiraa reni'c ruluii Sprit Dxan xten Dios loonu, gajd yudxanduxh guxal che sugasijc yu' ganid, yu' ni laa dxan, cadro sanuu rajnreni Dios. ⁹ Guiraa ni gujc galoo najc si'c te balaa, baluiini xho gacni naj. Regon nájza reman ni rúdeedreni lo Dios direni nusansa'c xcáriejn reni rúdeed gojn lo Dios, sa'csi xtiejn reman rusáutisni lo xtojł rebejn. ¹⁰ Dee najc ganaxtis xhi rajwni, ni rá'ni, con yálrobnis, o xhi stee dzuun ni rujn bejn te ria ganaxtis tiejxhreni che guidzujñli dxej cheni guxaa Dios guiraa'ti.

¹¹ Niluxh abiaád Jesucrist, naj laani najc bixhojzro xcuent redidxcoob ni sajcrú naj. Nacoob guidoro cadro biu' bixhojzre, nasa'cruni naj. Xhet con naadi bejn guc-cheeni. Dizani gac guidoo guedxliujre. ¹² Abiu' Jesucrist cadro najcpac yu' ni laa dxanduxh, niluxh xhet xtiejn di redxib, regon; ganax lagajc xtiejn ni ca'ni biu'ni yudxanduxh tejtis huált, te si'c baslaani nuure lo dojl par tejpas. ¹³ Reni basia xtojł bejn galoo najc redee: xtiejn regon nájza redxib, naj cobdáj xten reguidxaa ni rejc nenñi guidodxanga; bastiojñni guiro'preni yejc reni yu' xtojłni. ¹⁴ Palga basia redee xtojł bejn, aticaxh xtiejn Jesucrist sajc gusia dojl, sa'csi rajpni yálnabajn par tejpas. Lagajc laani badeedni xtiejn ni lo Dios. Niluxh najcni renya sa'csi dini niujn dojl, rusiazani xcáriejn nuu xcuent retzuun ni xhet sajcdi, te chunu loj Dios ni nabajn par tejpas.

¹⁵ Ni'cni Jesucrist najc nani suga' galáii: nez lo Dios nájza nez loj reben guedxliuj xcuent didxcoob. Yálgujt xten Jesucrist najc te gudzucajni xtojł reben nájza xtojł renani bejn si'cni caj lo leii, te xca' guiraa reni agurejdx Dios yálnabajn par tejpas, si'c bia'n diidx galooli. ¹⁶ Didxcoobre najc si'c che rlaiz tej bejn guñibee xho guidis xhixtenni che agojl guetni, nanab gucuua bejnga lo te guiitz xho guidisni, dxejcti gucuuani lajni. Niluxh xhet sajcdi guiitzga che gajd bejnga guet. ¹⁷ Xhet sajcdi guiitzga che nabansijc nani bejnñi. Sajcni che agujt bejnga. ¹⁸ Ni'cni che bia'n Dios diidx loj rexpejn Israel galoo, gujt te man te bixe' rejn. ¹⁹ Che gulujx gunii Moisés rediidx si'c ni caj lo leii loj guiraa rexpejn Israel, bagu'tni rebiser, redxib, cua'ni rejnga nájza nis, bahuaidxni guid-xiil xníaa nájza te la' yajg balagbáz, hysopo, dxejcti bastiojñni rejn yejc

guijtz cadro caj leii, nájza yejc rebejn. ²⁰ Dxejc guniini lojreni: “Rejnre najc seen sile'pac diidx ni abaxhal Dios lojtu.”

²¹ Sigajza bastiojb Moisés rejn guidoo náj guiraa renani rquiin rebixhojz che rajnreni Dios. ²² Leii xten Moisés rnibee jia guiralii con rejn, palga di rejn guixe', di xtojł bejn jia.

Xtiejn Jesucrist rudzucaj dojl

²³ Ni'cni biquiinpac gujt remanre, bixe' xtiejn ni te basiani reni najc xpalaa reni yu' xhaguibaa, niluxh reni yu' xhaguibaa rquiin guixe' xtiejn te ni sajru. ²⁴ Di Jesucrist niu' nen guidoo ni benchee rebejn, ni najc xpalaa guidoopac xten Dios xhaguibaa. Laani biu'ni lagajc xhaguibaa, te laani suga'ni nez lojpac Dios te caniini xcuent nuure loj Dios. ²⁵ Bixhojzro xten xpen Israel biu' nen yu' ni laa dxanduxh tejtis huált nen teb ijz, ca'ni xtiejn reguidxaa. Niluxh Crist biu' xquidoopac Dios xhaguibaa tejtis huált par tejpas, luxh ca'ni lagajc xtiejn ni. Di guiquiin jiu'runi balti huált. ²⁶ Palga nanab gunni si'cni rujn rebixhojz, sajpní por niejtni te chinaduxh huált cheli birixtiej guedxliuj. Luxh naj, cheni bidzujn dxej, baluiloj Jesucrist tejtis huált, lagajc laani badeedzani xtiejn ni lo Dios cheni gujtni, cuajni lo cruzj te si'c badzucajni par tejpas xtojł rebejn. ²⁷ Guiraa bejn nanabpac guetreni tejtis huált, dxejctiru sidejdreni yálguxhtis xten Dios. ²⁸ Sigajza tejtis huált badeed Jesucrist xtiejn ni ni bixe' lo cruzj te badzucajni xtojł xhidalduxh bejn. Luxh loj renani cabájzní suluiilojní stehuált, xhet te gudzucajdiruni dojl, alga te gusa'ni xcälrusłaa renani cabájzní.

10

¹ Sa'csi leii xten to Moisés najtis si'c te balaa xten nani siáäd naj. Niluxh dini gac si'cpac redidxcoobga. Ni'cni leii, con xtiejn reguidxaa ni rxe' cazob ijz digacdi gusa'cni rebejn nani guibig lo Dios, sa'csi di xtiejn man gudzucajpac rextojłreni. ² Paru niajc nibicajpac xtojł reni ruedeed xtiejn guidxaa, agulájz ruedeedreni xtiejn guidxaa, sa'csi che gubicaj xtojłreni, diru xcäriejnreni gumbee dojl. ³ Niluxh yälrejt man náj yälruedeedreni rejn casob ijz rusnajtisreni lajzreni xcuent dojl. ⁴ Sa'csi digacdi gudzucajpac regon nájza xtiejn redxib xtojł bejn.

⁵ Ni'cni che biáäd Jesucrist lo guedxliuj rájpní lo Dios:

Di rlaizlu xtiejn guidxaa ni claza regon niluxh abejnlu gacä nigui-guedxliuj. ⁶ Dilu nichaglaiz yälrejc xten guidxaa ni claza yälruedeed rejn, ni claza gojn ni ruedeed rebejn te gusiani xtojłreni. ⁷ Dxejc rápä: “Nará basiälä te gunä si'cni rlaizlu Dad, Dios, (si'cni caj nen reguijtz xcuent ni sacä).”

⁸ Che gulujx gunii Jesucrist diidxga: “Di rlaizlu, dizalu guidxaglaiz xcälrejt guidxaa nájza regon ni claza xcälrejc guidxaa, ni claza yälruedeed rejn xcuent xtojł bejn si'cni caj lo leii gun bejn.” ⁹ Dxejcti rájpní: “Nará siälä, te gunä si'cpac ni rlaizlu, Dad Dios.” Dxejc badzucaj Jesucrist nani gujc galoo, te guläxtiejni didxcoob ni bia'n Dios loonu naj. ¹⁰ Abasia Dios lastoonu sa'csi bejn Jesucrist si'c rlaiz Dios cheni baxhe'ni xtiejn ni lo cruzj tejtis huált par tejpas.

¹¹ Guiraa rexpixhojz Israel rujnreni dzuun guixe-guixee te ruedeedreni lagajctis guidxaa, nájza xtiejn reman, guiraa si'ctis ni caj lo leii, niluxh reni'c digacdi gudzucaj dojl. ¹² Niluxh Jesucrist tejtis huált baxhe' xtiejn ni lo cruzj te badzucajni xtojł rebejn par tejpas. Naj agurejni xladbee Dios cadro rnibeeni. ¹³ Ro'c cabájzní guiraa ni rdxe'ch lojní te cuereni ladzní ni. ¹⁴ Ni'cni

tejtis huält cuajni lo cruzj te basiani par tejpas guiraa renani ahuililajz xtiidxni. ¹⁵ Sigajcza rni Sprit Dxan xten Dios loonu; najni:

¹⁶ Diidx nani jiannääreni neṅ redxejre gac scree,

naj Dad Dios: sucuaä rextidxä lo xcäriejnreni,

susäläza xtidxä neṅ lastooreni.

Dxejcti räjpni:

¹⁷ Diru lazä guizaj rextojlreni nicla rextolguijdxreni.

¹⁸ Ni'cni, cheni abia xtojł bejṅ, diru quiquiin gudeedreni guidxaa te jia rextojlreni.

Nanab guibignu lo Dios

¹⁹ Ni'cni resa'nu, na'c guidxejbtu, sajz jiu'nu yudxanduxh cadro bixe' xtiejn Dad Jesucrist nani abadeedni lo Dios. ²⁰ Naj yu' te nezyuj, nezsiucoob, nezyuj xten xcäl'nabaṅcoobnu ni baxhalni che badzucajni ladroga. Ni'c säloj cheni biu'ni neṅ yudxanduxh, badeedni lagajz xtiejn ni lo Dios. ²¹ Jesucrist najc xpixhojzronu nani rnibee rexpejṅ Dios. ²² Ni'cni do'o guibigrunu lo Dios guideb lastosa'cnu, na'c guidxejbdinu, na'cza guitujydinu. Con yäl'rililajzpac abia lastoonu xcuent rexhigabguijdx, abidiibza tiejxhnu lo nis-ya. ²³ Do'o chanuu sudzu'tznu lo xtiidxni nani huililajznu, na'c guchaanu xhigabnu sa'csi susoob Dios diidx ni bia'nni loonu. ²⁴ Naj do'o guihuii xho jiennu te gacnäj sa'nu te si'c chonälajznu sa'nu nägajcza te jiennu ganax dzunsa'c. ²⁵ Na'c jiennu si'c rujn rebejṅ nani diru jääd che rdxagsa'nu. Nanab guiliidxnu resa'nu sa'csi naj asiäddzungajxh dxej ni guibi' Dad Jesucrist.

²⁶ Palga chanuu jienrunu dojl, niluxh abiejn diajgnu xtidx Jesucrist, diru gacdi guibicaj xtojłnu dxejc. ²⁷ Dxejcsii guidxeebtisnu guilääznu yäl'guxhtisduxh xten Dios näj guiboo ni guze'c renani rdxe'ch loj Dios. ²⁸ Cheni guyu' chu tej ni di niujn si'c caj lo xleii Moisés, niluxh bidxaag xtidx tio'p o chon ni nancheepac, räjpreni dini nusoob lei, gujt bejṅga, rut balaslajz-dini. ²⁹ Maazru yäl'rusacsíduxh nanab ted renani ruläj yejc Xi'n Dios cheni direni gusobdiajg xtiidxni. Alga ru'o'nreni xtiejn ni baxhe'ni lo cruzj te basianini. Rusanxtujyzani Sprit Dxan xten Dios nani badeed didxcoob lojni. ³⁰ Anancheenu gunii Dios: "Narä susquixä bejṅ; loä siguijx bejṅ", räjp Dios. Stehuält guniini: "Dad sujn yäl'guxhtis rexpejṅni." ³¹ Cosduxh gac bejṅ ni jiajb ladzṅaa Dios nani nabajṅ par tejpas!

³² Niluxh colṅnaj lajztu xho gujctu galoo; cheni entis cua'tu xtidx Dios, xho batip lajztu, gudejdtu trabajw sa'csi cua'tu xtidx Dios. ³³ Guyu' resa'tu gudéreni lojni, yu' reni basacsi la'tu nez loj rebejṅ. Guyu'za huält astoo gudejdzatu trabajw sa'csi cahuiitu rebejṅ nani basacsireni, cadejdzareni trabajw. ³⁴ La'tu banaj lajztu renani yu' latzguuib, guideb yäl'rbalajz batip lajztu che cua'reni guiraa xhixtentu, sa'csi gucbeetu xhaguibaa rajptu reyäl'nasa'c ni sajcru, niluxh yu'ni par tejpas. ³⁵ Na'c gunijttu xcäl'rililajz xtidx Jesucrist, sa'csi yäl'rililajzga gun xca'tu yäl'nabajṅ par tejpas. ³⁶ La'tu nanab cuedxitu te che abejntu ni rlaiz Dios, dxejc xca'tu nani aguniini guniidxni. ³⁷ Sa'csi xtidx Dios ni bia'n rni:

Asiäddzungajxhpac dxej ni jäädni,

asiäddzungajxhpac dxej ni jääd nani siääd, dipacni gaclaa.

³⁸ Renani nabaṅsa'c sibannäj yäl'rililajz,

niluxh palga yu' chutej ni guidxejb chalilajz, dini'c gun guibaa lazä.

39 Niluxh nuure dinu gac si'c reni rusaan yälrlilajz te nitreni loj dojl. Nuure najcnu renani rililajz xtidx Jesucrist te laa xaimnu par tejpas.

11

Yälrlilajz

1 ¿Xhini'c najc yälrlilajz? Yälrlilajz säloj cabääznu sajcpac tejni gajd gac, yu'pacza ni mase dinu fiini, najcni si'cni abahuinuni. 2 Dios huinälajz retotxadgoldoonu sa'csi huililajzreni xtiidxni.

3 Sa'csi rililajznu, najnnu benchee Dios reguedxliuj, bencheeni guibaa, bencheezani guiraa nani rhuinu. Con xtiidxtisni bencheeni nani dinu guihui.

4 Gojpza toAbel yälrlilajz badzubyaaalni rexquidxaani lo Dios. Yälrbijbyaal xtenni sajcru loj yälrbibyaal xten toCaïn. Ni'cni gunii Dios najc toAbel bensa'c. Naj mase agujt Abel, sanuutis racheenu xcuent yälrlilajz ni gojpmi.

5 Sigajcza gojp Enoc yälrlilajz, ni'c sinä Dios Enoc xhaguibaa, guideb nabajni, te na'c niejtni. Diru rebejn nidxälni sa'csi asinä Diosni xhaguibaa. Luxh räjp Dios xcuentni che gajd Dios jinäni, gubansa'cni, baspaani lajz Dios.

6 Rut chu tejdi sajz guspaa lajz Dios palga dini chalilajz, sa'csi che guibigni lojni, nanab chalilajznu yu' Dios, chalilajzanni sudeed Dios xcäl'nasa'cni loj renani rguilni, nalajznu renani rlaiz gumbeepac Dios.

7 Gojpza toNoé yälrlilajz. Che räjp Dios lojni siajpac nisguuj ni gajdreni fii, huililajzni. Bejnmi si'c ni räjp Dios. Bidxejbni sa'csi najni rusoob Dios xtiidxni, ni'c bencheeni te canuduxh te di niejt rexi'nni. Sa'csi gojpmi yälrlilajzga, bejnmi gubibde rebejn guedxliuj, gunijtreni sa'csi direni nililajz xtiidxni. Dxejcti cua'ni yäl'nabansa'c ni siääd xcuent yälrlilajz.

8 Sa'csi gojp toAbram yälrlilajz, basoobni xtidx Dios che gurejdx Diosni, biriini lajdxni te huijni cadro gudeed Dios yuj lojni te cuääzni ro'c. Biriini lajdxni, mase dini gan caro chääni. 9 Gojp toAbram yälrlilajz, ni'c huilajzni si'c benzijt loj reyuj ni räjp Dios gudeedni lojreni. Ro'c guläjzreni si'c lajdx benzijt. Guläjzni neñ reyuguijd, sigajcza bejn toIsaac näjza toJacoob, sa'csi näjza lojreni räjp Dios gudeedni yujga. 10 Niluxh toAbram cayunloj te guejdx nani sudzu'tz, te guejdx nani cuäxtiej Dios, nani gunchee lagajc Dios.

11 Sigajcza gojp toSara yälrlilajz te mase anajcni bengool niluxh agudejd chu xi'nni, cua'ni yälrmibee xten Dios te gujcní nan, guyu' te xi'nni, sa'csi huililajzni susoob Dios xtiidxni. 12 Ni'cni mase siäddzungajxh dxej ni guet toAbram, guyu' xhidalduxh xajgni. Si'c rebalxhaguibaa näj si'c reguibäzlule' xten yujxh ni tre' ro' nisdoo, si'c najczeni xhidalduxh, nicla gac guigabreni.

13 Guiraa rebejnre gujt, direni nica' yuj nani räjp Dios gudeedni lojreni; niluxh sa'csi rajpreni yälrlilajz, bahuiireni lo yujga zitro, ni'c bibalajzreni, sa'csi anajreni najczeni benzijt, cansajsireni lo guedxliuj. 14 Reni rnií si'c, niliireni caguilsjcreni cadro gac lajdxreni. 15 Paru niujnreni xhigab lajdxreni najc guejdx cadro biriireni, pet niajc nibisacreni ro'c. 16 Niluxh laareni rlaizreni te lajdxreni ni sajcru, nalajznu lajdx Dios xhaguibaa, ni'c rguilreni. Ni'cni di Dios guituyj gäbreni najcni Dios xtenreni, luxh alabencheeni guejdx cadro cuääzreni xhaguibaa.

17 Gojpza toAbram yälrlilajz ni'cni cheni bateed Diosni preeb, räjpni loj Abram gudeedni Isaac lojni lacuaa gudeedni xhiil, cuäjbní gugu'tni xi'nni lacuaa xhiil, luxh Dios ni najc tejtis aräjp lojni galooli: 18 "Isaac guniidx chu xhidajl xajglu, xagdoolu." 19 Sa'csi nanchee toAbram rajp Dios yälrmibee

te guspajnni rebengut. Luxh si'cza cuasacni xi'nni, ascanu loj rebengut cuasacni xi'nni.

²⁰ Nájza toIsaac gojp yárlirilajz benle'ni toJacoob nájza toEsaú, rájpmi xhini'c gun tehgareni. ²¹ Gojppza toJacoob yárlirilajz, che agojl guetni, benle'ni guiro'p dexi'n toJosé. Dxejcti huistieni guzucajni yejc baston xtenni te si'c gojpmi Dios. ²² ToJosé gojp yárlirilajz. Che agojl guetni, rájpmi sirii rexpejn Israel lajdx Egipto, gunibeezani xho gunnájreni xtzujtmi.

²³ Gojp rexuczajzn Moisés yárlirilajz, ni'c cheni gojl Moisés, bacua'tzreneni chon báii, sa'csi bahuiireni bázdaanni. Direni niu xtidx reii ni gunibeeni, rájpmi ju'treni báz niguii. ²⁴ ToMoisés gojp yárlirilajz, ni'cni che aguroobni di rlanjni nirilajni xi'n xindxa'p reii xten Egipto. ²⁵ Bejnmi xhigab tednájni trabajw rexpejn Dios lacuaa niujnni redzuun ni rchagljaz rujn reben Egipto, sa'csi najc reni'c dojl, luxh tera'tsi ruspaareni lajz bejn. ²⁶ Par laani maazru sajc tedni lagajc trabajw ni gudejd Jesucrist lacuaa niájpni reyálnasa'c xten Egipto sa'csi laani cabájtisni reyálnasa'c nani churu gudeed Dios lojni. ²⁷ Gojp toMoisés yárlirilajz biriini lajdx reEgipto, dini nidxejb yáldrxe'ch xten reii, huinuutis gusudzu'tzni si'cni najc xhigabni, ruhuini loj nani di guzen, nalajznu Dios.

²⁸ Gojp Moisés yárlirilajz bejnmi lanij xten pascw. Gunibeeni baroobreni rejn ro' xpuert rexpejn Israel te che ted angl xten yálgujt nicla te xingan galoo xten rexpejn Israel di guet. ²⁹ Gojp rexpejn Israel yárlirilajz gudejdreni galáii nisdoo ni laa nisdoxniaa luxh asdoo loj yubijdz rsiajreni si'c gudejdreni. Niluxh che rlanjz rebejn Egipto nidejd, gubi' nis, dxejc gulo'reni nen nis.

³⁰ Xcuent yárlirilajz gureb'an paderguij xten guedx Jericó, cheni basa' gajdz dxej caded huált rexpejn Israel guejdxga. ³¹ ToRahab, te gunaguijdx, gojppzani yárlirilajz ni'c dini niejt che gujt renani di nuzobdiidx, sa'csi laani bacua'tzni gaii bejn nani sagula'tz xho najc guejdxga.

³² ¿Xhiruxh guiniá? Di galdi guiniá xcuent toGedeón, xcuent toBarac, xcuent toSansón, xcuent toJefté, xcuent toDavid, xcuent toSamuel, nájza xcuent retoprofe't. ³³ Guiraareni gojp yárlirilajz ni'c bejnreni gaan xhidajl reguejdx, bensa'creni yálguxhtis, cua'reni xcálracnáj Dios ni bia'n diidx xca'reni, basáuren ro' rebeedz. ³⁴ Guyu'reni nen te balduxh luxh xhet gujcdireni, gojl baxuñreni te di niejtreni con espad. Reni gujc beñrdxajg, guzutu'tzreni gujcreni nadipduxh, gujcreni beñduxh lo guer, barilaagwreni resoldaad xten reni rdxe'ch lojreni. ³⁵ Guyu' regunaa ni cuasac rextogoolreni, gubansacreni lo rebengut.

Sgairreni gujt xcuent yálrusacsí lacuaa nicájbre ni nusiech lajzreni te nuslaa bejnreni sa'csi rlanjreni xca'reni stee yálnabajn ni sajcrú. ³⁶ Sgairreni gudejd trabajw guniyaj bejnreni, gudinnáj bejnreni chiir, cuaduuzaren cadén, guyu'zarení latzguuib. ³⁷ Guyu'za reni gujt che bacuaa bejn guij yejcreni o che gujcreni tio'p la' con sier. Guyu'za reni basacsí bejn te guro'nreni yárlirilajz. Guyu'za reni gujt con spaad. Guyu' reni cuanzaj nezree nezrec, gojtreni guid-xiil nájza guid-dxib, sa'csi xhet rajpdireni luxh entis rdejdre ni trabajw rusacsí bejnreni. ³⁸ Sa' rebejnnga di nungájl reben guedxliuj niáad rebejnnga lojreni. Cuanzaj rebejnnga nez lo reyubijdz cad xhet yu'di xhi gaurení nicla nis te yáreni; cuanzajreni nez nen redajn, nez nen rebiliáa náj nez nen guedduxh ni yu' nen yuj. ³⁹ Guiraa rebejnnga gojp yárlirilajz, luxh ni'cni huá'p xpala'nreni, niluxh direni nica' ni bia'n diidx gudeed Dios lojreni, ⁴⁰ sa'csi bejn Dios xhigab gunni te dzunsa'c lojreni. Bejn Dios xhigab

guniidxni yálnasa'c loonu, naj tejsi guica'nu con laareni nani bia'n diidx guniidx Dios.

12

Guihuiitisnu lo Jesucrist

¹ Ni'c najcni si'cni suga'nu galäii guiraa rebejnre luxh cahuiireni xcälirililaaznu. Ni'c do'o guisa'n te laad guiraa reni rusäu lo xnejznu, näjza redojl ni ruxhiid nuure lo xcäl'nabajnnu, te di jieednu chosaanu nez lo nezyuj ni sasanäanu nez cadro chonnu. ² Do'o guihuidzu'tz nez loj Dad Jesucrist nani guläxteij, nani guluuxza xcäl'rililajznu. Jesucrist gudejd trabajw lo cruzj, dini nitujy gujtni lo sa' yäl'guitga, sa'csi najnni cheni agudejdni trabajw, sica'ni yäl'rbalajz; naj agurejni xladbee Dios cadro nrabeeni.

³ Colyujn xhigab la'tu xho gudejd Jesucrist ladznaa reben dojl, te na'c guidxajgtu, na'cza jieedtu laj ni cabäjtuni. ⁴ La'tu gajd xteijntu guixe' lo yäl'rucuanäj dojl. ⁵ ¿La abiäl lajztu xho balijdx Dios la'tu si'c xi'nni, ä? Sree caj xtiidxni lo reguijtz; räjpni:

Xinä, na'c cuälazlu xcäl'naj Dad niclaza jieedlu che tiñajni luj.

⁶ Sa'csi si'c runnaj Dad renani sanälajzni, rujnni riaa guiraa renani rca'ni si'c xi'nni.

⁷ Palga gatiip lajzlu lo xcäl'naj Dios, sica'ni luj si'c xi'nni, sa'csi ¿chu dad di gunnaj xi'nni? ⁸ Niluxh palga di Dios gunnaj la'tu si'cni runnajni guiraa rexi'nni, ditud gac xi'npacni, najctu xi'n redojguijdx. ⁹ Anajntu cheni gucnu biuux lo guedxliujre, bennaj xtadnu nuure te rsoobnu xtiidxni, te runsa'czanu si'cni rlajzni. ¿Xhicuten dinu cuadiajg xtidx xtadnu ni yu' xhaguibaa te si'c jia'pnu yäl'nabajj, ä? ¹⁰ Xtadnu lo guedxliujre bennajreni nuure tio'p-chon dxej, te gac gusoobnu xtiidxni. Niluxh si'c runnaj Dios nuure te jia'pnu te yäl'nabanya, te gac nayazanu sigajc najcni laani. ¹¹ Guliini xhet xhi yäl'najdi ni rchalonu najc laaca che rsiajcnuni, racnaj tiejxhnu niluxh ria'nnu et laadi. Niluxh guiraa renani agudejd loj yäl'najga rusoob xtiidxni, rca'reni te yäl'nabanya ni rbedcxilajzreni.

Riez guze'ni xtidx Dios

¹² Ni'cni col'sudzu'tz reñaatu ni abadxajg, col'sudzu'tz yecxhijbtu ni abadxajg, ¹³ te col'quuil nezyuj xten tidx Jesucrist te sudzu'tz ni'tu. Na'c guibicajtu lo xnezyujni.

¹⁴ Col'quuil xho cuedxinäjtu guiraa rebejn. Col'chanä te yäl'nabanya, sa'csi renani di guibanyadi, digacdi fiireni loj Dad Jesucrist. ¹⁵ Col'huisa'c te di gunijt chutejtu lo xcäl'racnäj Dios, col'natiro gac chu tejtü si'c te cuanlaa ni rujn daan, sa'csi sa' bejnğa suxhinni guiraa renani ahuililajz. ¹⁶ Nicla tejtü na'c ga'p stee gunaa te laad, nungäjü cuäznäjni chäältisni. Na'cza gactu bejn ni di jiu xtidx Dios, si'c gujc toEsaü cheni bato'ni xcäl'nasa'cni ni najc xteni sa'csi najcni xingan galoo xtadni. Bato'nini te cua'ni yäl'rajwtis. ¹⁷ Anajntu, cheni rlajzni niunle' xtadnini te nica'ni ni najc xten xingangalooni, dini nica'ni mase guc-huin lajzni, binduxhni. Dxejcti diru niajcdi nica'nini.

¹⁸ Col'natiro, sa'csi la'tu di'tu nibig lo te dajn cadro rajc rsiaj bejn, te dajn ni galoo cayecduxh guiboo, cadro nacäy, nacäiboo, cayajcza bedonduxh. ¹⁹ Diza diajgtu niejn xse' trompet, xse' Dios si'c biendiajg rexepejn Israel agujc xchero. Luxh che biejn diajgreni rediidxga, direni nutiplajz, gunabduxhrene na'cru guiniini lojrene. ²⁰ (Sa'csi direni nutiplajz diidx ni caniini, räjpni:

“Palga ted te mantis guläj xhuj dajnga, colju'tni con guij.” ²¹ Te yäl'nadxebduxh najc nani guzen ro'c, lagajc toMoisés räjp: “Cayacditä yäl'rdxejb.”

²² Niluxh la'tu agubigtu lo dajn xten Siön, cad najc lajdx Dios ni nabajnpac, nalajznu guedx Jerusalén ni yu' xhaguibaa cadro yu' xhidalduxh xangl Dios, ²³ cadro re' reni calä'p xpala'n Dios. Ro'c re'za reni najc xi'n Dios, renani acaj lajni xhaguibaa. Agubigzatu lo Diospac, ni najc Juejz xten guiraanu, näjza lo resprit xten rebejn nani abasia Dios te anajcreni bennasa'c. ²⁴ Agubigzanu loj Jesucrist nani suga' galäii nez loj Dios näj benguedxliuj xcuent didxcoob ni bia'n Dios, näjza lo xtiejn Jesucrist ni badeedni lo Dios xcuent nuure. Jesucrist rniab riäj'l lajz Dios, luxh ni'c sajcru loj nani rniab xtiejn toAbel. Xtiejn toAbel rniab guix nani bagu'tni.

²⁵ Ni'c colnatio te di cuälaztu nani canii lojtu rextiidxni. Palga di rebejn nidedbia sa'csi gulälaz nani baluii bejn ni siäd guedxliujre, ¿xho jiennu tedbianu palga guilälaznu nani ruluii nani siäd xhaguibaali? ²⁶ Xse' Dios basniib guedxliuj galooli, niluxh naj rnisacni: “Ste huält susnibä xhet ganaxdi guedxliuj, susnibä näjza xhaguibaa.” ²⁷ Che gunii “ste huält”, ni'c säloj guibicaj renani benchee Dios ni rac rniib, te jia'n renani digacdi guiniib. ²⁸ Luxh sa'csi lajdxnu ni guniidx Dios digacdi guiniibni, do'o guideed xquixtios lo Dios xcuentni, te si'c chunu loj Dios, chonälaznuni guideb yäl'rdxejb näjza yäl'nadolajz, ²⁹ sa'csi Xtiosnu najc si'c te balduxh ni ruse'c, ni runitlojza.

13

Xho guspaa bejn lajz Dios

¹ Colchanuu lo yäl'rinälajz sa'ni. ² Di gusaantu gudeedu rolijztu guidzujn biooz, sa'csi loj reni bejn si'c, yu'reni badeed rolijzreni bidzujn xangl Dios rolijzreni, niluxh direni niacbee chu najcreni.

³ Colšnjaj lajztu reni yu' nen latzguuib, ascanu la la'tu ni yunäreni latzguuib. Colšnjajza lajztu renani basacsí bejn, ascanu la la'tu ni cagusacsíreni sa'csi näjza la'tu najctu benguedxliuj si'c najcreni.

⁴ Colga'p xpala'n yäl'guchnaa te guiban-nayatu con chäältu sa'csi sujn Dios yäl'guxhtis rebejn ni resnäjä chäl bejn näjza reni rusguee rebenxteb.

⁵ Na'c chanälajztu meel, colguibalaznäjä ni rajptu, sa'csi Dios agunii: “Dipacna gusanälu, dizana cuälazälu.” ⁶ Ni'c dinu guidxteeb guiniinu: Dad ni yu' xhaguibaa najc ni rcanäj narä; dina guidxebä xhitis ni gunnäjä bejn narä.

⁷ Colšnjaj lajztu renani baluii guiba'nsa'ctu, ni basule'za xtidx Dios lojtu; colhuii xho nabajnreni te sigajcza colchanä xcäl'rililajzreni.

⁸ Sigajc gujc Jesucrist naii, sigajcza najcni nadxej, sigajcza sajcnii par tejpas. ⁹ Na'c gusaantu gusiejchreni lajztu xcuent ste'ca yäl'ruluii ni digac si'c najc xtidx Jesucrist. Sacduxh sudzu'tz lastoonu lo yäl'racnäjä ni ruluii xtidx Dios, xhet lojdi yäl'rajwtis. Xhet sajcdi rebejn nani rujntis xhigab xcuent yäl'rajw.

¹⁰ Nuurnu rajpnu garenca piään, ro'c digacdi xca' rebixhojz xhi gaureni si'c ni cua'reni nen guidoguijd galoo. ¹¹ Sa'csi xpixhojzro xpejn Israel rinä xtiejn reman nen yu' ni laa dxanduxh te biäu lo dojl xten rebejn, niluxh rize'creni xpääl remanga te laad, dejtz guejdxga. ¹² Si'cza gujt Jesucrist te laad, dejtz guejdx, te basiani xtoj'l rebejn xcuent lagajc xtiejnii. ¹³ Naj colcho' chonnu loj Jesucrist te laad dejtz guejdx te guideednu trabajw näjza yäl'xtujy si'cni gudejd Jesucrist. ¹⁴ Sa'csi lo guedxliujre dxunlaasinu, niluxh caguuilnu

laadxnu ni chu jiäädru, te ro'c guidxunnu par tejjas. ¹⁵ Guideb xcälracnäj Jesucrist do'o guideeditisnu xquixtios lo Dios si'c te gojn ni gudeednu lojni, guiliä'pnu xpala'nni näj jielnu redij. ¹⁶ Na'cza jiälajztu guntu huen, gacnäj sa'tu, sa'csi reni'cni najc redzuun ni rdxaglaz Dios.

¹⁷ Colcuadiajg xtidx reni rnibee la'tu, sa'csi laareni rcanäjreni lastoonu, si'cza laareni sudeedreni cuent lo Dios. Colyujn guibalajzreni gunreni xtzunreni, na'c gac-huin lajzreni sa'csi palga gac-huin lajzreni, xhet sajcdini par la'tu.

¹⁸ Colnab lo Dios xcuent nuunu, sa'csi racbeenu naya xcäriejnnu, rlaaznu laaca jiennu guira'ti dzuun. ¹⁹ Rniä lojtu, guiniabrutu loj Dios, te gun Dios jiojb guibi'ä jiälä lojtu.

Te didxle' näj lult xtixtios

²⁰ Dios xten yälrbedxilajz ni baspajñ Dad Jesucrist lo rebengut, Jesucrist najc baxtorduxh xten rexiil xcuent rejñ ni bejn gusojb didxcoob xtenni ni najc par tejjas. ²¹ Dios gun gactu beñsa'c, bendxojn loj xhitis te guntu ni rlajzni, näj gunni loj guiraa nuure si'c ni rlajzni xcuent Jesucrist. ¡Colspaa lajz Jesucrist par tejjas! ¡Sugacni si'c!

²² Resa'nu, rniabä lojtu, colcuedcxi lajztu, colcuadiajg rediidx ni rulijdxre, sa'csi riojbg cacuaä te labäz guiitzre lojtu. ²³ Colyacbee abirii bejtznu Timoteu latzguiib. Palga guidzungajni ree, siädnääni jiädhuiä la'tu.

²⁴ Colgudeed xtixtios loj guiraa renani ruluii la'tu näj loj guiraa rebejtznu ni rililajz. Reben Italia ruxhał xtixtios lojtu.

²⁵ Gacnäj Dios guiraatu. Sugacni si'c.

Guijtz Nani Bacuaa Santiaag

Santiaag rucuaa guijtz loj renani nare'ch lo guedxliuj

¹ Narä Santiaag, xmos Dios näjza xten Dad Jesucrist, ruxhalä xtixtios loj guitzubitio'p cuaa rexpejn Israel ni nare'ch lo guedxliujre.

Yälñajn nani runiidx Dios loonu

² Rebetzä lo xtidx Dios, colguibalazduxhtis che rsiajctu recos nani ruquiltu cuälaztu xnezyuj Dios, ³ sa'csi che rsiajctu reni'c, rsiajctureni te don la guliipac ahuililajztu xtidx Dios, dxejc rsieedrutu yäl'rbecdxi lajz. ⁴ Dxejcti yäl'rbecdxilajz sajz gunni xtzuunni neñ lastootu, te gactu beñsa'c, bejn ni aguyajl lo xtidx Dios, nani xhet cayäädxi xcälñajnni.

⁵ Palga yu' tejtü ni cayäädxi xcälñajnni, suguiniabnini lo Dios, sa'csi Dios ruedeedxhni yälñajn loj guira'ti bejn, luxh dini guini didxlaa lojni. Palga guiniab bejn, sudeedza Diosni. ⁶ Niluxh che guiniabni, suchalilajzpacni, na'c guntio'p lajzni, sa'csi bejn ni runtio'p lajzni najc si'c bäj ni sanä bej, nezree-nezre'c sääbni. ⁷ Nani najc si'c, na'c gunni xhigab yu' xhi xca'ni lo Dad Jesucrist. ⁸ Sa'csi nani runtio'p lajzni, lo guiraa ni rujnni nadxej rujnni tej xhigab, guixee rujnni xte'ca xhigab, di gacdi chanuuni tejsi xhigab.

⁹ Te sa'nu ni najc nadolajz, suguibalajzni sa'csi najcni beñro sa'csi guläs Diosni, ¹⁰ sigajcza bejtznu ni yu' xhixtenni, suguibalajzni sa'csi abaluu Dios lojni najcni bejn ni xhet sajcdini, sa'csi nägajc laani sinitlojni si'c rnitloj reguii ni yu' lo cuaan ni yu' loniaa. ¹¹ Sa'csi che rliejn gubijdz näjza te belaa, li rgoļ recuaanga, li riuii reguii ni caj lojni, dxejc rtejbreni, dxejcti agunijt xcälsacrüni. Si'cza sinitloj te bejn ni yuduxh xhixtenni laļ ni yu'ni lo xnezyujni.

Xhi xca'ni che tedni trabajw

¹² Chicbaa niguii ni rsiudzu'tz laļ ni cadejdni trabajw, sa'csi che agunii Dios didxa'c xcuent nani bejnni sica'ni coron xten yälñabajn par tejpas ni bia'n Dios diidx gudeedni loj rebejn ni sanälajz Dios. ¹³ Che gunijt tejtü, rujntu dojl, na'c gäbtu: "Dios bejn banitä", sa'csi di gacdi quiquiil Dios te gunni cosguijdx, digacdi gunijt Dios, luxh sigajcza di gacdi gun Dios gunijt te bejn, gunni dojl. ¹⁴ Niluxh tejtatu runijt che rcäy xcariejntu sa'csi riab jejtü guntu cosguijdx. ¹⁵ Che riab jejtü guntu cosguijdx, runijttu rujntu dojl, luxh dojl che abejntuni, riädnäni yälgujt.

¹⁶ Sa'ä ni sanälazä, na'c gusaantu gusgueereni la'tu. ¹⁷ Guiraa recoshueen, guiraa recossa'c xhaguibaali siädreni loonu; Dios ruxhalreni, lagajc Dios ni benchee rebajl xhaguibaa, Dios nani di guchaa, sigajctis najcni. ¹⁸ Lagajc xcuentni bejn Dios gacnu xpejnni sa'csi huililajznu xtidxliipacni, te gacnu rebeñ galoo loj rexpejnni.

Xho nanab jiennu

¹⁹ Acanajntu recosre, sa'ä ni sanälazä. Niluxh tejtatu nanab gusquejnni te gucuaajntu, per gaclaani te guiniini, gaclaazani te guidxe'chni, ²⁰ sa'csi xcälrdxe'ch bejn dini gun xcälñasa'c Dios. ²¹ Ni'cni colcuälaz guiraa recosguijdx, guiraa recoslatsiaj ni ria'n. Guideb yälñadolajz colchalilajz xtidx Dios ni basule'nu, ni yu'pac lastootu, sa'csi ni'c najc ni sajz guslaa xaimtu lo dojl.

²² Niluxh baluui lo guira'ti bejn najctu bejn ni ruseobpactu xtidx Dios, xhet bejndi ni rucua diajgtis xtiidxni, ni rusgueeni lagajc laani. ²³ Sa'csi palga najc te bejn te nani rucua diajgtis xtidx Dios, niluxh dini gusoob diidxga, najcni si'c te bejn ni ruhuii lojni loj te guihuaajn. ²⁴ Sa'csi che ruhuiini xho najcni, sägajcni, riallazgajcni xho najcni. ²⁵ Niluxh nani ruhuidzu'tz lo leisa'c, nalajznu leii nani ruslaa bejn, luxh rusobpacni leiiga, nani lacuaa jiallajzni nani riejn diajgni, rujnpacni ni caj lo leiiga, bejnnga najc ni sajjp yälrbalajzpac lo xhitis ni rujnni.

²⁶ Palga yu' tejtü ni rujn xhigab najcni te bejn ni randuxh Dios, niluxh di gacdi gusauni ro'ni, guiraløj rniini, bejnnga rusguee lagajc laani, luxh xhet sajjcdi yälrajn Dios xtenni. ²⁷ Yälrajn Dios ni najc guliipac, ni xhet nu'chdi lojni najc scree: chahuini rebisiäjb, näjza regunaa ni agujt chäälni che yu' xhi rquiniireni, näjza na'c säblajztu guntu nani rujn reben guedxliuj ni di chalilajz xtidx Dios.

2

Nanab tebloj jiennänu guira'ti bejn

¹ Resa'ä, la'tu ahuililajztu xtidx Dad Jesucrist ni rajp guiraa yälrdimbicha', ni'c di gacdi guntu xhigab sajjcru tej bejn lo sabejnni. ² Palga guidzujn te bejn xquidootu yu' niloor naani, najcwni ladsa'c, dxejcti jiu'za te bejn nani xhet rajpdi, najcwni ladyujxh, ladbeed, ³ dxejcti la'tu jiuurutu nani najcw ladsa'cga, naatu: "Ree gurej lo yagxhilsa'cre", dxejcti gäblu lo bejn ni xhet rajpdi: "Rec gusulii o gurej lo yujre", ⁴ çla xhet rujnditu xhigab garenca najc tej bejn lo sa'ni, ä? Luxh dxejc acayajctu si'c juejz ni rujn xhigab guijdx.

⁵ çColgucua diajg, betzä ni sanälazä! Agule Dios bejn nani xhet rajpdi lo guedxliujre te ga'preni yälrlililazduxh, te lo xcälrnibee Dios xca'reni xcäl'nasa'c ni bia'n diidx gudeed Dios loj renani sanälajzni. ⁶ Niluxh la'tu agulälaztu rebejn nani xhet rajpdi. çXhixh xhet laadi rebejn ni rajp ni rusacsitu, li rgobxhaxh'reni la'tu, rinäreni la'tu loj reguxhtis, ä? ⁷ çLa xhet laadi rebejn ni rajp ni rniyaj loj Dios ni sacduxh? La'tu abirilajtu rexi'n Dios.

⁸ Palga guliitu cagusoobtu leii xten xreinu Dios, si'cni caj lo xquijtz Dios scree: "Colchanälajz sa'tu sigajc rinälajztu lagajc la'tu", laaca rujntu. ⁹ Niluxh palga rinälajzrutu tej cuaa bejn lo stee cuaa bejn, cayujntu dojl, luxh xleii Dios rniij najctu bejn dojl, bejn ni rbälaz leii. ¹⁰ Palga yu' te bejn ni ruseob guiraa ni caj lo xleii Moisés, niluxh runijtni lo tejtis diidx ni caj lo leii, abanijtpacni, najcni si'cni dini nusoob nicla tej diidx lo guideb leiiga. ¹¹ Sa'csi lagajc Dios ni gunii: "Na'c guesnäjl bejn ni di gac chäällu", lagajc laani guniizani: "Na'c ju'tlu." Palga dilu guesnäj bejn ni di gac chäällu, niluxh rugu'tlu te bejn, abanijtlu xcuent guiralii releii. ¹² La'tu colguini, colguibajn si'c rebejn ni gun Dios yälguuxtis con xtiidxni ni ruslaa bejn lo dojl. ¹³ Sa'csi renani di gulaslajz bejn, che gun Dios yälguuxtis'reni, dizani gulaslajz laareni. Sajcru yälruulaslajz lo yälguuxtis.

Yälrlilajz näj dzuun ni rujn bejn

¹⁴ Resa'ä, çxhi sajjc palga guinii te bejn: "Ahuililazä xtidx Dios", niluxh dini gun dzuun ni riälj palga, ä? Sa' yälrlililajzre, çla suslaanini lo dojl, ä? ¹⁵ Palga yu' te bejznu o te bisiajnnu ni dini ga'p xhajibni, luxh xhetiza xhi gauni, xhi yäni, ¹⁶ luxh gäb tejtü lojni: "Sucuedxi lajzlu jiilu, suguidxa' lajzlu, suguidxaj xque'lu", niluxh dini gudeed nani caquiinni, çxhi sajjc rediidx ni räjpni lojni,

ä? ¹⁷ Sigajcza yälirililajz nani di guquuil bejn gunreni xtzuum Dios najc si'c te ni agujt, sa'csi dini guquuil bejn gunreni dzuun.

¹⁸ Yu'za reni naa: "Luj rajplu yälirililajz, narä runä xtzuum Dios; baluui narä xcälirililajzlu xhet näjdi xtzuum Dios, dxejcti narä suluiä xcälirililazä xluent rextzuum Dios ni runä." ¹⁹ La'tu rililajztu yu' tejtis Dios, raddjltireni, rdxebduxhrenini. ²⁰ ¿La di rlanjztu gacbeetu, beñnayäl? ¿La ditu gan, yälirililajz ni di guichagnäj xtzuum Dios najc te yälirililazgut? ²¹ Dios badzucaj xtojł toxtadgoldoonu Abram sa'csi bejn ni si'c gunibee Dios gunni, che badzuubni xingaanni Isa'c lo piään, nugu'tnini nez lo Dios. ²² Colhuui xho tejsi junt sadxaag xcälirililajz toAbram dzuun ni bejn ni, dxejcti sa'csi bejn ni nani gunibee Dios gunni, bejn Dios gujc xcälirililajz ni sa' yälirililajz nani rlanj Dios ga'p rexpejn ni. ²³ Dxejcti huile' xtidx Dios cadro caj scree: "Abram huililajz ni räjp Dios lojni, ni'cni badzucaj Dios xtojł ni, cua' Dios Abram sa'c te beñnaya." Birilajzani "xamüigw Dios."

²⁴ Ni'cni ruhuiitu rca' Dios te bejn si'c beñnaya nez lojni xcuent xtzuum Dios ni rujnzani, xhet ganaxtis xcuent xcälirililajz bejn ga. ²⁵ Sigajcza gusajc toRahab, ni gujc te gunadxab. Dios badzucajza xtojł ni, bejn Dios xhigab najcni te beñnaya sa'csi bejn ni xtzuum Dios che badeedni rolizjni bacua'tzloj tio'p xpejn Israel ni gujc guixhajg ni sagula'tz guejdxga, dxejc gucnäjnireni te siireni ste'ca nez yuj. ²⁶ Sigajc ni di gacdi guibajn tiejxh bejn palga xheti sprit, sigajcza di gacdi guibajn yälirililajz palga dini gun dzuun ni rnibee Dios gunni.

3

Rediidx nani rnii luudxnu

¹ Resa'ä, na'c gac xhidajltu bejn ni ruluii xtidx Dios, sa'csi anajnnu rac yälguxhtisoru rebejn nani ruluii xtiidxni. ² Sa'csi guiragajcnu riennu xhidajł cuaa dojl. Palga yu' te bejn ni di gunijł to diidx ni rniini, laani najcni te beñsa'c, rajcza rnibeeni guideb tiejxhni. ³ Palga rusäl'nu guiib ni ru' ro' cabaii te chääni cadro rlanjznu jiini, rnibeezanu guideb xtiejxhni. ⁴ Colhuui rebarcwro, mase siolduxhreni, luxh rebeduxh rulanaareni, niluxh capitán ni rusaj barcw lo nisdoo, te guibbáz ni caj xhajn barcw neñ nis, con ni'ctis rinäni cadrotis rlanjzni. ⁵ Sigajcza najc luudxnu, najcni te labáz tiejxhnu, luxh colhuui lacti didxro rniini. Najcni si'c te balbáz ni rajc ruze'c guiragajc reyajg ni yu' dajn. ⁶ Luxh luudxnu najc si'c te bajł. Rnii luudxnu guiraa redidxdxuudx ni rnii rebeñ guedxliujre nani rdxe'ch lo Dios. Lo guiraa rela' ni najc tiejxhnu, laa luudxnu ni rundxuudx guideb tiejxhnu. Luudxnu ralguij con xquiboo gabijł. ⁷ Rebejn sajc gusiadcooreni guraloj guidxaa, guiraa mane', guiraa bäl, guiraa man lo nisdoo, abasiadcoo bejnreni, ⁸ per nicla tej bejn di gacdi gusiadcoo lujdxni. Dini cuedxi, guidxani cosguijdx, najcni si'c te bäl ni rauya'ni rugu'tni te bejn. ⁹ Lagajc luudxnu rliä'pnu xpala'n Dios Xtadnu, lagajc laani rnijajnu sabejn nu ni benchee Dios sigajc najcni. ¹⁰ Tejsi ro'nu rnile' lo Dios nägajcza rgue lo bejn. Rebetzä, jxhet si'c di nungäjł di gacni! ¹¹ ¿La rbää bejn nisnejxh näjza nisrop lo tejsi bisie, ä? ¹² Betzä, ¿la caxajsi sajc xcaj aceitun loj te yagiigw, ä? ¿O la sajc xcaj iigw lo te yaguub, ä? Sigajcza digacdi guirii nisnejxh näjza nisrop lo tejsi bisie.

Yäl'najn ni siääd xhaguibaa

¹³ ¿Chuni'c lo guiraa tu yu' xcäriejn ni, nanduxhni, ä? Suguluiini xho najcni xcuent xcäl'nabansa'cni, sugunni xtzuumni guideb yäl'nadolajz ni rudeed xcäriejn ni. ¹⁴ Niluxh palga yu' yälrdxe'ch lo sa'lu ni runnan'laa lastoolu,

näjza rujnlu guira'ti parsi xcäl'nasa'c lagajc luj, na'c gaclu gualajz, sa'csi ni'c najc si'c ni caniiu didxrusguee xcuent xtidxlü Dios. ¹⁵ Sa'csi sa' yäl'najnre, xhet xhaguibaadi siädni, alga najcni yäl'najn xten guedxliujre, xten reben guedxliuj, xtenza rebendxab. ¹⁶ Sa'csi cadro yu' yälrdxe'ch lo sa'ni, näj cadro rujn bejn guira'ti parsi xcäl'nasa'c lagajc laani, ro'c yu' bieje, yu' guiraloj latsiaj. ¹⁷ Niluxh yäl'najn ni ruxhal Dios, ganiddoo najcni naya, dxejcti rulecdxini xcäriejn bejn, dxejc rujnni rajc bejn nadolajz lo sa'reni, rujnzani saru runnäj bejn sa'reni, rulazlajz bejn sa'reni, rujnzareni guiraloj dzunsa'c, runle'pacreni xtiidxreni, direni guinii tej diidx laaga cayujnreni garenca dzuun. ¹⁸ Renani rguuil yäl'rbedxi, yäl'rbedxi rbe'creni te xca'reni te yäl'nabannaya nez loj Dios si'c xcäl'nasa'creni.

4

Ni nabannäj guedxliuj

¹ ¿Casiäd rebieje, reyälrdxe'ch lo sa'ni ni casiajctu? ¿La direni jiaäd xcuent lagajc xhigab ni yu' lastootu, ä? Lagajc rexhigabga rujn bieje nen lastootu, ruscäjäyeni xcäriejntu. ² La'tu rlanjtu ga'ptu nani ditu ga'p, dxejcti rugu'ttu sa'tu. Rsiäblajztu xhixten sa'tu, luxh sa'csi digacdi xca'tuni, dxejc rucuanäjtu sa'tu, rdil'näjtu sa'tu. Ditu ga'p nani rlanjtu sa'csi ditu guiniabni loj Dios. ³ Rniabtuni, niluxh dini guniidxnini sa'csi xhet laadi najc xhigabtu gunabtuni, alga gunabtuni sa'csi rlanjtu gunijttuni si'cni rlanjtu. ⁴ ¡Aii! Bejn ni di gandzu' Diostis. ¿La ditu gan bejn nani rlanj gun redzuun ni rujn reben guedxliuj, bejnga rdxe'chreni lo Dios, ä? Ni'cni palga yu' chu tejtü ni rlanj chanuu lo ni rajc lo guedxliujre, bejnga rdxe'ch lo Dios. ⁵ O ¿la rchalotu xlia'si caj lo xtidx Dios rediidxre: “Sprit ni baxhal Dios te cuääzni nen lastoonu, randzu'ni nuurnu sa'csi rlanjni guinibeeni nuurnu”? ⁶ Niluxh runiidxru Dios xcäl'racnäjni loonu. Ni'cni rnii xtiidxni scree: “Dios rdxechnäj renani runnaro lagajc laareni, niluxh rudeedruni xcäl'racnäjni lo rebennadolajz.” ⁷ Coljiu'pac lo xnezuj Dios. Colsudzu'tzpac te di guntu ni rlanj bendxab, te guxunni lojtu. ⁸ Colguibigru lo Dios te guibigzani lojtu. Bendojl, colquuib naatu, nalajznu na'cru guntu latsiaj; colgusia lastootu, la'tu ni runtio'p lajztu. ⁹ Sugacnaj lajztu, suchuti xliajs, colyonduxh. Colguchaa xcäl'ruxijstu, colca' yäl'huin, colguchaa xcäl'rbalajztu, colca' yäl'roon. ¹⁰ Colyajc si'c bejn ni xhetliidi sajz nez loj Dad Jesucrist, te laani guiliäsi la'tu gunni la'tu benro.

Na'c guiniyajtu sa'tu

¹¹ Rebetzä, na'c guiniyajtu resa'tu. Sa'csi renani rniyaj sa'ni o rujnni yälguxhtis sa'ni, reni'c rniyaj xleii Dios, rujnreni yälguxhtis xleii Dios luxh palga guntu si'c, dirutu gac renani rusoob xtidx Dios, alga najctu juejz xten leii. ¹² Tejtis najc nani runiidx leii loonu, tejtis najc juejz; najcni nani rajc ruslaa bejn lo dojl, nani sajzca gunitloj bejn. La'tu, ¿chuxh najctu te guntu yälguxhtis lo sa'tu, ä?

Dinu gan xhi gac guixee

¹³ Naj colcuadiajg dee, la'tu ni rniitu, nadxej o guixee chonnu te guejdx nezrec. Ro'c guideednu tebjz te guiziinu, guito'nu te jiennu gaan meel. ¹⁴ Luxh nicla gantu xho gac xcäl'nabajntu guixee. Xcäl'nabajntu najc si'csi te za nani rienloj tera'tböz, dxejcti rnitlojni. ¹⁵ Hueenru guiniitu scree: “Palga rlanj Dios sibaannu, te jiennu dee o dec.” ¹⁶ Niluxh si'c ni rujntu naj, rajc

guyalajztu rniitu didxro; luxh guiraa redidxroga najc dojl. ¹⁷ Ni'cni ni najn xho riäjł gunni, palga dini gun si'c, rujnni dojl.

5

Rulijdxni rebejn ni yu' xhidajł xhixtenni

¹ Colgucudiajg xtidxä, bejn ni yu' xhidajł xhixtentu. Colyoon, colcuedxa' xcuent recasionduh ni sactu. ² Guiraa rexhixtentu nani rajptu aguxhijn, luxh rexhajbtu agudajw rebaguiidni. ³ Oor näjza pla't xtentu agubibtiejnni, aguxhijnni. Lagajc dee gun gacbee Dios ditu niujn ni rłajz Dios guntu, lagajc ni'c gun chectu, niflojtu. iXlia'si batiedajntu xhixtentu nen redxey lultga! ⁴ iColhuii! Ditu niguixsa'c loj reni bejn xtzuuntu, ni'cni laareni cayujnreni yälqij lo Dios xcuenttu. Luxh xhadiajłi Dios xten reangł ni yu' xhaguibaa abiduzjn yälqij xtentu ni cabe'c renani batie' xcäl'nasa'ctu. ⁵ Agubansa'cpactu lo guedxliujre, bejntu lanij si'ctis ni rłajztu, abastio'tu lastootu nen redxey xten yälrugut. ⁶ Gudiiltu xho bagu'ttu rebensa'c luxh laareni dxiitis gusuajreni, xhet bejndireni te na'c nugu'ttureni.

Colcuääz jiadxhii Diostu

⁷ Resa'ä, dxitis colcuääz guidzujn dxej cheni jiaäd Dad Jesucrist. Colhuii xho rujn bejn ni rbe'c binij, dxitis rbäjzni gac xcäjłni lał ni riabj nisguigaloo näjza nisguij ni riabj lult. ⁸ Si'cza la'tu colcuääzxi, colgustioob lastootu sa'csi asiäddzungajxh dxej ni jiaäd Dad Jesucrist. ⁹ Resa'ä, na'c chale'ctu xqee sa'tu, didi gun Dios yälguhxhtis la'tu, sa'csi asiäddzungajxh dxej che guidzujn Dios ni najc Juejz. ¹⁰ Rebetzbidä, colhuii xho gudejd reniguii nani bacuaa xtidx Dios trabajw galoo, xho guläjjzareni. ¹¹ Colhuii xho rniinu chicbaa renani guläzdxı lo trabajw ni gudejdreni. Abiejn diajgzatu xho bejn Job che gudejdni trabajw, anajnzatu xho guzajcni xcuent redzusa'c ni bennäsac Diosni, ni ruluiloj xho riaduxh Dios bejn, rapduxhni yäl'rulasłajz.

¹² Rebetzä, che ria'ntu diidx lo te bejn, gunatiro palga gusä'ttu xhaguibaa, o guedxliuj, o xhi steeni. Che naatu: "Mbaj", ni'ctisza colguinii. Che naatu: "Na'c", ni'ctisza colguinii te na'c gun Dios yälguhxhtis la'tu.

¹³ iLa yu' tejtı ni cadejł trabajw, ä? Suguiniabni lo Dios. iLa yu' chu tejtı ni cabalajz, ä? Sugolni dij te guiliä'pni xpala'n Dios. ¹⁴ iLa yu' chu tejtı ni cayacxhuu, ä? Sucueedxni rebengool ni rnibee nen guidoo, te guiniabreni lo Dios xcuentni lał ni cagusälzareni se't lo cuajni con laj Jesucrist. ¹⁵ Luxh palga rililajzpacreni che canabreni, siajç benracxhuuga, siliäs Jesucrist bejnğa. Luxh palga bejnni dojl, sibicaj xtojłni. ¹⁶ Ni'cni colguxhobdojl lo sa'tu, colnab lo Dios xcuent sa'tu te jiajctı. Che rniabduxh te bejn naya lo Dios, dzunroza rujn Dios. ¹⁷ Elías, te bejn ni gunii xtidx Dios agujç xchero, gujca te bejn sigajç najcnu. Gunabdipni loj Dios te na'c jiajb nisguij, luxh di nisguij niajb lo guedxliuj choñ ijz garol. ¹⁸ Dxejç gunabsacni lo Dios, dxejç bixal xhaguibaa, biabsac nisguij, dxejçru gujç reyäl'nasa'c xtenreni lo guedxliuj.

¹⁹ Rebetzä, palga yu' chu tejtı ni guibicaj lo xtidx Dios, luxh yu' chu gacnäj guibisacni lo xtidx Dios, ²⁰ sugacbee bejn nani racnäj guirii bendojł lo xnezyuguijdxni te guibisacni lo Dios, bejnğa agucnäjni te gulaa xaimni lo yälgujç, te guibicajza guiraa xtojłni, mase xhidalduxh najc xtojłni.

Guijtz Ganid Nani Bacuaa Pedr

Pedr cacuaa guijtz loj reni rililajz ni nare'ch

¹ Narä Pedr, te apost xten Jesucrist, cacuaa guijtzre loj renani agule Dios gac rexejnni nani rbäjz si'c benzijt lo reguedx Ponto, Galacia, Capadocia, Asia, näjza Bitinia. ² Xtdadnu Dios gule la'tu galooli bencheeni niguii, aguleni la'tu par lagajc laani te gun Sprit Dxan xtenni xtzuumni nen lastootu te gusoobtu xtidx Jesucrist te jia lastootu con xtiejn Jesucrist. Rniabä lo Dios gacnäduxhroni la'tu, guscuedcxini lastootu lo guiraliiti.

Te yäl'nabajn ni cabääznu

³ Colguiliä'p xpala'n Dios ni najc Xtdad Jesucrist, Dios nani xcuent xcäl'rulaslazduxhni bejnni gojppu te yäl'nabañcoob sa'csi baspañsacni Jesucrist loj rebengut. Sa'csi rajpnu yäl'nabañcoob, ni'c nadippac lajznu. ⁴ Ni'cni laani suniidxni te yäl'rusalajz ni di nitloj, ni di xhin, ni di jiuii si'c riuii rebalajc. Yäl'rusalajzga aguluchedzu'tzni xhaguibaa par la'tu, ⁵ nani cayapdzu'tz xcäl'milaagwr xten Dios sa'csi rililajztu xtiidxni, te guluui Dios guira'ti ni rajpni par la'tu, ni arapcheeni te guluiinireni lojtu che luux guedxliujre.

⁶ Ni'cni rbalazduxhtu, mase nanab tedtu balti trabajw gaie'si dxej lo guedxliujre, ⁷ te guzen xho rililajztu. Xcäl'rililajztu sajcro lo oor nani rnitloj, niluxh xcäl'rililajztu di nitloj, mase tedni lo guiboo, ni'cni sinii Dios didxsa'c, didxro, siliä'pni xpala'ntu che guibisac Jesucrist lo guedxliujre guideb xcäl'milaagwrni, näjza xcäl'rindimbicha'ni.

⁸ Mase gajdttu fii lojni, sanälajztuni. Mase ditu fii lojni naj, ahuililajztu xtiidxni, rbalazduxhtu guideb yäl'rbalajz ni rut rajcni rusule', sa'ni yu' xhaguibaatis, ⁹ sa'csi xcäl'rililajztu susläa xaimtu lo dojl, sica'tu yäl'nabajn par tejpas.

¹⁰ Luxh xcuent yäl'rusläa dojlre, rebejn nani gunii xtidx Dios agujc xchero, laareni abasulexgaareni xcuent xcäl'racnäj Diosre nani siääd lojtu. Luxh bisiedduxhrene, gunabdiidxzareni, ¹¹ te rrajzrene gacbeereni chu bejn o gupac gac nani cagusä't Sprit xten Crist ni yu' nen lastooreni che gunixgaani xho nungäjł ted Jesucrist trabajw, dxejcro xcasacni yäl'rñibee. ¹² Baluii Dios lojrene, di rediidxga soob nen redxej ni nabajnrene, alga par la'tu najc rediidxga. Naj agunii rebejn ni rusule' xtidx Dios rediidxga lojtu. Abasule'reni xtidx Jesucrist sa'csi xhaguibaali baxhal Dios Sprit Dxan xtenni te cuääzni nen lastooreni. Näjza rexangl Dios ni rbäjz xhaguibaa rrajz gacbeerureni rediidxga.

Xcäl'nabañnayanu nez loj Dios

¹³ Ni'cni, colsanij xcäriejntu, colgusudzu'tz lastootu, guideb lastootu colyenloj yäl'racnäj xten Dios ni abia'n diidx xca'nu che guibisac Jesucrist lo guedxliuj.

¹⁴ Gactu si'c biuux nani ruseob xtidx xtdadni. Na'cru xcäjbtu guntu redzunguidx ni bejntu galoo che gajdttu gumbee Dios. ¹⁵ Dios ni gule la'tu najc dxan. Sigajcza la'tu, loj guiraliu ni rujntu colyajc benđxan. ¹⁶ Sa'csi lo xtidx Dios caj scree: "Sajctu benđxan sa'csi narä nacä dxan."

¹⁷ Palga la'tu rniitu "Dad" lo Dios nani tebloj rujn yäl'guxhtis loj guiraa bejn xcuent dzuun ni bejnni, la'tu riälj guidxejbtuni guiraa dxej ni nabansijctu lo guedxliujre. ¹⁸ Anajntu di Dios nudeed yäl'nasa'c ni rnitlojdi, si'c oor näjza pla't, te basläani la'tu lo recostumbr ni cua'tu lo retoxtdagoldootu.

Recostumbrga xhet sa'cdireni. Di Dios nudeed oor nicla pla't te baslaani la'tu, ¹⁹ badeedni rejn ni sacduxh te baslaani la'tu loj xtojltu. Rejn si'c xtiejn te xiil ni naya, xhetpac najcdini, xtiejn lagajc Jesucrist. ²⁰ Guliipacni che gajdli guirixtiej guedxliujre, gule Dios Jesucrist, niluxh najru, nen redxelult che gajd guedxliujre nitloj, biadluilojni par xcäl'nasa'ctu, ²¹ la'tu nani rililajz xtidx Dios xcuent Jesucrist. Luxh Dios baspansac Jesucrist loj rebengut, badeedni yäl'rnibee lojni, ni'cni ahuililajztu xtidx Dios, luxh Diostis cayenlojtu naj.

²² Naj sa'csi abasoobtu xtidxliini, te si'c abasiatu lastootu te gac chanälajztu sa'tu, naj guideb lastootu colchanälajzpac sa'tu. ²³ Sa'csi acua'tu xcäl'nabañcoobtu xcuent xtidx Dios ni najc par tejpas, et xcuentdi xtidx beñ guedxliuj ni rnitloj. La'tu najctu si'c cuaan ni rliejn lo bejdz ni siäd xhaguibaa, xhet lo bejdzdi ni rnitloj. ²⁴ Galooli gunii Dios scree: Guiraa reben guedxliuj najc si'c recuaan, guiraa xcäl'nasa'creni najc si'c reguii ni rcaj lo cuaan, recuaan rgoj, lirtejbza reguii xtenni, ²⁵ niluxh xtidx xtad Jesucristnu rsiudzu'tzni tejpas. Luxh diidxre najc diidx ni basule'reni lojtu.

2

¹ Ni'cni colgusaan guiraa redzunguijdx ni yu' lo guedxliuj, na'c gusgueetu sa'tu, na'c guntiop lajztu, na'c chuguij lajztu xhixten sa'tu, na'c guiniyaj sa'tu. ² Si'c riojl rebäznite' le'ch, si'cza colquuil xtidx Dios par sprittu. Coljiojl xtidx Dios te gustioobruni la'tu lo yäl'rusläa lo dojl, ³ palga agucbeetu lacti hueen najc xcäl'racnäj Jesucrist.

Crist najc si'c te guij ni nabajn

⁴ Colguibig loj Jesucrist ni najc si'c te guij ni nabajn. Laani suniidx yäl'nabajn par tejpas loonu. Rebejn badzucaj guijga, niluxh Dios gulenini sa'csi sacduxhni. ⁵ Sigajcza tejpgatu najctu si'c guij ni nabajn, ni'c colgusaan xca' Dios la'tu, reguibajn, te con la'tu gunchee Dios te yu' cadro cuääz Sprit xtenni, te gactu rexpixhojz Dios, nani nayapac lastooreni. Ni'cni sa'csi najctu tejtis con Dad Jesucrist sudeedtu lo Dios guiraa xcäl'nasa'ctu con xprit xtentu. Dee najc nani rchaglajz Dios. ⁶ Sa'csi galooli gunii Dios scree:

Agule'cä te bejn nen guedx Siön, nalajznu Jerusalén, ni gac si'c te guisa'c, te guiro ni rsiuj squiin te yuro. Chutis bejn ni chalilajz xtiidxni, dini jianxtujuj.

⁷ Lojtu ni ahuililajz xtiidxni najcni si'c te guisacduxh, niluxh loj renani gajd chalilajz xtiidxni, najcni:

Guij ni gulälaz renani cayunchee yu', lagajc guijga gujc guijpac ni baliib squiin xten yu'ga ⁸ näjza:

Te guij ni rliaj ni' bejn, ni ruzäl'ta'reni, laareni riajbreni sa'csi direni gusoob xtidx Dios, luxh agunibexga Dios nitlojreni.

Renani gule Dios

⁹ La'tu najctu te cuaa bejn ni agule Dios, tejpgatu najctu rebixhojz ni najc si'c reii xten Dios. La'tu najctu te ben'naya, te bens'a'c, rexpeljpacni. Aguleni la'tu te gusule'tu reyäl'nasacduxh ni bejn Dios ni gurejdxtu che guyu'tu lo nezyunacäy xten guedxliujre te biu'tu lo nezyuj ni rdimbichasejz xten Dios. ¹⁰ La'tu galoo rut najcditu, niluxh naj najctu rexpeljpac Dios. Galoo gajd Dios gulaslajztu, luxh naj abalaslajz Dios la'tu.

Colguibajn lo xnezyuj Dios

¹¹ Rebetzä ni sanälazä, nabajntu lo guedxliujre si'c benzijit, ni rbäjz te laad, ni'c rniabduxhä lojtu, na'c guntu recosguijdx xten guedxliujre, ni rutijl nen lastoo bejn te cuälazreni xnezyuj Dios. ¹² Colguibansa'c lal ni yu'tu loj rebenzijt ni di gac xpejn Israel te palga guiniyajreni la'tu gäbreni najctu beñlatsiaj, che fiireni redzunsac'c ni rujntu, siliä'ppacreni xpala'n Dios che jiädsac Jesucrist te gunni yälguxhtis.

¹³ Ni'cni, sa'csi huililajztu xtidx Jesucrist, colgusoob xtidx guiraa reni rnibeetu lo guedxliujre, si'c najc presidentro, ¹⁴ regubernadoor nani ruxhalni te rujnreni yälguxhtis rebendojl näjza te guiliä'pni xpala'n reben nani laaca rujnreni. ¹⁵ Sa'csi Dios rlajz guntu recossa'c te cuedcxitu rextidxnayääl ni rni reni di rlajz gumbee didxlii xcuent Jesucrist.

¹⁶ Colguibajn si'c bejn ni rut rnibeedi, na'cza guntu latsiaj sa'csi rut rnibeeditu, colguibajn si'c guinibee Dios. ¹⁷ Ga'ptu yälnadolajz loj guiraa si'c bejn. Colchanälajz sa'tu ni rililajz. Colguidxjeb Dios, colguiliä'p xpala'n presidentro.

Gudejd Jesucrist trabajw te baluiini xho jiennu

¹⁸ La'tu ni najc mos, guideb yälnadolajz colgusobdiaj guiraa xtidx rexlamtu, xhet ganaxdi relamsa'c ni najc nadolajz, näjza relam ni najc benguijdx. ¹⁹ Sa'csi rchaglajz ruhuii Dios te bejn palga sa'csi rililajz te bejn xtidx Dios rujn bejn huant che rdejndi trabajw luxh xhet bejndini. ²⁰ Palga la'tu rujntu latsiaj ni'cni rusacsini la'tu, xhi guntu gaan palga rujntu huant rdejdtu trabajw? Niluxh palga la'tu rdejdtu trabajw sa'csi rujntu redzunsac'c, luxh rujntu huant, ni'c najc laaca nez loj Dios. ²¹ Te guntu si'c gurejdx Diostu, sa'csi gudejdza Jesucrist trabajw xcuenttu te guluiini xho guntu che chanuutu lo xnezyujni. ²² Laani dini niujn nicla tej dojl, laani dini nusguee nicla tej bejn con didx-xhii. ²³ Che guniyajreni lojni, dini nudzu' yälrmijajga. Che cadejndi trabajw, dini nudzu' diidx niluxh bateedni lagajc laani ladznaa Dios ni rujn yälguxhtissa'c. ²⁴ Gudeed Jesucrist trabajw si'c te bendolduxh, bacuaarenini lo cruzj te ro'c gusacsiduxh tiejxhni xcuent xtojlnu, te na'c gunrunu dojl, te guibansa'cnu lo xnezyuj Dios. Gudilguixdxreni tiejxhni te basiajnci la'tu. ²⁵ Sa'csi galoo gujctu si'c rexiiil ni rut rajpdi, rijreni nezree-nezrec. Niluxh naj agubisactu lo xpaxtoortu näjza nani randzu' xaimtu, Jesucrist.

3

Xho nanab guibannäjtu chäältu

¹ Sigajcza la'tu, regunaa ni abachnaa, colgusoob xtidx chäältu, te mase yu' tejreni ni di chalilajz xtidx Dios, sililajzni xtidx Dios sa'csi fiini xho rujntu mase xhet rniidilu. ² Sa'csi fiini xho riulu xtiidxni näjza xho rniilu nadolajz lojni, näjza xho nabañnäsa'cluni. ³ Na'c gusucheetu ganax lo jiaatis, si'c najc guichniil yejctu, näjza biaoar ni rcaj diajgtu, guejntu, naatu, näjza ladsa'c ni najc sacru. ⁴ Colgusuchenäj lastootu yälnadolajz, yälrbecdxij lajz, näjza yälšanälajz, sa'csi direni nitloj, luxh sacduxhreni nez loj Dios. ⁵ Galoo si'cza bejn regunaa ni gujc xpejn Dios ni huililajz xtidx Dios, basucheereni lastooreni, basoobreni xtidx chäälreni. ⁶ Si'c gujc toSara, basobdiajgni xtidx toAbram, guniizani lo toAbram, Dad. Naj najctu si'c laani palga rujntu redzunsac'c, näjza na'c guidxjebditu.

⁷ Sigajcza la'tu, niguii ni abachnaa, colguibannäsa'c chäältu. Colgapdani sa'csi dini gacnadip si'c te niguii; nanab guntu si'c sa'csi näjza lojreni badeed Dios

yäl'nabajn par tejpas. Colyejn si'c, te gucuadiajg Dios che cuedx-guiniabtu lojni.

Renani rdejđ trabajw che laaca rujnreni

⁸ Dee najc ni caniađ loj guiraatu, saru colguibannäj sa'tu. Colgulaslajz sa'tu, colchanälajz sa'tu si'c rinälajz te niguii bejtzni. Gactu bensa'c, bennadolajz. ⁹ Na'c gudzu'tu didxguijdx che guiniireni didxguijdx lojtu, na'cza gudzu'tu didxyaj che guiniireni didxyaj lojtu. Alga gunab lo Dios gacnäjnireni, sa'csi ni'cni gule Dios la'tu, te sica'zatu reyäl'nasa'c ni guniidxni lojtu. ¹⁰ Sa'csi scree caj lo xtidx Dios:

Nani rchagljajz guibajjni,
luxh rrajzzani saru tedni redxej lo guedxliujre,
sugudxojnni guinii ro'ni didxnaj näjza didx-xhii.

¹¹ Guibicajni loj redzunguijdx, sugunni redzunsac'tis.

Suquiiłni yäl'rbedxi te ni'c chanuuni.

¹² Sa'csi ruhuii Dios rebejn ni rujn dzunsac',
rucuadiajgzani xtiidxreni che rniabreni lojni.

Niluxh rudzurëni lojni, rbälazzani renani rujn latsiaj.

¹³ ¿Chu laa ni gun latsiaj la'tu, palga la'tu rbaali lajztu rujntu dzunsac'?

¹⁴ Palga caxäjsi tedtu trabajw che guntu redzunsac'. ¡Chicbaatu! Na'c guntu xhigab, niclaza guidxejbtu xcäl'ruchejbreni. ¹⁵ Colgusaan guinibee Dad Jesucrist nen lastootu, gususin te gudzu'tu diidx loj reni rniabdiidx lojtu xhicuent runlojtu guibi Jesucrist. Guideb yäl'nadolajz saru gudzu'tu diidx.

¹⁶ Colguibansa'c te cuedxi xcäl'riejntu te che guiniyajreni la'tu sa'csi nabańsa'ctu loj Crist, jianxtujy reni rniyaj la'tu. ¹⁷ Sa'csi hieenru tedtu trabajw che cayuntu te dzunsac', palga si'c rrajz Dios, lacuaa tedtu trabajw sa'csi cayujntu dojl.

¹⁸ Sa'csi sigajcza tejtis gujt Jesucrist xcuent rextojłnu. Xhetliidi xtojłni guyu' nez loj Dios, niluxh gudejdni trabajwduxh xcuent rebendojl. Bejnni si'c te gac guibignu lo Dios sa'csi gujt tiejxh Jesucrist, luxh guyusac sprit xtëni lo tiejxhni te gubansacni. ¹⁹ Che gajd xpřitni guibisac lo tiejxhni, huij spritni basule'ni diidx loj resprit ni yu' latzguiib. ²⁰ Respritga najc renani di nusoob xtidx Noé che basule'ni xtidx Dios lojreni. Guläjz Dios rebejnğa guiraa redxej ni cayujn Noé barcwro agujc xchero. Baslaa Dios xcäl'nabajn xhujntis bejn, xhet gujcdireni gudejdreni lo nisguiro ni biabj guideb guedxliujre. ²¹ Che robnisnu naj, rusnaalajznu rebejnğa; yäl'robnisga ruluiloj xho ruslaa Diosnu lo dojl. Et sa'csi riäjt beed lo tiejxhnu nen nisga, alga sa'csi dxejc rniabnu lo Dios guniidxni te xcäriensa'c, sa'csi sajc xca'nuni xcuent ni gubansac Jesucrist lo rebengut. ²² Che birii Jesucrist loj rebengut, biu'ni xhaguibaa cadro gurejni xladbee Dios te ro'c rnibeeni loj rexangl Dios, näjza loj guiraa resprit ni rajc rniabee, ni yu' lo guedxliuj näjza xhaguibaa.

4

Colyejn xtzuun Dios

¹ Ni'cni sa'csi agudejd Jesucrist trabajw cuajni lo cruzc xcuentnu, sigajcza la'tu riäjł guntu xhigab sidejdtu trabajw lo guedxliujre sa'csi nani agudejd trabajw, diruni gun dojl, ² te guideb nabajjni lo guedxliuj, guibajjni si'c rrajz Dios, diruni guibajni te gunni redzunguijdx xten guedxliujre. ³ Sa'csi bejntu si'ctis ni rrajztu galoo, bejntu si'c rujn rebejn ni di gumbee Dios, bejntu si'cni rrajz tiejxhtu, bejntu latsiaj, gusojztu, bejntu relaniri, gudedcaj gusojztu, luxh bejntu cosxtuiduxh bazuxhijbzatu loj rebanäbdxab. ⁴ Dxejcti rebejn ni

rujn recosga naj, rdxelojreni sa'csi dirutu gun ni rlanjreni, ni'c rniyajreni la'tu. ⁵ Niluxh laareni suureni nez loj Jesucrist ni agojł gun yalguxhtis loj guiraa rebejn, rebejn ni nabajn nájza renani agujt, te gusule'reni xcuent nani bejnreni. ⁶ Ni'cni basule' Jesucrist xtidx Dios loj reni agujt, te mase che gubajjnreni lo guedxliuj gujcreni yalguxhtis si'ctis ni rajc bejn, dxejc gujtreni, naj sprit xtenreni sinuu guibajn si'c ni rlanj Dios.

⁷ Asiaddzungajxh dxej che guibisac Jesucrist lo guedxliujre. Ni'cni ganax laaca colyejn xhigab, colgusin xcäriejntu te saru cuedx-guiniabtu lo Dios. ⁸ Niluxh ni maazru sajc najc yälsanälajz resa'tu sa'csi che rinälajztu resa'tu, riallajztu xtojł sa'tu. ⁹ Saru gurenäj bejn ni rdzujn rolizłzlu, na'c jieyjt. ¹⁰ Abaniidx Dios loj tejgatu te dzuun ni sajc guntu. Dzuunga colyacnäj resa'tu, te si'c guluiitu lo resa'tu laaca cayunsa'ctu guira'ti nani baniidx Dios lojtu. ¹¹ Palga tejtı najc xtzuumni guluiini xtidx Dios, suguiini ascanu najcni xtiidxpac Dios. Palga tejtı najc xtzuumni gacnäjni sa'ni, sugunnini, guideb yälñadip yälñadaan ni rudeed Dios lojni, te guira'tis ni rajc sujñ guiliä'p xpala'n Dios xcuent Jesucrist. Sa'csi laatisni riäjł chä'p xpala'nni, laatisni riäjł guinibeeni tejpas. Sugacni si'c.

Xho nanab tednu trabajw

¹² Rebetzä ni sanälazä, na'c guidxelojtu sa'csi cadejdtu trabajw ni najc si'c guiboo, ni siäd te gactu preeb. Na'c guntu xhigab xhichani'c casiajctı. ¹³ Colguibalajz sa'csi sigajc ni cadejdtu trabajw sa'ni gudejd Jesucrist, sigajcza sibalajztu che guilui loj xcälrdimbicha' Jesucrist. ¹⁴ Palga rniyajreni la'tu sa'csi rililajztu xtidx Jesucrist, chichaa la'tu, sa'csi rbäjz Xprit Dxan xten Dios guideb xcälrdimbicha'ni neñ lastootu. ¹⁵ Gunatiro, andi gusaantu ted tejtı trabajw sa'csi bagu'ttu bejn, o sa'csi gulajntu xhi xten bejn, o sa'csi bejntu latsiaj, o sa'csi huichu'ni lo xcuent sa'ni ni xhet nungäjłdi gacbeeni. ¹⁶ Palga yu' chu tejdı tedni trabajw sa'csi rililajzni xtidx Jesucrist, na'c guitujyni, alga suguiiä'pni xpala'n Dios xcuent Jesucrist.

¹⁷ Abidzujñ dxej che ganid rexpejn Dios ted trabajw. Luxh palga ganid nuurnu gacnu yalguxhtis luxh ahuililaaaznu xtiidxni, xhocha gun rebejn nani di chalilajz xtidx Dios xcuent Jesucrist! ¹⁸ Lo xtidx Dios caj scree: Lacti naganlajz rliaa rebenñaya lo dojł,

łxhocha gunäjni rebejn nani di chalilajz xtidx Dios nájza rebeñdojł?

¹⁹ Ni'cni, guiraatu nani cadejd trabajw xcuent xtidx Dios si'cni rlanj Dios, colgudeed xprittu lo Dios ni di gusguee, ni bencheetu, te chanuutis guntu ni riäjł guntu.

5

Yälrlujdx loj renani ahuililajz xtidx Dios

¹ Narä nacä te beñgool, bahuiä trabajw ni gudejd Jesucrist, bahuiäza xcälrdimbicha' Jesucrist ni guniidxni loonu che guibisacni lo guedxliujre. Ni'cni rulidxä la'tu ni najc rebeñgool, ² colgajp renani rililajz xtidx Dios nani rajptı fiipactu xhi rujñreni. Colga'preni si'c te bejn ni rajp xiil, colyejnmi guideb yejc, guideb lajztu. Colyejn si'c sa'csi si'c rlanj Dios guntu, na'c gunlojtu meel. Colguibalajz cayajptı rexpejn Dios. ³ Na'c guinibeetu lojreni si'c rñabee te lam loj reni rujñ xtzuumni, colguluiireni xho gunreni con xcälñabansa'clu. ⁴ Che guibisac Jesucrist, ni rajp nuure, laani suniidxni xcuentnu, te yälñasacduxh nani dipac nitloj.

⁵ Sigajcza la'tu ni najc bi'n, colgusobdiajg xtidx rebengool. Guiraatu coljiu xtidx sa'tu, colgului sa'tu guideb nadolajz. Sa'csi:

Dios rbälaz rebejn ni runnaro lagajc laareni, niluxh racnäjni rebejn ni najc nadolajz.

⁶ Ni'cni guideb yäl nadolajz coljiu lo Dios sa'csi rajpni yäl rñibeduxh, te guiliä'pni xpala'ntu che gal dxej ni guibisacni. ⁷ Colgudeed guiraa reyärsia' ni yu' lastootu lo Jesucrist te guscuecdxini xcäriejntu sa'csi laani sanälajzni la'tu.

⁸ Colgusanij xcäriejntu, colsusin sa'csi rdxe'ch bendxab lojtu, cansaxhiga'tzni si'c te beedz nialajz, caguiilni chu guxhinni. ⁹ Colsudzu'tz nez lojni, guideb lastootu colchalilajz xtidx Dios, sa'csi anajntu sigajcza cayunnäjni guiraa rebetznu ni nabajn lo guedxliujre. ¹⁰ Che agudejdtu trabajw tiop-chon dxej, Dios nani rajp guiraa yäl racnäj, nani gurejdx la'tu te näjza la'tu xca'tu xcalrdimbicha'ni xcuent lagajc Jesucrist, lagajc laani sunsa'cni la'tu, bejn ni rsiudzu'tz lo xtiidxni, bejn ni nadip lajzni, bejn ni di guidxejb. ¹¹ Laani rajpni yäl rñibeduxh par tejjpas, guiliä'pnu xpala'nni par tejjpas. Sugacni si'c.

¹² Siädnä Silvan guijtze lojtu. Runä xhigab najcni te bejn nani huililazsa'c xtidx Dios. Abacuaä bale'si diidxe lojtu te gulidxä la'tu, te guiniliä lojtu dee najc xcäl racnäjjpac Dios. Colsudzu'tz xcuent yäl racnäjre.

¹³ Rexepejn Dios ni re' lo guedx Babilonia ruxhał xtixtios lojtu sa'csi gule Dios la'tu sigajc guleni laareni. Marcw, ni najc si'c xi'nä, ruxhałza xtixtios lojtu. ¹⁴ Colguinii "xchan" lo tejjpa sa'tu ro'c.

Rniabä lo Dios guscuecdxini lastoo guiraatu ni rililajz xtidx Crist.

Guijtz Ni Rojp Ni Bacuaa Pedr

Pedr rucuaa te guijtz loj reni ahuililajz

¹ Narä nacä Simón Pedr, ni rujn xtzun Jesucrist, te apost xtenni. Rucuaä guijtze lojtu nani rililajz xtidx Dios sigajc ni rililajznu, sa'csi bahuii Dios loonu si'c bennaya xcuent Xtiosnu Jesucrist nani baslaa nuurnu lo dojl.
² Rniabä lo Dios gacnäduxhruni la'tu, guscuedxiruni lastootu, te gacheerutu xtidx Dios näjza Dad Jesucrist.

Xho riäj gac rexpejn Crist

³ Sa'csi xcälrnibee Dios baniidx guira'ti ni rquinnu te guibansa'cnu, te gacnu bennaya nez lojni, xcuent rililajzpac xtidxni ni nansa'cnu xcuent Jesucrist nani gurejdx nuure, nani gule nuure te xca'zanu xcälrdimbicha'ni, näjza guiraa xcäl'nansa'cni. ⁴ Lagajc xcuent redee baniidxni rextidxliini, rextidxsacduxhni. Palga chalilajznu xtidxni, sajcnu xpejn, sajcnu bensa'c si'c najcni sa'csi abiriinu loj redzunguijdx ni chagljajz rujn rebejn ni ruhxin guedxliujre. ⁵ Ni'cni nanab gacheenu xho nabañnu lo guedxliujre. Siroobru xcäl'rililajztu sacnäjni la'tu te guibansa'cnu lo Dios; luxh sa'csi nabañsa'ctu, siroobru xcäl'najntu xcuent dzunsa'c näjza dzunguijdx. ⁶ Luxh palga guroob xcäl'najntu xcuent dzunsa'c näjza dzunguijdx sajc guinibeetu tiejxhtu te na'c guntu dzunguijdx. Che guinibeetu tiejxhtu, sibedxi lajztu. Che arajptu yäl'rbedxilajz, sajctu bensa'c, bendxan. ⁷ Che anajctu bensa'c, bendxan, sinälajztu resa'tu; che asanälajztu sa'tu, arajptu yäl'sanälajz sa'tu xten Jesucrist.

⁸ Palga la'tu rusoobtu guiraa rediidxre, luxh chanuutis caroobreni nen lastootu, ditu guibanxlia'; sujnpactu xtzun Dios, luxh rediidxre sacnäjrutu gumbeetu Dad Jesucrist. ⁹ Sa'csi renani di ga'p rediidxre, najcni si'c te lotiä'p ni di fii, o te ni di gacdi fii zijt, ni'cni abiäl'lajzni xho basia Dios rextojlni nani bejn ni galoo. ¹⁰ Ni'cni rniä lojtu rebetzä, colsejs, colguiseed xtidx Dios te gacheepactu, gululiojzatu lo bejn xho gurejdx, xho gule Dios la'tu, sa'csi la'l ni chanu gucuadijgtu rediidxga, dipactu gunijt lo Dios. ¹¹ Palga guibajntu si'c lo guedxliujre, siu'pactu xhaguibaa cadrö rnibee Dad Jesucrist par tejjpas.

¹² Ni'cni anasuga'ä te gusnaä lajztu xcuent rediidxre, mase anajntureni, mase risutzu'tztu yäl'rililajz xten didxlii ni yu' nen lastootu. ¹³ Narä runä xhigab laaca runä che rusnaä lajztu, te gusnibä la'tu, te gusnaä lajztu. Si'cza gunä guideb ni nabañä lo guedxliujre. ¹⁴ Ananä asiäddzungajxh dxej ni xca' Dios narä, sa'csi abaluii Dad Jesucrist ni'c loä. ¹⁵ Ni'cni cayunduxhä dzuun naj, te che guiquinni sinaj lajztu xtidxä che agu'tä.

Renani bahuii loj yäl'nasa'c xten Crist

¹⁶ Che basule'nu lojtu xcälrnibee näj xcälrdimbicha' Dad Jesucrist, xcuent ni guibisacpaci, dinu niniitisi, dizanu nusguee la'tu, sa'csi abahuiloonu xcälrdimbicha'ni. ¹⁷ Sa'csi che badeed Dios xtradnu yälrnibee, yälrdimbicha' lojni, dxejc biejn diajgnu gunii Dios, birii xse'ni nen te za ni gurej xhaguibaa, räjpni: "Dee najc xi'nä ni sanälazä, rbanälazduxhäni." ¹⁸ Lagajc nuure biejn diajgnu xse' Dios che guniini xhaguibaali che guyunäjnu Jesucrist lo dajn ni najc dxan.

¹⁹ Ni'cni naj guliuru rediidx ni gunii reprofte't. Ni'cni sujntu laaca palga gusobdiajglu rediidxga, sa'csi najcreni si'c te bajl ni rusanij te lajt ni nacäy, susanijreni xcäriejntu dxejli ni jiaäd bajl xhaguibaa. Dxejc lagajc laani

susaniĵ lastoonu. ²⁰ Niluxh ganiddoo nanab gacbeetu dee: nicla tej bejn saĵ guinii laatisni saĵ guinii xhi säloj xtidx Dios, ²¹ sa'csi nicla tej diidx ni bacuaa reprof'e't dini gac diidx ni biajbtis yejcreni. Guiraliireni bacuaareni ganaxtis diidx ni badeed Xp'rit Dxan Dios lojreni gucuaareni.

2

Rebejn nani rusguee (Judas 4-13)

¹ Niluxh galoo biricajza te cuaa bejn ni basguee rexpejn Israel, sigajcni siääd stee cuaa bejn ni susguee la'tu. Laareni guluixhiga'tzreni didx-xhii nani rujn rusiejxh lajz bejn xcälrrililajzreni, sibälazreni lagaĵc Dad Jesucrist nani gudijx xcuent xtojlrēni. Niluxh renani rusguee, siojĵ nitlojreni par tejpas. ² Xhidajlza bejn sinajlreni lo xcäl'nabaŋguijdxreni, dxejcti ni'c gun siniyaj xhidajl bejn xnezyuj xtidxlii Dios. ³ Sa'csi ruguilajzreni xmeeltu, xhixtentu, ni'c siädgusgueerēni la'tu te xca'reni xhixtentu. Niluxh xcäl'guxhtisreni nani gun Dios, näjza xcäl'rnitlojreni cabäz'gajceni agujc xchero.

⁴ Najcni si'c sa'csi di Dios niäl'lajz rextojl rexangl'ni nani bejn dojl, niluxh baxha'lnireni gabijl, basäunireni nen reguednacäy cadro cabäz'reni dxej ni gun Dios xcäl'guxhtisni. ⁵ Sigajcza rebejn ni guy'u' galoo, banitloj Diosreni, bas'laa Dios xcäl'nabajn Noëtis näjza sgajdzreni, sa'csi basule' Noé xtidx guluii Dios. Luxh baxha'lni nisguiro te biäd'nitlojni guiraa rebejn nani di nucuaadijg xtidx Dios. ⁶ Bejn Dios yäl'guxhtis xten guedx Sodoma näjza guedx Gomorra, base'cni reguejdxga, gujcreni cobdäj. Si'c bejn Dios te gacbee bejn xho runnäj Dios rebejn ni di gusoob xtidx Dios. ⁷ Gulää Dios Lo't ni guj'c te bensa'c lo reguejdxga, sa'csi guc-huin lajzni xcuent relatsiaj ni bejn rebendojlgā. ⁸ Guideb ni guläjs Lo't, te bensa'c, lo guejdxga, dxej, yääl guc-huin lastooni xcuent nani bahuiini, nani biejn diajg'ni, xcuentza latsiaj ni bejnreni, sa'csi bensa'cni. ⁹ Anajn Dios xho racnäj'ni rebensa'c te rbäänireni lo retrabajw ni cadej'reni, anajnza Dios xho gusacs'ini rebendoj' cheni guidzuj'ni dxej ni gunni xcäl'guxhtisreni.

¹⁰ Guliduxhni, sujnru Dios yäl'guxhtis loj rebejn nani r'laiz gun si'ctisni r'laiz tiejxh'reni, näjza renani rbälaz xcäl'rnibee Dios. Najc'reni bejn ni di guidxejb, rujn'reni ni r'iajbtis yejcreni, direni guidxejb guiniyaj'reni rexangl' Dios ni rdimbicha'. ¹¹ Niluxh nicla tej rexangl' Dios ni rajpru yäl'rnibee lo rebejn're, direni guiniyaj, cue'creni xquej'reni lo Dios.

¹² Luxh, rebejn'ga najc si'c reguidxaa nani xheti xcäriejn'reni, cabäzjtisreni chu guiniaaz'reni te guet'reni. Rniyaj'reni luxh direni gan xhini'c rniireni. Niluxh sigajc rnitloj reguidxaa, sigajcza sinitloj'reni. ¹³ Bejn'reni dojl, ni'c sinitloj'reni, sidej'reni yäl'rusacsiduxh xcuent rextojl'reni. Laareni rchag'laiz'reni guntisreni laniro rdxee. Laareni najc'reni si'c te cosdxuudx o si'c te manch ni rcaj lo te ladnol, rbaali lajz'reni rusgueerēni la'tu la' ni cayajc lanij cayaunäj'reni la'tu.

¹⁴ Digacdi fiireni loj te gunaa, li rsia' lajz'reni, direni guidxajg rujn'reni dojl, rusgueerēni rebejn te gunzareni dojl, ruluiireni lastooreni te säblajz'reni meel, najc'reni bejn nani batzubde Dios, ¹⁵ agulälaz'reni nezyusa'c, abanijt'reni, naj sanajl'reni xnezyuj Balaam, xi'n Beor, nani huichag'laizru nani rquijx yäl'latsiaj. ¹⁶ Niluxh gudil'näj Diosni xcuent xtoj'ni, bejn Dios gunii te mandip si'c xse' bejn, te bascuääz'ni prof'e'tga, dini nusaan niuj'ni nani cayuj'ni, cayuj'ni si'c te bejn ni rajc yej'cni.

¹⁷ Reben latsiajre najc si'c te bisie cadro xheti nis, najczareni si'c rexcäy ni sanä bej nezree nezrec che cabi' te bero. Laareni su'reni lo xcäy par tejpas che gun Dios yälguxhtis. ¹⁸ Sa'csi rniduxhrene didxro, niluxh xhet sajcdi rediidxga luxh rniireni huenduxh najc gun bejn ni rlanjtis tiejxhrene, con yällatsiaj rusgueerene rebejn nani entis birii loj reni rujn sa' dzunguijdxga. ¹⁹ Rusgueerene, rniireni rut gudxojndini palga jädnajlnireni, niluxh lagaj laareni najcreni mos, sa'csi rnibee latsiajrene. Xhitis ni rnibee te bejn, ni'c rusäuni nen latzguuib. ²⁰ Sa'csi palga agubicaj te bejn loj redzunguijdx xten guedxliuj sa'csi huililajzrene xtidx Dad Jesucrist nani rusläa rebejn lo guiraa dojl, dxejctiru gubisacni loj xtojlni, abixhidsacreni lo xtojlni, nalajz najcreni si'c che gajdrene gumbee xtidx Dios. ²¹ Huenru direni niembee xnezyuj Dios, quela che abimbeerene nezyujga, cuälazrene didx dxan, xtidx Dios ni basule'reni lojrene. ²² Dxejcsii rsiojb diidx ni najc scree: "Rbisac te bä'cw loj xcälrdzujbni. Cuch ni entis gojz richusacni lo xpajnni."

3

Xho gac che guibisac Jesucrist

¹ Rebetzä, dee najc ni rojp guijtz ni caguxhalä lojtu; lo guiro'p guijtzre cagusnibä la'tu xcuent reyälrlujidx ni gusnaj lajztu. ² Colgusnaj lajztu rediidx ni gunii reprofet agujc xchero, näjza rediidx ni gunii Dad Jesucrist nani basule' reapost.

³ Ganiddoo, colgacbee dee: che asiäddzungajxh redxelult, siääd rebejn ni rgubee rextidx Dios, laareni sunjrene si'ctis ni rlanj tiejxhrene. ⁴ Siniabdiidxrene: "Zhicuent gajd Jesucrist guibisac si'cni bia'n diidx? Cheni gujtli rextadgoldoonu, guira'ti sanuutis najcni si'c gujnci cheni guc-cheeli guedxliujre." ⁵ Niluxh che rniireni si'c, rlanjpac jällajzrene agujc xchero benchee Dios xhaguibaa xcuent xtiidxtisni, näjza guniitis Dios te si'c guc-chee guedxliuj, birini nen nis, naj tre'ni loj nisga. ⁶ Dxejcti gunitloj guira'ti ni yu' lo guedxliujga che biajbe te nisguiro, gunitlojni. ⁷ Niluxh xhaguibaa näjza guedxliuj ni tre' naj, cayajp Diosreni xcuent xtiidxni te checeni che guidzujn dxej ni gunni yälguxhtis, che gunitlojni rebendojl.

⁸ Rebetzä, na'c jällajztu, Jesucrist ruhuii tebdxej si'c te tzugayuu ijz, rhuiizani te tzugayuu ijz si'c tebdxej. ⁹ Di gaclaa gusoob Dios diidx ni bia'n, si'c rujn bejn xhigab raclaani, niluxh cabecdxiru lajzni xcuent la'tu, sa'csi cabäjnzi gusiejch lajztu, sa'csi di rlanjzni nitloj nicla tejtü.

¹⁰ Niluxh sidzujn dxej che guibisac Jesucrist lo guedxliujre si'c rdzujn te gubaan, rut gacbeedi siäädni. Dxejcti sibicaj xhaguibaa, gac te bieiduxh, guira'ti sialni lo te guiboduxh, guedxliujre näjza guira'ti ni tre' lojni, guiragajcni sejcni.

¹¹ Sa'csi sinitloj guiraa redee, ni'c nanab guibanayatu lo guedxliujre, na'c guntu dojl. ¹² Colcuäjz dxejtis ni jääd Dios lo guedxliuj. Dxej sejc xhaguibaa, sinitlojni, luxh guiralii ni yu' sialni lo guiboro. ¹³ Niluxh abasa'n Dios diidx loonu, ni'cni cayenloonu te guibacoob, te guedxliucoob, cadro gunreni ganaxtis dzunsa'c, xhetiru dojl.

¹⁴ Ni'cni rebetzä ni sanälazä, sa'csi cabääznu guiraa ni gac, colyejn huant te che guibisac Dios, sidxälni la'tu dxitis nabajntu, nabanayatu, xhetiru xtojltu. ¹⁵ Colhuui xhi dzuun bejn Dad Jesucrist ni'c rajpnu yärlusläa lo dojl. Sigajcza bacuaa bejtznu Pabl ni sanälajznu. Bacuaani sa'csi badeed Dios yäl'najn lojni. ¹⁶ Nen guiraa rexquijtzni bacuaani xcuent rediidxre. Yu' gaii guijtz ni bacuaani ni najc naganduxh. Luxh bejn ni guxii racbee, ni runtio'p

lajzreni, reni'c ruxhiid rextiidxni, sigajc runnäjreni guiraa xtidx Dios, ni'cni sinitlojreni.

¹⁷ Ni'cni rebetzä ni sanälazä, sa'csi ananxgaatu rediidxre, colnatiru didi jiajbtu ladznaa renani gusgueetu, te na'c gunijttu xcälrsiudzu'tztu lo xtidx Dios. ¹⁸ Colgustioob xcäriejntu con yälracnäjä näjza yäl'najn xten Dad Jesucrist nani rusläa nuure lo dojl. Suguiliä'pnu xpala'n Dad Jesucrist, naj näjza par tejpas. Sugacni si'c.

Guijtz Ganid Ni Bacuaa Juan

Xtidx Dios ni runiidx yäl nabajñ par tejpas loonu

¹ Galooli che gajd Dios gun guedxliuj, agac nabajñ Jesucrist. Niluxh narä bahuiä loj Jesucrist, biejn diağä rediidx ni guniini loä, gunazä ñaani. Laani najc Diidx ni runiidx yäl nabajñ par tejpas loonu. ² Baluilojni loonu; reapost bahuiinu lojni. Ni'cni rniä lojtu, nabajñ Jesucrist par tejpas. Rniliäpac nabaññaj Jesucrist Dios. Baluui Dios Jesucrist loonu. ³ Caniä stehuält lojtu, bahuiinu lojni. Biejn diağnu rediidx ni guniini loonu. Xhigab xtenu najc tejtis con Dios, najza Jesucrist Xi'n Dios. Ni'cni cagusule'ä rediidxga lojtu, te tejtis xhigab jiennäanu resa'nu. ⁴ Cagucuaä rediidxre lojtu te guibalazduxhtu.

Dios najc Bajl

⁵ Naj cagusule'ä rediidx nani baluui Jesucrist loonu. Dios najc bajl. Guiraa redzuun ni rujñni, ganax dzunsa'cni. Xhet yäl nacäydi yu' lo Dios. ⁶ Palga chutis tejnu naa, tejtis najc xhigabnu con Dios, niluxh riennu redzunguijdx, rniinu didx-xhii, runijtnu dinu chasanäj xtidx Dios. ⁷ Palga nabajñnu lo bianij si'cni nabajñ Dios lo bianij, tejtis xhigab riennu con resa'nu. Dxejc rusiaza xtiejn Jesucrist Xi'n Dios lastoonu che riennu dojl.

⁸ Palga naanu xheti xtojñnu, rusgueenu lagajc nuunu, luxh dinu ga'p xtidx Dios neñ lastoonu. ⁹ Palga guicäjpnu lo Dios guiraa redojl ni cayennu, siälälajzni xtojñnu, sudzucajni rextojñnu, sa'csi laaca rujñni luxh gulii najc rextiidxni. ¹⁰ Palga guinuunu dinu niujñ dojl, rniinu najc Dios si'c te bejn ni rniü didx-xhii sa'csi anaj Dios yu' xtojñnu, luxh dizanu ga'p xtidx Dios neñ lastoonu.

2

Racñaj Jesucrist nuunu nez loj Dios

¹ Guejbtu, resa'ä nani huililajz xtidx Dios, cagucuaä rediidxre lojtu lo guijtz te na'c guntu dojl. Niluxh palga jiennu dojl, racñaj Jesucrist nuunu, rniini xcuentnu lo Dios, sa'csi xheti xtojñni. ² Gujt Jesucrist xcuentnu lo cruzj. Gudijxni rextojñnu lo cruzj. Luxh et rextojñtisnu gudijxni. Gudijxni rextojñ guiraa rebejn ni re' lo guideb guedxliuj.

³ Palga rusooobnu rextidx Dios, huenliisi rluii riembeenu Dios. ⁴ Cheni rniie te bejn, "narä rumbeäni", niluxh dini gusoob rextiidxni, rusgueeni resabejnñi. Di lajzni nillii xtidx Dios. ⁵ Palga rusooobnu xtidx Dios, guliipac rinälaznu Dios, ni'c najñnu nabaññajñuni. ⁶ Cheni rniinu nabaññajñu Jesucrist, nanabpac guibañsa'cnu si'c gubajñ Jesucrist lo guedxliuj.

Redidxcoob

⁷ Guejbtu resa'ä, xhet didxcoobdi ni cagucuaä lojtu. Cagucuaä lagajc diidx ni najntu galooli che huililajzlitu rextidx Dios, nalajznu rediidx nani biejn diağtu galooli. ⁸ Niluxh najcza rediidxre didxcoob loonu, sa'csi che huililajznu rextiidxni gusoj dirunu guibajñ lo yäl nacäy. Baluui Jesucrist redidxcoobga loonu. Guliipac najc Dios si'c bajl. Di ni guibajñ lo nacäy.

⁹ Palga chutis tejnu rniü, "nabañä lo nianij xten Dios", niluxh rdex'chni lo resa'ni, lo yäl nacäy yu'ni. ¹⁰ Chutis tejnu ni rinälajz sa'ni, nabajñni lo bianij xten Dios, rujñni dzunsa'c, dizani guichagljaz gunni dojl. ¹¹ Niluxh palga

rdxe'chnu lo resa'nu, nabajnnu lo yälñacäjy sa'csi riennu dojl, sasaanu lo yälñacäjy. Nicla gacbeenu canejz chonnu, sa'csi ruscäjy bendxab balojnu.

¹² Cagucuaä rediidxre lo guebttu, resa'ä ni rililajz, sa'csi abadzucay Dios rextojlñu, sa'csi lo crujz gudijx Jesucrist rextojlñu. ¹³ Cagucuaä rediidxre lo guebttu, redad bengool, sa'csi huililajzttu rextidx Jesucrist, najntu laani nabajnni galooli näjza par tejpas. Cagucuaä rediidxre lojttu, rebi'n sa'csi dirutu jiu xtidx bendxab.

Cagucuaä rediidxre lojttu rexi'nä, sa'csi rumbeetu Dios. ¹⁴ Abacuaä rediidxre lo guebttu, redad bengool, sa'csi numbeetu Jesucrist nani nabajnni galooli näjza par tejpas. Abacuaä rediidxre lojttu rebi'n, sa'csi sudzu'tztu, sa'csi yuchee xtidx Dios neñ lastootu, dirutu jiu xtidx bendxab.

¹⁵ Na'c guichagljzttu guntu renani rujn rebejn nani di chalilajz xtidx Jesucrist; na'cza chanälaztejtü xhixentü ni rajttu lo guedxliuj. Palga rinälaztejtü rexhixentü ni ra'pnu lo guedxliuj, dxejc dinu chanälajz Dios. ¹⁶ Reben guedxliuj ni di chalilajz xtidx Dios rchagljzreni rujnreni redzunguijdxre: rujnreni dzunguijdx nani rchagljz tiejxhrene; rujnreni dzunguijdx nani rchagljz balojreni, näjza lagajc laareni rliä'preni xpala'nreni. Niluxh guiraa reni'c najc dzun guedxliuj, xhet dzuundi ni gunibee Dios gac. ¹⁷ Luxh rnitlojjpac guedxliuj. Sinitlojza guiraa reni rchagljz rujn reben guedxliuj ni di chalilajz xtidx Dios. Niluxh palga gusoobtisnu xtidx Xtdanu Dios, sibannäjnni par tejpas.

Didx guli näjza didx-xhi

¹⁸ Guebttu resa'ä ni rililajz xtidx Dios, asiäddzungajxh dxej che guluiloj niguii nani rdxe'ch loj Jesucrist. Abiejn diajttu siääd niguiiga. Naj yu' xhidajl reniguii nani rdxe'ch loj Crist. Ni'c alaracbeenu asiäddzungajxh dxejga che guluiloj niguiiga. ¹⁹ Yu' xhidajl rebejn ni rdxe'ch loj Jesucrist. Biriireni lo resa'nu. Direni nililajz xtidx Jesucrist. Palga nililajzreni xtidx Jesucrist si'c huililaaznu nuure xtidx Jesucrist, direni niri lo resa'nu. Biriireni lo resa'nu, ni'c racbeenu direni gac xpejn Jesucrist.

²⁰ Gule Dios Jesucrist. Jesucristre baniidx Sprit Dxi xten Dios loonu te gacbeenu xhini'c najc redidxliipac. ²¹ Et sa'csi ditu gan xhi diidx najc didx guliipac, ni'c bacuaäni, te gutijp lajttu. Palga rucuaä rediidx ni najc guli, anajntu dina gusueä la'tu.

²² Chutis ni naa di Jesús gac Crist Xi'n Dios, xhet guliidi rextiidxni. Renani rni di Jesucrist gac Xi'n Dios rdxe'ch loj Jesucrist. Di reni'c nililajz xtidx Dios. ²³ Chutis reni rni di Jesucrist gac Xi'n Dios, di reni'c gumbee xtdanu Dios. Niluxh renani rni Jesucrist najc Xi'n Dios, huililajzreni xtidx Dios, numbeezareni Dios.

²⁴ Colgusoob rediidx ni biejn diajttu galooli che huililajzttu rextidx Dios. Palga rusoobttu rediidxga, nabannäjttu Dios näj xi'nni Jesucrist. ²⁵ Abia'n Jesucrist diidx guniidxni yälñabannäc loonu. Naj ara'pnu yälñabajnni, ra'pnni par tejpas.

²⁶ Abacuaä rediidxre lojttu xcuent rebejn ni rrajz chalilajzttu rediidx ni xhet guliidi. ²⁷ Baxhal Jesucrist Sprit Dxi xten Dios loonu. Rbäjzn neñ lastoonu. Dinu guiquini chu stee bejn guluii loonu xhi diidx najc guli, sa'csi lagajc Sprit Dxi xten Dios ruluii xtiidxni loonu. Naj ruluiini la'tu guiraa ni najc guli, dini gusueä la'tu. Colguibannäj Jesucrist; colgusoob xtidx Jesucrist si'cni ruluii Sprit Dxi xten Dios lojttu.

²⁸ Naj guebntu resa'ä, colguibanñaj Jesucrist, te che jädsacni lo guedxliuj sisiutzu'tznu nejz lojni, dinu guituj nejz lojni. ²⁹ Anajntu laaca najc Dios. Anajntu renani rusooob xtidx Dios sasanäjreni Dios, ni'c najcreni xi'n Dios.

3

Rexi'n Dios

¹ Bahuii xho huinälazduxh Dios nuure, ni'c anaj Dios nuure najcnu rexi'nni. Luxh guli najcnu rexi'n Dios. Rebeñ guedxliuj ni di chalilajz xtidx Dios, direni gumbee nuure, rexi'n Dios, sa'csi dizareni gumbee Dios ni najc xtadnu. ² Resa'ä ni rinälazä, nuunu riolilaaznu rextidx Dios, ni'cni najcnu rexi'n Dios. Dinu gacbee xho gacnu niluxh che guibisac Jesucrist loonu, suhuiinu lojni si'c ni najcni, sa'csi suchani nuure te gacnu si'c ni najcni laani. ³ Che rnaj laaznu sidzujñ dxej gac tejganu si'c ni najc Jesucrist, dxej rbañsa'cnu si'c ni gubajñ Jesucrist lo guedxliuj.

⁴ Di rebejñ ni rujñ dojl gusoob leii xten Dios. Che riennu dojl, runijntu lo leii xten Dios. ⁵ Racbeenu Jesucrist biääd lo guedxliuj, gujñni niguii te gujñ badzucajni rextojñnu. Laani dini niujñ dojl. ⁶ Che sasanäjnu Jesucrist, dinu gac benguijdx. Di bejñ nani rujñ dojl chalilajz xtidx Jesucrist, dizani gumbeeni. ⁷ Resa'ä, na'c chalilajztu didx-xhii ni rñii bejñ lojtu, che rñireni cayujntu dojl. Rebejñ ni rujñ laaca, najczareni si'c najc Jesucrist. ⁸ Rebejñ nani rujñ dojl najc xi'n bendxab. Galodooli rujñ bendxab dojl. Ni'cni biääd Jesucrist Xi'n Dios lo guedxliuj te gudzucajni redojl nani rujñ bejñ xcuent bendxab.

⁹ Rebejñ nani najc xi'n Dios direni guichagljaz gunreni dojl, sa'csi abachaa Dios xcäriejnreni, sa'csi rbäjz Dios neñ lastooreni. Direni gun dojl, sa'csi najcreni xi'n Dios. ¹⁰ Si'c riembeenu rebejñ ni najc xi'n Dios, näjza rebejñ ni najc rexi'n bendxab. Chutis tejni di gun dzunsa'c, ni dini chanälajz resa'reni, dini gac xi'n Dios.

Nungäjñ chanälajznu resa'nu

¹¹ Lagajc rediidxre biejn diajgtu galooli che huililajztu rextidx Dios: colchanälajz resa'tu. ¹² Xhet si'c di toCain nani gujñ xi'n bendxab. Bejnñi dojl, bagu'tni bejztni. ¿Xhicuent bagu'tnini? Bagu'tnini sa'csi bejñ bejztni ganax dzunsa'c, luxh toCain bejñ dzunguijdx. ¹³ Na'c guidxelojtu che guidxechlajz rebejñ lojtu. ¹⁴ Racbeenu dirunu sa lo xnezyuj yälgujñ, sa'csi dinu guidxechlajz loj resa'nu. Rajpnu yälñabajñ par tejpas sa'csi rionälaznu resa'nu. Chutis tej ni di chanälajz resa'reni canzaj lo xnezyuj yälgujñ, sa'csi rdxechlajzreni lo sa'reni. ¹⁵ Chutis ni rdxechlajz lo resa'ni, najcni nejz lo Dios si'c ni abagu'tni te bejñ. Najñnu che rugu't te niguii te bejñ dini ga'p yälñabajñ par tejpas. ¹⁶ Racbeenu rinälajz Jesucrist nuunu, sa'csi gujñni lacuaa nuunu lo cruzj. Sigajcza nungäjñ gacnäjnu resa'nu, mase guetnu lacuaa guetreni. ¹⁷ Chutis tejnu ni rajp xhidajñ xhixtenni, luxh dini gacnäj nicla tejnu ni xhet rajpdi, di bejnga chanälajz Dios. ¹⁸ Guebntu resa'ä, na'c chanälaznu resa'nu con rextiidxtisnu, na'c guiniitistnu rionälaznu resa'nu. Palga rionälazpacnu resa'nu, sacnäjnu resa'nu.

Sisiutzu'tznu nez loj Dios

¹⁹⁻²⁰ Palga rionälaznu resa'nu, nancheenu najcnu rexi'n Dios. Palga jajbnu xhigab dinu gac bensa'c, dizanu gac xi'n Dios, nanab jiunu rextiidxtis Dios, na'c jiunu rexhigabnu. Dios najñ rexhigabga. Niluxh Dios anaj: renani rinälaz resa'reni, reni'c najc rexi'nni. ²¹ Rñiä lo guebntu nani rinälazä, palga

lagajc lastoonu rni loonu, “cagusooblu xtidx Dios”, sisiutijp lastoonu che rbedx-rniabnu lo Dios. ²² Xhitis ni rniabnu lo Dios, runiidxni loonu sa'csi rusoobnu xtiidxni, riennu redzuun ni ruspaaj lajz Dios. ²³ Dee najc rediidx ni gunibee Dios gusoobnu: chalilaaznu xtidx Dios, diidx ni rni xho gujt Jesucrist lacuaa nuunu, chonālaazzanu resa'nu si'cni gunibee Dios. ²⁴ Palga rusoobnu guiraa nani gunibeeni, nabaññajnu, si'cza nabaññajni nuunu. Nancheenu nabaññaj Dios nuunu, sa'csi baniidxni Sprit Dxan xtenni te cuääz neñ lastoonu.

4

Scree gacheenu xhi didx najc guliipac

¹ Guejbtu renani rinälazä, na'c chalilajztu rextidx chutis bejn nani naa, “rniä rextidx Dios lojtu”. Ganiddoo colgula'tz rextiidxni te gacheetu don chu xtidx caniini, sa'csi xhidajl bejn sini lojtu, “nuunu rniinu rextidx Dios”, niluxh canisireni si'c. ² Scree gacheenu xhi diidx najc guliipac. Guiraa rebejn nani guinii “Jesucrist, Xi'n Dios, ni biääd lo guedxliuj si'c niguii”, reni'c cayacñaj Sprit Dxan xten Dios, reni'c canii xtidx Dios. ³ Guiraa rebejn nani di guinii biääd Jesucrist Xi'n Dios si'c niguii, xhet xtidx Diosdi rniireni. Reni'c rdxe'chreni loj Jesucrist. Abiejn diajgtu siääd te niguii ni rdxe'chduxh loj Jesucrist, luxh naj abidzujñ rextzuun niguiiga lo guedxliuj.

⁴ Guejbtu resa'ä, najcnu rexi'n Dios. Naj abiennu gaan lo rebejn ni rdxe'ch lo Jesucrist sa'csi Dios ni rbäjz neñ lastoonu abejni gaan lo bendxab ni nabajn lo guedxliuj. ⁵ Rebejn ni rni xhet guliidi xtidx Dios, rililajztsireni rediidx ni najc xten guedxliuj. Xhidalduxh rebejn ni re' lo guedxliuj riu rediidx ni xhet guliidi. ⁶ Nuunu najcnu xi'n Dios. Rebejn nani riembee Dios riu xtiidxnu. Rebejn nani di gac xi'n Dios direni jiu xtiidxnu. Scree gacheenu chu rebejn rni didxliipac. Scree gacheezanu chu rebejn rni diidx ni xhet guliidi.

Rinäälajz Dios rebejn

⁷ Rniä lo guejbtu nani rinälazä, nanab chanālaaznu resa'nu, renani huililajz xtidx Dios, sa'csi Dios racnä j nuunu te chanālaaznu resa'nu. Palga rinālaaznu resa'nu, dxejc najcnu rexi'n Dios, luxh guli riembeenu Dios. ⁸ Palga chutis tejnu di chanälajz resa'ni, dizani gumbee Dios, sa'csi lagajc Dios racnä j chanālaaznu Dios, racnä jzani chanālaaznu resa'nu. ⁹ Abasule' Dios loonu lacti rinälajzni nuunu. Yu' tejtis Xi'n Dios. Abaxhañni Xi'nni lo guedxliuj te gudijxni rextojlñu lo cruzj te si'c guibaññajnumi par tejpas. ¹⁰ Si'c racbeenu rinälajzpac Dios nuunu. Galoo dinu ninälajz Dios. Niluxh Dios huinälajz nuunu, ni'c baxhañni Xi'nni lo guedxliuj te gudijxni xtojñu lo cruzj.

¹¹ Rniä lo guejbtu nani rinälazä, si'cni rinälajz Dios nuunu, sigajcza rla-jzni chanālaaznu resa'nu. ¹² Nicla tej bejn gajd fii lo Dios. Niluxh palga chanālaaznu resa'nu, Dios nabajn neñ lastoonu, dxejc guli rinālaazpacnu Dios. ¹³ Nancheenu nabaññajnu Dios, sigajcza nabaññajpac Dios nuunu, sa'csi abaxhañni Sprit Dxan xtenni cuääz neñ lastoonu. ¹⁴ Narä najza reapost abahuiinu loj Jesucrist. Caniä lojt abaxhañ Xadnu Dios Xi'nni lo guedxliuj te guslaani rebejn lo xtojñreni. ¹⁵ Chutis tejnu ni rni “Jesucrist najc Xi'n Dios”, nabaññajni Dios, nabaññajza Dios bejn ga.

¹⁶ Racheenu, rililaazzanu rinälajz Dios nuure. Guliduxh rinälajz Dios nuunu. Palga rinālaaznu Dios, nabaññajnu Dios, nabaññajza Dios nuunu. ¹⁷ Naj sanālaaznu Dios si'cni rla-jzni luxh palga chanālaaznumi guidebtis ni guibajñnu, dinu guidxeyb che guidzujñ dxej ni gun Jesucrist yälguxhtis lo

guedxliuj. Dinu guidxejb sa'csi guideb nabajnnu lo guedxliuj, nabannäjnu Dios si'c nabannäj Jesucrist Dios. ¹⁸ Palga rinälazsa'cnu Dios, dinu guidxejb, palga rinälajzpacnu di gacdi guidxeebnu. Palga guliipacnu rinälaaznu Dios, xhetliidi rdxejbdu. Nani rdxejb, rdejndi trabajw, gajd bejnğa chanälazsa'c Dios.

¹⁹ Rinälaaznu Dios sa'csi ganiddoo Dios huiälajz nuunu. ²⁰ Palga chutis tejnu naa "rinälazä Dios" niluxh rdxechlajzni lo resa'nu, xhet guliidi xtiidxni. Palga dinu chanälajz sa'nu nani cahuiinu, xhixh sajc chanälaazzanu Dios nani gajdnu fii. ²¹ Agunibee Dios, nani rinälajz Dios chanälajzni resa'ni sigajc rinälajzni Dios.

5

Riennu gaan lo guiraa redolgujdx lo guedxliuj

¹ Chutis ni rililajz Jesús najc Crist nani baxhał Dios, ni'c najc Xi'n Dios. Palga rinälaaznu Xtradnu Dios, sigajcza sinälaaznu renani najc Xi'n Dios. ² Palga rinälaaznu Dios, palga rusoobzanu xtiidxni, dxejc najnnu rinälaaznu resa'nu nani najc Xi'n Dios. ³ Ni'cni, palga rinälaaznu Dios, susoobnu xtiidxni. Luxh dinu guichalo nagajz gusoobnu xtiidxni. ⁴ Chutis tejnu ni najc xi'n Dios, riennu gaan lo redoł ni re' lo guedxliuj. Riennu gaan lo redoł lo guedxliujre sa'csi huililaaznu xtidx Jesucrist. ⁵ ¿Chuni'c cayujn gaan lo redoł lo guedxliuj, ä? Renani rililajz najc Jesucrist, Xi'n Dios, reni'c rujn gaan lo redoł lo guedxliujre.

Rediidx ni baluui Dios loonu xcuent Jesucrist

⁶ Biädä Jesucrist lo guedxliujre. Birobnis Jesucrist, baxhe'zani xtiejnni lo crujz. Xhet ganaxdi te guirobnisni biädäni, näjza te guxhe'ni xtiejnni lo crujz che biädäni. Sprit Dxan xten Dios canii rediidxre. Guliipac rextiidxni. ⁷ Yu' choñ ni baluiloj xhaguibaa. Rniireni xcuent Jesucrist tejsi diidx. Tejni najc Dios, steeni najc nani laa Diidx, steeni najc Sprit Dxan xten Dios. ⁸ Sigajcza yu' choñ ni baluiloj lo guedxliuj. Rniireni xcuent Jesucrist tejsi diidx. Tejni najc Sprit Dxan xten Dios. Steeni najc che birobnis Jesucrist, steeni najc che baxhe' Jesucrist xtiejnni lo crujz che gujtni. ⁹ Palga rililaaznu xtidx rebejn ni rbäjz lo guedxliuj, nungäjł chalilaazrunu xtidx Dios. Rediidx nani rnii jion reni baluiloj tejsi diidx najcreni con nani rnii Dios xcuent Jesucrist Xi'n Dios. ¹⁰ Palga rililaaznu xtidx Jesucrist Xi'n Dios, rnii Dios xcuent Jesucrist nen lastoonu. Chutis tejnu ni di chalilajz xtidx Dios, rujnni najc Dios si'c tej ni rusguee sa'csi dini chalilajz xtidx Dios ni rniini xcuent Jesucrist. ¹¹ Scree najc rediidx ni rnii Dios. Abaniidx Dios loonu yäl nabajñ par tejpas. Yäl nabajñğa biädnä Xi'nni, Jesucrist. ¹² Palga nabannäjnu Xi'nni, rajpnu yäl nabajñ par tejpas. Palga dinu guibannäj Xi'nni, dinu ga'p yäl nabajñ par tejpas.

Xtixtios con diidx ni rulijdx

¹³ Abacuaä rediidxre lojtu ni rililajz rextidx Jesucrist te gacheepactu rajptu yäl nabajñ par tejpas.

¹⁴ Ni'cni dinu guidxejb che guiniinu lo Dios, sa'csi riu Dios xtiidxnu palga tejsi najc xhigabnu con Dios che rniabnu lojni. ¹⁵ Luxh palga najnnu riu Dios nuunu che rniinu lojni, sigajcza najnnu suniidxni nani rniabnu lojni.

¹⁶ Palga tejnu fii tej resa'nu cayujn doł, niluxh riuruni xtidx Dios, nuunu rajpnu por guiniabnu lo Dios xcuent laani, te gudeed Dios yäl nabajñ lojni. Niluxh yu' te doł roduxh. Chutis te bejn ni gun dołğa, di Dios gudeed lo bejnğa yäl nabajñ par tejpas. Dizana guiniä guiniabtu lo Dios xcuent bejn ni rujn

doꞤroga. ¹⁷ Guiraa redzunguijdx nani rujn rebejn najc dojl. Niluxh yu' redojl nani di gun gunijt bejn lo Dios par tejpas palga jiu bejn xtidx Dios.

¹⁸ Racheenu guiraanu nani najc xi'n Dios di rlaaznu jiennu dojl. Racnäj Jesucrist nuunu te di bendxab gun gaan nuunu, te dizanu gusoob xtidx bendxab.

¹⁹ Nancheenu nuure najcnu xi'n Dios, niluxh guiraa rebejn nani riutis rextzun guedxliuj cagusoobreni xtidx bendxab.

²⁰ Najnnu biääd Jesucrist Xi'n Dios lo guedxliuj. Baluini nuunu rextidx Dios te jiembeenu Dios, nani najcpac Dios gulii. Nabaññäjnu Dios ni najc gulii, sa'csi nabaññäjnu Jesucrist. Laani najc Dios ni najc gulii. Caguniidxni loonu yälñabajn par tejpas. ²¹ Resa'ä, na'c guzuxhijbtu lo rebanäjb ni xhet guliidi. Sugacni si'c.

Guijtz Ni Rojp Ni Bacuaa Juan

Diidx gului näjza yälrinälaaznu resa'nu

¹ Narä nacä bengool. Cagucuaä guiitzre lojlu nane' nani agule Dios, näjza loj rexi'nlu. Rinälazäpac la'tu luxh xhet xtebädi; näjza guiraa reni rililajz xtidx Dios sanälajztu. ² Nuure rinälaaznu la'tu sa'csi yuchee neñ lastoonu rediidx nani najc gului, luxh dilajznu jääl rediidxre. ³ Xtradnu Dios, näjza Jesucrist Xi'nni, gacnäj nuunu, jia reni nuunu, guscuecdxi lajznu con xcälñajn didxlii näjza yälrinälaajz.

⁴ Bibalazduxhä che guceä yu' rexi'nlu ni ruseob xtidx Dios si'c gunibee Dios loonu guseobnuni. ⁵ Nane' ni gule Dios, diidx nani rniabä guseob guejblu naj dini gac didxcoob, niluxh lagajc diidx ni biejn diaagnu galooli, che huililaazlinu xtidx Jesucrist. Lagajc dee najc nani gunibee Dios loonu: nungäjlpac chanälaaznu resa'nu. ⁶ Sinälaaznu resa'nu palga caguseobnu xtidx Dios. Dee najc xtidx Dios ni biejn diaagnu galooli, che huililaazlinu xtidx Jesucrist: chanälaaznu resa'nu.

Rebejn ni rnii garenca diidx ni xhet guliidi

⁷ Balti bejn birii loonu, naj cagugueereni xhidajl bejn ni re' lo guedxliuj. Caniireni di Jesucrist niajc niguii che biäädni lo guedxliuj. Sa' bejnre najc bejn rusguee. Sa' bejnre rdxe'chreni loj Jesucrist. ⁸ Colga'p la'tu te na'c chalilajztu xtiidxreni, didi xlia'si biennu dzuun ro'c, te xca'tu guiraa ni guniidx Dios lojtu.

⁹ Chutis bejn ni rlaiz gugu'ch xtiidxpacni lo xtidx Jesucrist, di bejn ga gumbee Dios. Niluxh chutis bejn ni riu xtidx Jesucrist, rumbeeni Dios, rumbeezani Jesucrist Xi'n Dios. ¹⁰ Palga jääd te bejn rolijztu ni di chasanäj xtidx Jesucrist, na'c xcäjbtu jiu'ni rolijztu, na'cza guiniitu lojni, "Xchan. Biu'." ¹¹ Sa'csi chutis bejn ni guinii "xchan" loj te bejn ni di chasanäj xtidx Jesucrist, cayacnäjzani redzunguijdx ni rujn bejn ga.

Rudeedni xtixtios

¹² Xhidalduxhru diidx rlazä guiniä lojtu, niluxh di rlazä gucuaäreni lo guiitz. Cabäzä jädhuiä lojtu ro'c te guiniä rediidxre lojpactu, te guibaalajztu. ¹³ Rexi'n bäjllu, nani aguleza Dios, ruxhal xtixtios lojlu. Ni'ctis najc ni rucuaä lojtu. Sugacni si'c.

Guijtz Ni Riojn Ni Bacuaa Juan

Cagucuaani didxsa'c lo Gayo

¹ Narä nacä te bengool. Caguxhalä guiτζzre lojlu, dad Gayo. Rinälazduxhälu sa'csi huililajzlu rextidx Dios.

² Sanälazälu, nanä laaca yu' lastoolu loj Dios. Naj rniabä lo Dios gacnäjni luj, guniidxzani yäl'nadaanlu. ³ Bibalazduxhä che gubi' gaii resa'nu, guniliireni loä xho huililajzlu xtidx Jesucrist, xho basoobzalu xtidx Jesucrist. ⁴ Xheti stee diidx ni ruspaä lazä si'c rbaa lazä che racbeä rusoob resa'nu redidxlii xten Jesucrist.

⁵ Dad Gayo, laaca cayujnlu che racnäjlu renani rililajz xtidx Jesucrist, mase dilu gumbeereni che riäädreni lojlu. ⁶ Aräjpreni lo resa'nu ni rdxagsa' ree xho huinäälajzlureni näjza xho gucnäj'lureni. Laaca bejnlu gucnäj'lu resa'nu, badeedlu xhi biqiinreni lo nejz che biriireni rolizlu. Si'cza nanab jiennu lo guiraa resa'nu, nalajznu rebejn ni ruluii xtidx Dios. ⁷ Ruluiireni xtidx Jesucrist sa'csi sanälajzreni Jesucrist. Xhet rca'direni lo rebejn ni di chalilajz xtidx Jesucrist. ⁸ Si'cza nanab gacnäjnu rebejn ni riluii xtidx Jesucrist nen garen-garen guejdx, te si'c jiennänu xtzuum Dios guiraa renani ruluii xtidx Dios.

Di Diótrfes niujn redzunsä'c

⁹ Abaxhalä te guiτζz lo rexepejn Jesucrist ro'c. Niluxh Diótrfes rlaјz guinibeeni lo resa'nu ro'c. Dini jiu xtidxä. ¹⁰ Ni'cni che guidzunä ro'c, narä siniä rediidxre lo resa'nu ro'c, che guidxaag sa'nu ro'c. Diótrfes rniyaj narä lo resa'nu ro'c. Dizani jiu resa'nu che rdzujnreni ro'c. Dizani gusaan fiitu resa'nu ni riääd ro'c, mase rlaјz chu teјtu fiireni. Luxh rlaјzni gudxoјjni guidxagnäјtu rebejn nani ruhuu'i resa'nu ni ruluii xtidx Jesucrist.

¹¹ Sa'ä ni rinälazä, na'c gunlu redzunguiјdx, bejn redzunsä'c. Nani rujn dzunsä'c ni'c najc Xi'n Dios. Chutis tej ni rujn redzunsä'c najc xpejn Dios. Chutis tej ni rujn redzunguiјdx, di ni'c gumbee Dios.

Rniireni didxsa'c xcuent Demetrio

¹² Guiraa rebejn ganax didxsa'c rniireni xcuent Demetrio, luxh huenliisi rusoobni xtidx Jesucrist. Sigajcza narä rniä didxsa'c xcuentni. Najnlu guliipac rediidx ni rniä.

Rudeedni xtixtios

¹³ Rlazä guiniä xhidalduxhru diidx lojlu, niluxh di rlazä gucuää rediidxga lo guiτζzre. ¹⁴ Runä xhigab di gaclaa jäädhuiä lojlu, dxeјcti jieinu diidx.

¹⁵ Gulecdxi laјzlu. Rexamigwlu ruxhal'reni xtixtios lojlu. Badeed xtixtios lo teјga rexamigwä ro'c.

Guijtz Ni Bacuaa Judas

Judas cagucuaa loj renani agule Dios

¹ Narä nacä Judas, ni rujn xtzuun Jesucrist. Narä nacäza betz Jacoob. Cagucuaä guijtze loj renani agule xtdnu Dios, renani sanälazduxhni, nani cayapxeni par Jesucrist. ² Rniabä lo Dios, gulaslazduxhruni la'tu, guscedxiduxhruni lastootu, gacnäjni la'tu, guniidxruni yäl_{sanälajz}.

Renani ruluii yäl_{rusguee}

(2 Pedro 2:1-17)

³ Rebetzä nani sanälazä, che cayunduxhä xhigab gucuaä lojtu xcuent yäl_{ruslaa} lo rextol_{nu} ni rajpnu, benä xhigab riojbru gucuaä te guijtz lojtu te gulidxätu sudzu'tznu, gapdzu'tztu yäl_{rililajz} ni basule'reni par tejjpas loj rexpelj_n Dios. ⁴ Sa'csi abiuxhiga'tz gaii bejn, renani galooli gunii Dios siädreni, niluxh sinitlojreni. Najcreni bejn ni di chälilajz xtidx Dios, najreni benguidxduxh, rutzuräreni xcäl_{racnäj} Dios, rujnreni xtujy, sanäreni te yäl_{nabandxuudx}. Rbälazzareni xpaxhuaannu nani rnibee loonu, Dad Jesucrist.

⁵ Mase anajntu guira'ti rediidxga tejjpas, rlazä gusnaä lajztu che gudejd gulää Dad Jesucrist rexpelj_n Israel lo guedx Egipto, dxejcti bagu'tni renani di nililajz xtiidxni. ⁶ Rexangl Dios nani di nucuadiajg diidx, ni birii cadro rlaz Dios churenü, reni'c basäu Diosreni cadro nacäiboo te cabäzreni gun Dios xcäl_{guxhtisni} lojreni. ⁷ Si'c bejn_{ni} guedx Sodoma näjza Gomorra näjza reguedxbäz ni tre' gajxh ro'c, sa'csi bejnreni dojl, reniguii guyunäjreni niguii biräax, regunaa guyunäjzareni regunabiräax. Dxejc gudejdreni trabawduxh huejcreni neñ guiboo par tejjpas xcuent xtoj_{lreni}, ni'c najc te yäl_{ruilijdx} loonu.

⁸ Rebejn ni riu' lojtu naj najc si'c rebejn galoo ni bejn dojl. Nabaj_{nreni} si'c ni bisieedreni lo guiraa nani ruluii yäl_{rnixcal}, ruxhinreni tiejxhreni, rbälazreni xcäl_{rnibee} Dios, rniyajzareni rexangl Dios. ⁹ Miguejl ni rnibeeru loj rexangl Dios, che gudildiidxni bendxab yejc tiejxh toMoisés, dini niniyaj bendxab, alga räjpni: "Sugun Dad Jesucrist yäl_{guxhtis} lojlu." ¹⁰ Niluxh rebejn_{ga} rniyajreni nicla ganreni xhini'c rniireni. Niluxh nani racbeepac rebejn_{ga} najc yäl_{najn} nani nicla niqiiin nisieedreni, lala sa' nani rujnza reguidxaa, ni xheti xcäriejn_{ni}, reni'c sujn nitlojreni.

¹¹ ¡Aiil! ¡Riazanuren! Sanaj_{lreni} xnezyuj Caín, luxh te gunreni gaan meel ruxhun_{lreni} rujnreni sa' dojl ni bejn Balaam agujc xchero, näjza sa' dojl ni bejn Coré, ni gudil_{näj} Dios, luxh gunitlojni. ¹² Laareni najcreni te xtuiduxh lo rexchej ni rajc guidoo, direni guidx_{ejb} gauxchenäjreni la'tu, sa'csi xque'tisreni riureni. Najcreni si'c te xcäy_{ni} xhet nisguij siädnäni, nani sanä bej nezrec nezrec; najczareni si'c te yagbigool nani di ninejxh xcajlojni, tio'p huäl agujtreni, najcreni si'c te yaj_n ni abiliäädx. ¹³ Laareni najc si'c nis ni räjs lo nisdoo, che cayajc te bidon_{duxh}, sää, siädäni, cari_{ni} xtujyreni si'c räjs nis lo nisdoo. Najcreni si'c bale' ni rtejb xhaguibaa, rijreni lo te yäl_{nacäiduxh} ni benchee Dios par tejjpas.

¹⁴ Xcuentza redee agunixgaaza Enoc ni najc xagdodoo Adán, räjpni: "Bahuii, siädnä Dios xhidalduxh xangl_{ni} ¹⁵ te gunni yäl_{guxhtis} loj guiraa bejn te gusacsiduxhni guiraa rebejn ni di gumb_{ee} Dios xcuent redolduxh ni bejnreni, xcuentza redidxnaj ni guniyaj rebejn_{olduxhre} Dios." ¹⁶ Rebejn_{re} laa reni rmojm, runduxh_{reni} quej, rujnreni si'ctis ni rlaz tiejxh_{reni}, rniireni

guiraloj didxnaj, rniisireni didxs'a'c loj rebejn te gun rebejn'ga si'c ni r'rajzreni gunreni.

Rulijdxni rebejn nani ahuililajz xtidx Dios

¹⁷ La'tu, betzä ni sanälazä, riäj] guinaj lajztu rediidx nani gunii reapost xten Dad Jesucrist, ¹⁸ sa'csi guniireni lojtu: "Neñ redxelult che guibisac Jesucrist, su' bejn ni suxhiznäjreni rextidx Dios, sujnreni si'ctis guisia' lajzreni." ¹⁹ Redee najc renani run rlia' rexpejn Dios lo sa'reni; rinuuzareni ni yu' lo guedxliuj, diza Xp'rit D'xan xten Dios cuääz neñ lastooreni.

²⁰ Niluxh la'tu rebetzä nani sanälazä, col'tioob loj xcäl'r'ililajztu ni siäd lo Diostis, col'nab lo Dios xcuent yäl'rnibee xten Xp'rit D'xan xtenni. ²¹ Colguibajntis lo yäl'sanälajz xten Dios, col'susintis la] ni cayunlojtu yäl'rulasajz xten Dad Jesucrist ni guniidx yäl'nabaj] par tejpas.

²² Colgacnäj renani di chalilazsa'c te chalilajzpacreni xtidx Dios. ²³ Colyacnäj sgaii te guibicajreni lo dojl, gudobxhaxreni, col'yejn xhigab lo guiboo cayejcreni. Colyacnäj sgaii bejn, col'gulasajzreni con yäl'rdxejb, niluxh col'natiru te di guntu lagajc dojl ni rujnreni. Gulälaz nani rujnreni, nani ruxhijreni.

Redidx lult

²⁴ Colguiliä'p xpala'n Dios nani racnäj la'tu didi jiajbtu lo dojl, nani rujn sajc suutu lo xcäl'rdimbicha' Dios, nayadujtu, rbaduxh lajztu. ²⁵ Yu' tejtis Dios. Laatisni rajpni yäl'najn te guslaani nuurnu lo dojl xcuent ni bejn x'tadnu Jesucrist. Colguiliä'p xpala'n'ni, rajpni guiralii yäl'rnibee, yäl'rdimbicha', galooli, näj naj, näjza par tejpas. Sugacni si'c.

Rediidx Nani Bacuaa Juan Xcuent Recos Ni Churu Gac

Baluiloj Jesucrist lo Juan

¹ Dee najc rediidx ni badeed Dios loj Jesucrist te gululojnini loj rexmosni, xcuent recos nani di gaclaa gac. Jesucrist baxhał xanglni lo Juan, te baluiini guiraa recosga lojni. ² Ni'cni bacuaa Juan lo guijtze guiraa xtidx Dios nani baluii Jesucrist lojni, xcuent guiraa recos nani bahuilojpacni.

³ Chicbaa renani roł guijtze xcuent recos ni churu gac, renani riuza rediidxga, renani rguchee rediidxga neñ lastooni sa'csi siäddzuṅgajxh redxej che soob rediidxga.

Juan cagucuaa guijtza lo gajdz guidoo

⁴ Narä nacä Juan. Cagucuaä guijtze loj guigajdz reguidoo ni tre' lo región Asia. Dios gusalajz la'tu, guscuecdxini lajztu, lagajc Dios ni sigajc najc nadxej, sigajcza gujcnj nani, sigajcza sajcni par tejpas. Xca'zatu xcälruspalajz näj xcälrbexdilajz guigajdz respit ni suga' guideb gabi cadro rnibeeni, ⁵ näj xcälruspalajz, xcälrbexdilajz Jesucrist nani gunilii diidx ni badeed Dios lojni, nani ganiddoo gubanšac lo rebengut, nani rnibeeza lo guiraa reřei loj guedxliujre. Laani sanälazduxhni nuure, laani rudzucajni xtojłnu con xtiejnii. ⁶ Laani bejnii gacnu te benro, te guedxro, gaczanu bixhojz lo Dios Xtadni. Suchä'p xpala'nni, suga'pni yälrnibee par tejpas. Sugacni si'c.

⁷ ¡Colgacbee! Laani sibisacni lo rexcäy, luxh guiragajc rebejn suhuui lojni, nägajc renani gudzujd cuä' xcustiini. Guiraa rebejn guedxliujre soon xcuentni. Si'cti, sugacni si'c.

⁸ —Narä nacä ganid, nacäza lult, si'c najc relettr A con Z —rnii Dad Dios—. Nabanä nadxej, sigajcza gubanä nani, sigajcza sibanä par tejpas, dipacna gacä ste'ca. Rapä yälrnibeduxhru lo chutis.

Bahuiä loj Jesucrist lo xcälrdimbicha'ni

⁹ Narä, Juan, bejtztu, näjza ni cadednäjtu trabajw xcuent Jesucrist, ni riunäjzatu cadro rnibee Dios, ni rsiudzutznäjzatu lo xtidx Jesucrist, guyu'ä lo yuj nani tre' lo nisdoo, ni laa Patmos. Ro'c baxhałreni narä pres sa'csi basule'ä xtidx Dios näjza diidx xcuent ni bejn Jesucrist lo guedxliujre. ¹⁰ Te dumingw, lał ni cayunää Dios, guzacä astoo canixcalä, dina niacbeä caro yu'ä, dxejcti nez detzä biejn diagä xse' te ni gunii dipduxh, astoo te trompet, ¹¹ najni loä:

—Narä nacä ganiddoo, nacäza lult. Lo te guitzro bacuaa nani fiilu, dxejcti baxhał guijtza loj guigajdz guidoo ni yu' nez Asia, neñ reguejdxre: Éfeso, Esmirna, Pérgamo, Tiatira, Sardis, Filadelfia, näjza Laodicea.

¹² Dxejx gubireä te bahuiä chuni'c canii loä. Che gubireä bahuiä lo gajdz gandilier oor. ¹³ Galäii guigajdz recandilieerga, suga' te ni najc Xi'n Dios nani gujx Xi'n Niguii, najcwni te lajd ni rdzujn lo ni'lini, lastoozani naliib te cinturon gulajg ni najc ganaxduj oor. ¹⁴ Yejcni näjza xquidxejcnj najczareni nolbäj si'c xquichlajd xiil, nolbäj si'c yeyg. Dxejcru rbebjl lojni. ¹⁵ Ni'ni rdimbicha' si'c guuib ni laa bronx che cayejcnj lo guiboo. Xse'ni riejn nadipduxh astoo che riäjz nisro neñ regueuu. ¹⁶ Ladbee ca' naani gajdz balxhaguibaa; ro'ni rii te espaad ni guiro'p laad caj ro'ni; dxejctiru lojni rujn si'c rujn loj gubijdx che cagusanijni guideb lagaa.

¹⁷ Che bahuiä lojni, biabrloä nez lojni si'c te bengut. Dxejcti batzuubni naani xladbeeni yecä, dxejc guniini loä, najni:

—Na'c guidxjblu, narä nacä ni gubajñ galooli, narä nacäza ni guibajñ lult.

¹⁸ Narä nacä ni nabajñpac; gutä, niluxh naj nabanä par tejpas. Rapä yälrnibee lo yälgujt näjza lo gabijl. ¹⁹ Ni'cni bacuaa recos ni abahuilu, nani cayajc naj, näjza nani churu gac. ²⁰ Dee najc laa yälxhiga'tz xten regajdz balxhaguibaa ni bahuiilu lo naä ladbee näjza regajdz gandilier oor: guigajdz balguibaa sälojni xangl Dios xten reguidoo. Dxejc gajdz gandilieerga sälojni guigajdz reguidooga.

2

Rediidx nani chää loj rexpejn guidoo Éfeso

¹ Dxejcti najni loä:

—Bacuaa rediidxre lo xangl Dios xten guidoo Éfeso: “Nani ca' guigajdz balxhaguibaa naani ladbee, näjza nani rsiaj galäii guigajdz gandilier oor, rñii rediidxre lojtu: ² Narä numbeä xhi redzuun rujntu, xhi trabajw rdejdu rujntu dzuunga, näjza xho rsiudzu'tztu. Dizatu guchagsa'tu benlatsiaj; näjza bala'tztu xho rujñ rebejn nani rñiireni najcreni apost ni rñii xtidx Dios, luxh direni gac, luxh la'tu gucbegajctu cagusueereni bejn. ³ Rsiudzu'tztu, rujntu huant xcuent xtidxä, gajdtu guidxajg. ⁴ Empac yu' te quej ni rbe'cä xcuentu: dirutu chanälajz narä si'cni huinälajztu narä ganiddoo. ⁵ Ni'cni colguzaa lajztu caro banijttu, colgusiejch lajztu, colyejn lagajc redzuun ni bejntu galoo che guslojtu huililajztu xtidxä. Palga ditu gusiechajztu, sudzucää xcandilieertu cadre suga'ni. ⁶ Laaca rujntu rbälaztu xtzuun rebejn ni laa nicolaítas, sa'csi näjza narä rbixlazä xtzuunreni. ⁷ Nani yu' diajgni te cuadiajgni diidx, sucuadiajgni diidx ni rñii Sprit Dxan xten Dios loj reguidoo: loj renani gun gaan lo dojl, gudedä gauni ninejxh ni rcaj lo yajg yälñabajñ, ni yu' xhaguibaa cadre yu' Dios.”

Rediidx ni rñiini loj rexpejn guidoo ni yu' Esmirna

⁸ Dxejcti najni loä:

—Bacuaa rediidxre lo xangl Dios xten guidoo ni yu' Esmirna: “Nani najc ganiddoo, nani najza lult, nani agujt, dxejctiru gubansacni par tejpas, rñii diidxre lojtu: ⁹ Narä nanä xho cadejdlu trabajw, nanäza guxilii rajplu, niluxh nez loj Dios yu' xhidajl xhixtenlu. Nanäza yu'reni rñiyajlu. Reni rñiyajlu rñiireni najcreni rexpejn Israel, luxh direni gac. Najcreni xpejn xquidobäz bendxab. ¹⁰ Na'c guidxjblu trabajw nani agojl tedlu. Aree bendxab gusäl gaii sa'tu nen latzguib, te gacbeeni don la guliitu ahuililajztu xtidx Dios, te tedzatu trabajw tzuu dxej. Colgutip lajztu mase guettu, dxejcti narä gunidxä te coron xten yälñabajñ. ¹¹ Nani rñajz cuadiajg diidx sucuadiajgni diidx ni rñii Sprit Dxan xten Dios loj reguidoo: nani gun gaan lo dojl, xhet gundi yälgujt ni rojpa lojni.”

Rediidx ni rñiini lo rexpejn guidoo ni yu' Pérgamo

¹² Dxejcti najni loä:

—Bacuaa rediidxre lo xangl Dios xten guidoo ni yu' Pérgamo: “Nani ca' spaad ni caduxh ro'ni guiro'p laad rñii rediidxre lojtu: ¹³ Narä nanä caro rbäjztu, rbäjztu lo guejdx cadre rnibee Bendxab. Rsiudzu'tztu xcuent xtidxä. Laltis rsiudzu'tztu rililajztu xtidxä, mase nen redxej cheni bagu'treni Antipas, ni gunii diidx xcuenta, nani gusudzutzpac nez loä, nani bagu'treni nen guejdx cadre rnibee Bendxab. ¹⁴ Niluxh yu' tiop-chon xtojltu. Lojtu

nadxaag gaii bejn ni rujn si'c bejn toBalaam agujc xchero. Laani baseedni Balac xho gunni te jiajb rexpejn Israel neñ dojl, baseednireni gaureni recos ni gurej lo dxan nez loj rebanajb, baseedzani rexpejn Israel guesnäjreni chutis gunaa. ¹⁵ Sigajcz naadxaag lojtu gaii bejn ni riu rediidx ni rusule' reni laa nicolaifas. ¹⁶ Colgusiechxgaa lajztu, te di jialgacä lojtu te gucuanääreni spaad ni yu' ro'ä. ¹⁷ Nani rlaiz cuadiajg diidx, sucuadiajgni diidx ni rnii Sprit Dxan xten Dios loj reguidoo: renani gun gaan lo dojl, lojni gudedä yätxtiil ni laa mana ni yuchee-xhiga'tz. Sudedäza lojni te guibaz ni najc nol, lojni caj te lajni ni nacoob, nani rutru racheedi, xtebtis nani xca'ni."

Rediidx nani rniini lo rexpejn guidoo ni yu' Tiatira

¹⁸ Dxejcti najni loä:

—Bacuaa rediidxre lo xangl Dios xten guidoo ni yu' Tiatira: "Xi'n Dios nani rbebajl balojni, ni rdimbicha' ni'ni si'c bronz, ni'c rnii rediidxre lojtu: ¹⁹ Ananä xtzauuntu, sanälajztu sa'tu, nanä xho rililajztu xtidxä, xho racnäjtü resa'tu, näjza xho rsiudzu'tztu, runduxhtu huant. Nanäza cayujntu dzunroru naj loj ni bejntu che guslojtu. ²⁰ Niluxh yu' xhicuent rdxe'chä lojtu. Rcäjbtu riu'tu loj te gunaa ni laa Jezabel. Laani rniisini najcni te profet, gunaa ni rnii xtidx Dios, rusgуетisni bejn. Luxh xcäl'ruseedni cagusgueeni rexpenä nani ahuililajz xtidxä, te naj rujnreni cosguijdx, si'c yälresnä j ni di gac chäälni, rajwzarenani nani gurej lo dxan xten rebanajb. ²¹ Aguläzä xchej te gusiechla-jzni, gusaanni gunni dojl, luxh naaddini gusiechla-jzni xcuent redzunguijdx ni rujnii. ²² Luxh palga laani dini gusaan gunni redzuun nani rujnii, narä siguixäni, gudedä te yälracxhuro. Luxh sutedä trabajwduxh guiraa renani bennäjni dzunguijdx palga direni gusiech lajzreni, palga direni guchaa xmoodreni. ²³ Sugutxhiä, sunitloä rexi'n gunaaga, te si'c gachee guiraa rebejn ni yu' neñ reguidoo narä nacä ni rula'tz rexhigab ni yu' xcäriejreni, näjza yäl'rililajz ni yu' neñ lastooreni. Te gacheezarenani narä sunidxä lo tejgatu ni riäjil xca'tu xcuent redzuun ni rujntu. ²⁴ Dxejc loj guiraa reni yu' lo guedx Tiatira, la'tu ni di guirinajl xnezuy Jezabel, la'tu ni di gumbee nani rniireni najc recosduxh xten bendxab, xhetru rniädi lojtu, dirunä gutalä xtzauuntu. ²⁵ Colyapdzu'tz rextidxä nani arajptu dxejli ni guibisacä lojtu. ²⁶ Nani gun gaan lo dojl, näjza nani cagusoob xtidxä dxe lultli, lojni sudedä yäl'rnibee te guinibeeni renacion. ²⁷ Si'cni baniidx Xtaäd yäl'rnibee loä, sudedä yäl'rnibee lojni, te guinibeeni guiraa reben guedxliuj, gunnäjni yäl'guxhtis lojreni te barguüib si'c rujn ni runchee guesbajñ, rlia'ni guiraa regues nani xhet sajcdi. ²⁸ Sunidxäza bale' xhaguibaa ni rii rsildoo (ni säloj guibannäjnu Dios). ²⁹ Nani rlaiz cuadiajg sucuadiajgni diidx ni rnii Sprit Dxan xten Dios loj reguidoo."

3

Rediidx nani rniini lo rexpejn guidoo ni yu' Sardis

¹ Dxejcti najni loä:

—Bacuaa rediidxre lo xangl Dios xten guidoo ni yu' Sardis: "Si'c naj nani rajp guigajdz Sprit xten Dios näj guigajdz rebal xhaguibaa: Narä nanä guiraa redzuun nani rujntu, rnii rebejn nabajntu, niluxh narä nanä ascanu agujntu, dirutu gun xtzunä. ² Colguibajñ, colgula'tzru nani rapsijctu xcuent rextidxä nani ameer nitloj neñ lastootu. Narä ruhüiä ditu niunsa'c dzuun xtenä nez loj Dios. ³ Colgusnaj lajztu rediidx ni basule'reni lojtu, nani abacuadiajtu, colgusoob rediidxga, colgusiech lajztu. Palga ditu guibajñ, palga ditu guchaa xmoodtu, sidzunä nez lojtu si'c te gubaan, nicla gaantu cor guidzunä lojtu. ⁴ Niluxh yu' gaiisi bejn lo guedx Sardis nani naya, nani gajdreni gun dojl.

Sajcwreni ladnolbäj te sanäreni narä xhaguibaa, sa'csi laareni säbyäjłreni. ⁵ Nani gun gaan lo dojl, ni'c sajc gacwni ladnol, luxh dizana guche'nä lajni loj xlibr cadro caj laj renani sibajññäj Dios par tejpas. Sicäpäza nez loj Xtadä näjza nez loj guiraa rexquixhajni, bejnga najc rexpenä. ⁶ Nani rłajz cuadiajg diidx, sucuadiajgni diidx ni rñii Sprit Dxan xten Dios loj reguidoo.”

Rediidx nani rñiini lo rexpejn guidoo ni yu' Filadelfia

⁷ Dxejcti najni loä:

—Bacuaa rediidxre lo xangl Dios xten guidoo yu' Filadelfia: “Nani najc dxan, nani najc guliipac, nani rajp xliäii toDavid (ni säloj guiragajc yälrmibee), nani che ruxhalni, rut rusäuudi, nani che rusäuuni, rut ruxhaldi, laani rñiini diidxre lojtu: ⁸ Narä nanä xhini'c rujntu. Si'c te puert ni naxhal, ni rut rusäudi, si'cza sunidxä yälrmibee lojtu te gusule'tu xtidxä, rutliidi sajc gusäuu ro'tu. Mase guxii nadip-nadaantu, atu canii xtidxä, ditu cuatzłajz xtidxä. ⁹ Suhuuitu xho gunä rebejn ni yu' lo guidobäz xten beñdxab. Rñiisireni najcreni xpejn Israel, luxh direni gac; rusgüerene bejn. Narä sunäpac jiädzuxhijbreni nez lojtu, sunäza gacbeepacreni sanälazduxhä la'tu. ¹⁰ Sa'csi basoobtu xtidxä ni gunibeä sutijptu, na'c jieedtu, ni'cni narä sacnäžzatu che guidzujñ dxej tedtu trabajw. Luxh orga ameer guidzujñ lo guideb guedxliuj, luxh sidejd guiraa reben guedxliuj trabajw, te guibee rebensa'c lo reben guedxliuj. ¹¹ Narä di gaclaa jialä; gopdzu'tz ni rajptu, te rut gudzucajdi ni gunidxä xca'tu. ¹² Nani gun gaan lo dojl, narä gunäni si'c te pilajr nen xquidoo Xtioozä, nalajznu, sajcni te bejn nani gac guinibee cadro yu' Dios. Sibajñni ro'c par tejpas, diruni guirii ro'c. Lojni gucuaä laj Dios näjza laj guejdx xten Dios ni najc Jerusalencoob, nani guirii xhaguibaa cadro yu' Dios; lojni sucuaäza laä ni najza nacoob sa'csi najcni xpenä. ¹³ Nani rłajz cuadiajg diidx, sucuadiajgni ni rñii Sprit Dxan xten Dios loj reguidoo.”

Rediidx nani rñiini lo rexpejn guidoo ni yu' Laodicea

¹⁴ Dxejcti najni loä:

—Bacuaa rediidxre lo xangl Dios xten guidoo ni yu' Laodicea: “Nani laa Amén (ni säloj sugacni si'c), nani najc testiigw ni rñiliipac, ni di cuääz guiniini didxliiga, nani guläxtiej guedxliujre näj guiraliini benchee Dios, laani rñiini scree: ¹⁵ Nanä redzuun ni cayujntu. Ditu sasa'c lo xnezyuä, dizatu cuälaz xnezyuä. ¡Maläii guntu tejni o steeni! ¹⁶ Ni'cni, sa'csi najctu si'c nistiib, ditu gac si'c nisanajł, nicłaza gactu si'c nislää, sibäro'ä la'tu. ¹⁷ Sa'csi rñiilu: Ri'cw narä, rapä xhidalduxh xhixtenä, xhet rquinädi. Luxh dilu gan xhet rajpdilu, alga najclu ben gubijn, te ben probduxhłu, di lojlu jien, luxh suga'lu xhabäálu nez lo Dios. ¹⁸ Ni'cni rulidxälu siilu loä oor xtenä nani agudejd lo guiboo te gaclu ri'cw; gusii loä ladnol gacwlu, te di guitujyłu suulu xhabäálu; gusiiza unguent loä te chää balojlu, te jien lojlu. ¹⁹ Rebejn nani sanälazä, reni'c rulidxä, runäza riareni che et laadi rujñreni. Ni'cni colsäblajz; colgusiejch lajztu. ²⁰ Colhüii, ana suga'ä roxlä' lastootu, cagusezä, cabedxa'ä. Palga yu' chu tejtu ni jiejn diajgni xse'ä, guxhalni xpuert lastooni, siu'ä lastooni, te gacnääni, te guiban'saczani nez loä. ²¹ Loj nani gun gaan lo dojl, lojni gudedä guinibenäjni narä xhaguibaa, sa'csi näj narä abenä gaan lo dojl, ni'cni gurenä Xtadä cadro rñibeeni xhaguibaa. ²² Nani rłajz cuadiajg diidx, sucuadiajgni diidx ni rñii Sprit Dxan xten Dios loj reguidoo.”

¹ Che gulujx bacuaä rediidxga, guläsä loä, bahuiä astoo naxhal ro puert xhaguibaa. Dxejrcru gunii xse' nani biejn diagä ganiddoo, nani riejn si'c xse' te trompet, najni loä:

—Huä'p, gudaä ree, te guluiä lojlu recos ni churu gac che luux gac recosre.

² Lagajc dxejc astoocanu si'cni huij sprit xtenä xhaguibaa. Ro'c bahuiä te yagxhilo cadro rbej nani rnibee xhaguibaa, luxh ro'c sobga' nani rnibeeni.

³ Nani sobga' lo yagxhilga, rienmi si'c te guisa'c ni rbebalsejs, si'c reguisa'c ni laa jaspe, näj cornalina. Guideb gabi yagxhil cadro rnibeeni dejd te xquitgubijdx ni rbebalsejs si'c guisa'c ni laa esmeralda. ⁴ Guideb gabi cadro rnibeeni suga' sgalbitajp yagxhil, loj reyagxhilga sobga' galbitajp rebengool, najcwreni ladnol, yu' coron oor yejc teygareni. ⁵ Nez lo yagxhilo cadro rnibeeni ri reyalrdinya' näjza guzii. Nez loj cadro rnibeeni cayaiguuj gajdz bajl ni najc gajdz Sprit Dxaan xten Dios. ⁶ Nez loj cadro rnibeeni yu' astoocanu te nisdoo ni rien si'c te guihuanro, rdimbichasejsni.

Galäii yagxhilroga näjza guideb gabini suga' tajp man, guideb nez lojreni näjza nez dejtreni yu' balojni. ⁷ Manganidga najc si'c te lion; man ni rojppa najc si'c te gonbäz; man ni riojnga rujn lojni si'c rujn loj te niguii; man ni rdajppa najcni si'c te bisiro cagutajx xhaguibaa. ⁸ Niluxh guidap remanga teygareni yu' xho'p xhigareni, guideb gabireni, näj nez nenreni liguidxa balojreni, niluxh direni gusilajz, dxej-yääl caniiireni:

Dxaan, dxaan, dxaan najc Dad Dios ni rajp yälrnibeduxh, nani yu' galooli, nani yu' naj, nani churu jiaäd.

⁹ Guidap remanga rliä'preni xpala'n Dios, rusuxhijbreni rajnrenini, rdeedzarenini xquixtios loj nani rnibee par teppas. ¹⁰ Dxejc guigalbitap rebengool, suzuxhijbzeneni loj nani rbej lo yagxhilo, te ganreni nani nabajñ par teppas. Sucuaarenini xcoronreni nez loj xyagxhilroni, siniireni lojni, säjpreni:

¹¹ Dad Dios baxhuaannu, Guejbpaculu riäjł xca' guiraa rebala'n, guiraa reyälruzxhijb, guiraa reyälrnibee, sa'csi Guejblu guläxtiej guira'ti nani yu' naj, yu'reni sa'csi rrajz Guejblu chureni, ni'cni benchee Guejblu guiraarenini.

5

Te guijtż näj te ni najc Xiil xten Dios

¹ Dxejrcru narä Juan bahuiä lo nani sobga' lo yagxhilroga. Naani ladbee ca'ni te libr; najcni si'c te bilu guijtż. Caj diidx nez lojni caj diidx nez dejtżni, nadxe'ni, caj gajdz seii lojni. ² Dxejcti bahuiä lo te xangl Dios ni nadipduxh, dip guniini, najni:

—¿Chuni'c riäjł guxhal guijtżre? ¿Chuni'c riäjł gutiäjs reseiere?

³ Niluxh nicla tej bejn di nidxäjł ni riäjł gutiäjs reseiega te guxhalni guijtżga; nicla xhaguibaa, nicla lo guedxliujre, nicla xhajiät nez nen guedxliuj. Niclaza nidxäjł chu niajc nuhui lo guijtżga. ⁴ Narä ronduxhä sa'csi nicla tej rut riäjłdi gutiäjs reseiega, niclaza ni riäjł gol guijtżga, niclaza ni riäjł fiitis lo guijtżga. ⁵ Dxejcti gunii te bengool loä, najni:

—Na'cru goonlu. Bahuii gan, niguii ni rniireni Lion, xagdoos toJudä, xagdoos toDavid, abejjni gaan lo yalgujt ni'c naj riäjł guxhalni guijtżga, gutiäjszani guigajdz reseiega.

⁶ Dxejc bahuiä nez cadro suga' yagxhilroga näj guidap remanga, näj cadro suga' guiraa rebengool luxh te galäiiga suga' tej ni najc Xiil xten Dios, astoo

abagu'trenini. Sojb gajdz xca'chni nájza gajdz balojni, ni najc gajdz Sprit xten Dios nani ruxhalni guiraa nez lo guedxliuj. ⁷ Laani gubigni, cua'ni guijtzga, guläänini naa ladbee xten nani sobga' lo yagxhilroga canibee. ⁸ Che cua'ni guijtzga, guidap remanga nájza guigalbitap rebengool bazuxhijbreni nez loj Xiilga. Tejga rebengoolga ca' te arp, ca'zareni taz oor guidxa te ni najc si'c yaal. Yaalga najc guiraa reyälrbejdx, yälrniab xten rexpejn Dios. ⁹ Cayoizareni te dicoob ni najc scree:

Guejblu sacduxh,
riäjlpac xca' Guejblu guijtzga,
gutiäjs Guejblu reseiiga, sa'csi bagu't rebejnlu,
nájza xtiejnlu gudijx xcuent bejn lo Dios.
Gudijxlu xcuent bejn ni najc garen-garen raz,
ni rnii garen-garen didxsaj,
ni siääd garen-garen guejdx lo garen-garen ladxbejn.

¹⁰ Badeedlu gacreni reii nájza bixhojz lo Dios.

Laareni sinibeereni reben guedxliuj.

¹¹ Che bahuiä, biejn diagä xse' xhidalduxh xangl Dios ni suga' guideb gabi yagxhilo cadro rbej nani rnibee, nájza xse' guidap reman, nájza xse' guiraa rebengool. Luxh di gacdi guigab xangl Dios ni tre' ro'c sa'csi xhidalduxhtej najcreni, xhidalduxh miyõn najcreni. ¹² Dipduxh najc xse'reni, caniireni scree:

Sacduxh Xiil nani bagu'treni,
ni'c riäjl xca'ni yälrnibeduxh, yälrapduxh, yälñanduxh, yälmilagwr.

Riäjlza guiliä'pnu xpala'nni, guzuxhijbnu lojni ganñuni, gudeednu xquixtios lojni.

¹³ Dxejcti biejn diagä xse' guiragajcreni, guiraa reni benchee Dios ni yu' xhaguibaa, náj guiraa reni yu' loj guedxliujre, nájza guiraa reni yu' xhajiät nez neñ guedxliuj náj lo nisdoo, biejn diagä caniireni scree:

Loj nani sobga' lo yagxhilo cadro rnibeeni,
nájza loj ni najc Xiil xten Dios, laatisni sacduxhni,
guiliä'pnu xpala'nni, guzuxhijbnu nez lojni ganñuni,
gäbzanu rinibeeni par tejpas.

¹⁴ Dxejcti guidap remanga rnigajcreni scree:

—Sugacni si'c.

Dxejcti guigalbitap rebengool bazuxhijbreni nez loj nani nabajn par tejpas, gojnrenini.

6

Guigajdz reseii

¹ Dxejcti bahuiä loj ni najc Xiil xten Dios. Batiäjsni tej seiiga. Biejn diagä gunii tej lo guidap remanga, luxh che guniini riejn xse'ni si'c che ni canii guzii, najni loä:

—Gudaa te filu.

² Dxejc bahuiä lo te cabai nol. Nani bijb dejtzn ca' te arcw nani rucuaa fle'ch. Badeedreni te coron lojni. Biriini cayujnni gaan te chanuutis gunni gaan.

³ Che batiäjsni ni rojp seiiga, biejn diagä gunii ni rojp manga, najni loä:

—Gudaa te filu.

⁴ Dxejc bahuiä lo te cabai xnгаа. Loj nani bijb cabai xnгаа badeedreni yälrnibee gudzucajni yälñadoo, yälrbedxilajz, lo guedxliujre, te ju't sa' rebejn. Badeedreni te spadro cua'ni.

⁵ Dxejcti che batiäjsni ni riojn seiiga, biejn diagä gunii ni riojn manga, najni loä:

—Gudaa te filu.

Dxejc bahuiä lo te cabai yas. Nani bijbni naazni te balans. ⁶ Biejn diagä astoo galäii guidap remanga, birii xse' te ni canii scree:

—Tej kil xob xca'lu gunlu dzuun tebdxej; choñ kil salbaad xca'lu gunlu dzuun tebdxej. Niluxh na'c guhuallu bin niclaza se't.

⁷ Dxejcti che batiäjsni ni rdap seiiga, biejn diagä gunii ni rdajp manga, najni loä:

—Gudaa te filu.

⁸ Dxejc bahuiä lo te cabai gojtz. Nani bijbni laa yälgujt, luxh dejtzni siädnalgajc ni rnibee gabijl. Gula'ni rebejn ni re' lo guedxliujre gujcreni tajp gala', dxejc loj redee badeedreni guinibeereni lo te cuaa rebenguedxliuj te ju'treni rebejnnga con spaad, näj yälrliaan, näj yälracxhuu, näjza remanduxh ni yu' dajn.

⁹ Dxejcti che batiäjsni ni rajc gaii seiiga, bahuiä nez ni' xpiändxan Dios, ro'c naga' xaim rebejn nani bagu'treni sa'csi huililajzreni xtidx Dios, näjza sa'csi gusutijpreni basule'reni xtidx Dios. ¹⁰ Dipduxh caniiireni, canabreni lo Dios, räjpreni:

—Dad, ni najc Dxan, ni najc guliipac. ¿Gucli cuääz, gaclaa gun Guejblu yälguxhtis loj reni bagu't nuure lo guedxliuj te quixreni ni bejnreni?

¹¹ Dxejcti cua'reni te ladnolbäj gojt tejpgareni. Dxejc räjpreni lojreni cuäzsjcreni, gusilajzreni, lañ ni guiza' resa'reni ni rusule' xtidx Dios, ni churu gugu'treni sigajc bagu'treni laareni.

¹² Bahuiäza cheni batiäjsni ni rajc xho'p seiiga, luxh gujc te xuduxh, bigasboo loj gubijdx si'c te ladyas, sas bäii gujc guidebni si'c rejn. ¹³ Rebajl ni yu' xhaguibaa bitejbreni lo guedxliujre, si'c rtejb rebetz yaxhejn che rusniib te beduxh yajgga. ¹⁴ Dxejcti gunitloj guibaa si'cni rnitloj te guijtz che re'ni, rajcni te bilu. Guiraa redajn näjza reyuj ni re' galäii lo nisdoo biniibreni, bidxaa xljadreni. ¹⁵ Ni'cni guiraa rebeñ guedxliuj, rebejn nani rnibee, näjza rebeñro, näjza recapitan, näjza rebeñ rapduxh, näjza rebeñ ni nadiplajzreni, näjza remos, näjza renani rut lojdi yu'reni, guiragajczeni baxunreni, huicuatzlojreni neñ rebiliää neñ redajn. ¹⁶ Dxejc räjpreni loj redajn, loj regulaj:

—Colguitejb yejcnu, colgucua'tz nuure loj nani rbej lo yaxghilro xhaguibaa näjza loj yälguxhtis xten nani najc Xiil xten Dios. ¹⁷ Sa'csi abidzujñ dxero xten xcälguxhtisni, çchuni'c sajc suu nez lojni?

7

Tegayuu tiubitajp miñ rexpejn Israel

¹ Dxejcti bahuiä lo tajp xangl Dios ni suga' loj guidajp laad guedxliuj. Caguscuaäzreni guidajp rebej xten guedxliuj te xhet bejdi guibi' lo guedxliuj nicla lo nisdoo niclaza yejc reyajg. ² Bahuiä lo stee xangl Dios, ni siääd nez cadre rliejn gubijdx, ca'ni seii xten Gueb Dios ni nabajñ par tejpas. Dipduxh guniini lo guidap xangl Dios ni rajp yälrnibee te gunreni daan lo guedxliuj, näjza lo nisdoo. ³ Räjpni lojreni:

—Guläzsjctero, lañ ni guicuauu te seen lo cuaj reni najc xpejn Dios, te dxejcro sajc guntu daan lo yuj, näj loj nisdoo, näj loj reyajg.

⁴ Dxejcti biejn diagä najreni bal bejn guyu' seenga lo cuajreni, basa'reni tegayuu tiubitajp miñ bejn ni bibee loj rexpejn Israel. ⁵ Loj rexpejn Judä bibee

tzubitio'p mil; loj rexpejn Rubén bibee tzubitio'p mil; loj rexpejn Gad bibee tzubitio'p mil; ⁶ loj rexpejn Aser bibee tzubitio'p mil; loj rexpejn Neftalí bibee tzubitio'p mil; loj rexpejn Manasés bibee tzubitio'p mil; ⁷ loj rexpejn Simeón bibee tzubitio'p mil; loj rexpejn Leví bibee tzubitio'p mil; loj rexpejn Isacar bibee tzubitio'p mil; ⁸ loj rexpejn Zabulón bibee tzubitio'p mil; loj rexpejn José bibee tzubitio'p mil; loj rexpejn Benjamín bibee tzubitio'p mil.

Benguixhuj ni najcw ladnolbäj

⁹ Dxejcti bahuiä lo xhidalduxh bejn, benguixhuj, nicla tej bejn digacdi gulabreni. Garen-garen ladx-bejn siäädreni, garen-garen najc lajdxreni, näj raz xtenreni, näj xtiidxreni. Suga'reni nez loj yagxhilo xten ni rnibee, näjza nez lojni ni najc Xiil xten Dios. Najcwreni ladnolbäj, ca'zarení zijn.

¹⁰ Dipduxh rniireni, räjpreni:

Dios ni rnibee lo yagxhilo, näjza nani najc Xiilre, baslaareni nuure lo xtojlnu.

¹¹ Suga'za guiraa rexangl Dios guideb gabi yagxhilo cadro rnibeeni, näjza guideb gabi rebengool näjza guidap remanga, dxejcti bazuxhijbreni, basajbreni lojreni nez lo Dios, ¹² räjpreni:

Sugacni si'c. Loj Xtiostisnu colye'tz sacduxhni;

colguiliä'p xpala'nni;

laatisni rajpni yäl'naj;

lojtisni colgudeed xquixhtios, laatisni colgan,

col'suxhijb lojni; laatisni rajpni yäl'rnibee näjza yäl'milagwr.

Sugacni si'c par tejpas.

¹³ Dxejc gunii te bengool loä, najni:

—Renani najcw reladnolbäjre, ¿chu najczeni? ¿Casiäädreni?

¹⁴ Dxejcti räpä lojni:

—Dad, anaj Guejblu.

Dxejc najni loä:

—Redee najc renani agudejd yäl'trabajwduxh, renani abia rextoljreni sa'csi xtiejn Xiil xten Dios agudijx xtojlni. ¹⁵ Ni'cni suga'reni nez loj yagxhilo xten Dios dxej-yääl cayujnreni xtzuanni neñ xquidooni. Ni'cni sacnäj nani sobga' lo yagxhilooga guiraa renani suga' nez lojni, sunäj'tisni laareni.

¹⁶ Dirureni guiliaan, niclaza jiojlreni, diza gubijdx guze'c lojreni, dizareni gacnanlaa. ¹⁷ Sa'csi nani najc Xiil xten Dios ni sobga' galäi loj yagxhilo xten Dios, laani cayajpnireni si'c xilbäz, sinänireni cadro yu' nisyä ni rudeed yäl'nabajn par tejpas. Suspijdz Dios nisbee balojreni, dirureni goon par tejpas.

8

Ni rajc gajdz seiiga

¹ Che batiäjsni ni rajc gajdz seiiga, gucdxi xhaguibaa si'cti med or. ² Dxejcti bahuiä loj guigajdz xangl Dios ni suga' nez loj Dios. Lojreni badeedreni gajdz trompe't. ³ Dxejctiru biääd stee angl, ca'ni te bacue ni najc ganax oor, bazujnini nez loj piändxan. Badeedreni lojni naclejn yaal te cachaagnini loj guiraa rextidx xpejn Dios ni rniireni che rbedx-rniabreni lo Dios, te checni lo piändxan ni najc ganax oor, ni yu' nez loj yagxhilooga. ⁴ Dxejcti gujxhga nägajc rextidx rexpejn Dios, birii ladsnaa xangl Dios ni ca' bacue, huä'preni nez loj Dios. ⁵ Dxejcti lagajc anglga cua'ni guiboo ni dzuub lo piändxanga, bachajni

bacue, dxejcti baslojnini lo guedxliuj. Dxejc guyu' te guziduxh, bidinyaduxh, gujca te xuduxh.

Retrompe't

⁶ Dxejcti guigajdz rexangl Dios ni ca' guigajdz retrompe't, guzusinreni te guisloj golreni retrompe'tga.

⁷ Che bil trompetganid, guixob naj guiboo nu'chreni rejn gusloj cayajbreni loj guedxliuj. Dxejcti huejc ni riojn la' guedxliuj, huejca ni riojn la' reyajg najza guiralii recuaan.

⁸ Che bil ni rojp xangl Dios trompe't ni ca'ni, ascanu yu' chu bacuaani biajb si'c te danro ni cayejc loj nisdoo. Dxejcti gujc ni riojn la' nisdoo si'c rejn.

⁹ Dxejcti gujt ni riojn la' rebajl naj guiraa reman ni yu' loj nisdoo. Gunitlojza ni riojn la' rebarcw ni sazaj lo nisdoo.

¹⁰ Che bil ni riojn xangl Dios trompe't ni ca'ni, biajb te balro xhaguibaa, cayejcni si'c te balguejd. Bitejbni loj ni riojn la' regueuu, najza cadro rliejn nis. ¹¹ Laj bajlga najc Ajenjo, ni saloj te cos ni nanladuxh. Ni riojn la' nis gujc nis nanladuxh. Dxejcti gujt xhidalduxh bejn xcuent nisanlaaga.

¹² Che bil ni rdajp xangl Dios trompe't ni ca'ni, guxhijn ni riojn la' gubijdx, najza ni riojn la' baai, najza ni riojn la' rebal xhaguibaa, bicajyreni. Dxejcti dirureni guzanij ni riojn la' dxej, naj ni riojn la' yaal.

¹³ Dxejcti bahuiä xhaguibaa, biejn diagä si'c te bisij cagutajt nez galäii xhaguibaa. Biejn diagä cabedxa'ni, caniini rediidxre:

—jAii! jAii! jAii! Riaduxhä reben guedxliuj che guisloj gol schon rexangl Dios retrompe't ni ca'reni. Sidejd reben guedxliuj trabajwduxhru.

9

¹ Che bil ni rgaii xangl Dios trompe't, bahuiä lo te bal xhaguibaa ni bitejb lo guedxliuji. Bajl xhaguibaaga cua'ni läii ni ruxhal ro' gabijl. ² Baxhaltini ro' gabijl, dxejc huäjs te gujxh ro'ni si'c räjs gujxh ro' te orguiboro. Dxejcti gujxhga basäuni loj gubijdx, gudxajni lo bej. ³ Dxejcti lo gujxhga birii betzsu gusujreni guideb lo guedxliuj. Cua'reni yälrnibee gacreni nialajz si'c nialajz renaxejb. ⁴ Cua' remanga yälrnibee na'c gunreni daan loj reguixa', loj recuaan, loj reyagbajn; rebejntis nani xhet beedi xten Dios caj lo cuajreni, reni'c gusacsireni. ⁵ Cua'reni yälrnibee na'c ju'tni bejn, gaii baai gusacsireni xcälñayanreni bejn. Luxh xcälñayanreni najc si'c yälñayan cadro rauya' te naxejb te bejn. ⁶ Neñ redxejga, siguiil rebejn yälgujt, luxh direni guidxälni. Luxh mase rlajzreni guetreni, sibicaj yälgujt lojreni.

⁷ Rebetsure najc si'c recabaii ni suchee te chääreni lo guer. Yejcreni yu' te ni najc si'c te coron oor; luxh lojreni rujn si'c loj rebejn. ⁸ Xquichejcreni si'c najc xquichejc gunaa; reläjyreni najc si'c läjy lion. ⁹ Luxh guideb tiejxhreni caj si'c guibi ni rusäudzu'tzreni. Rubeduxh rehxigaareni, si'c rubej che ruxun xhidalduxh cabaii naj xcarreni che agojl chääreni guer. ¹⁰ Xhibaanreni najc si'c xhibaan naxejb, xcuchreni yu' yälñayan te gusacsireni reben guedxliuj gaii baai. ¹¹ Yu'za ni rnibee lojreni, xangl bendxab ni birii gabijl. Xtidx hebreo laani Abadón, xtidx griegw, laani Apoliön.

¹² Naj agudejd tej casionroga, naj cayäädx stio'pni.

¹³ Che bil ni rxho'p xangl Dios trompe't, biejn diagä te xse' bejn ni lascanu siäädni galäii guidajp reca'ch ni caj loj xpiändxan ni nac-chee ganax oor, ni yu' nez loj Dios. ¹⁴ Luxh xse' bejnga canii loj ni najc rxho'p xangl Diosga, ni ca' trompe't:

—Baslaa guidap reangl nani caduu nez rogeueu ni laa Eufrates.

¹⁵ Dxejcti baslaani guidap reanglga te ju'treni ni riojn la' beñ guedxliuj. Luxh gule Dios reanglga parpac dxejga, bäiiga, iizga. ¹⁶ Biejn diagä bal najc guiraa resoldaad ni rbijb cabaii: najcreni tio'p gayuu miyon.

¹⁷ Scree bahuiä lo bacal recabaiiga näjza renani bijb recabaiiga. Lastoo reni bijb recabaii caj te guib, najcni xniaa näj zul näj gojtz. Dxejcru yejc recabaiiga najc si'c yejc te beedz. Ro'reni carii bajl näj gujxh, näj sufr. ¹⁸ Ni riojn cuua bejn gujt xcuent guichon replaag nani carii ro' recabaii, xcuent bajl näj gujxh, näjza sufr. ¹⁹ Recabaii runnäj daan ro'reni näjza xhibaanreni, sa'csi xhibaanreni najc si'c bäl, yu' yejcreni, näj ni'c runnäjreni daan.

²⁰ Luxh guiraa rebejn nani di replaagre nugu't, direni nusiejch lajzreni xcuent ni cayujn naareni, te rajnreni rebendxab, näjza rebanäjb ni nac-chee oor, näjza pla't, näjza latón, näjza guij, näjza yajg. Luxh rebanäjbga di gacdi fiireni, di diajgreni jiejn, di gacdi saren. ²¹ Diza rebejnga nusiejch lajzreni xcuent xcälrug'u'treni, xcälrujnreni yälbidxaa, xcälresnäjreni bejn ni di gac chäälni, niclaza xcälgubaanreni.

10

Te angl ni ca' te gujtz

¹ Bahuiä stee xangl Dios ni rajp yälrnibeduxh, siädjiäjtne xhaguibaa, li yu'ni neñ bäj, yejcti dejd xquitgubijdx, luxh lojni najc si'c gubijdx. Reni'ni najc si'c tio'p pilajr bajl. ² Ca'ni te librbäze', naxhal libre'ga. Bazujni ni'ni ladbee loj nisdoo, bazujni ni'ni ladbäjgw lo yuj, ³ dxejc guredxaduxh anglga si'c rbedxa' beedz. Dxejcru gunii guigajdz guzii sigajcsa. ⁴ Che gulujx gunii guziiga, narä rlazä nucuaä lo gujtz nani guniireni, per biejn diagä xse' tej ni gunii xhaguibaali, najni loä:

—Guluchedzu'tz reidiidxga nani gunii reguzii, na'c gucuaaluni.

⁵ Angl nani suj ni'ni loj nisdoo näjza loj yuj, guläs naani ladbee nez xhaguibaa. ⁶ Guniliini diidx con laj GuebDios ni nabajn par tejjpas, ni guläxtiej xhaguibaa näjza guiraa ni tre' xhaguibaa; ni guläxtiej guedxliujre näjza guiraa ni tre' lojni; ni guläxtiej nisdoo näjza guiraa ni tre' neñ nisdoo. Räjjni:

—Diru redxejre gaclaa. ⁷ Che guidzujntis dxej ni agojl gol ni najc rgajdz xangl Dios ni ca' trompe't, dxejc abaza' rextidxxhiga'tz Dios, si'c ni basule' redade' ni gunii xtidx Dios agujc xchero.

⁸ Dxejc gunisac xse' nani gunii xhaguibaali, stehuält biejn diagä caniini loä, najni:

—Huij, te xca'lu libre' ni naxhal ni yu' ladznäa angl ni suj te laad ni'ni loj nisdoo, stelaad ni'ni lo guedxliuj.

⁹ Dxejcti hua'ä lo anglga, räpä lojni:

—Guniidxlu libre'ga.

Laani najni loä:

—Anire, cua'ni, gudajwni. Sun nanlaani xque'lu, niluxh ro'lu sajcti nejxh si'c dzujn.

¹⁰ Dxejcti cua'ä libre'ga lo naa anglga, dxejc gudauäni. Ro'ä guyu'ni nejxh si'c dzujn, luxh che gudämäni, lacti guc nanlaani xque'ä. ¹¹ Dxejc najni loä:

—Nanab chasulesaclu xtidx Dios xcuent nani churu gac loj xhidalduxh bejn, näjza guejdx, näjza renani rni garen-garen xtiidxreni, näjza loj rereii.

11

Tio'p niguii ni rusule' xtidx Dios

¹ Dxejcti baniidxni loä si'c te biquii nani rurejxh. Dxejc guyu' chu naj loä: —Huisu te charejxhlu xquidoo Dios, näjza piändxan, balabza balti bejn rusuxhijb nenga. ² Na'c gutiexhlu gabi lole' guidooga, sa'csi ni'c acua' rebenzijnti te tiubutio'p bäii chaläjsreni guedxdxan si'ctis ni rlanjreni. ³ Narä sudedä yälrnibee lo tio'p dade' ni guinii diidx xcuentä, luxh guideb najcwreni ladyas, susule'reni xtidxä lojreni te mił tio'pgayuu gayojn dxej.

⁴ Guiro'preni najc si'c tio'p yag oliib, si'c tio'p gandilieer ni suga' nez lo Dios. ⁵ Palga yu' chu bejn rlanj gun latsiaj loj redade'ga, sirii bajl ro'reni te chec nani rdxe'ch lojreni. Luxh si'cpac riäjł guet chutis ni rlanj gun latsiajreni. ⁶ Guiro'p redade'ga rajp yälrnibee te gusäureni xhaguibaa te na'c jiajb nisguij guideb neñ redxej nani cagusule'reni xtidx Dios, rajpzareni yälrnibee te guchaareni nis te gacni rejn, rajpzareni yälrnibee te jiädgusacsi xhitis plaag lo guedxliuj, si'ctis huält ni rlanjreni. ⁷ Che luux gusule'reni xtidx Dios, dxejcti ni najc si'c te man nialajz sirii gabijł te jiädchagdijłni guiro'preni. Sujnni gaanreni, sugu'tnirenı. ⁸ Dxejcti jia'n guiro'p rebengutga lad caii xten guejdx cadro bacuaareni Dad Jesucrist lo cruzj. Guejdxroga rbälajzareni Sodoma näjza Egipto. ⁹ Chon dxej garol guiraa rebejn ni siäd guedxbäz, ni siäd guedxro, ni najc garen-garen raz, ni rniı garen-garen xtidx guiraa rebejn guedxliuj, suhuıi loj guiro'p rebengutga, direni gusaan guiga'tzreni neñ baa. ¹⁰ Guiraa renani nabajł lo guedxliujre sibalazduxhreni sa'csi gujtreni. Luxh sa'csi rbalajzduxhreni, suxhalzareni xhi xca' sa'reni; sa'csi guiro'p redade' ni basule' xtidx Dios baxhal trabajwduxh lojreni. ¹¹ Che guejdx chon dxej garolga, baspansac Diosreni, dxejcti huitiesacreni. Guiraa reni bahuii lojreni, bidxebduxhreni. ¹² Dxejcti biejn diajg guiro'preni xse' te ni canii dipduxh desde xhaguibaali, räjpni lojreni:

—Colchä'p jiaare.

Dxejcti huä'preni xhaguibaa lo te za, luxh guiraa renani rdxe'ch lojreni, bahuiireni huä'preni xhaguibaa. ¹³ Lagajc orga gujc te xuduxh, gurebä'n tej lo tzuu la' guejdxga, gujt gajdz mił bejn lo xu ni gujc ro'c. Rebejn ni bia'n ro'c bidxebduxhreni, guslojreni calä'preni xpala'n Dios ni yu' xhaguibaa.

¹⁴ Si'cti gulujx ni rojp casioon, luxh agojł guidzujn ni riojnga.

Ni rajc gajdz xangl Dios goł trompe't

¹⁵ Che bil ni rajc gajdz xangl Dios trompe't ni ca'ni, dxejc biejn xse' reni dipduxh canii xhaguibaa, cayäjpreni:

Xcälrnibee guedxliuj agudejd ladznaa Dad Dios näjza Jesucrist; luxh laani sinibeeni par tejpas.

¹⁶ Galbitajp rebengool nani sobga' lo tron xtenreni cadro rnibee Dios, biabrolojreni nez loj Dios te calä'preni xpala'n Dios. ¹⁷ Räjpreni:

Xquixtioste Guejblu Dios, nani rajp yälrnibeduxh, nani najclu, nani gujclu, nani churu gac, sa'csi acua'lu xcälrnibeduxhlu te agusloj canibeelu.

¹⁸ Bidxe'ch reben guedxliuj lojlu, luxh abidzujn dxej guidxe'chlu lojreni, gunlu yälğuxhtis rebengut, te gudeedlu cossa'c loj rexpeljnu, lo renani gunii xtidx Dios, lo renani huililajz xtiidxlu, lo renani rusuxhijbni nez lojlu;

rebenproob sigajc rebenro.

Abidzujnza dxej che cuäcajlu renani bejn daan guedxliujre, te nitlojreni par tejpas.

¹⁹ Dxejc bixal xquidoo Dios ni yu' xhaguibaa, neŋ guidooga bien te guijn cadro yu' guij cadro caj rediidx ni bia'n Dios loj rexpejn Israel. Dxejcti lacti bidinya', lacti guiniiza reguziro, gujc te xu, dxejc biajb te guixobroduxh.

12

Te gunaa näj te ni najc si'c te gutiatzro

¹ Dxejcti guyu' te senro xhaguibaa: te gunaa ni najcw si'c gubijdx, ni'ni sojb bäii, yejcnj yu' te coron ni nac-chee tzubitio'p balxhaguibaa. ² Gunaare nuxi'nni. Rbedxa'ni sa'csi agusloj cayu' yoob xque'ni te gaal xi'nni, cadejdni trabajwduxh. ³ Dxejcti bahuiä stee seen xhaguibaa: te manxniaa ni rujn lojni si'c loj te gutiatzro, manduxhni. Yu' gajdz bitiuvejcnj, sojb tzuu xca'chni. Tejga yejcnj yu' te coron, najcreni gajdz coron. ⁴ Dxejcti xhibaanni cagobxajxhni ni riojn la' rebalxhaguibaa, dxejcti bacuaanireni lo guedxliuj. Dxejcti biädsu manroga nez loj gunaaga ni ameer gaal xi'nni, te gauni xi'nni che gaalni. ⁵ Dxejcti gojl xi'n gunaaga, najcni te niguii, luxh te bar guuib nungäj'l guinibenäj'ni lo guiraa reben guedxliuj. Guläsgajcreni bázga te sanärenini xhaguibaa cadro rnibee Dios. ⁶ Dxejcti baxun gunaaga, siini nez loj reyubijdz cadro yu' te lajt ni basuchee Dios te cuääzni, te ro'c guyaannini te mi'l tio'p gayuu gayojn dxej.

⁷ Dxejc guyu' guer xhaguibaa, xangl Dios nani laa Miguejl näj resa'ni bacuanäj'reni gutiatzro. Gutiatzroga näjza rexangl'ni gudil'duxh'reni, ⁸ niluxh direni niujn gaan, luxh di niajcdiru nia'n manga näjza resa'ni xhaguibaa. ⁹ Dxejcti bacuaareni manroga näjza resa'ni lo guedxliuj're. Laani najc ni gujc bäl galoroga, ni najc gueb Beñdxab, ni laaza Satanás, ni rusguee guideb guedxliuj're.

¹⁰ Dxejcti biejn diagä xse' te ni canii dipduxh xhaguibaali, räjpni:

—Abidzujn yäl'ruslaa lo dojl, näj yäl'milagwr, näj yäl'rnibero xten Dios, näjza yäl'rnibee xten Jesucrist, sa'csi agulää'reni bejn nani entis rbe'c xquej rexpejn Dios loj Dios dxej-yääl. ¹¹ Laareni gujc bejn'reni gaan loj beñdxabre, xcuent xtejn ni najc Xiil xten Dios, näjza sa'csi huililazsa'creni xtidx Dios, dizareni nidxejb mase niejtzareni. ¹² Ni'cni, guiraa la'tu ni yu' xhaguibaa näjza gueb xhaguibaa, col'quibalazduxh. Niluxh riaduxhnu renani rbäjz lo guedxliuj're, näjza lo nisdoo, sa'csi abiäjt beñdxab lo guedxliuj, luxh cadxechduxhni sa'csi anaj'ni guxii dxej räjpni.

¹³ Che guchee gutiatzroga abacuaarenini lo guedxliuj, birinaj'ni gunaa nani guyu' xi'ngaanni te gusacs'ini. ¹⁴ Dxejc badeed Dios lo gunaaga tio'p xhiga xten bisiro, te gac gutajtni nez lo reyubijdz cadro nac-chee cadro cuääzni. Chon ijz garol guyu'ni ro'c, nacuatzlojni lo bälga. ¹⁵ Dxejcti ro' gutiatzrore birii nis si'c te gueuu te nuslo'ni gunaaga. ¹⁶ Dxejc gucnäj guedxliuj gunaaga, baxhal guedxliuj ro'ni, gu'ni gueuu ni birii ro' gutiatzroga. ¹⁷ Dxejc bidxechduxh gutiatzroga loj gunaaga, ni'c sääni te gucuanäj'ni sgaii rex'i'n gunaaga, renani cagusoob diidx ni gunibee Dios, renani rililajzxa xtidx Jesucrist.

13

Tio'p manduxh

¹ Narä gusuä lo yujxh ni tre' ro' nisdoo, dxejc bahuiä carii te manro lo nisdoo. Sojb tzuu xca'chni. Dxejc lo tejga xca'chni yu' te coron. Yu' gajdz bitiuvejcnj cadro caj diidx ni rniyaj Dios. ² Manduxhre najc si'c te beedz, ni'ni najc si'c ni' te os, luxh ro'ni najc si'c ro' te bedzro. Gutiatzroga badeed

xcälmlaagwrni lojni, näjza tron cadro rbejni, näjza xcälrnibeduxhni. ³ Dxejcti bahuiä te yejcti najc ascanu yu' chu batiuugni con madxed, ameer guetni, luxh biajc cadro gurujg yejcti. Ni'cni rdxeloduxh guiralii rebejn guedxliuj, sanajlreni manduxhga. ⁴ Bazuxhijbreni gojnreni gutiatzroga sa'csi badeedni xcälrnibeeni lo manduxhga, dxejctiru bazuxhijbreni gojnzareni manroga, räjpreni:

—¿Chu stee najc si'c manrore, ä? ¿Chu laa ni gac guichagdijlñi, gucuanäjñini?

⁵ Yu' chu badeedza lo manroga diidx dxejcti gusloj caniini guiraloj didx-guyalajz, diidx ni rniyaj Dios. Yu'za chu badeed ga'pni yälrnibee tiubitio'p bäii, gunni si'ttis ni rlajzni. ⁶ Baxhalni ro'ni, guniyaduxhni Dios, guniyajni laj Dios, näjza xquidoo Dios, nalajznu renani yu' xhaguibaa. ⁷ Dxejcti yu' chu basaan bacuanäj manroga rexpejn Dios. Bejn manroga gaan rexpejn Dios, dxejcti gunibee manroga guiraa reguedxbáz, näj guiraa rebejn ni rñii garen-garen xtiidxreni, näjza guiraa reguedxroduxh. ⁸ Dxejcti guiraa reben guedxliuj sazuxhijbreni, sagajñreni manroga, guiraa rebejn nani di lajreni nicaj lo libr xten yälñabajñ xten Xiil nani gujt xcuentreni, sa'csi galooli guirixtiej guedxliuj cuaj lo guijtze laj guiraa ni gac xpejn Dios.

⁹ Palga yu' chu rlajz cuadiajñi, sugucuadiagsa'cni. ¹⁰ Palga yu' chu nungäjñ jiauu nen latzguib, siäuupacni. Chutis ni ju'te bejn con te madxed, con madxedza guetni. Ni'cni renani anumbee Dios, riäjñ gunreni huant, chanuutis chalilazsa'ceni xtidx Dios.

¹¹ Dxejcti bahuiä loj stee manro, cariini nen yuj. Sojb tio'p xca'chni si'c xca'ch te xiil, rniini si'c rñii te gutiatz. ¹² Luxh rnibeezani si'cni rnibee manroga lagajc nez loj manroga, rujnzani rusuxhijb reben guedxliuj loj manrogalooga ni gurujc yejcti, luxh biajc yejcti. ¹³ Manroga ni birii nen yuj rujnzani remilagwrro, rujñni rtejb bal-guiboo xhaguibaali, rtejbni lo guedxliuj nez loj rebejn. ¹⁴ Rusgueeni rebejn nani nabajn lo guedxliuj xcuent remilagwrro nani rujñni nez loj manrogalooga. Guinibeeni gun reben guedxliuj te banäjñ si'c najc manroga nani batiuug madxed yejcti, luxh biajcza yejcti. ¹⁵ Dxejcti man ni rojppa baspajn banäjñbga te guinii banäjñbga, dxejcti gunibeeni guet guiraa rebejn nani di guzuxhijb lojni te ganreni. ¹⁶ Gunibeezani chu bejn te seen lo cuajni o ñaani ladbee, guiraa rebejn ni xhet rajpdi, guiraa rebejn ni rajp, guiraa reni najc mos, guiraa reni najc lam, guiraa reni najc benro, guiraa reni najcza benbáz. ¹⁷ Gunibeezani digacdi si, digacdiza guto' bejn palga xhet seendi caj ñaani o lo cuajni. Seenga najc laj manga o numbr xten laj manga. ¹⁸ Dee rquiin yälñajn. Renani rajp yälñajn sugulabreni xseen manga, numbrga najc si'c xnumbr bejn; numbr xten manga najc xho'p gayuu gayonbixho'p.

14

Dij ni roļ te gayuu tiubitajp miļ

¹ Che bahuiä stee, bahuiä suga' Xiil xten Dios yejc dajn ni laa Siön. Sugañajni te gayuu tiubitajp miļ bejn nani caj lo cuajreni laj Xiil näj laj Xtdani. ² Biejn diagä rubej xhaguibaali, rubeduxh, riejnñi si'c rubej xhidajñ gueuro, näj te guziro; riejnznani si'cni riejn che cayol xhidajñ bejn ni roļ arp. ³ Cayolreni te dicoob nez loj tron cadro rbejn nani rnibee, näjza nez loj guidap reni najc si'c man ni nabajñpac, näjza nez loj rebengool. Rutliidi gujc bisieeddi dijga, xtebtis tegayuu tiubitajp miļ bejn nani guļaa lo reben guedxliuj. ⁴ Reniguiire najc renani gajd xhiñ con gunaa; nicla tejreni di niesñaj te gunaa, najceni

beñ dxan. Laareni rinajlreni Xiil xten Dios cadrotis sääni. Redee guḷaa lo rebeñ guedxliuj si'c te gojn lo Dios näjza lo Xiil xten Dios. Gojnre najc si'c gonganid ni rudeed beñ xten te cose'ch. ⁵ Nicla tej didx-xhii di guirri ro'reni, sa'csi xhetliidi xtojreni, nayareni suga'reni nez loj tron cadro rnibee Dios.

Rediidx nani bazule' jion rexangl Dios

⁶ Dxejcti bahuiä loj stee xangl Dios, rutajtni nez galäii xhaguibaa, siädnäni diidx ni najc par tejpas xten Dios te gusule'nini loj rebeñ guedxliuj, guiraa lo reguedxro, guiraa lo reguedxbäz, loj reben ni najc garen-garen raz, nani rñii garen-garen xtiidreni. ⁷ Dipduxh guniini, räjpni:

—Colguidxejb Dios, colguiliä'p xpala'n Dios sa'csi abidzujñ or gunni yälguxhtis guiraa rebejñ. Colguzuxhijb loj nani benchee xhaguibaa, näjza guedxliuj, näjza nisdoo, näjza cadro rliejn nis.

⁸ Dxejcti siädnajl stee angl nani canii:

—Abiajb, abiajb guejdxroga nani laa Babilonia, sa'csi baquiiłni guzojz guiraa reguejdx xten guedxliuj xcuent xcäl-latsiajni, xcuent dojl ni bejnñi guideb lagaa; najcni si'c reni rä' nejp.

⁹ Dxejc biädnajl ni riojn xangl Dios, dipduxh guniini, Räjpni:

—Palga yu' chu beñ guzuxhijb loj manroga o loj banäjb ni najc si'c manroga, o xcäjbni xca'ni xseen manro lo cuajni o lo ñaani, ¹⁰ sidxechduxh Dios lojni, di xcälguxhtisduxh Dios tedcaj lojni. Sidejdpacni trabajwduxh neñ balro näjza azufr nez loj rexangl Dios näjza nez loj Xiil xten Dios. ¹¹ Luxh gujxh xten reni cayejc sä'p nez lojreni guixe-guixee par tejpas. Digacdi gusilajzreni dxej-yääl, renani guzuxhijb, reni gojn manroga näjza reni gojn banäjb ni najc si'c manroga, chutisza ni rca' seen xten lajni. ¹² Ni'cni renani huililajz xtidx Dios, reni rusoobza xtidx Dios, ni rinuutis lo xnezyuj Jesucrist, nanab di guidxajreni.

¹³ Biejn diagä xse' te ni caniini loä xhaguibaali:

—Scree bacuaa: “Chicbaa rebejñ ni guet najli nani rililajz xtidx Jesucrist.” “Guliini”, naj Sprit Dxan xten Dios: “Te gusilajzreni, na'cru gunreni dzuun, sa'csi anancheenu xhi dzuun bejnreni.”

Yälñasa'c ni rudeed guedxliujre

¹⁴ Dxejcti bahuiä tre' te bänol, loj bänolga sobga' te ni najc si'c Xi'n Dios ni gujc Niguui. Yu' te coron ganaxduj oor yejcnı, dxejcti ñaani ca'ni te guiboz ni caduxh ro'ni. ¹⁵ Dxejcti birii te xangl Dios loj xquidoo Dios, dipduxh caniini loj ni sobga' loj bäjga, räjpni:

—Basäl xquibozlu, batiuug, te batie' yälñasa'c, sa'csi agojl or guire' yälñasa'c, guideb guedxliuj aguyajłni.

¹⁶ Dxejcti nani sobga' lo bäjga basniibni xquibozni, batiuugni yälñasa'c ni caj lo guedxliujre.

¹⁷ Dxejcti stee xangl Dios birii neñ guidoo ni yu' xhaguibaa, ca'zani te guiboz ni caduxh ro'ni. ¹⁸ Dxejcti birii stee xangl Dios nez loj piändxan xten Dios. Laani rajpni yälñnibee lo balro. Dipduxh guniini, räjpni loj ni ca' guiboz ni caduxh ro'ni, räjpni:

—Basäl xquibozlu nez ni' reyaguub, batiuug guiraa reresim uub ni yu' lo guedxliujre, sa'csi aguyajłni.

¹⁹ Dxejc batiuug angla guiraa reresim uub ni yu' lo guedxliujre nalajznu rebeñgujdx, basälñireni neñ tanc cadro guläjreni yejcnı sa'csi rdxechduxh Dios lojreni. ²⁰ Dxejcti baläjreni yejc reuub nez orii te guejdx. Biriiduxh rejn yejcreni, gutiäs rejnga, bidzujñ rejnga ro'li recabaii, gujcnı si'c che riu'

nisro gueuu, biäjtni si'cti choṅ gayuu mil metr guideb gabi cadro baläjreni yejc reuub.

15

Guigajdz xangl Dios näj lult xcälguختis Dios

¹ Dxejcti bahuiä stee senro xhaguibaa, nani bascheloduxh narä. Bahuiä loj gajdz xangl Dios, tejegareni ca' te plaag ni gusacsı reben guedxliuj. Redetis najc lult, sa'csi che ted redee ati agulujx yälrdxe'ch xten Dios.

² Dxejcti bahuiä loj tej ni najc si'c te nisdoo ni najc si'c biidr nu'chni bajl. Dxejcti galäii nisdooğa suga' renani bejn gaan loj manroğa näjza lo banäjb ni najc si'c manroğa, ni bejnza gaan di nica'reni seen xten lajni. Ca'reni arp xten Dios. ³ Cayol'reni dij xten to Moisés ni gujc xpejn Dios, cayolz'reni dij xten Xiil xten Dios. Scree najc dijga: Sacduxh, ruscheloy guiraa redzuun ni rujn Guejblu, Dad Dios, ni rajp guiraa yälrnibee.

Rujn Guejblu ganax dzunsa'c, rnii Guejblu ganax didxlii. Guejblu rnibee loj guiraliı reguejdx ni yu' lo guedxliuj.

⁴ Bahuii, Dad, çchu laa ni di guidxejb Guejblu ni di guiliä'p xpala'n Guejblu? Sa'csi Guejbtislu najc dxan, ni'cni guiraa reguejdx ni yu' guedxliuj siädzuxhijbreni,

siädgajñreni Guejblu,

sa'csi abaluıloj guiraa rextzunsa'cpac Guejblu.

⁵ Dxejcti bahuiä xhaguibaa, bixal ro' yu' ni najc dxanro neṅ guidoo, cadro yuchee guij cadro caj xleii to Moisés. ⁶ Ro' yudxanroğa birii gajdz xangl Dios ni ca' plaag te gusacsı'reni reben guedxliuj. Najcwreni te ladlin ni najc nolbäj, ni rdimbichaduxh. Dejd si'c te cinturon lastooreni ni najc ganaxduj oor.

⁷ Dxejcti yu' tajp reni najc si'c man nabajñ ni yu' nez loj Dios xhaguibaa. Tej reni badeed loj tejga reangla te co'p ni najc ganaxduj oor. Guidxa tejga rexhijğa xcälguختisro Dios nani nabajñ par tejpas. ⁸ Gudxaj guidoo ni najc yudxanroruga gujxh ni siädä xcuent xcäl'milaagwr, xcälrdimbichaduxh xten Dios. Rut gujcdi biu' neṅ yudxanroruga che gulujxli guiraa replaag ni ca' guigajdz reangla.

16

Rexhij ni guidxa xcälguختis Dios

¹ Dxejcti bejn diagä xse' te ni canii dipduxh xquidoolini, caniini loj guigajdz rexangl Dios, räjpni:

—Cołchäj, cołchasloj guigajdz rexhijğa lo guedxliuj, cołca' rexhij ni guidxa xcälguختis Dios.

² Angl galoo ni huij, baslojni ni yu' neṅ xhij ni ca'ni lo guedxliuj. Dxejc loj guiraa rebejn nani caj xseen manduxh, reni rusuxhijb, rajñreni banäjb ni najc si'c manroğa, birii tiejxhni te guedxyanduxh ni najc si'c cancer.

³ Dxejc ni rojp anglğa baslojni ni yu' neṅ xhij ni ca'ni loj nisdoo, te bejn ni gubixhloj nisdooğa gujcnı si'c rejn xten te beṅgut. Dxejcti gujt guiraliı reman ni yu' lo nisdoo.

⁴ Ni riojn anglğa baslojni ni yu' neṅ xhij ni ca'ni loj regueuu näjza cadro rliejn nis. Gubixhlojreni gujcreni rejn. ⁵ Dxejcti bejn diagä gunii angl ni rajp yälrnibee lo nis räjpni:

—Huenduxh najc Guejblu Dad ni najc naj sigajc gujc Guejblu galoo, dxan-duxh najc Guejblu sa'csi cayujñ Guejblu yälguختis redzunguijdx. ⁶ Sa'csi

laareni baxhe'reni rejn, bagu'treni rexpejn lu näjza renani gunii xtiidxlu, luxh naj badeed Guejblu rejn cayä'reni. Si'cpac nungäj] gacreni.

⁷ Dxejcti biejn diagä canii steeni lagajc lo piändxan, räjpni:

—Guliipacni Dad Dios ni rajp guiralii yälrnibee, xcäl]guxhtis Guejblu najc laaca, si'c riäj] gacni.

⁸ Dxejcti ni rdajp anglga cua' xhijg ni ca'ni, baslojni ni yu' nen xhijgga lo gubijdx, te badeedni lo gubijdx yälrnibee guze'cnäjni rebejn guiboo.

⁹ Guiraliireni gusloj cayejcreni, lacti nanladuxh, dxejc gusloj caniyajreni Dios ni rajp yälrnibee loj recosga. Niluxh direni nusiechljazreni, niclaza niliä'preni xpala'n Dios.

¹⁰ Dxejcti ni rajc rgaij anglga cua' xhijg ni ca'ni baslojni ni yu' nen xhijgga lo tron cadro rnibee manroduxh. Bicäjy guideb cadro rnibee manduxhga, luxh rebejn rauya'tisreni lujdxreni sa'csi cayajcreni yäl]nayanduxh. ¹¹ Guniyajreni Guejb Dios ni yu' xhaguibaa sa'csi rajcreni yäl]nayanduxh, xcuentza rexquedx-nayanreni. Luxh direni nusiechljazreni xcuent xtoj]reni.

¹² Dxejcti ni rajc xho'p anglga cua'ni xhijgni, baslojni ni yu' nen xhijgga loj gueuro ni laa Eufrates. Gueuga gubidzlii nisni te guc-chee te nezyuj xten rereii ni jääd nez cadro rliejn gubijdx.

¹³ Bahuiäza birii ro' gutiatzro, näjza ro' manro, näjza ro' ni najc profet' ni rusguee, birii choñ spritgujdx ni najc si'c bedz, ¹⁴ sa'csi najcreni respit xten bendxab, rujnreni milagw, senro. Rijreni loj guiraa rereii loj guedxliuj te gutie'reni guiraa bejn loj guedxliuj te gac guerroduxh, te gucuanäjreni Gueb Dios ni rajp guiralii yälrnibee che guidzujjni lo guedxliuj. ¹⁵ “Narä siädxhiga'tzä si'c riääd te gubaan. Chicbaaza renani cabäjz, cagutie'chreni bacal lojni che guibi'ä si'c rujn nani najcw guiraa xhajbni, te na'c guiga'ni xhabäälni, jianxtujyni che guibi'ä.” ¹⁶ Dxejc gutie'reni guiraa rebejnre te lajt ni laa lo didx hebre “Armagedón”.

¹⁷ Dxejcti ni najc rgajdz anglga cua'ni xhijgni baslojni ni yu' nen xhijgni loj bej. Dxejcti biejn xse' te ni gunii dipduxh xquidooli Dios xhaguibaali cadro yu' tron cadro rnibee Dios, räjpni:

—Agujcni, agulujxhni.

¹⁸ Dxejc guyuduxh yälrdinya' näj guziro. Gujcza te xuroduxh lo guedxliuj, te xu sa' ni gajdpac gac. ¹⁹ Che gujc xuroga, biräjs guedxroduxhga, gujcti choñ la, dxejcti gurebä'n guiraa reguejdx guideb guedxliujre. Dxejc banaj lajz Dios guedxro ni laa Babilonia, bialoj bejn Dios yäl]guxhtis guedxga. ²⁰ Li gubicaj, gunitloj reyuj ni tre' lo nisdoo, gunitlojza redajn. ²¹ Xhaguibaali bialb te guixhobro yejc rebejn; tejga guixhobga na' si'cti tiuu kil. Guniyaj rebejn Dios xcuent guixhobroga, sa'csi cuentroduxh gujcti.

17

Gun Dios yäl]guxhtis te gunadxab

¹ Lo regajdz anglga ni ca' gajdz xhijg birii tej ni gunii loä, najni:

—Gudaa ree te guluiä lojlu retrabajwduxh ni ted gunadxabre ni sobga' cadro yu sijn nis. ² Guiraa rereii lo guedxliujre bennäjreni gunaaga dojl, sigajca guiraa reben guedxliuj bennäjreni gunaaga dojl. Gusosnäjreni gunaaga bejnreni si'ctis ni rljazreni.

³ Dxejcti huinäni narä si'c lo te bacal nez lo reyubijdz. Bahuiä loj te gunaa, bijbni dejtz te manro ni najc xniala, luxh guidebni caj diidx ni rniyaj Dios. Gajdz najc bitiyuejcti, sojbza tzuu xca'chni. ⁴ Gunaaga najcw te lad moraad con xniala, sucheduxh gunaaga oor, näj reguisa'c, näj perl ni sa'cduxh. Ca'ni

te copro ni najc ganaxduj oor ni guidxa ganax recosguijdx, recosdxab ni bennäjni reben guedxliuj. ⁵ Caj te diidx lo cuajni, luxh rut racbeedi xhi sälojni. Scree nrii diidxga: “Babilonro, xnan regunadxab, xnan recosdxab ni rajc lo guedxliuj.” ⁶ Bahuiä agusojz gunadxabga. Agusosnäjni xtiejn rexpejn Dios nani bagu'tni, näj xtiejn renani basule' xtidx Jesucrist ni bagu'tzani. Che bahuiä lojni, bixeloduxhä. ⁷ Dxejcti gunii anglga loä, najni:

—¿Xhicuent rdxelojlu, ä? Narä siniä xhi säloj gunadxabga, näjza manroga ni sojb gajdz bitiuvejcti näj tzuu xca'chni. ⁸ Manroga ni bahuiilu gubajni galoo, niluxh agunitlojni naj, luxh agojl guiriini gabijl, dxejcti sinitlojni stee, sejtni par tejpas. Rebejn ni nabajn lo guedxliuj nani di lajreni nicaj lo guijtz xten yäl'nabajn xten Dios, guijtz ni guc-chee che birixtiejli guedxliuj, rebejnğa sixeloduxhrene che fireni loj manroga nani gubajn galoo, ni gunitloj, niluxh naj agubansacni.

⁹ 'Ree nanab ga'pni yäl'najn. Gajdz rebitiujejcti säloj gajdz dajn cadro sobga' gunaaga, ¹⁰ sälojzareni gajdz reii. Agujc gaii reiiga ni cayajb. Tej reieiiga canibee naj. Stee reiiga churu jääd. Luxh che jääd lult reiiga, guxii dxej guinibeeni. ¹¹ Manro ni gubajn galoo, ni agunitloj naj, ni'c rac xhujn reii, najczani tej loj guigajdz reiei, luxh sinitlojni, sejtni par tejpas.

¹² 'Guidzoo rexca'chni ni bahuiilu säloj tzuu reii. Gajdreni guisloj guinibee naj. Laareni näjza manroga xca'reni yäl'rnibee teb or, nalajznu guxii dxej. ¹³ Tejtis xhigab gun reieiiga, gudeedreni xcäl'nadipreni, xcäl'rnibeereni lo manroga. ¹⁴ Laa redee ni sucuanäj Xiil xten Dios. Dxejcti sujn Xiilga gaan lojreni sa'csi laani najcni Dad ni rnibee loj guiraa redad, najcni Reii ni rnibee lo guiraa reiei. Luxh renani siädnajni najc reni agurejdxni, reni aguleni, sisiudzu'tznäjreneni.

¹⁵ Dxejcti najza anglga loä:

—Reni ni bahuiilu cadro sobga' gunadxabga säloj guiraa guejdx, guiraa beñ guedxliuj, guiraa bejn ni rni garen-garenca xtiidxreni, ni siäd garen-garen reguejdx. ¹⁶ Guitzoo reca'chga näjza manroga ni bahuiilu, sidxe'chreni loj gunadxabga, suro'nreni gunadxabga, susa'nreni gunadxabga xhabäälni, sajwreni bältiejxhni, suze'reni gunadxabga lo guiboo. ¹⁷ Sa'csi abasniib Diosreni te gunreni tejsi xhigab, te gudeedreni xcäl'rnibeereni lo manroga che guidzujni dxej ni chale' guira'ti ni gunii Dios gac. ¹⁸ Gunadxabga ni bahuiilu säloj guedxro ni rnibee loj guiraa reiei loj guedxliuj.

18

Xho jiajb guedx Babilonia

¹ Dxejcti bahuiä loj stee xangl Dios ni siädyajt xhaguibaa. Siädnäni yäl'rnibeduxh, xcäl'rindibicha'ni bazanij loj guedxliujre. ² Dxejcti dipduxh gunii anglga, guredxa'ni:

—Abiajb, abiajb guedx Babilonia, agubixhlojni, naj najcni guejdx cadro rbäjz rebendxab, ro'c rcanzaj guirali cuaa spritdxab, najczani xptiääz guiraa reman xhaguibaa ni najc mandxab, mandxuudx. ³ Sa'csi guiraa reben guedxliuj agusojzreni xcent dojl ni bennäjreni gunadxabga, guiraa reiei loj guedxliuj bejn dojl gulänäjreni gunadxabga, luxh guiraa reben guedxliuj ni ruto' abejnreni ganduxh, agujceni ri'cw xcent recosdxab ni rujn gunabdxabga.

⁴ Dxejcti biejn diagä xse' stee nani canii xhaguibaa:

—Colguirri guejdxga rexpənä, te di näj la'tu gunnäjtu gunadxabga dojl, te di tedtu trabawduxh lo replaag xtenni. ⁵ Sa'csi yuduxh rextoljni, abidzujñreni xhaguibaali, luxh abanajza lajz Dios rextoljni. ⁶ Colgudeed loj gunaaga sigajc ni badeedni lojreni. Colquijx loj gunaaga tio'pli huält lo ni bejnni laani. Nen co'p cadre badeedni gu' bejn (te trabajw ni bateedni bejn), lagajc nenga colyejn te ni najc tio'p huält maazru fuert yä gunadxabga, nalajznu tedni trabajw tio'p huält. ⁷ Lacti gulä'p gunaaga xpala'nni, gubajñni si'ctis ni rlajzni lo guedxliuj. Naj colguteed gunaaga trabajw, si'cti mediid ni gulä'pni xpala'nni; si'cti mediidza ni bibalaznäjni mood ni gubajñni, sigajcza gac-huin lastooni sa'csi bejnni xhigab nen lastooni: “Narä sobga'ä ree si'c te rein, te benroduxh, dina gacä biuud, niclaza gac-huin lazä.” ⁸ Ni'cni tejsi dxej sijab yejçni guiraa replaag xten Dios: yälgujt, yälhuin lajz, näj yälrliaan, luxh sejczani lo balguiboo, sa'csi rnibeduxh Dad Dios ni gun xcälguxhtisni.

⁹ Guiraa rejei lo guedxliujre ni bennäj gunaadxabga cosguijdx, reni cuansanäjnini, sonduxhreni, siaduxhreni che fiireni gujxh ni carii cadre cayejçni. ¹⁰ Zijtru sisiujreni sa'csi rdxejbreni replaag xten gunadxabga, dxejç siniizaren:

—Aii, aii, riaduxhnu guedxrore, Babilonia, guedxdipduxh gujçlu, luxh chela gucbeenu, ala bidzujñ yälguxhtis yejçlu.

¹¹ Rebejn ni ruto' loj guedxliuj sonduxhreni, siareni guejdxga sa'csi rutru rsiidi xhixtenreni ni ruto'reni. ¹² Laareni ruto'reni oor, pla't, guiraloj reguisa'c, perl, ladlin, ladmuraad, ladseed, näjza guiraloj baräjd yagdo, näj guiraloj cos saru, ni nacchee läi elefant, näj cos saru ni nacchee bronz, näj guuib, näj márm, ¹³ näjza caneel, guiraloj laj comiid, näjza yalnejxh, näj perfum, näjza yaal, näjza bin, näjza se't oliib, näjza arinsa'c, näjza triuu, näjza gon, näjza rexii, näjza cabaii, näjza gare't, näjza bejn ni ruto'reni tiejxhreni, xaimreni. Guiraa reni'c ruto'reni. ¹⁴ Dxejç guniiza xse' ni canii xhaguibaali, najni:

—Ninexhsa'c ni rlazduxhlu, agunitloj. Guiraa recossa'c, recossaruduxh agubicajreni lojtu, luxh di gacdiru guidxäl bejn reni'c.

¹⁵ Reni ruto' guiraloj recosga, nani gujçreni ri'cw xcuent guedxroga, zijtru sisiujreni sa'csi rdxejbreni trabajw ni cadeed guejdxga, sonduxhreni, sac-huinduxh lajzreni, ¹⁶ säjbreni:

—Aii, aii, riaduxhnu guedxrore, naii gojtni ladsacduxh, guiraa ladlin, ladmuraad, ladxniaa, gusucheeni con oor, con guisa'c, con perl, ¹⁷ tera'tbäztis baralii recosro ni najc xhixtenni, guxhijñreni.

Guiraa recapitan xte barcw, näjza guiraa remarineer, näjza rebejn ni rij biaj lo rebarcw näjza guiraa reni rujn dzuun lo nisdoo, gusujreni zijt, ¹⁸ näjza laareni cahuiireni cayäjs gujxh guejdxga, cabexda'reni, caniireni:

—¿Xhi stee guejdx najc si'c najc guedxrore, ä?

¹⁹ Bachajreni yuyol yejçreni sa'csi rac-huin lajzreni, binduxhreni, guredxa'reni:

—¡Aii! ¡Aii! Riaduxhnu guedxro sa'csi xcuenttis guedxduxhre gujç ri'cwduxh guiraa rebejn ni rajp barcw ni rujn dzuun loj nisdoo. Luxh naj tera'tbäzsi aguxhijñ guedxrore.

²⁰ Guniiza xse' ni yu' xhaguibaa, najni:

—La'tu ni yu' xhaguibaa, la'tu rexpejn Dios, reapost xtenni, rebejn ni gunii xtidx Dios galoo, colbalasduxh sa'csi abiajb guedxrore, abejn Dios yälguxhtis xcuent ni bejnni lojtu.

²¹ Dxejcti te xangl Dios ni rajp yälrnibee, guläs te guiro ni najc si'c te guij ni ro't dojb, bacuaanini loj nisdoo, dxejc najni:

—Screeza gac guedxro ni laa Babilonia siajbni lo trabajwduxh, sinitlojni par tejpas, dirutu fii lojni. ²² Diru guibi' jiejn cayel nez xladcaiilu reharp, reflaut, retrompe't; diru guibi' chu tej ni gun xhitis dzuun; diruza guibi' chubej molin ni cayo't. ²³ Diru guibi' jieñ xcälrdimbicha' te bajl ni cagusanij; diruza guibi' jiejn xse' bi'n näj dxa'p loj te sa' sa'csi rexpejnlu ni ruto' gujcreni benroduxh lo guedxliuj sa'csi basguezalu reben guedxliuj xcuent rextzundxablu.

²⁴ Neñ guejdxga bidxäjlza xtiejn renani gunii xtidx Dios, näjza xtiejn rexpejn Dios, näjza xtiejn guiraa reben guedxliuj ni bagu'treni.

19

¹ Che gulujx recosre, biejn diagä lascanu xse' xhidaltro bejn ni canii xhaguibaa, cayäjpreni:

¡Colguiliä'p xpala'n Dios!

Xtentis Dios, xtenni najc yälrusläa lo dojl, näj yälrdimbicha', näj yälmilagwr.

² Sa'csi xcälgujxhtisni najc ganax laaca,

huentis najcni, sa'csi abejnni yälgujxhtis gunadxabga nani caguxhiñ reben guedxliuj xcuent xcälñadxabni.

Abejn Dios yälgujxhtisni,

agudijxhni xcuent xtiejn rexpejn Dios ni baxhe' gunadxabga, che bagu'tnireni.

³ Guibi' guniizareni:

—¡Colguiliä'p xpala'n Dios! Gujxh xten gunadxabga sanuutis cayä'p par tejpas.

⁴ Guiraa regalbitajp rebenool näjza guidap remanbajnga bazuxhibreni, biabrljreni gojnreni Dios ni rbej lo tron cadro rnibeeni, caniireni:

—Sugacni si'c. ¡Colguiliä'p Xpala'n Dios!

⁵ Dxejcti nez lo tron cadro rnibee Dios biejn xse' tej ni canii:

Colgudeed xquixtios lo Dios,

guira'tu ni rujn xtzuum Dios,

guira'tu ni rajntu Dios, rebenro sigajc rebenñadolajz.

Sa' xten Xiil xten Dios

⁶ Dxejcti biejn diagä ascanu xse' xhidalduxh bejn, riejnni si'c che cayäjt nisro xhidajl gueu, näjza si'c che caguixaduxh guzii, caniireni:

¡Colguiliä'p xpala'n Dios!

Sa'csi Gueb Dios, Dad xtennu ni rajp guiralii yälrnibee, ani acanibee.

⁷ Guibalajznu, guibalazduxhnu, guiliä'pnu xpala'nni sa'csi abidzujñ dxej guchnaa Xiil xten Dios, aguzucheeza dxa'p.

⁸ Abadeedreni ladlin ni najc nuiduxh gacwni.

Ladnolni, luxh rdimbicha'ni sa'csi nayadujni.

Ladnayare säloj redzunsac ni bejn rexpejn Dios.

⁹ Najza anglga löä:

—Bacuaa diidxre: “Chicbaa renani bidon jiaäd lo xsa' Xiil xten Dios.”

Guniizani löä, najni:

—Rediidxre najc didx-guliipac xten Dios.

¹⁰ Dxejcti bazuxhibä lojni te ganäni, dxejc laani najni löä:

—Na'c gunlu si'c, sa'csi narä nacä sigajc najclu, nacä te ni rujn xtzuum Dios, näjza bejtzlu ni rusule' xtidx Jesucrist. Bazuxhijb lo Diostis sa'csi Dios rudeed gusule' bejn xcuent Jesucrist, gusule'zareni xtidx Dios.

Nani bijb te cabainol

¹¹ Dxejcti bahuiä bixal xhaguibaa, biricaj te cabainol. Luxh laj nani rbijbni säloj casobsa'cpacni diidx, rniizani ganax didxgului. Entis laaca rujnni yälguxhtis, entis laaca rucuaani che rujnni guer. ¹² Rebalojni rbebajl, yejcti yu' xhidalduxh coron, luxh caj te laj lojni nani rutliidi rachee, luxh laatisni racheeni xhi sälojni. ¹³ Najcwni te lajd ni nadiini rejn; lajni najcza Xtidx Dios. ¹⁴ Guiraa resoldaad guibaa xten Dios siädnajni najcwreni ladnol, ladnaya, bijbzareni cabainol. ¹⁵ Ro'ni carii te spaad ni caduxh guiro'p laad ro'ni te ni'c tilnäjni guiralii reguejdx lo guedxliuj, te guinibeeni guiraa reben guedxliuj ca'ni si'c te barguüb. Sujnzani yälguxhtis loj reni rdexchlajz lo Dios, si'c ruläjreni yec uub che rbääreni bin, si'c sujnza Dios ni rajp guiralii yälrnibee. ¹⁶ Lo xhajbni näjza cuä' cujdni caj lajni: “Reii xten rereii, Dad xten redad.”

¹⁷ Bahuiä loj te angl suga'ni galäii gubijdx, cabedxa'ni caniini loj guiraa reman ni rutajt xhaguibaa, räjpni:

—Coltaa, colguire' ree, te gautu xcheroduxh xten Dios; ¹⁸ te gautu xpääl rereii, näjza xpääl recapitän, näjza xpääl rebenro, näjza xpääl recabaii, näjza xpääl renani rbijb recabaii, näjza xpääl guiraasi bejn, bejn ni rdo' si'c rdo' guidxaa sigajc rebejn ni di gun xtzuum bejn, rebenbäz sigajc rebenro.

¹⁹ Dxejcti bahuiä loj manro näjza loj rereii guedxliuj, abire'reni te gucuanäjreni nani rbijb cabainol näjza guiraa resoldaad xtenni. ²⁰ Biga' manroga näjza profetxhii ni bejn senro nez loj manroga te basgueni guiraa renani cua' seen xten manroga, näjza renani bazuxhijb lo banäjb xten manroga. Guiro'p redee bacuaareni guideb nabajñreni neñ te bal guiboduxh ni recnäj sufr. ²¹ Dxejc guiraa reni bia'n bagu't spaad ni birii ro' ni bijb cabainol. Guiraa reman xhaguibaa gudajw xpäälreni.

20

Te mil ijz

¹ Dxejcti bahuiä loj te xangl Dios ni siädjäjt xhaguibaa, siädnäni läii ni ruxhal guedro ni laa gabijl. Ca'zani te cadenro. ² Anglre gunaaz gutiatzroga, ni gujc bäl galooli, ni najcza bendxab, ni laaza Satanás. Bacuaduunini te mil ijz. ³ Basälñini neñ gabijl, te ro'c basäunini, bacuaani läii te na'cru gusgueni reben guedxliuj la' ni guiza' te mil ijz. Che guiza' reijzga, empac sibi' lasacni bale'si dxej.

⁴ Dxejc bahuiä retron cadro rbejreni rnibeereni, bahuiäza loj renani rbej lo retron, cua'reni yälrnibee te gunreni yälguxhtis. Dxejcti bahuiä xaim rebejn nani biru' yejcti sa'csi huililajzreni xtidx Jesucrist näjza sa'csi basule'reni xtidx Dios. Direni nuzuxhijb loj gutiatz niclaza lo banäjb ni najc si'c manroga, dizareni nica' seen lo cuajreni nicla lo ñaareni. Gubansacreni loj rebenгут, gurenäjreni Jesucrist te laani gunibenäjreni te mil ijz. ⁵ Dee najc yälrbañsac galoo lo rebengut. Niluxh stecuaa rebengut, direni guibañsac che guisa'li te mil ijz. ⁶ Chicbaa rebejn nani guibañsac ganiddoo, najcreni bendxan ni agubicaj xtojñreni. Ni rojp yälgujt di guidzujñ lojreni. Laareni sajcreni pxixhojz Dios näjza Jesucrist, sibenäjreni Jesucrist, sinibenäjreni Jesucrist te mil ijz.

⁷ Che guiza' te miĵ ijzga, suslasacni Satanás nen gabijl. ⁸ Che guiriini ro'c, gusgueeni guiraa reguejdx ni tre' lo guidap laad guedxliujre. Susgueeni reben Gog nájza reben Magog te gutie'nireni te gunreni guer. Xhidalduxh gacreni, pet si'cti yujxh ni tre' ro' nisdoo. ⁹ Huá'preni lo te camp cadro gulagduxh. Gudájyreni guideb gabig cadro rnibee rexpejn Dios nen guejdx nani sanálajz Dios. Per baxhaĵ Dios bal guiboo xhaguibaali bitejbni, te guyejc guiragajcreni. ¹⁰ Dxejc bacuaareni bendxab nani biädgusguee rebejn lo bal guiboo ni cayecnáj sufr; lagajc cadro yu' manro, nájza profetxhii nani basguae; lo bal guibooga susacsirenini sidejdreni trabawduxh dxej-yääl par tejpas.

Yälguxhtis ni gujc nez loj tronronol

¹¹ Dxejcti bahuiä lo te tronronol nájza lo nani sobga' lojni te rujnni yälguxhtis. Nez lojni gunitlojli guedxliuj nájza guibaa, xhetru lajtdi bidxäjl par laareni. ¹² Bahuiä lo rebengut, beņro sigajc beņnadolajz, tre'reni nez lo Dios. Bixal rexquijtz Dios, dxejcti bixalza stee xquijtz Dios ni najc guijtz xten xcäl'nabannáj Dios par tejpas. Dxejcti bejnni yälguxhtis rebengut xcuent ni bejnreni, xcuenta rediidx nani caj loj reguijtzga. ¹³ Guiranejz biääd rebengut: nisdoo batzuug rebengut ni yu' lojni, gabijl nájza yälgujt batzuugza rebengut ni yu' lojreni. Dxejcti bejn Dios yälguxhtis tejpgareni xcuent ni bejnreni. ¹⁴ Dxejcti bacuaani yälgujt nájza gabijl lo bal guiboo ni najc si'c te nisdoo te ro'c checreni par tejpas. Dee najc yälgujt ni rojp. ¹⁵ Guiraa bejn ni di lajni nidxäjl lo xlibr yäl'nabajn bacuaazani reni'c lo bajlga.

21

Xhaguibacoob nájza guedxliucoob

¹ Dxejcti bahuiä te xhaguibacoob nájza te guedxliucoob, sa'csi agunitloj guibabiejw, nájza guedxliubiejw, luxh xhettirua nisdoo. ² Narä Juan, bahuiä lo guedx Jerusaléncoob, guedxdxan, siädjiäjtne xhaguibaali cadro rnibee Dios. Sucheduxhni si'c rsiuchee te dxa'p nani agojl guchnaa. ³ Dxejcti biejn diagä te xse' te ni canii dipduxh, ascanu lo tron cadro rnibee Diosli carii se'ga, scree caniiini:

—Colhuii, aguzuj xquidoo Dios galäii rebejn, anabannáj Dios rebejn, sajczareni rexpejn. Sibannáj lagajc Gueb Diosreni. ⁴ Sutia Dios guiraa nisbee balojreni te na'cru goonreni. Sinitloj yälgujt, xhetru xliajsdi chu, diru bejn goon, dirureni jiajn, sa'csi guiraa redee ni guyu' galoo agunitloj.

⁵ Dxejcti ni sobga' lo tron cadro rnibeeni guniini, najni loä:

—Bahuii, najrä guscobä guira'ti.

Guniizani loä:

—Bacuaa rediidxre, sa'csi guliipacreni, sajc chalilajz bejn rediidxre.

⁶ Dxejcti najzani loä:

—Agujcni. Narä nacä A nájza Z, ni säloj nani rbaxtej nájza nani ruluux. Lo chutis ni cayojl, sudedxlia'ä nis yäni, nalajznu yäl'nabajn par tejpas. ⁷ Chutis nani gun gaan lo dojl, sica'zani guiraa dee si'c yäl'nasa'c, luxh narä sacä Xtiosni, laani sacni xi'nä. ⁸ Niluxh renani rdxejb, renani di chalilajz xtidxä, reni rdxe'ch loä, reni rugu't sa'reni, reni runnáj gunaa dojl, renani najc bidxaa, renani rusuxhijb lo banäjb, guiraa renani rusguee rniireni didxxhii, guiragajc reni'c sij lo nisdoo ni najc ganax bal guiboo, cadro rejc guiboo nájza sufr par tejpas. Dee ni najc yälgujt ni rojp.

Guejdx Jerusaléncoob

⁹ Dxejcti lo guigajdz xangl Dios ni ca' guigajdz xhijg ni guidxa guigajdz reyälguختis xten Dios, birii tejni, najni loä:

—Gudaa, te guluiä lojlu dxa'p nani guchnaa Xiil xten Dios.

¹⁰ Dxejcti bejnii gunixcalä, huinäni narä lo te danro ni jiaduxh, ro'c baluiini loä te guedxro, te guedxdxan ni laa Jerusalén, luxh xhaguibaali siädjijätni nez lo Dios. ¹¹ Guejdxga rdimbicha' guideb xcälrdimbicha' Dios. Luxh yälrdimbicha'ga najc si'c najc te guisacduxh ni laa jaspe, rdimbicha'zani si'c biidr. ¹² Guideb gabi guejdxga dejd te paderro cadro caj tzubitio'p xportonroni. Te angl xten Dios suga' ro' tejsa portonga. Loj tejsa portonga, caj laj tej retzubitio'p cuaa xten rexpejn Israel. ¹³ Chon portonga caj nez cadro rliejn gubijdx, yu'za chon portonga nez ladbee, yu'za chon portonga nez ladbäw, yu'za chon portonga cadro räaz gubijdx. ¹⁴ Yu' tzubitio'p guiro lo cimient xten guejdxga. Lo tejsa reguijga caj laj tej retzubitio'p apost xten Xiil xten Dios.

¹⁵ Angl ni caninäy narä ca' si'c te biquii ni najc ganaxduj oor te gurejxhni guejdxga, näj reportonga, näjza padeerga. ¹⁶ Guejdxga najc cuadraad: sigajc ni sioolni, sigajcza ni gulajgni. Dxejcti cua'ni biquii barejxni guejdxga, barejxni tio'p mil' tio'p gayuu kilometros tejsa laad. Sigajc sioolni, sigajcza gulajgni, sigajcza jiaani. ¹⁷ Dxejcti barejxni padeerga, yu'ni gayonbitajp metr segun mediid xten bejn, sa'csi ni'c najc ni cagutiexhnäzga anglga.

¹⁸ Padeerga naccheeni guij ni laa jaspe. Guejdxga najc ganaxduj orsa'c, rdimbicha'ni si'c guihuajn. ¹⁹ Recimient xten padeerga nac-chee guisa'c. Guiganid najc guijaspe; ni rojpga najc zafiro; ni riojnga najc ágata; ni rdajpga najc esmeralda; ²⁰ ni rgaüga najc onix; ni rxho'pga najc cornalina; ni rgajdzga najc crisólitó; ni rxhujnga najc berilo; ni rgaaga najc topacio; ni rtzuuga najc crisopraso; ni rtzubiteebga najc jacinto; ni rdzubitio'pga najc amatista. ²¹ Guitzubitio'p portonga najc tzubitio'p perl. Tejsa portonga guc-chee tej perl. Nezyuro ni rdeed galäii guejdxga najc ganaxduj oor, rienni si'c te guihuajn.

²² Dina nuhiä nicla tej guidoo nen guejdxga, sa'csi suga' Gueb Dios ni rajp guiralii yälrnibeduxh, näjza Xiil xten Dios. Laani najc xquidoo guejdxga. ²³ Guejdxga dini guiquiin gusanij nicla gubijdx niclaza bäii, sa'csi lagajc xcälrdimbicha' Dios näjza Xiil xten Dios ruzanij ro'c. ²⁴ Rebejn guedxliuj ni rililajz xtidx Dios sajc sareni lo bianijga, luxh rereii ni siääd lo guedxliujre siädnäzareni xcälrnibeereni, näj xpala'nreni ro'c. ²⁵ Di ro' reportanga jäüu rdxej, luxh ro'c xhettiza yääl. ²⁶ Ro'c chanäzareni yäl'nasa'c näj xpala'n reguejdxro ni yu' lo guedxliuj. ²⁷ Niluxh di gacdipac jiu' nicla tej cosguijdx ro'c, niclaza te bejn ni rujn cosguijdx näj yäl'rusguee. Ro'c siu' ganaxduj renani caj lajni lo libr xten yäl'nabajn par tejpas nani ca' Xiil xten Dios.

22

¹ Dxejc baluii anglga te gueuro loä, cadro yu' nisya xten yäl'nabajn. Rdimbicha'ni si'c te guihuajn, luxh cariini lo tron cadro rnibee Dios näjza Xiil xten Dios, ² rdejdnii loj nezyuro ni rdejdnii galäii guejdxga. Guiro'p laad gueuga sojb reyajg xten yäl'nabajn, lojreni rcaj tzubitio'p cuaa ninejxh nen tebjiz, tejsa cuaa ni tejsa bäii; luxh rebalajg ni rcaj lo reyajgga najc te gusajcni reben guedxliuj. ³ Dxejcti ro'c xhettiru yälrdzubde, sa'csi ro'c yu' tron cadro rnibee Dios näjza Xiil xten Dios, ruzuxhijbza rexpejnii, rajnreni laareni. ⁴ Suhuiireni lojpacni si'cpac ni najcni, sicajza laj Dios lo cuajreni. ⁵ Ro'c diru yääl chu.

Luxh reni rbäjz ro'c di guiquiin nicla bajl, niclaza xhanij xten gubijdx, sa'csi Gueb Dios susanij lojreni. Luxh sinibenäjrenini par tejpas.

Siäddzungajxh dxej ni guibisac Jesucrist

⁶ Dxej naj anglga loä:

—Guliipac najc rediidxga, sajpcac chalilajzlureni. Dad Dios lagajc nani basniib lastoo rebejn ni gunii xtüdxni agujc xchero, lagajc laani baxhalni xanglani te baluilojni loj rexpejni guira'ti nani agojl gac.

⁷ —Sajngalu gan, siojb jiälä. ¡Chicbaa nani riu rediidx ni caj lo librrre!

⁸ Luxh narä, Juan, biejn diagä rediidxre, bahuiäza recosre. Luxh che bahuiä, che biejn diagä bazuxhibä te ganä xangl Dios nani baluii loä guiraa redee. ⁹ Luxh laani najni loä:

—Na'c gunlu si'c, sa'csi narä runä xtuunni sigajc rujnluni, sigajc rujn rebejn ni gunii xtidx Dios agujc xchero, sigajc rujn rebejn ni rusoob rediidx ni caj lo librrre. Bazuxhibj loj Diostis.

¹⁰ Dxej najni loä:

—Na'c gusaüulu guijtz cadre caj rediidxre xcuent nani churu gac, sa'csi asiäddzungajxh redxej ni chale'reni. ¹¹ Luxh laj ni guidzujn dxejga, basaan suchanuu gun dojl renani cayungajc dojl, basaan suchanuu gun dzunguidx renani cayungajc dzunguidx. Per renani cayujn dzunsa'c, chanuu gunreni dzunsa'c, nani najcza beñnaya, si'cza chanuu gacni beñnaya.

¹² Gunajtiro:

—Siojb jiälä, luxh siändnä xhi gunidxä loj tejgatu si'c ni riälj xca'tu xcuent dzuun ni bejntu. ¹³ Narä Jesucrist nacä si'c najcza A näjza Z, ni säloj nani rbäxtiej näjza nani ruluux.

¹⁴ 'Chicbaa renani riu xtidx Dios, najcreni si'c ni rguuib xhajnreni te saj jiu'reni nez porton xten guejdxga, sajcza gauni ninejxh ni caj lo yajg xten yälñabajn par tejpas. ¹⁵ Per dejtz guejdxga chajia'n reni najc si'c bä'cw, nalajznu rebidxaa, renani rusguee chälbejn, renani rugu't sa'reni, renani ruzuxhibj lo rebanäj, näjza ni rchaglajz rni didx-xhii te gusgueeni.

¹⁶ 'Narä Jesucrist, abaxhalä xanglä lojlu te gusule'ni lojtu diidx xcuent guiraa redee, te gusule'zalu rextidxä neñ reguidoo loj rexpenä. Narä nacä te xajg to'reii David, nacäza si'c balxhaguibaa nani rdimbidxa' cäjysi che gajd jianij lo guedxliuj.

¹⁷ Sprit Dxan xten Dios näjza chääl Xiil canii, najreni:

—Coltaa.

Suguiniiza nani riejn diajgreni diidxre, gäbreni:

—Coltaa.

Sujiädza chutis ni cayojl, sujiädyaäxlia'ni nis yälñabajn par tejpas.

¹⁸ Sa'csi narä rñiliä'ppac lojtu, guiraatu ni riejn diajgtu rediidx ni caj lo guijtzre xcuent recos ni churu gac, palga yu' chu tejtü gutajlru diidx ni caj lo guijtzre, suteedru Dios bejnga replaag yejcnij loj ni caj lo guijtzre. ¹⁹ Palga yu' chu gudzucaj loj rediidx ni caj lo guijtzre, sudzucajza Dios nani nica'ni lo yajg xten yälñabajn par tejpas, näjza lo guedx Dxan, ni caj xcuentreni lo guijtzre.

²⁰ Nani cagusule' diidx xcuent guiraa redee guiniini, najni:

—Guliipacni siojb jiälä.

Sugacni si'c. Gudaa Dad Jesucrist.

²¹ Sujiädäc xäl'racnäj Dad Jesucrist lo guiraatu. Sugacni si'c.